


Didza' cubi rucá'ana
tsahui



New Testament in Zapotec, Rincón (MX:zar:Zapotec, Rincón)

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
 Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25

Contents

San Mateo	1
San Marcos	85
San Lucas	136
San Juan	221
Hechos	284
Romanos	365
1 Corintios	399
2 Corintios	432
Gálatas	452
Efesios	464
Filipenses	476
Colosenses	484
1 Tesalonicenses	492
2 Tesalonicenses	499
1 Timoteo	503
2 Timoteo	513
Tito	520
Filemón	524
Hebreos	526
Santiago	551
1 Pedro	560
2 Pedro	569
1 Juan	575
2 Juan	583
3 Juan	585
Judas	587
Apocalipsis	590

DIDZA' DXI'A BUZÚAJË' MATEO

*Yugu' xuz xinë'e gudödi queë' Jesús
(Lc. 3:23-38)*

¹ Ni ruzúaja' lágaquië' xuz xinë'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' böchë'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xinë'ë.

Booz gúquië' xuzë' Obed, ate' Rut gúcanu xinë'ë.

Obed gúquië' xuzë' Isaí.

⁶ Isaí gúquië' xuzë' David.

David na' gunná bé'enë' bönachi Israel, ate' butsaga ná'alënë'-nu nigula na' gúcanu zí'alö nigula queë' Urías, ate' David, en nigula ni guláquië' xuz xinë'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' böchë'ë.

Yugu' bönni' ni gula'cu'ë dza ni' cate' yugu' bönni' Babilonia gula'chë'ë bönachi Israel nadzúngaca lu xiyúgaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

14 Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

15 Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

16 Jacob gúquië' xuzë' José.

José ni gúquië' bönni' queënu María, ate' María ni gúcanu xinë' Jesús, lë' ca' Cristo, Bönni' na' tun löza bönachi judío guídë' idinná bé'enë' légaquië'.

17 Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'chë'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'chë'ë léguequi ga bidxintë dza guljë' Cristo.

Yugu' le guca cate' guljë' Jesucristo

(Lc. 2:1-7)

18 Caní guca cate' guljë' Jesucristo. Cate' ni' chinazí' lu ná'abi' María, xinë' Jesús utsaga ná'aleni' José, en zí'atëlö cate' si' utsaga ná'aleni'-bi', en cabí ne sóaleni'-bi', guyú'ubi' tubi' bí'ido' lë'ëbi' María na'. Guca caní ni'a que yöl-la' huáca queë' Dios Bö' Lá'ayi.

19 Náquië' José na', bönni' queëbi' María, bönni' tsahui', pero bití' gú'unnë' uzéguië'-bi' didza' lógaca bönachi. Gú'unnë' ulá'aleni'-bi' bagáchi'sö.

20 Tsanni ni' rizá' ládxe'ë José ca na' gunë', buluf'i lahuë' gubáz lá'ayi queë' Xanru' lahuë' José lu yëla béchigal, en gudxe' lë':

—José, xzí'ini xzi'söë' David. Bití' gádxinu' si'u-bi' María, para gácabi' nigula quiu', tu' yú'ubi' bi'i bönni'do' lë'ëbi' ni'a que yöl-la' huáca queë' Dios Bö' Lá'ayi.

21 Gáljabi' tubi' bi'i bönni'do' queëbi', ate' gu'u labi' Jesús, tu' usölábi' bönachi queëbi' lu dul-la' nabága'gaca.

22 Caní guca yúgu'të lë ni para gaca lë na' gunnë' Xanru' lu ru'ë bönni' bë'ë didza' uláz queë' Dios, gunnë':

23 Buli'yútsöca', tu nigula ra'bando',

tsú'ubi' bí'ido' lë'ëbi',

ate' gáljabi' tubi' bi'i bönni'do',

ate' ilu'ë labi' Emanuel.

Emanuel naca tu didza' hebreo le rnna: Len rë'u Dios.

24 Cate' bubanë' José lu yëla béchigal, benë' ca na' gudxe' gubáz lá'ayi queë' Xanru' lë', ate' guzxi'ë-bi' María, ate' gúcabi' nigula queë'.

25 Biti' guzóalenë'-bi' cate' bidxinrö dza chigúlajbi' bi'i bönni'do' queëbi', bi'i zí'alö queëbi', ate' gulu'ë labi' Jesús.

2

Bönni' ta'yéajni'inë' ridiyúgaquië' bí'ido' Jesús

1 Cate' gúljabí' Jesús lu yödzo Belén, luyú Judea, rinná bë'ë Herodes luyú ni', ate' bila'dxinë' bönni' ta'yéajni'inë' Jerusalén, narúajgaquië' tu yödzo dë saca' ga rilén gubidza.

2 Gula'nabë' bönni' ni, ta'nnë':

—¿Gazxi zóabi' bí'ido' na' ral-la' inná bé'ebi' bönachi judío, bí'ido' na' si' gúljabí'? Cate' ni' zóatu' ga rilén gubidza bilé'etu'-ba' bölaj bení' naca bë' chigúlajbi', ate' za'tu' ni para tseaj ládxi'tu'-bi'.

3 Cate' gúquibe'enë' Herodes, bönni' rinná bë'ë, lë ni, gur'ödë' böniga, en lësca' caní gula'b'ö' böniga yúgu'të bönachi nacua' Jerusalén.

4 Ní'irö Herodes na' bulidzë' yúgu'të bixúz unná bë', len bönni' yudo' tu'sédinë', ate' gunábinë' légaquië' gazxi ral-la' galjé' Cristo, bönni' na' tunë' löza bönni' judío ilá' lahuë' para inná bé'enë' légaquië'.

5 Të' lë':

—Lu yödzo Belén luyú Judea. Caní naca tu' buzúajë' tu bönni' bë'ë didza' uláz queë' Dios le rnna caní:

6 Biti' nácarö cá'asö yödzo Belén luyú Judá lahuë' Dios ca nacagaca yödzo gapa nacua' nupa ta'nná bë' luyú ni, tu' irúajë' tu bönni' yödzo Belén, en gáquië' lo, bönni' na' gun chi'ë bönachi Israel quia'.

7 Ní'irö Herodes bulidzë' bagáchi'sö bönni' ta'yéajni'inë' na', en gunábinë' légaquië' para inözinë' dxi'a gáca'xte chiguca bulu'i lahui bölaj na' bila'lé'enë'.

8 Ní'irö gusöl-lë'ë légaquië' tsöjáquië' Belén. Rë' légaquië':

—Guli'tséaj ni', en guli'tsöjnaba dxi'a nacxi naca queëbi' bí'ido' na'. Cate' chibidzölili'-bi', ididíxjö'i'ili' neda', para tseja' ca' neda', tseaj ládxa'a-bi'.

9 Gudödi bila'yönnë' didza' bë'ë Herodes na', söjáquië' bönni' ta'yéajni'inë' na', ate' bölaj na' bila'lé'enë' cate' ni' nacu'ë ládzagaquië' söjnöruba' lógaquië' ga bidxintë yöjsóa ga na' dëbi' bí'ido' na'.

10 Cate' bila'lé'enë' bölaj na', bulu'dzëjade'enë'.

11 Cate' gula'yázië' yu'u, bila'lé'enë'-bi' bi'i bönni'do' na', zóalenbi'-nu María, xiná'abi'. Bulu'zóa zxíbigaquië' lobi', en gula'yéaj ládxi'gaquië'-bi'. Gudödi na' gula'saljé' yugu' yöxaj quégaquië', ate' bulu'nödzejë' queëbi' oro, en yalaj, en nörido' rilá' zxixi que yaga mirra.

12 Tu' chibuzéajni'inē' Dios légaquiē' lu yēla bēchigal para cabí tsōjhuōjquiē' ga zoē' Herodes na', que lē ni na' yōjhuōjquiē' lādzaqaquiē' nōza yúbölö.

José, en María, ta'chě'ë-bi' Jesús luyú Egipto

13 Gudödi bulu'zě'ë yugu' bönni' ta'yéajni'inē' ni', buluí'i lahuē' tuē' gubáz lá'ayi queē' Xanru' lu yēla bēchigal, ga na' dē' José, en rē' lē':

—Guyaschi. Guchě'-bi' bí'ido' ni, enca' xiná'abi', ate' buzx-unnaj ni. Guyéaj luyú Egipto, ate' ugá'anu' ni' cate' guiēra' li' ia'tú. Caní gunu' tu' uguiljē' Herodes bí'ido' ni para gútiē'-bi'.

14 Ní'irö guyasē' José, en ni' naca chi'i dzō'ölö, guchě'ë-bi' bí'ido' na', enca' xiná'abi', ate' yōjáquiē' luyú Egipto.

15 Bulu'gá'anē' ni' cate' gútirē' Herodes. Caní guca para gaca lē na' gunnē' Xanru' Dios lu ru'ë tu bönni' bē'ë didza' uláz queē', gunnē': "Ga naca luyú Egipto bulidza' Zxí'ina'."

Risöl-lē'ë Herodes bönni' ilútiē'-bi' bi'i huē'ënido' nacuá'abi' yödzo Belén

16 Cate' gúquibe'enē' Herodes biti' gulunē' bönni' ta'yéajni'inē' ca rnnē', gulénē', ate' gunná bé'enē' bönni' tsōjáquiē' ni' para ilútiē'-bi' yúgu'tēbi' bi'i bönni'do' nacuá'abi' yödzo Belén, en idú gásibi'ilö ga dē Belén na', yugu' bí'ido' chiyú'ugacabi' chopá iz, en bí'ido' nahuē'ë'nigacaröbi'. Caní benē' ca busáquiē' queē' Herodes na', tsca chiguca dza buluí'i lahui böläj na', dza na' bulu'zéajni'inē' bönni' ta'yéajni'inē' na' lē'.

17 Caní guca, bidxín lē na' gunnē' Jeremías, bönni' bē'ë didza' uláz queē' Dios, gunnē':

18 Lu yödzo Ramá riyön chí'igaca nupa ta'bödxi, en nupa ta'bödxi yechi'.

Raquel ribödxi nu ni'a quégacabi' zxi'ininu.

Biti' gaca nu huē tsahui' lēnu, tu' chinátigacabi'.

19 Gudödi gútiē' Herodes na', ní'irö buluí'i lahuē' gubáz lá'ayi na' queē' Xanru' lu yēla bēchigal lahuē' José ga ni' zoē' luyú Egipto, ate' rē' lē':

20 —Guyasa. Guchě'-bi' bi'i bönni'do' ni, enca' xiná'abi', ate' böaj luyú Israel, tu' chigulátiē' bönni' ni' gulě'ënnē' ilútiē'-bi' bi'i bönni'do' ni.

21 Ní'irö guyasē' José, ate' guchě'ë-bi' bi'i bönni'do' na', enca' xiná'abi', ate' yōhuōjquiē' luyú Israel.

22 Cate' gúquibe'enē' José rinná bē'ë Arquelao luyú Judea tu' chigútiē' Herodes, xuzē' Arquelao na', que lē ni na' gúdxinē' José huōjē' ni'. Cate' buzéajni'inē' Dios lē' lu yēla bēchigal, guyijē' luyú Galilea.

²³ Cate' bidxinë' ni', yöjsöë' lu yödzö Nazaret. Caní guca para gaca lë na' gula'nnë' yugu' bönni' gulu'ë didza' uláz queë' Dios ca ral-la' gaca queë' Jesús, si' Lë', Bönni' Nazaret.

3

Juan, bönni' ruquilë' bönachi nisa runë' libán lu lataj cá'asö
(Mr. 1:1-8; Lc. 3:1-9, 15-17; Jn. 1:19-28)

¹ Yugu' lu dza ni' buluí'i lahuë' Juan, bönni' na' buquilë' bönachi nisa, en runë' libán lu lataj cá'asö luyú Judea.

² Juan na' rnnë':

—Buli'bí'i ládxi'li', tu' chizóa idxín dza idinná bë' Nu na' zoa yehua' yubá luyú ni.

³ Ca naca queë' Juan na', buzúajë' Isaías, bönni' bë'ë didza' uláz queë' Dios dza ni'të, le rnna caní:

Riyön chi'ë bönni' rulidzë' lu lataj cá'asö, rnnë':

“Buli'pá'a nöza para idxín Xanru' ga zóali'.

Guli'béaj li yugu' nöza lasi tödë' lu icja ládxi'do'oli'.”

⁴ Nácuë' zxë' Juan lari' néquini lítsa'ba' böa', ate' núguë'ë lë'ë le néquini guídi. Rahuë'-ba' böchi'zu, en re'jë' bidxindo' que buzdo'.

⁵ Yugu' bönni' yödz Jerusalén len bönachi narúajgaca idú luyú Judea, en idú gásibi'ilö ga dë yegu Jordán bila'dxinë' ga zoë' Juan na'.

⁶ Cate' gula'xóalëpë' dul-la' nabága'gaquië', Juan na' buquilë' légaquië' nisa lu yegu Jordán na'.

⁷ Cate' bilé'enë' Juan ta'dxinë' zían bönni' yudo' fariseo len yugu' bönni' yudo' saduceo ga zoë' para ila'dilë' nisa, gudxë' légaquië':

—Libi'ili', di'a dza quégacaba' bëla sína'. ¿Zoa nu buzéajni'i libi'ili' para izxúnnajli' yöl-la' rusiúdxí na' si' gaca quégaca bönachi?

⁸ Guli'gún le gaca bë' chibubí'i ládxi'li'.

⁹ Biti' cuéqui ícjali', biti' innali' nácali' tsahui' tu' naca Abraham xuz gudödi queëli'. Rea' libi'ili', huáca gunë' Dios ga ulu'huóaca yugu' guiöj nacua' ni di'a dza queë' Abraham.

¹⁰ Chizóa riböza guíë huága para ichugu yugu' yaga le ruluí'i ca gaca queëli'. Yúgu'të yaga biti' ta'bía le naca dxi'a, irúgugaca, ate' ila'gu'ë léguequi lu guí'.

¹¹ Le nácatë neda' ruquila' libi'ili' nisa lu nisa, núlöli' chibubí'i ládxi'li', pero Bönni' na' ral-la' guidë' cate' tödi quia' neda', Lë' gunë' le ruluí'isö yöl-la' ridila nisa ni, uchízië' libi'ili' Dios Bö' Lá'ayi len guí' queë'. Bönni' ni nácatëre' lo ca neda', ate' neda' biti' naca' lesaca' ilecja' xiráchuë' nudë'ë.

¹² Zönë' lu në'ë böcö' queë', le ulúbinë' ga ridxi'a zxoá' xtila queë'. Cu'ë zxoá' xtila queë' lu yu'u ga ni' gun chi'ë le, pero uzégu'ë bëbu que lu guí', ate' guí' na' biti' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzë'ë Jesús luyú Galilea, ate' bidxinë' ra' yegu Jordán ga na' zoë' Juan, para idilë' nisa lu në'ë Juan na'.

¹⁴ Juan buzáguë'ë xinözë', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

¹⁵ Bubi'ë didza' Jesús, rë' lë':

—Benna lataj na'a, tu' caní ral-la' gunru' idütë le naca tsahui'.

Ní'irö Juan bë'ë Lë' lataj.

¹⁶ Cate' chinadilë' Jesús nisa, la' burúajtë' lu nisa. Ní'irö gualaj lúzxiba lahuë' Jesús, ate' bilé'enë' ruhuötjë' Dios Bö Lá'ayi, en bidxinë' ga na' zoë', rinë'ë ca riná'aba' gu'dödo'.

¹⁷ Ní'irö biyön chi'i nu ruí' didza' yehua' yubá, rnna:

—Bönni' ni náquië' Zxí'ina'. Nadxí'ida' Lë', en raza ládxa'a Lë'.

4

Rë'ëni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

¹ Ní'irö la' guchë'të' Dios Bö Lá'ayi Jesús lu lataj cá'asö para gata' lataj si' bë' Satanás tu' xihui' Lë'.

² Idú choá' dza choá' yëla biti' bi gudahuë' Jesús, ate' gudödi ni' ridunë'.

³ Ní'irö tu' xihui', nu na' run ga tá'baga' bönachi dul-la', bidxín ga zoë' Jesús, en rë Lë':

—Channö nacu' idú Zxí'inë' Dios, gunná na'a ulu'huóaca guiój nacuá' ni yöta xtila.

⁴ Bubi'ë didza' Jesús, rë' le:

—Nazúaj lu guichi lá'ayi le rnna: “Calëgasö yöta xtila nabánigaca bönachi, pero lësca' yúgu'të didza' ru'ë Dios nabánigaca bönachi.”

⁵ Ní'irö tu' xihui' guchë' Jesús lu yödzö lá'ayi Jerusalén, ate' budxía Lë' ga naca xitsá' ícjo'olö yudo'.

⁶ Ní'irö tu' xihui' rë Lë', rnna:

—Channö nacu' Li' idú Zxí'inë' Dios, busuladzu' cuinu' ni, tu' nazúaj lu guichi lá'ayi le rnna:

Dios isöl-lë'ë gubáz lá'ayi queë' para ilún chi'ë Li', ate' ulu'chisë' Li' lu ná'agaquië', para cabí tsöjchégu'u guiój, en cabí gunu' zi' ni'u.

⁷ Bubi'ë didza' Jesús, rë' le:

—Ia'stú nazúaj lu guichi lá'ayi, le rē bönachi, rnna: “Biti' ugunu' dxin Xanu' Dios.”

⁸ Ní'irō tu' xihui' guché' Jesús ga naca tu lu guí'a sibi, ate' ni' buluí'i Lē' yúgu'tē yōdzō nacuá' yōdzōlió ni, en yúgu'tē yöl-la' tsahui' quéguequi.

⁹ Ní'irō rē Lē':

—Yúgu'tē lē ni udōda' lu no'o channō uzóa zxibu' lahua', en gunu' neda' zxön.

¹⁰ Jesús rē' le:

—Bōaj quiu' li', Satanás tu' xihui', tu' nazúaj lu guichi lá'ayi le rē netu', rnna: “Xanu' Dios tseaj lādXu'u, en udōdi cuinu' lu na' tuzē' Lē'.”

¹¹ Ní'irō buzá' Satanás tu' xihui' ga na' zoé' Jesús, ate' gubáz lá'ayi queé' Dios bila'dxinē' ga zoé', en gulácalenē' Lē', en gula'gu'ē le gudahuē'.

Risí lahuē' Jesús runē' libán luyú Galilea

(Mr. 1:14-15; Lc. 4:14-15)

¹² Cate' biyönnē' Jesús nadzunē' Juan lidxi guié, guyijē' luyú Galilea.

¹³ Buzé'ē yōdzō Nazaret, ate' yöjsöé' lu yōdzō Capernaum ga naca ra' nísado', lu buzá' quégaca bönachi Zabolón, en bönachi Neftalí.

¹⁴ Caní guca, bidxín lē na' gunné' Isaías, bönni' bē'ē didza' uláz queé' Dios, gunné':

¹⁵ Luyú Zabolón, en luyú Neftalí,

la' nōza ra' nísado' ia'tsól'a yegu Jordán saca' ga rilén gubidza. Luyú Galilea, ga nacuá' bönachi biti' nácagaca judío.

¹⁶ Bönachi chul-la niti ni' bila'lé'e bení',

ate' bönni' ni' nácagaquiē' ca nupa chinátigaca, gulén quégaquiē' bení'.

¹⁷ Cate' ní'irō gusí lahuē' Jesús runē' libán, en rē' bönachi ni':

—Buli'bí'i lādxi'li', tu' chizóa idxín dza idinná bē' Nu na' zoa yehua' yubá luyú ni.

Jesús rulidzē' tapē' bönni' uzxön böla para tsöjtá'gaquiē' Lē'

(Mr. 1:16-20; Lc. 5:1-11)

¹⁸ Cate' gudē' Jesús ra' nísado' que Galilea, bilé'enē' chopē' bönni'. Tuē' lē' Simón, en zoa ia'tú lē' Pedro, ate' dzáguiē' Andrés, bönni' böchē'ē, lē'. Chopē' ni ta'chiljē' yöxaj böla quégaquiē' lu nísado' na' tu' nácagaquiē' uzxön böla.

¹⁹ Jesús rē' légaquiē':

—Guli'dutá' neda', ate' guna' ga iché'ēli' bönachi quia', gunli' ca runli' rizönli'-ba' böla.

²⁰ Chopē' ni la' bulu'cá' anatē' yugu' yöxaj böla quégaquiē', ate' sōjácalenē' Jesús.

²¹ Cate' gudödē' Jesús ia'lati' ní'ilō, bilé'enē' ia' chopē' bönni'. Tuē' lē' Jacobo, ate' dzáguiē' Juan, bönni' böchē'ē lē'.

Nácagaquië' xzí'inë' Zebedeo. Nacu'ë lë'e bárcodo' dzágagaquië' Zebedeo, xúzgaquië', en tu'únë' yöxaj böla quégaquië'. Ní'irö Jesús bulidzë' chopë' ni para tsöjtá'gaquië' Lë'.

²² La' bulu'cá'anatë' bárcodo' na', enca' xúzgaquië', ate' söjácalenë' Jesús.

Jesús rusédinë' bönachi zían

(Lc. 6:17-19)

²³ Gudë' Jesús idú luyú Galilea, rusédinë' bönachi gapa naca lu yu'u ga tu'dubë' bönni' judío, en tu'sédë' queë' Dios. Benë' libán ni' que didza' dxi'a ca si' idinná bë'ë Dios luyú ni', en bunë' yúgu'të nupa te'e tsa naca yödzöhuë' té'eguequi.

²⁴ Guzë didza' que yöl-la' huáca queë' Jesús, ate' bila'yöni bönachi idú luyú Síria, ate' dujuá'gaquië' yúgu'të bönni' té'enë' zían yödzöhuë' que queëgaquië', en ta'gu'i ta'zaquië', ga zoë' Jesús. Dujuá'gaquië' ca' yugu' bönni' yú'ugaquië' bö' xihui', en yugu' bönni' té'enë' huë' xjote', en yugu' bönni' nacú'unigaquië' bin ni'a ná'agaquië', ate' Jesús bunë' yúgu'të bönni' na'.

²⁵ Bönachi zían bila'rúajgaca luyú Galilea, en yugu' yödzö Decápolis, en yödzö Jerusalén, enca' luyú Judea, en yugu' yödzö nacua' ia'tsölá'alö yegu Jordán saca' ga rilén gubidza, ate' röjácalen Jesús.

5

Libán benë' Jesús ga naca lu guí'ado'

(Lc. 6:20-23)

¹ Cate' bilé'enë' Jesús bönachi zían söjácalen Lë', ní'irö gurenë' tu lu guí'ado' ga naca xitsá'alö, ate' gurö'ë lu guí'a ni'. Ní'irö bulu'dubë' bönni' usëda queë' ga zoë'.

² Gusí lahuë' rusédinë' légaquië', rnnë':

³ —Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bë'ë Bönni' na' zoë' yehua' yubá.

⁴ 'Bica' ba yugu' bönni' tu'hu'ini ládxi'gaquië' tu' nabága'gaquië' dul-la', tu' huë tsahuë'ë Dios caz légaquië'.

⁵ 'Bica' ba yugu' bönni' nácagaquië' nöxaj ladxi' lahuë' Dios, tu' gata' quégaquië' luyú ni.

⁶ 'Bica' ba yugu' bönni' ta'zë ládxi'gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'zë ládxi'gaquië'.

⁷ 'Bica' ba yugu' bönni' tu'huechi' ládxi'gaquië' luzá'agaquië', tu' huéchi' ládxi'ë Dios légaquië'.

⁸ 'Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

⁹ 'Bica' ba yugu' bönni' ta'bequi dxíë' didza' bizxaj, tu' ila'zì' lágaquië' zxi'ini cazë' Dios.

¹⁰ 'Bica' ba yugu' bönni' ta'zaca' ta'gui'ë lu le ta'bía ládxi'gaca bönachi légaquië' cate' tunë' le naca tsahui', tu' dë lataj quégaquië' ga rinná bë'ë Bönni' na' zoë' yehua' yubá.

¹¹ 'Bica' ba libí'ili' cate' tu'lidza bönachi libí'ili' zi', en ta'bía ládxi'gaquië' libí'ili', ate' lu yöl-la' rizi' yë' ta'nnë' queëli' le xihui' tu' dá'ali' neda'.

¹² Buli'dzeja, en guli'chaza ládxi'li', tu' uzí'da'ali' xibé yehua' yubá. Ca raca queëli', guca quégaquië' bönni' gulu'ë didza' uláz queë' Dios, en gula'cu'ë zí'atëlö ca libí'ili', tu' gula'bía ládxi'gaca ca' bönachi légaquië'.

Bönachi dá'gaca Cristo ilaca ca zödi', en ca bení'

(Mr. 9:50; Lc. 14:34-35)

¹³ Gunnë' ca' Jesús:

—Libí'ili' nácali' ca zödi' luyú ni, pero channö initi zödi' na' yöl-la' siná'a que, biti' gaca gunru' ga huóaca siná'a. Bítirö naca lesaca', pero chinaca tu le chú'unaru', ate' ulu'libi bönachi le.

¹⁴ 'Libí'ili' nácali' ca bení' yödzölió ni para ulu'ili' lahui le naca queë' Dios. Ral-la' gácali' ca tu yödzö rö'ö tu lu gu'a, tu' cabí gaca igachi' yödzö na'.

¹⁵ Cate' ruquéla'ru' guí', biti' rigú'uru' le tu zxan gu'ina, pero ruzóaru' le ga liná' para uzení' yúgu'të nupa nacuá' lu yu'u.

¹⁶ Ca na' run bení', ral-la' gunli' ca' libí'ili', gü'ili' lataj gaca bë' le nácali' lógaca yúgu'të bönachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yöl-la' ba.

Rusédinë' Jesús que le gunná bë'ë Dios lu në'ë Moisés

¹⁷ Gunnë' ca' Jesús:

—Biti' guéquili' bida' para usunítia' yugu' le gunná bë'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', calëga para usunítia' yugu' lë na', pero para ulu'a lahui idútë le tu'sedi lë na'.

¹⁸ Le nácatë rea' libí'ili'. Tsanni nacuá' lúzxiba, en yödzölió ni, biti' tödi cá'asö nitú dídza'do', en nitú le rinná bë' xibá na', cate' gácarö yúgu'të le ral-la' gaca.

¹⁹ Que lë ni na', núti'tës bönni' quítsjë' tu xibá cuídido'os le zoa lu xibá na', en usédinë' bönachi para ilún caní, bönni' ni gácatërë' cuídido'os ca yúgu'të nupa ila'cuá' ga rinná bë' Bönni' na' zoë' yehua' yubá, pero núti'tës bönni' gunë' ca rinná bë' xibá na', en usédinë' bönachi para ilún ca' caní, bönni' ni tsépisëtërë' ga rinná bë' Nu na' zoa yehua' yubá.

20 Rea' ca' libí'ili': Channö cabí gunli' le nácatërö tsahui' ca le tunë' bönni' yudo' usedi, enca' ca tunë' bönni' yudo' fariseo, biti' ca' tsú'uli' ga rinná bē'ë Dios yehua' yubá.

Rusédinë' Jesús ca naca que nu rilé luz'ë
(Lc. 12:57-59)

21 Gunnë' ca' Jesús:

—Chibiyönili' ca gula'nnë' bönni' guta' lu ná'agaquië' le gulë' xuz xtó'oli': “Biti' gútili' bönachi. Nu bönni' gútië' bönachi, nabáguë'ë xíguia', ate' huadxinë' ga uchi'a usöröë' Dios lë'.”

22 Na'a, neda' rea' libí'ili': Nu bönni' rilenë' böchi' luzë'ë, nabáguë'ë xíguia' huadxinë' ga uchi'a usöröë' Dios lë'. Lëscá caní, nu bönni' innë' zì'ë queë' böchi' luzë'ë nabáguë'ë xíguia' ulu'chi'a ulu'söröë' bönni' lo tu'chi'a tu'söröë' lë', ate' nu bönni' guíë' luzë'ë: “¡Böa' canöz!” nabáguë'ë xíguia' tsöjtsu'ë lu guí' gabila.

23 'Caní naca, channö chizóa cu'u tu le unödzu' lu bucugu lá'ayi, ate' tsöjnenu' ni' zoa bizx que rilenë' böchi' luzó'o li',

24 bucá'ana lë na' unödzu' lu bucugu ni', en böaj lidxu'. Zí'alö yöjca'ana tsahui' le benu' queë' böchi' luzó'o, ate' ní'irö gudá unödzu' lë na' nu'u.

25 'Channö zoa nu bönni' rinábinë' li' bi ubi'u queë', en ichë'ë li' ga uchi'a usöröë' tu bönni' li', budzágatë tsahui' bönni' ná' tsanni ni' yú'ulenu' lë' nöza, para cabí udödë' li' lahuë' bönni' ruchi'a rusöröë', ate' bönni' ni udödë' li' lu në'ë bönni' rusayjë' lidxi guíë, ate' lë' cu'ë li' lidxi guíë na'.

26 Le nácatë rea' li', biti' ca' uruju' ni' cate' idxinrö dza quixju' ga buitë le ral-lu'u.

Rusédinë' Jesús ca naca que nu riguitsaj xibá que yöl-la' nutsaga na'

27 Gunnë' ca' Jesús:

—Chibiyönili' ca na' gula'nnë': “Biti' gunu' dul-la' le riguitsaj xibá que yöl-la' nutsaga na'.”

28 Na'a, neda' rea' libí'ili': Núti'tës bönni' ruyúë' tu nigula len yöl-la' rizé ladxi' le ruá' dö', chibenë' dul-la' len lënu lu icja ládxi'da'ahuë'.

29 'Que lë ni na', channö guiöj lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítiiu' tu guiöj lo', en calëga idúteo' tsöjtsú'u lu guí' gabila.

30 Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítiiu' tu no'o, en calëga idúteo' tsöjtsú'u lu guí' gabila.

Rusédinë' Jesús ca naca que nu bönni' rulá'alenë' nigula queë'
(Mt. 19:9; Mr. 10:11-12; Lc. 16:18)

31 Gunnë' ca' Jesús:

—Lësca' gula'nnë': "Núti'tës bönni' rusanë'-nu nigula queë', ral-la' unödzejë' queënu tu guichi le rnna rulá'alenë'-nu."

³² Na'a, neda' rea' libí'ili', channö zoë' nu bönni' rusanë'-nu nigula queë', en biti' zoa le ruá' dö' runnu, gunë' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' gunë' dul-la' le riguitsaj xibá que yöl-la' nutsaga na'.

Rusédinë' Jesús ca naca que nu ruzötaj La la'ayi queë' Dios

³³ Gunnë' ca' Jesús:

—Lësca' biyönili' ca yugu' bönni' guta' lu ná'agaquië' gulë' xuz xtó'oli', gula'nnë': "Biti' si' yë'u cate' run tsutsu xtídzu'u ni'a queë' Dios, en ral-la' gunu' lahuë' Xanru' Dios idútë' lë na' run tsutsu xtídzu'u ni'a queë' Lë'."

³⁴ Na'a, neda' rea' libí'ili', biti' ca' gun tsutsu xtídza'li'. Biti' gun tsutsu xtídza'li' ni'a que yehua' yubá, tu' naca ga rö'ë rinná bë'ë Dios.

³⁵ Biti' gun tsutsu xtídza'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë' Bönni' nayëpisëtërë' rinná bë'ë.

³⁶ Biti' gun tsutsu xtídzu'u ni'a que icju', tu' cabí gaca gunu' ga huóca chiguichi o gasaj nitú guitsa' icju'.

³⁷ Ral-la' innásili': "Ön", o innásili': "Biti'", tu' naca que tu' zihui' le nadödi bë' ca nácagaca didza' ni.

Rusédinë' Jesús ca naca que nu ruzí' lëbi luzë'e

(Lc. 6:29-30)

³⁸ Gunnë' ca' Jesús:

—Chibiyönili' ca naca le gunná bë'ë Moisés, gunné': "Nu bi run que guiój lahui luzë'e, ubí'i ca' que, enca' nu bi run que layi' luzë'e, ubí'i ca' que."

³⁹ Na'a, neda' rea' libí'ili': Biti' tá'baga'li' nu guá' dö' queëli', ate' channö nu capa' xagu' ibëla, bë' lataj capa' ca' ia'tú xagu' yögöla.

⁴⁰ Channö zoa nu gun ga uchi'a usöröë' tu bönni' li', en cuë' xzo', bë' ca' queë' lari' rixóa cúdzu'u.

⁴¹ Channö zoa nu gun bayudxi gu'u yua' que tu chi'i, guyéajlen nu na' chopa chi'i.

⁴² Nu bi rinábini lí', bunödzej que, en nu bi guë'ëni gunnu' que tu chi'i, biti' tá'bagu'u lë na' inabi lí'.

Rusédinë' Jesús ca ral-la' idxí'iru' nupa biti' ta'lé'e rë'u dxi'a

(Lc. 6:27-28, 32-36)

⁴³ Gunnë' ca' Jesús:

—Lësca' caní biyönili' lë na' gula'nnë': "Ral-la' idxí'inu' nu nadxí'i lí', en udí'inu' nu biti' rilé'e lí' dxi'a."

⁴⁴ Na'a, neda' rea' libí'ili', guli'dxi'i nupa bití' ta'lé'e libí'ili' dxi'a. Guli'nábinē' Dios gácalenē' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzē' Dios inábili'-nē' gunē' ga gaca dxi'a quégaca nupa ta'nnē' queēli', en tuá' dō' queēli'.

⁴⁵ Channō gunli' caní, gácali' zxi'ini cazē' Xúziru' Dios, zoē' yehua' yubá, tu' runē' Lē' ga ruzení' gubidza queē' ga nacua' bōnachi tuá' dō', enca' ga nacua' bōnachi tsahui'. Risól-lē'ē tu nisa guiōj lu yu quégaca bōnachi tsahui', enca' lu yu quégaca bōnachi bití' nácagaca tsahui'.

⁴⁶ Channō nadxi'isili' bōnni' nadxi'iguequinē' libí'ili', ¿nuzxi caz cu'u libí'ili' yól-la' ba? Lē'sca' caní tunē' bōnni' bití' nácagaca tsahui' na', bōnni' tu'quizxjē' uláz que yōdzō zi'tu', nadxi'iguequinē' luzá'agaquiē'.

⁴⁷ Channō rugápali' Dios tuzē' bōchi' luzá'ali', ¿bizxi caz runli' le nácatērō dxi'a? Lē'sca' caní tunē' bōnni' bití' núnbē'gaquiē' Dios.

⁴⁸ Pero libí'ili', guli'gaca idú tsahui', ca na' náquiē' Xúziru' Dios, zoē' yehua' yubá, náquiē' idú tsahui'.

6

Rusédinē' Jesús ca ral-la' gácalenru' bōnachi

¹ Gunnē' ca' Jesús:

—Guli'gūi' lādxi'li' gaca idú ca reaj lādxi'li'-nē' Dios. Bití' gúnsili' lē ni lógaca bōnachi para ila'lé'e ca na' runli'. Channō runli' caní, bití' bi gunnē' Xúziru' Dios zoē' yehua' yubá queēli'.

² Cate' bi unōdzju' que nu bi riyadzaj, bití' gunu' ga ilá' lahui lē na' runu' ca tunē' bōnni' tu'luí'isō tsahui' cuíngaquiē' ga naca lu yu'u ga tu'dubē' bōnni' judío, en tu'sédē' queē' Dios, enca' ga naca lu yē'ēyi. Caní tunē' para ila'gú'u bōnachi légaquiē' yól-la' ba. Le nácatē' rea' libí'ili', cá'asō naca yól-la' ba gata' quégaquiē'.

³ Pero li', cate' bi unōdzju' que nu bi riyadzaj, bití' ca' gu'u lataj nu inōzi.

⁴ Na'a, lē na' unōdzju', bagáchi'sō ral-la' unōdzju', ate' Xúziru' Dios, Nu rilé'e ca na' runu' bagáchi'sō, Lē' ubi'ē' quiu'.

Rusédinē' Jesús ca ral-la' ulídzaru'-nē' Dios

(Lc. 11:2-4)

⁵ Gunnē' ca' Jesús:

—Cate' ulídzali'-nē' Dios, bití' gunli' ca tunē' bōnni' tu'luí'isō tsahui' cuíngaquiē', tu' ta'yaza lādxi'gaquiē' ta'zuínē' tu'lidzē' Dios gapa naca lu yu'u ga tu'dubē' tu'sédē' bōnni' judío queē' Dios, en gapa naca lu yē'ēyi para ila'lé'e bōnachi légaquiē'. Le nácatē' rea' libí'ili', cá'asō naca yól-la' ba gata' quégaquiē'.

⁶ Pero libí'ili', cate' ulídzali'-nē' Dios guli'tsaza lídxili', en buli'sayaj yu'u. Buli'lidzē' Dios inábili'-nē' Xúziru' Dios, zóalenē' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sö, Lē' ubi'ē' queéli'.

⁷ 'Cate' ulídzali'-nē' Dios biti' gunli' la' yē'ëyi la' lez ca na' tunē' bönni' biti' núnbē'gaquiē' Dios, tu' téquinē' huayönnē' Dios légaquiē' tu' tu'lidzē' la' yē'ëyi la' lez.

⁸ Biti' gunli' ca na' tunē' légaquiē'. Xúziru' Dios, zí'atëlö cate' si' inábali'-nē', chinöz quézinē' le riyadzaj queéli'.

⁹ Que lē ni na', ral-la' ulídzali'-nē' Dios innali' caní: Xuz netu', zu' yehua' yubá, gaca zxön Lo'.

¹⁰ Gudá inná bē'u luyú ni.

Ben ga gaca luyú ni ca raza ládxi'u Li' ca na' raza yehua' yubá.

¹¹ Benna le gágutu' na'a dza.

¹² Buniti lo netu' le huiá' dö' bentu' Lo' Li' ca runtu' netu', runiti lotu' nupa bi tun queētu'.

¹³ Biti' gu'u lataj si' bē' tu' xihui' netu', pero busöla' netu' lu na' nu ruá' dö'.

Nequi quiu' ga rinná bē'u, en yöl-la' unná bē', en yöl-la' ba. Caní rē'ënitú' gácatíca'sö. ¡Ca' gaca!

¹⁴ 'Channö uniti loli' luzá'ali', nupa tuá' dö' queéli', uniti lahuē' Xúziru' Dios, zoē' yehua' yubá, libí'ili'.

¹⁵ Channö cabí uniti loli' luzá'ali', biti' uniti lahuē' Xúziru' Dios libí'ili' ca naca dul-la' nabága'li'.

Rusédinē' Jesús ca ral-la' gunru' gubasa

¹⁶ Gunnē' ca' Jesús:

—Cate' gunli' gubasa, biti' gunli' bayechi' loli' ca tunē' bönni' tu'luí'isö tsahui' cuíngaquiē', tu' tunē' bayechi' lógaquiē' para iléquibe'e bönachi tunē' gubasa. Le nácatē rea' libí'ili', cá'asö naca yöl-la' ba gata' quégaquiē'.

¹⁷ Libí'ili', cate' gunli' gubasa, buli'pá'a ícjali', en guli'quibi loli',

¹⁸ para cabí iléquibe'e bönachi runli' gubasa. Bagáchi'sö ral-la' gunli' gubasa, ate' Xúziru' Dios, zóalenē' libí'ili' ga na' zóali' queézili', Lē' ubi'ē' queéli'.

Yehua' yubá ral-la' utúbiru' yöl-la' tsahui' queëru'

(Lc. 12:33-34)

¹⁹ Gunnē' ca' Jesús:

—Biti' utúbili' yöl-la' tsahui' luyú ni, ga ni bēlado' que tu'töba' le, ate' raza ditaj, en ga ni ta'yaza gubán, ta'banē'.

²⁰ Buli'tubi yöl-la' tsahui' yehua' yubá, ga ni' bēlado' que biti' ulu'töba' le, en biti' gaca ditaj, en ga ni' biti' ila'yáziē' bönni' gubán, en biti' ila'banē'.

²¹ Ga ni' dē yöl-la' tsahui' queéli', ni' gü'í ládxi'li' idxinli'.

Le rigú'u bení icja ládxi'do'oru'

(Lc. 11:34-36)

²² Gunně' ca' Jesús:

—Guiöj loru' naca ca tu le rigú'u bení icja ládxi'do'oru'. Que læ ni na', channö guiöj loli' naca tsahui', idúteli' tsépili' yösa bení'.

²³ Channö guiöj loli' biti' naca tsahui', idúteli' nachúl-lali'. Que læ ni na', channö bení zóalen libí'ili' nuhuóaca le naca chul-la, yénni'tërö nachúl-lali'.

Dios, en dumí

(Lc. 16:13)

²⁴ Gunně' ca' Jesús:

—Cuntu nu bönni' gaca guně' xichíngaquiě' chopa xaně', tu uzóe' tuě' tsólá'alö, ate' ia'túe' na' idxí'ině', o ugá'analeně' tuě', ate' ia'túe' na' usán ládxe'ë. Biti' gaca gunli' xichině' Dios, enca' dumí.

Dios rapa chi'ë nupa néquiquequi queë'

(Lc. 12:22-31)

²⁵ Gunně' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tërö yöl-la' na'bán queéli' ca le gáguli', ate' nácatërö lesaca' le nácali' ca lari' gáculi'.

²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë légacaba'. Nazáca'tëröli' libí'ili' ca yugu' biguínido' na'.

²⁷ ¿Nuzxi caz bönni' nútsë'ë ládjali' gaca guně' ga soë' ibaně' ia'túz dza tu' ruúbi ruguí'ině' para gaca caní queë'?

²⁸ ¿Bizx que ruúbi ruguí'ili' ni'a que le gáculi'? Buli'yútsöca' ca raca quégaca yöjdo' rögaca la' guixi' ca ta'zxón. Biti' tun dxin, en biti' tun du lari'.

²⁹ Neda' rea' libí'ili', Salomón, bönni' ni' gunná bē'ë, sal-la' gúta'da' yöl-la' tsahui' queë', lari' gúcuë' biti' gunná'tërö lachi ca rinná'gaca yöjdo' na'.

³⁰ Dios caz runě' lachi yöj guíxi'do', le rögaca la' guixi', le nacua' na'a dza, ate' cuxó huidzaj ila'yegui lu guí'. Channö caní ruí' ládxe'ë yöj guíxi'do', runě' léguequi lachi, gúnda'arë' ca' queéli', sal-la' biti' réajlë'ëli'-në' idú ládxi'li'.

³¹ Que læ ni na', biti' ubi uguí'ili', en biti' innali': “¿Bizxi gágutsatu?” o “¿Bizxi guí'jatsatu?” o “¿Bizxi lari' gácutsatu?”

³² Bönachi yödzölió ni tu'úbi tu'guí' ni'a que yúgu'të læ ni, pero zoë' Xúziru' yehua' yubá, ate' Lë' nözině' naquínili' yúgu'të læ ni.

³³ Na'a, guli'gü'irö ládxi'li' inná bé'enë' Dios libí'ili', en gunli' le naca tsahui' lahuë' Lë', ate' Lë' cu'ë xinózáli' yúgu'të lë ni.

³⁴ Que lë ni na', bití' ubi uguí'ili' ni'a que le ral-la' gaca cuxó huidzaj, tu' huáca gü'i ládxi'li' cuxó huidzaj le gaca queëli' dza na'. Tu tu dza ilaca le ral-la' gü'i ládxi'li' dza na'.

7

Biti' ral-la' ichugu bë'ëru' böchi' luzá'aru'

(Lc. 6:37-38, 41-42)

¹ Gunnë' ca' Jesús:

—Biti' ichugu bë'ëli' böchi' luzá'ali', para cabí ichugu bë'ë Dios queëli',

² tu' ichugu bë'ë Lë' queëli' la' leze ca na' richugu bë'ëli' queë' böchi' luzá'ali', ate' ca na' rurixi rudödili' que luzá'ali', la' cá'asö urixi udödë' Dios queëli'.

³ ¿Bizx que ruyú' bëbudo' yu'u guiöj lahuë' böchi' luzó'o, en bití' réquibe'enu' yu'u le zxöntëro guiöj lo' li'?

⁴ ¿Guiëtso' böchi' luzó'o: “Gulöz, cueja' bëbudo' yu'u guiöj lo'”, ate' li', le zxöntëro ca' yu'u guiöj lo' li'?

⁵ Li', bönni' rulu'isö tsahui' cuinu'. Guléaj zí'alö le zxön yu'u guiöj lo' li', ate' ní'irö ilé'enu' tsáhu'i'do' para gaca cueju' bëbudo' yu'u guiöj lahuë' böchi' luzó'o.

⁶ 'Biti' gü'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en bití' chú'unali' le naca lesaca' queëli' láhuigacaba' cuchi, para cabí ulu'zadi' ní'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queëli'. Guli'guilaj, ate' gunnë' lataj idzöli queëli'. Buli'lidza ra' yu'u, ate' Lë' isaljë' queëli'.

⁸ Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹ 'Channö zoë' nu bönni' ladjali' libí'ili', ate' zóabi' bi'i queë', channö inábibi' lë' yöta xtila, ¿naru' unödzejë'-bi' guiöj?

¹⁰ Channö inábibi' lë' tuba' böla, ¿naru' unödzejë'-bi' bëla?

¹¹ Libí'ili' nácali' huiá' dö', pero nözili' unödzejali' xzí'nili' le naca tsahui'. Nácatëro löza, Xúzili' zoë' yehua' yubá unödzejë' nupa ta'nábini Lë' le naca dxi'a.

¹² 'Que lë ni na', ca na' rë'ënili' ilún bönachi queëli', lësca' caní guli'gún quégaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'

(Lc. 13:24)

¹³ Gunnë' ca' Jesús:

—Guli'tsáz ga nu riyaza le naca tsúpi'do'. Blaga' naca ga nu riyaza, en yalaj naca nõza le rōjácalenē' bōnni' ga ni' ila'nítiē', ate' ta'yáziē' bōnni' zían ni'.

¹⁴ Tsúpi'do' naca ga nu riyaza, en lásido'os naca nõza le rōjácalen bōnachi ga ni' ila'deli' yōl-la' na'bán idú, ate' nabábasō nupa ta'dzōli le.

Le runru' naca bē' le nácaru'
(Lc. 6:43-45)

¹⁵ Gunnē' ca' Jesús:

—Guli'gún chi'i cuinli' para cabí ila'zí' yé'enē' bōnni' ta'zí' yē'ē libí'ili', ta'nnē' tu'ē didza' uláz queē' Dios. Ila'dxinē' bōnni' caní ga zóali', en ulu'luí' cuíngaquiē' nõxaj lādxi'do' ca nácagacaba' bō'cu' zxíla'do', pero lu icja lādxi'do'gaquiē' nácagaquiē' ca bō'cu' guí'a sínia'.

¹⁶ Yugu' le tunē' ilaca bē' le nácagaquiē'. Biti' ruchíbiru' le ribía lubá uva lu yaga yōtsi', en bití' ruchíbiru' le ribía yaga higo lu guixi' legui lásido'.

¹⁷ Caní naca, yúgu'tē yaga dxi'a ta'bía le naca dxi'a, ate' tu yaga cabí naca dxi'a ribía le cabí naca dxi'a.

¹⁸ Yaga dxi'a na' bití' gaca cuía le cabí naca dxi'a, ate' yaga na' bití' naca dxi'a bití' gaca cuía le naca dxi'a.

¹⁹ Yúgu'tē yaga bití' ta'bía le naca dxi'a ila'rugu, ate' ila'gu'ē léguequi lu guí'.

²⁰ Caní naca, yugu' le tunē' bōnni' na' ilaca bē' le nácagaquiē'.

Nupa bití' ila'yáziē' ga rinná bē'ē Dios
(Lc. 13:25-27)

²¹ Gunnē' ca' Jesús:

—Zian nupa tē neda': "Xan, Xan", pero calēga yúgu'tē' ila'yáziē' ga rinná bē'ē Dios yehua' yubá. Ila'yázasē' ni' bōnni' tunē' ca ré'ēnē' Xuza' Dios, zoē' yehua' yubá.

²² Cate' idxín dza údxi que yōdzōlió ni, bōnni' zían ilē' neda', ila'nnē': "Xan, Xan, bentu' libán que xtídzē'ē Dios, buguntu' dxin Lo', en buguntu' ca' dxin Lo' para bubéajtu' yugu' bō' xihui', en buguntu' ca' dxin Lo' bentu' zían yōl-la' huáca zxōn."

²³ Ní'irō neda' guía' légaquiē': "Bití' ca' núnbē'a libí'ili'. Guli'cuíta ga zoa', libí'ili' ruá'ali' dō'."

Chopa ca gaca udxíaru' xilibi zō'ō
(Lc. 6:47-49; Mr. 1:22)

²⁴ Gunnē' ca' Jesús:

—Ia'stú ca', nu bōnni' riyōnnē' xtídzá'a ni, en gunē' ca rnna, bōnni' ni náquiē' ca tu bōnni' réajni'inē', budxíē' lidxē' ga naca lu guiōj.

²⁵ Cate' gulaj guiójsiu', en guzxón yegu gubó'o, en guyecja bö', gudibi nisa cuita yu'u na', pero biti' gubixi, tu' dxía xilibi lu guiój.

²⁶ Na'a, nu bönni' riyönnë' xtída'a ni, en biti' runë' ca rnna, bönni' ni náquië' ca tu bönni' biti' réajni'inë', budxië' lidxë' lu yu dzöbi.

²⁷ Cate' gulaj guiójsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubíxitë, en tsaz biguinnaj.

²⁸ Cate' Jesús budxi bë'lenë' légaquië' didza' ni, bulu'bani bönachi zían nacuá' ni' ca naca le rusédinë',

²⁹ tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quégaquië'.

8

Ruhuóáquië' tu bönni' ré'enë' huë' nudzu' ruzödi

(Mr: 1:40-45; Lc. 5:12-16)

¹ Cate' bötjë' Jesús lu guí'a na', sójácalen bönachi zían Lë'.

² Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxibë' lahuë' Jesús, en rë' Lë':

—Xan, channö ré'ënu', huáca unu' neda'.

³ Ní'irö Jesús la' bulitë në'ë, en gudanë' lë'. Rë' lë':

—Rë'ënda'. Huóácu' dxí'a.

La' bunítitë xihuë'ë bönni' huë' na'.

⁴ Ní'irö Jesús gudxë' lë':

—Buyú, cuntu nu guío' caní, pero guyéaj, yöjluí'i cuinu' lahuë' bixúz, ate' yöjnodzaj le gunná bë'ë Moisés le uluí'i bönachi chibóácu'.

Jesús ruúnë' bi'i huen dxin queë' tu bönni' rinná bë'ë lu gudil-la

(Lc. 7:1-10)

⁵ Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyü'ë bönni' röjáquië' gudil-la, ate' gúta'yuë' lahuë' Jesús,

⁶ en rë' Lë':

—Xan, bi'i huen dxin quia' dëbi' yu'u, ré'ebi' huë' nací'unibi' bin, ate' riguí'i rizáca'da'abi'.

⁷ Jesús rë' lë':

—Neda' guída' una'-bi'.

⁸ Bubi'ë didza' bönni' na' rinná bé'enë' bönni' röjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huóacabi' bi'i huen dxin quia'.

⁹ Lëscá' neda', zoa nu rinná be'e neda', en nacu'ë ca' bönni' röjáquië' gudil-la rinná bé'egacada'-në'. Cate' rea'-në' tuë': “Guyéaj ni”, rejë'. Cate' rea'-në' ia'tué': “Gudá ni”, ridë'. Cate'

rea'-në' bönni' huen dxin quia': "Ben dxin ni", la' runtë' dxin na'.

¹⁰ Cate' biyönnë' Jesús didza' ni, bubáninë', ate' gudxë' bönni' sôjácálenë' Lë', rnnë':

—Le nácatë rea' libí'ili', ga nacuá' bönachi Israel, cuntu nu bönni' rôjxëqui'da'-në' réajlë'ë neda' ca runë' bönni' ni.

¹¹ Ia'stú rea' libí'ili': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxön Abraham, en Isaac, en Jacob, yehua' yubá ni' ga rinná bë'ë Dios,

¹² pero yugu' bönni' na' gurö cazë' Dios para ila'yázië' ga na' rinná bë'ë Lë', chú'unë' légaquië' ní'ilö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhuí'ini quégaquië'.

¹³ Ní'irö Jesús gudxë' bönni' na' rinná bë'enë' bönni' rôjáquië' gudil-la, rnnë':

—Böaj lidxu'. Ca na' réajlë'u, ca' gaca quiu'.

La' ná'asö böácatëbi' bí'i huen dxin queë' na'.

Jesús ruúnë' xiná'anu nigula queë' Pedro

(Mr. 1:29-31; Lc. 4:38-39)

¹⁴ Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá.

¹⁵ Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunödžjanu le gulahuë'.

Jesús ruúnë' zían nupa te'e

(Mr. 1:32-34; Lc. 4:40-41)

¹⁶ Cate' chiridzö' dza na', dujuá'agaquië' zían bönni' yú'ugaca bö' xihui' légaquië' ga zoë' Jesús, ate' len yöl-la' rinnësö queë' bubéajë' yugu' bö' xihui' na', en bunë' ca' yúgu'të nupa te'e.

¹⁷ Caní guca para gaca ca na' gunnë' Isaías, bönni' bë'ë didza' uláz queë' Dios, gunnë': "Lë' bu'ë yugu' le rizáca'ru', en bu'ë ca' yugu' yödzöhuë' queëru'."

Nupa gulë'ëni tsöjácálen Jesús

(Lc. 9:57-62)

¹⁸ Cate' bilé'enë' Jesús nacuá' bönachi zían gásibi'ilë', gunná bë'enë' yugu' bönni' usëda queë' ila'dödë' ia'tsölá'a nísado' ni'.

¹⁹ Bidxinë' tu bönni' yudo' usedi ga na' zoë' Jesús, en rë' Lë':

—Bönni' Usedi, sá'lena' Li' gáti'tës ga tseju'.

²⁰ Jesús rë' lë':

—Yugu' böza' nacuá' zzan guiöj quégacaba', ate' yugu' biguínido', nudxíagacaba' xicá'agacaba', pero neda', Bönni' Guljë' Bönachi, bití' dë ga quíxaj icja'.

²¹ Ia'tué' bönni', náquië' bönni' usëda queë' Jesús, gudxë' Lë':

—Xan, benna neda' lataj huöja' ga idxinrö dza chibucácha'a-në' xuzá'.

²² Jesús gudxë' lë':

—Gudá' neda'. Bë' lataj yugu' bönni' tati cazë' ulu'cáchéë nupa ilátigaca quégaquië'.

Jesús ribequi dxíë' bö' budunu'

(Mr. 4:35-41; Lc. 8:22-25)

²³ Gurenë' Jesús lë'e bárcodo', ate' dzágagaquië' Lë' bönni' usëda queë'.

²⁴ Ní'irö guyecja bö' budunu' lu nísado' na', ate' riyasa ridxiada' nísado' na' ga bidxintë riyaza nisa lë'e bárcodo' na'. Dë' rásie' Jesús lë'e barco na'.

²⁵ Ní'irö bila'dxinë' bönni' usëda queë' Jesús ga na' zoë', ate' bulu'subanë' Lë', en të' Lë':

—Xan, busölá netu'. Chirigáchi'ru' lu nisa.

²⁶ Bubi'ë didza' Jesús, en rë' légaquië':

—¿Bizx que rádxili'? Láti'do'os réajlë'ëli'-në' Dios.

Ní'irö guyasë' Jesús, en bulidzë' bö' na' recja, en nísado' na', ate' la' gurö'ötë dxi.

²⁷ Bulu'bánninë' bönni' na', ta'nnë':

—¿Nuzxi caz bönni' ni? Ru'isë' didza', ate' bö' recja, en nísado' tun ca rnnë'.

Yugu' bönni' Gadara yú'ugaca bö' xihui' légaquië'

(Mr. 5:1-20; Lc. 8:26-39)

²⁸ Cate' bidxinë' Jesús ia'tsölá'a nísado' ga na' naca lu xiyú yödzo Gadara, bila'rúajë' chopë' bönni' ga nacuá' ba quégaca nupa nátigaca, dutságagaquië' Jesús. Nácagaquië' sínia', ate' cuntu nu gaca tödi la' nöza ni'.

²⁹ La' gulu'itë' zidzaj didza' chopë' ni, ta'nnë':

—¿Bizxi ral-la'tu' quiu', Jesús, Zxí'inë' Dios? ¿Naru' bidxintso' ni dusaca' zi'u netu' zí'alö ca idxín dza queëtu'?

³⁰ Ga ni' nacu'ë nacuá'aba' cuchi zían ta'daba' táguba', nacuá'aba' láti'do' ga naca zi'tu'.

³¹ Gula'naba yechi' bö' xihui' na' Jesús, en të Lë':

—Channö ubéaju' netu', benna lataj tsöjtsú'ugacatu'-ba' cuchi zían ni'.

³² Ní'irö Jesús gudxë' léguequi:

—Guli'tséaj.

La' bila'rúajtë bö' xihui', en yöjcházagaca cuchi zían ni'.

Ní'irö yúgu'tëba' cuchi zían na' yöjbíxitëgacaba' ga naca lë'e guiöj, en yöjcházagacaba' lu nísado', ga ni' gula'yëpiba' nisa, en gulátiba'.

³³ Guládxinë' bönni' tu'yúë'-ba' cuchi na', ate' bulu'zxúnnajë'. Cate' bila'dxinë' lu yödzo, gula'guíxjö'ë yúgu'të lë na' guca quégaquië' bönni' ni' gula'yú'u bö' xihui' légaquië'.

³⁴ Ní'irö bila'ruáj bönachi lu yödzö ni', yöjtságagaquië' Jesús. Cate' bila'lé'enë' Lë', guláta'yue' lahuë' uzé'ë lu xiyúgaquië' na'.

9

Jesús ruúnë' tu bönni' nacú'unië' bin

(Mr. 2:1-12; Lc. 5:17-26)

¹ Ní'irö bubenë' Jesús lë'e bárcodo', en gudödë' ia'tsölá'a nísado' ni', ate' budxinë' ga naca ladzë'.

² Ní' dujuá'gaquië' tu bönni' nacú'unië' bin ga zoë' Jesús, zxoë' lu da'a yaga. Cate' bilé'enë' Jesús ca na' ta'yéajlë'ë bönni' ni Lë', gudxë' bönni' na' nacú'unië' bin, rnnë':

—Butipa ládxu'u, zxi'ina'do'. Chibuníti lahua' dul-la' nabágu'u.

³ Nacu'ë ca' bönni' yudo' tu'sédinë' ni', ate' ta'nnë' lu icja ládxi'do'gaquië', ta'nnë': “Didza' ru'ë bönni' ni ruzóa Dios tsölá'alö.”

⁴ Cate' réquibe'enë' Jesús le ta'zá' ládxi'gaquië', rë' légaquië':

—¿Bizx que rizá' ládxi'li' caní le cabí naca tsahui'?

⁵ Biti' naca böniga nu guiésö bönni' ni: “Yugu' dul-la' nabágu'u chibuníti lahua'”, pero naca böniga nu gun ga huöásë', en uzé'enë'.

⁶ Na'a, uluí'ida' libí'ili' neda', Bönni' Guljë' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxë' bönni' na' nacú'unië' bin, rnnë':

—Guyása. Buchisa da'a yaga quiu', en böaj lidxu'.

⁷ Ní'irö la' guyásatë' bönni' na' nacú'unië' bin, en böajë' lidxë'.

⁸ Cate' bila'lé'enë' bönni' nacu'ë ni' lë ni, bulu'bábinë', ate' gula'gu'ë Dios yöl-la' ba tu' bunödzejë' yöl-la' huáca caní quégaca bönachi.

Jesús rulidzë' Mateo

(Mr. 2:13-17; Lc. 5:27-32)

⁹ Cate' buzë'ë Jesús ni', bilé'enë' bönni' lë' Mateo, rö'ë ga na' ruquíxjë' uláz que yödzö zi'tu', ate' Jesús gudxë' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

¹⁰ Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quíxjë', en yugu' bönni' cá'asö bila'dxinë' ga zoë', ate' gula'bó'lenë' Jesús tsözxön len yugu' bönni' usëda queë'.

¹¹ Cate' bönni' yudo' fariseo bila'lé'enë' lë ni, gula'nábinë' yugu' bönni' usëda queë' Jesús, ta'nnë':

—¿Naru' bönni' rusédinë' libí'ili' rágulentsë' tsözxön bönni' tu'quíxjë', en iá'zica'rë' bönni' dul-la'?

¹² Cate' biyönnë' Jesús lë ni, rë' légaquië':

—Biti' naquíniguequinë' bönni' nácagaquië' dxi'a nu un bönachi, pero bönni' té'enë' naquíniguequinë' nu un bönachi.

13 Gulí'tséaj, en buli'sëda le rnna lë na' nazúaj lu guichi lá'ayi, le rnna caní: “Rë'ënda' ulu'huéchi' ládxi'gaquië' bönni' luzá'agaquië', en calëga ilútië'-ba' böa' bëdxi lu bucugu lá'ayi quia'.” Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bíi ládxi'gaquië'.

Rusédinë' Jesús ca ral-la' gunru' gubasa

(Mr: 2:18-22; Lc. 5:33-39)

14 Ní'irö bönni' dá'gaquië' Juan, bönni' na' buquilë' bönachi nisa, bila'dxinë' ga zoë' Jesús, ate' gula'nábinë' Lë', ta'nnë':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' biti' tunë' gubasa?

15 Bubi'ë didza' Jesús, en rë' légaquië':

—¿Naru' huácatsö ila'sëbi ládxi'gaca nupa nacuá' laní que yöl-la' rutsaga na' tsanni ni' bönni' rutsaga në'ë zóalenë' légaquië'? Za' dza cate' idué' bönni' na' rutsaga në'ë ga nacu'ë. Dza ní'irö ilunë' gubasa.

16 Bucúdzu'ë didza' Jesús, rnnë':

—Cuntu nu un tu lari' tëbi len lari' cubi, tu' uxú'uni lari' cubi na' nugu'ë lari' tëbi na', ate' ichöza'rö lari' tëbi na'.

17 Lë'sca' caní, cuntu nu bönni' rigué'ënë' xisi uva cubi tu lu buzudi guídi gula, tu' galaj ilëbi xisi uva cubi na', en uzuzxaj buzudi guídi gula na', ate' gaca ditaj xisi uva na', ate' initi ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë taca chí'i.

Rubanbi' bi'i nigula queë' Jairo, en ruhuöácanu tu nigula gudannu lari' nácuë' Jesús

(Mr: 5:21-43; Lc. 8:40-56)

18 Tsanni ni' Jesús ru'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxibë' lahuë' Jesús, en rë' Lë':

—Bi'i nigulado' quia' la' gútitëbi'. Gudá ixóa no'o lëbi', ate' ubanbi'.

19 La' guzuítenë' Jesús, en sa'yéajlenë' lë'. Dzágagaquië' bönni' usëda queë' Lë'.

20 Ní'irö bidxinnu tu nigula zaca' cúdzu'lë' Jesús, chiguca chinnu iz ré'enu, biti' ruhu'i rön queënu que huë' quégaca cázanu nigula, ate' gudannu lari' nácuë' Jesús.

21 Caní bennu tu' rizá' ládxi'nu, rnnanu: Channö cansa' zxë', huöáca'.

22 Ní'irö buécjë' Jesús, en ruyué' lënu, ate' rë'ë-nu:

—Butipa ládxi'u, zxi'ina'do'. Chiböácateu' tu' réajlë'u neda'.

La' ná'asö böácatënu.

23 Cate' bidxinë' Jesús lidxë' bönni' unná bë' na', bilé'enë' nacu'ë ni' bönni' tu'cödxë' gui, en nupa ta'bödxí yechi'.

24 Jesús rë' légaquië':

—Guli'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

25 Cate' chinubéajë' Jesús bönachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'.

26 Guzë didza' ca guca lë ni, ate' bila'yöni bönachi nacuá' idütë luyú na'.

Jesús ruúnë' bönni' nachul-la guiöj lógaquië'

27 Cate' Jesús burúajë' ni', chopë' bönni' nachul-la guiöj lógaquië' söjácalenë' Lë'. Tu'ë zidzaj didza', ta'nnë':

—Zxí'ini xi'sóë' David, buéchi' ladxi' netu'.

28 Cate' bidxinë' Jesús ga naca lu yu'u, bila'dxinë' chopë' bönni' na' nachul-la guiöj lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

29 Ní'irö Jesús gudanë' guiöj lógaquië', ate' rnnë':

—Ca réajlë'ëli', ca' gaca queëli'.

30 La' böáljatë guiöj lógaquië'. Ní'irö Jesús buzenë' bach légaquië', rnnë':

—Guli'güi'itica'sö ládxi'li' cuntu nu inözi lë ni.

31 Cate' bulu'rúajë' ni', la' bulu'zëtë' didza' idütë luyú ni' ca naca lë na' benë' Jesús.

Jesús ruúnë' tu bönni' biti' ru'ë didza'

32 Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús nachë'gaquië' lahuë' tu bönni' biti' ru'ë didza', tu' yu'u lë' bö' xihui'.

33 Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'bábinë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

34 Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bë' que xángaca bö' xihui' na'.

Jesús ruhuéchi' ládxe'ë bönachi zían

35 Gudë' Jesús idú gásibi'ilö gapa nacuá' yödzö zxön, en gapa nacuá' yödzödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bë'ë Dios. Bunë' yúgu'të nupa bi ta'guí'i ta'zaca' yugu' lu yödzö na'.

³⁶ Cate' Jesús bilé'enë' bönni' zían ni', buéchi' láchxë'ë légaquië', tu' ta'gu'i ta'záquië', en nudú láchxi'gaquië' ca raca quégacaba' bö'cu' zxila' bití' zoa nu ruyú légacaba'.

³⁷ Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa.

³⁸ Que lë ni na', guli'gáta'yu lahuë' Dios, náquië' Xan yöla na', inábili'-në' isöl-lë'ë bönni' huen dxin ulu'lapë' yöla queë'.

10

Jesús riböë' bönni' ilácagaquië' gubáz queë'

(Mr. 3:13-19; Lc. 6:12-16)

¹ Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'únë' yúgu'të nupa te'e, en yúgu'të nupa bi ta'gu'i ta'zaca'.

² Caní naca lágaquië' idxínnutë' gubáz na' nasöl-lë'ë Jesús:

Simón, (lë' ca' Pedro),

Andrés, (böchë'ë Simón na'),

Jacobo, (zxí'inë' Zebedeo),

Juan, (böchë'ë Jacobo na'),

³ Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ru'i láchxë'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

Jesús risöl-lë'ë gubáz queë' tsöjéngaquië' libán

(Mr. 6:7-13; Lc. 9:1-6)

⁵ Ní'irö Jesús gusöl-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Bití' tséajli' ga nacua' bönachi bití' nácgaca judío, en bití' tsú'uli' láchzagaca bönachi nacua' luyú Samaria.

⁶ Guli'tséaj ga nacua' bönachi Israel, nácgagaquië' ca bö'cu' zxíla'do' nanítigacaba'.

⁷ Guli'tsöjén libán, innali': "Chibidxín gala' dza Dios, Nu na' zoa yehua' yubá, inná bë'ë luyú ni."

⁸ Buli'ún nupa te'e. Buli'ún dxí'a nupa te'e huë' nudzu' ruzödi. Buli'subán nupa chinátigaca. Buli'béaj bö' xihui' yú'ugaca bönachi. Bénnasa' queëli' yöl-la' unná bë' ni. Buli'gún dxin le, en bití' bi uquízxjali'.

⁹ Bití' bi guá'ali' lu buzudi queëli', calëga dumí oro, en calëga dumí plata, en calëga dumí lásido'.

10 Biti' guá'ali' yōxaj yōta queéli' le gáguli' la' nōza. Tuz lari' ixóya yenli', en biti' guá'ali' xiráchuli' o xiyaga queéli', tu' idzöli quézinë' bōnni' huen dxin le gahuë'.

11 'Gáti'tës yōdzö zxōn o yōdzödo' ga idxinli', guli'naba nuzxi naca idú ladxi' lu yōdzö ni', ate' ugá'anali' lidxi nu na' cate' gála'rö dza urúajli' yōdzö na'.

12 Cate' tsú'uli' tu lu yu'u, buli'gapa Dios bōnachi nacua' lu yu'u na', inábili'-në' Dios unōdzjé' quégaquië' le cuéqui dxi icja ládxi'do'gaquië'.

13 Channö bōnachi nacua' lu yu'u ni' nácagaca lesaca', ugá'analen le ribequi dxi ladxi' na' léguequi, pero channö bōnachi na' cabí nácagaca lesaca', inábali' cabí ugá'ana lë na' ribequi dxi ladxi' len léguequi.

14 Gáti'tës ga idxinli' ga bōnachi ni' biti' ilún libí'ili' bal, en biti' ulu'zé nagui xtízza'li', buli'rúaj lu yu'u ni' o yōdzö ni', ate' guli'cuíbi bëchtö da' lë'e lábali', le ulu'i léguequi nabága'gaca xíguia'.

15 Le nácatë rea' libí'ili', cate' idxín dza ichúguië' Dios quégaca bōnachi, ila'guí'ila'záca'rö bōnachi yōdzö na' ca ila'guí'ila'záca' bōnachi gula'cuá' yōdzö Sodoma, en yōdzö Gomorra, nupa ni' busunítië' Dios.

Nupa biti' ta'yéajlë' ulu'saca' zi' nupa dá'gaca Cristo

16 Gunnë' ca' Jesús:

—Buli'yútsöca', neda' risöl-la'a libí'ili', ate' gácali' ca bö'cu' zxíla'do' ta'daba' ga dzö'öba' bö'cu' gu'a sínia'. Guli'gaca sina' ca nácagacaba' sina' bëla sínia', pero guli'gaca ca' nōxaj ladxi' ca nácagacaba' gu'dödo'.

17 Guli'gún chi'i cuinli' quégaca bōnachi, tu' ulu'dödë' libí'ili' lu ná'agaquië' bōnni' yúlahui', en ila'guinë' libí'ili' gapa naca lu yu'u ga tu'dubë' tu'sëdë' bōnni' judío queë' Dios.

18 Lësca' caní, ila'chë'ë libí'ili' lógaquië' bōnni' lo, en lógaquië' bōnni' ta'nná bë'ë, tu' dá'ali' neda'. Caní gaca para gaca gunli' ba nalí quia' lógaquië' bōnni' ni', en lógaquië' bōnni' biti' nácagaquië' judío.

19 Ní'irö cate' ulu'dödë' libí'ili' lu ná'agaquië' bōnni' unná bë' na', biti' cö'öli' bōniga nacxi innali', tu' ichizë' Dios icja ládxi'do'oli' didza' güi'ili', en ca innali' la' dza ná'asö.

20 Calëga libí'isili' na' innali', pero Dios Bö' Lá'ayi, Nu na' risöl-lë'ë Xúziru' Dios queéli', Lë cazë' sóalenë' libí'ili', en gu'ë didza'.

21 'Ila'cuá' bōnachi ulu'dödi böchi'guequi lu ná'agaquië' bōnni' ilútië' légaquië', en lësca' caní, bōnni' nácagaquië' xuz ulu'dödë' zxí'inigaquië', ate' ila'cuá'abi' bi'i ila'dá'baga'bi' xúzgcabi', en ilunbi' ga ilátië' xúzgcabi' na'.

22 Yúgu'të bönachi ulu'zóa libí'ili' tsölá'alö tu' dá'ali' neda', pero nu ugá'ana tsutsu ga idxinrö dza údxi, nu ni ulá.

23 Cate' ulu'saca' zí' bönachi libí'ili' tu lu yödzö, buli'zxunnaj ni', ate' tséajli' ia'tú yödzö, tu' rea' libí'ili', huöda' neda', Bönni' Guljé' Bönachi, zí'alö cate' údxi gunli' libán gapa nacuá' yugu' yödzö quégaca bönachi Israel.

24 'Núti'tës bönni' náquië' bönni' usëda biti' nácarë' lo ca nu rusëdi lë', en lësca' caní, nu bönni' náquië' huen dxin biti' nácarë' lo ca xanë'.

25 Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'nnë' naca' Belzebú tu' xihui', ila'nnë' zí'irë' quégaca bönachi tá'gaquië' neda'.

Nu ral-la' gádxiru'

(Lc. 12:2-9)

26 Gunnë' ca' Jesús:

—Que lë ni na', biti' gádxili' bönachi. Hualá' lahui yúgu'të le raca bëdxi lándos, ate' huáca bë' yúgu'të le nagachi'.

27 Yugu' didza' ruí'ilena' libí'ili' ga naca chul-la, guli'quixjö' ga naca lu bení', ate' le rea' libí'ili' ga nagachi', guli'nnë' zidzaj ga naca lahui' lógaca bönachi.

28 Biti' gádxili' nupa tuti le nácacaca caz bönachi, pero biti' gaca ulu'suniti bö' naca cázaru'. Guli'gadxi Dios, Bönni' na' gaca gútië' idútë le nácali', en chú'unë' bö' naca cázali' lu guí' gabila.

29 'Ta'dá'uba' chópaba' biguínido' len tu dumí lásido', pero biti' ibíxiba' tuba' lu yu channö cabí ru'ë Xúziru' Dios lataj gaca caní.

30 Lësca' caní, nabábagaca yúgu'të guitsa' ícjali' lahuë' Dios.

31 Que lë ni na', biti' gádxili'. Ruí'itë'rö ládxi'ë Dios libí'ili' ca ruí' ládxi'ë-ba' zianba' biguínido'.

Yugu' bönni' ta'z'í lu ná'agaquië' Cristo lógaca bönachi

(Lc. 12:8-9)

32 Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá.

33 Bönni' ta'dá'baguë'ë lógaca bönachi, ila'nnë' biti' ta'dë'ë neda', lësca' caní neda' tá'bagaa' légaquië' lahuë' Xuza' zoë' yehua' yubá.

Jesús náquië' le run ga ila'ruáj choplö bönachi

(Lc. 12:51-53; 14:26-27)

34 Gunnë' ca' Jesús:

—Biti' guéquili' za'a idigu'a le ribequi dxi bönachi yödzölió ni. Biti' za'a idigu'a le ribequi dxi, pero za'a idigu'a le gun ga ila'rúaj choplö bönachi.

³⁵ Za'a ni, ate' guna' ga ila'dá'baga' bönachi xúzguequi, ate' yugu' nigula ila'dá'baga'nu ca' xiná'agacanu. Lësca' caní, yugu' nigula xzoa' lídxigacanu ila'dá'baga'nu xto' xzí'ininu.

³⁶ Caní gaca, la' di'a dzasö quégaca bönachi ulu'saca' zi luzé'eguequi.

³⁷ 'Nu nadxí'irö xuz xinë'e ca nadxí'i neda', biti' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', biti' naca bachi nu na' ta' neda'.

³⁸ Nu biti' si' lu në'e gaca ca tu bönni' söjté'ë lë'e yaga cruz, en ta' neda', biti' naca bachi guequi quia' neda'.

³⁹ Nu ruí'i ladxi' gun chi'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queëru'

(Mr. 9:41)

⁴⁰ Gunnë' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasöl-lë'ë neda'.

⁴¹ Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'.

⁴² Núti'tës nu unödzej queë' tu bönni'do' ni tu zxibíndo'os nisa tu' náquië' bönni' usëda quia' neda', le nácatë rea' libí'ili', biti' uniti nu na' le ral-la' si' lu në'ë Dios.

11

Ta'dxinë' bönni' nasöl-lë'ë Juan ga zoë' Jesús

(Lc. 7:18-35)

¹ Cate' Jesús budxi buzéajni'inë' yugu' bönni' usëda queë', buzë'ë ni', sa'yéajë' röjsédinë' bönachi, en röjenë' libán yugu' lu ládzagaca bönachi na'.

² Juan, bönni' buquilé' bönachi nisa, ni' yu'ë lidxi guíë, ate' biyönnë' ca nácgaca le runë' Jesús. Ní'irö Juan na' gusöl-lë'ë chopë' bönni' dá'gaquië' lë', ate' bila'dxinë' ga na' zoë' Jesús.

³ Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'tué' bönni'?

⁴ Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyönili', en rilé'eli'.

⁵ Guli'tsöjödxe' ca raca, tu'lé'enë' bönni' guchul-la guiöj lógaquië', ate' tu'zë'ë bönni' biti' guca ila'dë'. Nuhuöácagaquië'

bönni' gü'iguequinë' huë' nudzu' ruzödi, ate' ta'yönnë' bönni' gula'cödzuë'. Nnita' nabángaquië' bönni' gulatië', ate' raca libán que didza' dxi'a lógaca bönachi yechi'.

6 Bica' ba nu bönni' biti' gáquië' chopa ládxë'ë, biti' ubéaj ládxë'ë neda'.

7 Cate' yugu' bönni' na' dá'gaquië' Juan bulu'zë'ë sòjhuójgaquië', ní'irö gusí lahuë' Jesús ru'ílenë' bönachi nacua' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asö? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le?

8 Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado'? Nöz quézili' bönni' nácugaquië' lari' dxí'ado' nacu'ë lídxigaquië' bönni' ta'nná bë'ë.

9 Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatërë' lo ca ia'zica'rë' bönni' gulu'ë didza' uláz queë' Dios.

10 Caní naca, tu' náquië' Juan bönni' na' ru'í' didza' le nazúaj lu guichi lá'ayi ca naca queë', le rnna:

Buyú, risöl-la'a bönni' gubáz quia', inöruë' ca Li'.

Lë' upë'ë nöza ga tödu'.

11 Le nácatë rea' libí'ili'. Idútë yödzölió ni, cuntu nu zoa nácarö lo ca Juan, bönni' ni' buquilé' bönachi nisa, pero nu naca cuídi'do'os ga rinná bë' Nu na' zoa yehua' yubá nácatërö lo ca Juan na'.

12 'Cate' ni' gusí lahuë' buquilé' Juan bönachi nisa, ga ridx-intë na'a dza, bayudxi túngaca bönachi para ta'yaza ga rinná bë'ë Bönni' na' zoë' yehua' yubá, ate' nupa tunsö bayudxi ta'deli' le.

13 Ga bidxintë dza na' blë'ë Juan, le rinná bë' xibá queë' Moisés, en le bulu'zúajë' lu guichi yúgu'të bönni' gulu'ë didza' uláz queë' Dios gulu'i didza' ca rinná bë'ë Bönni' na' zoë' yehua' yubá.

14 Channö rë'ënili' si' lu ná'ali' lë ni, ral-la' inözili' Juan na' náquië' Elías, bönni' ni' bë'ë didza' uláz queë' Dios, bönni' na' Dios gunnë' ral-la' ilá' lahuë' leyúbölö dza ni zóaru' na'a.

15 Nu zoa nagui, en riyöni ral-la' uzë nagui.

16 '¿Bizxi ubéqui'tseda' ca nácagaca bönachi nacua' dza ni zóaru' na'a? Nácagaquië' ca yugu' bí'ido' ta'bö'öbi' lu yë'ëyi. Zidzaj tu lídzabi' luzá'agacabi',

17 ta'nnabi': "Rucödxitu' queëli' gui. ¿Bizx que biti' ruyá'ali'? Rul-la yéchi'tu' queëli'. ¿Bizx que biti' ribödxu yéchi'li'?"

18 Caní nácali', tu' bidë' Juan, ate' tu' cabí gü'í' gudahuë' ca ráguli' libí'ili', gunnëli' queë', gunnali': "Tu' xihui' dzágui lë'."

19 Ní'irō bidxina' neda', Bönni' Guljē' Bönachi, ate' re'aj rahua', ate' rnnēli' quia', rnnali': "Náquiē' bönni' huágulē'ē, en bönni' re'jē'. Náquiē' luzá'agaquiē' bönni' uquízxaj, en ia'zíca' rō huen dul-la'." Yöl-la' réajni' queē' Dios naca bē' ni'a que le tun nupa ta'zí' lu nē'eguequi le.

*Le gaca que nu bití' run ca rnna xtídžē'ē Dios
(Lc. 10:13-15)*

20 Ní'irō gusí lahuē' Jesús ruzenē' bach bönachi nacua' yugu' yödžö gapa ni' benē' zían yöl-la' huáca, tu' cabí tu'bí'ini ládxi'guequi.

21 Gudxē' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödžö Tiro, en lu yödžö Sidón yugu' yöl-la' huáca bena' ga zóali', dza nítēlō ulu'bí'i ládxi'gaca bönachi yödžö Tiro, en yödžö Sidón na', en ilácugaca lari' tēbi, en ulu'dxía dö ícjaguequi, le ulu'lu'i tu'bí'i ládxi'gaca bönachi na'.

22 Na'a, neda' rea' libí'ili', cate' idxín dza ichúguiē' Dios quégaca bönachi, quí'i sáca'röli' libí'ili' ca ila'gu'i ila'zaca' bönachi yödžö Tiro, en yödžö Sidón, nupa na' busunítiē' Dios.

23 Libí'ili', bönachi Capernaum, guca queēli' ca bidxintēli' ga nu riyaza yehua' yubá. Huötjali' lu guí' gabila. La'tu' gulaca yugu' yöl-la' huáca bena' ga zóali' lu yödžö Sodoma, ulu'gá'ana bönachi yödžö ni' ga ridxintē na'a dza.

24 Na'a, neda' rea' libí'ili', cate' idxín dza ichúguiē' Dios quégaca bönachi, quí'i sáca'röli' libí'ili' ca ila'gu'i ila'zaca' bönachi Sodoma na'.

*Rnnē' Jesús: "Guli'dá ga zoa', uzí' ládxi'li'"
(Lc. 10:21-22)*

25 Dza na' bē'ē didza' Jesús, rnnē':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lē ni, para cabí ila'lé'enē' bönni' ta'yéajni'ide'enē' le, pero bulu'ínu' nupa nácagaca ca yugu' bí'ido' le.

26 Ca' gaca, Xuza', tu' caní guyaza ládxi'u Li'.

27 Yúgu'tē nudödē' Xuza' lu na'a. Cuntu nu nunbē' neda', Zxí'inē' Dios, pero tuzē' Dios Xuz, en cuntu nu nunbē' Dios Xuz, pero tuza' neda', Zxí'inē' Dios, enca' nupa na' ré'ēnda' ulu'ida' léguequi Dios Xuz.

28 Guli'dá ga zoa' yúgu'tēli' röjxéqui'li' tu' rúntica'sili' dxin que yöl-la' yudo', en nuá'ali' yua' zí'i quégaca xibá que, ate' neda' guna' ga uzí' ládxi'li'.

29 Lu yöl-la' nōxaj ladxí' queēli' guli'gún xichina', gácali' ca bēdxi ta'zí'iba' yugu' quegacaba'. Guli'sēda lu na'a neda', tu'

naca' nōxaj ladxi', en do' ladxi', ate' idzöli yöl-la' ruzí' ladxi' queëli', le cuéqui dxi ládxi'li'.

³⁰ Yugu' na' ugu'a libí'ili', le naca le inná bé'eda' libí'ili', bití' naca bōniga, ate' yua' ugu'a libí'ili' le naca le rusédida', dzá'do'os naca.

12

Ta'lecjē' do bōnni' usēda queē' Jesús dza lá'ayi

(Mr. 2:23-28; Lc. 6:1-5)

¹ Dza ni', le naca dza lá'ayi quégaquiē' bōnni' judío, gudödē' Jesús gapa dē yōla xzoa' xtila, ate' ta'dunē' bōnni' usēda queē', en gusi lógaquiē' ta'lecjē' do ga dxía xzoa' xtila, en tahuē' xzoa' xtila na'.

² Cate' bila'lé'enē' bōnni' yudo' fariseo lē ni, tē' Jesús:

—Buyútsöca', tunē' bōnni' usēda quiu' le cabí ral-la' gunru' dza lá'ayi.

³ Ní'irō Jesús gudxē' légaquiē':

—¿Naru' cabí nulábanili' lu guichi lá'ayi bi benē' David cate' gudunē', ate' gula'dún ca' nupa gula'cuá'len lē'?

⁴ Guyu'ē lu yu'u queē' Dios, en gudahuē' yugu' yōta xtila nagú'ugaquiē' lu bucugu lá'ayi, le cabí ral-la' gahuē' lē', en bití' ral-la' ilahuē' bōnni' gula'cuá'lenē' lē', pero légacsē' bixúz dē lataj ilahuē' le.

⁵ ¿Naru' cabí nulábanili' le rinná bē' xibá queē' Moisés ca tunē' bixúz yugu' dza lá'ayi? Tunē' dxin lö'a yudo' yugu' dza lá'ayi, en bití' ta'báguē'ē xíguia'.

⁶ Na'a, neda' rea' libí'ili', zoa' neda' ni, en naca' bōnni' nácarē' lo ca yudo'.

⁷ Bití' réajni'ili' lē na' nazúaj lu guichi lá'ayi, le rnna: “Rē'ēnda' huéchi' ládxi'li' luzá'ali', en calēga gútigacali'-ba' böa' bēdxido' ruzégui'gacali'-ba' lu bucugu lá'ayi quia'.” La'tu' réajni'ili' lē ni, bití' ichúguli' quégaca nupa bití' nabága'gaca xíguia'.

⁸ Ca' naca, tu' naca' neda', Bōnni' Guljē' Bōnachi, Xani dza lá'ayi.

Jesús ruúnē' tu bōnni' narequi' nē'ē

(Mr. 3:1-6; Lc. 6:6-11)

⁹ Ní'irō buzē'ē Jesús ni', ate' guyu'ē lu yu'u ga tu'dubē' bōnni' judío, en tu'sédē' queē' Dios.

¹⁰ Lu yu'u na' zoē' tu bōnni' narequi' nē'ē, ate' tu' tē'ennē' bōnni' judío unná bē' ila'dzölinē' bi ulu'zégui'ē Jesús didza', que lē ni na' gula'nábinē' Lē', ta'nnē':

—¿Naru' dē lataj unru' nu re'e cate' naca dza lá'ayi?

¹¹ Bubi'ē didza' Jesús, rē' légaquiē':

—Nu bönni' nútsë'ë ládjali', channö zóaba' tuba' bö'cu' zxila' queë', en channö ibíxiba' lu yeru cate' naca dza lá'ayi, ¿naru' cabí tsöjxönë'-ba', en tsöjléajë'-ba'?

12 Nazáca'tërë' tu bönni' ca tuba' bö'cu' zxila'. Que lë ni na', dë lataj gunru' le naca dxi'a quégaca bönachi cate' naca dza lá'ayi.

13 Ní'irö Jesús gudxë' bönni' huë' na':

—Bulí no'o.

Cate' bulí në'ë, la' böácatë dxi'a ca naca ia'tsólá'a në'ë.

14 Ní'irö bulu'rúajë' bönni' yudo' fariseo na', ate' gulún xtídza'gaquië' para gaca ilútië' Jesús.

Le gunné' tu bönni' bë'ë didza' uláz queë' Dios ca ral-la' gaca queë' Jesús

15 Cate' réquibe'enë' Jesús lë ni, buzë'ë ni', ate' sôjácálen bönachi zían Lë'. Jesús bunë' yúgu'të nupa te'e ladaj bönachi na',

16 en gunná bé'enë' léguequi bití' usiyönguequi bönachi Nu náquië'.

17 Caní gunné', para gaca lë na' gunné' Isaías, bönni' bë'ë didza' uláz queë' Dios, gunné':

18 Bulí'yútsöca', Bönni' ni náquië' Huen Dxin quia', na' gurö caza' neda' Lë'.

Nadxí'ida' Lë', en raza ládxa'a Lë'.

Ichiza' Lë' Bö' Lá'ayi.

Lë' usiyönnë' yúgu'të bönachi ca guna', uchi'a usöröa' quéguequi.

19 Cuntu nu tíl-lalenë' didza', en bití' ulidzë' zidzaj.

Cuntu nu yöni chi'ë ga naca zi'tu'.

20 Tu guído' zoa bö bití' quítsjë' le, ate' guí' chizóa ulu, bití' usúluë' le, cate' uzóarë' le naca tsahui' queë'.

21 Yúgu'të bönachi ilún löza Lë'.

Ta'nnë' bönni' judío unná bë': "Dzaga Jesús tu' xihui'"

(Mr. 3:19-30; Lc. 11:14-23; 12:10)

22 Ní'irö dujuá'gaquië' tu bönni' ga zoë' Jesús, nachul-la lahuë', en bití' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, rilé'enë', en ru'ë didza' bönni' na' guchul-la lahuë', en bití' guca gu'ë didza'.

23 Que lë ni na' bulu'bani yúgu'të bönachi nacuá' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

24 Cate' bila'yönnë' bönni' yudo' fariseo lë ni, ta'zá' ládxe'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

25 Réquibe'enë' Jesús lë na' ta'zá' ládxi'gaquië', ate' rë' légaquië':

—Gátí'tës ga ta'nná bë' bönachi, channö bönachi ni' ila'rúaj choplö, en ila'díl-lalen luzë'eguequi, initi yöl-la' unná bë' quéguequi. Lësca' caní, channö ila'rúaj choplö bönachi nacuá' tu yödzo o tu yu'u, en ila'dil-la, bití' gaca ila'día' bönachi nacuá' yödzo na' o yu'u na'.

26 Lësca' caní, channö ubéaj Satanás tu' xihui' la' luzë'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'?

27 Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca libí'ili' cate' tu'béaj yugu' bö' xihui'? Que lë ni na' le túngaca caz naca bë' nachíxili'.

28 Na'a, channö neda' rubéaja' yugu' bö' xihui' tu' zóalen yöl-la' huáca queë' Dios Bö' Lá'ayi neda', le nácatë chibidxín le rinná bë'ë Dios ga zóali'.

29 '¿Naru' huácatsö nu bönni' tsu'ë lidxë' bönni' nal-la, en cuéajë' yöl-la' tsahui' dzö'ö lidxë' channö cabí gúguë'ë bönni' nal-la na' zí'alö? Ní'irö gaca tsu'ë, en ulatjé' lidxë' bönni' nal-la na'.

30 'Nu bití' run neda' tsözxön, ridá'baga' neda', en nu bití' rutubi tsözxön len neda', rusilasi nu na'.

31 'Que lë ni na' rea' libí'ili', ca naca yúgu'të dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' innë' zi'ë queë' Dios Bö' Lá'ayi, bití' ca' uniti lahuë' Dios lë'.

32 Lësca' caní, nu bönni' innë' quia' neda', Bönni' Guljé' Bönachi, Dios uniti lahuë' lë', pero nu bönni' innë' queë' Dios Bö' Lá'ayi, bití' ca' uniti lahuë' Dios lë'. Bití' uniti lahuë' lë' dza ni zóaru' na'a, en bití' uniti lahuë' lë' dza si' za'.

Le runru' naca bë' le nácaru'

(Mt. 7:15-20; Lc. 6:43-45)

33 Gunnë' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'.

34 Libí'ili' nácali' di'a dza quégacaba' bëla sínia'. ¿Nacxi gaca güi'ili' dxi'a didza', channö cabí nácali' dxi'a? Ca naca le ta'zá' ládxi'gaca bönachi, lësca' caní tuí'i didza'.

35 Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' bití' naca tsahui' tu' yu'u le cabí naca tsahui' icja ládxi'da'ahuë'.

36 Que lë ni na' rea' libí'ili', cate' idxín dza ichúguië' Dios quégaca bönachi, uchi'a usöröë' tu tu bönni' ca naca yúgu'të didza' gula'nnazë' ca'.

³⁷ Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bē'u.

Ta'nábinē' Jesús gunē' le gaca bē' nu náquiē'

(Mr. 8:12; Lc. 11:29-32)

³⁸ Ní'irö bulu'bi'ē didza' yugu' bönni' yudo' fariseo, en yugu' bönni' yudo' tu'sédinē', en tē' Jesús:

—Bönni' Usedi, rē'ënitu' ilé'etu' tu le gunu' le gaca bē' dē lu no'o yöl-la' unná bē'.

³⁹ Bubi'ē didza' Jesús, en rē' légaquiē':

—Yugu' bönni' tuá' dö' ni, biti' zoa idú ládxi'do'gaquiē', ta'nábinē' neda' guna' tu le gaca bē' nu naca'. Biti' bi le gaca bē' ila'lé'enē', pero le naca bē'sö na' ca guca queē' Jonás, bönni' bē'ē didza' uláz queē' Dios.

⁴⁰ Ca na' guca queē' Jonás na', bugá'anē' lē'ëba' tu böla zxön idú tsonna dza tsonna yëla, lësca' caní gaca quia' neda', Bönni' Guljē' Bönachi, tsonna dza tsonna yëla ugá'ana' zxan yu.

⁴¹ Ila'yasē' bönni' gula'cu'ē yödzo Nínive dza ichúguiē' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le gulunē' usubaga' bönachi ni xíguia' tu' bulu'bí'i ládxi'gaquiē' bönni' Nínive na' cate' ni' busiyönnē' Jonás légaquiē' xtídzē'ē Dios, ate' na'a zoa' ni neda', en nácatëra' lo ca Jonás na'.

⁴² Lësca' caní, nigula ni' gunná bé'enu yödzo dē saca' ga ridödi gubidza beo' ziaga chásanu dza ichúguiē' Dios quégaca bönachi cate' uchi'a usöröë' bönachi nacua' dza ni zóaru' na'a, ate' le bennu usubaga' légaquiē' xíguia', tu' birúajnu nigula na' ga nácatëro' zi'tu' para yöninu didza' réajni'i bē'ē Salomón, ate' na'a zoa' ni neda', en nácatëra' lo ca Salomón na'.

Cate' rudxín tu bö' xihui' xilataj

(Lc. 11:24-26)

⁴³ Gunnē' ca' Jesús:

—Cate' rirúaj tu bö' xihui' yu'u bönni', ridá gapa nabitxi, riguilaj ga uzí' ladxi'. Channö cabí idzöli ga na' uzí' ladxi',

⁴⁴ ní'irö inná: "Huöja' xilatja' ga ni' birúaja'." Cate' udxín ga ni' birúaj, tsöjxaca' bönni' na', náquiē' ca tu yu'u nadachi', en nalúaj, en chinabá'a para nu tsöjsóa ni'.

⁴⁵ Ní'irö tseaj, tsöjzxi' ia'gadxi bö' xihui' nácatëro' xihui' ca le, ate' ila'yaza yúgu'tē, en ila'cuá' icja ládxi'ahuē' bönni' na', ate' ga údxi huayáli'tëro ca gaca queē' bönni' na' ca guca queē' zí'alö. Lësca' caní gaca quégaca bönachi tuá' dö' ni.

Xinë'ē Jesús, en yugu' bönni' böchë'ē

(Mr. 3:31-35; Lc. 8:19-21)

46 Cate' ni' ru'ilenē' Jesús bönachi didza' ni, xinē'ë, en yugu' bönni' böché'ë bila'dxinē' ni'. Gula'cu'ë lö'alö, en gulē'ëniaguequinē' ilu'ilenē' Jesús didza'.

47 Ní'irö tu bönni' busiyönnē' Jesús, en rē' Lē':

—Buyútsöca', nacu'ë xinó'o, en yugu' bönni' böchu'u lö'alö, en tē'ënnē' ilu'ilenē' Li' didza'.

48 Bubi'ë didza' Jesús, en rē' bönni' na' busiyönnē' Lē' caní, rnnē':

—¿Nözili' nuzxi caz xiná'a, en nupxi caz bönni' böcha'a?

49 Ní'irö bulí nē'ë, en bulu'e yugu' bönni' usēda queē', en rnnē':

—Bulí'yútsöca', bönni' ni nácaqaquiē' ca xiná' caza', en yugu' böchi' caza'.

50 Núti'tēs nu run ca rē'ëni quézinē' Xuza' zoē' yehua' yubá, nu ni naca bi'i böchi' caza', en bi'i zan caza', en xiná' caza'.

13

Rucúdzu'ë didza' Jesús ca naca queē' tu bönni' guz

(Mr. 4:1-9; Lc. 8:4-8)

1 La' dza ní'sö birúajē' Jesús niu' yu'u, ate' yöjchö'ë ra' nísado'.

2 Tu' bila'dxín bönachi zían ga zoē' Jesús, gurenē' tu lē'e bárcodo', en gurö'ë ni', ate' bönachi zían na' gula'cuá' luyú bidxi ra' nísado' na'.

3 Ní'irö Jesús bë'lenē' légaquiē' didza', zían le busédinē' légaquiē'. Bucúdzu'ë didza', rnnē':

—Bulí'yútsöca', birúajē' tu bönni' guz, sōjësiē' xisedo'.

4 Tsanni ni' sōjësiē', bal-la xisedo' na' gulasi ra' nöza, ate' bila'dxinba' biguínido', en gulē'ajba' xisedo' na'.

5 Gulasi ia'zica'rö xisedo' na' luyú ga rö'ö guiöj, ga na' rö'ö láti'sö yu, ate' la' gula'lentē, tu' cabí rö'öda' yu ni'.

6 Ní'irö cate' budzá'a gubidza, lē na' bësiē' la' gula'cuáditē, en gula'bidxi, tu' cabí dē ga ilún luí.

7 Gula'lén ia'zica'rö xisedo' na' ga bulu'lén lubá yötsi', ate' gula'zxön lubá yötsi' na', en bila'röli lē na' bësiē', en gulún ditaj le.

8 Gulasi ia'zica'rö xisedo' na' ga naca luyú bëbu, ate' bulu'nödzej. Bal-la lē na' bësiē' bulu'nödzej ia'tú gayuá'tērö ca'. Ia'zica'rö bulu'nödzej ia'tsónnalalaj ca', ate' ia'zica'rö bulu'nödzej ia'chí uruá' ca'.

9 Nu zoa nagui, en riyöni, ral-la' uzē nagui.

Le tē'ëni ilún le bucúdzu'ë Jesús didza'

(Mr. 4:10-12; Lc. 8:9-10)

10 Ní'irö bila'dxinē' bönni' usēda queē' Jesús ga zoē', en gula'nábinē' Lē', ta'nnē':

—¿Bix que ru'ílenu' bönachi didza' yugu' le rucúdu'u didza'?

¹¹ Bubi'ë didza' Jesús, en rë' légaquië':

—Dios ru'ë libí'ili' lataj tséajni'ili' le nagachi' ca rinná bē'ë Lē' yehua' yubá, pero bönachi ni biti' té'ëni ila'yéajni'i.

¹² Nu si' xtídzē'ë, Dios unödzjē' que ia'lati', ate' gáta'da'arö que, pero nu biti' si' le, la's dui le dē que udúa.

¹³ Que lē ni na' ru'ílena' légaquië' didza' yugu' le rucúdu'a didza', tu' tu'yúë' pero biti' ta'lé'enē'. Ta'yönnē' pero biti' tu'zē nágagaquië', en biti' ta'yéajni'inē'.

¹⁴ Caní raca quégaquië' para gaca ca na' gunnē' Isaías, bönni' bē'ë didza' uláz queë' Dios, gunnē':

Le nácatē yönili' pero biti' tséajni'ili'.

Uyuli' iná'ali' pero biti' ilé'eli'.

¹⁵ Caní raca tu' nazidi ládxi'do'gaca bönni' ni,

en biti' bi riyaza icja nágagaquië'.

Nadzudi' guiöj lógaquië',

para cabí ila'lé'enē' len guiöj lógaquië' na'.

Biti' ulu'zē nágagaquië',

en biti' ulu'zéajni'i ládxi'gaquië',

en biti' ulu'huóáquië' quia' neda'

para gaca una' légaquië'.

¹⁶ 'Na'a, bica' ba libí'ili', tu' rilé'e guiöj loli', en riyöni nágali'.

¹⁷ Le nácatē rea' libí'ili', zían bönni' gulu'ë didza' uláz queë'

Dios en yugu' bönni' tsahui' gulé'ënnē' ila'lé'enē' le rilé'eli'

libí'ili' pero biti' bila'lé'enē' le. Gulé'ënnē' ila'yönnē' le riyönili'

libí'ili' pero biti' bila'yönnē' le.

Riguíxjö'ë Jesús le bucúdu'ë didza'

(Mr. 4:13-20; Lc. 8:11-15)

¹⁸ Gunnē' ca' Jesús:

—Buli'zē nágali' ca naca le bucúdu'a didza' que bönni' guz.

¹⁹ Núti'tēs nu riyöni didza' ca rinná bē'ë Dios yehua' yubá,

en biti' réajni'i le, raca que didza' riyöni nu na' ca guca que

xisedo' na' gulasi ra' nöza. La' za'tē tu' xihui', en rugúa didza'

na' guyú'u icja ládxi'da'ahuë' bönni' na'.

²⁰ Xisedo' na' gulasi luyú ga rö'ö guiöj rulu'i ca raca queë'

bönni' riyönnē' didza' na', en la' ruzetē náguië' lu yöl-la' rudzeja

queë',

²¹ pero ca na' biti' ridía' xisedo' na' tu' cabí dē ga gun luí,

lēsca' caní raca queë' bönni' ni. Cate' idxín tu le usaca' zi' lē',

ate' ila'bía nágaca bönachi lē' tu' nazí' lu nē'ë didza' na', la'

gácatē chopá ládxi'ë'.

²² Xisedo' na' gulasi ga na' bulu'lén lubá yötsi' rulu'i ca raca

queë' bönni' na' riyönnē' didza' na', pero ru'i ládxi'ë' yugu' le

dē yödzölió ni, ate' nazí' yē'ë bönni' na', tu' ru'i ládxi'ë' yugu'

yöl-la' tsahui' que. Yugu' lë ni ta'röli didza' na', en tun ga biti' gun dxin lu icja ládxi'da'ahuë'.

²³ Xisedo' na' gulasi luyú bëbu rulu'i ca raca queë' bönni' riyönnë' didza' na', en réajni'inë' le, ate' run dxin didza' na' lu icja ládxi'da'ahuë'. Nácagaca bal-la bönachi ca xisedo' na' bulu'nödzej ia'tú gayuá'tërö ca'. Nácagaca ia'zica'rö bönachi ca xisedo' na' bulu'nödzej ia'tsónnalalaj ca', ate' nácagaca ia'zica'rö bönachi ca xisedo' na' bulu'nödzej ia'chí uruá' ca'.

Tu guíxi'do' cané le nalá' ca rilá' yöla xzoa' xtila

²⁴ Ia'tú le bucúdzu'ë didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyúë'.

²⁵ Tsanni na' tasië' bönni' nacu'ë lidxë', bidxín tu nu biti' rilé'e xan yu'u na' dxi'a, ate' yöjözä lu xiyúë' xisedo' guíxi'do' cané le nalá' ca naca yöla xzoa' xtila, ate' böaj xilataj.

²⁶ Cate' gulén xzoa' xtila na', en gurö'ö do que, ga na' dxía xui'i, ní'irö gulaca bë' guíxi'do' cané na'.

²⁷ Ní'irö bila'dxinë' bönni' huen dxin ga zoë' bönni' xan la' yëla na', en tē' lë': "Xan, channö guzu' xisedo' dxi'a lu yu quiu', ¿nacxi guca gula'lén guíxi'do' cané na'?"

²⁸ Xan yu na' gudxë' légaquië', rnnë': "Tu bönni' biti' rilé'enë' neda' dxi'a benë' caní." Ní'irö gula'nábinë' huen dxin queë' lë', ta'nnë': "¿Ba rë'ënu' tséajtu' tsöjölajtu' guíxi'do' cané na'?"

²⁹ Xángaqüië' rë' légaquië': "¡Biti' ca'! Nadx ca' cate' iládzu'li' guíxi'do' cané na', iládzu'lentëli' ca' yöla xzoa' xtila.

³⁰ Gácarö dxi'a gü'ili' lataj ila'zxöngarö tsözxön cate' idx-inrö dza tsöjtúbiru' le, ate' ní'irö guía' nupa ulu'tubi le: Buli'tubi zí'alö guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' xzoa' xtila lu yu'u quia'."

Rucúdzu'ë didza' Jesús ca naca que xisé mostaza

(Mr. 4:30-32; Lc. 13:18-19)

³¹ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá, gaca ca raca que tu xisé mostaza, le guzë' tu bönni' ga naca lu xiyúë'.

³² Le nácatë xisé mostaza na' nácatërö cuidi' ca yúgu'të xisedo' ia'zica'rö, pero cate' chinadúz, rizxöntërö ca yúgu'të guixi' cuan, en rizxön ca naca tu yaga, ate' ta'dxinba' biguínido', en tunba' xicá'agacaba' lu ni'a në'e.

Rucúdzu'ë didza' Jesús que cúa zi que yöta xtila

(Lc. 13:20-21)

³³ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjözä xzoa' xtila, ate' guyazxa idütë cúa na'.

Le rě'ëni gun le rucúdzu'ë didza' Jesús

(Mr: 4:33-34)

³⁴ Yúgu'të lë ni bucúdzu'ë didza' Jesús, le bě'leně' bönachi nacua' ni' didza', en biti' bi didza' bě'leně' légaquiě' le cabi bucúdzu'ë didza'.

³⁵ Caní beně' para gaca lë na' buzúajě' lu guichi tu bönni' bě'ë didza' uláz queě' Dios, gunně':

Gu'a didza' yugu' le ucúdzu'a didza'.

Innía' yugu' le nagachi' cate' ni' gusí lo si' guta' yödzölió.

Rigúxjö'ë Jesús le bucúdzu'ë didza' que guíxi'do' cané

³⁶ Ní'irö buzeně' Jesús bönachi nacua' ni' didza', en gusól-lě'ë légaquiě', ate' guyu'ë yu'u. Ní'irö bila'dxině' bönni' uséda queě' ga zoě', en tē' Lě':

—Gudíxjö'i' netu' le rě'ëni inná lë na' bucúdzu'u didza' que guíxi'do' cané le nalá' ca naca yöla xzoa' xtila.

³⁷ Bubi'ë didza' Jesús, ate' rě' légaquiě':

—Bönni' razě' xisedo' dxi'a naca' neda', Bönni' Guljě' Bönachi.

³⁸ La' yëla na' naca yödzölió ni, ate' xisedo' dxi'a na' tu'lu'í ca nácagaca nupa nabábagaca ga rinná bě'ë Dios. Guíxi'do' cané na' le nalá' ca naca yöla xzoa' xtila tu'lu'í ca nácagaca nupa néquiquequi que tu' xihui'.

³⁹ Nu na' biti' rilé'e dxi'a xan la' yëla na', en yöjözä guíxi'do' cané na', tu' xihui' caz naca. Dza ulu'tubě' na' rulu'í ca gaca dza údxi que yödzölió ni, ate' nupa na' tu'tubi nácagaca gubáz lá'ayi queě' Dios.

⁴⁰ Ca na' guca, bulu'tubě' guíxi'do' cané na', en bulu'zégui'ë le lu guí', lěsca' caní gaca cate' údxi que yödzölió ni.

⁴¹ Neda', Bönni' Guljě' Bönachi, isól-la'gaca'-ně' gubáz lá'ayi quia', ate' ulu'béajě' ga rinná bě'ë Dios yúgu'të nupa tun ga tun dul-la' luzě'eguequi, enca' nupa tuá' dö'.

⁴² Yugu' gubáz lá'ayi na' ila'gu'ë bönni' tuá' dö' na' lu guí' gabila. Ní' ila'bödxě', en ulu'tíl-la láy'gaquiě'.

⁴³ Ní'irö ila'yěpi yösa bení' bönachi tsahui', en ilácagaquiě' ca gubidza ga ni' rinná bě'ë Dios yehua' yubá. Nu zoa nagui, en riyöni ral-la' uzě nagui.

Rucúdzu'ë didza' Jesús que tu yöl-la' tsahui' nagachi'

⁴⁴ Lěsca' caní bucúdzu'ë didza' Jesús, rnně':

—Le rinná bě'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzölině' tu bönni' le, bucáchě'ë le leyúbölö ga na' bigachi', ate' lu yöl-la' rudzeja queě' guyijě', yöjěti'ë yúgu'të le dë queě' ate' gú'uě' la' yëla na' para gata' yöl-la' tsahui' na' queě'.

Rucúdzu'ë didza' Jesús que tu bugá le nazáca'da'

⁴⁵ Gunně' ca' Jesús:

—Ca ral-la' sē lādxi'li' le rinná bē'ē Dios yehua' yubá naca ca benē' tu bōnni' rá'uē', en ruúti'ē, en riguiljē' bugá nazáca'gaca.

46 Cate' bidzōlinē' tu bugá le nazáca'da', guyijē', yōjēti'ē yúgu'tē le dē queē', ate' gú'uē' bugá na'.

Rucúdzu'ē didza' Jesús que tu yōxaj böla

47 Lēasca' caní gunnē' Jesús:

—Ca gaca ga ridxín le rinná bē'ē Dios yehua' yubá, gaca ca run tu yōxaj böla le ta'chiljē' bōnni' lu nísado', le rōjxí' zían böla izá'a.

48 Cate' chibidzá' yōxaj na', bulu'béajē' le luyú bidxi ra' nísado' na', ate' gula'bō'ē ni', en gula'gu'ē-ba' yugu' böla dxi'a tu lu ga'bōra, pero gula'rú'unē'-ba' yugu' böla cá'asō.

49 Lēasca' caní gaca cate' údxi que yōdzōlió ni. Ila'rúajē' gubáz lá'ayi queē' Dios, ate' ulu'béajē' quez yugu' bōnachi tsahui', ate' ulu'cuítie' légaquie' ladaj bōnachi tuá' dō'.

50 'Ní'irō ila'gu'ē bōnachi tuá' dō' na' lu guí' gabila. Ni' ila'bōdxē', en ulu'tíl-la láyē'ē.

Yöl-la' tsahui' le naca gula, en le naca cubi

51 Ní'irō Jesús gunábinē' yugu' bōnni' usēda queē', rnnē':

—¿Ba réajni'ili' yúgu'tē lē ni?

Bulu'bi'ē didza', tē' Lē':

—Ön, Xan.

52 Jesús gudxē' légaquie':

—Cate' tu bōnni' yudo' usedi chinazí' lu nē'ē le rinná bē'ē Dios yehua' yubá, náquie' ca tu bōnni' xan yu'u, rubéajē' ladaj yöl-la' tsahui' queē' le naca cubi, en le naca gula, le nácagaca tsahui' le ruzi'ē xibé.

Le benē' Jesús lu yōdzō Nazaret

(Mr: 6:1-6; Lc. 4:16-30)

53 Cate' budxi bucúdzu'ē Jesús yugu' didza' ni, buzē'ē ni'.

54 Cate' budxinē' ladzē', busédinē' bōnachi nacua' lu yu'u ga tu'dubē' bōnni' judío, en tu'sédē' queē' Dios, ate' bulu'bánninē', ta'nnē':

—¿Gazxi caz guzēdē' bōnni' ni yöl-la' réajni'i ni? ¿Nacxi caz naca, runē' yugu' yöl-la' huáca ni?

55 Náquie' bōnni' ni zxí'inē' bōnni' gubēdxi yaga, ate' xinē'ē lēnu María. Náquie' bōchi'gaquie' Jacobo, en José, en Simón, en Judas.

56 Lēasca' nigula zanē' nacua'lennu rē'u ni. ¿Gazxi caz guzēdē' yúgu'tē lē ni?

57 Que lē ni na' gulaca chopa lādxi'gaquie', ate' bulu'cá'anē' Lē'. Ní'irō Jesús gudxē' légaquie':

—Yúgu'të bönachi tun bal tu bönni' ru'ë didza' uláz queë' Dios, pero bönachi uládz queë', en bönachi nacuá' lidxë' biti' tun lë' bal.

⁵⁸ Que lë ni na' biti' benë' Jesús zían yöl-la' huáca ni', tu' cabí ta'yéajlë'ë Lë'.

14

Ca bëtgaquie' Juan, bönni' buquile' bönachi nisa
(Mr. 6:14-29; Lc. 9:7-9)

¹ Lu dza ni', biyönnë' Herodes, bönni' rinná bë'ë luyú Galilea, ca nácagaca yugu' yöl-la' huáca runë' Jesús.

² Herodes na' gudxë' yugu' ni'a në'ë, rnnë':

—Bönni' na' Juan, bönni' buquile' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zxön na'.

³ Caní gunné' Herodes tu' gusöl-lë'ë lë cazë' bönni' gula'zönë' Juan, en gulúgui'ë lë' du guië, ate' gula'gu'ë lë' lidxi guië tu' gú'uninu Herodías ilunë' caní. Herodías na' gúcanu nigula queë' Felipe, böchë'ë Herodes na'.

⁴ Caní benë' Herodes, tu' gudxë' Juan na' lë': "Biti' ral-la' sóalenu'-nu."

⁵ Que lë ni na' gú'unnë' Herodes gútië' Juan, pero gúdxinë' ila'dá'baga' bönachi lu yödzö ni' lë', tu' téquiquequi bönachi náquie' Juan na' tu bönni' ru'ë didza' uláz queë' Dios.

⁶ Ní'irö cate' guca laní que dza guyé'enë' iz Herodes, birúajbi' bi'i nigula queënu Herodías na', en buyá'abi' lógaca nupa nacuá' laní na', ate' guyaza ládxë'ë Herodes le benbi'.

⁷ Guzxí' lu në'ë Herodes, en benë' tsutsu xtídzë'ë unödzjë' queëbi' bíti'tës bi inábibi' lë'.

⁸ Tu' chibusédinu-bi' zí'alö xiná'abi', gúdxibi' lë':

—Benna quia' na'a icjë' Juan, bönni' buquile' bönachi nisa. Gulú'u le tu lu zxiga' zxön.

⁹ Ní'irö buí'innë' Herodes, pero tu' chibenë' tsutsu xtídzë'ë, en tu' bila'yöni nupa te'aj tágulen lë', que lë ni na' gunná bé'enë' nu tsöjnödzaj icjë' Juan na' queëbi'.

¹⁰ Caní guca, gusöl-lë'ë nu tsöjrixí yenë' Juan ga ni' yu'ë lidxi guië.

¹¹ Bönni' na' nasöl-lë'ë bu'ë icjë' Juan na', zxoa lu zxiga' zxön, ate' bunödzjë' le queëbi' bi'i nigula na', ate' lëbi' buá'abi' le queënu xiná'abi'.

¹² Ní'irö bila'dxinë' bönni' gula'dë'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequinë' Jesús ca gulaca lë ni.

Jesús rugahuë' zíanrö ca chi-un gayuá' bönachi
(Mr. 6:30-44; Lc. 9:10-17; Jn. 6:1-14)

13 Cate' réquibe'enë' Jesús lë ni, buzë'ë ni', ate' gurenë' tu lë'e bárcodo', en sa'yéajë' la' queëzë' tu lataj cá'asö. Cate' bila'yöni bönachi zéajë' ni', bila'rúaj yugu' yödzö ni', en yöjaca ga ni' idxinë' Jesús, ta'zë'e ní'aguequi.

14 Cate' burúajë' Jesús lë'e barco, bilé'enë' nacua' bönachi zían ni', ate' buéchi' ládxe'ë léguequi, en bunë' nupa te'e, nútsa'gaca ladjaguequi.

15 Cate' chiridzö' dza na', bila'dxinë' yugu' bönni' usëda queë' Jesús ga zoë', en të' Lë':

—Chiridzö' na'a, ate' cá'asö naca lataj ni. Busöl-la' bönachi ni para tsöjaca gapa dë yödzödo' para gá'ugaca bi ilagu.

16 Ní'irö Jesús gudxë' légaquië':

—Biti' run bayudxi tsöjáquië'. Buli'nödzej libí'ili' le ilahuë'.

17 Ní'irö të' Lë':

—Gáyu'sö yöta xtila dë, en chópasöba' böla dëba' queëtu' ni.

18 Jesús rë' légaquië':

—Buli'dödi le lu na'a.

19 Ní'irö Jesús gunná bé'enë' bönachi na' ila'bö' ga yu'u daca'. Gudödi na' gudélë'ë gayu' yöta xtila na', en chópaba' böla na', ate' guchisa lahuë', ruyúë' zaca' yehua' yubá. Gudxë' Dios: "Xclenu'." Ní'irö buzzuxjë' yöta xtila na', en budödë' le lu ná'agaquië' bönni' usëda queë', ate' légaquië' gula'guísië' le lógaca bönachi zían na'.

20 Gulahuë' yúgu'tëgaquië', en bulu'huöljanë'. Ní'irö bulu'tubë' yugu' bizxaj nagá'anagaca, en bulu'lié' chinnu ga'böra.

21 Bönni' ni' gulahuë' guláquië' idú chi-un gáyu'ë, pero cuntunu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

22 Ní'irö la' bentë' Jesús ga gula'benë' bönni' usëda queë' lë'e bárcodo', en tsöjáquië', ila'nöruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'.

23 Cate' chibusöl-lë'ë Jesús bönachi na', gurenë' tu lu guíado' ga ni' yöjsöë' tuzë'. Ni' bulidzë' Dios. Cate' chigul-la, tuzë' zoë' ni'.

24 Bárcodo' ga na' nacu'ë bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridxia nísado' na', ate' ruzaga' bö' recja barco na'.

25 Gudödi guluhuëla, gubígui'ë Jesús gala' ga na' nacu'ë, rizë'e ni'ë lu nísado'.

26 Cate' yugu' bönni' usëda queë' bila'lé'enë' Lë', rizë'e ni'ë lu nísado', gula'bö'dë'ë böniga tu' tádxinë'. Gula'bödxí'ë, ta'nnë':

—Tu' ridasö na'.

27 Ní'irö Jesús la' bulidztë' légaquië', rnnë':

—Buli'zxöni ládxi'li'. Neda' ni. Biti' gádxili'.

²⁸ Ní'irö bubi'ë didza' Pedro, rë' Jesús:

—Xan, channö nacu' Li', gunná be'e neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús.

³⁰ Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' gurödxí'ë. Bulidzë' Jesús, rnnë':

—Xan, busölá neda'.

³¹ Jesús la' bulitë në'ë. Buguélë'ë lë', en rë' lë':

—Láti'sö réajlë'u neda'. ¿Bix que guca chopa ládxi'u?

³² Cate' bulu'benë' lë'e bárcodo' na', gurö'ö dxi bö' na' recja.

³³ Ní'irö bönni' nacu'ë lë'e bárcodo' na' gula'yéaj ládxi'gaquië' Jesús, ta'nnë':

—Le nácatë, Zxí'inë' Dios nacu'.

*Jesús ruúnë' yugu' bönni' huë' nacu'ë yödzö Genesaret
(Mr: 6:53-56)*

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzö Genesaret.

³⁵ Cate' bulu'únbë'ë bönni' yödzö ni' Jesús, gula'söl-lë'ë didza' idútë luyú ni', ate' dujuá'gaquië' yúgu'të nupa te'e ga na' zoë' Jesús.

³⁶ Guláta'yuë' lahuë' Jesús gu'ë légaquië' lataj ila'gansë' ruí'i lari' nácuë', ate' la' bulu'huócatë yúgu'të nupa na' bila'gán lari' na'.

15

*Le tun ga bití' nácaru' tsahui' lahuë' Dios
(Mr: 7:1-23)*

¹ Ní'irö yugu' bönni' yudo' fariseo, en bönni' yudo' tu'sédinë', narúajgaquië' Jerusalén, bila'dxinë' ga zoë' Jesús, ate' të' Lë':

² —¿Bix que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi në'ë ca naca que yudo' cate' si' ilahuë'.

³ Bubi'ë didza' Jesús, en gunábinë' légaquië', rnnë':

—¿Bix que libí'ili' ca' rucá'anali' cá'asö xibá queë' Dios para gunli' le nulaga loli' runli'?

⁴ Caní raca, tu' gunná bé'enë' Dios libí'ili', gunné': “Ben bal xuz xino'o”, en gunné' ca: “Nu innë' zi' que xuz xinë'e, tsaz gati nu na'.”

⁵ Pero libí'ili' rnnali': "Channö nu guié xuz xinë'e: Biti' bi gaca gunna' quiu' tu' chiguzxi' lu na'a gunna' yúgu'të queë' Dios,

⁶ bíti'rö bi run bayudxi gun nu na' que xuz xinë'e." Caní runli', rucá'anali' cá'asö le gunná bē'ē Dios, para gunli' le nulaga loli' runli'.

⁷ Libí'ili', bönni' rulu'isö tsahui' cuinli', idú ca nácali' gudíxjö'ē Isaiás, bönni' bē'ē didza' uláz queë' Dios, gunné':

⁸ Bönni' ni, len rú'agacsē' tunē' neda' bal, en calēga idú ládxi'gaquiē'.

⁹ Nítisö naca le ta'yéaj ládxi'gaquiē' neda', tu' tu'sédinē' yugu' le gula'nná bē' bönachi.

¹⁰ Ní'irö bulidzē' Jesús bönachi nacuá' ni', en rē' léguequi:

—Buli'zē nágalí' le guía' libí'ili', en guli'tséajni'i.

¹¹ Calēga le riyaza ru'ē nu bönni' run ga bití' náquiē' tsahui' lahuē' Dios, pero le rirúaj ru'ē, lē ni run ga bití' náquiē' tsahui' lahuē' Dios.

¹² Ní'irö yugu' bönni' usēda queë' Jesús gula'bígui'ē ga zoē', en tē' Lē':

—¿Naru' nöztsenu' gula'lenē' yugu' bönni' yudo' fariseo cate' bila'yönnē' didza' ni bē'u?

¹³ Ní'irö bubí'ē didza' Jesús, en rē' légaquiē':

—Yúgu'të le nadúz, le cabí guzē' Xuza' zoē' yehua' yubá, huadúl jagaca idú luí.

¹⁴ Buli'cá'ana légaquiē'. Chinachúl-la lógaquiē', en ta'chē'ē nupa nachul-la lógaca. Channö tu bönni' lo chul-la ichē'ē ia'tué' bönni' lo chul-la, iropē' ila'bixē' tu lu yeru.

¹⁵ Ní'irö bubí'ē didza' Pedro, en rē' Jesús:

—Buzéajni'i netu' lē ni rucúdz'u didza'.

¹⁶ Jesús rē' légaquiē':

—¿Naru' cabí réajni'itseli' ca' libí'ili'?

¹⁷ ¿Naru' cabí réajni'itseli' riyaza lē'ēru' yúgu'të le riyaza ruá'aru', ate' rurúaj lē'ēru'?

¹⁸ Na'a, le rirúaj rúa'ali', lu icja ládxi'do'oli' za', ate' lē ni run ga bití' nácali' tsahui' lahuē' Dios.

¹⁹ Caní raca, tu' ta'lén lu icja ládxi'do'oli' yugu' le rizá' ládxi'li' le ruá' dö', le ilún ga gútili' bönachi, en le ilún ga quítsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnēli' que luzá'ali' le cabí nácate, en yugu' le rinnē xíhui'li'.

²⁰ Yugu' le caní tun ga bití' náquiē' tu bönni' tsahui' lahuē' Dios, pero channö cabí nayari nē'ē ca naca que yudo' cate' bi gahuē', bití' gun ga bití' náquiē' tsahui' lahuē' Dios.

*Tu nigula izá'a réajlē'ēnu Jesús
(Mr. 7:24-30)*

21 Ní'irö buzë'ë Jesús ni', en guyéajë' lu xiyú yödzo Tiro, en yödzo Sidón.

22 Tu nigula nabábanu luyú Canaán birúajnu yödzo ni', ate' bë'ënu zidzaj didza', rënu Jesús:

—Xan, zxi'ini xi'söë David, buéchi' ladxí' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

23 Biti' bi didza' bubí'ë Jesús. Ní'irö gula'bígú'ë bönni' usëda queë' ga zoë', ate' gulë' Lë', ta'nnë':

—Busól-la'-nu, tu' zá'anu cúdzu'ru' ribödxi'anu.

24 Ní'irö bubí'ë didza' Jesús, ate' rë'ë-nu:

—Dios nasól-lë'ë neda' gácalena' bönachi Israel, nupa nácgaca ca bö'cu' zxi'la'do' nanítigacaba'.

25 Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

26 Bubi'ë didza' Jesús, rnnë':

—Biti' naca dxi'a ugúaru' yöta quégacabi' bí'ido', en chú'unaru' le lógacaba' bö'cu'do'.

27 Ní'irö nigula na' rënu Jesús, rnnanu:

—Ön, Xan, pero táguba' bö'cu'do' na' le bizxaj tu'huóxaj ga tagu xángacaba'.

28 Ní'irö bubí'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca rë'ënnu'.

La' ní'isö böácatëbi' bi'i nigúlado' queënu.

Jesús ruúnë' zían nupa te'e

29 Ní'irö buzë'ë Jesús ni', en gudödë' ga naca ra' nísado' que Galilea. Gurenë' tu lu guíado', ate' gurö'ë ni'.

30 Bönachi zían dujuá'gaquië' nupa biti' guca ila'zá', en nupa nachul-la guió'j lógaca, en nupa biti' guca ila'nnë', en nupa narugu ni'a në'eguequi, en ia'zica'rö zían nupa te'e, ate' gula'guíxaj léguequi xini'ë Jesús, ate' Lë' bunë' léguequi.

31 Bulu'bani bönachi ni' ca naca le benë' Jesús, tu' bila'lé'e tu'nnë nupa biti' guca ila'nnë', ate' nuhuóacagaca nupa gurugu ni'a në'eguequi, ate' tu'zá' nupa biti' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

Jesús rugahuë' zíanrö ca choá' gayuá' bönachi

(Mr: 8:1-10)

32 Ní'irö Jesús bulidzë' yugu' bönni' usëda queë', en rë' légaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en biti' bi dë le ilagu. Biti' rë'ënda' usól-la'gaca'-në' tsó'jhuóajgaquië' lídxigaquië' ta'dunsë' ca', nadxi ca' udú ládxi'gaquië' la' nöza.

33 Ní'irö yugu' bönni' usëda queë' të' Lë', ta'nnë':

—¿Gazxi caz idzölitu' yöta xtila zián lu lataj cá'asö ni, le ugágutu' bönachi zián ni?

34 Gunábinë' Jesús légaquië', rnnë':

—¿Bal-laxi yöta xtila dë queëli'?

Bulu'bi'ë didza', ta'nnë':

—Gadxì, ate' nabábasöba' böla cuidi' dëba' queëtu' ni.

35 Ní'irö Jesús gunná bé'enë' bönachi zián na' ila'bö' lu yu.

36 Gudél'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzzuxjë' iroptë na', en bunödzejë' quégaquië' bönni' usëda queë', ate' légaquië' gula'guísië' le lógaca bönachi zián na'.

37 Gulahuë' yúgu'të', en bulu'huöljanë'. Gudödi ni' bulu'tubë' le bizxaj nagá'anagaca, ate' bulu'lié' gadxi ga'böra.

38 Yugu' bönni' na' gulahuë' nácaquië' choá' gáyu'ë, pero cuntú nu bulaba yugu' nigula, en bí'ido'.

39 Ní'irö busöl-lë'ë Jesús bönachi na' tsöjhuöajgaquië' lídxigaquië', ate' gurenë' lë'e bárcodo' ni', en sa'yéajë' lu xiyú yödzo Magdala.

16

Ta'nábinë' Jesús gunë' tu le gaca bë' nuzxi náquië'

(Mr. 8:11-13; Lc. 12:54-56)

1 Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'.

2 Bubi'ë didza' Jesús, en rë' légaquië':

—Cate' ridzö', rnnali' caní: "Gun dxi'a cuxö, tu' rö'ö böaj xiná lúzxiba."

3 Cate' naca zílado', rnnali' caní: "Biti' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulu'isö tsahui' cuinli'. Raca innë ya'ali' naca gun lúzxiba, pero biti' gaca tséajni'ili' le tu'sedi le taca dza ni zóaru' na'a.

4 Yugu' bönachi tuá' dö' ni, en biti' zoa idú ládxi'gaca ta'nábini neda' guna' tu le gaca bë' Nu naca', pero biti' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús buca'anë' légaquië', söhuöjë'.

Le tu'sedinë' bönni' yudo' naca ca cúa zi que yöta xtila

(Mr. 8:14-21)

5 Cate' bila'dxinë' ia'tsölá'a nísado' ni', guléquië' enë' bönni' usëda queë' Jesús gulál-la ládxi'gaquië' ilu'ë le ilahuë'.

6 Ní'irö Jesús gudxë' légaquië':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

⁷ Ní'irö la' légacasë' gulún xtídza'gaquië' bönni' usëda queë', ta'nnë':

—Rnnë' caní tu' cabí nuá'aru' yöta xtila.

⁸ Réquibe'enë' Jesús lë ni, ate' rë' légaquië':

—¿Bizx que run xtídza'li' la' libí'isili' tu' cabí nuá'ali' yöta xtila? Láti'do'os réajlë'ëli' neda'.

⁹ ¿Naru' cabí réajni'itseli', en biti' röjnétseli' ca guca quégaca gayu' yöta xtila ni', lë na' gulahuë' chi-un gáyu'ë bönni', ate' tsca xö ga'böra butúbili'?

¹⁰ ¿Naru' cabí röjnétseli' ca' ca guca quégaca gadxi yöta xtila ni', lë na' gulahuë' choá' gáyu'ë bönni', ate' tsca xö ga'böra butúbili'?

¹¹ ¿Naru' cabí réajni'ili'? Biti' bë'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquië' bönni' yudo' fariseo, en quégaquië' bönni' yudo' saduceo.

¹² Ní'irö gula'yéajni'inë' biti' gudxë' Jesús légaquië' ilún chi'i cuíngaquië' que cúa zi que yöta xtila, pero ral-la' ilún chi'i cuíngaquië' que le tu'sédinë' yugu' bönni' yudo' fariseo, en yugu' bönni' yudo' saduceo.

Pedro rnnë' Jesús náquië' Cristo

(Mr. 8:27-30; Lc. 9:18-21)

¹³ Cate' bidxinë' Jesús lu xiyú yödzö Cesarea, ga na' rinná bë'ë Filipo, gunábinë' yugu' bönni' usëda queë', rnnë':

—¿Bizxi ta'nná bönachi nu naca' neda', Bönni' Guljë' Bönachi?

¹⁴ Bulu'bi'ë didza', ta'nnë':

—Bal-lë' ta'nnë': "Juan nacu', bönni' ni' buquilé' bönachi nisa." Ia'zica'rë' ta'nnë': "Elías nacu', bönni' ni' bë'ë didza' uláz queë' Dios dza ni'te." Ia'zica'rë' ta'nnë': "Jeremías nacu', o ia'tué' bönni' bë'ë didza' uláz queë' Dios."

¹⁵ Ní'irö Jesús gudxë' légaquië':

—Naru' libí'ili', ¿nuzxi rnnali' naca' neda'?

¹⁶ Bubi'ë didza' Simón Pedro, en rë' Lë':

—Li' nacu' Cristo, Zxí'inë' Dios ban.

¹⁷ Bubi'ë didza' Jesús, rë' lë':

—Bica' xibó' li', Simón, zxí'inë' Jonás, tu' cabí buluí'inë' nu bönni' li' lë ni. Xuza' zoë' yehua' yubá buluí'inë' li' lë ni.

¹⁸ Neda' rea' li', li' nacu' Pedro, ate' lu guiöj ni ucuá'a nupa ulu'dubi quia', ate' yöl-la' unná bë' que tu' xihui' biti' sequi' uzaga' xinözgaquië'.

¹⁹ Gunna' quiu' yugu' zxí'ini guíë que lataj ga rinná bë' Nu zoa yehua' yubá. Le inná bë'u luyú ni, chigunná bë' ca' Nu

na' zoa yehua' yubá, ate' le gu'u lataj gaca luyú ni, chibé' lataj gaca lë na' Nu na' zoa yehua' yubá ni'.

²⁰ Ní'irö Jesús gunná bé'enë' yugu' bönni' usëda queë' cuntu nu ilë'ë náquië' Lë' Cristo.

Jesús riguíxjö'ë ca si' ilútië' Lë'

(Mr: 8:31-9:1; Lc: 9:22-27)

²¹ La' dza ní'isö gusí lahuë' Jesús riguíxjöi'inë' yugu' bönni' usëda queë' run bayudxi tsejë' Jerusalén, ga ni' yugu' bixúz unná bë' en bönni' gula tu'zéajni'inë', en bönni' yudo' tu'sédinë' ulu'saca' zi'ë Lë', ate' ní'irö ilútië' Lë', pero cate' gaca tsonna dza ubanë' lu yöl-la' guti.

²² Ní'irö Pedro guchë'ë Jesús quez, en gusí lahuë' ridil-lë' Lë' didza', rnnë':

—Xan, biti' gu'ë Dios lataj. Biti' ca' gaca quiu' ca rnno'.

²³ Ní'irö buécjë' Jesús, en rë' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopa ládxa'a tu' cabí naca le rizá' ládxa'u li' ca rizá' ládxe'ë Dios, pero ca ta'za'sö ládxi' gaca bönachi.

²⁴ Ní'irö Jesús gudxë' yugu' bönni' usëda queë', rnnë':

—Channö zoë' tu bönni' rë'enë' të'ë neda', ral-la' uzóë' tsölá'alö yugu' le rë'ëni quëzinë', en gáquië' ca tu bönni' sa'yéajë' zeajtë'ë lë'e yaga cruz, ate' ní'irö gaca të'ë neda'.

²⁵ Nu bönni' guë'ënnë' gun chi'ë yöl-la' na'bán queë', unítie' le, pero bönni' unítie' yöl-la' na'bán queë' tu' dë'ë neda', gata' yöl-la' na'bán idú queë'.

²⁶ ¿Naru' uzi'tsë' xibé tu bönni' channö utubë' yúgu'të le dë yödzo'lió ni pero unítie' yöl-la' na'bán idú queë'? Biti' bi gaca unödzejë' tu bönni' para gata' yöl-la' na'bán idú queë'.

²⁷ Caní rnniá', tu' huöda' neda', Bönni' Guljë' Bönachi, en idzaga yöl-la' unná bë' queë' Xuza' Dios neda', ate' idzágagaquië' gubáz lá'ayi quia' neda'. Ní'irö ubi'a que queë' bönachi tsca naca le núngaca.

²⁸ Le nácatë rea' libí'ili': "Biti' ca' ilátigaca bal-la nupa nacué' ni cate' ila'lé'erö idinná bë'a neda', Bönni' Guljë' Bönachi."

17

Ridzá' ca nalá' lahuë' Jesús

(Mr: 9:2-13; Lc: 9:28-36)

¹ Gudödi xopa dza, Jesús gudélé'ë Pedro len Jacobo, en Juan, böchë'ë Jacobo na', en guchë'ë légaquië', ate' yöjáquië' quez tu lu guí'a sibi.

² Ni' bidzá' ca nalá' lahuë' Jesús lógaquië'. Guyëpi yösa bení' lahuë' Jesús ca ruzení' gubidza, ate' lari' nácuë' böaca chiguíchido'os ca bení'.

³ Ní'irö bila'lé'enë' bönni' usëda queë' buluí'i lógaquië' Moisés, en Elías, ate' tu'ilenë' Jesús didza'.

⁴ Ní'irö Pedro rë' Jesús:

—Xan, naca dxi'a zóaru' ni. Channö rë'ënu', guna' ni tsonna yu'u lága'do', tu quiu', ia'tú queë' Moisés, en ia'tú queë' Elías.

⁵ Tsanni ni' ru'ë Pedro didza' ni, la' gurö'ötë tu böaj bení' le guzxóa légaquië', ate' lu böaj na' biyön chi'i nu rnna:

—Bönni' ni Zxí'ini caza'. Nadxí'ida'-në', en raza ládxa'a Lë'. Buli'zé nágali' didza' gu'ë.

⁶ Cate' bila'yönnë' bönni' usëda queë' chi'i na', gula'dzö'ë gusurú'alö, en guladxi bila'dzöbinë'.

⁷ Ní'irö gubígui'ë Jesús ga na' nacu'ë, ate' gudanë' légaquië', rnnë':

—Guli'chasa. Biti' gádxili'.

⁸ Cate' gula'chisa lógaquië', en bulu'yúë', cúnturö nu bila'lé'enë', pero tuzë' Jesús.

⁹ Cate' ni' tu'dínnië' lu guí'a na', Jesús gunná bé'enë' légaquië', rnnë':

—Cuntu nu guiëli' ca guca lë ni bilé'eli' cate' ubanra' lu yölla' guti neda', Bönni' Guljë' Bönachi.

¹⁰ Ní'irö yugu' bönni' usëda queë' gula'nábinë' Lë', ta'nnë':

—¿Bizx que ta'nnë' bönni' yudo' usëdi run bayudxi uluí'i lahuë' Elías zí'alö ca uluí'i lahuë' Cristo?

¹¹ Bubi'ë didza' Jesús, rë' légaquië':

—Le nácatë uluí'i lo cazë' zí'alö Elías, en ucá'anë' tsahui' yúgu'të.

¹² Neda' rea' libí'ili': “Chibuluí'i lahuë' Elías na', pero bití' bulu'únbë'ë lë', ate' yúgu'të ca rnnasö quégaquië' gulunë' queë'.” Lësca' caní ilunë' quia' neda', Bönni' Guljë' Bönachi, ulu'saca' zí'ë neda'.

¹³ Ní'irö gula'yéajni'inë' bönni' usëda queë', bé'lenë' Jesús légaquië' didza' ca guca queë' Juan, bönni' na' buquilë' bönachi nisa.

Ruúnë'-bi' Jesús tubi' bi'i bönni' ré'ebi' xjote'

(Mr. 9:14-29; Lc. 9:37-43)

¹⁴ Cate' bila'dxinë' ga na' nacua' bönachi zían, gubígui'ë tu bönni' ga zoë' Jesús, ate' buzóa zxibë' lahuë' Lë',

¹⁵ en rë' Lë':

—Xan, buéchi' ladxi'-bi' bi'i bönni'do' quia', tu' ré'ebi' xjote', en riguí'i rizáca'da'abi', ate' zían luzu' ridzö'öbi' lu guí' o lu nisa.

¹⁶ Chidiguá'a-bi' lógaquië' bönni' usëda quiu' pero bití' guca ulu'únë'-bi'.

¹⁷ Bubi'ë didza' Jesús, rnnë':

—Libí'ili', bönachi cabí réajlë'ëli', en biti' nácali' tsahui'. ¿Gáca'xte caz ral-la' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

18 Ní'irö Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böácatebi' bi'i bönni'do' na'.

19 Ní'irö, yugu' bönni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bizx que na' biti' guca ubéajtu' netu' bö' xihui' na'?

20 Jesús rë' légaquië':

—Biti' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídi'sö naca yöl-la' réajlë' queëli' Dios, nácatë ca tu xisedo' mostaza, huáca guiëli' gu'ado' ni: “Gucuíta ni, en yöjsóa ní'ilö”, ate' la' icuítatë gu'ado' na'. Biti' bi' zoa le cabí gaca gunli' channö réajlë'ëli' Dios idú ládxi'li'.

21 Tu bö' xihui' caní gácasö ubéajli' channö ulídzali'-në' Dios, en gunli' gubasa.

Rigu'xjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

22 Tsanni ni' ta'dë' luyú Galilea, Jesús gudxë' yugu' bönni' usëda queë', rnnë':

—Zoa nu udödi neda', Bönni' Guljë' Bönachi, lu ná'agaca bönachi.

23 Ilútië' neda', pero cate' gaca tsonna dza Dios usubanë' neda'.

Ní'irö bulu'huí'innë' bönni' usëda queë'.

Jesús riguizxaj lazë' que yudo'

24 Cate' bulu'dxinë' Jesús, en yugu' bönni' usëda queë' lu yödzö Capernaum, bila'dxinë' yugu' bönni' tu'quizxjë' bönachi lázagaca que yudo' ga zoë' Pedro, ate' të' lë':

—¿Naru' cabí quizxaj lazë' que yudo' bönni' rusédinë' libí'ili'?

25 Bubi'ë didza' Pedro, rnnë':

—Ön, huaguizxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bönni' ta'nná bë'ë luyú ni, ¿nupxi tu'quizxjë' le riguizxaj laz, en lazxaj que yu? ¿Naru' tu'quizxjë' bönachi uládz quégaquië' o bönachi izá'a?

26 Bubi'ë didza' Pedro, rë' Lë':

—Bönachi izá'a tu'quizxjë'.

Ní'irö Jesús rë' lë':

—Que lë ni na', biti' run bayudxi quizxaj laza' que yudo' tu' naca' Zxí'inë' Dios ca na' biti' bi' ta'guizxaj nupa nátagaca bönachi uládz queë' bönni' na' ruquizxjë'.

²⁷ Na'a, para cuntú nu gun leru', guyéaj ra' nísado', yöjzalaj lu nisa le rizöninu'-ba' böla, ate' böla cueju'-ba' zí'alö, guzxí'iba'. Cate' isalju' ruá'aba', ni' idzölinu' tu dumí lásido'. Guzxí'i le, ate' gudixxaj laza', en lazu'.

18

¿Núzxilö gaca lo?

(Mr. 9:33-37; Lc. 9:46-48)

¹ La' dza ní'sö bila'dxiné' bönni' uséda queé' Jesús ga zoé', ate' gula'nábiné' Lë', ta'nné':

—¿Núzxilé' bönni' ni gáquié' lo ga rinná bē'ē Dios yehua' yubá?

² Bulidzē'-bi' Jesús tubi' bi'i bönni'do', ate' buzöé'-bi' gatsaj láhui'lö ga na' nacu'ē.

³ Ní'irö rē' légaquié':

—Le nácatē rea' libí'ili', channö cabí huóacali' ca zeaj nacabi' bí'ido', bití' ca' tsú'uli' ga ni' rinná bē'ē Dios yehua' yubá.

⁴ Que lē ni na', nútí'tēs nu gaca nöxaj ladxí', en huóaca ca nacabi' bí'ido' ni, nu ni gaca lo ga ni' rinná bē'ē Dios yehua' yubá.

⁵ Nútí'tēs nu gun bal tubi' bí'ido' caní tu' néquibi' quia', neda' caz gun bal.

Le tun ga nu gun dul-la'

(Mr. 9:42-48; Lc. 17:1-2)

⁶ Gunné' ca' Jesús:

—Nu gun ga gunbi' dul-la' tubi' bí'ido' caní réajlē'ēbi' quia', gácarö dxi'a queé' bönni' na' la'tu' ugalē'ē guiöj riyétuni yaga yené', ate' tsöjsuladzu' cuiné' lu nísado'.

⁷ Bica' bayechi' bönachi yödzölió ni tun ga gun dul-la' luzé'eguequi. Nacuá'tica'sö le tun ga nu gun dul-la', pero bica' bayechi' nu run ga nu gun dul-la'.

⁸ 'Que lē ni na', channö gun no'o o ni'u ga gunu' dul-la', guchugu le, en gurú'una le. Gácarö dxi'a quiu' tsöjtsáziu' ga su' ibanu' bití' rizó'o o narugu ni'a no'o, en calēga nacua' chopa no'o, en chopa ni'u ate' tsöjtsáziu' lu guí' gabila le catu caz ulu.

⁹ Channö gun guiöj lo' ga gunu' dul-la', guléaj le, en gurú'una le. Gácarö dxi'a quiu' tsöjtsáziu' ga su' ibanu', zoa tuz guiöj lo', en calēga nacua' chopa guiöj lo', ate' tsöjtsáziu' lu guí' gabila.

Jesús rucúdzu'ē didza' que tu bö'cu' zxila' nanítiba'

(Lc. 15:3-7)

¹⁰ Gunné' ca' Jesús:

—Guli'gún chí'i cuinli' para cabí uzóali'-bi' tsölá'alö tubi' bí'ido' caní. Neda' rea' libí'ili', gubáz lá'ayi tapa chí'ē légacabi' nacua'tica'sē' lahuē' Xuza' zoé' yehua' yubá.

11 Bida' ni neda', Bönni' Guljē' Bönachi, para usölá' nu ni naniti.

12 '¿Nacxi rusáca'li' queëli'? Tu bönni', nacuá'aba' tu gayuá' bö'cu' zxila' queë', channö nítiba' tuba', ¿naru' cabí uca'anē'-ba' tápalalaj yu' chënnaba' na', ate' tsejē' gapa naca lu guí'a, para tsöjtijē'-ba' bö'cu' zxíla'do' na' nanítiba'?

13 Channö udzölinē'-ba', le nácatē rea' libí'ili', udzéjarönē' ni'a queëba' bö'cu' zxíla'do' na' ca gunē' quégacaba' ia'tápalalaj yu' chënnaba' ni' bití' gula'nítiba'.

14 Lësca' caní, Xúziru' Dios, zoē' yehua' yubá, bití' rē'ēnē' nítibi' tubí' bí'ido' caní.

Ca ral-la' uniti loru' böchi' luzá'aru'
(Lc. 17:3)

15 Gunnē' ca' Jesús:

—Channö böchi' luzó'o guá' dö' quiu', guyéajtsöca', en yöjca'analenē' tsahui' la' libí'isili'. Channö uzē náguiē' li', chibuguélu'u böchi' luzó'o.

16 Channö cabí uzē náguiē' xtídzu'u, guchē'ē ia'tué' o ia'chopē' bönni' para urúaj li xtídzu'u lógaquiē' chopá tsonnē' bönni', nupa gaca ilún ba nalí que xtídza'li'.

17 Channö cabí uzē náguiē' xtídza'gaquiē', gudxi ca' bönachi tu'dubi tu'sēdi queë' Dios, en channö cabí uzē náguiē' xtídza'gaca bönachi na', ní'irö bönni' na' gáquiē' quiu' ca tu bönni' bití' réajlē'ē Dios, en ca tu bönni' ruquíxjē' uláz que yödzö zi'tu'.

18 'Le nácatē rea' libí'ili', yúgu'tē le inná bē'ēli' lu yödzölió ni, naca le chigunná bē'ē Dios yehua' yubá, ate' yúgu'tē le gü'ili' lataj lu yödzölió ni, naca le chibē'ē lataj Dios yehua' yubá.

19 'Lësca' caní rea' libí'ili', channö chópasili' gun tuz xtídza'li' lu yödzölió ni ca naca tu le inábili'-nē' Dios, gunē' Xuz caza' Dios, zoē' yehua' yubá, lē na' rinábili'-nē'.

20 Ga nacuá' chopá tsonna nupa ni nudúbigaca quia' neda', zoa caza' neda' gatsaj láchui'lö ga na' nacué'.

21 Ní'irö gubígui'ē Pedro ga zoē' Jesús, en gunábinē' Lē', rnnē':

—Xan, ¿bál-laxitē luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

22 Jesús rē' lē':

—Neda' rea' li', calégasö gadxi luzuí, pero idú tsónnalalaj yu' chi cuía le naca gadxi luzuí.

Jesús rucúdzu'ē didza' que tu bönni' huen dxin bití' buniti lahuē' luzē'ē

23 Gunnē' ca' Jesús:

—Ia'stú, ca gun Nu na' rinná bè' yehua' yubá naca ca benè' tu bönni' rinná bè'è. Gú'unnè' ucá'analenè' tsahui' yugu' bönni' huen dxin queè'.

24 Cate' gusí lahuè' rucá'analenè' légaquiè' tsahui', dujuá'gaquiè' ga zoè' tu bönni' ral-lè'è queè' zían gayuá' dumí.

25 Tu' cabí guca quíxjè', gunná bè'è xanè' idó'ogaquiè' lè', en nigula queè', en yugu' bi'i queè', en yúgu'tè le dè queè', ate' ní'irö gazxaj le ral-lè'è queè' xanè' na'.

26 Ní'irö bönni' huen dxin na' buzóa zxibè' lahuè' xanè', en gunábinè' lè', rnnè': "Xan, ben zxön ládxi'u neda'. Huaguíxaj caza' li' idutè'."

27 Ní'irö xanè' na' buéchi' ládxi'è bönni' huen dxin queè' na', en buniti lahuè' lè' lè na' ral-lè'è queè', ate' busanè' lè'.

28 Cate' burúajè' bönni' huen dxin na', la' yöjtságatè' tu bönni' rúnlenè' lè' tsözxön dxin, ate' bönni' na' ral-lè'è queè' láti'do'os dumí. Ní'irö guzxönè' lè', en guzxínnajè' yenè', ate' rè' lè': "Gudíxjatè lè na' ral-lu'u quia'."

29 Ní'irö luzè'è na' buzóa zxibè' lahuè', en gunaba yechè'è lahuè', rnnè': "Ben zxön ládxi'u neda'. Huaguíxaj caza' li' idutè'."

30 Biti' gú'unnè' bönni' huen dxin na', ate' yöjlu'è lè' lidxi guíe dza quíxjarè' lè na' ral-lè'è queè'.

31 Cate' bila'lé'enè' lè ni ia'zíca'rè' huen dxin, bulu'hu'i'inide'enè' ni'a queè', ate' yöjtíxjoi'iguequinè' xángaquiè' yúgu'tè lè na' guca.

32 Ní'irö xángaquiè' bulidzè' bönni' huen dxin na', ate' rè' lè': "Li', huen dxin catsahui'. Yúgu'tè dumí na' gúl-lu'u quia' buniti lahua' li'. Busúlua' lè na' gúl-lu'u quia' tu' gunaba yechu'u lahua'.

33 ¿Naru' cabí ral-la' huéchi' ládxi'u ca' luzó'o ca na' bena' neda', buéchi' ládxi'a li'?"

34 Ní'irö guléde'enè' xanè', en budödè' lè' lu ná'agaca nupa ulu'saca' zi' lè' dza quíxjarè' idutè' le ral-lè'è queè'.

35 Ní'irö rnnè' Jesús:

—Lésca' caní gunè' Xuza' zoè' yehua' yubá queéli' channö cabí uniti loli' idú ládxi'li' yugu' böchi' luzá'ali'.

19

Nupa tu'lá'a yöl-la' nutsaga na'

(Mr. 10:1-12; Lc. 16:18)

1 Cate' budxi bè'è Jesús yugu' didza' ni, buzè'è luyú Galilea, ate' bidxinè' luyú Judea le dè ia'tsolá'a yegu Jordán saca' ga rilén gubidza.

2 Bönachi zían sójacalen Jesús, ate' bunè' léguequi ni'.

3 Ní'irö bila'dxinè' bal-lè' bönni' yudo' fariseo ga zoè' Jesús para ila'zí' bè'è Lè', ate' gula'nábinè' Lè', ta'nnè':

—¿Naru' dē lataj bönni' nutsaga nē'ē usanē' nigula queē' tu' nözi bítí'tēs bi raca?

⁴ Bubi'ē didza' Jesús, rē' légaquiē':

—¿Naru' cabí nulábanili' le nazúaj lu guichi lá'ayi ca benē' Dios bönachi cate' si' benē' yödzölió? Bönni', en nigula benē' légaquiē'.

⁵ Caní gunnē' Dios: “Que lē ni na', ral-la' usanē' tu bönni' xuz xinē'ē, ate' tsaz tsöjsóalenē'-nu nigula queē', ate' iropē' na' ulu'huóáquiē' tuz bönachi.”

⁶ Caní naca, bítí'rö nácagaquiē' chopē' pero tuz bönachi chin-uhuóáquiē'. Que lē ni na', bití' ral-la' ulu'lē'ē bönni' nupa na' benē' Dios tuz.

⁷ Ní'irö bönni' yudo' na' gula'nábinē' Jesús, ta'nnē':

—¿Bizx que na' gunná bé'enē' Moisés légaquiē' le ruí'í lataj nu bönni' unödzjē' tu guichi queēnu nigula queē' le rnna nulá'a yöl-la' nutsaga na', ate' usanē'-nu nigula queē' na'?

⁸ Jesús rē' légaquiē':

—Caní benē' Moisés tu' nazidi icja ládxi'do'oli'. Bennē' libí'ili' lataj usanli'-nu nigula queēli', pero cate' gusí lo guta' gurö'ö yödzölió, bití' guca caní.

⁹ Neda' rea' libí'ili', channö tu bönni' usanē'-nu nigula queē', en bití' gudálennu bönni' yúbölö, ate' utsaga ná'alēnē'-nu nigula yúbölö, gunē' dul-la' le riguitsaj xibá que yöl-la' nutsaga na'. Lēscá' caní, channö nu bönni' utsaga ná'alēnē'-nu nigula na', nusanē'-nu bönni' queēnu, gunē' dul-la' le riguitsaj xibá que yöl-la' nutsaga na'.

¹⁰ Ní'irö yugu' bönni' usēda queē' Jesús gulē' Lē', ta'nnē':

—Channö caní naca queē' tu bönni' zóalenē'-nu nigula queē', gácarö dxi'a queē' la'tu' cabí utsaga caz nē'ē, ugá'anē' tuzē'.

¹¹ Bubi'ē didza' Jesús, rē' légaquiē':

—Bití' gaca ila'zí' lu ná'agaca yúgu'tē bönachi didza' ni, pero núpasö na' Dios ruzéajni'inē' léguequi.

¹² Nacu'ē bönni' bití' tu'tsaga ná'alengaquiē' nigula tu' cabí nácagaquiē' idú bönni' biguiú', tu' gulaljē' ca', ate' ia'zícá'rē' bönni' bití' tu'tsaga ná'alengaquiē' nigula tu' bulu'zaga' bönachi xinözgaquiē', ate' ia'zícá'rē' bönni' bití' tu'tsaga ná'alengaquiē' nigula para gaca ilunē' xichinē' Dios, Nu rinná bē' yehua' yubá. Nu sequi' si' lu nē'e didza' ni ral-la' si' lu nē'e le.

Jesús rulidza tsáhuē'ē-bi' yugu' bí'ido'

(Mr. 10:13-16; Lc. 18:15-17)

¹³ Ní'irö yugu' xuz xiná'agacabi' bí'ido' dujuá'agaquiē'-bi' ga zoē' Jesús para ixóa nē'ē légcabi', en ulidzē' Dios ni'a quégcabi', ate' bönni' usēda queē' bulu'zágui'ē xinözgaquiē'.

¹⁴ Ní'irö Jesús rē' légaquiē', rnnē':

—Guli'güi'i-bi' yugu' bí'ido' lataj ila'dxinbi' ga zoa', en biti' uzága'li' xinózgcabi', tu' ila'zi' lataj nupa nácagaca ca yugu' bí'ido' caní ga ni' rinná bē'ē Dios yehua' yubá.

¹⁵ Jesús guxóa nē'ē légcabi', ate' ní'irö buzē'ē ni'.

Tu bönni' unná bē' cuidi' dē yöl-la' tsahui' queē'

(Mr. 10:17-31; Lc. 18:18-30)

¹⁶ Tu bönni' ni zoē' iz cuidi' queē' buduyüē' Jesús, en rē' Lē':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ē didza' Jesús, rē' lē':

—¿Naru' nöztsenu' lē na' rnno' quia', rnno' naca' idú tsahui'? Cuntu nu bönni' náquiē' idú tsahui'. Tuzē' Dios náquiē' idú tsahui'. Channö ré'ēnu' gata' yöl-la' na'bán idú quiu', ben ca rinná bē' xibá queē' Dios.

¹⁸ Ní'irö bönni' na' rē' Jesús, rnnē':

—¿Bízxilö xibá na'?

Jesús rē' lē':

—Xibá na' gunná bē'ē Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' innió' que böchi' luzó'o le cabí nácate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoē' iz cuidi' queē' gudxē' Jesús, rnnē':

—Yúgu'tē lē ni runa' ga gudela' naca' bí'ido'. ¿Naru' zoa ia'tú le ral-la' guna'?

²¹ Jesús rē' lē':

—Channö ré'ēnu' gacu' tsahui', guyéaj, yöjēti' le dē quiu', ate' dumí na' si'u, bunödzej quégaca bönachi yechi'. Caní gata' yöl-la' tsahui' quiu' ni' yehua' yubá. Ní'irö gudá, gudá' neda'.

²² Cate' bönni' na' ni zoē' iz cuidi' queē' biyönnē' didza' ni, söhuöjē' ruhu'innē' tu' dēda' yöl-la' tsahui' queē'.

²³ Ní'irö Jesús gudxē' yugu' bönni' usēda queē', rnnē':

—Le nácate rea' libí'ili', böniga naca tsáziē' nu bönni' dē yöl-la' tsahui' queē' ga rinná bē'ē Dios yehua' yubá.

²⁴ Ia'stú rea' libí'ili', nácáro böniga tsáziē' tu bönni' dē yöl-la' tsahui' queē' ga ni' rinná bē'ē Dios ca tódiba' böa' lu nagui yötsi'.

²⁵ Cate' bila'yönnē' yugu' bönni' usēda queē' didza' ni, bulu'bánninē, ta'nnē':

—¿Nuzxi caz gaca ulá, channö?

²⁶ Jesús buyüē' légaquiē', en rē' légaquiē':

—Biti' gaca ilún bönachi lē ni, pero Dios huáca gunē' yúgu'tē.

²⁷ Ní'irö bubi'ē didza' Pedro, en rē' Jesús:

—Buyútsöca', netu' chibucá'anatu' yúgu'të, en zá'lentú' Li'. ¿Bíxirö gata' queëtu'?

²⁸ Jesús rë' légaquië':

—Le nácatë rea' libí'ili', dza ni' cate' ucubi yödzölió, ate' cö'a inná bë'a neda', Bönni' Guljë' Bönachi, ga ni' gácatëra' lo, lësca' libí'ili' zá'lenli' neda' na'a, cö'öli' chinnu lataj ga inná bé'ëli', en uchi'a usöröli' quégaca idxinnu cö'të yödzö quégaca xzí'ini xi'sóé' Israel.

²⁹ Nu bönni' rucá'anë' lidxë', o yugu' böchë'ë, o yugu' zanë', o xuzë', o xinë'ë, o nigula queë', o yugu' xzí'inë', o yugu' xiyúë', para gunë' xichina', bönni' ni si'ë ia'tú gáyua'tërö ca' queë', en gata' ca' yöl-la' na'bán idú queë'.

³⁰ Zían nupa nácgaca lo na'a, ulu'gá'ana cá'asö, ate' nupa nagá'anagaca cá'asö na'a, hualácagaca lo.

20

Rucúdzu'ë didza' Jesús ca tunë' bönni' huen dxin

¹ Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyúë' ga na' nadúzgaca lubá uva.

² Cate' chibugá'analënë' tsahui' yugu' bönni' huen dxin na', quíxjë' légaquië' tu dumí lazxaj que tu dza, gusöl-lë'ë légaquië' ilunë' dxin ga naca lu xiyúë'.

³ Cate' burúajë' idú xsila, bilé'enë' ia'zícá'rë' bönni' nacuá'asë' ca' ga naca lu yë'ëyi.

⁴ Rë' légaquië': "Guli'tséaj ca' libí'ili' ga naca lu xiyúa', ate' quíxja' libí'ili' le naca tsahui'." La' yöjácátë' ca' légaquië'.

⁵ Burúajë' bönni' xan yu'u na' leyúbölö idú huagubidza, enca' idú xihuö udzö', en la' tuz ca benë', gusöl-lë'ë yugu' bönni' yöjxáquië' lu xiyúë'.

⁶ Burúajë' ca' cate' ni' zoa ia'láti'do'os gubidza, en yöjxáquië' ia'zícá'rë' bönni' nacuá'asë' ca' ni', ate' rë' légaquië': "¿Bizx que zóatsali' ni cá'asö idú dza, biti' bi dxin runli'?"

⁷ Yugu' bönni' na' të' lë', ta'nnë': "Cuntu nu benna xichintu'." Ní'irö rë' légaquië': "Guli'tséaj ca' libí'ili' ga naca lu xiyúa', ate' quíxja' libí'ili' le naca tsahui'."

⁸ Cate' chizóa gal-la, bönni' xan yu na' rë' bönni' yu'u lu në'ë yugu' huen dxin na', rnnë': "Bulidza yugu' bönni' huen dxin na', ate' gu'u láxjagaquië'. Quíxju' zí'alö yugu' bönni' na' bila'dxinë' yöjsetë. Udxí na' quíxju' yugu' bönni' na' bila'dxinë' zí'atëlö."

⁹ Ní'irö bila'dxinë' bönni' yöjéngaquië' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazxaj que tu dza.

10 Cate' bila'dxinë' bönni' yójéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza.

11 Cate' gula'zi'ë le, gula'nnédë'ë queë' bönni' xan yu'u na',

12 ta'nnë': "Yugu' bönni' ni bila'dxinë' ga yójsetë, tu chí'isö gulunë' dxin, en tuz ca gudízxjatsö' légaquië' ca netu', ate' netu' ni bentu' dxin idú dza, en gúguida'atu' gubidza."

13 Bubi'ë didza' xan yu na', en rë' tuë': "Böcha'a, biti' bi runa' quiu' le cabí naca tsahui'. ¿Naru' cabí bugá'ana tsáhui'ru' si'u tu dumí lazxaj que tu dza?"

14 Guzxí' lazxju', en böaj lidxu'. Neda' rë'ënda' quízxja' bönni' ni yöjenë' dxin ga yójsetë la' leze ca na' riguízxja' li'.

15 ¿Naru' cabí dë lu na'a guna' ca rë'ënda' len le nequi quia'? ¿Naru' ruzxé'etsenu'-në' luzó'o tu' rúnnada'a queë'?"

16 Caní naca, bal-lë' bönni', tu'cá'ana bönachi légaquië' cá'asö, ilácagaquië' lo, ate' ia'zícá'rë' bönni', ná'cagaquië' lo na'a, ulu'gá'anë' cá'asö. Zían nupa nulidza', pero nabábasö nupa narógaca.

Rigúxjö'ë Jesús leyúbölö ca si' ilútië' Lë'

(Mr. 10:32-34; Lc. 18:31-34)

17 Cate' ni' yu'ë Jesús nöza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

18 —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'.

19 Ulu'dödë' neda' lu ná'agaquië' bönni' zi'tu' para ulu'titjë' neda'. Ila'guinë' neda', en ulu'dë'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

Le gunábanu xiná'agaquië' Jacobo, en Juan

(Mr. 10:35-45)

20 Ní'irö bidxinnu xiná'agaquië' Jacobo, en Juan, yugu' zxí'inë' Zebedeo, ga zoë' Jesús, dzágagaquië'-nu chopë' ni, ate' buzóa zxíbinu lahuë' Jesús, en gunábinu Lë' tu le uzá' ládxe'ë queënu.

21 Jesús gunábinë'-nu, rnnë':

—¿Bizxi rë'ënu'?

Rënu Lë':

—Gunná bë' cõ'öbi' tubi' zxí'ina' ni cuita lë'u ibëla, en ia'tubi' cõ'öbi' cuita lë'u yögöla ga ni' inná bë'u.

22 Bubi'ë didza' Jesús, rë' légaquië':

—Biti' nözili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

23 Ní'irö Jesús rë' légaquië':

—Le nácatë le ral-la' qui'i saca'a neda', gaca ca' queëli', en le ral-la' idila' neda' nisa, gátia', idílali' ca' nisa lib'íli', pero que cõ'oli' cuita lë'a ibëla o cuita lë'a yögöla, biti' dë lu na'a nu gu'a que, pero gata' quégaca nupa ni' chinupë'ë Xuza' quéguequi.

24 Cate' ia'chíë' bönni' usëda queë' Jesús bila'yönnë' lë ni, gula'lenë'.

25 Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridödité bë' ta'nná bé'enë' légaquië', ate' nupa ni' nácacarö lo ta'nná be'e la' luzë'eguequisö.

26 Biti' gaca caní queëli'. Núti'tëslöli' lib'íli' nu rë'ëni gaca zxön ga zóali', nu ni ral-la' gun dxin que ia'zica'röli'.

27 Lësca' caní, núti'tëslöli' lib'íli' nu guë'ëni gaca lo, ral-la' gaca ca tu bönni' nadó'o que ia'zica'röli'.

28 Lësca' neda', Bönni' Guljë' Bönachi, bida' ni, calëga para nu gun xichina', pero para guna' xichíngaca bönachi, en udöda' yöl-la' na'bán quia', le quízxjada' ni'a quégaca bönachi zían para ulu'lágaca.

Ruúnë' Jesús chopë' bönni' nachul-la lógaquië'

(Mr. 10:46-52; Lc. 18:35-43)

29 Cate' ni' tu'rúajë' yödzö Jericó, bönachi zían söjácalen Jesús.

30 Nacu'ë chopë' bönni' nachul-la lógaquië' ni', rõ'gaquië' ra' nöza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, xzí'ini xi'sóë' David, buéchi' ladxi' netu'.

31 Bönachi zían nacua' ni' gulë' légaquië' ila'cu'ë dxisö, pero zídzejrö gulu'ë didza', ta'nnë':

—Xan, xzí'ini xi'sóë' David, buéchi' ladxi' netu'.

32 Ní'irö guzë' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi rë'ënili' guna' queëli'?

33 Të' Jesús:

—Xan, rë'ënitü' gunu' ga huöálaj guiöj lotu'.

34 Ní'irö Jesús buéchi' ládxë'ë légaquië', ate' gudanë' guiöj lógaquië'. La' böáljatëgaca guiöj lógaquië', ate' yöjácalenë' Jesús.

21

Ridxinë' Jesús yödzö Jerusalén len yöl-la' ba zxön

(Mr. 11:1-11; Lc. 19:28-40; Jn. 12:12-19)

1 Cate' bila'dxíngalë' yödzö Jerusalén, en ni' nacu'ë ga dë yödzö Betfagé ga na' zoa Guí'a Yaga Olivo, ní'irö gusól-lë'ë Jesús chopë' bönni' usëda queë',

2 ate' rë' légaquië':

—Guli'tséajtsöca' yödzödo' ni' ca dödilö ga ni zóaru', ate' la' tsöjxáca'téli'-ba' tuba' burro guná' nága'ba', ate' dzaga lëba' tuba' burro biguiú'do'. Guli'tsöjsexi-ba', en iché'ëli'-ba' quia' ni.

³ Channö nu bi guié libí'ili', guli'guié nu na': "Xanru' riquinné'-ba'." Ní'irö isöl-lë'ë légacaba' quia'.

⁴ Caní guca para gaca lë na' buzúajë' lu guichi bönni' bë'ë didza' uláz queë' Dios, gunné':

⁵ Guli'guié nupa nacuá' yödzö Sión,
Buli'yútsöca', zë'ë Bönni' inná bé'enë' libí'ili'.

Lu yöl-la' nöxaj ladxi' queë' dxíë'-ba' tuba' burro.

Dxíë' cúdzu'ba' búrrodo' nácaba' zxi'iniba' böa' ruá'aba' yua'.

⁶ Ní'irö bönni' usëda queë' yöjáquië' ni', ate' gulunë' ca na' gunná bé'enë' Jesús légaquië'.

⁷ Gula'ché'ë-ba' burro guná' na', en burro biguiú'do' na', ate' bulu'dxíë' cúdzu'gacaba' yugu' lari' guitsa' quégaquië', ate' gudxíë' Jesús lahui' lari' na'.

⁸ Nacuá' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zíca'rë' bulu'chibë' zin le bulu'zxóë' ga naca la' nöza.

⁹ Gulu'i zidzaj didza' bönachi na' nanörugaca, en nupa na' söjácalen Jesús, ta'nná:

—¡Yöl-la' ba Lë', zxi'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

¹⁰ Cate' guyázië' Jesús yödzö Jerusalén, bulu'dzatsa yúgu'të bönachi lu yödzö na', ate' zían nupa gulë luzë'eguequi, ta'nná:

—¿Nuzxi caz bönni' ni?

¹¹ Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

¹² Cate' guyázië' Jesús lö'a yudo' queë' Dios, bulágui'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu'tsë'ë dumí yödzö zi'tu', en yugu' le ta'bö'i nupa tuti' gu'dödo'.

¹³ Rë' légaquië':

—Nazúaj lu guichi lá'ayi le rnna: "Lidxa' si'i le, yu'u ga nu ulidza Dios", pero libí'ili' chinunli' lataj ni ca naca yu'u lídxigaca gubán.

¹⁴ Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'.

¹⁵ Gula'lenë' yugu' bixúz unná bë', en bönni' yudo' tu'sédinë' cate' bila'lé'enë' yugu' yöl-la' huáca ni runë' Jesús, en

bila'yönnë' tuí'ibi' bí'ido' zidzaj didza' ga naca chila yudo', ta'nnabi':

—¿Bica' ba Lë', zxi'ini xi'sóë' David!

16 Ní'irö tē' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: “Li' benu' ga yugu' bi'i cuidi', en yugu' bí'ido' ni' tádxí'bi' gulúl-labi' yöl-la' ba le naca idú.”

17 Ní'irö Jesús buca'anë' légaquië', ate' burúajë' Jerusalén. Guyijë' yödzö Betania ga ni' bugá'anë' idú yëla.

Jesús rulidza zi'ë yaga higo

(Mr. 11:12-14, 20-26)

18 Cate' za' rení', ate' ni' söhuöjë' Jesús Jerusalén, ridunë'.

19 Bilé'enë' tu yaga higo rö' gal-la' cuite nöza, ate' gubígui'ë ga na' rö', pero biti' bi bidzölinë' lu yaga na'. Xilágui'sö dxía. Ní'irö Jesús gudxë' le:

—Bíti'rö cuía le ribía quiu'.

La' gubídxitë yaga higo na'.

20 Cate' bila'lé'enë' bönni' usëda queë' lë ni, bulu'bábinë', ate' gula'nábinë' Jesús, ta'nnë':

—¿Nacxi caz guca, gubídxitë yaga ni?

21 Bubi'ë didza' Jesús, rë' légaquië':

—Le nácatë rea' libí'ili', channö tséajlë'ëli' Dios, en biti' gaca chopa ládxí'li', calégasö huáca gunli' ca na' bena' que yaga ni, pero channö guiëli' guí'a ni: Gucuíta, en yöjsóa lu nísado', gaca ca na' innali'.

22 Lësca' caní, yúgu'të le inábali' cate' ulídzali'-në' Dios, channö huayéjlë'ëli' gunnë' Dios queëli', huazí'ili' lë na' inábali'.

Yöl-la' unná bë' dë lu në'ë Jesús

(Mr. 11:27-33; Lc. 20:1-8)

23 Ní'irö guyázië' Jesús chila yudo', ate' tsanni ni' rusédinë' bönachi nacuá' ni', bila'dxinë' yugu' bixúz unná bë' len bönni' gula tu'zéajni'inë' ga zoë', ate' gula'nábinë' Jesús, ta'nnë':

—¿Bizxi yöl-la' unná bë' dë lu no'o, runtso' yugu' lë ni? ¿Nuzxi budödi lu no'o yöl-la' unná bë' ni?

24 Bubi'ë didza' Jesús, rë' légaquië':

—Lësca' neda' inábatsöqui'da' libí'ili' tu didza'. Channö qui'xjöi'ili' neda' ca naca, neda' ca' guí'a libí'ili' bizxi yöl-la' unná bë' dë lu na' a runa' caní.

25 ¿Nuzxi caz gusöl-la' Juan para buquilë' bönachi nisa? ¿Naru' Dios gusöl-lë'ë lë', o gula'söl-lë'ë yugu' bönni' lë'?

Ní'irö gula'sí lógaquië' bönni' yudo' na' ta'nnë' la' légacasë':

—Channö innaru': Dios gusöl-lë'ë lë', la' guiëtë' rë'u: "¿Bizx que bití' guyéajlë'ëli' lë'?"

²⁶ Na'a, channö innaru': Gula'söl-lë'ë yugu' bönni' lë', rádxiru' le ilún bönachi lu yödzo tu' ta'yéajlë'ë yúgu'të' Juan na' bë'ë didza' uláz queë' Dios.

²⁷ Que lë ni na' bulu'bi'ë didza', të' Jesús:

—Biti' nöztu'.

Jesús rë légaquië':

—Neda' ca', bití' guía' libí'ili' bizxi yöl-la' unná bë' dë lu na'a runa' lë ni.

Rucúdzu'ë didza' Jesús ca gulunbi' chópabi' xzí'inë' tu bönni'

²⁸ Ní'irö Jesús gudxë' yugu' bönni' yudo' na':

—¿Nacxi rusáca'li' queëli'? Guzóë' tu bönni' nacuá'abi' chópabi' bi'i bönni' queë', ate' yöjödxe'-bi' tubi' bi'i queë' na', gunné': "Zxí'ina', guyéaj na'a tsöjenu' dxin ga naca luyú quia' ga rögaca lubá uva."

²⁹ Bubí'ibi' didza' bi'i na', gúdxibi'-në': "Biti' rë'ënda' tseja'." Gudödi ni' bubí'i ládxi'bi', ate' yöjenbi' dxin.

³⁰ Ní'irö bönni' na' yöjödxe'-bi' ia'tubi' bi'i queë' na', en la' tuz ca gunné', ate' bubí'ibi' didza' bi'i ni, gúdxibi'-në': "Huaca, Dad. Uyéaja'." Biti' guyéajbi' bi'i ni.

³¹ ¿Núzxilöbi' bi'i chopa ni benbi' le guyaza ládxe'ë xúzibi'?

Bulu'bi'ë didza', të' Jesús:

—Bi'i zí'aló na'.

Ní'irö Jesús rë légaquië':

—Le nácatë rea' libí'ili', ila'nöruë' bönni' uquízxaj tuá' dö', en yugu' nigula udá dzaga ca libí'ili', ate' ila'yázië' ga ni' rinná bë'ë Dios.

³² Caní gaca, tu' bidë' Juan, bönni' buquilé' bönachi nisa, ga zóali', en busédinë' libí'ili' le naca tsahui' ca ral-la' gunli', ate' libí'ili' bití' guyéajlë'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, bití' bubí'i ládxi'li' para tséajlë'ëli' lë'.

Rucúdzu'ë didza' Jesús ca béngaquië' bönni' huen dxin bití' nácagaquië' tsahui'

(Mr. 12:1-12; Lc. 20:9-19)

³³ Gunnë' ca' Jesús:

—Buli'zë nágali' ia'tú le ucúdzu'a didza'. Guzóë' tu bönni' xan yu'u, ate' bönni' ni budë'ë yugu' lubá uva luyú queë'. Guléquië' lë'aj que, en guchö'önë' tu lerui guiöj ga isíë' xisi uva na'. Benë' ca' tu yu'u xitsá' ga gaca nu uyú idütë luyú queë'. Ní'irö budödë' luyú na' lu ná'agaquië' bönni' huen dxin, para ila'zi'ë quégaquië' gatsaj huéaj, ate' sa'yéajë' yödzo zí'tu'.

34 'Cate' chibidxín dza ulu'chibë' yugu' lubá uva na', gusöl-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'.

35 Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'túë' bëtigaquië' lë', en ia'túë' bulu'ladxë' lë' guiøj.

36 Leyúbölö bönni' xan luyú na' gusöl-lë'ë ca' ia'zícá'rë' ni'a në'ë, ate' guláquië' zióntërë' ca nupa na' gusöl-lë'ë zí'alö, ate' la' tuz ca gulunë' bönni' huen dxin ni' quégaquië'.

37 'Ga yöjsete, gusöl-lë'ë ca' zxí'inë' ga na' nacu'ë. Guzá' ládxë'ë, rnnë': Hualunë' bal bi'i quia'.

38 Cate' yugu' bönni' huen dxin na' bila'lé'enë'-bi' zxí'inë', la' gula'nnatë' la' légacasë': "Bi'i ni guequi queëbi' luyú ni. Guli'dá, gútiru'-bi', ate' le ral-la' guequi queëbi' guequi queëru'."

39 Ní'irö gula'zönë'-bi', ate' bulu'béajë'-bi' ní'ilö luyú ga na' rögaca lubá uva, ate' bëtigaquië'-bi' ni'.

40 Ní'irö Jesús gunábinë' légaquië', gunnë':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

41 Bulu'bi'ë didza' bönni' yudo' na', të' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zícá'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

42 Ní'irö Jesús gudxë' légaquië':

—¿Naru' catu caz nulábanili' lë' na' nazúaj lu guichi lá'ayi ca naca lë' ni? Caní rna:

Guiøj na' gula'rú'unë' bönni' tu'cu'ë zö'ö,

la' guiøj ná'asö chinaca guiøj len zö'ö.

Lë' cazë' Xanru' benë' ga naca caní,

ate' naca tu le run ga rubániru'.

43 'Que lë' ni na' rea' libí'ili', xilátjali' ga na' rinná bë'ë Dios idúa queëli', en gata' quégaca bönachi ilún ca ral-la' gun nu nadelí' lataj ni'.

44 Nu tsøjchegu' lu guiøj ni, la' cuinsi quítsaj, ate' channö guiøj ni tseajbaga' bönni' na', uzxuzxaj lë'.

45 Cate' yugu' bixúz unná bë', en yugu' bönni' yudo' fariseo bila'yönnë' lë' na' bucúdzu'ë didza' Jesús, téquibe'enë' bë'ë Jesús didza' ca naca quégaquië'.

46 Gula'zóa gula'bö'ë ila'zönë' Jesús, pero guládxinë' bi ilún bönachi zían nacué' ni' tu' ta'yéajlë' náquië' Jesús bönni' ru'ë didza' uláz queë' Dios.

22

Rucúdzu'ë didza' Jesús ca naca que laní que yöl-la' rutsaga na'

1 Jesús bĕ'lenĕ' légaquiĕ' didza' leyúbölö, ate' bucúdu'ĕ didza', rnnĕ':

2 —Ca gaca quégaca nupa ila'yaza ga rinná bĕ'ĕ Dios yehua' yubá naca ca guca quégaca nupa bulidzĕ' tu bönni' rinná bĕ'ĕ cate' benĕ' laní que dza utsaga ná'abi' bi'i bönni' queĕ'.

3 Gusöl-lĕ'ĕ ni'a nĕ'ĕ tsöjxí'gaquiĕ' yugu' bönni' chinulidzĕ' para guídagaquiĕ' laní queĕ'bi', pero biti' gulĕ'ĕnĕ' guídagaquiĕ'.

4 Ní'irö gusöl-lĕ'ĕ ia'zícá'rĕ' ni'a nĕ'ĕ, en gudxĕ' légaquiĕ': "Guli'tsöjdxitsöca' nupa na' chinulidza', na' guiĕli' légaquiĕ': Buli'yútsöca', chinupá'a la' huagu. Chibĕtia'-ba' yugu' xpĕdxa', en yugu' böa' bĕdxi renni' quia'. Yúgu'tĕ chinupá'a. Guli'dá, sóaru' laní queĕ'bi' bi'i bönni' quia' utsaga ná'abi'."

5 Yugu' bönni' na' yöjlídzagaquiĕ' biti' gulunĕ' légaquiĕ' bal, ate' yöjáquiĕ' que queĕgaquiĕ'. Tuĕ' yöjenĕ' dxin, en ia'túĕ' guyijĕ' tsöjö'u tsöjĕti'ĕ.

6 Ia'zícá'rĕ' gula'zönĕ' yugu' ni'a nĕ'ĕ na', ate' gulu'ĕ dö' quégacaquiĕ', en bĕtgaquiĕ' légaquiĕ'.

7 Cate' bönni' na' rinná bĕ'ĕ biyönnĕ' lĕ ni, gulĕnĕ', en gusöl-lĕ'ĕ yugu' bönni' queĕ' röjáquiĕ' gudil-la, ate' bĕtigaquiĕ' yugu' bönni' hueti bönachi na', en bulu'quelĕ'ĕ guí' ládzaagaquiĕ'.

8 Ní'irö bönni' na' rinná bĕ'ĕ gudxĕ' yugu' ni'a nĕ'ĕ, gunnĕ': "Le nácatĕ chinupá'a que laní na', pero yugu' bönni' bulidza' biti' guláquiĕ' lesaca' guídagaquiĕ' laní quia'.

9 Guli'tséajtsöca' gapa naca la' nöza, en buli'lidza yúgu'tĕ nupa tsöjxáca'li' ni' para guídagaca laní queĕ'bi' bi'i bönni' quia' utsaga ná'abi'."

10 Ní'irö bila'rúajĕ' ni'a nĕ'ĕ na', söjáquiĕ' gapa naca la' nöza, ate' bulu'tubĕ' yúgu'tĕ nupa yöjxáca'gaquiĕ', yugu' bönni' dxí'a, en yugu' bönni' tuá' dö', ate' ga na' raca laní bilíró bönachi.

11 'Cate' guyáziĕ' bönni' na' rinná bĕ'ĕ para uyúĕ' nupa ni' nudúbigaca, bilé'enĕ' tu bönni' biti' nácuĕ' lari' tsahui' le bunödzejĕ' quégaquiĕ' bönni' nacu'ĕ laní na'.

12 Ní'irö gudxĕ' bönni' na': "Bönni'do', ¿zóatso' ni, en biti' nacu' lari' tsahui' bunödza' quégaca nupa nacuá' laní?" Bönni' na' busayaj ru'ĕ.

13 Ní'irö bönni' na' rinná bĕ'ĕ gudxĕ' nupa na' tun xichinĕ', gunnĕ': "Guli'guga' ni'a nĕ'ĕ bönni' ni. Guli'tsöjchú'un-nĕ' ní'ilö ga na' rö'ö chul-la. Ni' cödxĕ', en util-la láyĕ'ĕ, lu yöl-la' ruhuí'ini queĕ'."

14 Ní'irö Jesús gudxĕ' légaquiĕ':

—Zian nupa nulidza', pero nabábasö nupa ila'rögaca.

Jesús ru'ĕ didza' ca naca le riguízaxj lázaru'
(Mr. 12:13-17; Lc. 20:20-26)

15 Ní'irö yugu' bönni' yudo' fariseo na' bulu'zë'ë ni', ate' gulún xtídza'gaquië' ilunë' ga bi innë' Jesús para gaca ulu'zéguië' Lë' didza'.

16 Para ilunë' caní, gula'söl-lë'ë bal-lë' bönni' dá'gaquië' légaquië', len bönni' dá'gaquië' Herodes, ga zoë' Jesús, nupa na' gulë Jesús:

—Bönni' Usedi, nöztu' Li' ru'u didza' cätëze naca, en naca idútë li ca rusédinu' ca naca queë' Dios, en biti' ru'í ládXu'u le ta'nná quiu' bönachi, tu' cabí ruchi'a rusöröu' bönachi ca naca le ta'nnašö bönachi na'.

17 Gudíxjoi' i netu'. ¿Nacxi runi li? ¿Naru' run bayudxi, o biti' run bayudxi quizxaj laztu' queë' César, bönni' yödzö zítu' na' rinná bé'enë' rë'u?

18 Réquibe'enë' Jesús té'ënnë' ulu'béajë' Lë' didza', ate' gudxë' légaquië':

—Libi'ili', bönni' rulu'ísö tsahui' cuinli', ¿bizx que ru'íli' didza' le ruzóa neda' ra' gu'á?

19 Buli'lu'í' i neda' dumí le riguíxaj lázali'.

Ní'irö bulu'lu'í'inë' Lë' tu dumí que yödzö Roma.

20 Jesús gunábinë' légaquië', rnnë':

—¿Nuzxi lahui da' ni, en nuzxi le nazúaj lë'e dumí ni?

21 Të' Lë':

—Queë' César na'.

Ní'irö Jesús gudxë' légaquië':

—Guli'guíxjé' César le nequi queë' César, ate' Dios le nequi queë' Dios.

22 Cate' bila'yönnë' lë ni, bulu'bánninë' ca naca didza' tsahui' bubí'ë Jesús, ate' bulu'cá'anë' Lë', söhušajtëgaquië'.

Ta'nabi yúdxinë' Jesús ca ulu'bán nupa chinátigaca

(Mr. 12:18-27; Lc. 20:27-40)

23 La' dza ná'asö yugu' bönni' yudo' saduceo, bönni' na' ta'nnë' biti' ulu'bán nupa chinátigaca, bila'dxinë' ga zoë' Jesús, ate' gula'nábinë' Lë',

24 ta'nnë':

—Bönni' Usedi, Moisés gunné': “Channö gátie' tu bönni' zóanu nigula queë', en cuntu nu bi'i zóabi' queë', ní'irö bi'i böchë'ë bönni' na' ral-la' utsaga ná'alénbi'-nu nigula uzëbi queë', para cabí initi di'a dza queë' bönni' böchi'bi' na'.”

25 Gula'cuá'abi' gadxi bi'i bönni' ga zóatu', naca böchi'gacabi'. Bi'i zí'alö na' butsaga ná'alénbi'-nu nigula, ate' gútitebi'. Tu' cuntu nu bi'i queëbi' zóabi', bi'i buropi na' butsaga ná'alénbi'-nu nigula uzëbi queëbi' bi'i böchi'bi' na'.

26 Lë'sca' caní guca queëbi' bi'i buropi na', enca' queëbi' bi'i bunní, en la' tuz ca guca quégacabi' igádxitebi', gulátibi' yúgu'tëbi'.

27 Ga búdxite' gútinu ca' nigula na'.

28 Cate' idxín dza ulu'bán nupa chinátigaca, ¿núzxilögacabi' bi'i gadxi ni' guéquinu nigula na' queëbi', tu' bulu'tsaga ná'alenbi'-nu yúgu'tëbi' nigula na'?

29 Ní'irö bubí'ë didza' Jesús, ate' rë' légaquië':

—Nachíxili' libí'ili' tu' cabí réajni'ili' le nazúaj lu guichi lá'ayi, en tu' cabí núnbë'ëli' yöl-la' huáca queë' Dios.

30 Cate' idxín dza ulu'bán nupa chinátigaca, bíti'rö gaca yöl-la' rizóalen nigula, en bití' ulu'tsaga ná'agaquië', pero gácagaquië' ca nácagaquië' gubáz lá'ayi queë' Dios nacué' yehua'yubá.

31 Ca na' ral-la' ulu'bán nupa chinátigaca, ¿naru' cabí nulábanili' lë na' gudxi cazë' Dios libí'ili'?

32 Caní gunnë': "Neda' naca' Dios queë' Abraham, en Dios queë' Isaac, en Dios queë' Jacob." Dios na' bití' náquië' Dios quégaca nupa nátigaca tsaz, pero náquië' Dios quégaquië' bönni' ni nabángaquië' sal-la' gulátië'.

33 Cate' bila'yöni bönachi nacué' ni' didza' ni, bulu'bani ca naca lë na' rusédinë' Jesús léguequi.

Xibá queë' Dios le naca lo

(Mr. 12:28-34)

34 Cate' guléquibe'enë' bönni' yudo' fariseo ca benë' Jesús, busayjë' ruá'agaquië' bönni' yudo' saduceo, ní'irö bulu'dubë' yúgu'të'.

35 Tuë' bönni' nútsë'ë ládjagaquië', en nazëdë' xibá queë' Moisés, gú'unnë' si' bë'ë Jesús.

36 Que lë ni na' gunábinë' Jesús, rnnë':

—Bönni' Usedi, ¿bízxilö xibá queë' Dios naca lo?

37 Jesús rë' lë':

—Idxi'inu' Xanu' Dios idú ládxi'u, en idú icja ládxi'do'o, enca' len idú yöl-la' réajni' quiu'.

38 Xibá ni naca lo, en nazáca'tërö.

39 Xibá na' naca buropi, la' ca nácatë, en caní rna: "Idxi'inu' böchi' luzó'o ca nadxí'i cuinu'."

40 Chopa xibá ni nácagaca ga röjloz yúgu'të le rinná bë' xibá queë' Dios, en yúgu'të le bulu'sédinë' bönni' gulu'ë didza' uláz queë' Dios.

¿Nuzxi zxi'ini náquië' Cristo?

(Mr. 12:35-37; Lc. 20:41-44)

41 Tsanni ni' nacué' tsözxón bönni' yudo' fariseo na', Jesús gunábinë' légaquië',

42 rnnë':

—¿Nacxi rusáca'li' queëli' queë' Bönni' na' lë' Cristo? ¿Nuzxi zxi'ini náquië'?

Bulu'bi'ë didza', ta'nnë':

—Zxi'ini xi'sóë' David náquië'.

43 Ní'irö Jesús rë' légaquië':

—¿Bix que na' lë cazë' David bulidzë' Lë', gunné': "Xana"?" Caní gunné' cate' ni' bë'ë didza' uláz queë' Dios Bö' Lá'ayi, gunné':

44 Xanru' Dios gudxë' Xana':

"Gurö'ö cuita lë'a ibëla, cate' gunra' ga ulu'zechu zxíbigaca Lo' nupa tequi Li' zi'."

45 Channö David na' gunné' queë' náquië' Xanë', ¿nacxi caz naca, rnnali' náquië' zxí'ini xi'sóë' David na'?

46 Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

23

Jesús ruzéqui'ë yugu' bönni' yudo' didza'

(Mr. 12:38-40; Lc. 11:37-54; 20:45-47)

1 Ní'irö Jesús bë'lenë' bönachi nacua' ni' len yugu' bönni' usëdi queë' didza'.

2 Rë' légaquië':

—Yugu' bönni' yudo' fariseo, en yugu' bönni' yudo' usëdi nuhuöázagaquië' xilatjë' Moisés, en tu'sëdinë' bönachi.

3 Que lë ni na', guli'gún yúgu'të le ilë' libí'ili', pero biti' gunli' libí'ili' ca na' tunë' légaquië', tu' tu le ta'nnë', en ia'tú le tunë'.

4 Le ta'nná bé'enë' bönachi naca ca tu yua' zi'i le cabí sequi' nu guá', ate' tu'gu'ë le ya'zxícjagaca bönachi, pero légaquië' biti' të'ënnë' ulu'tenë' le, calëga len tuze xibön ná'agaquië'.

5 Yúgu'të le tunë', tunë' para ila'lé'e bönachi légaquië', tu' tunë' zxön le túgui'ë yen ná'agaquië', en ra' xigágaquië' ga na' nuzúajgaquië' tu le nazúaj lu guichi lá'ayi, en tu'tunnë' luzxi lari' nácugaquië'.

6 Të'ënnë' ila'bö'ë ga naca lataj lo ga na' tu'dubë' tahuë', enca' ga na' naca lataj lo lu yu'u ga tu'dubë' tu'sëdë' queë' Dios.

7 Lë'sca' caní, të'ënnë' ulu'gapa bönachi légaquië' didza' ba zxön gapa naca lógaca bönachi, en të'ënnë' ilë' bönachi légaquië': "Padiux, bönni' usëdi."

8 'Pero libí'ili', biti' ral-la' gunli' ga nu guië' libí'ili': Bönni' Usëdi, tu' zoa tuz Nu naca Bönni' Usëdi queëli', neda', Cristo, ate' yúgu'tëli' nácali' böchi'li' tuli' ia'tuli'.

9 Cuntu nu guiëli' luyú ni, biti' innali': Xuz, tu' zoa tuz Nu naca Xúzili', zoë' yehua' yubá.

10 Biti' gunli' ga nu guië' libí'ili': Xan, tu' zoa tuz Nu naca Xanli', neda', Cristo.

11 Nu nutsa' ladjali' nu run xichinli' ia'zica'röli', nu ni na' gácarö lo ga zóali'.

12 Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

13 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nōza sōjácalen bōnachi para ila'dxín ga ni' rinná bē'ē Dios yehua' yubá. La' libí'sili' biti' sequi' tsú'uli', en biti' ruí'ili' lataj ila'yú'u nupa té'ēni ila'yú'u.

14 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lídxigacanu nigula uzēbido', en para ulu'isö tsahui' cuinli', xidzé rulídzali'-nē' Dios. Que lē ni na', zí'terō irugu queēli' quí'i sáca'li'.

15 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridōdili' idú lu nísado', en idú yōdzōlió ni para gunli' ga tseaj lādxxē'ē tu bönni' Dios tsōzxon len libí'ili', en cate' chiguzxéqui'li'-nē', runli' ga nabága'rē' xíguia' ca libí'ili', ate' tsōjtsu'ē lu gu' gabila.

16 'Bica' bayechi' libí'ili'. Nachul-la loli', ate' rē'ēnili' ulu'ili' nōza bōnachi. Caní naca queēli' tu' rnnali': "Channō bi rizí' lu nē'ē tu bönni' ni'a que yudo', biti' run bayudxi, pero channō runē' le ni'a que oro dzō'ō yudo', bayudxi gun."

17 Libí'ili', bönni' lo chul-la, en tu' caréajni'i. ¿Bízxilō nácarō lo? ¿Naru' oro na', o yudo' le run lá'ayi oro na'?

18 Lēasca' caní rnnali': "Channō nu bönni' gunē' le ni'a que bucugu lá'ayi, biti' gun bayudxi, pero channō gunē' le ni'a que gun zxoá lahui, bayudxi gun."

19 Libí'ili', nazídili', en nachul-la loli'. ¿Bízxilō nácarō lo? ¿Naru' gun zxoá láhuisō, o bucugu lá'ayi na' run lá'ayi gun na'?

20 Que lē ni na', channō nu bönni' runē' le ni'a que bucugu lá'ayi, runē' le ni'a que le, enca' ni'a que yúgu'tē le zxóagaca láhuisō.

21 Lēasca' caní, channō nu bönni' runē' le ni'a que yudo', runē' le ni'a que le, enca' ni'a queē' Dios, nun cazē' xilatjē' ni'.

22 Lēasca' caní, channō nu bönni' runē' le ni'a que yehua' yubá, runē' le ni'a que lataj ga rō'ē rinná bē'ē Dios, enca' ni'a que Lē cazē' Dios rō'ē ni'.

23 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queēli' tu' riguízxcjali' que yudo' tu cō' huéaj tu' chi cō' le rizí'ili' que xōhuéaj, en que guixi' anís, en que comino la' huagu, pero rucá'anali' le nácarō lo le rinná bē' xibá queē' Dios, tu' cabí runli' le naca tsahui', en biti' ruhuéchi' lādxi'li' luzá'ali', en biti' réajlē'ēli'-nē' Dios. Yugu' lē ni run bayudxi gunli', en lēs biti' ucá'anali' ia'zíca'rō lē na' runli', le riguízxcjali' que yudo'.

24 Libí'ili', nachul-la loli', en rē'ēnili' ulu'ili' nōza bōnachi. Ca na' runli' naca ca rudōdili' bōdzádzado' le ré'jali', rubéajgacali'-ba' bō'iyudo', pero ré'jali'-ba' bōa' ta'bíé'-ba' bönni'.

25 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Nácali' ca zxíga'do' ré'jali', en yö'öna ráhuili'. Riguíbili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'.

26 Libí'ili', bönni' yudo' fariseo lo chul-la. Zí'alö guli'quibi le nuá' lu zxíga'do', en lu yö'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lë'ëli'.

27 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le nácgaca chiguíchido'os cuita lë'e, en le nácatë lachi nalá'gaca, pero nalí'gaca dxita quégaca nupa chinátigaca, enca' yúgu'të le siguti.

28 Lë'sca' caní nácali' libí'ili'. Le nácatë láhuisö rulu'i' cuinli' tsahui' lógaca bönachi, pero lu icja ládxi'do'oli' nalili' yugu' le rulu'isö tsahui' cuini, en le ruá' dö' runli'.

29 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruchísali' biquitaj que ba gapa nagáchi'gaquië' bönni' gulu'ë didza' uláz queë' Dios, en ruí'ili' biquitaj gapa nagáchi'gaca bönachi tsahui'.

30 Lë'sca' caní rnnali': "La'tu' zóatu' dza ni'te cate' gula'cu'ë xuz xtó'otu', bití' guntu' légaquië' tsözxön cate' gulútië' yugu' bönni' gulu'ë didza' uláz queë' Dios."

31 Tu' rnnali' caní, la' libí'isili' runli' ba nalí nácali' zxi'ini xi'sóagaca nupa ni' bétigaca yugu' bönni' gulu'ë didza' uláz queë' Dios.

32 Caní naca, rusubaga' cuinli' xíguia' na' gula'báguië' xuz xtó'oli'.

33 'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zí' libí'ili' lu guí' gabila'?

34 Que lë ni na', neda' isöl-la'a queéli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzo.

35 Caní gaca, ibága'li' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bétigaca Zacarías, zxi'inë' Berequías, bönni' na' bëtili'-në' gatsaj láhui'lö ga dë yudo', en ga dë bucugu lá'ayi ga na' tu'zégui'ë' böa' bédxido' lahuë' Dios.

36 Le nácatë rea' libí'ili', yúgu'të lë ni ila'baga' bönachi nacúa' dza ni zóaru' na'a.

Jesús ribödxë' ni'a que yödzo Jerusalén

(Lc. 13:34-35)

³⁷ Lësca' caní gunnë' Jesús:

—Jerusalén, Jerusalén, libí'ili' na' rútigacali'-në' bönni' tu'ë didza' uláz queë' Dios, en ruládxigacali' guiöj nupa nasö-l-lë'ë Dios. Zián luzuí gú'unida' utuba' libí'ili' quia', ca runba' yöjede, rutúbiba' börado' queëba' zcan xíliba', pero bití' gú'unili'.

³⁸ Buli'yútsöca', cá'asö ugá'ana yu'u lídxili'.

³⁹ Caní gaca, tu' rea' libí'ili', na'a isí lo bití' ulé'eli' neda' cate' innárolí': "Lá'ayi náquië' Bönni' na' zë'ë uláz queë' Xanru'."

24

Riguíxjö'ë Jesús ca si' ulu'quínajë' yudo'

(Mr. 13:1-2; Lc. 21:5-6)

¹ Birúajë' Jesús chila yudo', en tsanni ni' rizë'ë ni', gula'bígüi'ë bönni' usëda queë' ga na' zoë', ate' bulu'lu'ínë' Lë' ca nácgaca zö'ö nagú'ugaca lë'a yudo'.

² Bubi'ë didza' Jesús, ate' rë' légaquië':

—¿Rilé'etseli' yúgu'të lë ni? Le nácatë rea' libí'ili', bití' ca' ugá'ana guiöj nabaga' luzë'e ni, le cabí' iguínaj.

Le ilaca bë' chizóa idxín dza údxi que yödzölió

(Mr. 13:3-23; Lc. 21:7-24; 17:22-24)

³ Cate' ni' rö'ë Jesús ga naca lu Guí'a Yaga Olivo, bila'dxinë' bönni' usëda queë' ga na' zoë' queëzë', en të' Lë':

—Gudíxjöi'i netu', ¿bátaxi ilaca lë ni, en bizxi gaca bë' dza huödu', en dza údxi que yödzölió ni?

⁴ Ní'irö bubi'ë didza' Jesús, ate' rë' légaquië':

—Buli'yú para cabí' nu si' ye'e libí'ili',

⁵ tu' zá'gaquië' zián bönni' légaquië' ca lea' neda'. Ila'nnë' nácgacaquië' Cristo, en ila'zí' yé'enë' bönachi zián.

⁶ Huayönili' raca gudil-la, en le ruí' didza' que gudil-la, pero bití' cö'öli' böniga, tu' ral-la' ilaca yúgu'të lë ni, pero cabí' ridxini dza údxi cate' ilácarö lë ni.

⁷ Til-la tu yödzö len ia'tú yödzö, ate' tu ga nu rinná bë' len ia'tú ga nu rinná bë'. Ilatsaj yödzöhuë' zxon, en gaca gubín, ate' zián lataj tödi budó' zxu'.

⁸ Yúgu'të lë ni nácgaca le isí lógaca yugu' le ila'guí' ila'zaca' bönachi.

⁹ Ní'irö ulu'dödi bönachi libí'ili' lu na' nu usaca' zi' libí'ili'. Yúgu'të bönachi ulu'dí' libí'ili' tu' dá'ali' neda', en ilútië' bál-lali' libí'ili'.

¹⁰ Cate' gaca caní, gaca chopa ládxi'gaca zián bönachi, en ulu'cá'ana neda', ate' udödi tu ia'tú luzë'e, en tu ia'tú udí' luzë'e.

11 Ní'irö ulu'lu'i lógaquië' zían bönni' ta'zí' yë'ë. Ulu'lu'i cuíngaquië' ca yugu' bönni' tu'ë didza' uláz queë' Dios, en ila'zí' yé'enë' bönachi zían.

12 Iluá'ada' dō' bönachi, ate' que lē ni na' bití'rō ila'dxí'i böchi' luzé'eguequi.

13 Nu guequi tsaz queë' Dios ga idxintē dza údxi, nu ni ulá.

14 Idú yōdzōlió gaca libán que didza' dxí'a ca rinná bē'ë Dios para gaca ba nalí que lógaca yúgu'tē bönachi izá'a, ate' ní'irō idxín dza údxi.

15-16 'Nu ulaba lē ni ral-la' uzéajni'i ladxi'. Gunnē' Daniel, bönni' bē'ë didza' uláz queë' Dios, gunnē': "Tsaza le rudí'inē' Dios lataj lá'ayi queë' Dios, lē na' rusuniti." Cate' ilé'eli' gaca caní, ní'irō nuli' zóali' luyú Judea ral-la' tsōjzxúnajli' saca' guí'ado'.

17 Nu dxía ícjo'olō biti' gal-la' huōtaj tsōjzxí' bi dē que lu yu'u, pero ral-la' izxúnajtē.

18 Nu zoa la' guixi', biti' gal-la' huōaj tsōjzxí' lari' que.

19 Bica' bayechi' yugu' nigula si' ulu'zóanu bí'ido' quégacanu, enca' nigula ni' tu'gádxí'nu-bi' bí'ido' quégacanu cate' idxín dza ni'.

20 Buli'lidzē' Dios inábili'-nē' cabí idxín dza ni' izxúnajli' cate' raca beo' ziaga o cate' naca dza lá'ayi,

21 tu' ila'guí'i ila'záca'tērō bönachi dza ni' ca gula'guí'i gula'záca' bönachi dza ni'te cate' si' guta' gurō'ō yōdzōlió, ga ridxintē na'a dza, en calēga dza zá'gaca biti' ila'guí'i ila'záca' caní.

22 Cate' idxín dza ni', channō Dios biti' cuéqui lahuē' quégaquië', cuntu nu ulá, pero cuéqui lahuē' quégaquië' dza ni', en gácalenē' nupa gurō cazē' Lē'.

23 'Ní'irō biti' tséajlë'ëli' channō nu idxín queëli', en guíë libí'ili': "Buli'yútsōca', ni zoë' Cristo", o inná: "Ni' zoë'."

24 Ulu'lu'i lógaquië' zían bönni' ta'zí' yë'ë, en ila'nnē' nácagaquië' Cristo, o ila'nnē' tu'ë didza' uláz queë' Dios. Ilunē' le ilaca bē', en le ilún ga ulu'bani bönachi, ate' ila'zí' yé'enē' nupa gurō cazē' Dios channō huala'zéqui'nē'.

25 Buli'yútsōca', chigudxi caza' libí'ili' yúgu'tē lē ni zí'atēlō ca si' ilaca.

26 Que lē ni na', biti' irúajli' channō ila'dxín queëli' nupa ilē libí'ili': "Buli'yútsōca', ni' zoë' Cristo lu lataj cá'asō." Lēscá' caní, biti' tséajlë'ëli' channō ila'nná: "Buli'yútsōca', lu yu'u zoë'."

27 Ca na' raca cate' rēpi yōsa ga rilén gubidza, en ruzení' ga ribía gubidza, lēscá' caní gaca cate' huōda' neda', Bönni' Guljē' Bönachi.

28 Ilácatē caní, ca na' ta'nná bönachi: "Gátí'tēs ga dē tu le nati, ni' ulu'dubi cázaba' bíchulab."

Ca gaca cate' huödë' Bönni' Guljë' Bönachi
(Mr. 13:24-37; Lc. 21:25-33; 17:26-30, 34-36)

29 Gunnë' ca' Jesús:

—Tödi yugu' dza ni' cate' ila'gu'i ila'zaca' bönachi caní, ichul-la gubidza, ate' beo' biti' gunna beni' que. Ila'guínnajba' böljaj lúzxiba, ate' ila'zxízi le nalá'gaca naca tsutsu lúzxiba.

30 Ní'irö ilá' lahui lúzxiba le gaca bë' huöda' neda', Bönni' Guljë' Bönachi, ate' ila'bödxi yechi' yúgu'të bönachi yödzülió ni, cate' ila'lé'e neda', Bönni' Guljë' Bönachi, suzá'a lu böaj lúzxiba, dë lu na'a yöl-la' unná bë', en yöl-la' huáca zxön.

31 Ní'irö isöl-la'gaca'-në' gubáz lá'ayi quia'. Ulu'cödxë' zidzaj lúzuba' böa' guixi', ate' ulu'tubë' nupa naböa' quia', nacuá' idapa la'atë yödzülió, en yúgu'të lataj zzan lúzxiba.

32 'Buli'zéajni'i ládxi'li' le rusedi libí'ili' le raca que yaga higo. Cate' ta'lén ni'a në'e yúludo', en chirubía xilaguí' yúludo', inözili' chizóa idxín cusubá.

33 Lësca' caní, cate' ilé'eli' taca yúgu'të lë ni, inözili' chizóa idxín dza údxi na', en chiridzaga lahui.

34 Le nácatë rea' libí'ili', yúgu'të lë ni ilaca zí'atëlö ca ilátigaca bönachi nacuá' dza ni'.

35 Huadödi quégaca lúzxiba, en luyú ni, pero yugu' xtídza'a biti' ila'dödi cá'asö.

36 'Cate' idxín dza ni' cuntunu nözi. Biti' nözguequinë' gubáz lá'ayi queë' Dios nacu'ë yehua' yubá, en biti' nözda' neda', Zxi'inë' Dios, pero tuzë' Dios Xuz nözinë'.

37 'Ca na' guca dza cate' ni' zoë' Noé, lësca' caní gaca cate' huöda' neda', Bönni' Guljë' Bönachi.

38 Yugu' dza ni' zí'atëlö ca si' idxín nisa guiöj le busuniti yödzülió, gulë'aj gulahuë', bulu'tsaga ná'agaquië', en bulu'dödë' zxi'inigaquië' lu yöl-la' rutsaga na' ga bidxintë dza guyázië' Noé lë'e barco zxön ni' benë',

39 en biti' gulëquibe'enë' cate' bidxintë nisa guiöj le busuniti yödzülió, ate' gula'nítië' yúgu'të'. Lësca' caní gaca cate' si' huöda' neda', Bönni' Guljë' Bönachi, cuntunu guëquibe'e.

40 Dza huöda' ila'cu'ë chopë' bönni' la' guixi'. Tuë' uchë'a-në' quia', ate' ia'túë' ucá'ana'-në'.

41 Ila'cuá'anu chópanu nigula nacuá'anu huëtu. Tunu uchë'a-nu quia', ate' ia'tunu ucá'ana'-nu.

42 'Buli'subán ládxi'li' tu' cabí nözili' bizxi dza huöda' neda', Xanli'.

43 Na'a, guli'tséajni'i lë ni. La'tu' nözinë' xan yu'u bizxi dza guidë' gubán, huanë'ë yëla, en biti' gu'ë lataj nu quidaj zö'ö para cuan le dzö'ö lidxë'.

44 Que lë ni na', buli'subán ládxi'li' ca' libí'ili', tu' huöda' neda', Bönni' Guljë' Bönachi, tu dza biti' nuzóa icjali'.

Bönni' huen dxin tsahui', en bönni' huen dxin biti' náquië' tsahui'

(Lc. 12:41-48)

⁴⁵ Gunnë' ca' Jesús:

—¿Nuzxi caz bönni' huen dxin náquië' tsahui', en réajni'inë', bönni' huen dxin na', xanë' cu'ë lu në'ë bönachi nacuá' lidxë' para gu'ë le ilágugaca cate' idxín dza?

⁴⁶ Bica' ba bönni' huen dxin na' náquië' tsahui', bönni' na', cate' udxinë' xanë', uduxáquië' lë' caní runë' le nudödë' xanë' lu në'ë.

⁴⁷ Le nácatë rea' libí'ili', yúgu'të le dë queë' xanë', udödë' lu në'ë bönni' huen dxin na' runë' caní.

⁴⁸ Channö huöáquië' bönni' huen dxin queë' huiá' dö', en sa ládxë'ë, innë': "Huadzenë' xana', en biti' huödatië'",

⁴⁹ en channö isí lahuë' gundë' zi' bönni' túnlenë' lë' tsözxön dxin, en isí lahuë' ca' gu'aj gágulenë' nupa ta'zudxi,

⁵⁰ ní'irö huödë' xanë' bönni' huen dxin na' tu dza cate' biti' zoë' ribözë', o tu yëla biti' réquinë'.

⁵¹ Ní'irö xanë' na' usaca' zí'dë'ë bönni' huen dxin na', en gunë' ga gaca queë' ca na' ral-la' gaca quégaca nupa tu'lu'isö tsahui' cuínguequi. Ní'irö cödxí yechë'ë, en gagu zxea láyë'ë.

25

Rucúdzü'ë didza' Jesús ca naca quégacabi' chibi' bi'i nigula ra'bando'

¹ Gunnë' ca' Jesús:

—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuá'gaca guí' quégacabi', ate' bila'rúajbi' tsöjtságagacabi' bönni' utsaga në'ë.

² Gáyu'bi' nácagacabi' bi'i biti' ta'yéajni'ibi' ate' ia'gáyu'bi' nasína'gacabi'.

³ Yugu' bi'i nigula biti' ta'yéajni'ibi' na' gula'zí'ibi' le nuá'gaca guí' quégacabi' pero biti' guluá'abi' ia'lati' za régui.

⁴ Yugu' bi'i sina' na' guluá'abi' za régui lu böga'do' quégacabi' len le nuá'gaca guí' quégacabi'.

⁵ Tu' gudzenë' bönni' utsaga në'ë, gudödi yëla lógacabi', en gulásitëbi'.

⁶ Cate' bidxín idú guluhuëla, biyön chi'i nu rinnë zidzaj, rnna: "¡Chizë'ë bönni' utsaga në'ë! ¡Guli'rúaj tsöjtságali'-në'!"

⁷ Ní'irö gula'yásabi' yúgu'tëbi' bi'i nigula na', ate' bulu'pá'abi' le nuá'gaca guí' quégacabi'.

⁸ Gulu'í'ibi' didza' bi'i biti' ta'yéajni'ibi' na', en gulëbi' yugu' bi'i sina' na': "Guli'gunna queëtu' láti'do' za régui queéli' tu'úlu le nuá'gaca guí' queëtu' ni."

⁹ Bulu'bí'ibi' didza' bi'i sina' na', gula'nnabi': "Biti' gaca, tu' cabí bi ugá'ana queëtu', en queëli'. Guli'tséajtsöca' ga ridó'o za régui, tsöj'ö'uli' queëli'."

¹⁰ Tsanni ni' söjácabi' söjxí'gacabi' le, bidxinë' bönni' ut-saga në'ë. Yugu' bi'i na' nacuá'abi' sina', en ta'bözabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u.

¹¹ Gudödi ni' ia'zíca'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queëtu'."

¹² Lë' bubí'ë didza', rnnë': "Le nácatë rea' libí'ili', biti' nözda' gazxi libí'ili'."

¹³ Ní'irö Jesús gudxë' légaquië':

—Buli'subán ládxi'li', tu' cabí nözili' bizxi dza o bizxi yëla huöda' neda', Bönni' Guljé' Bönachi.

Rucúdzu'ë didza' Jesús ca naca que dumí zaca'

¹⁴ Gunnë' ca' Jesús:

—Ca gun Nu na' rinná bë' yehua' yubá naca ca benë' tu bönni', chizóa tsejë' zì'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

¹⁵ "Tuë' bönni' huen dxin na', gulu'ë gayu' dumí nazaca' lu në'ë, ate' ia'túë' gulu'ë chopa dumí nazaca' lu në'ë. Ia'túë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zéqui'në'. Ní'irö la' guzá'atë' ga naca zì'tu'.

¹⁶ Guyijë' bönni' huen dxin na' guzxi'ë gayu' dumí nazaca' na', en yöjtíljalenë' le ia'gayu' dumí nazaca'.

¹⁷ Lësca' caní, bönni' na' guzxi'ë chopa dumí na', yöjtíljalenë' le ia'chopa ca'.

¹⁸ Bönni' na' guzxi'ë tu dumí guyijë', en yöjchö'önë' lu yu, ate' bucáchë'ë dumí queë' xanë' lu yu ni'.

¹⁹ 'Cate' chigudzé, budxinë' xángaquië' bönni' huen dxin na', ate' bucá'analënë' légaquië' tsahui'.

²⁰ Ga gusí lo bidxintë' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yöjtíljalena' le."

²¹ Xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a yénni'tërö cu'a lu no'o. Guyaza ga zoa', udzëjalenu' neda'."

²² Gudödi ni' bidxinë' ca' bönni' huen dxin na' guzxi'ë chopa dumí nazaca', ate' rnnë': "Xan, chopa dumí gulú'u lu na'a. Ni dë ia'chopa dumí ca' yöjtíljalena' le."

²³ Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'tërö cu'a lu no'o. Guyaza ga zoa', udzëjalenu' neda'."

24 Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga bití' guzu', en rutubu' ga bití' guchilju'.

25 Que læ ni na' gúdxida' li', ate' guyija', yöjcácha'a dumí quiu' lu yu. Ni dë na'a le nequi quiu'."

26 Ní'irö bubí'ë didza' xanë', en rë' læ': "Nacu' huen dxin bití' naca tsahui', en xöhuëdi. Nöz quézinu' rulapa' ga bití' guza', en rutuba' ga bití' guchilja'.

27 Que læ ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guíljalënë' le ia'lati', para cate' huöda' neda', uzi'a le nequi quia' len icja ca'."

28 Ní'irö xanë' na' gudxë' nupa nacuá' ni': "Guli'cúa dumí na' dë lu në'ë bönni' ni, en guli'cú'u le lu në'ë bönni' na' dë queë' chi dumí."

29 Núti'tës nu rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' bití' rugún tsahui' dxin le dë lu në'e, la's dui le dë queë' idúa.

30 Na'a, bönni' huen dxin bití' naca tsahui' ni, guli'tsöjchú'una-në' ní'ilö ga naca chul-la. Ni' cödxí yéché'ë, en gagu zxea láyë'ë.

Cristo uchi'a usöröë' quégaca bönachi

31 Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi.

32 Ulu'dubi dërö lahua' neda' bönachi yödzölió ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'.

33 Yugu' bö'cu' zxila' na' ucu'ë-ba' cuita læ'ë ibëla, ate' yugu' chivo na' ucu'ë-ba' cuita læ'ë yögöla.

34 Ní'irö, neda', bönni' unná bë', guía' nupa nacuá' cuita læ'a ibëla, innía': "Guli'dá ga zoa', libí'ili' bubéajë' Xuza' libí'ili' quez queë'. Nequi queéli' lataj ga na' rinná bë'ë, læ na' bupë'ë queéli' dza ni'te cate' ni' benë' yödzölió.

35 Caní nequi queéli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'.

36 Biyadzaj le gácu'a, ate' bugáculi' neda' le ráculi'. Gü'í'ida', ate' buduyúli' neda'. Guyu'a lidxi guíë, ate' buduyúli' neda'."

37 Ní'irö ulu'bi'ë didza' bönni' tsahui' na', ilë' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u?"

38 ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'?"

39 ¿Bátaxi bilé'etu' Li' gü'ínu', o guyú'u lidxi guié, ate' buduyútu' Li'?"

40 Ubi'a didza' neda', bönni' unná bē', ate' guía' légaquiē': "Le nácatē rea' libí'ili', tu' benli' caní queē' nu bönni' böcha'ado' ni, sal-la' náquiē' bönni' cá'asö, quia' neda' caz benli' ca'."

41 'Ní'irö guía' nupa nacuá' cuita lē'a yögöla, innía': "Guli'cuíta ga zoa', libí'ili' na' nabága'li' xíguia', tsöjtsázali' lu guí' na' bití' ulu, lē na' bupě'ē Dios ni'a que tu' xihui', en quéguequi gubáz dá'gaca le.

42 Caní gaca queēli' tu' guduna', ate' bití' bénnali' le gahua'. Gubidxa' nisa, ate' bití' bénnali' le guí'ja'.

43 Guca' ca bönni' ridē' zi'tu', ate' bití' gulú'uli' neda' lídxili'. Biyadzaj le gácua', ate' bití' bugáculi' neda' le ráculi'. Güí'ida', enca' guyu'a lidxi guié, ate' bití' buduyúli' neda'."

44 Ní'irö ila'nná ca' nupa na', ilē neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridē' zi'tu', o biyadzaj le gacu', o güí'ínu', o guyú'u lidxi guié, ate' bití' gúcalentu' Li'?"

45 Ní'irö ubi'a didza' neda', bönni' unná bē', guía' légaquiē': "Le nácatē rea' libí'ili', tu' cabí bi benli' que tu nu nutsa' ladaj nupa nacuá' ni, sal-la' naca cá'asö nu na', bití' bi benli' quia' neda'."

46 Ní'irö bönachi tuá' dö' na' la' tsöjtsázagacatē ga ni' ila'guí'i ila'záca'tica'sö, pero bönachi tsahui' ni' gata' yöl-la' na'bán idú quéguequi.

26

Tun xtídza'gaquiē' bönni' yudo' ila'zönē' Jesús
(Mr. 14:1-2; Lc. 22:1-2; Jn. 11:45-53)

1 Cate' budxi bē'ē Jesús yugu' didza' ni, gudxē' yugu' bönni' usēda queē',

2 rnnē':

—Nöz quézili' ia'chopa dza idxín Laní Pascua, ate' dza na' neda', Bönni' Guljē' Bönachi, ulu'dödē' neda' lu ná'agaca nupa ulu'dá' neda' lē'e yaga cruz.

3 Ní'irö bila'dxinē' yugu' bixúz unná bē' len yugu' bönni' yudo' usedi, en bönni' gula tu'zėjni'inē' bönachi judío, ate' bulu'dubē' ga naca lö'a lidxi bixúz lo, lē' Caifás.

4 Ni' gulún xtídza'gaquiē' ila'zönē' Jesús, lu yöl-la' rizí' yē' quégaquiē', para ilútiē' Lē'.

5 Ta'nnē':

—Bití' gunru' lē ni dza laní, para cabí ila'dzatsa bönachi.

Tu nigula rigú'unu le rilá' zxixi icjē' Jesús
(Mr. 14:3-9; Jn. 12:1-8)

6 Cate' ni' zoē' Jesús lu yödzö Betania lu yu'u lidxē' Simón, bönni' na' gü'ínē' huē' nudzu' ruzödi,

7 bidxinnu cúdzu'lë' Jesús tu nigula, nuá'anu tu böga'do' néquini guiöj nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ni' rö'ë rahuë'.

8 Cate' bila'lë'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni?

9 Guca nu guti' lë ni, en si' dumí zían para gácalenru' yugu' bönachi yechi'.

10 Cate' biyönnë' Jesús lë ni, rë' légaquië':

—¿Bizx que rnnëli' queënu nigula ni? Tsahui' naca le bennu quia'.

11 Yugu' bönachi yechi' ila'cuá'lentica'sö libí'ili', pero neda' biti' ugá'analentica'sa' libí'ili'.

12 Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba.

13 Le nácatë rea' libí'ili', gáti'tës luyú yödzölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

Rizí' lu në'ë Judas udödë' Jesús lu ná'agaquië' bönni' unná bë' (Mr. 14:10-11; Lc. 22:3-6)

14 Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáquië' chínnuë' na' dá'gaquië' Jesús,

15 ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tsahui' ilu'ë lë' chi uruá' dumí plata.

16 Ní'irö gusí lahuë' Judas na' risí ribö'ë udödë' Jesús lu ná'agaquië'.

Le ráguru' le rusá' ládxi'ru' ca gútië' Xanru'

(Mr. 14:12-25; Lc. 22:7-23; Jn. 13:21-30; 1Co. 11:23-26)

17 Cate' naca dza risí lo laní quégaquië' bönni' judío cate' tahuë' yöta xtila le cabí nazí'i cúa zi que, gula'bígüi'ë bönni' usëda queë' Jesús ga zoë', en të' Lë':

—¿Gazxi rë'ënu' tsöjpá'atu' queëru' para gáguru'-ba' bö'cu' zxíla'do' dzö' Laní Pascua?

18 Jesús rë' légaquië':

—Guli'tséajtsöca' yödzö ni' ga na' zoë' tu bönni', en guli'guíë': “Bönni' rusédinë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' zxíla'do' dzö' Laní Pascua.”

19 Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pë'ë le ilahuë' dzö' Laní Pascua.

20 Cate' chigudzö' dza na', Jesús gurö'lenë' idxínnutë' bönni' usëda queë' tahuë'.

21 Tsanni ni' tahuë', Jesús rë' légaquië':

—Le nácatë rea' libí'ili', tu nu nutsa' ládjali' ni udödi neda'.

22 Ní'irö bulu'huí'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

23 Bubi'ë didza' Jesús, rnnë':

—Bönni' ni runë' në'ë tsözxön len na'a lu yö'öna, bönni' ni udödë' neda'.

24 Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

25 Ní'irö bubí'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús rë' lë':

—Ön, li' na'.

26 Tsanni ni' tahuë', gudélé'ë Jesús yöta xtila, en gudxë' Dios: "Xclenu'." Ní'irö buzxuzxjë' le, en bunödzejë' quégaquië' bönni' usëda queë', rnnë':

—Guli'sí', guli'gagu. Lë ni le naca caza'. Ca bena' que yöta xtila ni ruluí' ca gaca que le naca caza'.

27 Gudélé'ë ca' tu zxíga'do', en gudxë' Dios: "Xclenu'." Ní'irö bunödzejë' ca' quégaquië', rnnë':

—Guli'gui'aj yúgu'tëli'.

28 Lë ni ruluí' ca naca xichöna' le run tsutsu didza' cubi rucá'ana tsahuí'. Xichöna' na' ilalaj ni'a quégaca bönachi zían para gaca uniti lahuë' Dios yugu' dul-la' nabága'gaquië'.

29 Rea' ca' libí'ili', bití'rö guí'ja' xisi le ribía lubá uva ni cate' idxinrö dza ni' guí'jalena' libí'ili' tu le cubi ga ni' rinná bë'ë Xuza'.

Jesús rnnë' innë' Pedro bití' núnbë'ë Lë'

(Mr. 14:26-31; Lc. 22:31-34; Jn. 13:36-38)

30 Cate' budxi gulúl-lë' yöl-la' ba queë' Dios, yöjáquië' lu Guí'a Yaga Olivo.

31 Ní'irö Jesús rë' légaquië':

—Yúgu'tëli' gaca chopa ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bö'cu' Zxila', ate' ilásilasiba' bö'cu' zxila' na'."

32 Cate' ubana' lu yöl-la' guti, ní'irö tséaja' tsöjnörúa' loli' saca' luyú Galilea.

33 Ní'irö bubí'ë didza' Pedro, en rë' Jesús:

—Sala' ilaca chopa ládxi'gaquië', en ulu'cá'anë' yúgu'të' Li', neda' bití' gaca chopa ládxa'a, bití' ucá'ana' Li'.

34 Jesús gudxë' lë':

—Le nácatë rea' li', na'a dzö' ni, cate' si' cödxilöba' böra, li' innó' tsonna luzuí' bití' núnbë'u neda'.

35 Ní'irö Pedro gudxë' Jesús:

—Sal-la' gátilentea' Li', biti' ca' innía' biti' núnbë'a Li'.
Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemani'

(Mr. 14:32-42; Lc. 22:39-46)

³⁶ Ní'irö Jesús bidxínlenë' légaquië' la' yëla Getsemani', ate' gudxë' yugu' bönni' usëda queë' na', rnnë':

—Guli'cö'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' zxí'inë' Zebedeo, ate' gusi lahuë' ruhuí'innë', en risëbi ládxe'ë.

³⁸ Ní'irö Jesús gudxë' légaquië':

—Ruhuí'ini ládxa'a, en huáti caza' lu yöl-la' risëbi ladxi'. Guli'gá'ana ni, en guli'ná' yëla tsözxön len neda'.

³⁹ Gudödë' Jesús ia'láti'do' ní'ilö, ate' ni' biyéchuë'. Busudxín lahuë' lu yu, en bulidzë' Dios, gunné':

—Xuza', channö huáca, ben ga biti' gun bayudxi qui'i saca'a lë ni, calëga ca rë'ënda' neda', pero ca rë'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', ate' rë' Pedro:

—¿Naru' cabí gúcatsö iná'alenu' neda' tsözxön yëla tu chí'ido'?

⁴¹ Guli'ná' yëla, en buli'lidzë' Dios inábili'-në' gácalenë' libí'ili', para cabí güi'ili' Satanás tu' xihui' lataj si' bë' libí'ili' le xihui'. Bö' naca cázali' nasína'tica'sö, pero lu yöl-la' bönáchisö queëli' nacuídi'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga biti' qui'i saca'a lë ni, ben ca raza ládxi'u Li'.

⁴³ Cate' böajë', leyúbölö buduxaquië' légaquië' tasië' tu' nadödirö yëla guiöj lógaquië'.

⁴⁴ Ní'irö bucá'anë' Jesús légaquië', ate' guyijë' leyúbölö, en bulidzë' Dios le bunni luzuí, ate' tuz ca gunné' zí'alö rnnë'.

⁴⁵ Leyúbölö böajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö ládxi'li'? Buli'yútsöca', chibudzaga lo. Neda', Bönni' Guljë' Bönachi, chinadöda' lu ná'agaquië' bönni' dul-la'.

⁴⁶ ¡Guli'chasa, uyéajru! Buli'yútsöca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', ate' dzágagaquië' bönni' zían lë', nuá'agaquië' guíë tuchi', en yugu' yágado'. Yugu' bixúz unná

bë', en bönni' gula tu'zéajni'inë' bönachi judío nasöl-la'gaquië' légaquië'.

⁴⁸ Judas, bönni' na' rudödë' Jesús, chibulu'inë' légaquië' tu le gunë' le gaca bë' nu naca Jesús, gunnë':

—Bönni' na' utsaga lahua'-në', Lë' na' Jesús. Guli'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'.

⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', ate' gula'zönë' Jesús.

⁵¹ Tuë' bönni' dzáguië' Jesús gulecjë' guíë tuchi' queë', en benë' huë', guchúguië' guídi náguië' bönni' huen dxin queë' bixúz lo.

⁵² Jesús gudxë' lë':

—Bugú' guíë tuchi' quiu' lidxi. Yúgu'të nupa tu'dí'ini guíë tuchi', lu guíë tuchi' ilátigaca.

⁵³ ¿Naru' cabí nözinu' huáca ulidza' Xuza', ate' Lë' la' isöla'të' ziantëro ca chinno cö' gubáz lá'ayi le naca zían gáyu'ë tu cö' huéaj?

⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' guíë tuchi', en yágado' para sönli' neda' ca runli' rizönli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero biti' guzxönli' neda'.

⁵⁶ Raca caní yúgu'të lë' ni para udxín le nazúaj lu guichi lá'ayi, ca na' gula'nnë' bönni' gulu'ë didza' uláz queë' Dios.

Ní'irö yúgu'të bönni' usëda queë' Jesús bulu'cá'anë' Lë', en bulu'zxúnnejë' ni'.

Ridxinë' Jesús lógaquië' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ní'irö yugu' bönni' na' zöngaquië' Jesús gula'ché'ë Lë', ate' bila'dxinë' lahuë' Caifás, bixúz lo, ga ni' nudúbigaquië' ca' yugu' bönni' yudo' usedi len bönni' gula tu'zéajni'inë'.

⁵⁸ Pedro söjnáhuë' Jesús zítu' zítu'sö, en bidxinë' ga naca lö'a lidxi bixúz lo na', para ilé'enë' nacxi utságuië' Jesús.

⁵⁹ Yugu' bixúz unná bë' len bönni' gula tu'zéajni'inë', en bönni' yudo' tu'chi'a tu'söröë', bulu'guiljë' nu uzegui Jesús didza' sal-la' si' yë'ë bönni' na', para gaca ila'chúguië' queë' gatië'.

⁶⁰ Cuntu nu bila'dzölinë' sal-la' bila'dxinë' bönni' zían, en gula'nnë' queë' le cabí nácatë. Ga búdxitë bila'dxinë' chopë' bönni', ate' lu yöl-la' rizí' yë' quegaquië' gula'nnë' queë',

⁶¹ ta'nnë':

—Bönni' ni gunnë': "Huaca uquínna' yudo' queë' Dios, ate' uchisa' le ia'tsonna dzasö."

⁶² Ní'irö guzuínë' bixúz lo na', en rë' Jesús:

—¿Naru' cabí rubí'itso' didza'? ¿Bizxi caz lë ni ta'nnë' bönni' ni quiu'?

⁶³ Jesús bití' bi gunnë'. Ní'irö bixúz lo gudxë' Lë':

—Ni'a queë' Xanru' Dios ban rinná bé'eda' Li' quíxjö'u le nácatë. Gudíxjö'i netu' channö nacu' Li' Cristo, Zxí'inë' Dios.

⁶⁴ Jesús rë' lë':

—Ca na' rnno' naca'. Le nácatë rea' libí'ili', ilé'eli' neda', Bönni' Guljë' Bönachi, rö'a cuita lë'ë ibëla Dios, ga ni' dë lu na'a yöl-la' unná bë', ate' guída' lu böaj lúxiba, en idxina' ga zóali'.

⁶⁵ Ní'irö lu yöl-la' rilé queë' guchözë' bixúz lo lari' nácuë', rnnë':

—¿Gunnë' zi'ë bönni' ni queë' Dios! ¿Núzxirö naquíniru' nu innë queë' bönni' ni? Chibiyön quézili' didza' zi' bë'ë queë' Dios.

⁶⁶ ¿Nacxi rusáca'li' queëli'?

Bulu'bi'ë didza', gula'nnë':

—Nabáguë'ë xíguia' gátie'.

⁶⁷ Ní'irö bulu'chejë' zxöna' lahuë' Jesús, en gulu'ë dö' queë'. Gula'gápë'ë ru'ë Jesús ia'zica'rë',

⁶⁸ en të' Lë':

—¿Nácatso' Li' Cristo? Gunnëya'atsöca' na'a, ¿nuzxi na' gupada' Li'?

Pedro rnnë': "Biti' núnbë'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹ Tsanni ni' gulaca lë na', rö'ë Pedro ló'alö, ate' bidxinnu tunu nigula huen dxin ga na' zoë', ate' rnnanu:

—Lësca' li' gudálenu' Jesús, bönni' Galilea na'.

⁷⁰ Gudá'baguë'ë Pedro lógaca bönachi nacuá' ni', rnnë':

—Biti' nözda' nuzxi que na' ru'u didza'.

⁷¹ Cate' birúajë' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacuá' ni':

—Bönni' ni gudálenë' ca' Jesús, bönni' Nazaret na'.

⁷² Leyúbölö gudá'baguë'ë Pedro, en buzötjë' Dios, rnnë':

—Biti' ca' núnbë'a-në' bönni' ni.

⁷³ Iá'láti'do'os gudzé, gula'biga' nupa nacuá' ni' ga na' zoë' Pedro, en të' lë':

—Le nácatë li' nunu' ca' tsözxön légaquië' tu' naca bë'u yöl-la' ru'isö quiu' didza'.

⁷⁴ Ní'irö gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' ni.

La' ná'asö gurödxitëba' böra.

⁷⁵ Ní'irö yöjnenë' Pedro didza' gudxë' Jesús lë', gunnë': Cate' si' cödxilöba' böra, tsonna luzuí chigunnó' bití' núnbë'u neda', ate' burúajë' Pedro ni', en gurödxi yéchi'dë'ë.

27

Tu'dödë' Jesús lu në'ë Pilato

(Mr. 15:1; Lc. 23:1-2; Jn. 18:28-32)

¹ Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús.

² Gula'chë'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

Ratië' Judas

³ Cate' chinözinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', buí'innë', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'.

⁴ Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Bití' gun lë ni ga cõ'ötu' böniga. Le ben cazu' li' na'.

⁵ Ní'irö gurú'unë' Judas yugu' dumí plata na' ga naca chila yudo', ate' buzë'ë ni', en yöjsí yenë'.

⁶ Bulu'zi'ë bixúz unná bë' yugu' dumí plata na', ta'nnë':

—Bití' sa'yéaj cú'uru' dumí ni ga rigú'uru' dumí que yudo', tu' naca lazxjë' tu bönni' ratië' bönachi.

⁷ Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'.

⁸ Que lë ni na', ga ridxintë na'a dza nazí'i le lataj na', La' Yëla Rön.

⁹ Caní guca ca na' gunnë' Jeremías, bönni' bë'ë didza' uláz queë' Dios, gunnë': "Gula'guélé'ë chi uruá' dumí plata na', tsca le gula'zéqui'në' bönni' Israel Lë',

¹⁰ ate' dumí na' gulá'uinë' la' yëla queë' tu bönni' huen rö'ö. Lë ni bulu'ínë' Xana' neda'."

Ridxinë' Jesús lahuë' Pilato

(Mr. 15:2-5; Lc. 23:3-5; Jn. 18:33-38)

¹¹ Cate' bulu'sudxinë' Jesús lahuë' Pilato, bönni' na' rinná bë'ë uláz que yödzö Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasö rño'.

¹² Cate' yugu' bixúz unná bë' len bönni' gula tu'zéajni'inë' bulu'zégui'ë Jesús didza', bití' bi didza' bubí'ë Jesús.

13 Ní'irö Pilato rë' Jesús:

—¿Naru' cabí riyöntsenu' cate' xö le ta'nné' quiu'?

14 Jesús bití' bi didza' bubí'ë. Caní guca, bubáninë' bönni' unná bë' na'.

Rirugu queë' Jesús gátië'

(Mr. 15:6-20; Lc. 23:13-25; Jn. 18:38-19:16)

15 Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönachi rusanë' tuë' bönni' yu'ë lidxi guíë, núti'tës nu té'ëni usanë'.

16 Dza na' tu bönni' nabáguë'ë xíguia', lë' Barrabás, yu'ë lidxi guíë ní'.

17 Cate' bulu' dubi bönachi zían ní', Pilato gunábinë' légaquië', rnnë': —¿Nuzxi rë'ënili' usana' queéli'? ¿Naru' Barrabás o Jesús, Bönni' na' lë' Cristo?

18 Caní gunné' Pilato tu' réquibe'enë' bulu'dödë' bönni' yudo' Jesús lu në'ë tu' tu'zxé'enë' Lë'.

19 Tsanni ní' rë'ë Pilato ga na' ruchi'a rusöröë', nigula queë' gusöl-la'nu nu tsöjödxi lë', rnna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla béchigal tu' nözinë' Lë'.

20 Yugu' bixúz unná bë' len bönni' gula tu'zéajni'inë' gula'gú'u yöl-lë'ë bönachi zían na' para ila'nabi Pilato usanë' Barrabás na', ate' gútië' Jesús.

21 Leyúbölö bë'ë didza' bönni' unná bë' na', rë' légaquië':

—¿Núzxilë' chopë' ni rë'ënili' usana'-në' queéli'?

Gula'nnë':

—Barrabás.

22 Ní'irö Pilato gunábinë' légaquië', rnnë':

—¿Nacxi guna' queë' Jesús, bönni' na' lë' Cristo?

Yúgu'të' ta'nnë':

—¡Budë'ë lë'e yaga cruz!

23 Ní'irö bönni' unná bë' na' rë' légaquië':

—¿Bizxi dö' benë'?

Zídzajrö gulu'ë didza', ta'nnë':

—¡Budë'ë lë'e yaga cruz!

24 Cate' réquibe'enë' Pilato bití' birúaj xtídzë'ë, pero gula'dzátsarö bönachi, ní'irö gudélë'ë nisa, en gudibi në'ë lógaquië', rnnë':

—Biti' bi xíguia' nabága'a neda' tu' nözi yöl-la' guti queë' bönni' tsahui' ni. Le gun cázali' libí'ili' lë ni.

25 Bulu'bí'i didza' yúgu'të bönachi ní', ta'nná:

—¡Yöl-la' guti queë' bönni' ni ibága'tu' netu', en ila'baga' ca' xzí'initu'!

26 Ca' guca, Pilato busanë' Barrabás na' lu ná'agaquië'. Ní'irö gunná bé'enë' bönni' röjáquië' gudil-la ila'guínë' Jesús,

ate' gudödi ni' budödë' Lë' lu ná'agaquië' para ulu'dë'ë Lë' lë'e yaga cruz.

²⁷ Yugu' bönni' röjáquië' gudil-la nacu'ë lu në'ë bönni' unná bë' na' gula'chë'ë Jesús lu yu'u yúlahui' nazí'i le pretorio, ate' ni' bulu'tubë' yúgu'të bönni' röjáquië' gudil-la nacu'ë ni' ga na' zoë' Jesús.

²⁸ Ní'irö gula'lecjë' lari' nácuë' Jesús, en bulu'gácuë' Lë' tu lari' xiná chul-la, ca rácu gaca nupa ta'nná bë'.

²⁹ Bulu'dxië' icjë' tu le néquini ni'a në'e yaga yötsi' le naca ca le dxia icjë' bönni' rinná bë'ë, en bulu'zóë' tu guído' lu në'ë ibëla le rulu'i ca tu yaga que bönni' yúlahui'. Ní'irö bulu'zóa zxi bë' lahuë', en bulu'titjë' Lë', ta'nnë':

—¡Bica' ba Li', rinná bé'enu' bönachi judío!

³⁰ Ní'irö bulu'chejë' Lë' zxöna', ate' bulu'guélé'ë gui na', en gula'guinë' icjë'.

³¹ Gudödi bulu'titjë' Jesús, gula'lecjë' lari' na' nácuë', ate' bulu'gácuë' Lë' lari' que cazë'. Ní'irö gula'chë'ë Lë' para tsöjdá'agaquië' Lë' lë'e yaga cruz.

Tu'dë'ë Jesús lë'e yaga cruz

(Mr. 15:21-32; Lc. 23:26-43; Jn. 19:17-27)

³² Cate' ni' bila'rúajë' bönni' na', yöjxáca'gaquië' Simón, tu bönni' Cirene, ate' gulunë' ga bi'ë yaga cruz queë' Jesús.

³³ Cate' bila'dxinë' lataj nazí'i le Gólgota, le rnna lu didza' xidza', Lataj Que Böga' Ícjaru',

³⁴ bulu'gui'jë' Jesús nupi zi nutsí'i zxígala'aba' böa' guixi'. Cate' buxí'i ru'ë Jesús, bití' gú'unnë' guí'jë'.

³⁵ Cate' chinudá'agaquië' Lë' lë'e yaga cruz, gula'guísië' lari' nácuë', en bulu'quitjë' lahui le gaca bë' núzxilë' guequi queë'. Caní guca, budxín lë na' gunné' bönni' bë'ë didza' uláz queë' Dios, gunné': "Gula'guísië' lari' nácuá', en bulu'quitjë' lahui le gaca bë'."

³⁶ Ní'irö gula'bö'ë ni', tu'yúë' Jesús.

³⁷ Lësca' bulu'zóë' lë'e yaga cruz ícjälë' Jesús tu didza' le riguixjö' le nabáguë'ë le rnna caní: "Bönni' ni Jesús, Bönni' rinná bé'enë' bönachi judío."

³⁸ Ga ni' dë'ë Jesús, bulu'dë'ë ca' lë'egaca yaga cruz chopë' bönni' gubán. Tuë' bulu'dë'ë cuita lë'ë ibëla, en ia'túë' na' cuita lë'ë yögöla.

³⁹ Gula'dödë' ni' yugu' bönni' bulu'lidza zi'ë Jesús, en bulu'tá ícjagaquië', tu'titjë' Lë',

⁴⁰ ta'nnë':

—¡Ön, Li' na' uquínnaju' yudo', ate' tsonna dzasö ca' uchísatso' le! ¡Busölä cuinu' na'a channö nacu' Li' Zxí'inë' Dios! ¡Bötjatsöca' lë'e yaga cruz na'!

41 Lësca' caní bulu'titjē' Lē' yugu' bixúz unná bē' len yugu' bönni' yudo' usedi, en yugu' bönni' yudo' fariseo, len bönni' gula tu'zéajni'inē', ta'nnē':

42 —Yugu' nu yúbölö busölē' bönni' ni, pero biti' gaca usölá cuinë'. Channö náquiē' Bönni' inná bé'enē' bönachi Israel, huójtatsöquiē' na'a lē'e yaga cruz, ate' tséajlē'ēru' Lē'.

43 Lē' buzxöni ládxe'ē Dios. Dios usölá cazē' Lē' na'a channö raza ládxe'ē Lē', tu' gunné': "Zxí'inē' Dios naca'."

44 Lësca' caní yugu' bönni' gubán na' dá'gaquiē' lē'egaca yaga cruz ga ni' dē'ē Jesús bulu'lidza zi'ē Lē'.

Ratiē' Jesús

(Mr. 15:33-41; Lc. 23:44-49; Jn. 19:28-30)

45 Cate' bidxín huagubidza, guchul-la idütē yödžölió ga bidx-intē idú ridödi xihuó.

46 Idú ridödi xihuó na', bē'ē zidzaj didza' Jesús, rnnē':

—Elí, Elí, ¿lama sabactani?

Didza' ni rna lu didza' xidza': "Dios quia', Dios quia', ¿bizx que nubéaj ládxi'u neda'?"

47 Cate' nupa nacua' ni' bila'yöni didza' ni, ta'nná:

—Bönni' ni rulidzē' Elías, bönni' ni' bē'ē didza' uláz queē' Dios.

48 La' guxítitē' tuē' bönni' nútsē'ē ladjagaquiē', en gudélē'ē tu le bululu rixxupi nisa, ate' buxúpinē' le nupi zi, en buzöē' le tu lu gui, ate' butságuiē' le ru'ē Jesús para xupē'.

49 Ní'irö ia'zica'rē' bönni' ni' ta'nnē':

—¡Gulözagarö! ¡Yuyútsöca'ru' channö huidē' Elías usölē' Lē'!

50 Leyúbölö gurödxī'ē zidzaj Jesús, ate' burúajtē bö' naca cazē', gútitē'.

51 La' ná'asö biröza'tē lari' nal-la' lu yudo', birúaj choplö, le gudela' icjlö ga bidxintē xiní'i. Ní'irö gudödi budó' zxu', en gula'lá'a guiójj.

52 Gula'yajaj yeru ba quégaca nupa chinátigaca, nupa ni' gula'yéajlē' Dios, ate' bulu'bán bönachi na'.

53 Gudödi bubanē' Jesús, bulu'rúajē' bönni' na' yeru ba quégaquiē', en gula'yáziē' yödžö lá'ayi Jerusalén, ga ni' bila'lé'e bönachi zían légaquiē'.

54 Ní'irö gúdxinē' bönni' na' rinná bé'enē' bönni' röjáquiē' gudil-la, enca' yugu' bönni' röjáquiē' gudil-la nacua'lenē' lē' tu'yúē' Jesús, ate' gunné':

—Le nácatē bönni' ni gúquiē' Zxí'inē' Dios.

55 Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzē'ē luyú Galilea, ate' gulunnu xichinē', gula'gú'unu le gulahuē'.

56 Lësca' María Magdalena, en María, xiná'agaquië' Jacobo, en José, nútsa'gacanu ládjagacanu, ate' zóanu ca' ni xiná'agaquië' yugu' zxi'inë' Zebedeo.

Ta'gu'ë Jesús yeru ba le nadaj lë'e gu'a guiöj
(Mr. 15:42-47; Lc. 23:50-56; Jn. 19:38-42)

57 Cate' chiridzö' dza na', bidxinë' José, bönni' Arimatea, tu bönni' rilé'enë' yöl-la' tsahui' queë', en dë'ë ca' Jesús.

58 Bönni' ni yöjyüë' Pilato, en gunabë' lataj u'ë Jesús. Ní'irö Pilato gunná bë'ë ulu'nödzjë' queë' Jesús.

59 Guzxi'ë José Lë', en buchölinë' Lë' tu lari' nazaca'.

60 Ní'irö gulu'ë Lë' lu yeru ba cubi queë' le naguidjë' lë'e gu'a guiöj. Budë'ë tu guiöj blaga zxön ga nu riyaza yeru ba na', ate' söhuöjë'.

61 Gula'cuá'anu María Magdalena, en ia'tunu María ni', rö'gacanu ra' yeru ba na'.

Yugu' bönni' röjáquië' gudil-la tapa chi'ë ba queë' Jesús

62 Cate' za' reni' ia'tú dza, gudödi bulu'pë'ë que dza lá'ayi quégaquië' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato.

63 Të' Pilato:

—Bönni', röjnetu' bi gunné' bönni' rizi' yë'ë na', cate' ni' zoë' nabanë', gunné': “Cate' gaca tsonna dza ubana' lu yöl-la' guti.”

64 Que lë' ni na' gunná be'e nupa ilún chi'i ba ni' ga idxintë dza bunny, para cabí ídigaquië' bönni' usëda queë' chi'i dzö'ölö, en ulu'béajë' Lë'. Ní'irö ilë' bönachi: “Bubanë' Jesús lu yöl-la' guti.” Channö caní gaca, didza' cabí nácatë ni ilu'ë gúntëro huiá' dö' ca ben didza' cabí nácatë na' gulu'ë zí'alö.

65 Pilato gudxë' légaquië':

—Ni nacu'ë bönni' röjáquië' gudil-la. Guli'chë'ë queëli'. Guli'tséaj, guli'gún chi'i yeru ba na' tsca séqui'li' gunli'.

66 Ní'irö yöjáquië' ni', en bulu'sayjë' dxi'a yeru ba na', en bulu'dë'ë lë'e guiöj na' tu le gaca bë' channö isalaj, ate' bulu'cá'anë' ni' bönni' röjáquië' gudil-la ilún chi'ë le.

28

Rubanë' Jesús lu yöl-la' guti

(Mr. 16:1-8; Lc. 24:1-12; Jn. 20:1-10)

1 Cate' chigudödi dza lá'ayi quégaquië' bönni' judío, en chizá' reni' dza domingo, yöjyúgacanu María Magdalena en ia'tunu María na' yeru ba queë' Jesús.

2 Tsárido'os gudödi budó' zxu'. Caní guca, tu' bötjë' tuë' gubáz lá'ayi queë' Xanru' narúajë' yehua' yubá. Bidxinë' ra' yeru ba na', ate' gudüë' guiöj blaga zxön na', en gurö'ë lu guiöj na'.

³ Nalá' lahui gubáz lá'ayi na' ca yösa bení', ate' zxíla'do'os naca lari' nácuë'.

⁴ Cate' yugu' bönni' na' röjáquië' gudil-la tapa chi'ë yeru ba na' bila'lé'enë' lë', guládxinë', en gula'zxízië'. Gula'dzö'ë lu yu, en guláquië' ca bönni' nati caz.

⁵ Ní'irö gubáz lá'ayi na' gudxë' yugu' nigula na', rnnë':

—Biti' gádxili'. Nözda' ruguíjali'-në' Jesús, bönni' na' bulu'dë'ë lë'e yaga cruz.

⁶ Biti' zoë' ni tu' chibubanë' ca na' chigunná cazë' Lë'. Guli'dá, uyuli' ga ni' gutë' Xanru'.

⁷ Guli'tséaj na'a, guli'tsöjödxi yugu' bönni' usëda queë' chibubanë' Jesús lu yöl-la' guti, ate' na'a Lë cazë' inöruë' loli' saca' luyú Galilea. Ni' ulé'eli'-në'. Chigudxa' libí'ili' le gulu'ë Dios lu na'a.

⁸ Ní'irö la' bulu'zá'tënu ra' yeru ba na', tádxinu, en tu'dzéjanu, ate' carelö söjácanu söjtíxjöi'iguequinu yugu' bönni' usëda queë'.

⁹ Tsanni ni' söjácanu, Jesús yöjtságuië' légacanu, ate' rë' légacanu:

—Padiux.

Ní'irö gula'bíga'nu ga zoë' Jesús, en bulu'nída'nu ni'ë. Gula'yéaj ládxi'gacanu Lë'.

¹⁰ Ní'irö Jesús rë' légacanu:

—Biti' gádxili'. Guli'tséaj, guli'tsöjtíxjöi'i yugu' böcha'a tsöjáquië' saca' luyú Galilea, ate' ni' ulu'lé'enë' neda'.

Le gula'guíxjö'ë yugu' bönni' röjáquië' gudil-la

¹¹ Tsanni ni' söjácanu nigula na', yugu' bönni' na' röjáquië' gudil-la gulún chi'ë yeru ba na' bulu'dxinë' lu yödzö ni', ate' gula'guíxjöi'inë' yugu' bixúz unná bë' yúgu'të lë na' gulaca.

¹² Cate' chibulu'tubë' yugu' bönni' gula tu'zéajni'inë', gulún xtídza'gaquië'. Ní'irö bulu'nödzjë' dumí zían quégaquië' bönni' na' röjáquië' gudil-la.

¹³ Të' légaquië':

—Caní innali': "Bila'dxinë' bönni' usëda queë' chi'i dzö'ölö, en bulu'béajë' Lë' tsanni ni' rásitu'."

¹⁴ Channö huayönnë' bönni' rinná bë'ë lë ni, netu' uzéajni'itu' lë', en guntu' ga biti' bi gunë' queëli'.

¹⁵ Ní'irö yugu' bönni' röjáquië' gudil-la na' gula'zi'ë dumí na' ate' yöjéngaquië' ca na' chinazédagaquië'. Caní guca, tu'zë' bönni' judío didza' ni ga ridxintë na'a dza.

Jesús risöl-lë'ë yugu' bönni' gubáz queë'

(Mr. 16:14-18; Lc. 24:36-49; Jn. 20:19-23)

¹⁶ Ní'irö idxinéajtë' bönni' usëda queë' Jesús yöjáquië' luyú Galilea, ate' bila'dxinë' lu gu'ado' na' chibulu'inë' Jesús légaquië'.

¹⁷ Cate' bulu'lé'enē' Jesús, gula'yéaj ládxi'gaquiē' Lē', pero bal-lē' gulaca chopa ládxi'gaquiē'.

¹⁸ Ní'irō gubígui'ē Jesús ga na' nacu'ē, en rē' légaquiē':

—Dios chinudödē' lu na'a yúgu'tē yöl-la' unná bē' yehua' yubá, en luyú ni.

¹⁹ Que lē ni na', guli'tséaj, guli'tsöjsēdi yúgu'tē bönachi idútē yödzölió. Buli'quíla légaquiē' nisa, ugunli' dxin Lē' Dios Xuz, en Lē' Dios Zxí'ini, en Lē' Dios Bö' Lá'ayi.

²⁰ Guli'sēdi légaquiē' ilunē' yúgu'tē lē na' gunná bé'eda' libí'ili'. Buli'yútsöca', neda' caz zóalena' libí'ili' yúgu'tē dza ga idxinrö dza údxi que yödzölió. Ca' gaca.

DIDZA' DXI'A BUZÚAJĚ' MARCOS

Libán beně' Juan, bönni' buquilě' bönachi nisa

(Mt. 3:1-12; Lc. 3:1-9, 15-17; Jn. 1:19-28)

¹ Caní gusí lo didza' dxi'a ca guca queě' Jesucristo, Zxí'ině' Dios.

² Budxín lě na' buzúajě' lu guichi Isaías, bönni' bě'ě didza' uláz queě' Dios, le gunně' Dios:

Buyútsöca', risól-la'a bönni' gubáz quia', inöruě' Lo'.

Lě' upě'ě nōza ga tödu'.

³ Yōn chi'ě tu bönni' ulidzě' zidzaj lu lataj cá'asō, inně':

"Buli'pá'a nōza para idxín Xanru' yichaj lázxdo'oli'.

Buli'béaj li yugu' nōza lasi ga tödě'."

⁴ Caní budxín, tu' ruquilě' Juan bönachi nisa lu lataj cá'asō, en runě' libán para ila'dila bönachi nisa, bönni' na' bulu'bí'i lądxi'gaquiě' para uniti lahuě' Dios dul-la' nabága'gaquiě'.

⁵ Bila'rúaj bönachi zían yúgu'tě yōdzō luyú Judea, enca' yōdzō Jerusalén, en yōjáquiě' ga na' zoě' Juan, ate' Juan na' buquilě' légaquiě' nisa lu yegu Jordán, bönni' na' gula'xóalěpě' dul-la' nabága'gaquiě'.

⁶ Nácué' Juan lari' néquini lítsa'ba' bōa', en núguě'ě lě'ě tu guídi. Rahuě'-ba' bōchi'zu, en re'jě' le zxixi que buzdo'.

⁷ Runě' Juan libán, rnně':

—Si' zě'ě bönni' tōdi na'a, náparě' yöl-la' unná bě' ca neda'. Biti' naca' neda' lesaca' yéchua', para ilecja' xiráchuě' nudě'ě.

⁸ Neda' ruquila' libí'ili' nisa, pero Lě' guně' le rulu'ísō yöl-la' ridila nisa ní, uchíziě' libí'ili' Dios Bō' Lá'ayi.

Ridilě' Jesús nisa

(Mt. 3:13-17; Lc. 3:21-22)

⁹ Tu dza ni' birúajě' Jesús yōdzō Nazaret luyú Galilea, ate' Juan na' buquilě' Lě' nisa lu yegu Jordán.

¹⁰ Cate' burúajě' Jesús lu nisa, la' ná'asō bilé'eně' guyalaj lúzhiba, en ruhuōtjě' Dios Bō' Lá'ayi, rulu'í' cuině' ca tuba' gu'dōdo', en bidisóaleně' Lě'.

¹¹ Biyōn chi'i nu ru'í' didza' yehua' yubá, rnna:

—Li' nacu' Zxí'ina'. Nadxí'ida' Li', en raza lądxa'a Li'.

Rě'ěni tu' xihui' gun ga ibáguě'ě Jesús dul-la'

(Mt. 4:1-11; Lc. 4:1-13)

¹² Ní'irō Dios Bō' Lá'ayi guchě'ě Jesús bayudxi lu lataj cá'asō.

¹³ Guzōě' Jesús lataj cá'asō na' idú choá' dza, ate' gu'uni Satanás tu' xihui' gun ga ibáguě'ě Jesús dul-la'. Guzōě' Jesús

ga ni' ta'daba' böa' guixi' dzö'öba' guí'ado'. Yugu' gubáz lá'ayi quee' Dios gulácalenë' Jesús, en gula'gu'ë le gudahuë'.

Rusédinë' Jesús bönachi luyú Galilea

(Mt. 4:12-17; Lc. 4:14-15)

14 Gudödi gula'gu'ë Juan na' lidxi guíë, sa'yéajë' Jesús luyú Galilea. Runë' libán ni' que didza' dxi'a ca rinná bë'ë Dios.

15 Caní rnnë':

—Chibídxín dza. Chizóa idinná bë'ë Dios. Buli'bí'i ládxi'li', en guli'tséajlë' didza' dxi'a ni.

Rulidzë' Jesús tapë' bönni' uzxön böla

(Mt. 4:18-22; Lc. 5:1-11)

16 Tsanni ni' ridë' Jesús ra' nísado' luyú Galilea, bilé'enë' Simón len Andrés, bönni' böchë'ë Simón na'. Nácagaquië' uzxön böla, en ta'chiljë' yöxaj böla quégaquië' lu nisa na'.

17 Jesús gudxë' légaquië', rnnë':

—Guli'dutá' neda', ate' guna' ga ichë'ëli' bönachi quia' neda', gunli' ca runli' rizönli'-ba' böla.

18 La' bulu'cá'anatë' yöxaj quégaquië', en sójácalenë' Jesús.

19 Gudödë' Jesús ia'láti'do' ní'ilo, ate' bilé'enë' Jacobo, en Juan, yugu' zxi'inë' Zebedeo, nacu'ë lë'e bárcodo' quégaquië', tu'ünë' yöxaj böla quégaquië'.

20 Jesús la' bulidztë' légaquië', ate' bulu'cá'anë' xúzgaquië' Zebedeo, dzáguië' yugu' huen dxin quee' lë'e bárcodo' na', ate' sójácalenë' Jesús.

Tu bönni' yu'u lë' bö' xihui'

(Lc. 4:31-37)

21 Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quégaquië' bönni' judío, guyázië' Jesús yu'u ga tu'dubë' bönni' judío, en tu'sëdë' quee' Dios, ate' gusí lahuë' rusédinë' nupa nudúbigaca ni'.

22 Bulu'báninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi.

23 Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' quee' Dios, ate' gurödxí'ë bönni' na', rnnë':

24 —¿Bizxi rál-la'tu' quiu', Jesús, bönni' Nazaret? ¿Za'tsu' usunítíu' netu'? Núnbë'a Li', nacu' Bönni' Lá'ayi quee' Dios.

25 Jesús buzenë' le bach, rnnë':

—Busayaj ru'u, en burúaj lu bönni' ni.

26 Ní'irö bö' xihui' na' buxízida' bönni' na' yu'u lë', ate' gurödxí'a zidzaj, en la' burúajtë.

27 Bulu'báninë' yúgu'të bönni' nacu'ë ni', ate' gula'nabi luzë'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¡Len yöl-la' unná bë' rinná bë'enë' yugu' bö' xihui', ate' tun ca rnnë'!

28 La' guzëtë didza' que yöl-la' huáca queë' Jesús, ate' bila'yöni bönachi idútë luyú Galilea na'.

Ruúnë' Jesús xiná'anú nigula queë' Pedro
(Mt. 8:14-15; Lc. 4:38-39)

29 Ní'irö burúajë' Jesús lu yu'u ga na' tu'dubë' tu'sedë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés.

30 Ní' dënu xiná'anú nigula queë' Pedro, yú'unu tu xilá. La' gula'guíxjöi'itenë' Jesús ca raca queënu.

31 Ní'irö gubígui'ë Jesús, ate' gudélë'ë ná'anú, en guchisë'-nu. La' burúajtë tu xilá na' yú'unu, ate' bupá'anú le gulahuë'.

Ruúnë' Jesús zían nupa te'e
(Mt. 8:16-17; Lc. 4:40-41)

32 Cate' chiridzö', ca gudxía gubidza, la' dujuá'gacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús.

33 Yúgu'të bönachi lu yödzö bila'guírö ga nu riyaza yu'u ga na' zoë' Jesús.

34 Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea
(Lc. 4:42-44)

35 Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios.

36 Simón, en nupa nacué'len lë' söjdíljagaquië' Jesús.

37 Cate' yöjxáca'gaquië' Lë', të' Lë':

—Yúgu'të bönachi tu'guílaj Lí'.

38 Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúaja'.

39 Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sëdinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi
(Mt. 8:1-4; Lc. 5:12-16)

40 Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yuë' lahuë', rnnë':

—Channö ré'ënu', huáca unu' neda'.

41 Jesús buéchi' ládxe'ë lë'. Bulí në'ë, gudanë' lë', en gudxë' lë':

—Rë'ënda'. Chinuhuóacu'.

42 Ca gunné' ca', la' bunítitë huë' ré'enë', en böáquië' dxí'ado'.

43 Ní'irö Jesús buzenë' bach bönni' na', en la' busöl-la'të' lë'.

44 Caní gudxë' lë':

—Cuntu nu guío' ca bena' quiu', pero guyéaj, yöjlu'i cuinu' lahuë' bixúz, en yöjnödzaj para le böácanu' li' que yudo' ca na' gunná bë'ë Moisés, lë na' ulu'í bö'nachi chinuhuóacu'.

45 Burúajë' bönni' ni, en gusí lahuë' riguíxjöi'inë' bö'nachi zían ca guca queë'. Tu' buzë' didza' ni, bití'rö guca tsázië' Jesús yálajdo' tu lu yödzö, pero guzóasë' ní'ílö gapa naca lu lataj cá'asö. Bö'nachi yúgu'të yödzö bila'dxín ga na' zoë' Jesús.

2

Bönni' ré'enë' huë' nacú'unië' bin
(Mt. 9:1-8; Lc. 5:17-26)

1 Cate' chigudödi chopa tsonna dza, buázië' Jesús yödzö Capernaum, ate' guzë' didza' zoë' yu'u.

2 La' bulu'dúbitë bö'nachi zían ga na' zoë' Jesús, ga bidxintë bití'rö guzxéqui' ila'cuá' ni', ni ra' yu'u, ate' Jesús benë' libán que xtídzë'ë lógaquië'.

3 Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin.

4 Bití' guca ila'dxinë' lahuë' Jesús tu' nacua' bö'nachi zían ni'. Que lë ni na' gula'saljë' ícjo'olö ca dödilö ga zoë' Jesús. Cate' budxi bulu'dxië' yeru na', ni' bulu'zötjë' le denë' bönni' huë' na'.

5 Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' li' ca naca dul-la' nabágu'u.

6 Rö'ögaquië' bal-lë' bönni' yudo' usedi ni'. Ta'zá' ládxi'gaquië', ta'nnë':

7 ¿Bíx que ru'ë caní didza' bönni' ni? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni.

8 La' gúquibe'etenë' Jesús le ta'zá' ládxi'gaquië', ate' gudxë' légaquië':

—¿Bíx que rizá' ládxi'li' caní?

9 Bití' naca bö'niga nu guiësö bönni' huë' ni chibuníti lo dul-la' nabáguë'ë, pero naca bö'niga nu gun ga huóásë', en u'ë le denë', en uzë'e ni'ë.

10 Guna' le gaca bë' neda', Bönni' Guljë' Bö'nachi, dë lu na'a luyú ni uniti lahua' dul-la' nabága'gaca bö'nachi.

Ní'irö Jesús gudxë' bönni' huë' na':

11 —Li' rea': Guyasa. Buá' le denu', en böaj lidxu'.

12 La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacua' ni'. Bulu'bánninë' yúgu'të', en gula'gu'ë Dios yöl-la' ba, ta'nnë':

—Catu caz rilé'etu' le caní.

*Jesús rulidzë' Leví**(Mt. 9:9-13; Lc. 5:27-32)*

¹³ Burúajë' Jesús yödzo Capernaum, na' gudödë' leyúbölö ra' nísado'. Bulu'dubi bönachi zían ga zoë' Jesús, ate' Lë' busédinë' légaquië'.

¹⁴ Cate' ridödë' Jesús ni', bilé'enë' Leví, zxi'inë' Alfeo, rö'ë ga ruquíxjë' uláz que yödzö zi'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

¹⁵ Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquíxaj, en ia'bal-lë' bönni' cá'asö rö'ölengaquië' tsözxón Jesús, en yugu' bönni' usëda queë'. Caní guca, tu' röjaca bönachi zían len Jesús.

¹⁶ Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxón yugu' bönni' uquíxaj, en ia'bal-lë' bönni' cá'asö, gulë' yugu' bönni' usëda queë' Jesús, ta'nnë':

—¿Bizxi caz runtsë'? ¡Rë'aj rágulentsë' yugu' bönni' uquíxaj, en ia'bal-lë' bönni' dul-la'!

¹⁷ Biyönnë' Jesús didza' ni tu'ë, en gudxë' légaquië':

—Nupa nacué' dxi'a biti' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bí'i ládxi'gaca.

*Ru'ë Jesús didza' que yöl-la' run gubasa**(Mt. 9:14-17; Lc. 5:33-39)*

¹⁸ Tu dza ni' tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá'gaquië' Juan, en bönni' dá'gaquië' yugu' bönni' yudo' fariseo, pero bönni' dá'gaquië' Li' biti' tunë' gubasa?

¹⁹ Bubi'ë didza' Jesús, rë' légaquië':

—¿Naru' réquitseli' ilún gubasa nupa nacué' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', biti' gaca ilunë' gubasa.

²⁰ Idxín dza cate' udüë' bönni' na' rutsaga në'ë, en bíti'rö sóalenë' légaquië', ate' dza ní'irö ilunë' gubasa.

²¹ Cuntu nu bönni' udë'ë tu lari' cúbido' lu lari' chinatëbi, tu' utsupí lari' cubi na', en huachöza' lari' tēbi na', ate' huaröza'rö lari' tēbi na'.

²² Lë'sca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj

buzudi néquini guídi. Xisi uva cubi lu buzudi néquini guídi cubi ral-la' cá'aru'.

Bönni' dá'gaquië' Jesús ta'lecjë' do dza lá'ayi
(Mt. 12:1-8; Lc. 6:1-5)

²³ Tu dza lá'ayi quégaquië' bönni' judío, gudödë' Jesús gapa dë yöla zxoa' xtila, ate' bönni' usëda queë' gula'sí lógaquië' ta'lecjë' do ga dxía zxoa' xtila.

²⁴ Ní'irö bönni' yudo' fariseo gulë' Jesús, ta'nnë':

—Buyútsöca'. ¿Bizx que tunë' bönni' dá'gaquië' Li' le cabí ralla' gunru' dza lá'ayi?

²⁵ Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacua'len lë'

²⁶ ate' guyázië' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' biti' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacua'lenë' lë'.

²⁷ Ní'irö Jesús gudxë' légaquië':

—Dios benë' dza lá'ayi le ulu'zí' xibé bönachi, calëga benë' bönachi para ilún chi'i dza lá'ayi.

²⁸ Que lë ni na', neda', Bönni' Guljë' Bönachi, naca' Xani dza lá'ayi.

3

Ruúnë' Jesús tu bönni' narequi' në'ë
(Mt. 12:9-14; Lc. 6:6-11)

¹ Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë.

² Bönni' yudo' nacua'ë ni' tu'yúë' Jesús channö únë' bönni' na' dza lá'ayi, tu' té'ënnë' ulu'zégui'ë Lë' didza'.

³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxí'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöla' na'bán o usunitiru' le?

Gula'cuá' dxisö bönachi ni'.

⁵ Ní'irö len yöla' rilé queë', buyúë' Jesús bönachi na' nacua' gásibi'ilë'. Ruhuf'innë' tu' nácaquië' zidi ladxi'. Gudxë' bönni' na' narequi' në'ë, rnnë':

—Bulí no'o.

Ní'irö bulí në'ë bönni' na', ate' böácatë dxí'ado' në'ë.

⁶ Ní'irö bulu'ruájë' bönni' yudo' fariseo, ate' la' guluntë' tsözxön didza' len bönni' dá'gaquië' Herodes bi ilunë' queë' Jesús, para ilútië' Lë'.

Tu'dubi bönachi zián ra' nísado'

⁷ Buzé'ë Jesús ni' tsözxön len bönni' dá'gaquië' Lë', en bidxinë' ra' nísado', ate' sōjácálen Lë' bönachi zián narúajgaca luyú Galilea, en luyú Judea.

⁸ Bönachi zián narúajgaca Jerusalén, en luyú Idumea, en ia'tsölá'a yegu Jordán, en yugu' yödzö nacua' idú gásibi'ilö ga nacua' yödzö Tiro, en yödzö Sidón bila'dxín ca' ga zoë' Jesús. Caní gulunë', tu' bila'yönnë' ca nácagaca yugu' le zxön runë' Jesús.

⁹ Que lë ni na' Jesús gunná bé'enë' bönni' dá'gaquië' Lë' ulu'cöztica'së' tu bárcodo' ga gaca cuenë', para cabí ulu'quí bönachi zián na' Lë'.

¹⁰ Caní guca tu' chibunë' zián nupa te'e, ate' bila'guirö bönachi zián na' ga zoë' para ila'gán Lë'.

¹¹ Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bödxí'a, ta'nná:

—Nacu' Li' Zxí'inë' Dios.

¹² Jesús buzenë' le bach bö' xihui' na', cabí ila'guixjō' nu náquië' Lë'.

Riböë' Jesús chinnu bönni' ilácagaquië' gubáz queë'

(Mt. 10:1-4; Lc. 6:12-16)

¹³ Ní'irö gurenë' Jesús tu lu gu'ado', ga ni' bulidzë' nupa rë'ënë'. Gula'biguë'ë bönni' ni gásibi'ilë'.

¹⁴ Jesús bucu'ë chínnuë' bönni' ni, para ila'cuá'lenë' Lë', en para isöl-lë'ë légaquië' tsöjéngaquië' libán.

¹⁵ Budödë' lu ná'agaquië' yöl-la' huáca ulu'únë' nupa te'e, en ulu'béajë' bö' xihui' yú'ugaca bönachi.

¹⁶ Caní nácagaca lágaquië':

Simón, (buzóë' Jesús ia'tú lë', Pedro),

¹⁷ Jacobo,

Juan, (bönni' böchë'ë Jacobo, ate' nácagaquië' zxi'inë' Zebedeo.

Chopë' ni, Jesús buzóë' ia'tú lágaquië', Boanerges, le rna lu didza' xidza': Bönni' sínia' ca guziú'),

¹⁸ Andrés, Felipe, Bartolomé, Mateo, Tomás,

Jacobo, (zxi'inë' Alfeo),

Tadeo,

Simón, (bönni' ru'í lādxë'ë yödzö queë'),

¹⁹ Judas Iscariote, (bönni' udödë' Jesús lu ná'agaquië' bönni' ilútië' Lë').

Yugu' bönni' yudo' ta'nnë': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquië' Lë' bulu'dxinë' tu lu yu'u.

20 Leyúbölö bila'guirö bönachi zían ga zoë' Jesús, ate' bíti'rö guta' lataj bi ilahuë' Jesús, en bönni' na' dá'gaquië' Lë'.

21 Cate' di'a dza queë' Jesús bila'yönnë' ca raca queë', bila'dxinë' ni' para ulu'chë'ë Lë', ta'nnë': Richixi icjë'.

22 Lësca' caní bönni' yudo' usedi, narúajgaquië' Jerusalén gula'nnë' queë', ta'nnë':

—Dzaga Belzebú, xángaca bö' xihui' Lë', ate' len yöl-la' unná bë' que rubéajë' yugu' bö' xihui'.

23 Ní'irö Jesús bulidzë' yugu' bönni' yudo' usedi na', en bucúdzu'ë didza', rnnë':

—¿Naru' ubéaj la' cuinsi Satanás tu' xihui'?

24 Channö ila'rúaj choplö bönachi tu yödzö, en ila'díl-lalen luzë'eguequi, bití' gaca idía' yödzö na'.

25 Lësca' caní channö ila'rúaj choplö bönachi nacuá' tu yu'u, en ila'díl-lalen luzë'eguequi, bití' gaca ila'día' bönachi nacuá' yu'u na'.

26 Que lë ni na', channö Satanás tu' xihui' tá'baga' luzë'e, narúajgaca choplö bö' xihui'. Bití' gaca idía' yöl-la' unná bë' que, pero chizóa údxi que.

27 'Cuntu nu gaca tsu'u lidxë' tu bönni' nál-la, en cuéaj yöl-la' tsahui' queë' channö cabí gaga' zí'alö bönni' nál-la na', ate' ní'irö sequí' cuéaj le dzö'ö lidxë'.

28 'Le nácatë rea' libí'ili': Dios gaca uniti lahuë' bönachi ca naca yúgu'të dul-la' nabága'gaca, en ca naca yúgu'të didza' schanní' ta'nná,

29 pero nútí'tës nu innë schanní' queë' Dios Bö' Lá'ayi, catu caz uniti lahuë' Dios nu na'. Tsaz nabaga' xíguia' nu na'.

30 Caní gunné' Jesús tu' ta'nnë' queë' bönni' yudo' usedi na', ta'nnë':

—Tu' xihui' dzaga Lë'.

Nu naca xinë'ë Jesús, en bönni' böchë'ë

(Mt. 12:46-50; Lc. 8:19-21)

31 Ní'irö bila'dxinë' yugu' bönni' böchë'ë Jesús, enca' xinë'ë ga zoë'. Gula'cu'ë lö'alö, en gula'söl-lë'ë nu tsöjlidza Jesús.

32 Bönachi zían na' rögaca cuitë' Jesús gulë Lë', ta'nná:

—Yugu' bönni' böchu'u, enca' xinó'o nacu'ë lö'alö, tu'lidzë' Li'.

33 Bubi'ë didza' Jesús, gudxë' légaquië':

—¿Nuzxi caz na' xiná'a, en nupxi caz yugu' bönni' böcha'a?

34 Ní'irö buyúë' nupa na' rögaca gásibi'ilë', rnnë':

—Buli'yútsöca'. Nupa ni nácacaca ca xiná'a, en yugu' bönni' böcha'a.

35 Nu run ca rë'enë' Dios, nu ni naca ca bi'i böcha'a, en bi'i zana' enca' xiná'a.

4

Rucúdzu'ë didza' Jesús ca naca queë' bönni' guz
(Mt. 13:1-9; Lc. 8:4-8)

¹ Leyúbölö gusí lahuë' Jesús rusédinë' bönachi ga naca ra' nísado'. Bulu'dubi bönachi zían ga zoë', ate' gurenë' Jesús tu lë'e bárcodo' zxoá lu nisa na', en gurö'ë ni', ate' yúgu'të bönachi na' gula'cuá' luyú ra' nisa na'.

² Zían le busédinë' Jesús légaquië', bucúdzu'ë didza'. Tsanni ni' rusédinë' légaquië', rnnë':

³ —Guli'zë nágalí' didza' ni. Birúajë' tu bönni' guz, sǒjësië' xisedo'.

⁴ Tsanni ni' rúsië', gulasi bal-la xisedo' na' ra' nöza, ate' bila'dxinba' biguínido', gulé'ajba' le.

⁵ Gulasi ia'bal-la xisedo' na' ga rö'ö guiǒj ga bití' rö'ö yenni' yu. Bayón gula'lén xisedo' na' tu' cabí rö'ö yenni' yu.

⁶ Ní'irö cate' gulén gubidza, buquexu' le, ate' gubidxi, tu' cabí nun luí ga rë'.

⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lë na' bësië' bití' bi bunödzej.

⁸ Gulasi ia'bal-la xisedo' na' ga naca luyú bëbu, ate' gula'zxón, en xitsá' ra' gula'bǒ'. Bulu'nödzej lë na' bësië'. Tu dxigu' xisedo' na' bësië' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

⁹ Ní'irö Jesús gudxë' légaquië', rnnë':

—Nu zoa nagui, en riyöni ral-la' uzë nagui.

Riguíxjö'ë Jesús bizx que rucúdzu'ë didza'
(Mt. 13:10-17; Lc. 8:9-10)

¹⁰ Cate' chibugá'anë' tuzë' Jesús, bila'dxín nupa dá'gaca Lë' ga zoë', núngaca tsözxón idxínnutë' bönni' usëda queë', ate' gula'nábinë' Lë' bi sa'yéaj lë na' bucúdzu'ë didza'.

¹¹ Jesús gudxë' légaquië', rnnë':

—Libi'ili' nadéli'li' tséajni'ili' le nagachi' ca rinná bë'ë Dios, pero nupa na' bití' nácagaca tuz len rë'u, ruí'ílena' légaquië' didza' yugu' le rucúdzu'a didza'.

¹² Caní runa' para gaca lë na' nazúaj lu guichi lá'ayi, rnna: Ulu'yüë', en bití' ila'lé'enë'.

Ulu'zë nágagaquië', en bití' ila'yéajni'inë'.

Bití' ulu'bí'i ládxi'gaquië' para gaca uniti lahua' légaquië' ca naca dul-la' nabága'gaquië'.

Riguíxjö'ë' Jesús le bucúdzu'ë didza'
(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdu'a didza'? ¿Nacxi caz gaca tséajni'ili' ia'zica'rö le ucúdu'a didza'?

¹⁴ Bönni' guz na' náquië' nu ruzë xtídzë'ë Dios.

¹⁵ 'Nácagaca bal-la bönachi ca xisedo' na' gulasi ra' nōza. Ta'yönnë' xtídzë'ë Dios, en ca ta'yönisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

¹⁶ 'Nácagaca ia'bal-la bönachi ca xisedo' na' gulasi ga rōō guiōj. Ta'yönnë' didza' na', ate' len yöl-la' rudzeja quégaquië' ta'zi'ë le.

¹⁷ Biti' riyaza icja ládxi'do'gaquië', ate' tu chí'sö ta'dë'ë le. Cate' bi raca quégaquië', o zoa nu ribía ladxi'légaquië' tu' ta'dë'ë didza' na', la' tu'huōatë ládxi'gaquië'.

¹⁸ 'Nácagaca ia'bal-la bönachi ca xisedo' na' gulasi ga na' tu'lén lubá yōtsi'. Ta'yönnë' didza' na',

¹⁹ pero tu'í ládxi'gaquië' le nácagaca que yōdzölió ni. Nazi' yé'eguequinë' tu' nadxi'iguequinë' yugu' yöl-la' tsahui', en ta'zë ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

²⁰ 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'zi' lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nōdzaj ia'chí uruá' huéaj. Nácagaca ia'bal-lë' ca xisedo' na' bulu'nōdzaj ia'tsónnalalaj ca', ate' nácagaca ia'bal-la bönachi ca xisedo' na' bulu'nōdzaj ia'tú gayuá' ca'.

Rucúdu'ë didza' Jesús que tu le rigú'u bení

(Lc. 8:16-18)

²¹ Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení.

²² Yúgu'të le nagachi' ilá' lahui, ate' yúgu'të le raca balándo'os ila'rúaj ga liná'.

²³ Nu zoa nagui, en riyöni ral-la' uzë nagui.

²⁴ Gudxë' ca' légaquië':

—Guli'gü' ládxi'li' le riyönili'. Ca naca le ruríxili', la' leze urixë' Dios queëli', ate' gunnë' queëli' ia'lati'.

²⁵ Nu nazi'í le za' que, gu'ë que ia'lati', pero nu biti' nazi'í le, la's dui le dë que, udúa.

Rucúdu'ë didza' Jesús ca rizxön zxoa' xtila

²⁶ Gunnë' ca' Jesús:

—Ca raca ni le rinná bë'ë Dios naca ca raca cate' ruchejë' tu bönni' zxoa' xtila lu yu.

27 Chi'i dz'öölö rásie', en riyasë' cate' za' rení'. Ta'lén zxoá' xtila na', en ta'zxön, pero bití' nözinë' lë' nacxi raca ta'zxön.

28 La' cuinsi luyú na' ruxön le nadúzgaca luyú na', zí'aló xiyazi, ní'irö za' do que, en tödi na' cuía xui'i nál-la lu do que.

29 Cate' chinal-la xui'i na', la' tséajtë' tsöjchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza

(Mt. 13:31-32; Lc. 13:18-19)

30 Gunnë' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca?

31 Raca ca raca que tu xisedo' mostaza. Cate' riyaza luyú naca tu xisedo' nácatërö cuidi' ca yúgu'të xisedo' dz'ö'ö luyú,

32 pero cate' chinadúz, rilén, en rizxöntërö ca yúgu'të guixi' cuan rö'gaca luyú. Tsca run yana' ni'a në'e, gaca ila'dxinba' biguínido', en ulu'dxíaba' xicá'agacaba' lu zxul-la que.

Ca rugunë' dxin Jesús le rucúdzu'ë didza'

(Mt. 13:34-35)

33 Caní guca, busédinë' Jesús légaquië', en zíanrö ca' le bucúdzu'ë didza' tsca guca ila'yéajni'inë'.

34 Yúgu'të didza' bë'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

Jesús ribequi dxíë' bö' budunu'

(Mt. 8:23-27; Lc. 8:22-25)

35 La' dza ná'asö, cate' ridzö', Jesús gudxë' yugu' bönni' dá'gaquië' Lë', rnnë':

—Töditsöca'ru' ia'tsolá'a nísado' ni.

36 Ní'irö bulu'lá'alënë' bönachi zían nacuá' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zícá'rö bárcodo' sōjácálen légaquië'.

37 Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'.

38 Dë' rásie' Jesús lu xicúgüë' ga naca xitsá'alö lë'e bárcodo' na', ate' bulu'subanë' Lë'. Të' Lë':

—¿Bönni' Usedi! ¿Naru' cabí ru'í'ládxí'tso' netu'? ¿Huáti caztu' lu nisa ni!

39 Ní'irö guyasë' Jesús, en gunná bé'enë' bö' na' recja, gunné':

—Gurö'ö dxi.

Gudxë' ca' nisa na', gunné':

—Dxisö guzóa.

Gurö'ö dxi bö' na' guyecja, en guzóa dxi lu nísado' na'.

40 Ní'irö Jesús gudxë' yugu' bönni' dá'gaquië' Lë', rnnë':

—¿Bizx que radxi ridzöbili' caní? ¿Naru' cabí réajlë'ëli' Dios?

41 Ni' tádxinë' gulé luzě'ě tuě' ia'túě':

—¿Nuzxi caz bönni' ni? ¡Tun bö' recja, en nísado' ca rnna xtídzě'ě!

5

Bönni' Gadara yu'u bö' xihui' lě'

(Mt. 8:28-34; Lc. 8:26-39)

1 Ní'irö bila'dxině' Jesús, en yugu' bönni' dá'gaquiě' Lě' ia'tsölá'a nísado' ga naca lu xiyúgaca bönachi Gadara.

2 Cate' burúajě' Jesús lě'e bárcodo' na', tu bönni' rirúajě' zxan bulóaj ga nacua' yeru ba la' dutsáгатě' Lě'. Bönni' ni yu'u bö' xihui' lě',

3 ate' nun xilatjě' ga na' nacua' yeru ba. Cuntu nu guca guga' bönni' na', calěga len du guíě.

4 Zián luzuí bulu'zózě' bregui' guíě yen ně'ě, en ni'ě, en gulúguí'ě lě' du guíě. Yugu' du guíě na' bul'ě, ate' bregui' guíě na' guditsjě'. Biti' rizéqui'ně' nu bönni' inná bé'eně' lě'.

5 Ridática'sě' ribödxí'ě rěla, en tē dza ga na' nacua' yeru ba, en gapa naca lu gu'ado', run huě' cuině' yugu' lu guíöj dzö'ö ni'.

6 Cate' bilé'eně' zě'ě zi'tu' Jesús, guxítí'ě gуйijě' ga na' zě'ě, ate' buzóa zxibě' lahuě' Lě'.

7 Bě'ě zidzaj didza', rě' Jesús:

—¿Bizxi ral-la'a quiu' Jesús, Zxí'ině' Dios nayěpisětērě'? Ni'a queě' Xanru' Dios ráta'yua' lo', bití' usaca' zi'u neda'.

8 Caní gunně' bönni' na' tu' chigudxě' Jesús bö' xihui' na':

—Li', bö' xihui', burúaj lu bönni' ni.

9 Jesús gunábině' le, rnně':

—¿Bi leu'?

Bubí'i didza' le, gudxi Lě':

—Lea': Le Zián, tu' rō'ö ziantu'.

10 Gula'nabi yechi' yugu' bö' xihui' na' Jesús para cabí isöl-lě'ě léguequi zi'tu' luyú ni'.

11 Nacua'aba' cuchí zían lu gu'ado' ní'isö, ta'daba' táguba' ni'.

12 Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzö'öba' cuchí zían. Bě' netu' lataj tsöjtsú'ugacatu'-ba'.

13 La' bē'tě' Jesús léguequi lataj, ate' bila'rúaj bö' xihui' na', en yöjtsú'ugaca cuchí zían na', ate' gula'xítí'ba' cuchí zían na', yöjbíxigacaba' ga naca ra' gu'a, yöjcházagacaba' nísado'. Lu nísado' na' gula'yěpiba' nisa, gulátiba', en nácagacaba' ca galaj gayuá'aba'.

14 Ní'irö bulu'zxunnaj nupa ni' gulún chí'i cuchí zían na'. Yöjtíxjöi'iguequině' bönachi lu yödzö ni', enca' bönachi nacua'

la' guixi' ni'. Bila'rúaj bönachi lu yödzö, söjyúgaquië' bizxi na' guca ni'.

15 Cate' bila'dxinë' ga ni' zoë' Jesús, bila'lé'enë' bönni' na' zí'alö yú'ugaca bö' xihui' lë'. Bönni' ni rö'ë ni', nácuë' lari', en zoë' dxí'ado', ate' guladxi bönachi na'.

16 Nupa na' bila'lé'e le benë' Jesús gula'guíxjöi'i bönachi na' bila'rúaj lu yödzö ca na' guca queë' bönni' na' zí'alö yú'ugaca bö' xihui' lë', enca' ca guca quégacaba' cuchu na'.

17 Ní'irö gula'sí lógaca bönachi zían na' ta'ta'yu lahuë' Jesús urúajë' lu xiyúguequi.

18 Cate' bubenë' Jesús lë'e bárcodo', bönni' na' zí'alö yú'ugaca bö' xihui' zían lë', gúta'yuë' lahuë' Jesús gu'ë lë' lataj tséajlenë' Lë'.

19 Jesús biti' bë'ë lë' lataj, pero gudxë' lë':

—Böaj lidxu'. Yöjtíxjöi'i dí'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a li'.

20 Söhuöjë' bönni' na', en ruzë' didza' yugu' yödzö Decápolis ca nácgaca le zxön benë' Jesús queë', ate' bulu'bani yúgu'të bönachi nacua' yugu' yödzö ni'.

Bi'i nigula queë' Jairo, en nigula na' gudannu lari' nácuë' Jesús

(Mt. 9:18-26; Lc. 8:40-56)

21 Cate' budxinë' Jesús ia'tsölá'a nísado' na', ní'irö bulu'dubi bönachi zían ga na' zoë' ra' nísado'.

22 Bönni' lë' Jairo, bönni' rinná bë'ë lu yu'u ga tu'dubë' bönni' judío, en nazëdë' queë' Dios, bidë' ga zoë' Jesús. Cate' bilé'enë' Jesús, buzóa zxibë' lahuë',

23 en gúta'yuë' lahuë', rnnë':

—Chiraqui gátibi' bi'i nigúlado' quia'. Gudá ixóa no'o lëbi' para huöácabi', en biti' gátibi'.

24 Sa'yéajlenë' Jesús lë', ate' bönachi zían söjácalen Jesús, tu'quirö Lë'.

25 Tu nigula, chinaca chinnu iz ré'enu, zóanu ca' ni'. Biti' ruhuí'i rön queënu que huë' quégaca cázanu nigula.

26 Yenni' chigudí'i guzxacá'nu lu ná'agaquië' zían bönni' tu'ünë' bönachi. Nítisö chibütönu dëra le dë queënu, tu' cabi' bi gúcalen lënu, pero riyali' queënu.

27 Cate' biyöninu tu'i didza' bönachi ca naca queë' Jesús, gudödinu ládjalö bönachi zían na', en bidxinnu zaca' cúdzu'lë' Jesús, en gudannu lari' nácuë'.

28 Caní bennu tu' rnnanu: "Channö cansa' le nácuë', huöáca'."

29 La' bu'itë rön queënu, ate' réquibe'enu chiböácanu que le guca queënu.

30 La' gúquibe'etenë' Jesús ben dxin yöl-la' huáca queë', ate' buécjè', ruyúë' bönachi zían na'. Rnnë':

—¿Nuzxi na' gudán neda'?

31 Ní'irö bönni' dá'gaquië' Lë' tē' Lë', ta'nnë':

—Rilé'e quézinu' bönachi zían ni tu'quirö Li', en rnatso': "¿Nuzxi na' gudán neda'?"

32 Ruyúë' Jesús gásibi'ilë' para ilé'enë' nuzxi na' gudán Lë'.

33 Ní'irö nigula na' gubíga'nu lahuë'. Rádxinu, en rizxízinu tu' chinözinu bi na' guca queënu, ate' buzóa zxíbinu lahuë' Jesús, en gudxinu Lë' idütë le nácatë.

34 Jesús rē'ë-nu:

—Nigúlado'. Chiböácu' tu' réajlë'u neda'. Böaj lidxu' idú ládxu'ú. Tsaz nuhuóácu' que le guca quiu'.

35 Tsanni ni' ru'ë caní didza' Jesús, bönni' narúajgaquië' lidxë' bönni' na' rinná bē'ë lu yu'u ga tu'dubë' tu'sédë' queë' Dios bila'dxnë' ni', en tē' bönni' na':

—Chigútibi' bi'i nigúlado' quiu'. Bítirö upízxjanu' Bönni' Usedi.

36 Biti' bē' l ádxë'ë Jesús lē na' ta'nnë', ate' gudxë' bönni' unná bē' na', rnnë':

—Biti' gádxinu'. Guyéajlë'ësë' Dios.

37 Biti' bē'ë lataj Jesús tsöjácálen Lë' ia'zícá'rö bönachi, pero légacasë' Pedro, en Jacobo, en Juan, böché'ë Jacobo na'.

38 Cate' bidxinë' lidxë' bönni' na' rinná bē'ë ga tu'dubë' tu'sédë' queë' Dios, bilé'enë' raca dzatsa, enca' nupa ni' ta'bödxí, en nupa ta'bödxí yechi'.

39 Guyázië' Jesús, en gudxë' légaquië':

—¿Bizx que rutsátsali', en ribödxili' caní? Biti' nátibi' bi'i nigúlado' ni. Rásisibi' na'.

40 Ní'irö bulu'titjë' Jesús, pero Lë' bubéajë' yúgu'të bönachi na' ní'ilö, ate' guchë'ë xuz xiná'abi' bi'i nigúlado' na', enca' nupa nacuá'len Lë', ate' guyázië' ga na' dëbi'.

41 Gudélë'ë ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rnna lu didza' xidza': Bi'i nigúlado', guyasa.

42 La' guyásatëbi' bi'i nigúlado' na', en buzé'ebi'. Chiyú'ubi' chinnu iz. Bulu'bani nupa nacuá' ni'.

43 Ní'irö Jesús gunná bé'enë' légaquië' cuntú nu ulu'siyönnë' lē na' guca. Gudxë' légaquië':

—Guli'güí' le gágubi' bi'i nigúlado' ni.

6

*Ridxinë' Jesús Nazaret, le naca ladzë'
(Mt. 13:53-58; Lc. 4:16-30)*

1 Buzëë Jesús ni', budxinë' ladzë', ate' yugu' bönni' dá'gaquië' Lë' sōjácalenë' Lë'.

2 Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sëdë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni'i ni nadéli'në'? ¿Nacxi caz runë' le nácagaca bë' na' zá'gaca yehua' yubá?

3 Náquië' bönni' ni gubëdxi yaga na', en xzí'ininu María. Náquië' böchi'gaquië' Jacobo, en José, en Judas, en Simón. Nigula zanë' nacua'lennu ca' rë'u.

Que lë ni na' bulu'cá'anë' Lë' cá'asö.

4 Ní'irö Jesús gudxë' légaquië', rnnë':

—Gátitës tunë' bal nu bönni' ru'ë didza' uláz queë' Dios, pero bönachi uládz queë', en bönachi di'a dza queë', en bönachi nacua' lidxë' bití' tun lë' bal.

5 Que lë ni na' bití' guca gunë' Jesús nitú yöl-la' huáca zxön ni'. Bunsë' nabábasö bönachi te'e cate' guxóa në'ë léguequi.

6 Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzödo' nacua' gásibi'ilö, rusédinë' bönachi ni'.

Risöl-lë'ë Jesús bönni' dá'gaquië' Lë' tsöjéngaquië' libán
(Mt. 10:5-15; Lc. 9:1-6)

7 Ní'irö bulidzë' Jesús idxínnutë' bönni' dá'gaquië' Lë', en gusí lahuë' risöl-lë'ë légaquië' chopa huéajgaquië'. Budödë' lu ná'agaquië' yöl-la' unná bë' ulu'béajë' yugu' bö' xihui' yú'ugaca bönachi.

8 Gunná bé'enë' légaquië' bití' bi ilu'ë la' nōza, calëga yōxaj, calëga yōta, en calëga dumí bití' ila'gu'ë lu buzudi quégaquië', pero iluá'asë' xiyágado'.

9 Ral-la' ulu'dë'ë xiráchugaquië', pero calëga chopa lari' ulu'xóa yéngaquië'.

10 Gudxë' ca' légaquië':

—Gátitës ga tsú'uli' tu yu'u, guli'sóa yu'u na' cate' uzá'aröli' yödzö na'.

11 Channö tsú'uli' tu yödzö ga bití' ilún bönachi lu yödzö na' libí'ili' bal, en bití' ulu'zë' nágagaquië' xtídza'li', buli'rúaj ni', en buli'quínnaj bëchtö da' lë'e lábali'. Lë ni gaca bë' nabága'gaquië' xíguia'. Le nácate' rea' libí'ili', cate' idxín dza ichúguië' Dios quégaca bönachi, ila'gu'í ila'záca'rö bönachi lu yödzö na' ca ila'gu'í ila'záca' bönachi Sodoma, en Gomorra, yugu' yödzö na' busunítie' Dios.

12 Ní'irö bila'rúajë' bönni' dá'gaquië' Lë', yöjéngaquië' libán ca ral-la' ulu'bí'i ládxi'gaca bönachi.

13 Bulu'béajë' zían bö' xihui' yú'ugaca bönachi. Gula'gu'ë le za zían nupa te'e, ate' bulu'huóáquië'.

Ca bétigaquië' Juan, bönni' buquilë' bönachi nisa

(Mt. 14:1-12; Lc. 9:7-9)

¹⁴ Biyönnë' Herodes, bönni' unná bë', ca naca le runë' Jesús, tu' rizé didza' gátitës que yöl-la' huáca queë'. Bal-la bönachi ta'nná:

—Chibubanë' Juan, bönni' ni' buquilë' bönachi nisa, lu yöl-la' guti. Que lë ni na' napë' yöl-la' huáca runë' yugu' lë ni.

¹⁵ Ia'bal-la bönachi ta'nná:

—Naquië' Elías, bönni' bë'ë didza' uláz queë' Dios dza ni'te.

Ia'bal-la bönachi ta'nná:

—Naquië' bönni' ru'ë didza' uláz queë' Dios ca guláquië' bönni' gulu'ë didza' uláz queë' dza ni'te.

¹⁶ Cate' biyönnë' Herodes yugu' lë ni, gunnë':

—Naquië' Juan, bönni' na' burixa' yenë'. Chibubanë' lu yöl-la' guti.

¹⁷ Caní gunnë' Herodes tu' gusöl-lë'ë lë cazë' bönni' yöjxõngaquië' Juan na', ate' gulúgui'ë lë' du guië lu yu'u lidxi guië. Caní benë' Herodes tu' rilenu Herodías Juan na'. Nácanu nigula na' gúcanu nigula queë' Felipe, böchë'ë Herodes na'. Herodes gudúë'-nu Herodías na', en butsaaga ná'alënë'-nu.

¹⁸ Juan na' gudxë' Herodes:

—Biti' ral-la' sóalenu'-nu nigula queë' böchu'u.

¹⁹ Que lë ni na' gusí gurõ'õnu Herodías. Gú'uninu bi gunnu queë' Juan, tu' gú'uninu gútinu lë', pero bití' bi guxzéqui'nu

²⁰ tu' rádxinë' Herodes Juan. Nözinë' náquië' Juan na' tsahui', en lá'ayi. Que lë ni na' gudapa chí'ë lë', en buzé náguië' lë' idú ládxë'ë sal-la' lë na' rnnë' Juan ben ga gurõ'ë bõniga Herodes na'.

²¹ Ní'irö bidxín tu dza guxzéqui'nu Herodías na', le naca dza runë' Herodes laní que dza guyé'enë' iz. Bupë'ë le ilë'aj ilahuë' bönni' dë lu ná'agaquië' uláz queë', en bönni' ta'nná bé'enë' bönni' rójáquië' gudil-la, enca' bönni' nácaagaquië' lo luyú Galilea.

²² Guyázabi' bi'i nigula queënu Herodías ga na' tē'aj tahuë', en buyá'abi' lógaquië'. Guyaza ládxë'ë Herodes ca runbi', en gula'yaza ládxí'gaca ca' nupa tē'aj tágulen lë'. Ní'irö Herodes gudxë'-bi' bi'i nigula na', gunnë':

—Gunaba bi ré'ënu' gunna' quiu', ate' guna' ca'.

²³ Benë' tsutsu xtídzë'ë, gudxë'-bi':

—Ni'a queë' Xanru' Dios gunna' quiu' bíti'tës bi inabu' ga idxintë gatsaj ga rinná bë'a.

²⁴ Burúajbi' lëbi', ate' gunábabi' xiná'abi':

—¿Bizxi inábatsa'?

Lënu gúdxinu-bi':

—Icjë' Juan, bönni' buquilë' bönachi nisa, inabu'.

²⁵ La' buázatëbi' ga na' zoë' Herodes, en rëbi'-në':

—Rë'ënda' ixú' quia' na'a lu zxiga' zxön icjè' Juan, bönni' na' buquile' bönachi nisa.

²⁶ Ní'irö buí'innè' Herodes, pero tu' buzöjtjè' Dios, en tu' bila'yöni ca' nupa tágulen lè', bití' gú'unnè' initi xtídzè'è na' guzxi' lu nè'è queébi'.

²⁷ Herodes la' gusöl-la'tè' tu bönni' rejè' gudil-la zoè' rapa chi'è, ate' gunná bé'enè' lè' tsöjxi'è icjè' Juan.

²⁸ Bönni' na' rejè' gudil-la guyijè' lidxi guíè, yöjrixè' yen Juan na', ate' bu'è icjè', nuxóè' le tu lu zxiga' zxön. Budödè' le lu ná'abi' bi'i nigula na', ate' lèbi' bunödzbabi' le queënu xiná'abi'.

²⁹ Cate' bönni' dá'gaquiè' Juan na' bila'yönnè' didza' chiguca lè na', bila'dxinè' ni', en bulu'ú'è lè', ate' yöjcháchi'gaquiè' lè' yeru ba.

Rugahuè' Jesús zíanrö ca chi-un gayuá' bönachi
(Mt. 14:13-21; Lc. 9:10-17; Jn. 6:1-14)

³⁰ Gudödi ni' bulu'dubè' bönni' gubáz queè' Jesús ga zoè', en gula'guíxjöi'inè' Lè' yúgu'tè le gulunè', en yugu' le bulu'sëdinè' bönachi.

³¹ Nacuá' bönachi zían ni', nupa zá'gaca, en nupa söjaca, ga bidxintè bití'rö dè lataj ilahuè' Jesús, en yugu' bönni' dá'gaquiè' Lè'. Que lè ni na' Jesús gudxè' légaquiè', rnnè':

—Guli'dá. Uyéaj cázaru' ga naca lataj cá'asö, en uzí' ládxi'ru' tu chi'i.

³² La' légacasè' yöjáquiè' tu lè'e bárcodo', ate' bila'dxinè' tu lataj cá'asö.

³³ Bila'lé'e bönachi zían légaquiè' söjáquiè' ni', en núnbè'gaca Jesús. Que lè ni na' bönni' yúgu'tè yödzö ni' carelö yöjáquiè' ni'. Gula'zè'e ní'agaquiè', ate' bila'dxinè' ni' zí'atèlö ca Jesús, en yugu' bönni' dá'gaquiè' Lè'.

³⁴ Cate' burúajè' Jesús lè'e bárcodo' na', bilé'enè' bönachi zían na', ate' buéchi' ládxi'è légaquiè' tu' nácagaquiè' ca bö'cu' zxíla'do' bití' zoa nu gapa chi'i légacaba'. Gusí lahuè' rusëdinè' légaquiè' le zían.

³⁵ Cate' chiridzö' dza na', yugu' bönni' dá'gaquiè' Jesús bila'dxinè' ga zoè', en të' Lè':

—Chiridzö', ate' lataj cá'asö naca ni.

³⁶ Busöl-la' bönachi zían ni para tsöjaca yugu' yú'udo', en yugu' yödzödo' nacuá' gásibi'ilö, tsöj'ögaca yöta, tu' cabí bi dè ni le ilagu.

³⁷ Bubi'è didza' Jesús, gudxè' légaquiè':

—Guli'gú' libí'i cázali' le ilahuè'.

Gulè' Lè':

—¿Naru' tsöj'ö'utsatu' yöta xtila len lászjatu' que idú xunu' beo', ate' gú'ítu' le ilahuè'?

38 Jesús gudxë' légaquië':

—¿Bal-laxi yöta xtila dë queëli'? Guli'tsöjyútsöca'.

Cate' chinöziguequinë', të' Lë':

—Gáyu'sö yöta xtila dë, en chópasöba' böla dëba'.

39 Ní'irö gunná bë'ë Jesús ilunë' ga ila'bö' bönachi zían na',
ila'cuá' tu cö' huéajguequi ga naca lachi' lu daca'.

40 Gula'cu'ë tu cö' huéajgaquië', tu gayuá' huéajgaquië', en chi-
un huéajgaquië'.

41 Ní'irö gudélë'ë Jesús igáyu'të yöta xtila na', en irópaba' böla
na'. Buyúë' zaca' lúzxiba, en gudxë' Dios: "Xclenu'." Ní'irö
buzxuzxjë' yöta xtila na', en bë'ë quégaquië' bönni' usëda queë'
para ila'guísië' quégaca bönachi zían na'. Gudísië' ca' irópatëba'
böla na' quégaca yúgu'të bönachi na'.

42 Gulahuë' yúgu'të', en bulu'huöljanë'.

43 Ní'irö bulu'tubë' le bizxaj que yöta xtila na', en quégacaba'
böla, ate' chinnu ga'böra bulu'lié'.

44 Guláquië' ca chi-un gáyu'ë bönni' na' gulahuë'.

Rizë'e ni'ë Jesús lu nísado'

(Mt. 14:22-27; Jn. 6:16-21)

45 La' bentë' Jesús ga gula'benë' yugu' bönni' dá'gaquië'
Lë' lë'e bárcodo', para ila'nöruë' lahuë', ila'dödë' lu nísado'
na', para ila'dxinë' lu yödzo Betsaida, tsanni ni' Lë' rusöl-lë'
bönachi zían na' lídxiguequi.

46 Cate' chibudxi busöl-lë' légaquië', guyijë' tu lu guí'ado', ate'
ni' ru'ilenë' Dios didza'.

47 Cate' chizá' ral-la, zeaj bárcodo' na' gatsaj láhui'lö nísado',
ate' zoë' Jesús tuzë' luyú bidxi na'.

48 Bilé'enë' Jesús légaquië', böniga tu'së'ë bárcodo' na' tu' recja
bö' za' ga na' ta'dödë'. Gudödi guluhuëla bidxinë' Jesús ga na'
nacu'ë, rizë'e ni'ë lu nísado' na', ate' gú'unnë' tódisë' ga na'
nacu'ë.

49 Cate' bila'lé'enë' Lë' rizë'e ni'ë lu nísado', guléquinë' bixín
na', ate' gula'bödxí'ë

50 tu' bila'lé'enë' yúgu'të' Lë', en guladxi gula'dzöbinë'.
Ní'irö la' bulidztë' Jesús légaquië', rnnë':

—Buli'tipa ládxi'li'. Neda' caz. Biti' gádxili'.

51 Gurenë' Jesús lë'e bárcodo' ga na' nacu'ë, ate' gurö'ö dxi bö'
na' recja, ate' légaquië' gula'niti gula'tíqui'sinë' bulu'báninë'.

52 Biti' ta'yéajni'ininë' le rulu'i lë na' benë' Jesús que yöta
xtila na'. Ni' naca zidi icja ládxi'do'gaquië'.

Ruínë' Jesús nupa te'e lu yödzo Genesaret

(Mt. 14:34-36)

53 Gula'dödë' Jesús, en yugu' bönni' dá'gaquië' Lë' ia'tsölá'a
nísado', ate' bila'dxinë' ga naca lu xiyúgaca bönachi Genesaret.
Bulu'dxíguë'ë bárcodo' luyú bidxi ni'.

⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús.

⁵⁵ Gula'xiti' bönachi na', yöjaca yúgu'të yödzödo' idú gásibi'ilö, en gula'sí lógaquië' dujuá'agaquië' yúgu'të nupa te'e ga zoë' Jesús, zxóagaca yugu' le déguequini, ate' bila'dxinë' gátitës ta'yönnë' zoë' Jesús.

⁵⁶ Gátitës ga ridödë' Jesús, yugu' lu yödzödo', en yugu' yödzö zxön, en yugu' yú'udo', tu'cu'ë nupa te'e quégaquië' gapa naca la' nöza, en gapa naca lu yë'ëyi, en ta'tá'yue' lahuë' Jesús gu'ë légaquië' lataj ila'gansë' luzxi lari' nácuë'. Yúgu'të nupa na' bila'gán lari' nácuë' bulu'huóacatë dxí'ado'.

7

Le tun ga biti' nácacaga bönachi tsahui' lahuë' Dios (Mt. 15:1-20)

¹ Ní'irö bal-lë' bönni' yudo' fariseo len bal-lë' bönni' yudo' usedi narúajgaquië' Jerusalén, bulu'dubë' ga zoë' Jesús.

² Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rnna: Biti' nayárigaca ca nalëbiguequinë' tunë' bönni' yudo' na'. Que lë ni na' gula'nnë' quégaquië'.

³ Yugu' bönni' yudo' fariseo na', en ia'zica'rö bönachi judío tunë' ca gulëbiguequinë' gulunë' xuz xtó'ogaquië', ate' channö cabí ta'guíbi ná'agaquië' zían luzuí ca na' nalëbiguequinë' tunë', biti' ca' tahuë'.

⁴ Cate' tu'dxinë' röj'ö'ugaquië' lu yë'ëyi, channö cabí ta'guibë' lë na' ca nalëbiguequinë' tunë', biti' ca' tahuë'. Zíanrö ca' tunë', yugu' le nalëbiguequinë' tunë'. Caní ta'guibë' zxiga' yö'öna, en yugu' zxiga' guíë, en yugu' le táti'në'.

⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulëbiguequinë' gulunë' xuz xtó'oru', pero tahuë' yöta biti' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libi'ili', bönni' rulu'isö tsahui' cuinli'. Nácatë le gudíxjö'ë Isaías, bönni' ni' bë'ë didza' uláz queë' Dios, ca naca queëli'. Buzúajë' lu guichi, gunné':

Yugu' bönni' ni, len rú'agacasë' tunë' neda' bal, calëga idú ládxi'gaquië'.

⁷ Níti'sö naca yöl-la' ba ta'gu'ë neda' tu' tu'sëdinë' le ta'nná bë' bönachi, calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazí láhuili' lu ná'agaca bönachi.

⁹ Gudxë' ca' légaquië':

—Idú ládxi'li' rucá'anali' cá'asö le gunná bënë Dios para gunli' ca naca le nulaga loli' runli'.

¹⁰ Moisés gunné' caní: “Ben bal xuz xinó'o.” Gunnë' ca': “Nu ulidza zi' xuzi o xinë'e, guli'gütitë nu na'.”

¹¹⁻¹² Libí'ili' rnnali' caní: “Channö nu bönni' guié' xuzë' o xinë'ë: Biti' gaca bi gunna' queëli', tu' naca Corbán.” (Didza' ni rna lu didza' xidza': Tu' nuzóa' quez queë' Dios yúgu'të.) Ní'irö rnnali': “Biti' run bayudxi bi gunë' bönni' na' quégaquië' xuz xinë'ë.”

¹³ Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudödili' lu ná'agaca zxi'ini xi'sóali'. Ziánrö ca' le caní runli'.

¹⁴ Ní'irö Jesús bulidzë' bönni' zían na' nacu'ë ni', en rë légaquië':

—Guli'zë nágali' didza' gu'a, yúgu'tëli', en guli'tséajni'i.

¹⁵ Biti' bi dë le riyaza nu bönni' le gaca gun ga bití' náquië' tsahui' lahuë' Dios, pero le rirúaj lë', lë ni gaca gun ga bití' náquië' tsahui' lahuë' Dios.

¹⁶ Channö zoa nágali', en riyónili', buli'zë nágali'.

¹⁷ Cate' Jesús bulá'alenë' bönachi zían na', guyu'ë tu yu'u, ate' yugu' bönni' usëda queë' gula'nábinë' Lë' ca naca lë na' bucúdzu'ë didza'.

¹⁸ Jesús gudxë' légaquië':

—¿Riyádzjatsö ca' queëli' yöl-la' réajni'i? ¿Naru' cabí réajni'ili', yúgu'të le riyaza nu bönni', bití' gaca gun ga bití' náquië' tsahui' lahuë' Dios?

¹⁹ Naca caní tu' cabí riyaza icja ládxi'da'ahuë', pero lë'ësë' riyaza, ate' rurúaj lë'ë.

Tu' gunné' caní Jesús, buluí'inë' rë'u naca dxi'a yúgu'të le rë'aj ráguru'.

²⁰ Gunnë' ca' Jesús:

—Le rirúaj lu bönni' run ga bití' náquië' tsahui' lahuë' Dios.

²¹ Caní naca, tu' ta'rúaj icja ládxi'do'gaquië' bönni' yugu' le ta'zá' ládxi'gaquië' le naca xihui', yugu' le tun ga tunë' dul-la' ta'guitsjë' xibá que yöl-la' nutsaga na', en yugu' le ruá' dö'. Tun ga tútië' bönachi,

²² en ta'banë', en ta'zë ládxi'gaquië' le dë que luzá'agaquië', en tu'ë dö', en ta'zí' yë'ë, en tu'zxë'ë, en ta'nná' zí'ë que luzá'agaquië', en tun ba zxon cúngaquië', en tunë' le canöz.

²³ Yúgu'të le xihui' caní ta'rúaj icja ládxi'da'ahuë' nu bönni', en tun ga bití' náquië' tsahui' lahuë' Dios.

*Tu nigula izá'a réajlë'ënu Jesús
(Mt. 15:21-28)*

²⁴ Buzë'ë Jesús ni', ate' bidxinë' gala' ga nacua' yödzo Tiro, en yödzo Sidón. Guyazië' tu yu'u ni', en gú'unnë' cuntu nu inözi, pero biti' ca' guca ucachi' cuinë'.

²⁵ Tu nigula zóabi' bi'i nigúlado' queënu, yu'u bö' xihui' lëbi', biyöninu didza' rizë ca naca queë' Jesús, ate' la' bídatënu ga zoë' Jesús, en buzóa zxi'binu xini'ë.

²⁶ Nigula ni biti' nácanu judío, pero nabábanu bönachi Sirofenicia. Gúta'yunu lahuë' Jesús ubéajë' bö' xihui' na' yu'u-bi' bi'i nigúlado' queënu.

²⁷ Ní'irö Jesús gudxë'-nu, rnnë':

—Bë' lataj ulu'huölaj zí'alö nupa nacagaca ca zxi'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bö'cu'do'.

²⁸ Bubí'inu didza' nigula na', gúdxinu Jesús:

—Ön, Xan, pero yugu' bö'cu'do' nacua'aba' zxani ga tágubi', táguba' le bizxaj tu'huöxaj ga na' tágubi'.

²⁹ Ní'irö Jesús gudxë'-nu, rnnë':

—Tu' gunnö' caní, huáca huöaju'. Chiburúaj bö' xihui' na' guyú'u-bi' bi'i nigúlado' quiu'.

³⁰ Cate' budxinnu lídxinu, bilé'enu-bi' bi'i nigúlado' queënu na', dëbi' lu da'a, en chinurúaj bö' xihui' na' guyú'u lëbi'.

Jesús ruúnë' tu bönni' nacödzuë', en biti' gaca innë'

³¹ Burúajë' Jesús lataj na' nababa yödzo Tiro, ate' gudödë' gapa dë yödzo Sidón, en yugu' yödzo Decápolis, ate' bidxinë' ra' nísado' lu xiyú Galilea.

³² Bönachi ni' dujuá'gaca tuë' bönni' nacödzuë', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lë'.

³³ Jesús bubéajë' lë' tsölá'alö ladjagaca bönachi na', ate' bunë'ë xibón në'ë yeru náguië' bönni' na'. Gurú'unë' zxöna'do', en gudanë' lúdxë'ë.

³⁴ Ní'irö buyüë' lúzxibälö, en gunné lúdxë'ë, rnnë':

—Efata.

Didza' hebreo ni rnna lu didza' xidza': Guyalaj.

³⁵ La' böáljatë náguië', en la' bugújtjatë lúdxë'ë, en gunnëtë' dxí'ado'.

³⁶ Jesús gunná bé'enë' légaquië' cuntu nu ilë' ca', pero tsca gunná bé'enë' légaquië', bulu'zëtëre' ca' didza' que lë na' benë'.

³⁷ Bulu'bánninë, ta'nnë':

—Tsáhui'do' runë' yúgu'të. Runë' ga tu'yöni nupa gulaca cödzu, en ga tú'i didza' nupa biti' guca ila'nnë'.

8

*Rugahuë' Jesús zíanrö ca choá' gayuá' bönachi
(Mt. 15:32-39)*

¹ Yugu' dza na' bulu'dubi bönachi zían ga zoë' Jesús. Tu' cabí dë le ilágugaca, Jesús bulidzë' bönni' usëda queë', ate' bë'lenë' légaquië' didza'.

² Gudxë' légaquië':

—Ruhuechi' ládxa'a bönachi zían ni tu' chinaca tsonna dza nacuá'len neda' ni, en bití' dë le ilágugaca.

³ Channö usöl-la'a léguequi lídxigaca ta'dunsö ca', huala'cuídi' la' nōza, tu' zá'gaca zi'tu' bál-lagaca.

⁴ Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵ Gunábinë' Jesús légaquië', rnnë':

—¿Bál-laxi yōta xtila dë queëli'?

Të' Lë':

—Gádxisö.

⁶ Ní'irö Jesús gunná bé'enë' bönachi zían na' ila'bör' lu yu. Gudélé'ë gadxi yōta xtila na', ate' gudxë' Dios: "Xclenu'." Ní'irö buzzuxjë' léguequi, en bë'ë quégaquië' bönni' usëda queë' para ila'guisië' lógaca bönachi zían na'.

⁷ Guta' ca' quégaquië' tu chópaba' böla cuidi'. Jesús gudxë' Dios: "Xclenu'", ate' gunná bé'enë' légaquië' ila'guisië' ca' légacaba' lógaca bönachi.

⁸ Gulagu yúgu'të bönachi na', en bulu'huö'ljaj. Ní'irö bulu'tubé' le bizxaj nagá'anagaca, ate' gula'lí idú gadxi ga'böra.

⁹ Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca,

¹⁰ ate' gurenë' lë'e bárcodo' tsözxön len yugu' bönni' usëda queë', ate' bila'dxinë' lu xiyúgaca bönachi Dalmanuta.

Ta'nábinë' Jesús gunë' tu le gaca bë' nuzxi náquië'

(Mt. 16:1-4; Lc. 12:54-56)

¹¹ Ní'irö bila'dxinë' bönni' yudo' fariseo ga zoë' Jesús, en gula'sí lógaquië' ta'díl-lalenë' Lë' didza'. Gulé'ënnë' ila'z'í bë'ë Jesús. Que lë ni na' gula'nábinë' Lë' gunë' tu le naca bë' za' yehua' yubá.

¹² Gunnëda' ládxe'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' libí'ili', bití' ca' ilé'eli' tu le naca bë' za' yehua' yubá.

¹³ Ní'irö bulá'alenë' légaquië'. Bubenë' lë'e bárcodo', en sa'yéajë' ia'tsölá'a nísado'.

Le tu'sëdinë' bönni' yudo' naca ca cúa zi que yōta xtila

(Mt. 16:5-12)

¹⁴ Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yōta xtila dë lë'e bárcodo' na'.

15 Ní'irö Jesús buzéajni'inë' légaquië', rnnë':

—Buli'yútsöca' queëli'. Guli'gún chi'i cuinli' para cabí sí'ili' le naca ca cúa zi que yöta xtila quégaquië' bönni' yudo' fariseo, en queë' Herodes.

16 Gula'sí lógaquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

17 Réquibe'enë' Jesús le ta'nnë', ate' rë' légaquië':

—¿Bizx que ruí'ili' caní didza' tu' cabí dë yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxi'do'oli'?

18 ¿Zóatsö guiöj loli', en bití' rilé'eli', en zóatsö guídi nágali', en bití' riyönili'? ¿Naru' cabí röjnétseli'?

19 Cate' ni' buzzuxzja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

20 Gunnë' ca' Jesús:

—Cate' ni' buzzuxzja' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nnë':

—Gadxi.

21 Ní'irö Jesús gudxë' légaquië':

—¿Naru' cabí réajni'itseli' na'a, bë'a didza' que le tu'sédinë' bönni' na'?

Jesús ruúnë' bönni' Betsaida nachul-la lahuë'

22 Cate' Jesús, en bönni' dá'gaquië' Lë' bila'dxinë' yödzö Betsaida, bila'dxín ga zoë' Jesús nupa dujuá'gaquië' queë' tu bönni' nachul-la lahuë'. Ta'tá'yuë' lahuë' canë' bönni' na'.

23 Jesús gudélé'ë në'ë bönni' na' nachul-la lahuë', ate' guchë'ë lë' ní'ilo ra' yödzö. Ní' budxië' zxöna' guiöj lahuë', en guxóa në'ë lë'. Ní'irö gunábinë' lë', rnnë':

—¿Ba rilé'enu' lati'?

24 Buyúë' bönni' na' nachul-la lahuë', rnnë':

—Rilé'egacada' bönachi, nalá'gaca ca yugu' yaga, pero ta'dá bönachi na'.

25 Leyúbölö guxóa në'ë Jesús guiöj lahuë', ate' buyúdë'ë bönni' na' nachul-la lahuë', ate' böácate' dxí'ado' guiöj lahuë'. Na'a rilé'enë' dxí'ado' yúgu'të.

26 Ní'irö Jesús gusöl-lë'ë lë' lidxë', rnnë':

—Bití' tsöjdödu' lahui' yödzö, en cuntú nu guío' le bena' nu zoa lu yödzö ni.

Rnnë' Pedro: "Jesús náquië' Cristo"

(Mt. 16:13-20; Lc. 9:18-21)

27 Gudödi na', bulu'zë'ë Jesús, en yugu' bönni' usëda queë' ni', ate' gula'dödë' yugu' yödzödo' nabábagaca Cesarea, ga na'

rinná bē'ē Filipino. Tsanni ni' yú'ugaquiē' nōza, Jesús rinabi yudxē' yugu' bōnni' usēda queē', rnnē':

—¿Nuzxi ta'nná bōnachi naca'?

²⁸ Bulu'bi'ē didza', ta'nnē':

—Ta'nná bal-la bōnachi nacu' Juan, bōnni' buquilē' bōnachi nisa. Ta'nná ia'bal-la nacu' Elías, bōnni' bē'ē didza' uláz queē' Dios dza ni'te. Ta'nná ia'bal-la nacu' bōnni' yúbölö bē'ē didza' uláz queē' Dios dza ni'te.

²⁹ Ní'irö Jesús gunábinē' légaquiē', rnnē':

—Nazxi libí'ili', ¿nuzxi rnnali' naca'?

Bubi'ē didza' Pedro, rnnē':

—Li' nacu' Cristo.

³⁰ Ní'irö Jesús gunná bé'enē' légaquiē' cuntu nu ulu'siyōnnē' Nu náquiē'.

Rigu'xjö'ē Jesús ca si' ilútiē' Lē'

(Mt. 16:21-28; Lc. 9:22-27)

³¹ Ní'irö gusí lahuē' Jesús rusēdinē' bōnni' dá'gaquiē' Lē', rnnē':

—Run bayudxi qui'i saca'a neda', Bōnni' Guljē' Bōnachi. Bōnni' gula tu'zéajni'inē', en yugu' bixúz unná bē', en bōnni' yudo' tu'sēdinē' ulu'zōē' neda' tsölá'alö. Ilútiē' neda', pero cate' gaca tsonna dza ubana'.

³² Yálajsö bē'lenē' légaquiē' didza' ni. Ní'irö Pedro guchē'ē Jesús tsölá'alö, en gusí lahuē' ridil-lē' lē' didza'.

³³ Bué'cjē' Jesús, en buyúē' ia'zica'rē' bōnni' usēda queē', ate' buzenē' bach Pedro, rnnē':

—Gucuita ga zoa'. Nacu' ca Satanás, tu' xihui'. Le rizá' ládxu'u bití' za' lu nē'ē Dios, pero ca ta'zá' ládxi'gaca bōnachi naca.

³⁴ Ní'irö Jesús bulidzē' yugu' bōnni' usēda queē', enca' bōnachi nacuá' ni', en gudxē' légaquiē':

—Channö rē'ēnē' nu bōnni' tē'ē neda', ral-la' uzóē' tsölá'alö le rē'ēni quézinē', en gáquiē' ca tu bōnni' sa'yéajē' sōjtē'ē lē'e yaga cruz, ate' ní'irö huáca tē'ē neda'.

³⁵ Nu bōnni' ru'í'ida' ládxē'ē yöl-la' na'bán queē', unítie' le, pero nu bōnni' unítie' yöl-la' na'bán queē' tu' dē'ē neda', o tu' dē'ē didza' dxi'a quia', udéli'nē' bōnni' ni yöl-la' na'bán queē'.

³⁶ ¿Naru' uzi'tsē' xibé tu bōnni' channö utubē' yúgu'tē le dē yödžölió ni, pero uniti cuinē'?

³⁷ Bití' bi gaca unödžjē' tu bōnni' le huóá'ui cuinē'.

³⁸ Channö zoē' nu bōnni' rutuí'inē' quia' neda', en que xtídza'a lógaca bōnachi ni nucá'anagaca Dios, en tun dulla', lē'sca' caní neda', Bōnni' Guljē' Bōnachi, utuí'ida' queē' bōnni' na' cate' guídalena' yöl-la' huáca zxon queē' Xuza', ate' dzágaquiē' gubáz lá'ayi neda'.

9

1 Jesús gudxë' ca' légaquië', rnnë':

—Le nácatë rea' libí'ili', nacuá' ni nupa biti' ilátigaca cate' ila'lé'erö idinná bē'ë Dios luyú ni, en ilá' lahui yöl-la' huáca zxön queë'.

Ridzá'a ca riná' lahuë' Jesús

(Mt. 17:1-13; Lc. 9:28-36)

2 Cate' chigudödi xopa dza, Jesús guchë'ë Pedro, en Jacobo, en Juan, ate' légacasë' yójáquië' tu lu guí'a sibi. Ni' bidzá'a ca riná' lahuë' Jesús lógaquië' yonnë' na'.

3 Guyëpi yösa beni' lari' nácuë' Jesús, ate' guca chiguíchido'os. Zxíla'do'os guca, le cuntú nu ra' lari' yödzölió ni gaca gun chiguíchido'os ca guca lari' na'.

4 Bulu'lu'í lógaquië' Elías, en Moisés, tu'ílenë' Jesús didza'.

5 Ní'irö Pedro gudxë' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

6 Caní gunnë' Pedro tu' cabí nözinë' bi na' rnnë', tu' tádxinë' bönni' usëda queë' Jesús na'.

7 Ní'irö gurö'ö böaj le gulú'u zxul-la légaquië', ate' biyön chí'i nu ru'í didza' lu böaj na', rnna:

—Bönni' ni Zxí'ina'. Nadxí'ida' Lë'. Buli'zë nágali' Lë'.

8 La' bulu'yutë' pero cúnturö nu ta'lé'enë'. Tuzë' Jesús zóalenë' légaquië'.

9 Tsanni ni' yú'ugaquië' nöza, tu'dínnië' lu guí'a sibi na', Jesús gunná bé'enë' légaquië' cuntú nu ulu'siyönnë' ca', lë na' bila'lé'enë', cate' ubanrë' lu yöl-la' guti Lë', Bönni' Guljë' Bönachi.

10 Que lë ni na' gula'gú'usë' ícjagaquië' didza' ni bē'ë, ate' la' légacasë' ta'nabi yúdxinë' luzá'agaquië' bizxi sa'yéaj didza' na' bē'ë, gunnë' ubanë' lu yöl-la' guti.

11 Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías zí'alö ca guídë' Cristo?

12 Bubi'ë didza' Jesús, rnnë':

—Le nácatë guídë' Elías zí'alö, en ucu'ë yúgu'të ca ral-la' gaca. Na'a, ¿bizxi sa'yéaj le nazúaj lu guichi rnna run bayudxi qui'í sáquë'ë Bönni' Guljë' Bönachi, ate' cá'asö ulu'cá'ana bönachi Lë'?

13 Rea' libí'ili': Chibidë' Elías, ate' gulunë' queë' tsca gulë'ënnë', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'í bönni' yu'u lëbi' bö' xihui'

(Mt. 17:14-21; Lc. 9:37-43)

14 Cate' ni' bulu'dxinë' Jesús, en bönni' dzágagaquië' Lë' ga na' nacu'ë ia'zica'rë' bönni' usëda queë' Jesús, bila'lé'enë' nacuá'

bönachi zián ni', ate' bönni' yudo' tu'sédinë' ta'díl-lalenë' yugu' bönni' usëda queë' na' didza'.

15 Cate' bönachi zián na' bila'lé'e Jesús, bulu'bani, en carelö zá'gaca ga na' zë'ë, dijödxi gaca Lë': "Padiux."

16 Ní'irö Jesús gunábinë' yugu' bönni' usëda queë' na', rnnë':
—¿Bizxi didza' na' ridíl-lalenli' légaquië'?

17 Bubi'ë didza' tu bönni' nútsë'ë ladaj bönachi zián na', rnnë':
—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'.

18 Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zéqui'në'.

19 Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gáca'xte caz ral-la' sóalena' libí'ili'? ¿Gáca'xte caz ral-la' guá' ilena' queëli'? Guli'diguá'-bi' quia' ni.

20 Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxizité lëbi'. Gudzö'öbi' lu yu, ate' burixi butula lëbi', ate' bidxía bidxina' zidi' ruá'abi'.

21 Ní'irö Jesús gunábinë' xúzibi' bi'i na', rnnë':

—¿Gáca'xi chiguca raca caní queëbi'?

Rnnë' xúzibi' na':

—Ni' nácatëbi' bí'ido' ré'ebi' caní.

22 Zián luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxi' netu', gácalenu' netu'.

23 Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

24 La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

25 Cate' bilé'enë' Jesús zá'gaca bönachi zián, tu'quí Lë', buzenë' bach bö' xihui' na', rë' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' li' uruju' lu bi'i ni, en bí'ti'rö tsu'u lëbi'.

26 Gurödxí'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, gulu'í didza' bönachi zián ni', ta'nná:

—Chinátibi'.

27 Ní'irö Jesús gudélë'ë ná'abi', en buchisë'-bi', ate' guzuíbi' bi'i na'.

28 Ní'irö guyazië' Jesús tu yu'u, ate' la' légacasë' gula'nábinë' bönni' usëda queë' Lë', ta'nnë':

—¿Bizx que biti' guca ubéajtu' netu' bö' xihui' na'?

29 Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-nē' Dios, en gunli' gubasa.

Jesús riguíxjö'ë leyúbölö ca si' ilútiē' Lē'

(Mt. 17:22-23; Lc. 9:43-45)

³⁰ Cate' bulu'zē'ë Jesús, en yugu' bönni' dá'gaquiē' Lē' ni', gula'dödē' luyú Galilea. Biti' rē'ënē' Jesús nu inözi ga na' zoē'

³¹ tu' rusēdinē' yugu' bönni' usēda queē'. Rē' légaquiē':

—Ulu'dödē' neda', Bönni' Guljē' Bönachi, lu ná'agaquiē' bönni' ilútiē' neda', pero tōdi gátia', cate' gaca tsonna dza ubana'.

³² Biti' gula'yéajni'inē' didza' ni rē' légaquiē', ate' tu' tádxinē', bití' bi gula'nábinē' Lē'.

Nu naca lo

(Mt. 18:1-5; Lc. 9:46-48)

³³ Ní'irö Jesús, en bönni' dá'gaquiē' Lē' bila'dxinē' yödzö Capernaum, ate' tsanni ni' nacu'ë lu yu'u, Jesús gunábinē' légaquiē', rnnē':

—¿Bizxi didza' na' gudíl-lalen luzá'ali' cate' ni' yú'uli' nōza?

³⁴ Légaquiē' bulu'sayaj rú'ugaquiē', tu' gula'díl-lalen luzá'agaquiē' didza' la' nōza ni' núzxilögaquiē' gáquiē' bönni' lo.

³⁵ Ní'irö gurö'ë Jesús, en bulidzē' idxínnutē' bönni' usēda queē'. Rē' légaquiē':

—Nu rē'ëni gaca lo ral-la' gaca ca tu bönni' cuídi'sö, enca' ca ní'a ná'ali' yúgu'téli'.

³⁶ Ní'irö Jesús gudélē'ë-bi' tubi' bí'ido', en buzóé'-bi' gatsaj láhui'lö ga na' nacu'ë. Ní' runidē'-bi', rē' légaquiē':

³⁷ —Nu bönni' si' lu nē'ë tu bí'ido' caní tu' néquibi' quia', si' lu nē'ë ca' neda', ate' nu bönni' si' lu nē'ë neda', calēga nēda'sö si' lu nē'ë, pero si' lu nē'ë ca' Xuza', Bönni' na' nasól-lē'ë neda'.

Nu bití' ridá'baga' rē'u, rácalen rē'u

(Mt. 10:42; Lc. 9:49-50)

³⁸ Ní'irö Juan gudxē' Jesús:

—Bönni' Usedi, bilé'etu'-nē' tu bönni' rubéajē' yugu' bö' xihui', rugunē' dxin lo'. Gunná bé'etu' lē' bíti'rö gunē' ca', tu' cabí' dē'ë rē'u.

³⁹ Ní'irö Jesús gudxē' lē':

—Biti' inná bé'eli'-nē', tu' channö zoē' nu bönni' runē' tu yöl-la' huáca le za' yehua' yubá, en rugunē' dxin La' neda', bití' ca' gaca bönni' na' innē' zí'ë quia'.

⁴⁰ Caní naca, nu bití' ridá'baga' rē'u, rácalen nu na' rē'u.

⁴¹ Núti'tēs nu gunna queéli' tu zxíga'do' nisa guí'jali' tu' dá'ali' neda', Cristo, si'i caz nu na' le ral-la' gata' que.

Zoa bönadxi queēru' gunru' ga nu gun dul-la'

(Mt. 18:6-9; Lc. 17:1-2)

42 Gunně' ca' Jesús:

—Núti'tēs nu gun ga gunbi' dul-la' tubi' bí'ido' caní réajlě'ēbi' neda', gácarō dxi'a ugal-la' nu na' guichi riyētu yaga yeni, en tsōjchú'una cuini lu nísado'.

43 Channō tu no'o gun ga gunu' dul-la', guchugu le. Dxi'arō gaca quiu' tsōjtsáziu' ga su' ibanu' zoa tuz no'o, calēga zoa chopa no'o, ate' tsōjtsáziu' lu guí' gabila, ga ni' biti' ulu guí' que.

44 Lataj ni' biti' ilátiba' buzuga' yú'ugacaba' nupa tsōjcuá' ni', ate' guí' na' biti' ca' ulu.

45 Lēasca' caní, channō tu ni'u gun ga gunu' dul-la', guchugu le. Gácarō dxi'a quiu', tsōjtsáziu' ga su' ibanu' zoa tuz ni'u, calēga zoa chopa ni'u, ate' tsōjtsáziu' lu guí' gabila, ga ni' biti' ulu guí' que.

46 Lataj ni' biti' ilátiba' buzuga' yú'ugacaba' nupa tsōjcuá' ni', ate' guí' na' biti' ca' ulu.

47 Lēasca' caní, channō tu guiōj lo' gun ga gunu' dul-la', guléaj le. Gácarō dxi'a quiu' tsōjtsáziu' ga rinná bē'ē Dios zoa tuz guiōj lo', calēga zoa chopa guiōj lo', ate' tsōjtsáziu' lu guí' gabila.

48 Lataj ni' biti' ilátiba' buzuga' yú'ugacaba' nupa tsōjcuá' ni', ate' guí' na' biti' ca' ulu.

49 'Ruxi'iru' bēla' zōdi', en rugála'ru' le ra' guí', para cabí gaca ditaj. Lē ni rusedi rē'u ca ulu'huōáca dxi'a yúgu'tē bōnachi. Lēasca' caní, rē'ēnē' Dios izxí'i zōdi' yúgu'tē bōa' bēdxido' tu'zégui'gaquiē'-ba' lu bucugu lá'ayi queē'.

50 Dxi'a naca zōdi', pero channō initi yōl-la' siná'a que, ¿naxci úniru' le siná'a? Guli'gaca la' libí'isili' ca zōdi' dxi'a, sóali' dxí'ado' tuli' len ia'tuli'.

10

Rusēdinē' Jesús que nu rulá' yōl-la' nutsaga na'

(Mt. 19:1-12; Lc. 16:18)

1 Buzē'ē Jesús yōdzō Capernaum, ate' guyijē' luyú Judea, en gudōdē' ia'tsolá'a yegu Jordán saca' ga rilén gubidza. Bulu'dubi leyúbölō bōnachi zían ga zoē', ate' leyúbölō busēdinē' légaquiē' ca run cazē'.

2 Ní'irō bila'dxinē' bōnni' yudo' fariseo ga zoē' Jesús, ate' tē'ēnnē' ilunē' ga bi innē' Jesús para gaca ulu'zéguiē' Lē' didza'. Gula'nábinē' Lē', ta'nnē':

—¿Dē lataj bōnni' nutsaga nē'ē usanē'-nu nigula queē'?

3 Bubi'ē didza' Jesús, rnnē':

—¿Bizxi gunná bé'enē' Moisés libí'ili'?

4 Gula'nnē':

—Moisés bē'ē lataj nu bōnni' uzúajē' lu guichi le rna rulá'alēnē'-nu nigula queē' na', ate' ní'irō usanē'-nu.

5 Bubi'ē didza' Jesús, rnnē':

—Gunná bé'enë' Moisés libí'ili' caní tu' naca zidi icja ládxi'do'oli',

⁶ pero cate' gusí lo rata' yödzölió, Dios benë' légaquië' bönni', en nigula.

⁷ Gunnë': "Que læ ni na' ucá'anë' bönni' xuz xinë'ë, en tsöjsóalenë'-nu nigula queë',

⁸ ate' chopë' ni ulu'huóáquië' ca tuz bönachi." Que læ ni na' bíti'rö nácagaquië' chopë' pero tuz chinácagaquië'.

⁹ Que læ ni na' ca', nu naca bönachi bití' ral-la' ulá'a nupa na' chinutsáquië' Dios.

¹⁰ Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë.

¹¹ Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu zí'alö.

¹² Lësca' caní channö tu nigula nutsaga ná'lennu bönni' usannu-në', en sí'inu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

Jesús rulidza tsáhuë'ë-bi' yugu' bí'ido'

(Mt. 19:13-15; Lc. 18:15-17)

¹³ Ní'irö bila'dxín bönachi ga zoë' Jesús dujuá'gaquië' bí'ido' quéguequi. Të'ëni ixóa në'ë légacabi', ate' gula'sí lógaquië' bönni' usëda queë' Jesús ta'dil-la dídza'gaquië' nupa na' dujuá'agaca légacabi'.

¹⁴ Cate' bilé'enë' Jesús læ ni, gulénë' légaquië', en gunnë':

—Gulí'güi'-gácabi' bí'ido' lataj ila'dxinbi' quia'. Bití' uzága'gacali'-bi', tu' gata' quégaca nupa nácagaca ca bí'ido' ni, lataj ga rinná bë'ë Dios.

¹⁵ Le nácate' rea' libí'ili': Nu cabí si' lu në'e le rinná bë'ë Dios ca runbí' tu bí'ido', bití' ca' tsaza ga ni' rinná bë'ë.

¹⁶ Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahui'

(Mt. 19:16-30; Lc. 18:18-30)

¹⁷ Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿naxi guna' para idéli'da' yöl-la' na'bán idú?

¹⁸ Jesús gudxë' læ':

—¿Bizx que ru'u neda' didza', rnno': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a.

¹⁹ Chinöz quézinu' yugu' le gunná bë'ë Dios, gunnë': Bití' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

²⁰ Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

²¹ Len yöl-la' dxi'i ladxi' queë', Jesús buyüë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

²² Cate' biyönnë' didza' ni, bu'innë', ate' söhuöjë' risëbi lãdxë'ë tu' dëda' yöl-la' tsahui' queë'.

²³ Ní'irö buyüë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lë'e yöl-la' tsahui' ga rinná bë'ë Dios.

²⁴ Bulu'bánninë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libi'ili', xzí'ina'do', böniga naca ila'yázië' bönni' tu'zxöni lãdxi'gaquië' yöl-la' tsahui' quégaquië' ga rinná bë'ë Dios.

²⁵ Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tödiba' böa' ta'bía-ba' bönachi lu nagui yötsi'.

²⁶ Cate' bila'yönnë' didza' ni, bulu'bánitëronë' ca'. Ta'nnë' la' légacasë':

—¿Nuzxi caz gaca ulá, channö?

²⁷ Buyüë' Jesús légaquië', rnnë':

—Biti' gaca gun bönachi lë ni, pero huáquië' Dios, tu rizequi'në' Dios yúgu'të.

²⁸ Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o böchë'ë, o zanë', o xuzë', o xinë'ë, o nigula queë', o yugu' xzí'inë', o xiyüë', tu' runë' xichina' o tu' runë' libán que didza' dxi'a quia',

³⁰ bönni' ni huazí' queë' ia'tú gayuá'tëro ca' dza ni zóaru' na'a, yugu' lidxë', en yugu' böchë'ë, en yugu' zanë', en yugu' xinë'ë, en yugu' xzí'inë', en yugu' xiyüë', enca' yugu' le ila'bía lãdxi'gaca bönachi lë', ate' lu yödzölió si' za', gata' yöl-la' na'bán idú queë'.

³¹ Zían nupa nácgaca lo na'a, ilaca cuídi'sö ni', ate' nupa nácgaca cuídi'sö na'a, ilaca lo ni'.

Leyúbölö rigútxjö'ë Jesús ca si' ilütië' Lë'
(Mt. 20:17-19; Lc. 18:31-34)

32 Cate' ni' yú'ugaquië' nõza, ta'benë' sõjáquië' Jerusalén, nanõruë' Jesús lógaquië' bõnni' usëda queë'. Nanítiguequinë', en lu yõl-la' rádxisõ sõjácalenë' Lë'. Leyúbölõ Jesús guchë'ë quez idxínnutë' na'. Gusí lahuë' ru'ílenë' légaquië' didza' ca naca le ral-la' gaca queë'.

33 Rnnë':

—Rilé'e quézili' ribenru' zéajru' Jerusalén ga ni' zoa nu udõdi neda', Bõnni' Guljë' Bõnachi, lu ná'agaquië' bixúz unná bë', en lu ná'agaquië' bõnni' yudo' usedi, ate' chúguië' quia' gátia', en ulu'dödë' neda' lu ná'agaquië' bõnni' zi'tu'.

34 Bõnni' na' ulu'titjë' neda', en ilúndë'ë neda' zi'. Ulu'chejë' neda' zxõna'. Ní'irõ ilútië' neda', pero cate' gaca tsonna dza ubana' lu yõl-la' guti.

Jacobo en Juan ta'nábinë' Jesús bi gunë' quégaquië'

(Mt. 20:20-28)

35 Ní'irõ gula'biguë'ë Jacobo, en Juan, zxí'inë' Zebedeo, lahuë' Jesús, en të' Lë':

—Bõnni' Usedi, ré'ënitú' gunu' queëtu' le inábatu'.

36 Jesús gudxë' légaquië':

—¿Bizxi ré'ënili' guna' queëli'?

37 Gulë' Lë':

—Cate' idxín dza cõ'u ga inná bë'u, ben ga cõ'õtu' tutu' cuitu' ibëla, en ia'tutu' cuitu' yõgõla.

38 Ní'irõ Jesús gudxë' légaquië':

—Biti' nõzili' bi rinábali'. ¿Naru' huáca sí'ili' le ral-la' si'a neda', le naca le qui'i saca'a? ¿Naru' huáca idílali' nisa ca idila' neda' nisa, gátia'?

39 Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', sí'ili' ca' libí'ili', en ca idila' neda' nisa, idílali' ca' nisa,

40 pero biti' dë lu na'a cõa' nu cuía cuita' ibëla, en nu cuía cuita' yõgõla. Dios unõdzjë' quégaquië' bõnni' chinupë'ë quégaquië' yugu' lataj na'.

41 Cate' bila'yõnnë' ia'chíë' bõnni' usëda queë' Jesús didza' ni, gula'lenë' Jacobo, en Juan na'.

42 Ní'irõ Jesús bulidzë' légaquië', rnnë':

—Nõz quézili' ca tun nupa ta'nná be'e yugu' yõdzõ, tu'zenë' bach bõnachi, ate' nupa nácgaca lo ládjagaquië' ta'nná be'e luzë'eguequi.

43 Biti' gaca caní' queëli', pero nu guë'ëni gaca zxõn ga zóali', ral-la' gun xichinli' ia'zíca'rõli',

44 ate' nútí'tëslõli' nu guë'ëni gaca lo ral-la' gaca ca bõnni' huen dxin tsaz queëli' yúgu'tëli'.

45 Caní ral-la' gunli' tu' bida' ni neda', Bönni' Guljē' Bönachi, calēga para nu gun xichina', pero para guna' xichíngaca bönachi, en udöda' yöl-la' na'bán quia' le huóá'uida' bönachi zián.

Jesús ruúnē' Bartimeo, bönni' lo chul-la

(Mt. 20:29-34; Lc. 18:35-43)

46 Ní'irö bila'dxinē' Jesús, en yugu' bönni' dá'gaquiē' Lē' yödzo Jericó. Cate' ni' rurujē' Jesús yödzo ni, dzágagaquiē' Lē' yugu' bönni' usēda queē', enca' bönachi zián. Ra' nōza ni' rō'ē tu bönni' nachul-la lahuē', lē' Bartimeo, xzí'inē' Timeo. Rinabē' nu bi gúnnašō queē'.

47 Cate' biyönnē' Bartimeo ridödē' Jesús, bönni' Nazaret, ni', gusí lahuē' ru'ē zidzaj didza', rnnē':

—¡Jesús, xzí'ini xi'sóē' David! ¡Buéchi' ladxi' neda'!

48 Nupa ta'dödi ni' gula'dil-la lē' didza'. Tē lē':

—Busayaj ru'u.

Ní'irö zídzejrö bulidzē', rnnē':

—¡Xzí'ini xi'sóē' David! ¡Buéchi' ladxi' neda'!

49 Ní'irö guzóē' dxisō Jesús, ribözē', ate' rē' légaquiē':

—Buli'lidzē'.

Bulu'lidzē' bönni' na' nachul-la lahuē'. Tē lē':

—¡Butipa lādXu'u! ¡Guyaschi! ¡Rulidzē' li'!

50 Ní'irö gurú'unē' tsölá'alö lari' naxóa yenē'. La' guyásatē', en bidē' ga na' zoē' Jesús.

51 Jesús gunábinē' lē', rnnē':

—¿Bizxi rē'ēnu' guna' quiu'?

Bubi'ē didza' bönni' na' nachul-la lahuē', rnnē':

—Bönni' Usedi, rē'ēnda' gunu' ga huóálaj guiōj lahua'.

52 Jesús gudxē' lē':

—Böaj lidXu'. Chinuhuóácu' tu' réajlē'u neda'.

La' böáljatē guiōj lahuē', ate' sa'yéajlenē' Jesús.

11

Riyaziē' Jesús yödzo Jerusalén

(Mt. 21:1-11; Lc. 19:28-40; Jn. 12:12-19)

1 Bila'dxinē' Jesús, en yugu' bönni' dá'gaquiē' Lē' gala' ga dē Jerusalén, ga na' nacuá' yödzo Betfagé, en yödzo Betania, en ga na' dē ca' Gu'a Yaga Olivo. Ní'irö Jesús gusöl-lē'ē chopē' bönni' usēda queē',

2 en rē' légaquiē':

—Guli'tséaj lu yödzo do' dē loru' ni', en cate' tsú'uli' ni', tsöjxáca'li'-ba' tuba' búrrodo' nága'ba' ni', en cuntu nu ribíani lēba'. Guli'sedxi-ba', en guli'ché'-ba' quia' ni.

3 Channö nu bi guié libí'ili' tu' runli' lē ni, guli'guié nu na': "Xanru' riquinnē'-ba', ate' la' usöl-la'tē'-ba' quiu'."

⁴ Ní'irö yöjáquië', en yöjáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'.

⁵ Nupa nacuá' ni' tē légaquië':

—¿Bizxi ni runli'? ¿Bizx que risédxili'-ba' búrrodo' na'?

⁶ Bulu'bi'ë didza' bönni' usëda queë' Jesús, gulë' légaquië' ca na' chigudxi cazë' Jesús légaquië', ate' gulu'ë légaquië' lataj.

⁷ Ní'irö gula'ché'ë-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxië'-ba'.

⁸ Zián bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guítsaj zin le bulu'zxóa la' nöza.

⁹ Gula'sí lo nupa nanörugaca lahuë' Jesús, en nupa na' zá'gaca cúdzu'lë' tu'i zidzaj didza', ta'nnë':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasöl-lë'ë Dios Lë'!

¹⁰ ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

¹¹ Caní guca, bidxinë' Jesús Jerusalén, ate' guyázië' lö'a yudo'. Cate' budxi buyüë' yúgu'të le nacuá' idú gásibi'ilö ni', burúajë' zaca' yödzö Betania tu' chiridzö', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

¹² Cate' za' rení' ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, ridunë' Jesús.

¹³ Zi'tu' bilé'enë' tu yaga higo dxía xilagui'. Gubígui'ë ga na' zoa yaga na' channö utsöjxaquië' lati' le ribía. Cate' bidxinë' ni' bití' bi yöjáquië' le ribía. Xilágui'sö dxía tu' cabí ridxini dza cuía.

¹⁴ Ní'irö Jesús bulidzë' yaga na', rnnë':

—Bití'rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bö' nupa tuti' yugu' gu'dödo'.

¹⁶ Bití' ca' bë'ë lataj nu bi guá', uzóa nöza ga naca lö'a yudo'.

¹⁷ Busëdinë' nupa nacuá' ni', rnnë':

—Nazúaj lu guichi lá'ayi, rna: “Lidxa' si'i le, yu'u ga bönachi iduté yödzölió ulu'lidza Dios.” Libí'ili' chinunli' le ca naca lídxigaca gubán.

18 Cate' yugu' bixúz unná bē', en yugu' bönni' yudo' usedi bila'yönnē' didza' ni, gula'sí lógaquiē' tu'guiljē' nacxi ilútiē' Jesús, pero tu' tádxinē' le ilún bönachi, biti' bi gulunē' queē', tu' tu'bani yúgu'tē bönachi ca naca le rusēdinē' Jesús.

19 Cate' chiridzō' burúajē' Jesús lu yödzō na'.

Ribidxi yaga higo bulidza zi'ē Jesús

(Mt. 21:20-22)

20 Cate' za' reni' ia'tú dza, gula'dödē' Jesús, en yugu' bönni' dá'gaquiē' Lē' ga zoa yaga higo na' bulidza zi'ē Jesús, en bila'lē'enē' le, chinabidxi idú lúí.

21 Ní'irō yöjnenē' Pedro bi guca, ate' gudxē' Jesús:

—Bönni' Usedi, buyútsōca'. Chinabidxi yaga higo ni bulidza zi'u néaje.

22 Bubi'ē didza' Jesús, rē' légaquiē':

—Guli'tseajlē' Dios.

23 Le nácatē rea' libí'ili', channō nu bönni' guíē' gu'ado' ni: "Gucuíta ni, yöjsóa lu nísado'", en biti' gaca chopá ládxxē'ē bönni' na', pero idú ládxxē'ē tseajlē'ē gunē' Dios ca na' rnnē', ca' gaca.

24 Que lē ni na' rea' libí'ili': Yúgu'tē le inábali' cate' ulídzali'-nē' Dios, guli'tséajlē' chibennē' Dios queéli' lē na' rinábali', ate' gunnē' queéli'.

25 Cate' ni' rulídzali'-nē' Dios, channō zoa nu rileli' nu bi ben queéli', buli'niti lo nu na', para uniti lahuē' ca' libí'ili' Xúzili' na' zoē' yehua' yubá ca naca dul-la' nabága'li'.

26 Channō cabí uniti lolí' bönachi, biti' uniti lahuē' Xúzili' zoē' yehua' yubá libí'ili' dul-la' nabága'li'.

Yöl-la' unná bē' dē lu nē'ē Jesús

(Mt. 21:23-27; Lc. 20:1-8)

27 Ní'irō Jesús, en yugu' bönni' dá'gaquiē' Lē' yöjhuōjgaquiē' Jerusalén. Cate' ni' ridē' Jesús ga naca chila yudo', bila'dxinē' yugu' bixúz unná bē', en yugu' bönni' yudo' usedi, en bönni' gula tu'zéajni'inē', ga zoē'.

28 Gula'nábinē' Jesús, ta'nnē':

—¿Bizxi yöl-la' unná bē' dē lu no'o runu' yugu' lē ni? ¿Nuzxi caz budödi lu no'o yöl-la' unná bē' gunu' caní?

29 Bubi'ē didza' Jesús, rē' légaquiē':

—Neda' ca' inábida' libí'ili' tu didza'. Channō ubí'ili' quia' didza', ní'irō guía' libí'ili' bi yöl-la' unná bē' rúnida' yugu' lē ni.

30 ¿Nuzxi budödi lu nē'ē Juan uquilē' bönachi nisa? ¿Naru' Dios o bönachi? Guli'nnátsōca'.

31 Gula'sí lógaquiē' tun xtídza'gaquiē' la' légacasē', ta'nnē':

—Channō innaru' Dios gusöl-lē'ē lē', guíē' rē'u: "¿Bizx que biti' guyéajlē'éli' lē'?"

32 ¿Naru' guiétsaru'-nē': Gula'söl-lē'ē bönni' lē'?

Caní ta'zá' ládxi'gaquië' tu' tádxinë' le ilún bönachi zián nacuá' ni' tu' téquiguequi yúgu'të bönachi na' bë'ë didza' Juan na' uláz queë' Dios.

³³ Que lë ni na' gulë' Jesús:

—Biti' nōztu'.

Ní'irō Jesús gudxë' légaquië':

—Neda' ca' biti' quíxjöi'ida' libí'ili' bi yöl-la' unná bë' dë lu na'a rúnida' yugu' lë ni.

12

Rucúdzu'ë didza' Jesús ca gaca quégaca huen dxin biti' nácagaca tsahui'

(Mt. 21:33-46; Lc. 20:9-19)

¹ Ní'irō gusílahuë' Jesús ru'ilenë' yugu' bönni' dá'gaquië' Lë didza' yugu' le rucúdzu'ë didza', rnnë':

—Guzóë' tu bönni', budë'ë lubá uva zián ga naca lu xiyúë'. Guléquië' lë'a que, en guchō'ōnë' tu rōga' guiōj ga isië' xisi uva na'. Budxíë' tu yu'u gupa ga naca xitsá' ga nu uyú xiyúë' na'.

'Ní'irō budödë' xiyúë' na' lu ná'agaquië' huen dxin, ila'zi'ë gatsaj huéaj le unödzej, ate' guyijë' yödzo'zi'tu'.

² Cate' bidxín dza ulu'chibë' le ribía, gusöl-lë'ë-bi' bi'i huen dxin tsöjxí'ibi' lu ná'agaquië' huen dxin na' le ral-la' si'ë xanbi' que le gula'bía lubá uva na'.

³ Ní'irō yugu' huen dxin na' gula'guélë'ë-bi' bi'i na', en gulundë'-bi' zi', ate' bulu'söl-lë'ë-bi' cá'asöbi'.

⁴ Ní'irō bönni' xan luyú na' gusöl-lë'ë-bi' ia'tubi' bi'i huen dxin queë', ate' bi'i ni bulu'ladxë'-bi' guiōj. Bulu'lë'ë ícjabi'. Gulu'ë dö' queëbi'.

⁵ Ní'irō bönni' xan luyú na' gusöl-lë'ë-bi' ca' ia'tubi' bi'i huen dxin queë', ate' bi'i ni gulútië'-bi'. Gusöl-lë'ë-bi' ca' ziánröbi', ate' bál-labi' gulúngacadë'-bi' zi', en ia'bál-labi' gulútigaquië'-bi'.

⁶ 'Cúnturō nu nagá'ana queë' xan luyú na'. Nagá'anasibi' zxi'inë', ate' nadxí'ide'enë'-bi'. Ga yōjsetë, gusöl-lë'ë-bi' zxi'inë', rnnë': "Ilunë' bal zxi'ina'."

⁷ Ní'irō yugu' bönni' huen dxin na' gula'nnë' la' légacasë', ta'nnë': "Bi'i ni ral-la' guequi queëbi' luyú ni. Guli'dá, gútiru'-bi', ate' guequi queëru' luyú ni."

⁸ Que lë ni na' gula'zōnë'-bi', en gulútië'-bi'. Gula'rú'unë'-bi' ní'ilō ga dá'gaca lubá uva na'.

⁹ Ní'irō Jesús gunábinë' bönni' nacu'ë ni', rnnë':

—¿Nacxi gunë' bönni' xan luyú na', channō? Huidë', en gútigaquië' bönni' huen dxin na', ate' udödë' luyú na' lu ná'gaquië' bönni' yúbölō.

¹⁰ ¿Naru' cabí nulábanili' lë na' nazúaj lu guichi lá'ayi? Caní rnna:

Guiǒj na' gula' rú' unē' bōnni' tu' cu' ē zō'ō, na' a naca guiǒj len, squin zō'ō.

11 Xanru' Dios benē' ga naca caní ate' rubániru' ca naca lē ni rilé' eru'.

12 Ní' irō ta' zóa ta' bö' ē ila' zōnē' Jesús tu' téquibe' enē' bucúdu' ē didza' ca naca quégaquiē', pero tádxinē' le ilún bōnachi zían nacua' ni', en que lē ni na' bulu' cá' anē' Lē', söhuǒjgaquiē'.

Ca naca le ta' guíxaj lázagaca bōnachi
(Mt. 22:15-22; Lc. 20:20-26)

13 Gudōdi lē ni yugu' bōnni' yudo' unná bē' na' gula' söl- lē' ē bal- lē' bōnni' yudo' fariseo len bōnni' dá' gaquiē' Herodes ga zoē' Jesús para ilunē' ga bi innē' para gaca ulu' zéguiē' Lē' didza'.

14 Bila' dxinē' bōnni' ni ga na' zoē' Jesús, en tē' Lē':

—Bōnni' Usedi, nōzitu' ru' u didza' idútē li. Biti' ru' i lādXu' u bi ta' nnasō bōnachi, tu' cabí ruyusu' le tu' lu' isō cuínguequi bōnachi, pero rusēdinu' ca nácatē le rē' enē' Dios ilún bōnachi. ¿Ru' i netu' lataj xibá queē' Moisés quíxaj laztu' le tu' quíxjē' uláz queē' César? ¿Naru' uguíxajtu' o biti' quíxajtu'?

15 Réquibe' enē' Jesús tu' ē didza' lu yöl- la' riguílaj ladxi' quégaquiē', ate' rē' légaquiē':

—¿Bizx que rubéajli' neda' didza'? Guli' diguá' tsöca' tu dumí ridá para ilé' eda' le.

16 Diguá' agaquiē' le, ate' Jesús gunábinē' légaquiē', rnnē':

—¿Nuzxi lahuí da' lē' e ni, en nuzxi lē ni?

Bulu' bi' ē didza', ta' nnē':

—Queē' César na'.

17 Ní' irō Jesús gudxē' légaquiē', rnnē':

—Buli' nōdzaj queē' César le nequi queē' César, ate' queē' Dios le nequi queē' Dios.

Bulu' bāninē' ca naca didza' bubi' ē Jesús.

Ca naca que yöl- la' rubán lu yöl- la' guti
(Mt. 22:23-33; Lc. 20:27-40)

18 Ní' irō bila' dxinē' bal- lē' bōnni' yudo' saduceo ga zoē' Jesús. Bōnni' ni ta' nnē' biti' ulu' bān nupa chinátigaca. Que lē ni na' gulé' Jesús, ta' nnē':

19 —Bōnni' Usedi, Moisés nuzájē' queēru' lu guichi channō gátie' tu bōnni' biti' zoa bi' i queē', ate' ugá' ananu nigula queē', bi' i böchē' ē bōnni' na' ral- la' utsaga ná' alenbi' -nu, en uzóabi' bí' ido' gácabi' bi' i queēbi' böchi' bi'.

20 Gula' cuá' abi' gádxibi' bi' i nácagacabi' böchi' gacabi'. Bi' i huáca na' butsaga ná' alenbi' -nu nigula, ate' gútibi', cuntu nu zoa bí' ido' queēbi'.

21 Bi'i buropi na' butsaga ná'alenbi'-nu nigula uzëbi na', ate' gútibi' ca', cuntu nu zoa bí'ido' queëbi'. Lësca' caní guca queëbi' bi'i bunni.

22 Caní guca, bulu'tsaga ná'alenbi'-nu yúgu'tëbi', cuntu nu zoa bí'ido' quégacabi'. Ga yöjsetë, gútinu ca' nigula na'.

23 Na'a, cate' ulu'bán nupa chinátigaca, ¿núzxilöbi' guéquinu nigula na' queëbi', tu' bulu'tsaga ná'alenbi'-nu igádxitëbi'?

24 Bubi'ë didza' Jesús, rë' légaquië':

—Richíxili' tu' cabí núnbë'ëli' le nazúaj lu guichi lá'ayi, en biti' nözili' ca naca yöl-la' huáca queë' Dios.

25 Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nácagaquië' gubáz lá'ayi queë' Dios, nacu'ë yehua' yubá.

26 Na'a, ca naca quégaca nupa chinátigaca channö ulu'bán, ¿naru' cabí nulábanili' le buzúajë' lu guichi Moisés? Ruí' didza' ca na' bulidzë' Dios lë' lu yaga yötsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunné' caní quégaquië', naca bë' nabángaquië' sal-la' gulátië' zí'alö.

27 Dios náquië' Dios quégaca nupa nabángaca, calëga quégaca nupa nátigaca tsaz. Richíxitëröli'.

Le naca lo le gunná bë'ë Dios

(Mt. 22:34-40)

28 Bidë' ca' tu bönni' yudo' usedi ga zoë' Jesús. Biyönnë' ca na' gulu'ilenë' Jesús didza', en nözinë' dxí'ado' bubí'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácaterö lo ca yúgu'të le gunná bë'ë?

29 Bubi'ë didza' Jesús, rë' lë':

—Le gunná bë'ë le nácaterö lo ca yúgu'të naca lë na' rna: "Guli'yöni bönachí Israel. Xanru' Dios, tuzë' Lë' náquië' Xanru'.

30 Ral-la' idxí'inu' Xanu' Dios idú ládxi'u, en lu idú icja ládxi'do'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bë'ë le nácaterö lo.

31 Le gunná bë'ë le naca buropi, lébisö ca naca. Caní rna: "Ral-la' idxí'inu' luzó'o ca nadxí'i cuinu'." Biti' ca' zoa ia'tú le gunná bë'ë le nácaterö lo ca chopa ni gunná bë'ë.

32 Ní'irö bönni' yudo' usedi na' gudxë' Jesús, rnnë':

—Dxí'ado' gunnó', Bönni' Usedi. Le nácaterö rno'. Tuzë' náquië' Dios, en cúnturö nu zoa naca Dios.

33 Para idxí'iru'-në' Dios idú ládxi'ru', en lu idú yöl-la' réajni'i queëru', en lu idú icja ládxi'do'oru', en lu idú yöl-la' huáca queëru', en para idxí'iru' luzá'aru' ca nadxí'i cuinru', nácaterö lesaca' ca yúgu'të böa' bédxido' rútigacaru'-ba' lu bucugu lá'ayi

queë' Dios, enca' ca yúgu'të böa' bëdxido' ruzégui'gacaru'-ba' lu bucugu na'.

³⁴ Cate' biyönnë' Jesús dxí'ado' rubi'ë didza' bönni' ni, ní'irö gudxë' lë', rnnë':

—Ia'láti'sö riyadzaj quiu' gúnbë'u le rinná bë'ë Dios.
Cúnturö nu burugui bi inábini Jesús.

¿Nuzxi zxi'ini náquië' Cristo?

(Mt. 22:41-46; Lc. 20:41-44)

³⁵ Cate' ni' rusëdinë' Jesús bönachi ga naca chila yudo', rnnë':

—¿Bizx que ta'nnë' bönni' yudo' usedi náquië' Cristo zxi'ini xi'sóë' David?

³⁶ Lë' cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

“Gurö'ö cuita lë'a ibëla cate' gunra' ga ulu'zóa zxi'bigaca lo' nupa biti' ta'lé'e Li' dxi'a.”

³⁷ ¿Naru' nácatsë' Cristo zxi'ini xi'sóë' David channö lë' cazë' David na' rnnë' queë' náquië' Xanë'?

Bönachi zían nacuá' ni' tu'zë' nágagaca Lë' gula'yaza ládxi'gaca didza' ni.

Jesús ruzégui'ë didza' bönni' yudo' tu'sëdinë'

(Mt. 23:1-36; Lc. 11:37-54; 20:45-47)

³⁸ Ni' rusëdinë' Jesús yugu' bönni' dá'gaquië' Lë', rë légaquië':

—Guli'gún chi'i cuinli' quégaquië' bönni' yudo' tu'sëdinë'. Ta'yaza ládxi'gaquië' ta'dë' nilö na'lö, nácugaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yë'ëyi.

³⁹ Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' tē'aj tahuë'.

⁴⁰ Rugúagaquië' lídxigacanu nigula uzëbi, en para ulu'lu'isö tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

Le bunödjanu tu nigula uzëbido' queë' Dios

(Lc. 21:1-4)

⁴¹ Tsanni ni' rö'ë Jesús chila yudo' ga zoa gu'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu gu'ina. Dumí zían ta'gu'ë bönni' dë yöl-la' tsahui' quégaquië'.

⁴² Ní'irö bidxinnu tu nigula yechi' uzëbido' ni', ate' gulú'unu chopá dumí lásido', le nazáca'gaca láti'do'os.

⁴³ Ní'irö bulidzë' Jesús yugu' bönni' usëda queë', en rë légaquië':

—Le nácatë rea' libí'ili', nigula yechi' uzëbido' ni gulú'urönu ca yúgu'të nupa bi ta'gú'u lu gu'ina que yudo'.

44 Yúgu'tè bönni' ni ta'gu'ë que le nagá'anasö quegaquië', pero nigula ni, lu yöl-la' yéchi'do' queënu gulú'unu idútè la's dui tsca le dësö queënu, le ral-la' gáhuinu.

13

Rigúxjö'ë Jesús ca si' ulu'quínnajë' yudo'

(Mt. 24:1-2; Lc. 21:5-6)

1 Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guiöj lë'e zö'ö queguequi.

2 Bubi'ë didza' Jesús, rë' lë':

—Rilé'enu' yugu' yu'u zxön ni, pero biti' ca' ugá'ana guiöj lahui luzë'e ni, tu' ulu'quínnaj bönnachi léguequi.

Le ilaca bë' cate' si' údxi que yödzöliö

(Mt. 24:3-28; Lc. 21:7-24; 17:22-24)

3 Ní'irö yöjáquië' Jesús, en yugu' bönni' dá'gaquië' Lë' lu Guí'a Yaga Olivo, guí'a na' dë ca dödilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulë' Lë', ta'nnë':

4 —Gudíxjö'i' netu' bátaxi ilaca lë ni. ¿Bizxi gaca bë' chizóa ilaca yúgu'tè lë ni?

5 Bubi'ë didza' Jesús, rusëdinë' légaquië', rnnë':

—Guli'gún chi'i cuinli' para cabí nu si' ye'e libí'ili'.

6 Ila'lá' lahuë' zían bönni' si' lágaquië' ca lea' neda', ila'nnë' nácagaquië' Cristo. Caní ila'zì' yé'enë' bönnachi zían.

7 'Ní'irö cate' yönili' raca gudil-la nilö ná'alö, biti' gádxili'. Yúgu'tè lë ni ral-la' ilaca, pero biti' ridxini dza údxi.

8 Tu yödzö tìl-lalen ia'tú yödzö, en tu ga nu rinná bë' tsöjtìl-lalen ia'tú ga nu rinná bë'. Zían lataj tödi budó' zxu', en tsu'u gubín. Ila'tsatsa bönnachi. Yugu' lë ni ilaca le isí lo ila'guí'i ila'zaca' bönnachi dza ni'.

9 'Ní'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'enë' libí'ili', en lógaquië' bönni' ta'nná bé'enë' yödzö zi'tu'. Ilunë' caní queëli' tu' dá'ali' neda', pero gunli' ba nalí quia' neda' ni'.

10 Zí'alö ca idxín dza údxi, run bayudxi gaca libán que didza' dxi'a quia' lógaca bönnachi idútè yödzöliö.

11 Cate' ni' ila'ché'ë libí'ili', en ulu'dödë' libí'ili' lu ná'agaquië' bönni' yúlahui', biti' güf'i ládxi'li' bizxi innali'. La' dza ní'isö Dios gunnë' queëli' didza' güf'ili', ate' lë ni innali'. Cate' ni' güf'ili' didza', calëga libí'isili' na' innali', pero Dios Bö' Lá'ayi innë'.

12 Ulu'dödi bönachi la' böchi'gacasö lu ná'agaquië' bönni' ilútië' légaquië'. Yugu' bönni' nacuá'abi' bi'i quégaquië' ulu'dödë' la' xzí'inigaca cazë' ca', ate' xzí'inigaquië' ná' ulu'dödibi' la' xuz xiná'agaca cázabi' lu ná'agaquië' bönni' ilútië' légaquië'.

13 Yúgu'të bönachi ulu'zóa libí'ili' tsölá'alö tu' dá'ali' neda', pero núlöli' guá' ilenli' lë na' ga idxinrö dza údxi, uláli'.

14 'Nupa tu'laba didza' ni ral-la' ila'yéajni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní: "Tsaz tu le xihui' le rucá'ana cané ga naca la'ayi." Dza ní'irö ral-la' ila'zxunnaj nupa nacuá' luyú Judea, en tsöjaca gapa naca lu guí'ado'.

15 Nu zoa ícjo'olö dza ni' ral-la' izxúnnajtë, en biti' huötaj zxan yu'u para tsöjzxí' bi dë que lu yu'u.

16 Nu zoa la' guixi' ral-la' izxúnnajtë, en biti' huöaj tsöjzxí' lari' rixóa yeni.

17 Bica' bayechi' yugu' nigula dza ni' nuá'agacanu-bi' bí'ido', enca' nigula tu'gádxí'nu-bi' bí'ido'.

18 Buli'lidzë' Dios inábili'-në' cabí gun bayudxi izxúnnajli' cate' raca beo' ziaga ca'.

19 Yugu' dza ni' ila'guí'i ila'zaca'rö bönachi ca le guca zí'atëlö cate' si' guta' yödzülió le benë' Dios ga ridxintë na'a dza, ate' dza zá'gaca biti' gaca caní.

20 La'tu' cabí nunë' Dios ga ulu'huóáca nabábasö yugu' dza ni', cuntu nu ulá, pero tu' nadxí'inë' nupa chigurö cazë', chinunë' queë' gunë' ga ulu'huóáca nabábasö yugu' dza ni'.

21 'Na'a, channö nu gufé libí'ili': "Buli'yútsöca', ni zoë' Cristo", o inná: "Buli'yútsöca', ni' zoë'", biti' ca' tséajlë'ëli' nu na'.

22 Ila'lá' lahuë' zían bönni' ila'zí' yé'enë' bönachi. Ila'nnë' nácagaquië' Cristo, en ila'nnë' nácagaquië' bönni' tu'ë didza' uláz queë' Dios. Ulu'luí'inë' le ilaca bë', en ilunë' yugu' yöl-la' huáca zxön. Huala'zí' yé'enë' ca' nupa gurö cazë' Dios channö ila'zéqui'në'.

23 Ní'irö libí'ili', guli'sóa ban ladxi'. Yúgu'të chigudxa' libí'ili' zí'atëlö ca gaca.

Ca huödë' Bönni' Guljë' Bönachi

(Mt. 24:29-35, 42-44; Lc. 21:25-36)

24 Gunnë' ca' Jesús:

—Yugu' dza ni', tödi gaca dza na' ila'guí'i ila'zaca' caní bönachi, ichul-la gubidza, en biti' cu'u bení' beo'.

25 Ila'guínnaj böljaj lúzxiba, en ila'zxizi le nál-lagaca nalá'gaca lúzxiba na'.

26 Ní'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení' quia'.

27 Isöl-la'gaca'-në' gubáz lá'ayi quia', ate' ulu'tubë' bönachi gurö caza' quia' nacuá' idapa la'a yödzülió, ga naguéla'të luyú bidxi, ga ridxintë ga naguéla' lúzxiba.

28 'Guli'tséajni'i le rusedi yaga higo ni'. Cate' ta'lén ni'a në'e huë'ënido', en rubía xilagui' yulu, nözili' chizóa idxín beo' cusubá.

29 Lësca' caní, cate' ilé'eli' taca lë ni, inözili' chizóa idxín dza údxi na', en chiridzaga lo.

30 Le nácatë rea' libí'ili', yúgu'të lë ni ilaca zí'atëlö ca ilátigaca nupa nacuá' dza na'.

31 Huadödi que lúzxiba, en que luyú ni, pero xtídza'a catu caz tödi que.

32 'Cate' idxín dza ni' o rëla ni', cuntu nu nözi. Biti' nözguequinë' gubáz lá'ayi nacu'ë yehua' yubá, en bití' nözda' neda', Zxí'inë' Dios. Tuzë' Dios Xuz nözinë'.

33 Que lë ni na', buli'subán ládxi'li'. Guli'sóa sina', en buli'lidzë' Dios tu' cabí nözili' bizxi dza gaca lë ni.

34 Gaca ca raca cate' sa'yéajë' zí'tu' tu bönni'. Cate' chizóa uzë'ë lidxë', udödë' lu ná'agaquië' huen dxin queë' yugu' le dë queë'. Que queëgaquië' gu'ë xichíngaquië', en inná bë'ë soa ban ladxí' nu zoa huen chí'i ga nu riyaza.

35 Guli'sóa libí'ili' ban ladxí' tu' cabí nözili' bátaxi huödë' xan yu'u, cate' chiridzö', o gatsaj lahui' yëla, o cate' ribödxiba' böra, o zílado'.

36 Guli'gún caní, para cabí idixáquië' libí'ili' rásili' channö huödë' tsárido's.

37 Lë ni rea' libí'ili', rea' ca' yúgu'të bönachi: Guli'sóa ban ladxí'.

14

*Tun xtídza'gaquië' bönni' yudo' ila'zönë' Jesús
(Mt. 26:1-5; Lc. 22:1-2; Jn. 11:45-53)*

1 Ia'chopa dza ca' gaca Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila bití' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sëdinë' ila'zönë' Jesús bagáchi'sö para ilútië' Lë'.

2 Ta'nnë':

—Bití' gaca sönru'-në' dza laní tu' ila'tsatsa bönachi.

*Nigula rigú'unu le rilá' zxixi icjë' Jesús
(Mt. 26:6-13; Jn. 12:1-8)*

3 Zoë' Jesús yödzo Betania, lu yu'u lidxë' Simón, bönni' güi'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu böga'do' néquini guiöj zaca', yudzu le rilá' zxixi que yöj susén lasi idú, le nazaca' yenni'. Gulá'anu böga'do' na', en gulú'unu le rilá' zxixi na' icjë' Jesús.

4 Gula'lélanë' bal-lë' bönni' nacu'ë ni'. Ta'nnë' la' légacasë':

—¿Bizx que guca ditaj le zxixi na'?

5 La'tu' nu guti' lë na', huazí' que ia'lati' ca lázxjaru' que tu iz para nu quisi le quégaca bönachi yechi'.

Gula'nnëdë'ë queënu.

6 Ní'irö Jesús bë'ë didza', rnnë':

—Guli'güi'-nu lataj. ¿Bizx que rinnë zí'ili' queënu? Naca dxi'a le bennu quia'.

7 Nacuá'lentica'sö bönachi yechi' libí'ili', en bátati'tës guë'enili', huáca gunli' dxi'a quégaquië', pero neda' biti' sóatica'sa' ga zóali'.

8 Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' zí'atëlö ca igácha'a yeru ba.

9 Le nácatë rea' libí'ili', gátitës ga gaca libán que didza' dxi'a quia' idú yödzölió, soa nu quixjö' ca' lë ni bennu nigula ni quia'. Caní gaca para nu tsöjné lënu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

10 Ní'irö birúajë' Judas Iscariote, bönni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'.

11 Cate' bila'yönnë' xtídzë'ë Judas na', bulu'dzéjanë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

Le rë'aj ráguru' rusubanru' ca gútië' Xanru'

(Mt. 26:17-29; Lc. 22:7-23; Jn. 13:21-30; 1Co. 11:23-26)

12 Naca dza risí lo laní cate' tahuë' yöta xtila biti' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölë' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi rë'ënu tséajtu' tsöjpa'atu' le gáguru' xtsö' que Laní Pascua?

13 Ní'irö Jesús gusöl-lë'ë chopë' bönni' usëda queë', en rë' légaquië':

—Guli'tséaj lu yödzö. Ni' huadzágali' tu bönni' nu'ë tu rö'ö nisa. Guli'tséajlenë'.

14 Ga na' tsázië', guli'guíë' xan yu'u na': “Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?”

15 Ní'irö uluí'inë' libí'ili' tu yu'u zxön ga naca buropi cuía ga chinabá'a. Buli'pá'a le gáguru' ni'.

16 Bila'rúajë' bönni' usëda queë' na', en bila'dxinë' lu yödzö, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

17 Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'.

18 Tsanni ni' rő'ogaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxön, nu udödi neda' lu ná'agaca bönachi.

19 Ní'irö bulu'huí'innë', en gula'sí lógaquië' tu tuë' të' Lë':

—¿Naru' neda'?

Ia'túë' ca' gunnë':

—¿Naru' neda'?

20 Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxön len na'a lu yö'öna.

21 Tseja' ga gátia' neda', Bönni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

22 Tsanni ni' tahuë', gudélé'ë Jesús yöta xtila. Gudxë' Dios: "Xclenu'." Buzxuzxjë' le, en bë'ë quégaquië', rnnë':

—Gulí'gagu. Lë ni naca bëla' rön quia'.

23 Gudélé'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulë'ajë' le.

24 Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían.

25 Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

Jesús rnnë' innë' Pedro biti' núnbë'ë Lë'

(Mt. 26:30-35; Lc. 22:31-34; Jn. 13:36-38)

26 Gudödi gulúl-lë' yöl-la' ba, bila'rúajë' sőjáquië' Guí'a Yaga Olivo.

27 Ní'irö Jesús gudxë' légaquië', rnnë':

—Yúgu'tëli' gaca chopa ládxi'li', ucá'anali' neda' na'a dzö', tu nazúaj lu guichi lá'ayi, rnna: "Gutia'-në' uyú bö'cu' zxila', ate' ilásilasiba' bö'cu' zxila' na'."

28 Tödi ubana' lu yöl-la' guti, tseja' luyú Galilea zí'alö ca libí'ili'.

29 Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', biti' ca' gaca chopa ládxa'a neda'.

30 Jesús gudxë' lë', rnnë':

—Le nácatë rea' li', la' dzö' nisö, si' cödxi'löba' böra le buropi luzuí, tsonna luzuí innó' biti' núnbë'u neda'.

31 Ní'irö Pedro buzötjë' Dios, rnnë':

—Sal-la' gátilentea' Li' tsözxön, biti' ca' innía' biti' núnbë'a Li'. Lësca' caní gula'nnë' yúgu'të'.

*Jesús rulidzë' Dios la' yëla Getsemaní**(Mt. 26:36-46; Lc. 22:39-46)*

32 Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

33 Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi ladxë'ë.

34 Gudxë' légaquië', rnnë':

—Huati caza' lu yöl-la' risëbi ladxi'. Guli'cöz ni, en guli'ná' yëla.

35 Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáquë'ë dza na'.

36 Ni' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca rë'ënda' neda', pero ca rë'ënu' Li', gunu'.

37 Ní'irö böajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtso' yëla lo' tu chí'ido'?

38 Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queëli' ricuídí'li'.

39 Ní'irö sa'yéajë' Jesús leyúbölö, rulidzë' Dios, en la' tuz ca gunné'.

40 Cate' böajë' leyúbölö ga na' nacu'ë, yöjxáquië' légaquië' tasië' tu' nadöditë yëla lógaquië'. Biti' nözguequinë' bizxi didza' ulu'bi'ë, le ilë' Lë'.

41 Cate' böajë' le bunni luzuí ga na' nacu'ë, rë' légaquië':

—¿Rásitsali'? ¿Ruzi'tsa ladxí'li'? ¡Tscá'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadóda' lu ná'agaca bönachi dul-la'!

42 ¡Guli'chasa, uyéajru'! ¡Buli'yútsöca', chizë'ë bönni' na' udödë' neda' lu ná'agaca bönachil!

*Ta'zönë' Jesús**(Mt. 26:47-56; Lc. 22:47-53; Jn. 18:2-11)*

43 Ni' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' guíë tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zëajni'inë' nasölla'gaquië' légaquië'.

44 Judas, bönni' na' rudödë' Jesús lu ná'agaquië' chinulu'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. ¡Guli'sönë', en guli'ché'ë! ¡Guli'yútsöquië'!

45 Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús.

46 Ní'irö gula'zönë' Jesús, en gula'chë'ë Lë' nadzunë'.

47 Ní'irö tuë' bönni' ni' dë'ë Jesús guléajë' guié tuchi', en benë'-bi' huë' bi'i huen dxin queë' bixúz lo. Guchúguië' guídi nágabi'.

48 Jesús gudxë' bönachi na', rnnë':

—¿Narúajtsali' nuá'ali' guié tuchi', en yaga para sönlí' neda', runlí' ca runlí' cate' rizönli'-në' gubán?

49 Yugu' dza guzóalena' libí'ili' rusédigacada' bönachi ga naca chila yudo', ate' biti' guzxönli' neda', pero raca caní para gaca le nazúaj lu guichi lá'ayi.

50 Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

Rixúnnajbi' tubi' bi'i ra'bán

51 Zóabi' ca' ni' tubi' bi'i ra'bán söjnobi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi'

52 pero busanbi' lari' na', en xiguídisöbi' buzxúnnajbi'.

Ridxinë' Jesús lógaquië' bönni' yúlahui' lo

(Mt. 26:57-68; Lc. 22:54-55, 63-71; Jn. 18:12-14, 19-24)

53 Gula'chë'ë Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi.

54 Pedro yöjnahuë' Jesús zi'tu' zí'tu'sö, en guyázië' lö'a lidxi bixúz lo na', en guró'ölenë' tsözxön yugu' ni'a në'ë bixúz lo na', rutsë'e cuinë' ra' guí.

55 Yugu' bixúz unná bë' len yúgu'të bönni' yúlahui' lo bulu'guiljë' tu le ulu'subáguië' Jesús para gaca íla'chúguië' queë' gátië' pero biti' bi bulu'dzölinë'.

56 Bönni' zían gula'nnë' queë' Jesús le cabí nácatë, pero biti' yöjłözagaca le gula'nnë' queë'.

57 Ní'irö gula'zuínë' yugu' bönni' gula'nnë' queë' Jesús le cabí nácatë, ta'nnë':

58 —Netu' biyönitu' didza' bë'ë bönni' ni, gunné': “Uquínnaja' yudo' ni, lë ni nequi lu ni'a lu na' bönachi, ate' tsonna dzasö uchisa' ia'tú le cabí nequi lu ni'a lu na' bönachi.”

59 Lësca' lë ni, biti' yöjłözagaca xtídza'gaquië'.

60 Ní'irö guyasë' bixúz lo na' gatsaj láhui'lö bönachi nacúa' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

61 Jesús, dxisö zoë'. Biti' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

62 Bubi'ë didza' Jesús, rnnë':

—Naca'. Il'é'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúxiba.

63 Ní'irö bixúz lo na', lu yöl-la' rilé queë' guchözë' lari' nácuë', rnnë':

—¿Núzxirö naquíniru' nu quixjö'?

64 ¿Riyön quézili' rucá'anë' Dios cá'asö len didza' ru'ë! ¿Nacxi rusáca'li' queëli'?

Yúgu'të' gula'chúguië' queë' gátie'.

65 Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Lë' zi', ta'nnë':

—Gunnë' yá'atsöca' nuzxi na' bë' Li'.

Yugu' bönni' ni'a në'ë bixúz lo gula'gápë'ë ru'ë Jesús.

Rnnë' Pedro biti' núnbë'ë Jesús

(Mt. 26:69-75; Lc. 22:56-62; Jn. 18:15-18, 25-29)

66 Cate' ni' zoë' Pedro lö'a zxan yu'u, bidxinbi' tubi' bi'i nigula huen dxin queë' bixúz lo na' ga na' zoë'.

67 Cate' bil'é'ebi' Pedro, rö'ë rutsë'e cuinë' ra' guí, buyubi' lë', rnnabi':

—Do'ö ca' li' Jesús, bönni' Nazaret na'.

68 Gudá'baguië' Pedro, rnnë':

—Biti' núnbë'a-në', en biti' nözda' bizxi na' rno'.

Burúajë' Pedro yöjsöë' ga nu riyaza lö'a. Ní'irö gurödxiba' böra.

69 Buyubi' lë' leyúbölö bi'i nigula huen dxin na', en gusí lobi' rëbi' nupa nacua' ni':

—Bönni' ni' dzáguië' légaquië'.

70 Leyúbölö gudá'baguië' Pedro. Ia'lati' gudzé nupa nacua' ni' tē Pedro, ta'nná:

—Le nácaté dzagu' légaquië', tu' nacu' bönni' Galilea. Yöl-la' ru'ísö quiu' didza' naca bë'u, tu' tuz ca ru'ili' didza'.

71 Gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' na' ru'ili' didza' ca naca queë'.

72 La' gurödxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': “Zi'alö cödxiba' böra le buropi luzuí, tsonna luzuí innó' biti' núnbë'u neda'.” Cate' yöjnenë' didza' ni, gusí lahuë' ribödxidë'ë.

15

Ridxinë' Jesús lahuë' Pilato, bönni' rinná bë'ë

(Mt. 27:1-2, 11-14; Lc. 23:1-5; Jn. 18:28-38)

¹ Ni' naca zílado', yugu' bixúz unná bē' len bönni' gula tu'zéajni'inē', en yugu' bönni' yudo' usedi, en yúgu'tē bönni' yúlahui' lo gulún xtídza'gaquiē'. Ní'irō gula'chē'ē Jesús náguē'ē, en bulu'dödē' Lē' lu nē'ē Pilato, bönni' rinná bē'ē uláz que yödž Roma.

² Pilato gunábinē' Jesús, rnnē':

—¿Naru' nacu' Li' Bönni' inná bé'enē' bönachi judío?

Bubi'ē didza' Jesús, rnnē':

—Ca nácatē rnno'.

³ Yugu' bixúz unná bē' bulu'zéguiē' Jesús didza' le zían.

⁴ Ní'irō Pilato gunábinē' Lē' leyúbölö, rnnē':

—¿Naru' cabí rubi'itso' didza'? Buzétsöca' nagu' cate' xö zían le ta'nnē' quiu'.

⁵ Biti' bi didza' bubí'ē Jesús. Ca' guca, bubáninē' Pilato.

Ta'chúquiē' queē' Jesús gátiē'

(Mt. 27:15-31; Lc. 23:13-25; Jn. 18:38-19:16)

⁶ Dē tu le runē' Pilato cate' raca laní na', rusanē' lu ná'agaca bönachi tu bönni' nadzunē' lidxi guíē, núti'tēs nu ta'naba.

⁷ Nadzunē' tu bönni' lē' Barrabás lidxi guíē, ate' dzágagaquiē' lē' ia'bal-lē' luzē'ē, yugu' bönni' gulútiē' bönachi cate' gula'dá'báguíē' yúlahui'.

⁸ Cate' bila'dxín bönachi zían ni', gula'sí lógaquiē' ta'nabē' lahuē' Pilato gunē' quégaquiē' ca run cazē'.

⁹ Bubi'ē didza' Pilato, rnnē':

—¿Rē'ēnili' usana'-nē' queēli' Bönni' Inná Bé'enē' Bönachi Judío?

¹⁰ Caní gunnē' Pilato tu' réquibe'enē' bulu'dödē' yugu' bixúz unná bē' Jesús lu nē'ē tu' tu'zxé'enē' Lē'.

¹¹ Yugu' bixúz unná bē' na' gula'gu'ē xilá ládxi'gaca bönachi zían na', para ila'nabē' lahuē' Pilato usanē' lu ná'agaquiē' Barrabás.

¹² Ní'irō Pilato gunábinē' légaquiē' leyúbölö, rnnē':

—¿Bizxi rē'ēnili' guna' queē' bönni' na' ruí'ili' lē', Bönni' Inná Bé'enē' Bönachi Judío?

¹³ Gulu'ē zidzaj didza', ta'nnē':

—¡Budē'ē lē'e yaga cruz!

¹⁴ Gunábinē' Pilato légaquiē', rnnē':

—¿Bizxi caz dö' nu'ē?

Leyúbölö tu'ē zidzaj didza', ta'nnē':

—¡Budē'ē lē'e yaga cruz!

¹⁵ Tu' gú'unnē' Pilato gunē' ga ila'yaza ládxi'gaca bönachi zían na', busanē' Barrabás lu ná'agaquiē'. Ní'irō gunná bé'enē' nu quin Jesús, ate' budödē' Lē' lu ná'agaquiē' bönni' ulu'dē'ē Lē' lē'e yaga cruz.

16 Ní'irō yugu' bōnni' rōjáquiē' gudil-la gula'chě'ē Jesús lō'a yúlahui', ate' bulu'tubē' luzá'agaquiē' ni'.

17 Bulu'gácuē' Jesús tu lari' xiná gul-la, en gulunē' tu bregui' ni'a nē'e yōtsi', le bulu'dxíē' icjē'.

18 Ní'irō gula'sí lógaquiē' tu'lidzē' Jesús, ta'nnē':

—¡Yöl-la' ba li', rinná bé'enu' bōnachi judío!

19 Gula'guínē' gui icjē', en bulu'chejē' Lē' zxōna'. Bulu'zóa zxíbigaquiē' lahuē', en lu yöl-la' rutitaj gulunē' Lē' bal.

20 Cate' budxi bulu'titjē' Lē', bulu'güē' lari' xiná chul-la na' nácuē' ate' bulu'gácuē' Lē' lari' que cazē'. Ní'irō gula'chě'ē Lē' ní'lō yúlahui' na' para tsōjda'gaquiē' Lē' lē'e yaga cruz.

Tu'dě'ē Jesús lē'e yaga cruz

(Mt. 27:32-44; Lc. 23:26-43; Jn. 19:17-27)

21 Gulunē' ga bi'ē tu bōnni' Cirene yaga cruz queē' Jesús, ridōdisē' ni' suzē'ē la' guixi'. Lē' Simón, xúzgacabi' Alejandro, en Rufo.

22 Gula'chě'ē Jesús lataj na' nazí'i le Gólgota, tu didza' hebreo le rna lu didza' xidza', Lataj Que Bōga' Ícjaru'.

23 Gulu'ē le guí'jē' Jesús xisi uva nutsi' nōri silá' que yaga mirra, pero Lē' biti' gu'ē le.

24 Ní'irō bulu'dě'ē Jesús lē'e yaga cruz, ate' gula'guisiē' lari' nácuē', le gula'zí' que queēgaquiē' bōnni' na' rōjáquiē' gudil-la. Bulu'béajē' le gaca bē' para ila'nōzinē' bízxilō idela' que queēgaquiē'.

25 Naca idú xsila cate' bulu'dě'ē Lē' lē'e yaga cruz.

26 Didza' na' bulu'zōē' lē'e yaga cruz ícjälē' Jesús ca naca le tu'quíē' Lē' rna caní: “Bōnni' Rinná Bé'enē' Bōnachi Judío.”

27 Bulu'dá'lenē' Jesús tsōzxōn lē'egaca yaga cruz chopē' gubán, tuē' cuita lē'ē ibēla, en ia'tuē' cuita lē'ē yōgōla.

28 Caní guca lē' na' nazúaj lu guichi lá'ayi, rna: Gubábalenē' bōnni' tuá' dō'.

29 Yugu' bōnni' ta'dōdē' ni' tu'lidza zi'ē Jesús, en tu'tá ícjaquiē', ta'nnē':

—¡Ōn! ¿Naru' uquínnajtso' yudo' queē' Dios, ate' tsonna dzasō uchísatsu' le?

30 ¡Busölá cuinu' na'a, en bōtaj lē'e yaga cruz na'!

31 Lē'sca' caní yugu' bixúz unná bē', en yugu' bōnni' yudo' usedi tu'titjē' Lē'. Tē' luzá'agaquiē' tuē' ia'tuē':

—Bōnachi yúbölō busölē', pero biti' gaca usölá cuinē'.

32 Ta'nnē' ca':

—¡Ōn! ¿Nácatsu' Cristo, Bōnni' Inná Bé'enē' Bōnachi Israel? ¡Bōtjatsōca' na'a lē'e yaga cruz para ilé'etu', ate' tséajlē'etu' Li'!

Yugu' bōnni' na' dá'gaquiē' tsōzxōn len Lē' lē'egaca yaga cruz bulu'lidza zi'ē ca' Lē'.

*Le guca cate' gútië' Jesús**(Mt. 27:45-56; Lc. 23:44-49; Jn. 19:28-30)*

33 Cate' bidxín idú huagubidza, guchul-la idútë yödzölió. Guca caní ga bidxintë idú ridödi xihuö.

34 Idú ridödi xihuö na' bë'ë Jesús zidzaj didza', rnnë':

—Eloi, Eloi, ¿lama sabactani?

Didza' hebreo ni rnna lu didza' xidza': Dios quia', Dios quia', ¿bizx que nubéaj ládXu'u neda'?

35 Yugu' bönni' nacu'ë ni' bila'yönnë' didza' ni, ate' ta'nnë':

—Buli'zëtsöca' nágali'. Elías rulidzë'.

36 Ní'irö guxiti'ë tu bönni' nútsë'ë ládjagaquië', en buxúpinë' nupi zi tu le bululu rë'aj nisa. Budë'ë le lahui gui, en bë'ë le xupë' Jesús, rnnë':

—Cöztsöca'ru', uyuru' channö huidë' Elías uzötjë' Lë'.

37 Gurödxí'ë zidzaj Jesús, en la' gútitë'.

38 Biröza' lari' yödx nala' lu yudo'. Birúaj choplö, gudela' icjlö, en birúajtë zxánilö.

39 Bönni' na' rinná bé'enë' bönni' röjáquië' gudil-la zuínë' lahuë' Jesús, en bilé'enë' ca na' guca gurödxí'ë Jesús, en la' gútitë', ate' gunnë':

—Le nácatë bönni' ni gúquië' Zxí'inë' Dios.

40 Nacuá'anu ca' ni' nigula, zí'tu'sö tu'yunu. Nútsa'gacanu ládjagacanu María Magdalena, en Salomé, en María, xiná'agacabi' Jacobo cuidi', en José.

41 Nigula ni yöjácalennu Jesús cate' ni' gudë' luyú Galilea, en gulácalennu Lë', gula'gú'unu le gulahuë'. Nacuá'anu ca' ni' ia'bál-lanu nigula zían gula'zá'lennu Lë' lu yödzö Jerusalén.

*Ta'gu'ë Jesús yeru ba**(Mt. 27:57-61; Lc. 23:50-56; Jn. 19:38-42)*

42 Chizá' ral-la, en naca dza tu'pë'ë, dza si' idxín dza lá'ayi quégaquië' bönni' judío.

43 Que lë ni na' bidë' José, bönni' yödzö Arimatea, bönni' lo ládjagaquië' bönni' yúlahui' lo. Ribözë' ca' dza idinná bë'ë Dios. Idú ládXë'ë guyázië' ga na' zoë' Pilato, en gunábinë' lë' gu'ë lë' lataj u'ë Jesús.

44 Bubáninë' Pilato tu' gunnë' chigútië' Jesús, ate' bulidzë' bönni' na' rinná bé'enë' bönni' röjáquië' gudil-la para inábinë' lë' channö chinátië' Jesús.

45 Cate' biyönnë' ca na' gunnë' bönni' na' rinná bé'enë' bönni' röjáquië' gudil-la, bë'ë José lataj u'ë Jesús.

46 Ní'irö José na' gú'uë' tu lari' xtila dxí'ado', ate' buzötjë' Jesús lë'e yaga cruz, en buchölinë' Lë' lari' na'. Ní'irö gulu'ë Lë' yeru ba nadaj lë'e gu'a guiöj. Budë'ë tu guiöj blaga zxon ga nu riyaza ba na'.

⁴⁷ María Magdalena, en María, xinë'ë José tu'yunu ga na' ta'gu'ë Jesús.

16

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

¹ Cate' chinadödi dza lá'ayi quégaca bönachi judío le naca dza gadxi, María Magdalena, en Salomé, en María, xinë'ë Jacobo, ta'z'ínu yugu' le rilá' zxixi para tsöjlú'ugacanu Jesús.

² Ni' naca zílado' dza risí lo, yójácanu ra' yeru ba queë'. Bila'dxinnu ni' cate' si' gulén gubidza.

³ Gula'nábinu luzá'agacanu:

—¿Nuzxi cúatsö queëru' guiöj na' da' ga nu riyaza ba queë'?

⁴ Cate' bila'dxinnu ni', bulu'yunu, en bila'lé'enu chinadúa guiöj na', ate' guiöj zxön naca.

⁵ Gula'yú'unu yeru ba lë'e guí'a guiöj na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queë' Dios. Rő'öbi' tsölá'a ibëla lu yeru ba na', nácubi' lari' tunna chiguíchido'os. Guládxide'enu.

⁶ Ní'irö bi'i na' gúdxibi' légaicanu, rnnabi':

—Bíti'rö gádxili'. Ruguílajli' Jesús, Bönni' Nazaret, Bönni' na' gudë'ë lë'e yaga cruz. Chibubanë'. Biti' zoë' ni. Buli'yú ga ni gula'gu'ë Lë'.

⁷ Guli'tséaj na'a, guli'tsöjtíxjöi'i ca' yugu' bönni' usëda queë', enca' Pedro. Guiéli' légaquië': "Tsejë' Jesús luyú Galilea zí'alö ca libí'ili'. Ni' ulé'eli'-në' ca na' chigudxi cazë' libí'ili'."

⁸ Ní'irö bulu'rúajnu ni', bulu'zxúnnajnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'i lahuë' Jesús lonu María Magdalena

(Jn. 20:11-18)

⁹ Cate' bubanë' Jesús zílado' dza na', buluí'i lahuë' zí'alö lonu María Magdalena, nigula na' bubéajë' gadxi bö' xihui' gula'yú'u lënu.

¹⁰ Guyéajnu yöjtíxjöi'ínu nupa na' gula'dalen Jesús. Nupa ni ta'sëbi ládxi'gaca, en ta'bödxí yechi'.

¹¹ Cate' bila'yöni didza' ru'ínu, zoë' nabanë' Jesús, ate' bilé'e quézinu Lë', biti' gula'yéajlë' lënu.

Chopë' bönni' usëda queë' Jesús tu'lé'enë' Lë'

(Lc. 24:13-35)

¹² Gudödi na', nadzá'alö buluí'i lahuë' Jesús lógaquië' chopë' bönni' usëda queë' yú'ugaquië' nōza, sōjāquië' ga naca ladaj guixi'.

13 Ní'irö bulu'dxinë', dutí'xjöi'iguequinë' ia'zíca'rë', ate' ni xtídza'gaquië' bití' gula'yéajlë'ë.

Le rigu'ë Jesús lu ná'agaquië' bönni' gubáz queë'
(Mt. 28:16-20; Lc. 24:36-49; Jn. 20:19-23)

14 Ga yöjsetë, bulu'i lahuë' Jesús lógaquië' idxinéajtë' tsanni ni' ta'bö'ë tahuë', ate' gudil-lë' légaquië' didza' tu' cabí ta'yéajlë'ë Lë', en tu' naca zidi icja ládxi'do'gaquië', tu' cabí gula'yéajlë'ë xtídza'gaca nupa na' bila'lé'e Lë' nubanë'.

15 Ní'irö gudxë' légaquië', rnnë':

—Guli'tséaj idútë yödzölió tsöjenli' libán que didza' dxi'a lógaca yúgu'të bönachi.

16 Nu tséajlë' neda', en idila nisa, ulá nu na', pero nu bití' tséajlë', irugu que gati nu na'.

17 Le ilaca bë' ni ilunë' bönni' ila'yéajlë'ë neda'. Ulu'gunë' dxin La' neda', en ulu'béajë' yugu' bö' xihui' yú'ugaca bönachi, en ilu'ë didza' izá'a.

18 Channö ila'zönë'-ba' bëla sínia' lu ná'agaquië', o channö ile'jë' le nachë' yöl-la' guti, bití' bi gun quégaquië'. Ila'xóa në'ë nupa te'e, ate' ulu'huöacatë.

Ruhuëpë' Jesús yehua' yubá
(Lc. 24:50-53; Hc. 1:6-11)

19 Cate' Xanru' budxi bë'lenë' légaquië' didza' ni, buchisë' Dios Lë' yehua' yubá ga ni' gurö'ë cuitë' ibëla Lë'.

20 Bila'rúajë' légaquië', yöjéngaquië' libán yúgu'të yödzö. Gúcalenë' Xanru' légaquië', en benë' ga gulunë' le náagaca bë' naca idútë li didza' tu'ë. Ca' naca.

DIDZA' DXI'A BUZÚAJË' LUCAS

Didza' rigu'ë Lucas lu në'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru',

² ca na' bila'lé'e nupa ni' dza ni'te, ate' bulu'lu'i rë'u, en bulu'zë didza' que.

³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te.

⁴ Ruzúaja' quiu' lu guichi ni para inözinu' naca idútë li lë na' chinazëdu'.

Rulu'inë' gubáz lá'ayi queë' Dios ca si' gálajbi' Juan, bönni' uquilë' bönachi nisa

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' xzí'ini xi'sóë' Aarón, bönni' gúquië' bixúz lo dza ni'te.

⁶ Nácaqaquië' Zacarías, en Elisabet tsahui' lahuë' Dios, ate' idú ládxi'gaquië' tunë' ca rnna xtídzë'ë Dios, en le rinná bë' xibá queë'. Caní guca, cunt nu guca bi innë quégaquië'.

⁷ Cuntu nu zoa bi'i quégaquië', tu' nácanu Elisabet nigula huödx, ate' chinagúlagaquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'.

⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios.

¹⁰ Tsanni ni' ruzégui'ë Zacarías na' yalaj, gula'cuá' yúgu'të bönachi ní'ilö, tu'lidza Dios.

¹¹ La' ná'asö bulu'i lahuë' gubáz lá'ayi queë' Xanru' ga zoë' Zacarías na'. Zuínë' gubáz na' tsölá'a ibëla bucugu lá'ayi ga na' régui yalaj.

¹² Cate' bilé'enë' Zacarías gubáz lá'ayi na', gurö'ë böniga, en gudxi bidzöbinë'.

¹³ Ní'irö gubáz lá'ayi na' gudxë' lë', gunné':

—Zacarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan.

¹⁴ Gata' quiu' le uzi'u xibé, en udzëjanu', ate' zián nupa ulu'dzeja ládxi'gaca cate' gálajbi' bí'ido' na',

15 tu' gácatëbi' zxön lahuë' Dios. Biti' gu'ajbi' xisi uva, en calëga tu le rusudxi bönachi, ate' sóalenë'-bi' Dios Bõ' Lá'ayi cate' isí lo si' gálajbi'.

16 Gunë' Juan ni ga ulu'huöaca zián bönachi Israel queë' Xanru'.

17 Inöruë' lë' ca Xanru', ate' ila'cuá'alen lë' Bõ' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len zxí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu né'eguequi Xanru'.

18 Zacarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

19 Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ilená' li' didza', en usiyönda' li' didza' dxi'a ni.

20 Na'a, tu' cabí guyéajlë'u xtídza'a, icödzu', en bítirö gaca innó' cate' gácarö lë ni. Yúgu'të lë ni udxín cate' idxín dza que.

21 Tsanni ni' raca lë ni, nacuá' bönachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi.

22 Cate' burúajë' Zacarías, bití' guca gü'ilenë' légaquië' didza', ate' guléquibe'enë' bilé'enë' tu le buluí'inë' Dios lë' lu lataj lá'ayi. Bulá'a buluí'isë' Zacarías, buzéajni'inë' légaquië', tu' cabí raca innë'.

23 Cate' bizá'a yugu' dza na' ral-la' gunë' dxin Zacarías lahuë' Dios, ní'irö böajë' lidxë'.

24 Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lidxigaquië'. Guzá' ládxi'nu, rnnanu:

25 “Caní runë' Xanru' quia'. Ruzá' ládxi'ë quia' bí'ido', en runë' ga bítirö utuí'ida' lógaca bönachi.”

Rigúxjö'ë gubáz lá'ayi ca si' gálajbi' Jesús

26 Cate' chiguca xopa beo', buluí' lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzo luyú Galilea.

27 Dios gusöl-lë'ë lë' ni' tsöjyúë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'alënbí-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te.

28 Cate' guyázië' Gabriel na' ga zóabi' María, gudxë'-bi':

—Padiux. Dios ruzá' ládxi'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

29 Cate' bilé'ebi' María gubáz lá'ayi na', gurö'öbi' böniga tu' nözi didza' na' bë'ë, en rubani ládxi'bi' nacxi sa'yéaj didza' na' bulidzë'-bi' gubáz lá'ayi na'.

30 Ní'irö gubáz lá'ayi na' gudxë'-bi', rnnë':

—María, bitì' gádxinu', tu' chibidéli'nu' le ruzá' ládxë'ë Dios quiu'.

31 Na'a, tsú'ubi' tubi' bí'ido' lë'u, ate' uzú'-bi' tubi' bi'i bönni'do', ate' gu'u labi' Jesús.

32 Jesús ni tsépisëtërë', en si' Lë' Zxí'inë' Dios, Nu nayépisëtërö. Xanru' Dios gunë' ga inná bë'ë ca na' gunná bë'ë David, xuz gula gudödi queë'.

33 Jesús na' inná bé'etica'sinë' bönachi Israel, ate' le inná bë'ë Lë' catu caz tödi que.

34 Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

35 Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayépisëtërö, sóalen li', le gaca ca tu zzul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios.

36 Cá'anqueze Elisabet, nigula di'a dza quiu', chinuá'anubi' lë'ënu tubi' bi'i bönni'do' sal-la' chinagúlanu. Gula'nnë' queënu: “Nácanu nigula huödx”, pero chizéaj xopa beo' nuá'anubi' lë'ënu bí'ido' na'.

37 Biti' bi zoa le cabí séqui'në' Dios.

38 Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

María söjyubi'-nu Elisabet

39 La' dza ní'isö guyú'ubi' nöza María, ate' carelö sa'yéajbi' ga naca gui'ado', en bidxinbi' tu yödzo luyú Judea.

40 Ni' guyázabi' lidxë' Zacarías, en gúdxibi'-nu Elisabet:

—Padiux.

41 Cate' biyöninu Elisabet didza' na' bë'ëbi' María, la' butátë cuinbi' bi'i huë'ënido' na' yú'ubi' lë'ënu, ate' bidisóalenë'-nu Dios Bö' Lá'ayi.

42 Ní'irö bë'ënu Elizabet zidzaj didza', rnnanu:

—¿Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bí'ido' na' yú'ubi' lë'u!

43 ¿Núzxitë neda', zá'anu xinë'ë Xana' quia'?

44 Cate' biyönda' didza' bë'u, bulidzu' neda', lu yöl-la' rudzeja queëbi' la' butátë cuinbi' bi'i huë'ënido' ni yú'ubi' lë'a.

45 ¿Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

46 Ní'irö gunabi' María:

¡Idütë le naca' rigú'u Xanru' yöl-la' ba,

47 en rudzeja ládxilena'-në' Dios, Nu rusölá neda'!

48 ¡Dios caz buzá' ládxe'ë quia' neda'!
 Yu'a lu në'ë, en tsaz naca' huen dxin queë'.

Na'a isí lo, ca naca quia' ila'nná:

Bica' ba nigula na'.

49 ¡Zxöntërö naca le benë' Dios unná bë' quia'!

¡Lá'ayi naca Lë'!

50 Lë' ruhuéchi' ládxi'tica'së' bönachi tadxi Lë'
 na'a dza, en dza zá'gaca.

51 Yugu' yöl-la' huáca zxön chibenë' Lë'.

Buzötjë' nupa gulún zxön yöl-la' réajni'i quéguequi.

52 Bugúë' yöl-la' unná bë' quégaca nupa gulaca lo,
 en benë' ga gulaca lo nupa gulaca nõxaj ladxi'.

53 Benë' ga bulu'huólaj bulu'dzë'e nupa gula'dún,
 en bucá'anë' cá'asö nupa bila'lé'e yöl-la' tsahui'.

54 Gúcalenë' bönachi Israel, nupa na' tun xichinë',
 tu' yöjnenë' légaquië', en buéchi' ládxe'ë légaquië'.

55 Benë' ca guzxí' lu në'ë gunë' quégaquië' xuz xtó'oru'
 enca' queë' Abraham, en quégaca di'a dza queë'.

56 María bugá'analenbi'-nu Elisabet idú ca tsonna beo', ate'
 gudödi ni' böajbi' lídxibi'.

Le guca cate' gúlajbe' Juan, bönni' uquilë' bönachi nisa

57 Cate' bidxín dza ral-la' sóabi' bí'ido' queënu Elisabet,
 buzóanu-bi' tubi' bi'i bönni'do'.

58 Bila'yöni dzaga yu'u queënu, en yugu' di'a dza queënu ca
 na' guca, buéchi' ládxe'ë-nu Dios, ate' bulu'dzëjalen lënu.

59 Cate' chiguca xunu' dza zóabi' bí'ido' na', bila'dxinë' di'a
 dza queënu para ila'chúguië' lu xipéla'bi' bi'i bönni'do' na' lë
 na' gaca bë' néquibi' queë' Dios, ate' t'é'ennë' ilu'ë labi' Zacarías
 ca na' lë' xúzibi'.

60 Ní'irö bubí'inu didza' Elisabet, xiná'abi', rnnanu:

—Calëga. Juan si' labi'.

61 Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

62 Ní'irö bulu'lá' bulu'lu'isinë', gula'nábinë' xúzibi' nacxi
 rë'ëne' gu'ë labi'.

63 Zacarías na' gunabë' tu blágado', ate' buzúajë' lahui caní:
 Juan lëbi'. Bulu'bábinë' yúgu'të'.

64 La' ní'isö böáljatë ru'ë Zacarías na', en buguítjatë lúdxë'ë,
 ate' bë'ë didza' le gulu'ë Dios yöl-la' ba.

65 Ní'irö guládxinë', en bulu'bábinë' yúgu'të dzaga yu'u
 quégaquië', ate' yúgu'të yödzödo' nacuá' lu gui'ado' luyú Judea,
 guzë didza' ca guca lë ni.

66 Gula'zá' ládxi'gaca yúgu'të nupa bila'yöni ca na' guca,
 ta'nná: “¿Nacxi caz gácabi' bi'i bönni'do' ni? Le nácatë Xanru'
 zóalenë'-bi'.”

Didza' bē'ē Zacarías uláz queē' Dios

67 Ní'irō Dios Bō' Lá'ayi bidisóalenē' Zacarías, xúzibi' Juan, atē' bē'ē didza' uláz queē' Dios, rnnē':

68 ꞓŷöl-la' ba Dios, Xángaca bōnachi Israel tu' buduyüē' rē'u, bōnachi queē', en böá'uē' rē'u!

69 ꞓGusöl-lē'ē queēru' Bōnni' usölē' rē'u,

len yöl-la' huáca zxōn queē'!

Bōnni' ni guljē' ládajgaca di'a dza queē' David, huen dxin queē' Dios.

70 ꞓDza ni'te guzxí' lu nē'ē gunē' ga gaca caní!

Raca ca na' gunnē' lu ruá'agaquiē' bōnni' gulu'ē didza' uláz queē'.

71 Guzxí' lu nē'ē usölē' rē'u

lu ná'agaca nupa tequi rē'u zi',

enca' lu ná'agaca nupa biti' ta'lé'e rē'u dxi'a.

72 Guzxí' lu nē'ē huéchi' ládxe'ē xuz gudōdi queēru',

en tsōjnenē' le guzxí' lu nē'ē le naca lá'ayi.

73 Lē ni benē' tsutsu xtídzē'ē, en guzxí' lu nē'ē,

le gunē' queē' Abraham, xuz gudōdi queēru',

le naca tu le ral-la' gunē' queēru' rē'u.

74 Guzxí' lu nē'ē usölē' rē'u

lu ná'agaca nupa biti' ta'lé'e rē'u dxi'a

para cabirō gádxiru' gunru' xichinē' Lē',

75 en para gácaru' ba'a ladxi', en idú dxi'a

lahuē' Lē' yúgu'tē dza sóaru' ibanru'.

76 Li', xzí'ina'do', si' lo' bōnni' ru'ē didza' uláz queē' Dios unná bē'

tu' tsōjnōru' ca Xanru' caz, en upó'o nōza ga tōdē'.

77 Gunu' ga ila'nōzi bōnachi queē' ca gaca ulu'lágaca,

en ca na' uniti lahuē' Dios dul-la' nabága'gaca.

78 Caní gaca, tu' ruhuéchi'da' ládxe'ē Dios rē'u,

en runē' ga tsení' queēru' Bōnni' na' náquiē' bení' idú.

79 Lē' uzení'ē quégaca nupa nacuá' gapa naca chul-la,

en gapa nacuá' nupa chizóa ilátigaca

para ugú'ē rē'u nōza ga cō'ō dxi ládxi'do'oru'.

80 Guzxōnbi' bi'i bōnni'do' na', en bidipa ládxi'bi'. Guzóasibi' gapa naca lu lataj cá'asō cate' bidxinrō dza buluf'i lobi' lógaca bōnachi Israel.

2

Le guca cate' gúlajbi' Jesús

(Mt. 1:18-25)

1 Lu dza na' gunná bē'ē Augusto César, bōnni' Roma, ila'yaza lu guichi yúgu'tē bōnachi nacuá' yōdzölió.

2 Cate' gusí lo ta'yaza lu guichi caní, rinná bē'ē bōnni' lē' Cirenio luyú Siria.

³ Yúgu'të bönachi yójaca yödzö que queéguequi ga na' zeaj nababa para ila'yaza lu guichi.

⁴ Guz'ë José yödzö Nazaret luyú Galilea, sa'yéajë' luyú Judea, en bidxinë' yödzö Belén, ga ni' guljë' David, tu' guljë' José ládagaca di'a dza queë' David na'.

⁵ Guyijë' José ni' para tsázië' lu guichi, ate' dzágabi'-në' María, bi'i nigula nazí' lu ná'abi' utsaga ná'aleni' lë', en chizóa sóabi' bí'ido' queëbi'.

⁶ Cate' ni' nacu'ë lu yödzö Belén, bidxín dza sóabi' bí'ido' queëbi'.

⁷ Buzóanu-bi' tubi' bi'i bönni'do', bi'i huáca queënu. Buchölinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba' böa' quégaca bönachi yú'ugaca nöza. Caní guca, tu' cabí bidzöli lataj ila'cu'ë lu yu'u ga ni' ta'dxín bönachi yú'ugaca nöza.

Tu'lu'i lahuë' gubáz lá'ayi queë' Dios ga nacu'ë bönni' tu'yúé'-ba' bö'cu' zxila'

⁸ Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa chí'igaquië'-ba' chi'i dzö'ölö.

⁹ La' bulu'itë lahuë' gubáz lá'ayi queë' Xanru' ga na' nacu'ë. Yöl-la' beni' queë' Xanru' buzení' ga na' nacu'ë, ate' guládxinë'.

¹⁰ Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzëjade'eli', le ulu'zí' ca' xibé yúgu'të bönachi.

¹¹ Na'a chigúlajbi' lu ladzë' David Nu usöla' libí'ili'. Nu ni naca Cristo, Xanru'.

¹² Lë ni gaca bé'ëbi'. Udzölili'-bi' Bí'ido' na', narölibi' yugu' lári'do', en dëbi' tu lu yú'udo' ga tun chi'i le táguba' böa' quégaca bönachi yú'ugaca nöza.

¹³ Ga na' zoë' gubáz lá'ayi na', tsárido'os bulu'lu'i lógaquië' zianrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

¹⁴ ¡Yöl-la' ba Dios zoë' xitsá',
ate' luyú gaca le cuéqui dxi ládxi'do'gaquië'
bönni' raza ládxë'ë Dios légaquië'!

¹⁵ Cate' bulu'zë'ë gubáz lá'ayi na' ga ni' nacu'ë, söjhuöjgaquië' yehua' yubá, ní'irö gulë luzë'ë tuë' ia'tué' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

¹⁶ La' yójacatië', ate' yöjxáca'gaquië' María len José, enca' bí'ido' na', dëbi' tu lu yú'udo' ga tun chi'i le táguba' böa' quégaca bönachi yú'ugaca nöza.

¹⁷ Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'.

18 Bulu'bani yúgu'të nupa bila'yöni didza' gulu'ë bönni' tu'yúe' bö'cu' zxila' na'.

19 María gulu'usö icja náganu didza' ni, ate' guzá' ládxi'nu ca naca que.

20 Söjhuöjgaquië' bönni' na' tu'yúe'-ba' bö'cu' zxila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

21 Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

22 Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzö Jerusalén para ila'gu'ë-bi' lu në'ë Xanru' Dios.

23 Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios."

24 Que lë ni na' yöjáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

25 Dza ní'sö zoë' tu bönni' lë' Simeón lu yödzö Jerusalén. Bönni' ni náquië' tsahui', en reaj ládxe'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na',

26 en chibulu'ínë' lë' biti' gátië' cate' ilé'erönë' Cristo, Bönni' na' isöl-lë'ë Xanru' Dios.

27 Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca rinná bë' xibá na',

28 ní'irö bunidë'-bi' Simeón na', en guyéaj ládxe'ë Dios, rnnë':

29 Xana', na'a huáca gunnu' neda' lataj gátia', soa dxi ládxa'a tu' chiguca le gudxu' neda', huen dxin quiu'.

30 Chibilé'eda' Nu na' buzóa cazu', Nu usölá bönachi,

31 Nu na' ulú'u lahui lógaca yúgu'të bönachi.

32 Lëbi' nácabi' bení' le uzení' bönachi izá'a, en nácabi' ca' bení' quégaca bönachi Israel quiu'.

33 Bulu'báninë' José, en María, xiná'abi' bí'ido' Jesús, ca naca lë na' gunné' Simeón ca naca queëbi' Jesús.

34 Simeón na' gunábinë' Dios gunë' ga gaca dxi'a quégaquië', ate' gudxe'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zían, ate' ulu'huöása bönachi zían ladaj bönachi Israel. Gácabi' tu le naca bë', ate' ila'nnë' bönachi queëbi'.

³⁵ Gaca caní para ila'lá' lahui le ta'zá' láchxi'gaca bönachi zían. Yugu' lë ni ilaca quiu' ca tu guíë tuchi' le tsaza láchxi'do'o.

³⁶ Ana, nigula ru'ínu didza' uláz queë' Dios, zóanu ca' ni'. Nácanu zxi'ínë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando',

³⁷ ate' bugá'ananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Réla, en te dza reaj láchxi'nu-në' Dios, runnu gubasa, en rulídzanu-në' Dios.

³⁸ La' ná'asö bidxintënu ni', rënu-në' Dios: "Xclenu'." Gudíxjöi'ínu yúgu'të bönachi ca naca queëbi' bí'ido' Jesús, bönachi na' nacué' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Söjhuöjgaquië' José, en María yödzo Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yöjhuöjgaquië' ládzagaquië' Nazaret luyú Galilea.

⁴⁰ Guzxönbi' bí'ido' Jesús, en bidipa láchxi'bi'. Guta' queëbi' yöl-la' réajni'i, ate' zxon naca le ruzá' láchxë'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto.

⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'.

⁴³ Cate' gudödi laní, söjhuöjgaquië', ate' bugá'anabi' bí'ido' Jesús Jerusalén, pero bití' téquibe'enë' José, en María, xiná'abi' Jesús.

⁴⁴ Tu' téquinë' nútsa'bi' ladaj bönachi zían yú'ulengaca légaquië' nöza, tu dza nayá' gula'zé'ë. Ní'irö cate' bulu'guiljë'-bi' gapa nacué' di'a dza quégaquië', en gapa nacué' nupa núnbë'gaquië'

⁴⁵ bití' bulu'dzölinë'-bi'. Que lë ni na' yöjhuöjgaquië' Jerusalén, söjdíljagaquië'-bi'.

⁴⁶ Cate' chiguca dza bunny, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzë nágabi' didza' tu'ë, en rinaba yúdxibi' légaquië'.

⁴⁷ Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'.

⁴⁸ Cate' bila'lë'enë'-bi' xuz xiná'abi', bulu'bánninë', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queëtu? Buyútsöca', len yöl-la' ruubi ruguí' neda', en xuzu' buguúljatú' lí'.

⁴⁹ Ní'irö gúdxibi' Jesús légaquië', rnnabi':

—¿Bizz que buguúljali' neda'? ¿Naru' cabí nõzili' run bayudxi guna' xichinë' Xuza'?

⁵⁰ Biti' gula'yéajni'inë' xuz xiná'abi' didza' na' gúdxibi' légaquië'.

⁵¹ Jesús böajlenbi' légaquië', budxinbi' Nazaret, ate' benbi' ca rnaa xtídza'gaquië' xuz xiná'abi'. María, xiná'abi' Jesús, gulú'usönu icja ládxi'do' onu yúgu'të læ ni.

⁵² Ráta'rö yöl-la' réajni'i queëbi' bi'i Jesús, en rizxönbí'. Burúajbi' dxi'a lahuë' Díos, en lógaca bönachi.

3

Libán runë' Juan, bönni' ruquilë' bönachi nisa
(Mt. 3:1-12; Mr. 1:1-8; Jn. 1:19-28)

¹ Cate' chiguca chinu iz rinná bé'enë' Tiberio César idútë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, böchë'ë Herodes na', rinná bë'ë luyú Iturea, en luyú Traconite, ate' Lisantias rinná bë'ë luyú Abilinia.

² Yugu' dza na' nácagaquië' bixúz lo Anás, en Caifás, ate' la' ná'asö Díos bë'lenë' Juan, xzi'inë' Zacarías, didza' cate' ni' zoë' Juan lu lataj cá'asö.

³ Ridë' Juan ni yúgu'të lataj nacua' ra' yegu Jordán, runë' libán ca ral-la' ila'dila nisa nupa tu'bí'i ládxi'gaca para uniti lahuë' Díos dul-la' nabága'gaca.

⁴ Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queë' Díos, rnaa:
Riyön chi'ë bönni' rulidzë' lu lataj cá'asö, rnnë':
“Buli'pá'a nõza lu icja ládxi'do'oli' para idxín Xanru' queëli'.
Buli'béaj li yugu' nõza lasi ga tödë'.

⁵ Ral-la' ulígaca yúgu'të gapa naca röga',
en ulu'huóaca lachi' yúgu'të guí'a sibi, en guí'ado'.
Ral-la' ulu'rúaj li nõza nayecja nabí'igaca,
ate' ulu'huóaca dxi'a nõza guiöj.

⁶ Ila'lé'eni yúgu'të bönachi Bönni' na' isöl-lë'ë Díos,
Nu usöla bönachi.”

⁷ Cate' bila'rúaj bönachi zían para ila'dila nisa lu në'ë Juan, læ' gudxë' légaquië':

—Libi'ili', di'a dza quégacaba' bëla sínia'. ¿Zoa nu bulú'i libí'ili' ral-la' izxúnajli' yöl-la' rusiúdxí si' gaca quégaca bönachi?

⁸ Na'a, guli'gún le ilaca bë' chibubí'i ládxi'li', en bití' sa' ládxi'li', bití' innali': “Nácatu' tsahui' tu' nácatu' di'a dza queë' Abraham”, tu' rea' libí'ili', huáca quelë'ë Díos yugu' guiöj ni, en gunë' ga ulu'huóaca di'a dza queë' Abraham.

⁹ Nácali' ca yugu' yaga. Chizóa riböza guié huága para ichugu yugu' yaga. Yúgu'të yaga biti' ta'bía le naca dxi'a, ila'chúguie' yaga na', en ila'gu'ë léguequi lu guí'.

¹⁰ Ní'irö bönachi nacua' ni' gula'nabi lë', ta'nná:

—¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopa cö' zxe ral-la' unödzej que nu biti' dë que, ate' nu dë le gagu, lësca' caní ral-la' quisi quégaca nupa biti' dë le ilágugaca.

¹² Bal-lë' bönni' tu'quixjë' lázagaca bönachi uláz que yödzö zi'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

¹³ Juan gudxë' légaquië':

—Biti' uquixjaröli' tsca le chigunnë' bönni' yú'uli' lu në'ë.

¹⁴ Bal-lë' bönni' röjáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guixxaj libí'ili', pero guli'tsaza ládxi'li' tsca rázxxali'.

¹⁵ Ta'zá' ládxi'gaca bönachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo.

¹⁶ Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'isö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudë'ë ni'e.

¹⁷ Zönë' lu në'ë böcö' queë', ate' ulubë' ga rilubi zxoá' xtila queë', lë ni rulu'i le gaca quégaca bönachi. Utubë' zxoá' xtila, en cu'ë le xilataj, pero bëbu que uzégui'ë lu guí' le catu caz ulu.

¹⁸ Ca náragaca didza' ni, en ia'zica'rö zían didza' le guchízië' icja náragaca bönachi, benë' libán Juan lógaquië' que didza' dxi'a.

¹⁹ Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö'.

²⁰ Ní'irö benë' Herodes tu le nácarö huiá' dö', gulu'ë Juan na' lidxi guié.

Ridíle' Jesús nisa

(Mt. 3:13-17; Mr. 1:9-11)

²¹ Dza na' cate' cabí nadzunë' Juan lidxi guié, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba,

²² ate' bötjè' Dios Bö' Lá'ayi, bidxinè' ga na' zoè' Jesús. Buluí'i lahuè', rinè'è ca riná' tuba' gu'dodo', ate' biyõn chi'i Nu ruí'i didza' yehua' yubá, rnna:

—Li' nacu' Zxí'ina'. Nadxí'ida' Li', en raza ládxa'a Li'.

Yugu' xuz xinè'e gudödi queè' Jesús

(Mt. 1:1-17)

²³ Cate' gusí lahuè' runè' xichinè' Jesús, yu'è ca chi uruá' iz. Téquiquequi bõnachi náquiè' zxí'inè' José. Jesús náquiè' zxí'ini xi'sóé' Elí,

nu na' náquiè' xúzinu María, nigula queè' José na'.

²⁴ Elí na' gúquiè' zxí'inè' Matat,

nu ni guca zxí'inè' Leví,

nu ni guca zxí'inè' Melqui,

nu ni guca zxí'inè' Jana,

nu ni guca zxí'inè' ia'tué' José.

²⁵ José ni gúquiè' zxí'inè' Matatías,

nu ni guca zxí'inè' Amós,

nu ni guca zxí'inè' Nahum,

nu ni guca zxí'inè' Esli,

nu ni guca zxí'inè' Nagai.

²⁶ Nagai na' gúquiè' zxí'inè' Mat,

nu ni guca zxí'inè' ia'tué' Matatías,

nu ni guca zxí'inè' Semei,

nu ni guca zxí'inè' ia'tué' José,

nu ni guca zxí'inè' Judá.

²⁷ Judá na' gúquiè' zxí'inè' Joana,

nu ni guca zxí'inè' Resa,

nu ni guca zxí'inè' Zorobabel,

nu ni guca zxí'inè' Salatiel,

nu ni guca zxí'inè' Neri.

²⁸ Neri na' gúquiè' zxí'inè' ia'tué' Melqui,

nu ni guca zxí'inè' Adi,

nu ni guca zxí'inè' Cosam,

nu ni guca zxí'inè' Elmodam,

nu ni guca zxí'inè' Er.

²⁹ Er na' gúquiè' zxí'inè' Josué,

nu ni guca zxí'inè' Eliezer,

nu ni guca zxí'inè' Jorim,

nu ni guca zxí'inè' ia'tué' Matat.

³⁰ Matat na' gúquiè' zxí'inè' Leví,

nu ni guca zxí'inè' Simeón,

nu ni guca zxí'inè' Judá,

nu ni guca zxí'inè' ia'tué' José,

nu ni guca zxí'inè' Jonán,

nu ni guca zxí'inè' Eliaquim.

³¹ Eliaquim na' gúquië' xzí'inë' Melea,
 nu ni guca xzí'inë' Mainán,
 nu ni guca xzí'inë' Matata,
 nu ni guca xzí'inë' Natán.

³² Natán na' gúquië' xzí'inë' David,
 nu ni guca xzí'inë' Isaí,
 nu ni guca xzí'inë' Obed,
 nu ni guca xzí'inë' Booz,
 nu ni guca xzí'inë' Salmón,
 nu ni guca xzí'inë' Naasón.

³³ Naasón na' gúquië' xzí'inë' Aminadab,
 nu ni guca xzí'inë' Aram,
 nu ni guca xzí'inë' Esrom,
 nu ni guca xzí'inë' Fares,
 nu ni guca xzí'inë' ia'túë' Judá.

³⁴ Judá na' gúquië' xzí'inë' Jacob,
 nu ni guca xzí'inë' Isaac,
 nu ni guca xzí'inë' Abraham,
 nu ni guca xzí'inë' Taré,
 nu ni guca xzí'inë' Nacor.

³⁵ Nacor na' gúquië' xzí'inë' Serug,
 nu ni guca xzí'inë' Ragau,
 nu ni guca xzí'inë' Peleg,
 nu ni guca xzí'inë' Heber,
 nu ni guca xzí'inë' Sala.

³⁶ Sala na' gúquië' xzí'inë' Cainán,
 nu ni guca xzí'inë' Arfaxad,
 nu ni guca xzí'inë' Sem,
 nu ni guca xzí'inë' Noé,
 nu ni guca xzí'inë' Lamec.

³⁷ Lamec na' gúquië' xzí'inë' Matusalén,
 nu ni guca xzí'inë' Enoc,
 nu ni guca xzí'inë' Jared,
 nu ni guca xzí'inë' Mahalalel,
 nu ni guca xzí'inë' ia'túë' Cainán.

³⁸ Cainán na' gúquië' xzí'inë' Enós,
 nu ni guca xzí'inë' Set,
 nu ni guca xzí'inë' Adán,
 nu ni guca ca xzí'ini cazë' Dios.

4

Satanás tu' xihui' rë'ëni usubaga' Jesús dul-la'

(Mt. 4:1-11; Mr. 1:12-13)

¹ Buzë'ë Jesús ra' yegu Jordán, zóalenë' Dios Bö' Lá'ayi Lë',
 atë' Dios Bö' Lá'ayi na' guchë'ë Jesús lu lataj cá'asö.

² Guzöé' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahué' Jesús yugu' dza na', ate' gudödi ni' riduné'.

³ Ní'irö tu' xihui' na' gudxi Jesús, rnna:

—Channö naca cazu' Li' Zxí'iné' Dios, gunnátsöca' ulu'huóaca guiöj ni yöta xtila.

⁴ Bubi'é didza' Jesús, rë' le:

—Nazúaj lu guichi, rnna: “Calégasö yöta xtila nabánigaca bönachi, pero nabánigaca ca' yúgu'té xtídzé'ë Dios.”

⁵ Ní'irö guché' tu' xihui' na' Jesús ga naca tu lu guí'a sibi ate' tu chí'ido'osö buluí'i Lë' yúgu'té xilátjagaca nupa ta'nná bë' yödzölió.

⁶ Tu' xihui' na' rë Jesús, rnna:

—Gunna' quiu' yúgu'té xilátjagaca nupa ta'nná bë' ni, en yölla' tsahui' quéguequi, tu' nadödi lu na'a yúgu'té lë ni, ate' nu rë'ënisida' ruá'a que.

⁷ Channö Li' uzóa zxibu' lahua', en gunu' neda' zxön, yúgu'té lë ni guequi quiu'.

⁸ Bubi'é didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: “Xanu' Dios tseaj ládxa'u-në', en tuzë' Lë' gunu' xichinë'.”

⁹ Ní'irö tu' xihui' na' guché' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'iné' Dios, busuládzu'tsöca' cuinu' ni

¹⁰ tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

¹¹ Lu ná'agaquië' ulu'chisé' Li' para cabí tsöjchégu'u guiöj, en bití' gunu' zí' ni'u.

¹² Bubi'é didza' Jesús, rë' le:

—Nazúaj lu guichi lá'ayi le rë netu': “Biti' si' bë'u Xanu' Dios.”

¹³ Cate' bití' budzöli tu' xihui' na' ia'tú le si' bë' Jesús, buzá' ga zoë' tu chí'ido'.

Risí lahué' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴ Böajë' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzë didza' ca naca queë', ate' bila'yöni bönachi nacua' yúgu'té yödzö idú gásibi'ilö.

¹⁵ Busédinë' Jesús bönachi gapa naca lu yu'u ga tu'dubë' tu'sëdë' bönni' judío queë' Dios, ate' yúgu'té bönachi gulún Lë' zxön.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

¹⁶ Ní'irö budxinë' Jesús yödzö Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús,

guyázië' lu yu'u ga tu'dubë' tu'sëdë' bönni' judío queë' Dios, ate' guzuinë' para ulabë' tu le nazúaj lu guichi lá'ayi.

17 Bulu'dödë' lu në'ë Jesús guichi ga na' nazúaj didza' bë'ë Isaías, bönni' bë'ë didza' uláz queë' Dios. Cate' gusaljë' guichi na', budzölinë' ga nazúaj lu guichi le rnna:

18 Zóalenë' Bö' Lá'ayi queë' Xanru' neda'

tu' nubéajë' neda' quez queë'

para usiyönda' bönachi yechi' didza' dxi'a.

Gusöl-lë'ë neda' para una' nupa raca zi' ládxi'do'guequi,

en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi,

en usólá' bönachi zoa nu run léguequi zi',

19 en guna' libán que dza ruzá' ládxi'ë Xanru' Dios quegaca bönachi.

20 Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús.

21 Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj lu guichi ni.

22 Yúgu'të' gula'nnë' dxi'a queë', en bulu'báininë' ca naca didza' dxi'a ru'ë, ate' ta'nnë':

—¿Naru' calëga bönni' ni zxi'inë' José?

23 Jesús rë' légaquië', rnnë':

—Nadxi huëli' neda' lë ni ta'nná bönachi, le rnna: “Li', bönni' ruún bönachi, bun cuinu'.” Lësca' caní huëli' neda': “Yugu' le biyönitu' benu' Capernaum, ben ca' ga ni naca ladzu'.”

24 Gunnë' ca' Jesús:

—Le nácatë rea' libí'ili', channö zoë' nu bönni' ru'ë didza' uláz queë' Dios, biti' tun bönachi uládz queë' lë' bal.

25 Le nácatë rea' libí'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' biti' gulaj guiöj idú ca tsonna iz yu' xopa beo', ate' guca gubín luyú na',

26 pero Dios biti' gusöl-lë'ë Elías na' ga nacuá'anu nigula uzëbi nabábagacanu Israel, pero gusöl-lë'ë lë' ga na' zóanu tu nigula uzëbi lu yödzö Sarepta, le nababa yödzö Sidón.

27 Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero biti' böáquië' nu bönni' nütse'ë ladaj bönachi Israel na', pero böáquië' tuzë Naamán, bönni' nababë' luyú Siria.

28 Cate' bila'yönnë' didza' ni, gula'lenë' yúgu'të bönni' nacu'ë le lu yu'u ga na' tu'dubë' tu'sëdë' queë' Dios.

29 Ní'irö gula'yasë', en bulu'béajë' Jesús ní'ilö ra' yödzö. Gula'ché'ë Lë' ga naca lë'e guí'a guiöj ga na' dë ládzaquië' para ulu'suládzuë' Lë' ga naca lë'e guí'a guiöj na'.

30 Ní'irö gudödë' Jesús gatsaj láhui'lö ga na' nacu'ë, söhuöajtë'.

Tu bönni' yu'u lë' bö' xihui'

(Mr. 1:21-28)

31 Ní'irö guyijë' Jesús yödzo Capernaum luyú Galilea, ate' busédinë' bönachi yugu' dza lá'ayi quégaquië' bönni' judío.

32 Bulu'báinë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

33 Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bë'ë zidzaj didza',

34 rnnë':

—¿Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítuu' netu'? Núnbë'a Li' Nu nacu'. Bönni' Lá'ayi queë' Dios nacu'.

35 Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bönachi nacua' ni'. Burúajtë lu bönni' na', en bíti'rö bi ben queë'.

36 Bulu'báinë' yúgu'të', en gulu'ë didza' tuë' len ia'tué', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca xzön rinná bé'enë' yugu' bö' xihui', ate' tu'rúajtë bö' xihui' na'.

37 Guzé didza' ca naca queë' Jesús, ate' bila'yöni bönachi yúgu'të yödzo idú gásibi'ilö.

Ruúnë' Jesús xiná'anu nigula queë' Pedro

(Mt. 8:14-15; Mr. 1:29-31)

38 Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yue' lahuë' Jesús únë'-nu.

39 Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e

(Mt. 8:16-17; Mr. 1:32-34)

40 Cate' chiribía gubidza, yúgu'të nupa nacua'len léguequi nupa na' te'e que queëguequi yödzhue' bila'dxín ni', ate' du-juá'gaca léguequi ga na' zoë' Jesús. Lë' guxóa në'ë nupa na' te'e, en bunë' léguequi.

41 Bulu'rúaj ca' zían bö' xihui' yú'ugaca bönachi te'e na'. Ta'bödxi'a bö' xihui' na', ta'nná:

—Li' nacu' xzí'inë' Dios.

Ní'irö Jesús buzenë' le bach yugu' bö' xihui' na', en bití' bë'ë lataj ila'nná, tu' nöziguequi náquië' Cristo.

*Runë' Jesús libán luyú Galilea**(Mr. 1:35-39)*

⁴² Cate' za' rení' ia'tú dza, burúajë' Jesús Capernaum na', ate' guyijë' tu lataj cá'asö. Bila'dxin bönachi zían ni', tu'guílaj Jesús. Cate' bila'dxinë' ga na' zoë', gulë'ëniaguequinë' ulu'tsenë' Lë', para cabí uzë'ë ga na' nacu'ë.

⁴³ Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zica'rö yödzö, tsöjena' ca' libán ni' que didza' dxi'a ca rinná bë'ë Dios. Que lë ni na' gusöl-lë'ë neda' ni.

⁴⁴ Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

5*Ta'dzunba' böla zían**(Mt. 4:18-22; Mr. 1:16-20)*

¹ Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios.

² Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzxón böla lé'egaca bárcodo' na', en ta'guibë' yöxaj böla quegaquië'.

³ Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'láti'do' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en rö'ösë' ca' ni' rusédinë' bönachi zían nacuá' lu yu bidxi na'.

⁴ Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' guli'zalaj yöxaj böla queëli' para sönli'-ba' böla.

⁵ Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitu'-ba', pero didza' quiu' izáljagara' yöxaj.

⁶ Cate' chigula'zaljë' le, gula'zönë' ziantëröba' böla, ate' réquitiqui' iröza' yöxaj böla na'.

⁷ Ní'irö bulu'lá'a bulu'lu'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huötaj bárcodo' na' lu nisa.

⁸ Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunnë' tu' radxi ridzöbinë' Pedro ni'a quégacaba' böla zían na' gula'zöngaquië'-ba', en lësca' caní guca quégaca nupa nacuá'len lë'.

¹⁰ Guladxi gula'dzöbinë' ca' Jacobo, en Juan, yugu' zxi'inë' Zebedeo, nupa ni nácagaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isí lo' ichë'u quia' bönachi ca runu' rizönu'-ba' böla.

¹¹ Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' sôjácalenë' Jesús.

Ruúnë' Jesús tu bönni' ré'enë' huë' nudzu' ruzödi
(Mt. 8:1-4; Mr. 1:40-45)

¹² Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yuë' lahuë', rnnë':

—Xan, channö ré'ënu', huáca unu' neda'.

¹³ Ní'irö bulí në'ë Jesús, en gudanë' lë'. Ré' lë':

—Ré'ënda'. Gacu' dxi'a.

La' gubídxitë huë' nudzu' queë' bönni' na'.

¹⁴ Ní'irö Jesús gunná bé'enë' lë' cuntu nu guié' ca'. Gudxë' lë':

—Guyéaj, yöjlu'i cuinu' lahuë' bixúz, ate' yöjnodzaj que yudo' le rulu'i nuhuóacu' dxi'a ca gunná bë'ë Moisés, lë na' ulu'i légaquië' chiböacu'.

¹⁵ Guzëtëro didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtídzë'ë, en para únë' léguequi, ugüë' yödzöhuë' té'eguequi.

¹⁶ Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

Ruúnë' Jesús tu bönni' huë' nacú'unië' bin
(Mt. 9:1-8; Mr. 2:1-12)

¹⁷ Ia'tú dza, cate' ni' rusédinë' Jesús bönachi, rö'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'.

¹⁸ Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús.

¹⁹ Cate' biti' gula'dzölinë' nacxi ilunë', tu' nacua' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guixjë' lë' gatsaj láhui'lö bönachi ni' lahuë' Jesús.

²⁰ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

²¹ Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'?” Tuzë' Dios runiti lahuë' dul-la'.”

²² Réquibe'enë' Jesús le ta'zá' ládxi'gaquië', ate' rë' légaquië':

—¿Bizx que rizá' ládxi'li' caní'?

23 Biti' naca böniga nu guiësö bönni' ni: "Yugu' dul-la' nabágu'u chibuníti lahua'", pero naca böniga nu gun ga chasë', en së'e ni'ë.

24 Guna' ga inözili' dë lu na'a neda', Bönni' Guljë' Bönachi, yöl-la' unná bë' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

25 La' guyásatë' bönni' huë' na' lógaquië', ate' bu'ë lë na' gúti'në', en söhuöjë' lidxë', rigu'ë Dios yöl-la' ba.

26 Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

Jesús rulidzë' Leví

(Mt. 9:9-13; Mr. 2:13-17)

27 Gudödi gulaca yugu' lë ni burúajë' Jesús ni', ate' bilé'enë' tu bönni' uquízaj lázagaca bönachi, lë' Leví, rö'ë ga na' ruquízajë', ate' Jesús rë' lë':

—Gudá' neda'.

28 La' guyásatë' Leví, ate' bucá'anë' yúgu'të', en sa'yéajlenë' Jesús.

29 Gudödi ni' benë' Leví na' tu güi' huagu queë' Jesús ga naca lu yu' lidxë', ate' gula'cu'ë zían bönni' uquízaj ni' len ia' bal-lë' bönni' ta'bö'lenë' légaquië' tahuë'.

30 Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' uséda queë' Jesús, ta'nnë':

—¿Bizx que rë'aj rágulenli' yugu' bönni' uquízaj, en ia' zíca'rë' bönni' dul-la'?

31 Bubi'ë didza' Jesús, rë' légaquië':

—Yugu' bönni' nacu'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi.

32 Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

Ta'nábinë' Jesús ca naca que yöl-la' run gubasa

(Mt. 9:14-17; Mr. 2:18-22)

33 Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' té'aj tahuë'?

34 Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'?

35 Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

36 Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejé' tsötaca' le udé'ë lë'e lari' tëbi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' biti' tsöjlöza lari' tëbi na'.

³⁷ Lësca' caní, cuntu nu bönni' rigué'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'.

³⁸ Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chi'i.

³⁹ Channö zoa nu rë'aj xisi uva gula, biti' gué'ënitë gu'aj xisi uva cubi, tu' rna: “Nácarö sizxi' xisi uva gula na'.”

6

Bönni' usëda queë' Jesús ta'lecjé' do xzoa' xtila dza lá'ayi
(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla xzoa' xtila, ate' bönni' usëda queë' ta'lecjé' do ga dxía xzoa' xtila. Ta'zxúbi'ni ná'agaquië' le, en tahuë'.

² Ní'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'?

⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljé' Bönachi, naca' xani dza lá'ayi.

Tu bönni' narequi' në'ë
(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sédë' queë' Dios, en busédinë' nupa nacuá'ni'. Zoë' ca' tu bönni' ni' narequi' në'ë ibëla.

⁷ Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'.

⁸ Réquibe'enë' Jesús le ta'zá' ladxí'gaquië', ate' gudxë' bönni' na' narequi' në'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'.

⁹ Ní'irö Jesús gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o uguaru' le?

¹⁰ Ní'irö buyüé' Jesús yúgu'të bönni' na' nacu'ë gásibi'ilë', ate' gudxë' bönni' hué' na':

—Bulí no'o.

Bulí në'ë bönni' na', ate' la' böacatë në'ë na'.

¹¹ Ní'irö gula'lenë' bönni' yudo' na', ate' gulún xtídza'gaquië' la' légacasë' naxi bi ilunë' queë' Jesús.

Riböë' Jesús chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu guí'ado'. Bulidzë' Dios ni', ate' idú yëla bë'lenë' Dios didza'.

¹³ Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'.

¹⁴ Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inë' Alfeo),

Simón, (bönni' ru'i lãdxë'ë yödzo queë'),

¹⁶ Judas, (böchë'ë Jacobo),

en Judas Iscariote, (bönni' udödë' Jesús lu ná'agaquië' bönni' ilútië' Lë').

Ruúnë' Jesús bönachi zían

(Mt. 4:23-25)

¹⁷ Jesús bö'tjalënë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë zíanrö ca' bönni' usëda queë', ate' nacuá'len légaquië' bönachi zían narúajgaca yúgu'të yödzo luyú Judea, en yödzo Jerusalén, en yugu' yödzo'do' dëgaca ra' nísado' ga na' nacuá' yödzo Tiro, en yödzo Sidón. Bila'dxín bönachi ni ga ni' para ulu'zë nágagaca xtídze'ë Jesús, en ulu'huóáca lu yödzo'huë' té'eguequi.

¹⁸ Bulu'huóáquië' ca' bönni' ni' ta'guí'i ta'záquië' lu ná'agaca bö' xihui'.

¹⁹ Yúgu'të bönachi zían na' tuí'i lãdxi'gaca ila'gán Jesús tu ruúnë' léguequi len yöl-la' huáca queë'.

Nupa ná'agaca bica' ba, en nupa ná'agaca bica' bayechi'

(Mt. 5:1-12)

²⁰ Ní'irö buyüé' Jesús yugu' bönni' usëda queë' nacu'ë ni', en gudxë' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queéli' lataj ga rinná bë'ë Dios.

²¹ Bica' ba libí'ili' ridunli' le gunnë' Dios queéli', tu' huöljali'.

'Bica' ba libí'ili' ribódxili' tu' bi nadéli'li' le naca tsahui', tu' huadxín dza uzxídxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxi'a, en ulu'béaj libí'ili' ga nacuá', en ila'nné' zi' queéli', en ulu'cá'ana cá'asó le nazí'i lali' ca tu le naca xihui' tu' dá'ali' neda', Bönni' Guljé' Bönachi.

²³ Buli'sí' xibé dza na', en buli'dzeja, tu' naca zxön le guequi queéli' yehua' yubá. Lësca' caní guluné' xuz xtó'ogaca bönachi ni quégaquié' bönni' gulu'é didza' uláz queé' Dios.

²⁴ 'Bica' bayechi' libí'ili', dē yöl-la' tsahui' queéli', tu' chidé le ruzí'ili' xibé.

²⁵ 'Bica' bayechi' libí'ili' nuhuölej nudzé'eli' na'a, tu' huadunli'.

'Bica' bayechi' libí'ili' ruzxídxili' na'a, tu' huí'inili', en cödxí yéchi'li'.

²⁶ 'Bica' bayechi' libí'ili' ta'nné' yúgu'té bönachi dxi'a queéli'. Lësca' caní guluné' xuz xtó'oli', gula'nné' dxi'a quégaquié' bönni' gula'zi' yé'ë, gula'nné' nácagaquié' bönni' tu' é didza' uláz queé' Dios.

Ral-la' idxí'iru' nupa biti' ta'lé'e rē'u dxi'a

(Mt. 5:38-48; 7:12)

²⁷ Gunné' ca' Jesús:

—Libí'ili' zóali' ni, en riyönili' xtídzá'a, rea' libí'ili': Guli'dxí'i nupa biti' ta'lé'e libí'ili' dxi'a. Guli'gún le naca dxi'a quégaca nupa tu'dí'i libí'ili'.

²⁸ Guli'nabi Dios gaca dxi'a quégaca nupa tua' dö' queéli', en buli'lidzē' Dios inábili'-né' gácalenē' nupa ta'nné' zi' queéli'.

²⁹ Channö nu capa' tsólá'a xagu', buzé ia'tsólá'a ca' xagu'. Channö nu cúa lari' naxóa cúdu'u, bē' lataj cúa ca' xzo'.

³⁰ Núti'tēs nu bi inaba le dē quiu', bunödzej que, ate' nu cúa le nequi quiu', biti' unabu' le.

³¹ Ca rē'ēnili' ilún bönachi queéli', lësca' caní guli'gún quéguequi.

³² 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tuné' bönni' dul-la', ta'dxí'iné' nupa nadxí'iguequi légaquié'.

³³ Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tuné' bönni' dul-la'.

³⁴ Channö runödzejali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tuné' bönni' dul-la', tu'nödzejé' quégaca nupa tun dul-la', tu' tuné' löza ulu'bí'i quégaquié' lē na' bulu'nödzejé'.

³⁵ Neda' rea' libí'ili': Guli'dxí'i nupa biti' ta'lé'e libí'ili' dxi'a, en guli'gún le naca dxi'a. Buli'nödzej quégaca bönachi sal-la' biti' runli' löza nu ubí'i queéli'. Channö caní gunli', zxön naca le gata' queéli', ate' gácali' xzí'ini cazé' Dios, Nu nácaterö lo, tu'

runë' Lë' le naca dxi'a quégaca bönachi biti' ta'yaza ládxi'gaca, en quégaca bönachi tuá' dö'.

³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxi'ë yúgu'të bönachi.

Biti' ral-la' ichugu bë'ëru' que luzá'aru'

(Mt. 7:1-5)

³⁷ Gunnë' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queëli'. Biti' cuéaj bë'ëli' que luzá'ali', ate' cuntu nu cuéaj bë' queëli'. Buli'niti lo luzá'ali', ate' Dios uniti lahuë' ca' libí'ili'.

³⁸ Buli'nödzej que luzá'ali', ate' Dios gunnë' queëli'. Ulu'nödzej' queëli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queëli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la ichë'ë ia'túë' bönni' lo chul-la? Biti' ca' gaca, tu' ila'bixë' iropë' tu lu yeru.

⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ ¿Bizx que ruyú' bëbudo' yu'u guiöj lahuë' böchi' luzó'o, en biti' rilé'enu' le zxön yu'u guiöj lo cazu'?

⁴² ¿Naru' huácatsö guío'-në' böchi' luzó'o: “Böcha'a, benna lataj cueja' bëbudo' yu'u guiöj lo’”, en biti' rilé'enu' le zxön yu'u guiöj lo cazu'? Li', bönni' rulu'isö tsahui' cuinu', guléaj zí'alö le zxön yu'u guiöj lo cazu', ate' ní'irö ilé'enu' dxi'a para cueju' bëbudo' yu'u guiöj lahuë' böchi' luzó'o.

Le runru' naca bë' le nácaru'

(Mt. 7:17-20; 12:34-35)

⁴³ Gunnë' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga guí'a biti' gaca cuía le naca dxi'a.

⁴⁴ Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva.

⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinnë ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u

(Mt. 7:24-27)

⁴⁶ Gunnë' ca' Jesús:

—¿Bizx que rulídzali' neda', rnnali': “Xantu', Xantu'”, pero biti' runli' ca rinná bé'eda' libí'ili'?

⁴⁷ Ulu'ida' libí'ili' ca naca nu na' za' quia', en riyöni xtídza'a, en run ca rnna xtídza'a.

48 Nu ni naca ca tu bönni', cate' benë' lidxë', guchö'önë' ga rë', en guléquië' xilibi yu'u ga naca lu guiöj. Cate' bötaj yegu gubó'o, guchö'öna cuita yu'u na', pero biti' guca uquínnaj le, tu' nulibi ga naca lu guiöj.

49 Na'a, nu riyöni xtídza'a, en biti' run ca rnna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchö'öna yegu gubó'o cuita yu'u na', la' biguínnajtë, ate' gubixi dërö zö'ö que.

7

Jesús ruúnë'-bi' bi'i huen dxin queë' tu bönni' unná bë'
(Mt. 8:5-13)

1 Cate' Jesús budxi bé'lenë' légaquië' didza' ni, guyázië' yödzö Capernaum.

2 Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'.

3 Cate' biyönnë' bönni' ni didza' tu'ë bönachi ca naca queë' Jesús, la' gusöl-la'të' bal-lë' bönni' gula tu'zëajni'inë' bönni' judío ga na' zoë' Jesús, tsöjötä'yugaquië' lahuë' Lë' guidé' uduhuënë'-bi' bi'i huen dxin queë' na' ré'ebi'.

4 Bönni' gula tu'zëajni'inë' na' bila'dxinë' ga zoë' Jesús, ate' guláta'yue' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni,

5 tu' runë' bal bönachi uládz queëru', en benë' tu yu'u queëru' ga rudúbiru' rusëdaru' queë' Dios.

6 Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusöl-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': "Biti' uguí'inu', tu' cabí naca' lesaca' tsáziu' lidxa',

7 en biti' naca' lesaca' guída' ga zu'. Que lë ni na' biti' burúguida' guída' ga zu'. Bë'ësö didza', ate' huóacatébi' bi'i huen dxin quia'.

8 Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'tué': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

9 Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel biti' röjxáqui'da'-në' réajlë'ë quia' ca réajlë'ë quia' bönni' ni.

10 Cate' bulu'dxinë' bönni' na' gusöl-lë'ë bönni' rinná bé'enë' bönni' röjáquië' gudil-la, gula'yázië' ga naca lu yu'u lidxë', en bila'lë'enë' chiböacabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

11 Gudödi guca lë ni, sa'yéajë' Jesús yödzo Naín, ate' dzágagaquië' bönni' usëda queë' Lë', len bönachi zían.

12 Cate' bidxinë' gala' ra' yödzo na', bilé'enë' yugu' bönni' nuá'agaquië'-bi' tubi' bi'i bönni' nati. Söjçáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' söjácálen-nu.

13 Cate' Xanru' bilé'enë'-nu, buéchi' ládxe'ë-nu, ate' gudxë'-nu:

—Bíti'rö cödxu'.

14 Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bi'ido', li' rea', guyasa.

15 Ní'irö bubanbi'. Gurö'öbi' bi'i na' zí'alö nátibi', ate' gusi' lobi' ruí'ibi' didza'. Jesús budödë'-bi' lu ná'anu xiná'abi'.

16 Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

17 Guzë didza' ca naca yöl-la' huáca queë' Jesús, ate' bila'yöni bönachi yúgu'të yödzo luyú Judea, en yúgu'të yödzo idú gásibi'ilö.

Le rinabë' Juan, bönni' buquilë' bönachi nisa

(Mt. 11:2-19)

18 Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guië', bulidzë' chopë' bönni' na' dá'gaquië' lë,

19 ate' gusöl-lë'ë légaquië' ga na' zoë' Jesús para ila'nábinë' Lë', ila'nnë': “¿Nacu' Li' Cristo, bönni' ral-la' guidë', o naru' ral-la' cöztu'-në' bönni' yúbölö?”

20 Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquilë' bönachi nisa, nasöl-lë'ë netu' para inábitu' Li', innatu': “¿Nacu' Li' Cristo, bönni' na' ral-la' guidë', o naru' ral-la' cöztu'-në' bönni' yúbölö?”

21 La' ná'asö ruúnë' Jesús zían nupa te'e, yugu' bönni' huë', en bönni' yú'ugaca légaquië' bö' xihui', ate' zían bönni' lo chulla busaljë' guió'j lógaquië'.

22 Bubi'ë didza' Jesús, rë' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyönili'. Tu'lé'enë' bönni' guchul-la lógaquië'. Tu'zé'ë bönni' gulatsjë'. Nuhuóácagaquië' bönni' güf'iguequinë' huë' nudzu' ruzödi. Tu'yönnë' bönni' gula'códzuë'. Nubángaquië' bönni' gulatië'. Ta'yönnë' bönni' yechi' didza' dxi'a.

23 Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

24 Cate' bönni' na' gusöl-lë'ë Juan bulu'zë'ë ni', gusí lahuë' Jesús rulu'ínë' bönachi ni' ca naca queë' Juan na', rnnë':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le?

25 ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácuë' lari' nazáca'de'e? Nöz quézili' nupa nácu'gaca lari' nazáca'de'e, en tu'zí xibé yöl-la' tsahui', nacuá' lídxigaquië' bönni' ta'nná bë'ë.

26 ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libí'ili', ate' nayëpisëtërë' ca nu ru'í didza' uláz queë' Dios.

27 Náquië' Juan bönni' na' nazúaj lu guichi lá'ayi ca naca queë', rnna:

Buyútsöca', risöl-la'a-në' gubáz quia', inöruë' ca Li'.

Bönni' ni uchi'ë nöza ga tödu'.

28 'Neda' rea' libí'ili': Gapa nacuá' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquilë' bönachi nisa, pero nu nácatërö cuídi'sö ga rinná bë'ë Dios nayëpisëtërö ca Juan na'.

29 Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan,

30 pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gú'unnë' Dios gunë' quégaquië'.

31 Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácu'gachië'?

32 Nácu'gachië' ca bí'ido' ta'guítjabi'. Ta'b'ö'öbi' lu yé'ëyi, en ta'bödxi'abi'. Ta'nnabi' tubi' ia'tubi': “Rucödxi'tu' queéli' gui, pero biti' ruyá'ali'. Rul-la yéchi'tu', pero biti' ribödxi'li'.”

33 Caní nácali' tu' bidë' Juan, bönni' buquilë' bönachi nisa, en biti' gudahuë' yöta xtila, en biti' gu'ë xisi uva, ate' rnnali' queë': “Tu' xihui' dzaga lë'.”

34 Cate' bida' neda', Bönni' Guljë' Bönachi, en rë'aj rahua', rnnali' quia': “Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizxjë', en ia'zica'rë' bönni' dul-la'.”

35 Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

36 Tu bönni' yudo' fariseo bulidzë' Jesús gágulenë' lë' tsözxön, ate' guyazië' Jesús lidxë' bönni' na', en gurö'ë rahuë'.

37 Zóanu lu yödzo na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu böga'do' néquini guiöj nazaca' le yudzu tu le rilá' zxixi.

38 Cate' bidxinnu zaca' cúdzu'lë' Jesús, gurö'önu xini'ë ribödxinu. Ní'irö gusí lonu rigú'unu nisa ribödxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi.

39 Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga."

40 Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

41 Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'tué' na' ral-lë'ë queë' lazxjë' que chopa beo'.

42 Tu' cabí dë quégaquië' dumí ulu'guíxjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

43 Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rnnó'.

44 Ní'irö buécjë' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quívida' ni'a, pero nigula ni gulú'unu ni'a nisa ribödxinu, en buzxinu ni'a len guitsa' ícjanu.

45 Biti' butsaga lo' neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a.

46 Biti' gulú'u icja' le za, pero nigula ni gulú'unu ni'a lë na' rilá' zxixi.

47 Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxí'ide'enu neda'. Nu na' Dios runiti lahuë' le láti'do'os, láti'do'os nadxí'i Dios nu na'.

48 Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

49 Yugu' bönni' na' ta'bö'lenë' Jesús tahuë' gula'sí lógaquië' të luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

⁵⁰ Ní'irō Jesús gudxé'-nu nigula na', rnné':
—Tu' réajlè'u neda', chibuló' li'. Bōaj lidxu', zoa dxi ládxcu'u.

8

Yugu' nigula tácalennu Jesús, ta'gú'unu le tahué'

¹ Gudōdi gulaca lè ni, gudé' Jesús gapa nacuá' zían yōdzō zxōn, en yugu' yōdzōdo', ate' bené' libán ni', en bē'ē didza' que didza' dxi'a ca rinná bē'ē Dios, ate' idxínnutē' bōnni' usēda queē' dzágagaquiē' Lē'.

² Bál-lanu nigula buné' Jesús légacanu dzágagacanu ca' Lē'. Bubéajē' bō' xihui' yú'ugaca légacanu, en bugúē' yugu' yōdzōhué' gū'iguequinu. Nútsa'nu ládjagacanu María, lēnu ca' Magdalena, nigula na' bubéajē' gadxi bō' xihui' yú'ugaca lēnu.

³ Juana, nigula queē' Chuza, bōnni' yu'u lu nē'ē le dē lidxé' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en zíanrōnu ca', le tahué' Jesús, en yugu' bōnni' usēda queē'. Tu'nōdzjanu le dē quégacanu.

Rucúdzu'ē didza' Jesús ca naca queē' bōnni' guz
(Mt. 13:1-9; Mr. 4:1-9)

⁴ Bila'rúaj bōnachi zían yugu' yōdzō ni', en bilá'gaca ga na' zoé' Jesús. Cate' bulu'dubé' ga na' zoé', Lē' bucúdzu'ē didza', rē' légaquié':

⁵ —Bírúajē' bōnni' guz, sōjésiē' xisedo'. Cate' ni' sōjésiē', bulu'huōxaj bal-la xisedo' na' ga naca la' nōza, ate' bulu'libi bōnachi léguequi. Bila'dxinba' ca' biguínido', en gulé'ajba' xisedo' na' dzō'ō la' nōza.

⁶ Bulu'huōxaj ia'bal-la xisedo' na' lu yu ga rō'ō guiōj. Cate' gula'lén xisedo' na', la' gula'bídxitē' tu' cabí nalupa' yu na'.

⁷ Bulu'huōxaj ia'bal-la xisedo' na' ga bulu'lén lubá yōtsi'. Tsōzxōn gula'zxōn lubá yōtsi' na', en xisedo' na', ate' lubá yōtsi' na' bila'rōli xisedo' na' gula'lén, en gulún ditaj léguequi.

⁸ Bulu'huōxaj ia'bal-la xisedo' na' ga naca luyú bēbu. Cate' chigula'zxōn, bulu'nōdzaj. Tu dxigu' na' bunōdzaj ia'tú gayuá'tērō xisedo' ca'.

Cate' budxi gunné' caní Jesús, bē'ē zidzaj didza', rnné':
—¡Nu zoa nagui, en riyōni ral-la' uzé nagui!

Bixx que rucúdzu'ē Jesús didza'
(Mt. 13:10-17; Mr. 4:10-12)

⁹ Ní'irō yugu' bōnni' usēda queē' Jesús gula'nábinē' Lē', ta'nné':

—¿Bixxi sa'yéaj lè na' bucúdzu'u didza'?

¹⁰ Jesús gudxé' légaquié':

—Dios ruzéajni'iné' libí'ili' le nagachi' ca rinná bē'ē Lē', pero ia'zíca'rō bōnachi ni, ruí'ilena' léguequi didza' le rucúdzu'a

didza' para cate' ulu'yúë, biti' ila'lé'enë, en cate' ila'yönnë, biti' ila'yéajni'inë'.

Rigu'xjö'ë Jesús le rulu'i le bucúdu'ë didza'

(Mt. 13:18-23; Mr. 4:13-20)

11 Gunnë' ca' Jesús:

—Caní naca le rulu'i lë na' bucúdu'a didza'. Xisedo' na' naca xtídzë'ë Dios.

12 Xisedo' na' bulu'huöxaj la' nöza tu'lu'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë', en cabí ulu'lë'.

13 Xisedo' na' bulu'huöxaj lu yu ga rö'ö guiöj tu'lu'i ca raca quégaquië' bönni' ta'yönnë' didza' na', en tu'dzéjanë' ta'zi'ë le, pero nácagaquië' ca xisedo' na' biti' ben lui. Tu chí'sö ta'yéajlë', tu' ridxín le rizí' bë' légaquië', ate' la' tu'huöatë ládxi'do'gaquië'.

14 Xisedo' na' bulu'huöxaj ga bulu'lén lubá yötsi' tu'lu'i ca raca quégaquië' bönni' ta'yönnë' didza' na', en cate' chibila'yönnë', yugu' le tu'i ládxi'gaquië' yödzölió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' biti' run dxin didza' na' lu icja ládxi'do'gaquië'.

15 Xisedo' na' bulu'huöxaj ga naca luyú bëbu tu'lu'i ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxön ladxi' tunë' ca rnna didza' na'.

Rucúdu'ë didza' Jesús que le rigú'u bení' lídxiru'

(Mt. 4:21-25)

16 Gunnë' ca' Jesús:

—Cuntu nu bönni' ruquelë'ë guí', ate' la' rudúsi'të' le guí'ina, en biti' rigú'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'.

17 Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

18 'Que lë ni na', buli'zë nágali', tu' huadéli'në' ia'lati' bönni' ruzóë' tsutsu icja ládxi'da'ahuë' didza' riyönnë', en huazi'rë' xtídzë'ë Dios, pero bönni' biti' ruzóë' tsutsu icja ládxi'da'ahuë' didza' riyönnë', huadúa didza' na' biyönnë'.

Xinë'ë Jesús, en yugu' bönni' böchë'ë

(Mt. 12:46-50; Mr. 3:31-35)

19 Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero biti' guca ila'bíguë'ë gala' ga zoë' tu' nacuá' bönachi zían ni'.

20 Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' iluí'ilenë' Li' didza'.

²¹ Bubi'ë didza' Jesús, rë' légaquië':

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxíë' bö' budunu'

(Mt. 8:23-27; Mr. 4:35-41)

²² Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö sőjácátë'.

²³ Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxan nisa, en zoa bönadxi quégaquië'.

²⁴ Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxiada', ate' guzóa dxi bö' na' recja, en guró'o dxi lu nísado' na'.

²⁵ Ní'irö Jesús gudxë' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'báininë'. Gulë luzá'agaquië' tuë' ia'tué':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

²⁶ Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea.

²⁷ Cate' birúajë' Jesús lë'e bárcodo' na' ga naca lu yu na', dutságuië' tu bönni' yödzö na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zxan bulóaj ga nádjagaca yeru ba.

²⁸ Cate' bönni' na' yu'u bö' xihui' lë' bilé'enë' Jesús, guródxí'ë zidzaj, ate' buzóa zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxí'inë' Dios nayëpisëtërë'? Ráta'yua' lo' cabí usaca' zi'u neda'.

²⁹ Caní gunné' tu' chigunná bé'enë' Jesús bö' xihui' na' urúaj lu bönni' na'. Zían luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúguië' lë' du guië, en bulu'xéjanë' bregui' guië ni'a në'ë, pero blë'ë yugu' du guië na', ate' bö' xihui' na' yu'u lë' guchë' lë' lu lataj cá'asö.

³⁰ Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'.

31 Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca.

32 Nacuá'aba' ca' tu cõ'õba' cuchí zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsõjtsú'ugaca cuchí zián na'. Jesús bë'ë léguequi lataj.

33 Bulu'rúaj yugu' bö' xihui' lu bönni' na', en yõjtsú'ugaca cuchí zián na', ate' yõjácaba' cuchí zián na' ga naca tu lë'e guiõj. Yõjbíxigacaba' lu nísado', ate' ni' gula'yépiba' nisa, gulátiba'.

34 Cate' bila'lé'enë' bönni' tu'yúgaquië'-ba' cuchí zián na' ca na' guca quégacaba', guladxi gula'dzõbinë'. Bulu'zxúnnejë' ni', ate' yõjhuõjgaquië' yõjtíxjõi'iguequinë' nupa nacua' yõdzõ na', en nupa nacua' la' guixi' ni'.

35 Ní'irö bila'rúajë' bönni' yõdzõ na', yõjyúgaquië' lë na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë xini'ë Jesús. Nácue' lari', en dxí'ado' chizõë', ate' guládxinë'.

36 Nupa na' bila'lé'e lë na' guca gula'guíxjõi'i légaquië' ca guca, böáquië' bönni' na' gula'yú'u bö' xihui' lë'.

37 Ní'irö yúgu'të bõnachi zián na' quégaca yõdzõ nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en sõhuõjë'.

38 Bönni' na' bulu'rúaj bö' xihui' na' lë' gúta'yuë' lahuë' Jesús gu'ë lë' lataj tséajlenë' Lë' tsõzxõn. Gunná bé'enë' Jesús lë' ugá'anë' ni', rnnë':

39 —Bõaj lidxu'. Yõjtíxjõi'i bõnachi uládz quiu' yugu' le zxõn benë' Dios quiu'.

Bõajë' bönni' na' lidxë', ate' buzë' didza' idú lu yõdzõ ni' ca naca le zxõn benë' Jesús queë'.

Jesús ruúnë'-bi' bi'i nigula queë' Jairo enca' nigula na' gudan nu lari' nácue'

(Mt. 9:18-26; Mr. 5:21-43)

40 Cate' budxinë' Jesús ia'tsölá'a nísado' na', bulu'dzeja bõnachi zián nacua' ni' ni'a queë' Lë', tu' ta'bõza Lë'.

41 Ní'irö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sedë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'.

42 Caní benë' tu' zóabi' tubi' bi'i nigula queë', chirequi gátibi'. Nácabi' bi'i la's dui queë', en yú'ubi' ca chinnu iz. Tsanni ni' sa'yéajë' Jesús, sönógaca tu'quirõ bõnachi zián Lë'.

43 Nútsa'nu tu nigula ladaj bõnachi zián na', chiguca chinnu iz riguí'i rizáca'nu. Biti' ruhu'i rön queënu que huë' quégaca

cázanu nigula, ate' chibutönu dëra le dë queënu, riguízxjanu nupa tu'ún bönachi, pero biti' guca nu bönni' únë'-nu.

⁴⁴ Gubíga'nu zaca' cúdzu'lë' Jesús, en gudannu ru'i lari' nácuë', ate' la' buí'të huë' rön queënu.

⁴⁵ Ní'irö Jesús gunábinë' nupa nacuá' ni', rnnë':

—¿Nuzxi na' gudán neda'?

Gula'dá'bagui'ë yúgu'të'. Ní'irö Pedro, en nupa nacuá'len lë' gulë' Lë', ta'nnë':

—Bönni' Usedi, nacuá' bönachi zían ni, tu'quirö Li', en tu'dxiga' Li', ate' ¿rnnatso': "¿Nuzxi na' gudán neda'?"

⁴⁶ Ní'irö Jesús gunnë':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷ Cate' réquibe'enu nigula na' nözinë' Jesús le bennu, ní'irö guxzízinu. Biyéchunu xini'ë Jesús, en gudíxjöi'ínu Lë' lógaca bönachi zían na' bizx que na' gudannu lari' nácuë', en ca na' guca, la' böácatënu.

⁴⁸ Ní'irö Jesús gudxë'-nu:

—Nigúlado', tu' réajlë'u neda' chiböácu'. Böaj lidxu', zoa dxi ládxu'u.

⁴⁹ Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sëdë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bítirö upízxjanu'-në' Bönni' Usedi.

⁵⁰ Cate' biyönnë' Jesús lë ni, bubí'ë didza', rë' bönni' lo na':

—Bíti' gádxinu'. Guyéajlë'ësö Dios. Huöácabi' bi'i nigúlado' quiu'.

⁵¹ Cate' guyázië' Jesús yu'u na', biti' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'.

⁵² Ta'bödxi nupa nacuá' ni'. Ta'bödxi yechë'ë ni'a queëbi' bi'i nigúlado' na', ate' Jesús rë' légaquië', rnnë':

—Bítirö cödxili'. Bíti' nátibi' nigúlado' ni. Rásisibi'.

⁵³ Bulu'titjë' Lë' tu' nözguequinë' chinátibi'.

⁵⁴ Ní'irö gudélé'ë Jesús ná'abi', en bë'ë zidzaj didza', rnnë':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesús gunná bé'enë' légaquië' ilu'ë le gágubi'.

⁵⁶ Bulu'bánninë' xuz xiná'abi', pero Jesús gunná bé'enë' légaquië' cuntu nu ilë' ca na' guca.

9

*Risöl-lë'ë Jesús bönni' usëda queë' tsöjéngaquië' libán
(Mt. 10:5-15; Mr. 6:7-13)*

1 Ní'irö butubë' Jesús idxínnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca bönachi, en ulu'únë' nupa te'e.

2 Gusöl-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e.

3 Jesús gudxë' légaquië':

—Biti' bi guá'ali' para la' nöza, calëga xiyágado', en calëga yöxaj, en calëga yöta, en calëga dumí, en bití' ixóa yenli' chopa lari'.

4 Bítí'tës yu'u ga tsú'uli', guli'sóa ni' cate' uzá'aröli' yödzö na'.

5 Gátí'tës ga bití' ilún bönachi libí'ili' bal, buli'rúaj yödzö na', en guli'cuíbi bëchtö da' lë'e lábali', le ulu'i légaquië' nagá'ana xíguia' nabága'gaquië'.

6 Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxi'a, en tu'únë' nupa te'e yúgu'të lu yödzö na'.

Ca gútië' Juan, bönni' buquilë' bönachi nisa

(Mt. 14:1-12; Mr. 6:14-29)

7 Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böniga, tu' ta'nná bönachi:

—Juan na' chibubanë' lu yöl-la' guti.

8 Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

9 Herodes na' gunnë':

—Juan na' burixa' yenë'. ¿Nuzxi caz bönni' ni, riyönda' queë' runë' yugu' lë ni?

Rizóa ribö'ë Herodes ilé'enë' Jesús.

Rugahuë' Jesús chi-un gayuá' bönachi

(Mt. 14:13-21; Mr. 6:30-44; Jn. 6:1-14)

10 Cate' bulu'dxinë' bönni' gubáz nasöl-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guchë'ë Jesús légaquië' quez. Yöjáquië' tu lataj cá'asö lu xiyú yödzö Betsaida.

11 Cate' chinöziguequi bönachi lë ni, yöjnóguequi Lë', ate' Jesús benë' léguequi bal, en bë'lenë' léguequi didza' ca rinná bë'ë Dios, ate' bunë' nupa te'e.

12 Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en tē' Lë':

—Busöl-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

13 Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queétu', o ¿naru' huayéajtsatu' tsöj'ö'outu' le ilágugaca bönachi zián ni?

14 Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

15 Caní gulunë', ate' gula'bö'ë yúgu'të'.

16 Ní'irö gudélé'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzzuxjë' léguequi, en bë'ë quégaquië' bönni' usëda queë' para ulu'cu'ë lógaca bönachi na'.

17 Gulahuë' yúgu'të', en bulu'huöljanë'. Gudödi na' bulu'tubë' yugu' bizxaj bugá'ana, ate' bulu'lié' idú chinnu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

18 Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

19 Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilë' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

20 Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasöl-lë'ë Dios.

Riguíxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

21 Ní'irö Jesús gúdxidë'ë légaquië', en gunná bé'enë' légaquië' cuntu nu ilë' Nu náquië' Lë'.

22 Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zián le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

23 Gudxë' ca' yúgu'të':

—Channö ré'ënë' nu bönni' tē'ë neda', ral-la' uzóë' tsólá'alö le dë queë', en gáquië' ca tu bönni' sa'yéajë' sötj'të'ë lë'e yaga cruz, ate' ní'irö gaca tē'ë neda'.

24 Núi'tës bönni' ru'i láchxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'.

25 Biti' bi uzi'ë xibé tu bönni' channö utubë' queë' yúgu'të le dë yödžölió ni, pero unítië' tsaz yöl-la' na'bán queë'.

26 Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljé' Bönachi, utuí'ida' bönni' na' cate' huóda' idinná bē'a, dzágagaca neda' yöl-la' zxon queë' Xuza', en yöl-la' zxon quegaquië' gubáz lá'ayi queë' Dios.

27 Le nácatë rea' libí'ili', nacuá' bal-lë' bönni' ni bití' ilátië' cate' ila'lé'erönë' dza idinná bē'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

28 Cate' bizá'a xunu' gubidza gudödi bē'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios.

29 Tsanni ni' ru'ílenë' Dios didza', bidzá' ca riná' lahuë', ate' böáca chiguí'chido'os lari' nácuë', en guyëpi yösa bení'.

30 Ní'irö bulu'lu'í lógaquië' chopë' bönni' ga zoë' Lë' tu'ílenë' Lë' didza'. Nácaquië' Moisés, en Elías.

31 Chopë' ni gula'yëpë' yösa bení', ate' tu'ílenë' Jesús didza' ca si' uzë'ë yödžölió ni, gátië' lu yödžö Jerusalén.

32 Sal-la' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lë'.

33 Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnnë'.

34 Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'.

35 Ní'irö biyön chi'i Nu ru'í didza' lu böaj na', rnna:

—Bönni' ni náquië' Zxí'ina'. Nadxí'ida' Lë'. Buli'zë' nágali' didza' gu'ë.

36 Cate' budxi bē' didza' chi'i na', tuzë' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulé' ca naca le bila'lé'enë'.

Ruúnë' Jesús bi'i bönni' yu'u bö' xihui' lëbi'

(Mt. 17:14-21; Mr. 9:14-29)

37 Cate' za' rení' ia'tú dza bulu'huötjé' Jesús, en bönni' na' dzágagacquië' Lë' lu guí'ado' na', ate' bila'rúaj bönachi zían dutságagaca Jesús.

38 Ní'irö bē'ë zidzaj didza' tu bönni' nútsë'ë ladaj bönachi zían na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'.

³⁹ Yu'u bö' xihui' lëbi' le run ga ribödxi'abi', en ruxízida' lëbi'. Run ga ribía bidxina' zxöna' ruá'abi', en rurixi rutúluda' lëbi', ate' catu caz rusán lëbi'.

⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zéqui'në'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'xte ral-la' sóalena' libi'ili', en guá' ilena' queëli'? Dijuá'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'.

⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë',

⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabí ru'ínë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túé' núzxilë' gáquië' lo.

⁴⁷ Réquibe'enë' Jesús le ta'zá' ládxi'gaquië', ate' gudélé'ë-bi' tubi' bí'ido', en buzóë'-bi' cuitë'.

⁴⁸ Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lë ni na' bönni' nútsë'ë ládjali' nácarë' nōxaj ladxi', bönni' ni náquië' lo.

Nu biti' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

⁵⁰ Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátië' Jesús, en huëpë' yehua' yubá, benë' bayudxi tsejë' Jerusalén.

⁵² Gusöl-lë'ë yugu' bönni' gubáz queë' ila'nöruë' ca Lë', ate' yöjáquië' tu yödzödo' quégaca bönachi Samaria para tsöjpa'agaquië' ga ugá'anë' Jesús tu yëla.

⁵³ Yugu' bönni' yödzö na' biti' gulunë' Jesús bal tu' chinaca queë' sa'yéajë' Jerusalén.

⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, çnaru' inábatsöca'tu' huötaj guí' le za' yehua' yubá, en usuniti légaquië', guntu' ca na' benë' Elías?

⁵⁵ Buécjë' Jesús, en gudil-lë' légaquië', rnnë':

—Biti' nözili' bizxi bö' dzágui libí'ili'.

⁵⁶ Bida' ni neda', Bönni' Guljë' Bönachi, calëga para usunítia' yöl-la' na'bán quégaca bönachi, pero bida' dusölá' bönachi.

Ní'irö yöjáquië' yödzö yúbölö.

Nupa të'ëni tsöjácálen Jesús

(Mt. 8:19-22)

⁵⁷ Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, rë'ënda' sá'lëna' Li' gáti'tës ga tseju'.

⁵⁸ Jesús rë' lë':

—Yúgu' böza', nacué' zxan bulóaj quégacaba', ate' biguínido', dxíagaca xcá'agacaba', pero neda', Bönni' Guljë' Bönachi, biti' dë quia' ga gáta'a uzí' ládxa'a.

⁵⁹ Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucácha'a-në' xuzá'.

⁶⁰ Jesús gudxë' lë':

—Bë' lataj bönni' chizóa ilátië' ulu'cáché'ë nupa chinati quégaquië', pero li', guyéaj, yöjén libán ca inná bë'ë Dios.

⁶¹ Ní'irö bidxinë' ia'túë' ca', en rë' Jesús:

—Xan, rë'ënda' sá'lëna' Li', pero benna neda' lataj tseja' tsöjzégacada'-në' didza' di'a dza quia'.

⁶² Jesús gudxë' lë':

—Núti'tës bönni' ruí'i ládxe'ë le raca yödzölió náquië' ca tu bönni' rugá'anë'-ba' bëdxi, en ruyúë' zaca' cúdzu'lë'. Nu run caní' biti' naca lesaca' tsaza ga rinná bë'ë Dios.

10

Risöl-lë'ë Jesús tsónnalalaj yu' chië' bönni' tsöjéngaquië' libán

1 Gudödi gulaca yugu' lë ni, guröë' Xanru' ia'tsónnalalaj yu' chië' bönni' usëda queë', ate' gusöl-lë'ë légaquië' chopa huéajgaquië' para ila'nöruë' ca Lë', en tsójáquië' yúgu'të yödzo, en yödzödo' gapa chizóa tödë' Lë'.

2 Gudxë' légaquië':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacua'. Que lë ni na', guli'gáta'yu lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'.

3 Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' sójácaba' ládjacacaba' bö'cu' guí'a sínia'.

4 Biti' guá'ali' yöxaj dumí, en calëga buzudi yöta, en bití' guá'ali' ia'tú cö' xiráchuli', en bití' tseli' para gü'ilenli' bönachi didza' gapa naca la' nöza.

5 Gátitës yu'u ga tsú'uli', innali': "Le ribequi dxi ladxi' gaca quégaca bönachi nacua' yu'u ni."

6 Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'.

7 Guli'gá'ana yu'u ga na' tsú'uli', en guli'guí'aj guli'gagu bi ilunnë' queëli', tu' udzöli quézinë' bönni' huen dxin le gahuë'. Biti' tödili' yu'u yu'u.

8 Gátitës yödzö ga tsú'uli', ate' ilún libí'ili' bal, guli'gagu le ulu'cu'ë loli'.

9 Buli'ún nupa te'e nacua' yödzö na', en guli'guíë léguequi: "Chibidxín le rinná bë'ë Dios ga zóali'."

10 Gátitës yödzö ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzö na', en innali':

11 "Bëchtö que ládzali' le da' lë'e lábatu' ruquínajtu', le ruluí'i nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'."

12 Neda' rea' libí'ili', cate' idxín dza ichúguië' Dios quégaca bönachi, ila'guí'i ila'zaca'rö bönachi yödzö ni' ca ila'guí'i ila'zaca' bönachi yödzö Sodoma, nupa ni' busunítië' Dios.

Le gaca quégaca nupa bití' ulu'bí'i ládxi'gaca

(Mt. 11:20-24)

13 Gunnë' ca' Jesús:

—Bica' bayechi' libí'ili', bönachi yödzö Corazín. Bica' bayechi' libí'ili', bönachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxi'gaquië' bönni' ni', ate' ilácuë' lari' cá'asö, en ila'gu'ë dö ícjagaquië', le ulu'ígaca chibulu'bí'i ládxi'gaquië'.

14 Que lë ni na', cate' idxín dza ichúguië' Dios quégaca bönachi, quí'í sáca'röli' ca ila'guí'í ila'záquië' bönni' yödz Tiro, en yödz Sidón.

15 Libí'ili', bönachi Capernaum. Réquili' tsázali' yehua' yubá. Huótjali' tsótsázali' lataj chul-la quégaca nupa nátigaca.

16 Ní'irö Jesús gudxë' yugu' bönni' usëda queë', rnnë':

—Nu ruzë nagui libí'ili', ruzë nagui ca' neda', ate' nu rucá'ana libí'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasöl-lë'ë neda'.

Bönni' yójéngaquië' libán tu'dxinë' ga zoë' Jesús

17 Cate' tsónnalalaj yu' chië' bönni' na' gusöl-lë'ë Jesús bulu'dxinë' ga zoë' Lë', bönni' na' yójéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

18 Jesús gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú.

19 Buli'yútsöca', neda' nudöda' lu ná'ali' yöl-la' unná bë' para gaca söngacali'-ba' bëla sínia', en xöjnö', en biti' bi gaca queëli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a.

20 Na'a, buli'dzeja, calégasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

21 La' ní'isö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero buluí'iguequinu'-bi' bí'ido' ca naca. ¡Ca' gaca, Xuza', tu' caní guyaza ladxu'u!

22 Ní'irö gunné':

—Yúgu'të budödë' Xuza' lu na'a. Cuntu nu bönni' nözinë' Nu náquië' Zxí'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Zxí'inë' nözinë', ate' inözigaca ca' nupa na' Zxí'inë' rë'ënë' uluí'inë' léguequi Xuzë'.

23 Ní'irö Jesús buyúë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' libí'ili',

24 tu' rea' libí'ili': Zián bönni' gulu'ë didza' uláz queë' Dios, enca' bönni' gula'nná bë'ë, gulë'ënnë' ila'lé'enë' le rilé'eli', pero biti' bila'lé'enë' le. Gulë'ënnë' ila'yönnë' le riyönili', pero biti' bila'yönnë' le.

Tu bönni' Samaria, bönni' tsahui'

25 Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

26 Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë' na' rulabu'?

27 Bubi'ë didza' bönni' na', rnnë':

—Caní rnna: “Ídxí'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la' réajni'i quiu', ate' idxí'inu' bönni' luzó'o ca nadxí'i cuinu'.”

28 Jesús rë' lë':

—Dxí'ado' bubu' didza'. Ben caní, ate' gata' quiu' yöl-la' na'bán na'.

29 Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

30 Bubi'ë didza' Jesús, rë' lë':

—Buzë'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'gúë' lari' nácuë', en gulunë' lë' huë'. Ní'irö bulu'zë'ë ni', en nucá'anagaquië' lë', chirati cazë'.

31 Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'.

32 Gudödë' ca' ni' tu bönni' nababë' xzí'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'alö ca' gudödë'.

33 Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxi'ë' lë'.

34 Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxíë' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'.

35 Cate' za' rení' ia'tú dza, en chizóa uzë'ë bönni' Samaria na', guléajë' lászjaru' que chopa dza, le bucá'anë' lu në'ë bönni' xan yu'u na', en rë' lë': “Gudapa chi'ë bönni' ni, en channö utóu' ia'lati' dumí, ubi'a neda' quiu' cate' huöda'.”

36 Na'a, ¿nacxi runi li'? ¿Núzxilë' bönni' yonna ni gúquië' bönni' luzë'ë bönni' na' gulu'ë dö' bönni' gubán queë'?

37 Bubi'ë didza' bönni' yudo' usedi na', rë' Jesús:

—Bönni' na' buéchi' ládxi'ë' lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

38 Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guchë'ënu Lë' lídxinu.

³⁹ Marta ni zóanu nigula zxílanu lënu María, ate' María na' gurö'ötënu ga naca xini'ë Jesús, en ruzë náganu xtídzë'ë.

⁴⁰ Marta na' bubu'bugu'ínu, zían dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxi'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbu' rugu'í'ide'enu', en zían le ruí'i ládxi'u' runu'.

⁴² Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' biti' udúa queébi'.

11

Ca ral-la' ulídzaru'-në' Dios
(Mt. 6:9-15; 7:7-11)

¹ Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios gü'í'ientu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios gü'í'ilenli'-në' didza', guli'ná: Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxi'u' Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu' ca netu' ca' runiti lotu' nupa tua' dö' queëtu'.

Biti' gu'u lataj si' bë' tu' xihui' netu', pero busölá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': “Böcha'a, benna quia' tsonna yöta xtila

⁶ tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'.”

⁷ ¿Naru' ubi'ë didza' caní bönni' na' zoë' yu'u, guíë' lë': “Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'?”

⁸ Neda' rea' libí'ili': Sal-la' biti' chasë' bi unödzejë' queë' tu' náquië' böchi' luzë'ë, pero chasë', en unödzejë' queë' idutë le riquinnë' para cabirö upízxjanë' lë'.

⁹ Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'.

¹⁰ Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

11 'Channö zoë' nu bönni' ládjali', en náquië' xuz, ate' channö zxi'inë' inábibi' lë' yöta xtila, ¿naru' unödzjatsë' queëbi' guiöj? Channö inábibi' lë' tuba' böla, ¿naru' unödzjatsë' queëbi' bëla?

12 Channö inábibi' lë' dxita que böra, ¿naru' unödzjatsë' queëbi' xöjnö'?

13 Caní naca, nácali' libí'ili' huiá' dö', pero nözili' unödzjali' quégacabi' zxi'inili' le naca dxi'a. Nácatërö löza Xúzili' zoë' yehua' yubá gunnë' queëli' Dios Bö' Lá'ayi, núlöli' inábili' Lë'.

Ta'nnë' runë' dxin Jesús len yöl-la' huáca que tu' xihui'
(Mt. 12:22-30; Mr. 3:19-27)

14 Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönachi nacuá' ni'.

15 Bal-la bönachi nacuá' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

16 Ia'bal-la bönachi na' gulë'ëni ila'zí' bë' Jesús, ate' gula'nabi Lë' gunë' tu le gaca bë' le za' yehua' yubá.

17 Réquibe'enë' Jesús le ta'zá' ládxi'gaquië', ate' rë' légaquië':

—Gátitës ga ta'nná be'e bönachi luzë'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacuá' tu yu'u, údxi quéguequi.

18 Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'?

19 Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libí'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'.

20 Channö neda', len yöl-la' huáca queë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

21 'Cate' tu bönni' nál-la dë lu në'ë le rudí'inë', en rapa chi'ë lidxë', naca chi'i dërö le dë queë'.

22 Na'a, channö zë'ë ia'tué' bönni' nál-latërë' ca lë', en ucul-lë' lë', ní'irö cuë' yúgu'të le rudí'inë', lë na' ruzxöni ládxi'ë, ate' quísië' le dë queë' bönni' na'.

23 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' rudxín xilataj
(Mt. 12:43-45)

24 Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguila'j ga uzí' ladxí'. Channö cabí idzöli que, inná: "Huöja' xilatja' ga ni' birúaja'."

25 Cate' rudxín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'.

26 Ní'irö reaj, en röjxí' ia'gadxi bö' xihui', nácacatërö xihui' ca le, ate' ta'yú'u bönni' na'. Na'a, le raca queë' bönni' na' nayáli'tërö ca le guca queë' zí'alö.

Le naca bica' ba le naca idú

27 Tsanni ni' ru'ë Jesús didza' ni, tu nigula nútsa'nu ladaj bönachi zían na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

28 Bubi'ë didza' Jesús, gunné':

—Nácacatërö bica' ba nupa ta'yöni xtídzë'ë Dios, en tun ca rna.

Ta'nábinë' Jesús gunë' le gaca bë' nuzxi náquië'

(Mt. 12:38-42; Mr. 8:12)

29 Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'.

30 Ca na' guca queë' Jonás, gúquië' tu le naca bë' lógaca bönachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a.

31 Cate' idxín dza ichúguië' Dios quégaca bönachi ila'guí' ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsölá'a ga ridödi gubidza beo' ziaga, ate' le bennu uluí' nabága'gaca bönachi ni xíguia', tu' bídanu lënu, birúajnu ga naca zi'tu' para uduzë' náganu didza' réajni'i bë'ë Salomón, bönni' gunná bé'enë' bönachi Israel, pero na'a, zoa' neda' ni, en nayëpisëtëra' ca Salomón na'.

32 Lësca' caní, Dios uchisë' bönni' gula'cu'ë yödzö Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' uluí' nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a zoa' neda' ni, en nayëpisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

33 Gunnë' ca' Jesús:

—Cate' nu ruquela' guí', biti' rigú'u le ga nagachi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'.

34 Guiöj loru' naca ca tu le rigú'u bení' lu icja ládxi'do'oru'. Channö guiöj lo' naca dxi'a, idúteo' yudzu le naca bení', pero channö naca xihui' guiöj lo', idúteo' yudzu le naca chul-la.

35 Ben chi'i cuinu' na'a, para cabí huóaca chul-la lè na' rigú'u bení' lu icja ládxi'do'o.

36 Caní naca, channö idúteo' nalísinu' le naca bení', en biti' bi zóalen lí' le chul-la, yúgu'tè ilé'enu' dxi'a ca raca cate' ruzení' quiu' guí'.

Jesús ruzéqui'ë yugu' bönni' yudo' didza'
(Mt. 23:1-36; Mr. 12:38-40; Lc. 20:45-47)

37 Cate' budxi bē'ë didza' ni Jesús, tu bönni' yudo' fariseo bulidzē' Lē' para tsöjtágulenē' lē'. Cate' guyáziē' Jesús lidxē' bönni' yudo' na', gurō'ë rahuē'.

38 Cate' bönni' yudo' fariseo na' bilé'enē' Lē', bubáninē' tu' cabí gudibi nē'ë Jesús cate' si' gahuē'.

39 Xanru' rē' lē':

—Libí'ili', bönni' yudo' fariseo, riguibí cuinli' ca riguibíli' láhuilögaca le rē'aji ráhuili', pero lu icja ládxi'do'oli' ruhuídi'li', en rizá' ládxi'li' le ruá' dö'.

40 Libí'ili', bönni' biti' réajni'ili'. ¿Naru' cabí nözili', Nu ben le zoa láhuisō ben ca' le yu'u lē'elō?

41 Na'a, gulí'gún gun le dē queēli', ate' ní'irō huóaca dxi'a yúgu'tè le dē queēli'.

42 'Bica' bayechi' libí'ili', bönni' yudo' fariseo. Riguíz'xjali' que yudo' tu cō' huéaj tu' chi cō' le rizí'ili' que xōhuéaj, en que guixi' ruda, en quégaca guixi' cuando', pero rudōdisili' le naca tsahui', en yōl-la' nadxi'í queēli' Dios. Yugu' lē' ni run bayudxi gunli', en biti' ucá'anali' ia'zica' lē' na' runli'.

43 'Bica' bayechi' libí'ili', bönni' yudo' fariseo. Rē'ënili' cō'ōli' gapa naca lo lu yu'u ga rudúbili' rusédali' queē' Dios, en rē'ënili' ulu'lidza bōnachi libí'ili' ba zxōn gapa naca láhuilöguequi bōnachi.

44 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'ísō tsahui' cuinli', tu' nácali' ca náagaca yeru ba quégaca nupa nátigaca le cabí nalá'gaca, ate' ta'dá bōnachi láhuigaca yeru ba na', en biti' téquibe'e.

45 Ní'irō ubi'ë didza' tu bönni' yudo' usedi raquiē' xibá queē' Moisés. Rē' Jesús:

—Bönni' Usedi, cate' rnno' caní, netu' ca' runu' zi'.

46 Jesús rē' lē':

—Bica' bayechi' ca' libí'ili', bönni' yudo' usedi rácali' xibá queē' Moisés, tu' rusubága'gacali' bōnachi tu yua' zi' le cabí gaca nu guá', pero libí'ili' calēga láti'do'os biti' ruláhuili' le len ná'ali'.

47 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'.

48 Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

49 'Que læ ni na', lu yöl-la' réajni'i queë', Dios gunnë' caní: "Isöl-la'a queëli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'."

50 Caní gunë' Dios tu' uchi'a usöröë' quégaca bönachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca bönachi légaquië' cate' gusí lo rata' yödzölió,

51 ga gusí lo nu bëti Abel, ga bidxintë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu'zégui'gaquië'-ba' böa' bëdxido' lahuë' Dios, en ga dë lataj lá'ayi. Que læ ni na', rea' libí'ili', Dios uchúguë' quégaca bönachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

52 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxí'ini guíë que lataj ga ta'dzöli bönachi yöl-la' réajni'i. Libí'ili' biti' riyázali', ate' ruzága'li' xinözigaca nupa tē'ëni ila'yaza.

53 Cate' Jesús budxi bë'lenë' légaquië' didza' ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zían le taca,

54 en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'isö tsahui' cuini

1 La' dza na' bulu'dubi zían gayuá' bönachi ga zoë' Jesús ga bidxintë ta'rölisö luzë'eguequi bönachi na'. Ní'irö gusí lahuë' Jesús rë' yugu' bönni' usëda queë' cazë', rnnë':

—Gulí'gún chi'i cuinli' que le naca ca cúa zi que yöta xtila quégaquië' bönni' yudo' fariseo, le naca yöl-la' rulu'isö tsahui' cuini quégaquië'.

2 Biti' bi dë le naca balándo'os le cabí ilá' lahui, en biti' bi dë le nagachi' le cabí gaca bë'.

3 Que læ ni na', yúgu'të le chigunnáli' ga naca chul-la, ila'yöni bönachi ga naca lu bení, ate' didza' bë'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'
(Mt. 10:28-31)

⁴ Gunně' ca' Jesús:

—Böcha'ado', rea' libí'ili': Biti' gádxili' bönni' tútigaquië' bönachi, ate' tödi na' bíti'rö bi gaca ilunë' quéguequi.

⁵ Uluí'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queéli', en tödi na' dë lu në'ë yöl-la' unná bë' chú'unë' libí'ili' lu guí' gabila. Ön, rea' libí'ili', guli'gadxi Nu na'.

⁶ 'Túti'gaquië'-ba' gáyu'ba' biguínido' len chopa dumí lásido'. Biti' ral-la ládxe'ë-ba' Dios tu biguínido' na'.

⁷ Lësca' caní, yúgu'të guitsa' ícjali' nabábagaca lahuë' Dios. Que lë ni na', bití' gádxili'. Nazáca'tëröli' libí'ili' ca zianba' biguínido'.

Nupa ta'nnasö néquiquequi queë' Jesús

(Mt. 10:32-33; 12:32; 10:19-20)

⁸ Gunně' ca' Jesús:

—Rea' libí'ili': Yúgu'të bönni' ta'nnë' néquiquequinë' quia' neda' lógaca bönachi, lësca' neda', Bönni' Guljë' Bönachi, innía' néquiquequinë' quia' lógaquië' gubáz lá'ayi queë' Dios,

⁹ ate' bönni' ta'dá'baguë'ë néquiquequinë' quia' lógaca bönachi, lësca' neda' tá'baga'a néquiquequinë' quia' lógaquië' gubáz lá'ayi queë' Dios.

¹⁰ Yúgu'të nupa bi ila'nnë quia' neda', Bönni' Guljë' Bönachi, gaca uniti lahuë' Dios léguequi, pero nu innë zi' queë' Dios Bö' Lá'ayi, bití' uniti lahuë' Dios nu na'.

¹¹ 'Cate' ila'ché'ë libí'ili' gapa naca lu yu'u ga tu'dubë' bönni' judío, en tu'sëdë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', bití' ubi uguí'ili' nacxi gunli' o bizxi didza' ubí'ili', o bizxi innali'.

¹² La' dza ná'asö usédinë' Dios Bö' Lá'ayi libí'ili' le ral-la' innali'.

Huáca gun yöl-la' tsahui' queëru' ga gal-la ládxi'ru'-në' Dios

¹³ Tu bönni' nútsë'ë ladaj bönachi zían na' rë' Jesús, rnnë':

—Bönni' Usedi, gudxë' böcha'a gunnë' uláz quia' le guta' queë' xuztu'.

¹⁴ Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queéli'?

¹⁵ Ní'irö Jesús gudxë' bönachi nacúa' ni', rnnë':

—Buli'yútsöca'. Guli'gún chi'i cuinli' para cabí' uhuí'di'li'. Le uzi'ë xibé nu bönni' bití' nácasö le zían le dë queë'.

¹⁶ Ní'irö Jesús bë'lenë' légaquië' didza', bucúdzu'ë didza', rnnë':

—Zoë' tu bönni' rilé'enë' yöl-la' tsahui' queë', ate' runöd'zjada' gulapa lu xiyüë'.

17 Ní'irö guzá' ládxë'ë bönni' na', rnnë': "¿Nacxi guntsa'? Biti' dë ga gapa chi'a le rulá' quia'."

18 Ní'irö rnnë': "Caní' guna'. Uquínnaigaca' yu'u ga rapa chi'a le rulá' quia', ate' guna' yugu' yu'u zxöntëro ca', ate' gapa chi'a le rulá' quia' ni', len yugu' le dë quia'."

19 Ní'irö gaca guíe cuina': Chidëda' quia' zían le chinutuba', le gáhuida' zían iz. Uzí' ládxa'a. Guí'aj gahua', en udzëjada'."

20 Ní'irö Dios rë' lë': "Li', bönni' bití' bi nözinë'. Na'a dzö' gátíu'. Na'a, ¿nuzxi caz guequi que, lë na' chinutubu'?"

21 Caní' raca queë' bönni' rutubë' la' queëzë' yöl-la' tsahui', en bití' runë' le naca ca yöl-la' tsahui' lahuë' Dios.

Dios run chi'ë yugu' bönachi queë'

(Mt. 6:25-34)

22 Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Bití' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'.

23 Nácarö lesaca' yöl-la' na'bán queëli' ca le ráguli', ate' nácarö lesaca' idú le nácali' ca lari' ráculi'.

24 Bulí'yutëz ca raca quégacaba' boíquiaj. Bití' tázaba', en bití' ta'lápaba', en bití' nacuá' quégacaba' ga ilún chí'iba' le rulá' quégacaba', pero Dios rugahuë' légacaba'. ¿Naru' cabí nazáca'tëröli' libí'ili' ca yugu' biguínido'?"

25 ¿Nuzxi caz bönni' ládjali' gaca gunë' ga soë' ibanë' ia'tú chí'ido'os tu' ruúbi ruguí'í ládxi'da'ahuë'?"

26 Que lë ni na', channö cabí gaca gunli' lë ni naca cuídi'sö, ¿bizx que ruúbi ruguí'ili' ni'a que le naca zxöntëro'?"

27 'Bulí'yutëz ca ta'zxön yöjdo'. Bití' tun du lari', en bití' taba lari', pero rea' libí'ili', bití' gúcarö lachi le gúcuë' Salomón ca nácgaca yöjdo' ni, sal-la' gúta'da' yöl-la' tsahui' queë'.

28 Channö Dios runë' lachi yöj guíxi'do' rögaca na'a la' guixi', ate' cuxö huidzaj ila'gu'ë léguequi lu guí', ¿naru' cabí gunë' le nácarö dxi'a queëli', libí'ili' na' bití' réajlë'ëli' Dios idú ládxi'li'?"

29 Que lë ni na', bití' güf'í ládxi'li' le ral-la' gáguli', en le ral-la' guí'jali', en bití' ubi uguí'í ládxi'do'oli'.

30 Yúgu'të lë ni ta'guilaj bönachi yödzülió ni, pero chinöz quëzinë' Xúzili' Dios le riquínili'.

31 Gulí'güí' ládxi'li' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

Yöl-la' tsahui' rigú'uru' yehua' yubá

(Mt. 6:19-21)

32 Gunnë' ca' Jesús:

—Bití' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxë'ë Xúzili' Dios gunnë' queëli' lataj tsú'uli' ga ni' rinná bë'ë Lë'.

33 Guli'guti' le dē queēli', en buli'nödzej quégaca bönachi yechi'. Caní gaca, gunli' queēli' yōxaj dumí le cabí gaca ditaj, en cú'uli' yöl-la' tsahui' na' yehua' yubá le biti' ubidxi udú, ga ni' biti' idxinē' bönni' gubán, en biti' usunítiba' böa'do' le.

34 Ga ni' dē yöl-la' tsahui' queēli', ni' guí'i lādxi'li' idxinli'.

Ral-la' sóaru' ban ladxí'

35 Gunné' ca' Jesús:

—Guli'sóa sina', en guli'quela' guí' le uzení' queēli'.

36 Guli'gaca ca bönni' huen dxin ta'bözē' dza huödē' xángaquiē', bönni' sa'yéajē' laní que yöl-la' rutsaga na', para cate' udxinē', en ulidzē', la' ila'sálatē' queē' tsu'ē.

37 Bica' bágaca huen dxin na' ila'cu'ē ban ladxí' cate' huödē' xángaquiē'. Le nácatē rea' libí'ili', upá'a cuiné' xángaquiē' na', ate' gunē' ga ila'bö'ē ga ilahuē', ate' cu'ē le ilahuē'.

38 Sal-la' huödē' cate' chiral-la o idú guluhuēla, channō idixáquiē' légaquiē' nacu'ē ban ladxí', bica' bágaca huen dxin na'.

39 Lē ni ral-la' inözili'. La'tu' nōzinē' xan yu'u bizxi dza huadxinē' bönni' gubán, usubán lādxi'ē, en biti' gu'ē lataj bönni' na' udxíē' yeru lidxiē', para cabí cuanē' le dzō'ō lidxiē'.

40 Que lē ni na', guli'sóa ban ladxí' ca' libí'ili', tu' huōda' neda', Bönni' Guljē' Bönachi, tu dza biti' ribözali' neda'.

Bönni' huen dxin tsahui', en bönni' huen dxin biti' náquiē' tsahui'

(Mt. 24:45-51)

41 Ní'irō Pedro gunábinē' Jesús, rnnē':

—Xan, ¿naru' reo' nétu'sō lē ni rucúdz'u didza', o reo' ca' caní yúgu'tē bönachi?

42 Rē' Xanru' lē':

—¿Nuzxi na' bönni' huen dxin tsahui', en réajni'inē', dē lu nē'ē uláz queē' xanē'? Bönni' ni, xanē' udödē' lu nē'ē lidxiē' para cate' gála'rō ilahuē' bönni' nacu'ē lidxiē', gu'ē que queégaquiē' le ilahuē'.

43 Bica' ba bönni' huen dxin na' cate' huödē' xanē', idixáquiē' lē' runē' caní dxin na' nudödē' lu nē'ē.

44 Le nácatē rea' libí'ili', udödē' xanē' lu nē'ē bönni' huen dxin tsahui' na' idutē le dē queē'.

45 Channō guéquinē' bönni' huen dxin na' huadzenē' huödē' xanē', ate' isí lahuē' gu'ē dō' quégaquiē' ia'zica'rē' huen dxin, bönni' en nigula, en isí lahuē' guí'aj gahuē', en súdxinē',

46 ní'irō huödē' xanē' bönni' huen dxin na' cate' biti' ribözē' lē', en cate' biti' réquibe'enē', ate' usaca' zí'ē bönni' huen dxin biti' náquiē' tsahui' na', en ichúguiē' queē' qui'i sáquiē' ca narugu quégaquiē' bönni' biti' ta'yéajlē'.

47 'Bönni' huen dxin na' nōzinē' le ré'ēnē' xanē', en biti' zoē' sina', en biti' runē' ca rnnē' xanē', bönni' ni, quínitērē' xanē' lē'.

48 Channö cabí nõzinë' tu bönni' huen dxin le rë'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxë'ë lë' le zxön, le zxöntëro ca' unabë' xanë' lu në'ë bönni' huen dxin na'.

Le náquië' Jesús gun ga ila'rúaj choplö bönachi
(Mt. 10:34-36)

49 Gunnë' ca' Jesús:

—Bida' neda' dujéna' ga tsegui guí' yödzölió ni, en caba ládxa'a chinaguéla' guí' na'.

50 Na'a, dë tu le ral-la' qui'i saca'a le naca ca tu le idílida' nisa, ate' rö'a böniga ga idxintë gaca caní quia'.

51 ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' dulëquia' le gun ga ila'rúaj choplö bönachi.

52 Na'a isí lo ulu'lá'alen luzë'eguequi gayu' bönachi nacuá' tu yu'u. Tsonnë' ila'dá'baguë'ë chopë' nazi'igaquië' xtídza'a, ate' chopë' na' ila'dá'baguë'ë tsonnë' na'.

53 Nu bönni' zóabi' bi'i bönni' queë' tá'baguë'ë xzí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu xzí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' xzí'ininu.

Le náca gaca bë' le taca na'a dza
(Mt. 16:1-4; Mr. 8:11-13)

54 Jesús gudxë' ca' bönachi zían nacuá' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guiöj”, ate' caní raca.

55 Cate' recja bö' za' saca' ga ridödi gubidza beo' ziaga, rnnali': “Udzá'a na'a”, ate' caní raca.

56 Libí'ili', bönni' ruluí'isö tsahui' cuinli'. Nözili' le ruluí'i le raca lúzxiba, en le raca luyú ni, pero bití' réquibe'eli' le ruluí'i le náca gaca bë' taca dza ni zóaru' na'a.

Ral-la' ugá' analenru' tsahui' nu rilé rë'u
(Mt. 5:25-26)

57 Gunnë' ca' Jesús:

—¿Bizx que bití' ruchi'a rusöröli' la' libí'isili' ca naca le naca tsahui'?

58 Channö zoa nu bi unabi yudxi li', ate' zéajli' idxinli' yúlahui', bë' ladxi' ugá' analenu' tsahui' nu na' tsanni ni' yú'uli' nõza, para cabí uzegui li' lahuë' bönni' uchi'a usöröë' libí'ili', ate' bönni' uchi'a usöröë' na' udödë' li' lu në'ë bönni' rusayjë' lidxi guié, ate' bönni' na' rusayjë' lidxi guié cu'ë li' lidxi guié na'.

59 Rea' li', biti' uruju' ni' cate' údxirö quizzju' yúgu'të dumí lásido' ral-lu'u que nu na'.

13

Run bayudxi ubí'i ládxi'ru'

¹ La' dza ní'isö bila'dxinë' bönni' ta' guíxjöi'inë' Jesús ca benë' Pilato, bëtië' bal-lë' bönni' Galilea, en guzxi'ë rön quégaquië', le bugútsi'në' xichõngacaba' böa' bëdxi chigulútië' légaçaba' para ila'gu'ë xichõngacaba' na' lahuë' Dios.

² Bubi'ë didza' Jesús, rë' légaquië':

—¿Naru' réquili' guláçarë' bönni' dul-la' bönni' Galilea na' ca ia'zica'rë' bönni' Galilea, tu' gula'gu'i gula'zaquië' caní?

³ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

⁴ Lëscá' caní guca quégaquië' chixxunë' bönni' ni', yöjbaga' yu'u sibi na' nazí'i le Siloé légaquië', ate' gulátië'. ¿Naru' réquili' gula'bága'tërë' légaquië' xíguia' ca ia'zica'rö bönachi nacua' Jerusalén?

⁵ Rea' libí'ili': ¡Calëga! Channö cabí ubí'i ládxi'li', nítili' ca' yúgu'tëli'.

Rucúdzu'ë didza' Jesús que yaga higo biti' bi ribía

⁶ Ní'irö bucúdzu'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Rõjtiljë' le ribía yaga na', pero biti' bi ridzölinë'.

⁷ Ní'irö gudxë' bönni' runë' dxin lu xiyúë' na', rnnë': "Chiguca tsonna iz rida' rududilja' le cuía yaga higo ni, en biti' bi ridzöliða'. Guchugu le. ¿Bizx que run nigui luyú ni?"

⁸ Ní'irö bubi'ë didza' bönni' huen dxin na', rë' lë': "Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani.

⁹ Channö cuía yaga ni, gaca dxi'a, pero channö cabí bi cuía, ní'irö ichugu' le."

Ruúnë' Jesús tu nigula ré'enu cate' naca dza lá'ayi

¹⁰ Tu dza rusédinë' Jesús bönachi nacua' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquië'.

¹¹ Zóanu tu nigula ni' chiguca chixxunu' iz ré'enu, tu' yu'u lënu bö' xihui' run ga te'e bönachi, ate' nayéçhutica' sinu ridanu, en biti' ca' raça ulí cuinnu.

¹² Cate' bilé'enë'-nu Jesús, bulidzë'-nu, rnnë':

—Nigúlado', chiböáçu' que yödzöhuë' quiu'.

¹³ Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba.

14 Ní'irö guléné' bönni' lo que yu'u ga na' tu'dubë' tu'sädë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacua' ni', rnnë':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

15 Ní'irö bubí'ë didza' Xanru', rnnë':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bédxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilé'ajba' nisa?

16 Nácanu nigula ni xzí'ini xi'söë' Abraham, ate' idú chixx-unu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

17 Cate' bë'ë didza' ni Jesús, bulu'tu'inë' yúgu'të bönni' nacu'ë ni' ta'lenë' Lë', pero bulu'dzeja ia'zica'rö bönachi, yúgu'të nupa nacua' ni', tu' ta'lé'enë' yugu' le zxön runë' Jesús.

Rucúdzü'ë didza' Jesús que xisedo' mostaza

(Mt. 13:31-32; Mr. 4:30-32)

18 Ní'irö rnnë' Jesús:

—¿Nacxi caz raca rizxön le rinná bë'ë Dios, o bizxi uséqui'tseru' le?

19 Raca ca raca que xisedo' mostaza, le guzxi'ë tu bönni', ate' guzë' le ga naca lu xiyüë'. Guzxön yaga mostaza na', en guca ca tu yaga zxön, ate' bila'dxinba' biguínido', gulunba' xcá'agacaba' lu ni'a në'e yaga mostaza na'.

Rucúdzü'ë didza' Jesús que cúa zi que yöta xtila

(Mt. 13:33)

20 Lëscá' caní rnnë' Jesús:

—¿Bizxi caz uséqui'tseda' le rinná bë'ë Dios?

21 Naca ca cúa zi que yöta xtila, le guzxi'ínu tu nigula, en bugútsi'nu tsonna cö' cúa yöta xtila, ate' guyazxaj idütë cúa na'.

Tu ga tödiru' le naca guído'

(Mt. 7:13-14, 21-23)

22 Tsanni ni' yu'ë nöza Jesús, sa'yéajë' Jerusalén, ridödë' yugu' yödzo zxön, en yugu' yödzo'do', ate' rusédinë' bönachi nacua' gapa na'.

23 Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?

Jesús rë' nupa nacua' ni', rnnë':

24 —Guli'gü'i'í ládxi'li' tsú'uli' saca' ga nu ridödi le naca guído', tu' rea' libí'ili': Zián nupa ilé'ëni ila'yaza ni', pero bití' ila'zéqui'në'.

25 Tödi chasë' Xan yu'u, en usayjë' yu'u, isí loli' libí'ili' na' zóali' ní'ilö ulídzali'-në' ra' yu'u na', ate' guiéli'-në': “Xan, Xan,

gusalaj queëtu.” Ní’irö ubi’ë didza’ Lë’, en guié’ libí’ili’: “Biti’ nözda’ nuzxi libí’ili’.”

²⁶ Ní’irö isí loli’ innali’: “Güf’i gudágulentu’ Li’, ate’ busédinu’ gapa naca lu yé’ëyi queëtu’.”

²⁷ Ní’irö guié’ libí’ili’: “Rea’ libí’ili’, bití’ nözda’ gazxi bönachi libí’ili’. Guli’cuíta ga zoa’, yúgu’tëli’ ruá’ali’ dö’.”

²⁸ Ní’irö cödxí yéchi’li’, en gagu zxea láya’li’ cate’ ilé’egacali’-në’ Abraham, en Isaac, en Jacob, en yúgu’të bönni’ gulu’ë didza’ uláz queë’ Dios, nacu’ë ga ni’ rinná bë’ë Dios, pero libí’ili’ sóali’ ní’llo.

²⁹ Ila’dxín bönachi ila’rúaj saca’ ga rilén gubidza, en saca’ ga ribía gubidza, en saca’ ga za’ bö’ ziaga, en saca’ ga ridödi gubidza beo’ ziaga, ate’ ila’bö’ë ilahuë’ ga ni’ rinná bë’ë Dios.

³⁰ Ní’irö ilaca lo bal-la bönachi nácagaca cá’asö na’a, ate’ ulu’gá’ana cá’asö bal-la nupa nácagaca lo na’a.

Ribödxí yechë’ë Jesús ni’a quégaca bönachi Jerusalén

(Mt. 23:37-39)

³¹ La’ dza ní’isö bila’dxinë’ bal-la bönni’ yudo’ fariseo ga zoë’ Jesús en të’ Lë’:

—¡Burúaj! ¡Buzxunnaj ni! ¡Rë’ënë’ Herodes gútië’ Li’!

³² Jesús rë’ légaquië’:

—Guli’tséaj, guli’tsöjödxë’ bönni’ na’ náquië’ ca tuba’ böza’, innali’: “Buyútsöca’, rubéajgaca’ bö’ xihui’, en ruúna’ bönachi na’a, en cuxö, en cate’ gaca lidzaj, údxi guna’ dxin quia’.”

³³ Run bayudxi tséajlensa’ ca’ nöza na’a, en cuxö, en huidzaj, ate’ idxina’ Jerusalén, tu’ tútigaquië’ bönni’ tu’ë didza’ uláz queë’ Dios ni’.

³⁴ ‘Libí’ili’, zóali’ Jerusalén. Rútigacali’-në’ bönni’ tu’ë didza’ uláz queë’ Dios, en ruládxí’gacali’-në’ guiöj bönni’ gubáz risöllë’ë Dios ga zóali’. Cate’ xö zían luzuí gú’unida’ utuba’ libí’ili’ quia’ ca runba’ yöjede, rutúbiba’ börado’ queëba’ zxan xíliba’, pero bití’ gú’unili’.

³⁵ Buli’yútsöca’, cá’asö ugá’ana lídxili’, ate’ rea’ libí’ili’, bíti’rö ilé’eli’ neda’ cate’ idxinrö dza innali’: “Bica’ ba Nu na’ za’ uláz queë’ Xanru’.”

14

Ruúnë’ Jesús tu bönni’ ré’enë’ huë’ gui

¹ Cate’ naca dza lá’ayi quégaquië’ bönni’ judío, guyu’ë Jesús lidxë’ tu bönni’ unná bë’, bönni’ yudo’ fariseo. Rö’ë Jesús rahuë’, ate’ nacu’ë bönni’ yudo’ fariseo ni’ ta’në’ë Lë’.

² Zoë’ ca’ tu bönni’ ré’enë’ huë’ gui ga na’ zoë’ Jesús.

³ Ní’irö Jesús gunábinë’ bönni’ yudo’ usedi táquië’ xibá queë’ Moisés, en yugu’ bönni’ yudo’ fariseo, rnnë’:

—¿Naru’ dë lataj unru’ nu re’e cate’ naca dza lá’ayi?

4 Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busöl-la'të' lë'.

5 Ní'irö Jesús rë' yugu' bönni' yudo' na', rnnë':

—Channö nu bönni' ladjali' nacuá'aba' queë' böa' bëdxi, ate' ibíxiba' tuba' lu yeru, ¿naru' cabí tsöjléajtë'-ba', sal-la' naca dza lá'ayi?

6 Biti' bi didza' guca ulu'bi'ë ca naca lë ni.

Nu cö' lataj lo

7 Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzu'ë didza', ate' rë' légaquië':

8 —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatërë' lo ca li'.

9 Ní'irö bönni' na' bulidzë' li' huidë' ga zu', en guíë' li': "Bë' lataj bönni' ni cö'ë ga zu'", ate' ní'irö lu yöl-la' rutuí' quiu' tsöjchö'u zxánitëlö.

10 Que lë ni na', cate' nu bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lógaca nupa ta'bö'len li' tsözxön.

11 Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

12 Jesús rë' ca' bönni' na' bulidzë' Lë', rnnë':

—Cati' gunu' tu güi'i huagu o tu lanído', biti' ulídzagacu'-në' yugu' böchi' luzó'o, en yugu' bönni' böchu'u, en yugu' dí'a dza quiu', en dzaga yu'u quiu' ta'lé'enë' yöl-la' tsahui' quégaquië', tu' ulu'lidzë' ca' li', ate' caní gaca, ubí'i quiu'.

13 Cate' gunu' tu güi'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la.

14 Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

15 Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

16 Jesús rë' lë':

—Zoë' tu bönni' benë' laní zxön, ate' zían nupa bulidzë'.

17 Cate' chinabá'a la' huagu, gusöl-lë'ë bönni' huen dxin queë' tsöjödxe' nupa na' chinulidzë', gunné': "¡Guli'dál ¡Yúgu'të chinabá'a!"

18 Gula'sí lógaquië' yúgu'të' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj."

19 Ia'tué' rnnë': "Si' guzxi'a gayu' nõzaba' bëdxi, ate' tsöjzxi' bë'a légaçaba' ugúngaca'-ba' dxin. Ráta'yua' lo' gunnu' neda' lataj."

20 Ia'tué' rnnë': "Si' butsaga na'a, en que lë ni na' biti' gaca guída'."

21 Cate' böajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulënë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yë'ëyi, en gapa naca la' nõza que yödzo ni, ate' ichë'u yugu' bönachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la."

22 Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë' lataj."

23 Ní'irö xanë' gudxë' bönni' huen dxin na', rnnë': "Guyéaj gapa naca la' nõza, en gapa naca nõza lasi, ate' ben bayudxi guídigaca nupa nacuá' ni' para íl' lidxa,"

24 tu' rea' libí'ili': Biti' gahuë' que laní quia' nitué' bönni' ni bulidza' zí'alö."

Le sáca'ru' cate' zéajlenru'-në' Cristo

25 Yugu' dza ni' röjácálen Jesús bönachi zían, ate' buécjë' Jesús, en rë' légaquië':

26 —Channö guídalenë' neda' tu bönni', en biti' idxí'irönë' neda' ca nadxí'inë' xuz xinë'ë, en nigula queë', en yugu' zxi'inë', en yugu' bi'i böchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'.

27 Nu bönni' biti' gáquië' ca tu bönni' sa'yéajë' söjtë'ë lë'e yaga cruz, ate' të'ë neda', biti' gaca gáquië' bönni' usëda quia'.

28 Channö zoë' nu bönni' ladaj libí'ili' guë'ënnë' gunë' tu yu'u zían cuía, çnaru' cabí cö'ë zí'alö ulabë' gáca'xi dumí ralla' utöë' para inözinë' channö dë' queë' tsca le riquinnë' para údxi gunë' yu'u na'?

29 Channö cabí gunë' caní, en isí lahuë' cuéquië' xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë',

30 ila'nná: "Bönni' ni gusí lahuë' runë' yu'u, pero biti' guca údxi gunë' le."

31 Lë'sca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'tué' bönni' rinná bë'ë, çnaru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ni' nachë'ë galaj milë' bönni', ate' lë' chi milsë' bönni' nachë'ë?

³² Channö cabí séqui'në', cate' ni' zoë' zi'tu' ia'tué' bönni' na' rinná bē'ë, isöl-lē'ë bönni' gubáz queë', ate' inábinē' lē' nacxi ral-la' gunē' para ulu'dzáguiē' dxi'a.

³³ Caní naca, channö zoë' nu bönni' ladaj libí'ili' biti' ucá'anē' yúgu'tē le dē queë', biti' gaca gáquiē' bönni' usēda quia'.

Zödi' le naniti yöl-la' siná'a que

(Mt. 5:13; Mr. 9:50)

³⁴ Gunnē' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a?

³⁵ Bítirō nazaca' zödi' na', calēga para luyú, en calēga para ga rirú'uniru' bëbu, pero chú'unaru' le ní'ilō. Nu zoa nagui, en riyöni, ral-la' uzē nagui nu na'.

15

Rucúdzu'ë didza' Jesús ca naca queë'ba' bö'cu' zxila' gunítiba'
(Mt. 18:10-14)

¹ Bulu'dubē' yúgu'tē bönni' tu'quízxjē' lázagaca bönachi, en yugu' bönni' cá'asō ga zoë' Jesús para ulu'zē náguiē' Lē'.

² Que lē ni na' yugu' bönni' yudo' fariseo, en yugu' bönni' yudo' usedi gula'nnē' queë' Jesús, ta'nnē':

—Bönni' ni runē' bal yugu' bönni' dul-la', en rágulenē' légaquiē'.

³ Ní'irō bucúdzu'ë didza' Jesús, rē' légaquiē':

⁴ —Channö zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'anē' ia'zica'rōba' tápalalaj yu' chēnnaba' na' ga naca lu lataj cá'asō, ate' tsejē' tsöjdiljē'-ba' bö'cu' zxila' na' nanítiba', cate' udzölrönē'-ba'?

⁵ Cate' udzölinē'-ba', lu yöl-la' rudzeja queë' ixóé'-ba' ya' zxicjē',

⁶ en cate' udxinē' lidxē' utubē' yugu' böchi' luzē'ë, en yugu' dzaga yu'u queë', ate' guíē' légaquiē': “Buli'dzéjalen neda', tu' chibudzövida'-ba' bö'cu' zxila' quia' gunítiba'.”

⁷ Rea' libí'ili': Lēsa' caní gácatērō yöl-la' rudzeja yehua' yubá ni'a queë' tuē' bönni' dul-la' ubí'i ládxi'ë ca gaca quégaquiē' tápalalaj yu' chēnnē' bönni' tsahui', bönni' téquinē' biti' naquíniguequinē' ulu'bí'i ládxi'gaquiē'.

Rucúdzu'ë didza' Jesús que tu dumí guniti

⁸ Rnnē' ca' Jesús:

—Channö zóanu tu nigula, dē queënu chi dumí plata, en channö initi tu dumí plata na', ¿naru' cabí uquéla'nu guí, ate' ulúanu yu'u, uguilaj yúdxinu le cate' udzölrönu le?

9 Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Buli'dzéjalen neda', tu' chibudzöliida' dumí plata na' guniti."

10 Rea' libí'ili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxi'ë.

Rucúdzu'ë didza' Jesús queëbi' tu bi'i gunítibi'

11 Rnnë' ca' Jesús:

—Zoë' tu bönni' nacué'abi' chópabi' bi'i bönni' queë'.

12 Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudísië' quégacabi' le dë queë'.

13 Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzö zi'tu', ate' ni' butöbi' dërö le dë queëbi'. Le ruá' dö' benbi'.

14 Cate' chibutöbi' dërö le dë queëbi', guca gubín lu yödzö ga na' zóabi', ate' biyadzaj queëbi'.

15 Ní'irö guyéajbi' yöjsóabi' huen dxin queë' tu bönni' lu yödzö ni', ate' bönni' na' gusöl-lë'ë-bi' ga dë xiyüë' tsöjgágubi'-ba' yugu' cuchi queë'.

16 Guca ládxi'bi' gágubi' guixi' cá'asö na' táguba' cuchi, pero cuntu nu bi bë' le gágubi'.

17 Ní'irö bubí'i ládxi'bi', rnnabi': "Cate' xö bönni' huen dxin nacu'ë lidxë' xuzá', en dëda' le tahuë', pero neda' ni huáti caza' yöl-la' ridún.

18 Uzá'a ni, huöja' ga zoë' xuzá', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' li'.

19 Bítirö naca' neda' lesaca' gaca' zxí'inu'. Ben neda' ca bönni' huen dxin quiu'."

20 Ní'irö guyu'ubi' nöza, söhuöajbi' ga zoë' xúzibi'.

'Cate' ni' zóabi' zi'tu' suzá'abi', bilé'enë'-bi' xúzibi', en buéchi' ládxi'ë-bi'. Carelö yöjzxí'galë'-bi' xúzibi', en yöjnidë' yenbi', gudahuë'-bi' zxixi.

21 Ní'irö zxí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Bítirö naca' neda' lesaca' gaca' zxí'inu'."

22 Ní'irö xúzibi' rë' yugu' bönni' huen dxin queë', rnnë': "Guli'tsöjléajtë lari' nazáca'tërö, en guli'gacu-bi'. Guli'cú'u le nazaca' xibón ná'abi', en buli'dá' huarache ní'abi'.

23 Guli'tsöjzxí'i-ba' bëdxi renni', ate' guli'guti-ba'. Gáguru'-ba', en gunru' laní,

24 tu' guca bi'i bönni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

25 "Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huö'a lu yu'u na'.

26 Ní'irö bulídzabi'-në' tuë' bönni' huen dxin zoë' ni', en gunábibi' lë' bizxi na' raca.

27 Bönni' huen dxin na' rë'ë-bi': "Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxi'a tsáhui'do'."

28 Ní'irö gulébi' bi'i zí'alö na', en biti' gú'unibi' tsú'ubi' yu'u. Ní'irö birúajë' xúzibi', en gúta'yue' lobi' tsú'ubi'.

29 Bubí'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxíla'do' para gü'ilena' xibë yugu' luzá'a.

30 Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'."

31 Ní'irö xúzibi' rë'ë-bi', rnnë': "Zxí'ina', li' zóalen cazu' neda' ate' yúgu'të le dë quia', quiu' nequi.

32 Ben bayudxi gunru' laní, en udzëjaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunitibi' ate' chibulá'abi'."

16

Rucúdzu'ë didza' Jesús queë' bönni' huen dxin biti' náquië' tsahui'

1 Jesús rë' ca' yugu' bönni' dá'gaquië' Lë', rnnë':

—Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zëguië' bönni' huen dxin na' lahuë' xanë', ta'nnë' queë' rutösë' le dë queë' xanë' na'.

2 Ní'irö xan yu'u na' bulidzë' bönni' huen dxin na', en rë' lë': "¿Bizxi didza' ni riyönda' quiu'? Buluí'i neda' le naca bë' dxin nunu', tu' cabirö gata' lu no'o uláz quia'."

3 Ní'irö guzá' lãdxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utuí'da' inaba' nu bi gúnna'sö quia'.

4 Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi.

5 Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?"

6 Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u.

Gurö'ötë ni, en buzúaj ia'tú lu guichi le inná chi-un rö'ö chugu ral-lu'u."

⁷ Gudödi ni' gunábinë' ia'tué', rnnë': "Nazxi li, ¿gáca'xi ral-lu'u?" Lë' rnnë': "Tu gayuá' da'a zxoá' xtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u."

⁸ Réquibe'enë' xanë' na' sína'të benë' bönni' huen dxin biti' náquië' tsahui' na'. Caní naca, nácacacarë' sina' bönni' yödzölió ni lu le tunë' la' légacasë', ca nácacaca bönachi ta'dalen Dios lu bení' queë'.

⁹ 'Neda' rea' libí'ili': Guli'cözalen bönachi dxi'a, ugunli' dxin yöl-la' tsahui' dë queëli' yödzölió ni, para cate' idxín dza ucá'anali' yugu' lë ni, ilunë' libí'ili' bal lataj ni' zóatica'sö.

¹⁰ 'Nu rugún dxi'a dxin tu le cuídí'sö dë lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídí'sö dë lu në'e, biti' ugún dxi'a dxin tu le zxön gata' lu në'e.

¹¹ 'Que lë ni na', channö cabí rugunli' dxi'a dxin yöl-la' tsahui' dë queëli' yödzölió ni, ¿nuzxi caz udödi lu ná'ali' yöl-la' tsahui' le naca idú?

¹² Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

¹³ 'Biti' gaca nitué' bönni' huen dxin gunë' xichíngaca chopa xanë', tu' udí'inë' tuë', en idxí'inë' ia'tué', o gunë' bal tuë', en uzóë' tsölá'alö ia'tué' na'. Biti' gaca gunli' xichinë' Dios, en gunli' ca' dxin para uzí'ili' xibé yöl-la' tsahui' que yödzölió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégaquië', que lë ni na' bulu'titjë' Jesús.

¹⁵ Ní'irö Jesús rë' légaquië':

—Libí'ili' rubéaj dxi'a cuinli' lógaca bönachi, pero nõzinë' Dios le yu'u icja ládxi'do'oli', tu' naca lë na' tun zxön bönachi tu le ruzóë' Dios tsölá'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

¹⁷ 'Sal-la' raca caní, gácarö ila'dödi que lúzxiba, en que luyú ni ca initi tu dídza'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

18 Gunnë' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

19 Ní'irö bucúdu'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' t'ë'aj tahuë' le banéquini.

20 Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' huë'tëzë' rō'ë ra' yu'u queë' bönni' na' rilé'enë' yöl-la' tsahui'.

21 Raca ládxe'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lë'ëba' lu huë' queë' bönni' yéchi'do' na'.

22 Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba.

23 Cate' ni' riguí' rizáque'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguie' Lázaro na' lë'.

24 Ní'irö bē'ë zidzaj didza', rnnë': "Xuza', Abraham, buéchi' ladxi' neda'. Gusöl-la' Lázaro quia' para usubisë' xibön nē'ë, en udusuhuóalë' lúdx'a, tu' riguí' rizáca'a lu guí' ni'."

25 Abraham rē' lë', rnnë': "Zxí'ina', busá' ládxa'u ca guca quiu', buzi'u xibé yöl-la' tsahui' tsanni ni' zu' nabanu', pero Lázaro ni, guca queë' yöl-la' yechi', ate' na'a, ruzí' zxonë' Lázaro ni, pero li' riguí' rizácu'u.

26 Ia'stú, tu ra' guí'a sibi rō', le zoa gatsaj láchui'lö ga ni' zóali' libí'ili', en ga ni zóatu' netu'. Que lë' ni na' nupa nacuá' ni, en ilé'ëni ila'dödi ga zóali' libí'ili', biti' ca' gaca ilunë' ca', en biti' gaca ilida ni nupa nacuá' ni'."

27 Ní'irö bönni' na' bilé'enë' yöl-la' tsahui' rē' lë', rnnë': "Xuza' Abraham, ráta'yua' lo' isöl-lu'u-në' Lázaro tsejē' lidxë' xuzá',

28 tu' nacu'ë gáyu'ë bönni' böcha'a ni'. Gusöl-lë'ë tsöjenë' liná' lo que le raca ni, para cabí guídigaquie' ca' lataj ga ni riguí' rizáca'a."

29 Ní'irö Abraham rē' lë', rnnë': "Dë quégaquie' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquie' na' ral-la' ulu'zë' náguië'."

³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacu'ë, ulu'bí'i ládxi'gaquië'."

³¹ Abraham rë' lë', rnnë': "Channö cabí tu'zë náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

17

Run bönadxi queëru' gunru' ga nu gun dul-la'

(Mt. 18:6-7, 21-22; Mr. 9:42)

¹ Jesús rë' yugu' bönni' dá'gaquië' Lë', rnnë':

—Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'.

² Dxí'arö gaca queë' bönni' na' runë' caní, nu ugal-la' tu guiój riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bí'i néquibi' quia'.

³ Guli'gún chí'i cuinli'. Channö böchi' luzó'o gu'ë dö' quiu', buzéajni'i-në', en channö ubí'i ládxi'ë, buniti lo lë'.

⁴ Sal-la' gadxi luzuí tu dza gu'ë dö' quiu', en gadxi luzuí ca' guidé' ga zu', en guíë' lí: "Rubí'i ládxa'a", ral-la' uniti lo' lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'ërötu'-në' Dios.

⁶ Xanru' rë' légaquië', rnnë':

—La'tu' naca cuídi'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: "Gucuíta ni, en yöjsóa lu nísado'", ate' gun yaga na' ca rnnali'.

Le ral-la' gun nu naca huen dxin

⁷ Gunnë' ca' Jesús:

—Channö zoë' tuë' bönni' ladaj libí'ili', en zoë' queë' tuë' bönni' nadó'o rugá'anë'-ba' bëdxi o rulapë', cate' údxi gunë' xichinë' xanë', ¿naru' huëtsë' xanë' lë', innë': "Gudá, gurö'ö gagu'?"

⁸ ¡Calëga! Caní guíë' lë': "Bupá'a le gahua'. Guzóa sina' cu' u le guí'aj gahua', ate' tódíro na' huáca guí'aj gagu' lí'."

⁹ ¿Naru' huëtsë' bönni' nadó'o queë' na': "Xclenu'", tu' benë' ca gunná bé'enë' lë'? Runi neda', biti' gunë' caní.

¹⁰ Lë'sca' caní gaca queëli'. Cate' chinunli' yúgu'të le gunná bé'enë' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

Chië' bönni' té'enë' huë' nudzu' ruzödi

¹¹ Tsanni ni' yu'ë Jesús nöza, sa'yéajë' Jerusalén, ridödë' gapa dö yödzödo' nabábagaca luyú Samaría, en luyú Galilea.

12 Cate' guyázië' tu yödzo'do', bila'rúajë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë' zí'tu'sö,

13 en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

14 Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i cuinli' lógaca bixúz.

Tsanni ni' sőjáquië', bulu'huöáquië' dxi'a.

15 Ní'irö tuë' bönni' nútsë'ë ladjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ru'ítica'së' zidzaj didza', rigü'ë Dios yöl-la' ba.

16 Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria.

17 Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacua'tsë' ia'zica'rë' bönni' na'?

18 ¿Naru' cabí zoa nu huöda cu'u Dios yöl-la' ba, pero tuzë' bönni' zí'tu' ni?

19 Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

Ca idxín le rinná bë'ë Dios
(Mt. 24:23-28, 36-41)

20 Cate' yugu' bönni' yudo' fariseo ta'nábinë' Jesús bátaxi ralla' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, bití' naca le ilé'eli'.

21 Cuntu nu gaca inná: "¡Ni bidxín!", o inná: "¡Ni' bidxín!" ¡Buli'yútsöca'! ¡Rinná bë'ë Dios lu icja ladxí'do'gaca bönachi!

22 Ní'irö Jesús gudxë' yugu' bönni' usëda queë', rnnë':

—Huadxín dza cate' guë'ënili' ilé'eli' dza huöda' neda', Bönni' Guljë' Bönachi, pero bití' ilé'eli' le.

23 Ila'cuá' nupa ilë libí'ili': "¡Ni zoë'!", o ila'nná: "¡Ni' zoë'!" Bití' tséajli' ni', en bití' tséajlenli' légaquië'.

24 Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi.

25 Zí'alö ca gaca lë ni, run bayudxi quí'i sáca'da', ate' bönachi dza ni zóaru' na'a ulu'cá'ana neda' cá'asö.

26 Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi.

27 Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxi'ingaqië' lu yöl-la' rutsaga na' ga bidxintë dza guyázië' Noé lë'e barco zxön na' nazí'i le arca, ate' bidxintë nisa guiöj usuniti yödzo'lió le busuniti yúgu'të'.

28 Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'.

29 Cate' bidxín dza na' burúajë' Lot lu yödzo Sodoma, böxaj guí' ca tu nisa guiöj, enca' le ruzéguida' nazí'i le azufre, ate' bulu'suniti yúgu'të'.

30 Lësca' caní gaca cate' idxín dza uluí'i lahua' neda', Bönni' Guljë' Bönachi.

31 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', biti' ral-la' huötjë' tsöjzxi'ë le dë queë', ate' nu zoa la' guixi', lësca' caní, biti' ral-la' huöjë' lidxë'.

32 Guli'sá' ládxi'li' ca guca queënu nigula queë' Lot.

33 Nu bönni' rë'ënë' gun chí'ë yöl-la' na'bán queë', unítië' le, pero bönni' udödë' yöl-la' na'bán queë' ni'a quia', udélë'ë le.

34 'Rea' libí'ili': Cate' idxín rëla na', ila'cu'ë chopë' bönni' tsözxön ga tasië', ate' tuë' uduzxi'a-në', en ia'túë' ucá'ana' lë'.

35 Ila'cuá'anu huëtu tsözxön chópanu nigula, ate' tunu uduzxi'a-nu, en ia'tunu ucá'ana'-nu.

36 Ila'cu'ë chopë' bönni' la' guixi', ate' tuë' uduzxi'a-në', en ia'túë' ucá'ana' lë'.

37 Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rë' légaquië':

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröë'

1 Ní'irö bucúdzu'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopa ládxi'ru'.

2 Rnnë':

—Zoë' tu bönni' ruchi'a rusöröë' tu yödzo, bönni' biti' rádxi'në' Dios, en biti' runë' nu bönni' bal.

3 La' yödzo ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnnanu: “Buchí'a busörö le run quia' nu ruá' dö' quia'.”

4 Xidzé biti' gú'unnë' bi gunë' queënu, pero gudödi ni' guzá' ládxi'ë, rnnë': “Biti' rádxi'a-në' Dios, en biti' runa' nu bönni' bal,

5 pero tu' rupízxjanu nigula uzëbi ni neda', que lë ni na' uchi'a usöröa'-nu, para cabí guídatica'sinu ni, en para cabí tödi bë' upízxjanu neda'.”

6 Ní'irö Xanru' rë' légaquië', rnnë':

—Guli'zë nágalí' ca na' gunnë' bönni' ruchi'a rusöröë' na', bönni' biti' náquië' tsahui'.

7 ¿Naru' cabí uchi'a usöröë' Dios bönachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'?

⁸ Rea' libí'ili': La' uchi'a usörötenë' légaquië'. Cate' huöda' neda', Bönni' Guljé' Bönachi, ¿naru' idzövida' nupa ta'yéajlë' neda' luyú ni?

Tu bönni' yudo' fariseo, en tu bönni' uquízxaj

⁹ Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zica'rö bönachi.

¹⁰ Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'tué' na' náquië' bönni' ruquízxjé' lázagaca bönachi.

¹¹ Guzuínë' bönni' yudo' fariseo na', en caní bulidzë' Dios, rnnë': "Dios, rea' Li': Xclenu', tu' cabí naca' ca nácagaquië' ia'zica'rë' bönni', nácagaquië' gubán, en bití' nácagaquië' tsahui'. Ta'guitsjé' xibá que yöl-la' nutsaga na'. Lësca' bití' naca' ca bönni' uquízxaj ni.

¹² Neda' runa' gubasa chopa luzuí tu' xunu' dza huéaj, en runödza' que yudo' tu' cö' huéaj tu' chi cö' que yúgu'të' le rata' quia'."

¹³ Guzóazë' zi'tu' bönni' uquízxaj na', en bití' böázxjanë' ichisa lahuë' uyúë' lúzxiba, pero gudapë' luchu'ë, rnnë': "Dios, buéchi' ladxi' neda', bönni' dul-la'."

¹⁴ Neda' rea' libí'ili': Bóajé' lidxë' bönni' uquízxaj na', nuhuóaqië' tsahui' lahuë' Dios, calëga ia'tué' bönni' ni'. Nútí'tës bönni' run ba zxön cuinë', gunë' Dios ga huöta' igulë', pero nu bönni' rizóë' nöxaj ladxi', gunë' Dios ga gácarë' lo.

Jesús rulidza tsáhuë'ë-bi' yugu' bí'ido'

(Mt. 19:13-15; Mr. 10:13-16)

¹⁵ Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bí'ido' quégaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'.

¹⁶ Ní'irö Jesús bulidzë' yugu' bönni' dá'gaquië' Lë', rnnë':

—Gulí'gü'i-bi' lataj ila'dxinbi' bí'ido' ni ga zoa'. Bití' uzága'li' xinözagacabi', tu' gata' quégaca nupa nácagaca ca bi'í caní lataj ga rinná bë'ë Dios.

¹⁷ Le nácaté' rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', bití' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'

(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxí'a. ¿Bizxi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a.

²⁰ Nöz quëzinu' yugu' le gunná bë'ë Dios:

Biti' gunu' dul-la' le riguitsaj xibá que yöl-la' nutsaga na'.

Biti' gútigacu' bönachi.

Biti' cuanu'.

Biti' innío' que luzó'o le cabí nácatë.

Ben bal xuz xinó'o.

²¹ Bönni' na' rë' Jesús, rnnë':

—Yúgu'të lë ni runa' ga gudela' naca' bí'ido'.

²² Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'të le dë quiu', ate' lë na' si'u bunödzej quégaca bönachi yechi', ate' gata' quiu' yöl-la' tsahui' yehua' yubá. Ní'irö gudá, gudá neda'.

²³ Cate' bönni' na' biyönnë' didza' ni, ruhu'innë', tu' dëda' yöl-la' tsahui' queë'.

²⁴ Cate' bilé'enë' Jesús ca na' ruhu'innë' bönni' na', rnnë':

—¿Bica' böniga gaca, ila'yaza nupa ta'lé'e yöl-la' tsahui' ga rinná bë'ë Dios!

²⁵ Gácarö tödiba' böa' nagui yötsi', ca tsázië' tu bönni' rilé'enë' yöl-la' tsahui' ga rinná bë'ë Dios.

²⁶ Ní'irö nupa bila'yöni didza' ni gula'nná:

—¿Nuzxi caz gaca ulá, channö?

²⁷ Jesús gudxë' légaquië':

—Le biti' gaca ilunë' bönni', huáca gunë' Dios.

²⁸ Ní'irö Pedro rë' Jesús:

—Buyútsöca', netu' nucá'anatu' yúgu'të le dë queëtu', en dá'atu' Li'.

²⁹ Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë', o xuz xiné'ë, o yugu' böchi' zanë', o nigula queë', o yugu' xzí'inë', tu' ru'i láchë'ë inná bë'ë Dios,

³⁰ bönni' ni huazí'irë' dza ni zóaru' na'a, ate' dza si' za' idéli'në' yöl-la' na'bán idú.

Jesús rigúxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

³¹ Jesús guchë'ë quez queë' idxínnutë' bönni' usëda queë', en rë' légaquië':

—Buli'yútsöca', ribenru' zéajru' Jerusalén, ga ni' ilaca yúgu'të le nazúajgaca lu guichi ca gula'nnë' bönni' gulu'ë didza' uláz queë' Dios ca ral-la' gaca quia' neda', Bönni' Guljé' Bönachi.

³² Yugu' bönni' Jerusalén ulu'dödë' neda' lu náagaquië' bönni' zì'tu', ate' ulu'titjé' neda', en ulu'lidza zi'ë neda', en ulu'chejë' neda' zxöna'.

³³ Ila'guinë' neda', ate' tödirö ni' ilútië' neda', pero cate' gaca tsonna dza ubana'.

34 Biti' gula'yéajni'inë' bönni' usëda queë' didza' ni, en biti' guléquibe'enë' ca sa'yéaj le ru'ilenë' légaquië' didza' que, tu' naca le cabí sequi' ila'yéajni'inë'.

*Jesús ruúnë' tu bönni' yödzö Jericó nachul-la lahuë'
(Mt. 20:29-34; Mr. 10:46-52)*

35 Cate' chizóa idxinë' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rinabë' nu bi gúnнасö queë'.

36 Bönni' ni' biyönnë' ta'dödi bönachi zían ni', ate' gunabë' bizxi na' raca.

37 Bönachi ni' tē lē':

—Jesús, bönni' Nazaret, ridödë' ni.

38 Ní'irö bönni' na' nachul-la lahuë' bē'ë zidzaj didza', rnnë':

—¡Jesús, zxi'ini xi'sóë' David, buéchi' ladxi' neda'!

39 Yugu' bönni' nanörugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzejrö bē'ë didza', rnnë':

—¡Zxi'ini xi'sóë' David, buéchi' ladxi' neda'!

40 Ní'irö guzë' dxiz Jesús ribözë', ate' gunná bé'enë' nu tsöjlidza lë' para idxinë' lahuë'. Cate' bönni' na' nachul-la lahuë' bidxinë' lahuë' Jesús, gunábinë' Jesús lë', rnnë':

41 —¿Bizxi rē'ënu' guna' quiu'?

Bönni' na' nachul-la lahuë' rnnë':

—Rē'ënida' huöálaj guiöj lahua'.

42 Jesús rē' lē':

—Chiböálaj guiöj lo'. Chiböácu' tu' réajlë'u neda'.

43 La' ní'isö bul'é'tenë', ate' sa'yéajlenë' Jesús, rigu'ë Dios yöl-la' ba. Lësca' yúgu'të bönachi nacuá' ni', en bila'lé'e lë' na' guca gula'gú'u Dios yöl-la' ba.

19

Jesús, en Zaqueo

1 Ní'irö guyázië' Jesús yödzö Jericó, en ridödë' lu yödzö na'.

2 Zoë' tu bönni' lë' Zaqueo ni', bönni' lo ládjagaquië' bönni' uquízxaj, ate' dë yöl-la' tsahui' queë'.

3 Ru'í ládxe'ë bönni' ni ilé'enë' Jesús, pero bití' guca queë' tu' nacuá' bönachi zían ni', en náquië' bönni' ga rē'ëdo'.

4 Ní'irö carelö yöjnörue' lógaca bönachi zían na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'.

5 Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en rē' lē':

—Zaqueo, bötjatë' lu yaga na', tu' run bayudxi tsöjgá'ana' lidxu' na'a.

6 Ní'irö la' bötjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'.

⁷ Cate' bila'lé'e bönachi nacuá' ni' lè ni, gula'sí lógaquiè' yúgu'tè' ta'nnè' queè', ta'nnè':

—Guyáziè' Jesús ugá'analenè' bönni' dul-la'.

⁸ Ní'irö guzuínè' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bè' buquixxa' bönachi, ubi'a quégaca bönachi na' tapa cö'tëlö ca'.

⁹ Jesús rë' lè':

—Na'a dza ni bidxín yöl-la' rusölá quégaca nupa nacuá' yu'u ni, tu' nababè' bönni' ni di'a dza queè' Abraham.

¹⁰ Bida' neda', Bönni' Guljè' Bönachi, ududilja', en udusölá' nupa nanítigaca.

Rucúdzu'è didza' Jesús que chi cö' dumí

¹¹ Tsanni ni' ta'yönnè' didza' ni ru'è Jesús, rë' légaquiè' le rucúdzu'è didza', tu' chizóa ila'dxinè' yödzö Jerusalén, ate' téquinè' chizóatè ilá' lahui le rinná bè'è Dios.

¹² Caní rnnè' Jesús:

—Zoè' tu bönni' lo, sa'yéajè' tu yödzö zi'tu' para si' lu nè'è yöl-la' unná bè', ate' ní'irö huödè'.

¹³ Cate' chizóa tsejè' ni' bulidzè' chiè' bönni' huen dxin queè', en bè'è que queégaquiè' tu cö' huéaj dumí, ate' rë' légaquiè': "Gul'guílajlen dumí ni tsanni huöda'."

¹⁴ Yugu' bönni' uládz queè' biti' ta'lé'enè' lè' dxi'a, ate' gula'söl-lè'è yugu' gubáz quégaquiè' ga ni' tsejè', ila'nnè': "Biti' rë'énitu' inná bé'enè' bönni' ni netu'."

¹⁵ Ní'irö guzxi' lu nè'è yöl-la' unná bè', ate' budxinè' ladzè'. Cate' bidxinè' ni' gunná bé'enè' nu tsöjlidza yugu' bönni' huen dxin na' budödè' lu ná'agaquiè' dumí na', para inözinè' gáca'xi bulu'guílajlenè' le tu tuè'.

¹⁶ Cate' bönni' zí'alö na' bidxinè' lahuè', rnnè': "Xan, tu cö' dumí quiu' na' chibén icja ia'chí cö' ca'."

¹⁷ Xanè' na' rë' lè': "Tsahui' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bé'enu' chi yödzö."

¹⁸ Ní'irö bidxinè' ia'túè' bönni' huen dxin na' lahuè' lè', rnnè': "Xan, tu cö' dumí quiu' na' chibén icja ia'gayu' cö' ca'."

¹⁹ Xanè' na' rë' ca' lè': "Inná bé'enu' gayu' yödzö."

²⁰ Ní'irö bidxinè' ia'túè' lahuè' lè', rnnè': "Xan, ni dë tu cö' dumí quiu' na'. Ben chi'a le, butúlida' le lari'.

²¹ Caní bena' tu' rádxida' li', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rulapu' ga biti' guzu'."

²² Ní'irö xanè' na' rë' lè': "Nacu' huen dxin biti' naca tsahui'. Ní'a que didza' bè'u uchi'a usöröa' li'. ¿Réquibe'enu' naca' bönni' bizxaj: Ruzi'a le cabí buzóa', en rulapa' ga biti' guza'?"

23 Na'a, ¿bizx que biti' yöjlú'u dumí quia' na' ga gun icja, para cate' huöda', uzí'a le idú len icja na'?"

24 Ní'irö rē' nupa nacua' ni': "Guli'cúa lu nē'ē dumí na', ate' guli'gü'i queē' bönni' na' dē queē' chi cō' dumí."

25 Légaquiē' tē' lē': "Xan, chidē queē' chi cō' dumí."

26 Ní'irö bubí'ē didza' xángaquiē', rnnē': "Rea' libí'ili': Nu rugún dxi'a dxin le do' dē lu nē'e, ulu'zxöni ládxi'gaca lē' ia'late', pero nu biti' rugún dxi'a dxin le do' dē lu nē'e, ulu'béaj lu nē'e lē' na' guta' lu nē'e.

27 Ca naca quégaquiē' bönni' ni' biti' ta'lé'enē' neda' dxi'a, en biti' gulē'ennē' inná bé'eda' légaquiē', guli'tsöjzxi' légaquiē' para ídigaquiē' ni, ate' guli'guti légaquiē'."

Len yöl-la' ba zxön raziē' Jesús yödzö Jerusalén

(Mt. 21:1-11; Mr. 11:1-11; Jn. 12:12-19)

28 Cate' budxi gunnē' caní Jesús, buguelē'ē xinözē', sa'yéajē' zaca' yödzö Jerusalén.

29 Cate' bila'dxinē' gala' ga nacua' yödzö Betfagé, en yödzö Betania, ga naca ra' guí'ado' nazí'i le Guí'a Yaga Olivo, gusöl-lē'ē Jesús chopē' bönni' usēda queē',

30 ate' rē' légaquiē':

—Guli'tséaj yödzödo' ni' ca dödilö ga zóaru', en cate' idxinli' ni', tsöjxáca'li'-ba' tuba' búrrodo' nága'ba' ni', búrrodo' na' cuntu nu ribíani lēba'. Guli'sedxi-ba', en guli'duchē'-ba' quia' ni.

31 Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnē'-ba'."

32 Söjáquiē' bönni' usēda queē' na' nasöl-lē'ē, ate' yöjxáca'gaquiē'-ba' ca na' chigudxē' Jesús légaquiē'.

33 Cate' gula'sedxē'-ba' búrrodo' na', yugu' bönni' xanba' tē' légaquiē':

—¿Bizx que risédxili'-ba' búrrodo' na'?

34 Bulu'bi'ē didza', ta'nnē':

—Xanru' riquinnē'-ba'.

35 Gula'chē'ē-ba' ga na' zoē' Jesús. Cate' chigula'xóē' yugu' lari' tsölá'a quégaquiē' cúdzu'ba' búrrodo' na', bulu'dxiē' Jesús cúdzu'ba' lahui lari' na'.

36 Gapa ral-la' tödē' Jesús, gula'chiljē' lari' quégaquiē' la' nöza.

37 Cate' chibila'dxinē' gala' ga zoa lidinni que Guí'a Yaga Olivo, lu yöl-la' rudzeja quégaquiē' gula'sí lógaquiē' yúgu'tē bönni' dá'gaquiē' Jesús, tu'ē zidzaj didza', ta'gu'ē Dios yöl-la' ba, ni'a quégaca yugu' yöl-la' huáca zxön bila'lé'enē' benē' Jesús.

38 Ta'nnē':

—¡Yöl-la' ba bönni' unná bē' ni zē'ē uláz queē' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

39 Ní'irö yugu' bönni' yudo' fariseo nútsa'gaquië' ladaj bönachi zían ni' tē' Jesús, ta'nnē':

—¡Bönni' Usedi, gudil-la yugu' bönni' usëda quiu'!

40 Bubi'ë didza' Jesús, rē' légaquië':

—Rea' libí'ili': Channö ila'cuá' dxíë' bönni' ni, yugu' guiöj hualuí'i caz zidzaj didza'.

41 Cate' bidxinē' Jesús gala' ra' yödzö na', en rilé'enē' le, ní'irö ribödxē' que,

42 rnnē':

—Raca ládxa'a huanözili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queéli', para cabí ilé'eli' le.

43 Huala'dxín queéli' dza cate' nupa biti' ta'lé'e libí'ili' dxi'a ila'bequi zö'ö idú gásibi'ilö ga zóali', en ila'gú'u libí'ili' lē'alö, ate' yúgu'tē lataj idú gásibi'ilö ilúnlenē' libí'ili' gudil-la.

44 Ulu'quínajē' zö'ö run chi'i yödzö queéli', en ilútiē' nupa nacué' lu yödzö ni. Biti' ugá'ana guiöj lahui luzē'e. Yúgu'tē lē ni gaca queéli' tu' cabí gúquibe'eli' dza bidē' Dios buduyúē' libí'ili'.

Rulatjē' Jesús lö'a yudo'

(Mt. 21:12-17; Mr. 11:15-19; Jn. 2:13-22)

45 Ní'irö guyáziē' Jesús lö'a yudo', en gusí lahuë' rubéajē' ní'ilö yúgu'tē nupa tuti', en nupa to'o ga naca lö'a yudo'.

46 Rē' légaquië':

—Nazúaj lu guichi lá'ayi, rnna: "Lidxa' naca yu'u ga ulu'lidza bönachi Dios", pero libí'ili' chinunli' le ca tu lídxi'gaca bönni' gubán.

47 Yugu' dza rusédinē' Jesús bönachi ga naca chila yudo', ate' gula'zóa gula'bö'ë bixúz unná bē', len bönni' yudo' tu'sédinē', en yugu' bönni' lo que lu yödzö ilútiē' Lē'.

48 Biti' bulu'dzölinē' nacxi ilútiē' Lē', tu' idú ládxi'gaca tu'zē nágagaca yúgu'tē bönachi xtídzē'ë.

20

Yöl-la' unná bē' dē lu nē'ë Jesús

(Mt. 21:23-27; Mr. 11:27-33)

1 Tu dza, cate' ni' rusédinē' Jesús bönachi ga naca chila yudo', en riguíxjö'ë didza' dxi'a, bila'dxinē' yugu' bixúz unná bē', en bönni' yudo' tu'sédinē', len bönni' gula tu'zéajni'inē', ga na' zoē',
2 ate' tē' Jesús:

—Gudixjöi'i netu'. ¿Bizxi yöl-la' unná bē' dē lu no'o runu' caní? ¿Nuzxi caz budödi lu no'o yöl-la' unná bē' ni?

3 Bubi'ë didza' Jesús, rē' légaquië':

—Inábida' ca' libí'ili' tu didza', ate' ubí'ili' innali'.

4 ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

5 Gulún xtídza'gaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guië' rë'u: “¿Bizx que biti' guyéajlë'ëli'-në'?”

6 Channö guiëru'-në': Gula'söl-lë'ë yugu' bönni' lë', bönachi lu yödzo ni ulu'laxi' rë'u guiöj, tu' nöziguequi bë'ë didza' Juan na' uláz queë' Dios.

7 Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

8 Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

Yugu' bönni' huen dxin biti' nácagaquië' tsahui'

(Mt. 21:33-44; Mr. 12:1-11)

9 Ní'irö la' gusi lotë' Jesús ru'ilenë' bönachi nacua' ni' didza'. Rucúdzu'ë didza', rnnë':

—Zoë' tu bönni' budë'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé.

10 Cate' bidxín dza ulu'chibë' uva luyú na', gusöl-lë'ë tuë' bönni' gubáz queë' ga na' nacu'ë huen dxin na' para si'ë uláz queë' que le ulu'zi'ë, pero huen dxin na' gulúndë'ë lë' zi', en bulu'söl-lë'ë lë' cá'asö.

11 Leyúbölö gusöl-lë'ë ia'túë' gubáz queë', ate' légaquië' gulúndë'ë lë' ca' zi', en gulu'ë dö' queë', ate' bulu'söl-lë'ë lë' cá'asö.

12 Leyúbölö gusöl-lë'ë quégaquië' bönni' bunni gubáz queë', ate' bulu'dxië' ca' lë' huë', en bulu'béajë' lë' ní'ilö luyú na'.

13 Ní'irö guzá' ladxë'ë xani luyú na', gunné': “¿Nacxi guntsa'? Isöl-la'a xzí'ini caza' nadxí'ida'-bi' quégaquië'. Cate' ila'lé'enë'-bi', nadxi ca' ilunë'-bi' bal.”

14 Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë', ta'nnë': “Bí'i ni guequi queëbi' luyú ni. Guli'dá, gútiru'-bi', para guequi queëru' le ralla' guequi queëbi'.”

15 Bulu'béajë'-bi' ní'ilö luyú na', en gulútië'-bi'.

'Na'a, ¿nacxi caz gunë' xani luyú na' quégaquië'?

16 Guidé', en gútië' yugu' huen dxin na', ate' udödë' luyú queë' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nnë':

—¡Inná Dios biti' gaca caní!

17 Ní'irö buyüë' Jesús légaquië', rnnë':

—¿Bizxi sa'yéaj lë na' nazúaj lu guichi lá'ayi, rnna:

Guiöj na' gula'ru'unë' bönni' huen zö'ö, guiöj ni chinaca guiöjlen squin zö'ö?

18 Nútí'tës nu ibixi lahui guiõj ni, quitsaj nu na', ate' nu bönni' tsõjbága' guiõj ni lè', uzzuzxaj lè'.

Ca naca dumí ta'guizxaj lázagaca bõnachi

(Mt. 21:45-46; 22:15-22; Mr. 12:12-17)

19 La' dza ní'sõ, yugu' bixúz unná bè' len bönni' yudo' tu'sédinè' gula'zóa gula'bõ'è ila'zõnè' Jesús, tu' téquibe'enè' gunné' quégaquiè' lè na' bucúdzu'è didza', pero guládxinè' bi ilún bõnachi zían nacuá' ni'.

20 Ní'irõ bulu'yúyeniè' Jesús, en gula'sõl-lè'è yugu' bönni' para ulu'béajè' Lè' didza', bönni' ulu'luí'i cuíngaquiè' ca bönni' tsahui', para ilunè' ga bi innè' Jesús, para gaca ulu'dödè' Lè' lu nè'è bönni' rinná bé'enè' uláz queè' César.

21 Para ilunè' caní, gula'nábinè' Jesús, ta'nnè':

—Bõnni' Usedi, nõztu' rnno' le nácatè, en rusédinu' le nácatè, en bití' ruchí'a rusörõu' ca naca le tu'luí'isõ lahui bõnachi, pero idútè li naca ca rusédinu' xibá queè' Dios.

22 Gudíxjõi'i netu'. ¿Naru' run bayudxi quizxaj laztu' queè' César, bönni' Roma rinná bè'è, o cabí?

23 Réquibe'enè' Jesús le té'ennè' ilunè' queè', ate' rë' légaquiè':

—¿Bizx que rizí' bè'èli' neda'?

24 Buli'luí'itsõqui' neda' tu dumí ridá. ¿Nuzxi lahui da' lè'e ni, en nuzxi le nazúaj ni?

Bulu'bi'è didza', ta'nnè':

—Queè' César na'.

25 Ní'irõ Jesús rë' légaquiè':

—Buli'nõdzaj queè' César le nequi queè' César, ate' queè' Dios le nequi queè' Dios.

26 Bití' guca ilunè' ga bi innè' Jesús para gaca ulu'zéguiè' Lè' didza' lógaca bõnachi zían na', pero bulu'bábinè' ca naca didza' bubí'è, ate' bulu'sayaj ruá'agaquiè'.

Ca gaca quégaca nupa ulu'bán lu yõl-la' guti

(Mt. 22:23-33; Mr. 12:18-27)

27 Ní'irõ yugu' bönni' yudo' saduceo, nupa na' ta'nná bití' ulu'bán nupa chinátigaca, bila'dxinè' ni', ate' gula'nábinè' Jesús, ta'nnè':

28 —Bõnni' Usedi, Moisés buzúajè' queèru' lu guichi, le rnna: "Channõ gátie' nu bönni', ate' ugá'ananu nigula queè', en channõ cuntú nu zoa bi'i queè', ní'irõ bi'i bõchi'bi' ral-la' sí'ibi'-nu nigula queè' na', para uzóabi' bi'i queèbi' bõchi'bi' na' gútibi'."

29 Gula'cuá'abi' gadxi bi'i bönni' nácagacabi' bõchi'bi', ate' bi'i zí'alõ na' butsaga ná'alénbi' bi'i nigula, en gútibi', bití' zóabi' bi'i queèbi'.

30 Ní'irõ bi'i buropi na' butsaga ná'alénbi'-nu nigula na', ate' gútibi' ca' bi'i ni, bití' zóabi' bi'i queèbi'.

31 Butsaga ná'alenbi'-nu bi'i bunni na', ate' la' tuz ca gulunbi' igádxitēbi', ate' gulátibi', biti' zóabi' bi'i quégacabi'.

32 Ga búdxitē, gútinu ca' nigula na'.

33 Na'a, cate' ulu'bán nupa chinátigaca, ¿núzxilöbi' guéquinu nigula na' queēbi', tu' bulu'tsaga ná'alenbi'-nu igádxitēbi'?

34 Ní'irö bubi'ē didza' Jesús, rē' légaquiē':

—Tu'tsága ná'agaca bönachi dza ni zóaru' na'a, en tu'nödzejē'-bi' xzí'inigaquiē' para ulu'tsaga ná'agacabi'.

35 Na'a, nupa náacagaca lesaca' ulu'bán lu yöl-la' guti, en tsöjcuá' yödzölió si' gata', biti' ilún yöl-la' rizóalen nigula, en biti' ulu'tsaga ná'agaca.

36 Caní gaca, tu' cabirö ilati nupa na' ulu'bán lu yöl-la' guti, pero ilácagaca ca náacagaquiē' gubáz lá'ayi queē' Dios, en ilácagaca xzí'ini cazē' Dios.

37 Ca na' ral-la' ulu'bán nupa chinátigaca, rulu'ínē' rē'u Moisés caz ga na' nazúaj lu guichi ca naca que yaga yötsi' régui, ga ni' ru'ē didza' Xanru', rnnē' náquiē' Dios queē' Abraham, en Dios queē' Isaac, en Dios queē' Jacob.

38 Dios náquiē' Dios, calēga quégaca nupa nátigaca tsaz, pero quégaca nupa nabángaca, tu' nabángaca lahuē' Lē' yúgu'tē bönachi, sal-la' gulati luyú ni.

39 Ní'irö bulu'bi'ē didza' bal-lē' bönni' yudo' usedi, ta'nnē':

—Bönni' Usedi, dxí'ado' gunnó'.

40 Bítirö bulu'rúguinē' ila'nábinē' Lē' didza'.

¿Nuzxi xzí'ini náquiē' Cristo?

(Mt. 22:41-46; Mr. 12:35-37)

41 Ní'irö Jesús rē' légaquiē':

—¿Nacxi caz na' ta'nnē': “Cristo náquiē' xzí'inē' David”?

42 David caz bē'ē didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxē' Xana':

“Gurö'i cuita lē'a ibēla

43 cate' gunra' ga ulu'zechu xzí'bigaca lo' nupa ta'dá'baga' Li'.”

44 David caz na' gunnē' queē' náquiē' Xanē'. ¿Nacxi caz naca, rnnali' libí'ili' náquiē' xzí'inē'?

Jesús ruzégui'ē diza' bönni' yudo' tu'sédinē'

(Mt. 23:1-36; Mr. 12:38-40; Lc. 11:37-54)

45 Tsanni ni' yúgu'tē bönachi nacuá' ni' tu'zē nágagaca Jesús, rē' yugu' bönni' usēda queē':

46 —Guli'gún chi'i cuinli' quégaquiē' bönni' yudo' tu'sédinē', tu' ta'yaza ládxi'gaquiē' ta'dē' nácugaquiē' lari' tunna, en tē'ennē' ulu'lidza bönachi légaquiē' zxön gapa naca lu yē'eyi, en ta'yaza ládxi'gaquiē' ca' ta'bö'ē lataj lo gapa tu'dubē' tu'sédē' queē' Dios, en gapa ta'bö'ē tahuē'.

47 Ta'güë' lídxigacanu nigula uzëbido', ate' para ulu'lu'i tsahui' cuíngaquië', xidzé tu'lidzë' Dios. Yugu' bönni' ni, yënni'tërö gunë' Dios ga ila'gu'i ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

1 Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quëgaquië', ta'gu'ë dumí lu gu'ina que dumí gun que yudo'.

2 Bilé'enë' ca' tu nigula yechi' uzëbido', rigú'unu chopa dumí lásido', le nazáca'gaca láti'do'os.

3 Rnnë' Jesús:

—Le nácatë rea' libí'ili', tu le zxöntërö gulú'unu nigula yechi' uzëbido' ni ca ia'zica'rö bönachi na' ta'gu'ë dumí.

4 Yúgu'të', tsca le nadödi bë' dë quëgaquië', gula'gu'ë dumí que yudo', pero nigula ni, lu yöl-la' yechi' queënu gulú'unu iduté le dë queënu, le ral-la' gáhuinu.

Riguíxjö'ë Jesús ca ulu'sunítië' yudo'

(Mt. 24:1-2; Mr. 13:1-2)

5 Nacuá' ni' nupa tu'i didza' ca naca que yudo' na', ca na' nazí'i biquitaj que, yugu' guiöj nazácalë'egaca, en yugu' gundo' náca'gaca lachi, ate' Jesús rë' légaquië', rnnë':

6 —Yúgu'të lë ni rilé'eli', huadxín dza cate' bíti'rö ugá'ana guiöj lahui luzë'e ni, tu' ulu'suniti bönachi yudo' ni.

Le ilaca bë' cate' si' idxín dza údxi

(Mt. 24:3-28; Mr. 13:2-23)

7 Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

8 Bubi'ë didza' Jesús, rnnë':

—Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zían, en ila'z'i lágaquië' ca lea' neda', ila'nnë' náca'gaquië' Cristo, en ila'nnë': “Chizá' gala' dza údxi.” Neda' rea' libí'ili': Biti' tséajlenli' légaquië'.

9 Cate' yönili' raca gudil-la, en ta'dá'baga' bönachi yúlahui', bití' gadxi idzöbili', tu' run bayudxi ilaca le caní, pero bití' zuítëni dza údxi.

10 Ní'irö rë' ca' légaquië':

—Til-la tu yödzö len ia'tú yödzö, ate' bönachi tu ga nu rinná bë' ila'díl-lalen bönachi ia'tú ga nu rinná bë'.

11 Tödígaca budó' xzu', ate' zían lataj gaca gubín, en ilatsaj yödzöhuë' zxön. Ila'lá' lahui lúzxiba le ilún gadxi bönachi, en le ilaca bë'.

12 'Zí'atëlö cate' si' ilaca lë ni, ila'zõn bõnachi libí'ili', en ila'bía ládxi'gaca libí'ili'. Ila'chë'ë libí'ili' gapa tu'dubë' tu'sëdë' queë' Dios para ilútië' libí'ili', en ila'gu'ë libí'ili' lidxi guié. Ila'chë'ë libí'ili' lógaquië' bõnni' ta'nná bë'ë, en lógaquië' bõnni' lo, tu' dá'ali' neda'.

13 Gaca caní queëli' para séqui'li' gunli' ba nalí quia' neda'.

14 Tsutsu guli'gún ládxi'li', para cabí cuéqui ícjali' zí'alò nacxi innali' uláz queëli',

15 tu' gunna' queëli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nnë' que xtídza'li' bõnni' ni' biti' ila'lé'enë' libí'ili' dxi'a.

16 Ní'irö xuz quézili' ulu'dödë' libí'ili', en cá'anqueze yugu' bõnni' böchi' quézili', en yugu' di'a dza que quézili', en yugu' böchi' luzë'e quézili', ate' ilútië' bál-lali'.

17 Yúgu'të bõnachi ulu'zóa libí'ili' tsölá'alò tu' dá'ali' neda',

18 pero biti' initi nitú guitsa' ícjali'.

19 Channö ugá'anali' tsutsu, idéli'li' yöl-la' na'bán idú.

20 'Cate' ilé'eli' bõnni' röjáquië' gudil-la nagú'ugaquië' lë'a Jerusalén, inözili' chibidxín dza initi yödzo ni.

21 Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzo ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzo ni.

22 Yugu' dza ni' Dios gunë' xíguia' nupa nacuá' yödzo ni para gaca yúgu'të le nazúaj lu guichi lá'ayi ca ral-la' gaca quégaquië'.

23 Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádxinu-bi' bí'ido', tu' ila'gu'i ila'záca'da' bõnachi nacuá' ni', ate' Dios gúndë'ë bõnachi ni' xíguia'.

24 Ilátië' zianë' lu gudil-la na', ate' ila'chë'ë ia'bal-lë' nadzúngaquië' ga ila'dxinë' idútë yödzo'lió, ate' yödzo Jerusalén ni, ulu'léaj ulu'libë' le bõnni' zítu', cate' izá'aró dza quégaquië'.

Le ilaca bë' si' huödë' Bõnni' Guljë' Bõnachi

(Mt. 24:29-35, 42-44; Mr. 13:24-37)

25 Gunnë' ca' Jesús:

—Ni'irö ila'cuá' le ilaca bë' lu gubidza, en lu beo', en yugu' lu böljaj lúzxiba, ate' luyú ni ulu'chixi bõnachi, en iládxiguequi, tu' yön chi'i guziú' yu que nísado', en que le riyasa ridxía nisa na'.

26 Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzo'lió, en ila'zxizi le nalá'gaca lúzxiba.

27 Ní'irö ila'lé'enë' neda', Bõnni' Guljë' Bõnachi, guída' lu böaj lúzxiba, dë lu na'a yöl-la' unná bë', ate' ilá' lahui yöl-la' zxön quia'.

28 Cate' isí lo ilaca lë ni, buli'tipa ládxi'li', en guli'chisa loli', tu' chizóa udxina' neda', para huóá'ua' libí'ili'.

29 Jesús gudxë' ca' légaquië' tu le bucúdzu'ë didza', rnnë':

—Buli'yútsöca' ca raca que yaga higo, en que bití'tës yaga yúbölö.

30 Cate' rilé'eli' ta'lén ni'a në'e huë'ënido', nöz quézili' chizá' gala' cusu ba.

31 Lësca' caní, cate' ilé'eli' chitaca yugu' lë ni, inözili' chizá' gala' dza idinná bë'ë Dios luyú ni.

32 'Le nácatë rea' libí'ili', bití' ilátigaca bönachi ila'cuá' dza ni' cate' ilaca yúgu'të lë ni.

33 Ila'dödi que lúzxiba, en que luyú ni, pero xtídza'a, bití' tódi cá'asö, tu' idxín caz ca rnna.

34 'Guli'gún chi'i cuinli' para cabí güi'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulë'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sóali' niti ladxi',

35 en para cabí gaca queëli' ca tu le rizön bönachi, ca naca le gaca quégaca yúgu'të bönachi nacuá' idútë yödzölió.

36 Que lë ni na', guli'sóa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utuí'ili' cate' idxinli' lahua' neda', Bönni' Guljé' Bönachi.

37 Lahui' dza rizóë' Jesús chila yudo', rusédinë' bönachi, ate' chi'i dzö'ölö rirúajë' ni', en rejë' lu guí'ado' nazí'i le Guí'a Yaga Olivo.

38 Yugu' zila bila'dxín yúgu'të bönachi ga zoë' Jesús chila yudo' para ulu'zë nágagaca xtídzë'ë.

22

Tun xtídza'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

1 Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na',

2 bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero bití' gula'zéqui'në' tu' tádxinë' bi ilún bönachi.

3 Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasöl-lë'ë Cristo.

4 Guyijë' Judas na', yöjë'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'.

5 Bulu'dzéjanë' bönni' yudo' na', en gula'zí' lu ná'agaquië' ulu'nödzjë' queë' dumí.

6 Raza ládxe'ë Judas lë ni, ate' rizóa ribö'ë udödë' Jesús lu ná'agaquië' bagáchi'sö.

Le ráguru' le rusá' ládxi'ru' ca gútië' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua.

⁸ Jesús gusól-lë'ë Pedro, en Juan, rnnë':

—Guli'tséaj, guli'tsöjpá'a queëru' le gáguru' dzö' Laní Pascua.

⁹ Të' Lë':

—¿Gazxi rë'ënu' tsöjpá'atu' queëru'?

¹⁰ Jesús rë' légaquië', rnnë':

—Buli'yútsöca', cate' tsú'uli' lu yödzo ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázië'.

¹¹ Guli'guië' xan yu'u na': "Bönni' Usedi rë' li': ¿Gazxi zoa yu'u laní ga gágulena' yugu' bönni' usëda quia' dzö' Laní Pascua?"

¹² Ní'irö uluf'inë' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

¹³ Ní'irö yöjáquië', en yöjxáca'gaquië' ca na' chigudxë' Jesús légaquië', ate' bulu'pë'ë ni' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lenë' Lë' tsözxön.

¹⁵ Ní'irö Jesús rë' légaquië':

—Gúcada' ládxa'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'.

¹⁶ Rea' libí'ili': Bítirö gahua' lë ni cate' idxinrö dza gaca le rulu'isö xtsö' ni ga ni' rinná bë'ë Dios.

¹⁷ Gudélë'ë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'guí'aj lati' huéaj,

¹⁸ tu' rea' libí'ili': Bítirö guí'ja' xisi uva cate' idxinrö le rinná bë'ë Dios.

¹⁹ Ní'irö gudélë'ë yöta xtila, en gudxë' Dios: "Xclenu'." Gudödi ni' buzuzxjë' le, en bë'ë que queëgaquië', rnnë':

—Lë ni naca idútë le naca' le rudöda' uláz queëli'. Guli'gún caní para usá' ládxi'li' neda'.

²⁰ Cate' budxi gulahuë', lësca' caní bë'ë didza' que zxíga'do' na', rnnë':

—Zxíga'do' ni rulu'í' ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queëli'.

²¹ 'Na'a, bönni' na' udödë' neda' lu ná'agaca bönachi rö'ë rágulene' neda' tsözxön.

²² Le nácatë huayija' ga ilútië' neda', Bönni' Guljë' Bönachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

²³ Ní'irö gula'sí' lógaquië' ta'nábinë' Lë' tu tuë', ta'nnë':

—¿Núzxilötu' nu gun caní?

Tu'i xtída' gaquië' núzxilögaquië' gáquië' lo

²⁴Ní'irö gulu'ë didza' la' légacasë' núzxilögaquië' idéli'në' lataj lo.

²⁵Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quégaquië', ta'nná bé'enë' bönachi, ate' nupa ni dë lu ná'agaca yöl-la' unná bë', légaquië' bönni' tácalen.

²⁶Libí'ili' biti' ral-la' gunli' caní, pero nu naca lo ládjali' ral-la' gaca ca nu naca cuídítërö, ate' nu rinná bë' ral-la' gaca ca nu run dxin quéguequi luz'é.

²⁷¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸'Libí'ili' ni guzóaleni' neda' cate' ni' bi guca quia', yugu' le gula'zí' bë' neda'.

²⁹Que lë ni na' udöda' lu ná'ali' tu ga inná bë'ëli', ca na' benë' Xuza', budödë' lu na'a ga inná bë'a neda'.

³⁰Caní guna' para gaca cö'öli', en gu'aj gágulenli' neda' ga ni' inná bë'a, ate' cö'öli' xilataj cázali' ga uchi'a usöröli' idxinnu cö' xzí'ini xi'sóë' Israel.

Rnnë' Jesús innë' Pedro biti' núnbë'ë Lë'

(Mt. 26:31-35; Mr. 14:27-31; Jn. 13:36-38)

³¹Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi zxoá' xtila,

³²pero chibulidza'-në' Dios, en gunábida' Lë' gácalenë' li', para cabí údxi udú yöl-la' réajlë' quiu' neda'. Na'a, cate' huöácu' quia', butipa ládxi'gaquië' böchi' luzó'o.

³³Pedro rë' Lë':

—Xan, chizóa' sá'lena' Li', calëgasö tseja' lidxi guié, pero lësca' gátilena' Li'.

³⁴Jesús rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesús cate' chizóa ilútië' Lë'

³⁵Jesús gunábinë' légaquië', rnnë':

—Cati' gusöl-la'a libí'ili' cabí nuá'ali' yöxaj yöta, en calëga buzudi dumí, en calëga chopá cö' xiráchuli', ¿naru' bi biyadzaj queëli'?

Légaquië' ta'nnë':

—Biti' bi.

³⁶Ní'irö rë' légaquië':

—Na'a, nu dë yöxaj yöta que ral-la' guá' le, ate' lësca' caní ral-la' gun nu dë que buzudi dumí, ate' nu biti' dë que guié tuchi' ral-la' guti' lari' rixóa yeni, en si' tu guié tuchi'.

³⁷ Rea' libí'ili': Run bayudxi gaca quia' lë na' nazúaj lu guichi lá'ayi, rnna: "Gulunë' queë' ca tunë' quégaca nupa tua' dö", ate' ilaca yúgu'të le nazúajgaca lu guichi ca ral-la' gaca quia'.

³⁸ Ní'irö légaquië' ta'nnë':

—Xan, ni dë chopa guié tuchi'.

Lë' rë' légaquië':

—Chinaca.

Jesús rulidzë' Dios la' yëla Getsemani

(Mt. 26:36-46; Mr. 14:32-42)

³⁹ Ní'irö birúajë' Jesús, en ca run cazë' sa'yéajë' lu Guí'a Yaga Olivo, ate' yugu' bönni' usëda queë' sōjácalenë' Lë'.

⁴⁰ Cate' bila'dxinë' ni', Jesús rë' légaquië', rnnë':

—Buli'lídzë' Dios, inábili'-në' cabí gata' lataj si' bë' tu' xihui' libí'ili'.

⁴¹ Ní'irö Jesús guzë'ë ga na' nacu'ë, en gudödë' ia'lati' tsca ga ridxín tu guió'j rirú'uniru', ate' ni' buzóa zxibë', en rulidzë' Dios.

⁴² Rnnë':

—Xúz, channö rë'ënu', bucuása ga zoa' lë na' ral-la' quí'i saca'a, pero calëga ca rë'ënda' neda', pero ca rë'ënu' Li' gunu'.

⁴³ Ní'irö bulu'i lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús.

⁴⁴ Lu yöl-la' risëbi ladxi' queë', idú ládxë'ë Jesús bulidzë' Dios, ate' nisa yösa queë' guca ca rön raba' luyú.

⁴⁵ Cate' budxi bulidzë' Dios, guyasë', en böajë' ga na' nacu'ë bönni' usëda queë', ate' duxáquië' légaquië' tásië' tu' tu'huí'inigaquië'.

⁴⁶ Ní'irö Jesús rë' légaquië':

—¿Rásitsali'? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'ë didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queë' Jesús dzáguië' légaquië', ate' nanöruë' lógaquië' bönni' zían na'. Gubígui'ë ga zoë' Jesús para utsaga lahuë' Lë'.

⁴⁸ Ní'irö Jesús rë' lë':

—Judas, ¿naru' rudödítso' caní neda', Bönni' Guljë' Bönachi, rutsaga lo' neda'?

⁴⁹ Cate' yugu' bönni' na' nacuá'lenë' Jesús bila'lé'enë' ca na' raca queë' Lë', të' Lë':

—Xan, ¿naru' gü'ítu' légaquië' guié tuchi'?

⁵⁰ Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla.

⁵¹ Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le.

⁵² Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zėjni'inë', bönni' na' biti' ta'lé'enë' Lë' dxi'a, rnnë':

—¿Narúajtsali' nuá'ali' guié tuchi', en yaga para sönli' neda' ca runli' rizönli'-në' gubán?

⁵³ Yugu' dza guzóalen caza' libí'ili' chila yudo', ate' biti' bi benli' quia', pero na'a chibidxín dza queëli', le naca dza dë lu në'e nu na' zoa lataj chul-la.

Rnnë' Pedro: "Biti' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'chë'ë Lë' ga na' bulu'sudxinë' Lë' lidxë' bixúz lo. Pedro yójnahuë' Jesús zí'tu' zí'tu'sö.

⁵⁵ Cate' ni'a në'ë bixúz lo chigula'béquië' guí' lö'a lidxë' bixúz lo na', gula'bö'ë idú gásibi'ilö ra' guí' na', ate' Pedro gurö'lenë' légaquië' tsözxön.

⁵⁶ Cate' tubi' bi'i nigula huen dxin bilé'ebi'-në' Pedro, ni' rö'ösë' ra' guí', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguië' Pedro, rnnë':

—Nigúla, biti' ca' núnbë'a-në' bönni' na'.

⁵⁸ Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'látisö gudzé, gunné' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

⁶⁰ Ní'irö Pedro gunné':

—Bönni', biti' nõzda' bizxi na' ru'u didza' que.

Tsanni ni' ru'ë didza' ni, la' gurödxitëba' böra.

⁶¹ Ní'irö buécjë' Xanru', en ruyúë' Pedro, ate' yójnenë' Pedro xtídzë'ë Xanru', ca na' gudxë' lë': "Zí'alö códxiba' böra na'a, li' chigudá'bagu'u tsonna luzuí, innó' biti' núnbë'u neda'."

⁶² Burúajë' Pedro ní'ilö, ate' rön caz gurödxë'.

Tu'titjë' Jesús

(Mt. 26:67-68; Mr. 14:65)

⁶³ Yugu' bönni' na' nazõngaquië' Jesús bulu'titjë' Lë', ate' gula'guinë' Lë'.

⁶⁴ Ní'irö bulu'sayjë' lahuë' Jesús, ate' gula'gápë'ë lahuë', en gula'nábinë' Lë', ta'nnë':

—¿Gunnëya'atsöca'! ¿Nuzxi na' gudapa' Li'?

65 Ziánrö ca' gula'nnë' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'
(Mt. 26:59-66; Mr. 14:55-64; Jn. 18:19-24)

66 Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixúz unná bë', en bönni' yudo' tu'sédinë', ate' gula'ché'ë Jesús lógaquië' bönni' yudo' tu'chi'a tu'söröë', ate' gula'nábinë' Lë',

67 ta'nnë':

—Gudíxjöi'i netu'. ¿Naru' nactso' Li' Cristo?

Jesús rë' légaquië':

—Channö guía' libí'ili' naca' Cristo, biti' tséajlë'ëli' neda',

68 en channö inábida' libí'ili' tu didza', biti' ubí'ili' didza', en biti' usanli' neda'.

69 Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatë're' yöl-la' unná bë'.

70 Gula'nábinë' Lë' yúgu'të', ta'nnë':

—¿Naru' nactso' Li' Zxí'inë' Dios?

Lë' gudxë' légaquië':

—Le nácasö rnnali'.

71 Ní'irö ta'nnë':

—¿Núxirö naquíniru' nu gun ba nalí queë'? La' rë'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queë' César
(Mt. 27:1-2, 11-14; Mr. 15:1-5; Jn. 18:28-38)

1 Ní'irö gulazuinë' yúgu'të bönni' zián ni', ate' gula'ché'ë Jesús lahuë' Pilato,

2 ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queëtu' yúlahui', en ruzáguë'ë xinözígaca nupa ta'guíxaj laz ruquíxjë' César, en rnnë' lë' cazë' náquië' Cristo, bönni' ralla' inná bë'ë.

3 Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnnö'.

4 Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzö'lida' le naca xíguia' nunë' bönni' ni.

5 Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxintë' runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea.

⁷ Cate' gunözinë' nababë' Jesús ga ni' rinná bë'ë Herodes, gusöl-lë'ë Lë' lahuë' Herodes na', tu' zoë' ca' Herodes Jerusalén yugu' dza na'.

⁸ Cate' Herodes na' bilé'enë' Jesús, budzéjanë', tu' chiguca xidzé rë'enë' ilé'enë' Lë' tu' chibiyönnë' le zían ca naca queë' Jesús, en runë' löza ilé'enë' tu yöl-la' huáca gunë'.

⁹ Ní'irö Herodes gunábinë' Jesús le zían, pero Jesús biti' bi didza' bubí'ë.

¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'.

¹¹ Ní'irö Herodes, en bönni' queë' röjáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato.

¹² Dza na' bulu'dzáguië' dxi'a Pilato, en Herodes, tu' zí'alö gula'lé luzë'ë tuë' ia'tué'.

Ta'chúquië' queë' Jesús gátië'

(Mt. 27:15-26; Mr. 15:6-15; Jn. 18:39-19:16)

¹³ Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzo,

¹⁴ ate' rë' légaquië':

—Djujá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzö'lida' le naca xíguia' nabáguë'ë, yugu' lë na' ruzéguili'-në' didza'.

¹⁵ Cate' gusöl-la'a libí'ili' lahuë' Herodes, biti' bi budzölinë' le benë' bönni' ni le naca xíguia' nabáguë'ë para nu ichugu queë' gátië'.

¹⁶ Na'a usaca' zi'a-në', ate' tödi na' usana'-në'.

¹⁷ Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'.

¹⁸ Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

¹⁹ Nadzunë' Barrabás na' lidxi guië tu' gudíl-lalenë' yúlahui' lu yödzo na', en tu' bëtië' bönachi.

²⁰ Bulidzë' Pilato légaquië' leyúbölö, tu' rë'enë' usanë' Jesús.

²¹ Leyúbölö gulu'ë zidzaj didza', ta'nnë':

—¡Budë'ë lë'e yaga cruz! ¡Budë'ë lë'e yaga cruz!

²² Ní'irö Pilato gudxë' légaquië' le bunny luzuí, rnnë':

—¿Bizxi caz le ruá' dö' benë' bönni' ni? Biti' bi budzö'lida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.

²³ Zídzajrö gulu'ë didza', ta'nabë' të'ë Jesús lë'e yaga cruz. Tu' gula'bödxi'ë yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'.

²⁴ Ní'irö Pilato guchúguië' queë' Jesús, para gaca queë' ca na' ta'nabë'.

²⁵ Busanë' quégaquië' bönni' na' nadzunë' lidxi guíë tu' gudíl-lalenë' yúlahui', en bëtië' bönachi, bönni' na' chigula'nabë', ate' budödë' Jesús para gaca queë' ca na' të'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

²⁶ Cate' ni' ta'chë'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzu'lë' Jesús.

²⁷ Bönachi zían, enca' yugu' nigula söjñógaca Jesús, ta'bödxi nu nigula na', en ta'bödxi yéchi'nu queë' Lë'.

²⁸ Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' cödxili' quia' neda', pero guli'cödxí que quézili', en quégacabi' zxi'inili'

²⁹ tu' huadxín dza ila'nná: “Bica' bágaca yugu' nigula huödx, en nigula bití' guluá'anu-bi' bí'ido', en bití' bulu'gádxí'nu-bi' bí'ido'.”

³⁰ Ní'irö ila'sí lógaca ila'nná bönachi, ilë' yugu' guí'a sibi: “Guli'dubága' netu'”, en ilë' ca' yugu' guí'ado': “Guli'cachi' netu'.”

³¹ Channö caní tunë' quia' neda', naca' ca tu yaga ya'a, ¿naru' cabí ilúntërë' ca' queëli', nácali' ca yaga bidxi'?

³² Gula'chë'ë ca' chopë' bönni' tuá' dö', para ilútië' légaquië' tsözxön len Jesús.

³³ Cate' bila'dxinë' lataj nazí'i le Calavera, le rnna len didza' xidza' Lataj Que Böga' Ícjaru', bulu'dë'ë Jesús lë'e yaga cruz. Bulu'dë'ë ca' lë'egaca yaga cruz chopë' bönni' tuá' dö'. Tuë' bulu'dë'ë cuita lë'ë ibëla Jesús, en ia'túë' bulu'dë'ë cuita lë'ë yögöla.

³⁴ Ní'irö Jesús rnnë':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lë'ë que queégaquië' le nácuë' Jesús, en bulu'quitjë' le gaca bë' lahui'.

³⁵ Bönachi nacuá' ni' tu'yú, en yugu' bönni' dë lu ná'agaquië' bulu'titjë' Jesús, ta'nnë':

—Yugu' nu yúbölö busölë' bönni' ni. Na'a ral-la' usölá cuinë' channö náquië' Cristo, bönni' gurö cazë' Dios.

³⁶ Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi,

³⁷ ta'nnë':

—Channö nacu' Li' bönni' inná bé'enë' bönachi judío, busölá cuinu'.

³⁸ Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'enë' Bönachi Judío."

³⁹ Tuë' bönni' huiá' dö' na' dë'ë lë'e yaga cruz bulidza zi'ë Jesús, rnnë':

—Channö nacu' Li' Cristo, busölá cuinu', enca' netu'.

⁴⁰ Bubi'ë didza' ia'tuë' bönni' huiá' dö' na', en gudil-lë' luzë'ë na', rnnë':

—¿Naru' cabí rádxiñu'-në' Dios? Lësca' li' narugu quiu' gátü'.

⁴¹ Le nácatë rë'u, le rál-la'sö gaca queëru' riguí'i rizáca'ru', ca na' sa'yéaj dö' biá'aru', pero Bönni' ni, biti' bi dö' nu'ë.

⁴² Ní'irö bönni' ni rë' Jesús:

—Yöjné neda' cate' idxiñu' ga ni' inná bë'u.

⁴³ Jesús rë' lë':

—Le nácatë rea' li', na'a dza ni sóalenu' neda' lataj lachi quia'.

Ratië' Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate' bidxín idú huagubidza, guchul-la idútë yödzölió ga bidxinrö idú ridödi xihuö.

⁴⁵ Guchul-la gubidza, ate' lari' nal-la' lu yudo' biröza' chopa dí'ilö.

⁴⁶ Ní'irö bë'ë zidzaj didza' Jesús, rnnë':

—Xuz, rigú'a lu no'o bö' naca caza'.

Cate' budxi gunné' caní, birúajtë bö' naca cazë', gútië'.

⁴⁷ Cate' bönni' rinná bé'enë' bönni' röjáquië' gudil-la bilé'enë' ca na' guca, gulu'ë Dios yöl-la' ba, rnnë':

—Le nácatë bönni' ni gúquië' bönni' tsahui'.

⁴⁸ Cate' yúgu'të bönni' nacu'ë ni' tu'yúë' bila'lé'enë' lë na' guca, yöjhuöjgaquië' yödzö, ta'gapa' luchú'ugaquië' tu' tu'báñinë'.

⁴⁹ Zí'tu'sö bulu'gá'ana yúgu'të nupa ni' núnbë'gaca Jesús, en yugu' nigula na' yöjácalennu Lë' cate' ni' gudë' luyú Galilea, ate' tu'yúë' lë ni raza.

Rigáchë'ë Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoë' ca' ni' tu bönni' yödzö Arimatea que luyú Judea, lë José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'.

⁵¹ Biti' benë' tuz nupa na' gula'chugu queë' Jesús gátüë', tu' ribözë' ca' José ni le rinná bë'ë Dios.

⁵² Ní'irö guyijë' José na' lahuë' Pilato, en gunabë' lataj u'ë Jesús.

⁵³ Cate' chinuzötjē' Lē', buchölinē' Lē' lari', ate' gulu'ē Jesús yeru ba, le nadaj lē'e gu'a guiöj, ate' lu ba na', cuntu nu nagü'iguequinē'.

⁵⁴ Dza na' naca dza tu'pē'ē que dza lá'ayi quégaquiē' bönni' judío, tu' si' idxín dza na'.

⁵⁵ Yöjácánu ca' ni' nigula na' gula'zá'lennu Jesús, cate' ni' gudē' luyú Galilea, ate' bila'lé'enu yeru ba na', en ca na guca, gula'gu'ē Lē' ni'.

⁵⁶ Cate' yöjhuöjgácanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí' ládxi'gácanu dza lá'ayi na' quégaquiē' bönni' judío ca na' rinná bē' xibá queē' Dios.

24

Rubanē' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxín dza risílo ia'gadxi dza na', cate' ni' naca zílado', bila'dxinnu nigula na' ra' yeru ba queē' Jesús. Nuá'gácanu yugu' le rilá' zxixi, lē na' chinupá'agácanu, ate' dzágagácanu légácanu ia'bál-lanu nigula.

² Cate' bila'dxinnu ni', bila'lé'enu chinadúa guiöj na' gudá' ga nu riyaza yeru ba queē'.

³ Cate' gula'yázanu yeru ba na', biti' bulu'dzölinu zoa Xanru' Jesús ni'.

⁴ Cate' ni' ta'bö'önu böniga ni'a que lē ni, chopē' bönni' nácugaquiē' lari' rēpi yösa bení' la' bila'dxintē' ni', en gula'zuínē' ga na' nacuá'anu.

⁵ Ní'irö guládxinu, en bulu'zötaj ícjagácanu, tu'yunu lu yu, ate' chopē' gubáz lá'ayi na' tē' légácanu, ta'nnē':

—¿Bizx que ruguílajli' nu zoa nabán xilataj nu nati?

⁶ Biti' zoē' ni, tu' chibubanē'. Guli'tsöjné lē na' chigudxi cazē' libí'ili' cate' ni' zoē' luyú Galilea.

⁷ Gunnē': "Run bayudxi nu udödi neda', Bönni' Guljē' Bönachi, lu ná'agaquiē' bönni' dul-la', ate' ulu'dē'ē neda' lē'e yaga cruz, ate' ubana' cate' gaca tsonna dza."

⁸ Ní'irö yöjnégácanu didza' na' bē'ē Jesús,

⁹ ate' bulu'zá'anu ra' yeru ba na', yöjtíxjöi'iguequinu idxinéajtē' bönni' gubáz queē' Cristo, en ia'zíca'rē' ca', ca naca lē na' guca.

¹⁰ Nigula na' yöjtíxjöi'iguequinu bönni' gubáz na' yugu' lē ni, nácagácanu María Magdalena, en Juana, en María, xinē'ē Jacobo, en ia'bál-lanu nigula na' dzágagácanu légácanu.

¹¹ Guléquinē' bönni' gubáz na' tu'ínu didza' chixi, en biti' gula'yéajlē'ē légácanu.

12 Ní'irö guyasë' Pedro, en carelö sa'yéajë' ra' yeru ba na'. Cate' buyüë' lu ba na', bilé'enë' yugu' lári'sö nacuá' ni', ate' ní'irö böajë' lidxë', rubáninë' ca naca lë na' guca.

Le guca la' nöza ridxintë Emaús

(Mr. 16:12-13)

13 La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén.

14 Yú'ugacasë' ca' nöza, tu'ë didza' ca naca yúgu'të lë na' guca.

15 Tsanni ni' yú'ugaquië' nöza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxön.

16 Biti' bulu'únbë'ë Lë' tu' naca ca tu le nabaga' guiöj lógaquië'.

17 Ní'irö Jesús gunábinë' légaquië', rnnë':

—¿Bizxi didza' na' ru'íli' la' libí'isili' yú'uli' nöza? ¿Bizx que na' ruhu'íinili'?

18 Bubi'ë didza' bönni' na' lë' Cleofas, rë' Lë':

—¿Nácatso' bönni' zí'tu' lu yödzö Jerusalén, en tuzu' li' bití' nözinu' lë na' guca néaje nasi ni'?

19 Ní'irö Jesús rë' légaquië':

—¿Bizxi na' guca?

Të' Lë':

—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të bönachi.

20 Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátië', ate' bulu'dë'ë Lë' lë'e yaga cruz.

21 Netu' bentu' löza gúquië' Lë' bönni' na' ral-la' huóá'uë' bönachi Israel, pero na'a chiguca tsonna dza cate' gulaca lë ni.

22 Ia'stú, bál-lanu nigula nútsa'gacanu netu' gulunnu ga gurö'ötu' böniga. Yöjácanu ra' yeru ba queë' cate' si' gulén gubidza na'a dza,

23 en cate' bití' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë légaicanu zoë' nabanë' Jesús.

24 Ní'irö bal-lë' bönni' luzá'atu' yöjáquië' ra' yeru ba na', en bila'lé'enë' naca ca na' gula'nnanu nigula na', pero bití' bila'lé'enë' Jesús.

25 Ní'irö Jesús gudxë' légaquië':

—Libí'ili', bönni' bití' réajni'ininë'. Nazidi icja ládxi'do'oli' para cabí tséajlë'ëli' yúgu'të le gula'nnë' bönni' gulu'ë didza' uláz queë' Dios.

26 ¿Naru' cabí ben bayudxi qui'i sáquë'ë Cristo yugu' lë ni, en tsázië' ga ni' tsépisëtë'ë'?

27 Ní'irö gusí lahuë' Jesús riguíxjöi'inë' légaquië' yúgu'të le ruí'í didza' ca naca queë' le nazúajgaca lu guichi lá'ayi, ca na' gusí lo bē'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

28 Cate' bila'dxinë' yödzödo' ga na' söjáquië', benë' Jesús ca tu bönni' zéajtërë' zi'tu'.

29 Gulunë' bayudxi ugá'analenë' légaquië', ta'nnë':

—Bugá'analen netu', tu' chiridzö' na'a, en chizóa gal-la.

Ní'irö guyázië' Jesús yu'u, en bugá'analenë' légaquië'.

30 Cate' ni' Jesús rö'ë rágulenë' légaquië', gudélë'ë yöta xtila, en gudxë' Dios: "Xclenu'." Ní'irö buzxuzxjë' le, en bē'ë quégaquië'.

31 La' ní'isö bidúa lë na' gubaga' guiöj lógaquië', ate' bulu'únbë'ë Jesús, ate' Lë' buniti cuinë' lógaquië'.

32 Ní'irö gulë luzë'ë tuë' ia'túë':

—¿Naru' cabí böála'tica' ládxi'do'oru' tsanni ni' ruí'ilenë' rë'u didza' la' nöza, en cate' ni' ruchila lá'anië' le nazúaj lu guichi lá'ayi?

33 La' ní'isö gula'zuinë' yöjhuöjgaquië' Jerusalén, ate' yöjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'.

34 Ní'irö yugu' bönni' na' nacu'ë ni' gulë' chopë' na':

—Chibubán cazë' Xanru', en buluí'í lahuë', ate' bilé'enë' Simón Lë'.

35 Ní'irö chopë' na' gula'guíxjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzxuzxjë' yöta xtila na'.

Bönni' usëda queë' Jesús tu'lé'enë' Lë'

(Mt. 28:16-20; Mr. 16:14-18; Jn. 20:19-23)

36 Tsanni ni' tu'ë didza' ca nácagaca lë ni, la' yöjsóatë' Jesús gatsaj láchui'lö ga na' nacu'ë, ate' rë' légaquië':

—Gulí'sóa dxi ládxi'li'.

37 Ní'irö guladxi gula'dzöbinë' tu' téquinë' bixín ta'lé'enë'.

38 Jesús rë' légaquië':

—¿Bizx que rö'öli' böniga? ¿Bizx que rizá' ládxi'li' yugu' lë ni?

39 Buli'yútsöca' na'a, en ni'a. Neda' caz ni. Gulí'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quía' neda'.

40 Ni' ruí'isë' ca' didza' ni, buluí'inë' légaquië' në'ë, en ni'ë.

41 Tu' tu'dzëjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queëli' ni le gahua'?

42 Ní'irö bulu'nödzjë' queë' láti'do'oba' böla chinégui'ba', en tu quízxi'ba' buz.

43 Guzxí'ë Jesús le, en gudahuë' lógaquië'.

44 Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunnía': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu' Salmo, ca ral-la' gaca quia' neda'.

45 Ní'irö buzéajni'inë' légaquië' lë na' nazúajgaca lu guichi lá'ayi.

46 Rë' légaquië':

—Caní nazúaj lu guichi ca run bayudxi gaca queë' Cristo, qui'i sáque'ë, en ubanë' lu yöl-la' guti cate' gaca tsonna dza,

47 ate' idútë yödzölió ral-la' gaca libán ca naca quia' neda' para ulu'bí'i ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na'

48 ate' libí'i cázali' na' bilé'eli' yugu' lë ni ral-la' gunli' ba nalí que.

49 Buli'yútsöca', isöl-la'a queë'li' le guzxí' lu në'ë Xuza' gunnë' queë'li', pero buli'gá'anasö Jerusalén cate' idxinrö queë'li' yöl-la' huáca na' za' yehua' yubá.

Ruhuëpë' Jesús yehua' yubá

(Mr. 16:19-20)

50 Ní'irö Jesús guchë'ë yugu' bönni' dá'gaquië' Lë', sōjāquië' yödzö Betania, ate' ni' guchisa në'ë, en bulidza tsáhuë'ë légaquië'.

51 Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá.

52 Gudödi gula'yéaj ládxi'gaquië' Lë', lu yöl-la' rudzeja quégaquië' yöjhuöjgaquië' Jerusalén.

53 Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

DIDZA' DXI'A BUZÚAJË' JUAN

Bönni' na' nazí'i lë' Didza' gúlajë' bönachi

¹ Cate' gusí lo, zí'atëlö cate' si' gata' yödzölió, ni' zoa cazë' Bönni' lë' Didza', ate' Bönni' na' náquië' Didza' zóalenë' Dios, ate' Didza' na' naca caz Dios.

² Bönni' na' náquië' Didza' zóalenë' Dios cate' ni' gusí lo si' rata' yödzölió.

³ Lu në'ë Bönni' ni, Dios benë' yúgu'të le dë, en biti' bi dë le nunë' Dios le çabí benë' lu në'ë Bönni' na'.

⁴ Dë caz queë' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi.

⁵ Ruzení' bení' na' ga naca chul-la que dul-la', pero biti' ca' sequí' le chul-la na' usulu bení' na'.

⁶ Dios gusöl-lë'ë ni tu bönni' lë' Juan.

⁷ Bidë' bönni' ni para gáquië' nu gun ba nalí. Bidë' para gunë' ba nalí queë' Bönni' na' náquië' bení', para tséjlë'gaca yúgu'të bönachi Dios ni'a que lë na' runë' ba nalí.

⁸ Biti' náquië' Juan bení' na', pero bidë' para gunë' ba nalí queë' Bönni' na' náquië' bení'.

⁹ Bönni' na' náquië' bení' le naca idú ni' razië' yödzölió ni, ate' ruzení'ë lu icja ládxi'do'gaca yúgu'të bönachi.

¹⁰ Bönni' na' náquië' bení' bidxinë' yödzölió ni, ate' lu në'ë Lë' Dios benë' yödzölió ni, pero bönachi yödzölió biti' bulu'únbë'ë Lë'.

¹¹ Bidxinë' ga nequi queë', pero biti' ca' gula'zí' lu ná'agaquië' Lë' bönni' nabábalenë'.

¹² Yúgu'të bönni' gula'zí' lu ná'agaquië' Lë', bönni' ni' gula'yéajlë'ë Jesús, Lë' benë' ga dë lu ná'agaquië' ilácagaquië' xzí'inë' Dios.

¹³ Bönni' ni nácagaquië' xzí'inë' Dios, calëga tu' nácagaquië' xzí'inë' nu bönni', en calëga tu' nálajgaquië' ni'a que le rizë ládxe'ë nu bönni', o ni'a que tu le ré'ënë' nu bönni', pero nácagaquië' caní tu' naca le ré'ëni quézinë' Dios.

¹⁴ Bönni' na' náquië' Didza' guljë' bönachi, en tu chí'isó guzóalenë' rë'u, idú dzágagaca Lë' le ruzá' ládxe'ë Dios queëru', en le naca idútë li. Bilé'etu' yöl-la' zxön queë', ate' yöl-la' zxön queë' na' naca le ruí'i queëbi' bi'i la's dui que, Nu na' naca Xúzibi'.

¹⁵ Juan na' benë' ba nalí queë' Bönni' na', en bë'ë zidzaj didza', rnnë':

—Bönni' ni náquië' Nu na' gudíxjö'a que, gunní'a: Bönni' si' zá'tëlë' ca neda' nayépisëtërë' ca neda', tu' zoa cazë' Lë' zí'aló ca neda'.

16 Le naca idú queë' buzí'iru' xibé yúgu'tëru', lë na' buzá' ládxë'ë queëru' Dios, en zianró ca' le ruzá' ládxë'ë queëru'.

17 Bidxín queëru' xibá queë' Dios lu në'ë Moisés, pero le ruzá' ládxë'ë queëru' Dios, en le naca idútë li bila'dxín queëru' lu në'ë Jesucristo.

18 Catu caz nu bilé'e Dios, pero Lë', la's dui Zxí'inë' Dios, Bönni' na' nadxí'ide'enë' Dios Xuz, Bönni' ni na' benë' ga núnbë'eru'-në' Dios.

Le benë' ba nalí Juan, bönni' buquilé' bönachi nisa, ca náquië' Jesús

(Mt. 3:1-12; Mr. 1:7-8; Lc. 3:1-17)

19 Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'sól-lë'ë yugu' bixúz, en bönni' nabábagaquië' Leví, nupa ni nácagaca ní'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

20 Yálajdo' bë'ë didza' Juan, en biti' gudá'baguië', pero gudíxjö'ë catëz naca, rnnë':

—Biti' naca' Cristo, Bönni' na' guzxi' lu në'ë Dios isól-lë'ë queëru'.

21 Ní'irö gula'nábinë' lë' leyúbölö, të' lë':

—¿Nuzxi caz li'? ¿Naru' nacu' li' Elías, bönni' bë'ë didza' uláz queë' Dios dza ni'të'?

Gunnë' Juan:

—Biti' naca'.

Ní'irö të' lë':

—¿Naru' nacu' li' bönni' na' ral-la' guídë' gu'ë didza' uláz queë' Dios?

Bubi'ë didza' Juan, rnnë':

—Calëga neda'.

22 Ní'irö të' lë':

—¿Nuzxi caz nacu'? Gudíxjö'i' netu' para gaca usiyöntu' nupa gula'sól-la' netu'. ¿Bizxi rnnö' li' nuzxi nacu'?

23 Bubi'ë didza' Juan, rë' légaquië':

—Neda' naca' bönni' na', nazúaj lu guichi lá'ayi ca naca queë', rnná: Riyón chi'i nu rulidza lu lataj cá'asö, rnná: Buli'béaj li nöza para idxín Xanru' queéli'. Caní gunné' Isaías, bönni' na' bë'ë didza' uláz queë' Dios.

24 Yugu' bönni' ni nácagaquië' bönni' yudo' fariseo nasöl-la'gaquië' bönni' judío unná bë'.

25 Gula'nábinë' Juan, të' lë':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en calëga bönni' na' ral-la' guídë' gu'ë didza' uláz queë' Dios?

26 Bubi'ë didza' Juan na', rë' légaquië':

—Neda' ruquila' bönachi nisa lu nisa, pero gatsaj lähui'lö ga zóali' zoë' tu bönni' biti' núnbë'ëli'-në'.

²⁷ Bönni' ni náquië' Bönni' na' si' zá'tëlë' ca neda', en nayëpisëtërë' ca neda', atë' biti' naca' neda' lesaca' ulecja' xiráchuë' nudë'ë.

²⁸ Yúgu'të lë ni guca lu xiyú yödzo Betábara, ga naca ia'tsölá'a yegu Jordán, zaca' ga rilén gubidza, ga ni' buquilë' Juan bönachi nisa.

Jesús náquië' ca bö'cu' zxíla'do' tutië'-ba' lahuë' Dios tu' nözi dul-la'

²⁹ Dza buropi ni' Juan bilé'enë' Jesús, zë'ë ga zoë', atë' rnnë':

—Buli'yútsöca'. Bönni' ni náquië' bö'cu' zxíla'do' queë' Dios, gatië' para ugúë' dul-la' nabága'gaca bönachi yödzo'lió.

³⁰ Lë' náquië' bönni' na' gunnía' queë': "Si' zá'tëlë' ca neda' tu bönni', nayëpisëtërë' ca neda', tu' zoa cazë' zí'alö ca neda'."

³¹ Neda' biti' bënbe'a-në' zí'alö, pero bida', ruquila' bönachi nisa para ilúnbë'e bönachi Israel Lë'.

³² Benë' ba nalí Juan ca naca queë' Jesús, rnnë':

—Bilé'eda'-në' Dios Bö' Lá'ayi, bötjë' birúajë' yehua' yubá, gunë'ë ca riná'aba' gu'dödo', atë' bidxinë' ga zoë' Jesús, en bugá'analenë' Lë'.

³³ Biti' bënbe'eda' Lë' zí'alö. Gudxi neda' Nu na' gusöl-la' neda' para uquila' bönachi nisa, gunnë': "Cate' ilé'enu'-në' huötjë' Dios Bö' Lá'ayi, tsöjsóalenë' Bönni' na', en ugá'analenë' Lë', Bönni' ni gunë' le rulu'isö yöl-la' ridila nisa ni, uchízië' bönachi Dios Bö' Lá'ayi."

³⁴ Na'a, chibilé'eda' lë na', en runa' ba nalí queë' Bönni' ni, náquië' Zxi'inë' Dios.

Yugu' bönni' usëda zí'alö queë' Jesús

³⁵ Ia'tú dza ca', leyúbölö zoë' Juan ni', atë' nacuá'lenë' lë' chopë' bönni' dá'gaquië' lë'.

³⁶ Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnnë':

—Buli'yútsöca'. Ni' zoë' bönni' na' náquië' bö'cu' zxíla'do' queë' Dios, gatië' uláz quegaca bönachi dul-la'.

³⁷ Chopë' bönni' na' dá'gaquië' Juan bila'yönnë' didza' ni bë'ë lë', atë' yöjnógaquië' Jesús.

³⁸ Ní'irö buécjë' Jesús, en buyúë' chopë' ni söjnógaquië' Lë', atë' rë' légaquië':

—¿Bizxi riguíljali'?

Të' Lë':

—Bönni' Usedi, ¿gazxi zu'?

³⁹ Bubi'ë didza' Jesús, rë' légaquië':

—Guli'dá, uyuli'.

Ní'irō yōjácalenē' Lē', en bila'lé'enē' ga na' zoē', ate' bulu'gá'analēnē' Lē' dza na', tu' chizá' ral-la.

⁴⁰ Andrés, bōchē'ē Simón Pedro, náquiē' tuē' bōnni' chopē' ni' bila'yōnnē' didza' bē'ē Juan, en yōjnógaquiē' Jesús.

⁴¹ Andrés na', zí'alō yōjdiljē' bōnni' bōchē'ē, lē' Simón, ate' rē' lē':

—Chibidzōlitu'-nē' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bōnni' nasōl-lē'ē Dios.

⁴² Ní'irō Andrés na' la' guchē'tē' Simón ga na' zoē' Jesús. Cate' Jesús bilé'enē' lē', rē' lē':

—Li' nacu' Simón, zxi'inē' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiōj.

Jesús rulidzē' Felipe, en Natanael

⁴³ Cate' za' rení' ia'tú dza, gú'unnē' Jesús tsejē' luyú Galilea, ate' yōjxáquiē' Felipe, en rē' lē':

—Gudá' neda'.

⁴⁴ Náquiē' Felipe bōnni' yōdzō Betsaida, le naca ládzagaquiē' Andrés, en Pedro.

⁴⁵ Felipe budzōlinē' Natanael, en rē' lē':

—Chibidzōlitu'-nē' bōnni' na' buzúajē' Moisés ca naca queē' lu guichi lu xibá queē' Dios, ate' bulu'zúajē' ca' ca naca queē' bōnni' gulu'ē didza' uláz queē' Dios. Bōnni' ni Jesús, zxi'inē' José, bōnni' yōdzō Nazaret.

⁴⁶ Natanael rē' lē':

—¿Naru' hualá'tsō Nazaret tu le naca dxi'a'?

Felipe rē' lē':

—Gudá uyú'.

⁴⁷ Cate' bilé'enē' Jesús zē'ē Natanael na' ga zoē', rnnē':

—Buli'yú ni tu bōnni' náquiē' idú bōnni' Israel, en biti' rnnasē' ca' bōnni' ni.

⁴⁸ Ní'irō Natanael gunábinē' Jesús, rē' Lē':

—¿Naru' núnbē'tso' neda'?

Bubi'ē didza' Jesús, rē' lē':

—Cate' si' ulídzatērē' Felipe li', cate' ni' zu' zxan yaga higo, bilé'eda' li'.

⁴⁹ Ní'irō bubi'ē didza' Natanael, rē' Lē':

—Bōnni' Usedi, Li' nacu' Zxi'inē' Dios. Li' nacu' Nu inná be'e bōnachi Israel.

⁵⁰ Bubi'ē didza' Jesús, rē' lē':

—¿Réajlē'tso' tu' gudxa' li': Bilé'eda' li' zxan yaga higo? Yugu' le zxōntērō ca lē' ni hualé'enu'.

⁵¹ Lē'sca' caní rē' Jesús légaquiē', rnnē':

—Le nácatē rea' libí'ili', ilé'eli' nayalaj lúzxiba, en ta'benē', en tu'huōtjē' gubáz lá'ayi queē' Dios ga zoa' neda', Bōnni' Guljē' Bōnachi.

2

Laní que yöl-la' rutsaga na' le guca lu yödzö Caná

¹ Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xině'ë Jesús ni'.

² Lësca' zoa nu bulidza Jesús, en yugu' bönni' usëda queë' dijáquië' laní na'.

³ Cate' biyadzaj xisi uva ilé'ajë', ní'irö xině'ë Jesús gúdxinu Lë', rnnanu:

—Biti'rö dë xisi uva ilé'ajë'.

⁴ Bubi'ë didza' Jesús, rë'ë-nu:

—Nigúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xině'ë Jesús gúdxinu bönni' huen dxin ta'gu'ë le tahuë', rnnanu:

—Guli'gún yúgu'të le guíë' libí'ili'.

⁶ Nacuá' ni' xopa yusu' guiöj tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopá tsonna rö'ö nisa tu tu yusu' na'.

⁷ Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'lié' yugu' yusu' na' nisa.

⁸ Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'. Yöjuá'gaquië' na'.

⁹ Buyúë' bönni' na' zoë' ra' yusu' channö nazxí'i nisa na' nuhuóaca xisi uva, pero bití' réquibe'enë' gazxi za'. Nöziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë,

¹⁰ en rë' lë':

—Zí'alö tu'nödzjë' yúgu'të bönni' xisi uva nácarö sizxí'i, en cate' chigulé'ajë' yenni', ní'irö tu'nödzjë' le cabí nazxí'i. Lí, ga bidxintë na'a ben chí'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzö Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxön queë', ate' gula'yéajlë'ë Lë' bönni' usëda queë'.

¹² Gudödi na' guyijë' Jesús yödzö Capernaum, ate' dzágagaquië' xině'ë, en yugu' bönni' böchë'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulatjë' Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzö Jerusalén.

14 Lu yödzo na' yöjxáquië' Jesús nacu'ë bönni' lö'a yudo' ga na' túti'ë-ba' yugu' bédxi, en yugu' bö'cu' zxila', en yugu' gu'dödo', böa' bédxi na' tútigaquië'-ba' lahuë' Dios. Rõ'õgaquië' ca' ni' bönni' tu'tsé'ë dumí za' idütë yödzölió.

15 Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të' ní'iló lö'a yudo', en bulágui'ë-ba' ca' ní'iló yugu' bö'cu' zxila', en yugu' bédxi. Bësië' dumí quégaquië' bönni' na' tu'tsé'ë dumí lu yu, en burixë' yugu' blaga quégaquië'.

16 Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu yë'ëyi.

17 Ní'irö yöjnéguequinë' bönni' usëda queë' Jesús le nazúaj lu guichi lá'ayi, rna: Tu' ru'ida' ládxa'a lidxu', régui rilá ládxi'da'ahua'.

18 Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca uluí'inu' netu' le gaca bë' dë lu no'o runu' yugu' lë ni?

19 Bubi'ë didza' Jesús, rë' légaquië':

—Guli'quínaj yudo' ni, ate' tsonna dzasö uchisa' le.

20 Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

21 Yudo' na' bë'ë didza' que Jesús naca la' cuin cazë'.

22 Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunné', ate' gula'yéajlë' le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

23 Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'.

24 Biti' buzxöni ládxe'ë Jesús légaquië', tu' nunbë' cazë' yúgu'të bönachi.

25 Biti' naquínnë' Jesús nu quíxjöi'i Lë' ca nácagaca bönachi, tu' nöz quézinë' Lë' le yu'u icja ládxi'do'gaca bönachi.

3

Jesús, en Nicodemo

1 Nicodemo, tu bönni' yudo' fariseo, nabábalenë' yugu' bönni' judío unná bë'.

2 Bidë' bönni' ni ga zoë' Jesús chi'i dzö'ölö, en rë' Lë':

—Bönni' Usedi. Réquibe'etu' nasöl-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nácagaca bë' ca nácagaca le caní runu' Li' channö cabí zóalenë' Dios lë'.

³ Bubi'ë didza' Jesús, rë' lë':

—Le nácatë rea' li', nu cabí galaj leyúbölö, biti' ca' ilé'e lataj ga ni' rinná bë'ë Dios.

⁴ Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lë'ënu xinë'ë, ate' galjë' ia'tú?

⁵ Bubi'ë didza' Jesús, rë' lë':

—Le nácatë rea' li'. Nu bönni' cabí galjë' ni'a que nisa, en ni'a queë' Dios Bö' Lá'ayi, biti' gaca tsázië' ga rinná bë'ë Dios.

⁶ Nu na' nalaj lu ni'a lu na' bönachi, bönáchisö naca, pero nu nalaj ni'a queë' Dios Bö' Lá'ayi, Bö' Lá'ayi nabani nu na'.

⁷ Biti' ubáninu' tu' rea' li', run bayudxi galju' leyúbölö.

⁸ Gátitës recja bö', ate' riyönnu' rnnë bö' na', pero biti' nözinu' gazxi za', o gazxi zeaj. Lësca' caní raca quégaca nupa náljagaca ni'a queë' Dios Bö' Lá'ayi.

⁹ Ní'irö Nicodemo gunábinë' Jesús, rnnë':

—¿Nacxi caz gaca lë ni'?

¹⁰ Bubi'ë didza' Jesús, rë' lë':

—¿Ruséditsenu' li' bönachi Israel, en biti' nözinu' yugu' lë ni'?

¹¹ Le nácatë rea' li', le nöztu' ruí'itu' didza' que, en le bilé'etu' runtu' ba nalí que, pero biti' rizí' lu ná'ali' lë na' runtu' ba nalí.

¹² Channö cabí réajlë'ëli' neda' cate' ruí'ilena' libí'ili' didza' ca naca le raca yödzülió ni, ¿nacxi caz gaca tséajlë'ëli' channö guía' libí'ili' le raca yehua' yubá?

¹³ Catu caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá.

¹⁴ Ca na' benë' Moisés lu lataj cá'asö, buchisë'-ba' bëla néquiniba' guié, budë'ë-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisë' neda' xitsá'.

¹⁵ Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

Dios nadxí'ide'enë' bönachi yödzülió

¹⁶ Tu' bidxí'ide'enë' Dios bönachi yödzülió, buzá' ládxë'ë quéguequi Zxí'inë' la' buduínë', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi.

¹⁷ Dios gusól-lë'ë Zxí'inë' yödzülió ni, calëga para ichúguië' quégaca bönachi yödzülió ni gátigaca, pero para ulu'lágaca bönachi yödzülió ni ni'a queë' Lë'.

18 Nu bönni' réajlë'ë Zxí'inë' Dios, biti' ca' narugu queë' inítië', pero bönni' na' biti' réajlë'ë Lë', chinarugu queë' gátíë', tu' cabí réajlë'ë Zxí'inë' Dios la' buduínë'.

19 Que lë ni na' chinarugu quégaca bönachi gátigaca, tu' bidxinë' Bönni' na' náquië' bení' yödžölió ni, pero gulunrö zxön bönachi ni le naca chul-la que dul-la' ca gulunë' zxön Bönni' na' náquië' bení', tu' nácagaca xihui' le tunë'.

20 Yúgu'të bönni' tu'ë dö' biti' raza ládxi'gaquië' bení', en biti' rídigaquië' lu bení', para cabí ilá' lahui le tunë'.

21 Nu run le naca idútë li ridxín lu bení' para gaca bë' núngaca ni'a queë' Dios le run nu na'.

Juan, bönni' ruquilë' bönachi nisa, ru'ë didza' ca naca queë' Jesús

22 Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ni', ga na' tu'quilë' bönachi nisa.

23 Lësca' ruquilë' Juan bönachi nisa ga nazí'i le Enón, gala' ga dë yödžö Salim, tu' dë nisa zila lataj na', ate' ta'dxín bönachi ni', en ta'dila nisa.

24 Raca caní zí'atëlö cate' biti' idzunë' Juan na' lidxi guíë.

25 Ní'irö gula'sí lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudó'.

26 Bila'dxinë' ga zoë' Juan, en të' lë':

—Bönni' usedi. Buyútsöca'. Bönni' na' guzóalenë' li' ia'tsölá'a yegu Jordán, bönni' na' benu' ba nalí queë', ruquilë' bönachi nisa, ate' ta'dxín yúgu'të bönachi ga zoë'.

27 Ní'irö bubi'ë didza' Juan, rë' légaquië':

—Biti' bi dë lu në'ë nu bönni', channó cabí nudödë' Dios le lu në'ë.

28 Biyön quézili' lë na' bena' ba nalí, gunnía': "Biti' naca' neda' Cristo", pero Dios nasöl-lë'ë neda' para guía' bönachi si' zë'ë Lë'.

29 Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, pero böchi' luzë'ë bönni' rutsaga në'ë, en dzáguie' lë', ruzë náguie' didza' ru'ë, en rudzéjanë' tu' riyönnë' didza' ru'ë bönni' rutsaga në'ë. Lësca' caní, rudzéjade'eda' neda' tu' raca lë ni caní.

30 Run bayudxi gácarë' zxön Cristo, pero neda', run bayudxi gácara' cuídí'sö.

Nu za' zaca' yehua' yubálö

31 Gunnë' ca' Juan:

—Bönni' na' zë'ë zaca' xitsá'alö nayëpisëtërë' ca yúgu'të bönachi. Nu bönni' náquië' bönachi yödžölió ni, que yödžölió ni

náquië, en ru'ë didza' que le raca yödzülió ni, pero Bönni' na' zë'ë zaca' yehua' yubálo nácatërë' lo ca yúgu'të bönachi.

³² Bönni' na' runë' ba nalí que le bilé'enë', en le biyönnë', pero cuntú nu rizí' lu në'e le runë' ba nalí.

³³ Núti'tës bönni' rizí' lu në'ë lë na' runë' ba nalí, bönni' ni rulu'ë lahui réajlë'ë naca idútë li didza' ru'ë Dios.

³⁴ Bönni' na' nasól-lë'ë Dios, didza' queë' Dios ru'ë, tu nuzóadërë' Dios Bö' Lá'ayi queë' lu Bönni' na'.

³⁵ Dios Xuz nadxí'inë' Zxí'inë', ate' yúgu'të le dë chinudödë' lu në'ë Zxí'inë' na'.

³⁶ Nu bönni' réajlë'ë Dios Zxí'ini, dë yöl-la' na'bán idú queë', pero bönni' na' biti' réajlë'ë Dios Zxí'ini, biti' idéli'në' yöl-la' na'bán na', pero nabáguë'ë xíguia' lahuë' Dios.

4

Jesús ru'ílenë'-nu didza' tu nigula Samaria

¹ Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilë' ca' nisa zíanrö bönachi ca ruquilë' nisa Juan.

² Calëga Jesús caz ruquilë' bönachi nisa, pero bönni' usëda queë' tu'quilë' bönachi nisa.

³ Cate' gúquibe'enë' Jesús lë ni, buzë'ë luyú Judea, ate' sa'yéajë' leyúbölo luyú Galilea.

⁴ Ga ni' sa'yéajë', run bayudxi tödë' luyú Samaria.

⁵ Caní guca, bidxinë' Jesús tu yödzüdo' luyú Samaria, nazí'i le Sicar, gala' ga dë yu na' bunödzejë' Jacob queëbi' José, zxí'inë' Jacob na', dza ni'te.

⁶ Lataj na' zoa tu yeru nisa nachö'önë' Jacobo na' ga rë'. Cate' bidxinë' Jesús ni', gurö'ë ra' yeru nisa na' tu' yöjxéqui'në' yu'ë nöza. Guca idú huagubidza.

⁷ Ní'irö bidxinnu tu nigula Samaria ni' para sí'inu nisa. Jesús rë'ë-nu:

—Benna le guí'ja'.

⁸ Tuzë' zoë' Jesús tu' chisöjajúqië' bönni' usëda queë' lu yödzö söjxí'gaqië' le ilahuë'.

⁹ Ní'irö nigula Samaria na' rënu Jesús, rnnanu:

—¿Rinábitsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnúnu tu' cabí ta'dzaga dxi'a bönachi Samaria len bönachi judío.

¹⁰ Bubi'ë didza' Jesús, rë'ë-nu:

—La'tu' núnbë'u le runödzejë' Dios, en Nuzxi na' rë li': “Benna le guí'ja'”, li' inabu', ate' Lë' gunnë' quiu' nisa runna yöl-la' na'bán.

¹¹ Ní'irö nigula na' rënu Lë', rnnanu:

—Bönni', bití' nu'u le cuéaju' nisa, ate' yeru nisa ni, dxí'tërö rö'. ¿Gazxi dë nisa na' runna yöl-la' na'bán?

¹² ¿Naru' nácatërötso' Li' zxön ca xúziru' gudödi Jacob, bönni' ni' bennë' queëtu' yeru nisa ni, ga ni guzxi'ë nisa gu'ë, en gulé'ajbi' ca' zxí'inë', en gulé'ajba' ca' böa' bëdxi queë'?

¹³ Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa,

¹⁴ pero nu guí'aj nisa na' unödza' neda', bíti'rö ubidxi icja ládxi'da'ahuë', tu' unödza' queë' nisa na' gaca lu icja ládxi'da'ahuë' ca tu ga ralaj nisa, le gü'i yöl-la' na'bán idú queë'.

¹⁵ Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bubi'ínu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rno': "Cuntu nu zoa bönni' quia'",

¹⁸ tu' chiguzóalenu' gayu' bönni', ate' bönni' na' zóalenu'-në' na'a, bití' náquië' bönni' quiu'. Didza' ni ru'u, ca nácatë rno'.

¹⁹ Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios.

²⁰ Xuz xtó'oru' guléquinë' Dios le bach lu guí'a ni, pero rnnali' libí'ili' Jerusalén naca ga ral-la' ilequi bönachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-la' bití' idisóali' guí'ado' ni, en bití' tsöjsóali' Jerusalén.

²² Libí'ili' reaj ládxi'li' Nu bití' núnbë'ëli', pero netu' núnbë'ëtu' Nu na' reaj ládxi'tu', tu' benë' queë' Dios ilá' lahui yöl-la' rusólá ni'a quégaquië' bönni' judío.

²³ Na'a, za' dza, en chiridxín dza na', cate' nupa le nácatë ta'yéaj ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li, tu' rë'ënë' Dios Xuz ilácagaquië' queë' bönni' ila'yéaj ládxi'gaquië' Lë' caní.

²⁴ Dios náquië' Bö', ate' nupa ta'yéaj ládxi'gaca Lë', run bayudxi ila'yéaj ládxi'gaca Lë', zóalenë' Dios Bö' Lá'ayi léguequi, en le naca idútë li.

²⁵ Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë' quíxjöi'inë' rë'u yúgu'të.

²⁶ Jesús rë'ë-nu:

—Lë' cazë' ru'ilenë' li' didza'.

27 La' ná'asö bulu'dxinë' bönni' usëda queë' Jesús, ate' bulu'bá'ínë' tu' ruí'ilenë'-nu nigula didza', pero biti' burú'guinë' nitüë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ruí'ilenü'-nu?"

28 Ní'irö nigula na' bucá'ananu xichö'önu ni', ate' böajnu la' yödzo, söjdxinu nupa nacuá' ni', rnnanu:

29 —¡Guli'dá, ilé'eli'-në' tu bönni' gudxë' neda' yúgu'të le chinuna'! ¿Naru' cabí nácatsë' Lë' Cristo?

30 Ní'irö bila'rú'aj bönachi yödzo na', en bila'dxín ga zoë' Jesús.

31 Tsanni ni' söhuöajnu nigula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

32 Jesús rë' légaquië':

—Dë tu le rahua', le cabí réquibe'eli'.

33 Ní'irö gula'nabi luzá'agaquië' bönni' usëda queë' tuë' ia'tué', ta'nnë':

—¿Zoa nu chidiguá'tsö le gudahuë'?

34 Ní'irö Jesús rë' légaquië':

—Le nabánida' naca guna' ca rë'ënë' Xuza' nasöl-lë'ë neda', en údxi guna' xichinë'.

35 Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Guli'chisa loli' uyuli' bönachi nácagaca ca gapa nadú'zgaca, le chinabí'dxigaca para tsöjláparu'.

36 Bönni' na' rulapë' rizi'ë la'zjë', ate' lë na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxón nu raza, en nu rulapa.

37 Naca idútë li lë na' rnna caní: Tu nu raza, ate' ia'tú nu rulapa.

38 Neda' gusöl-la'a libí'ili' tsöjlápali' ga biti' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núngaquië'.

39 Zián bönachi Samaria nacuá' yödzo Sicar na' gula'yéajlë'ë Jesús ni'a que xtídza'nu nigula na' bennu ba nalí queë', gunnánu: "Gudxë' neda' yúgu'të le chinuna'."

40 Cate' bila'dxinë' bönni' Samaria ga ni' zoë' Jesús, gulá'tayüë' lahuë' ugá'analenë' légaquië'. Jesús bugá'anë' ni' ia'chopa dza.

41 Caní guca, ziántërë' ca' bönni' ni' gula'yéajlë'ë Jesús ni'a que didza' bë'ë.

42 Ní'irö bönni' ni' gulë'-nu nigula na', ta'nnë':

—Na'a réajlë'ëtu' Lë', calégasö ni'a que didza' bë'u li', pero lë'sca' tu' biyónitu' netu' Lë', en nöztu' le nácate bönni' ni náquië' Cristo, Nu rusölá bönachi yödzo'lió.

Ruúnë' Jesús xí'inë' tuë' bönni' dë lu në'ë

43 Ia'chopa dza ca', buzě'ë Jesús luyú Samaria, en sa'yéajě' luyú Galilea.

44 Caní beně', tu' gudíxjö'ë Lě cazě' Jesús, gunně': "Bönachi uládz queě' nu bönni' ru'ë didza' uláz queě' Dios biti' tun lě' bal."

45 Cate' bidxině' Jesús luyú Galilea, guluně' bönni' Galilea na' Lě' bal tu' yójáquiě' ca' Jerusalén cate' guca Laní Pascua, en bila'lé'eně' le beně' Jesús ni'.

46 Ní'irö böajě' Jesús yödzo Caná luyú Galilea, ga ni' beně' ga böáca nisa xisi uva. Lu yödzo Capernaum na' zoě' tu bönni' dē lu nē'ë uláz queě' bönni' rinná bē'ë, ate' ré'ebi' bi'i bönni' queě' bönni' na' dē lu nē'ë.

47 Cate' biyönně' bönni' ni chibuzě'ë Jesús luyú Judea, en budxině' luyú Galilea na', ní'irö guyijě' ga na' zoě' Jesús, en gúta'yue' lahuě' guídě' lidxě', para uduhuéně'-bi' bi'i bönni' queě' na', tu' chirequi gátibi'.

48 Ní'irö Jesús rě' lě':

—Biti' ca' tséajlě'ëli' channö cabí ilé'eli' le nácagaca bē', en yugu' yöl-la' huáca guna'.

49 Ní'irö bönni' na' dē lu nē'ë uláz queě' bönni' rinná bē'ë gudxě' Jesús, rnně':

—Bönni', gudía'tě para cabí gátibi' bi'i quia'.

50 Ní'irö Jesús rě' lě':

—Böaj lidxu'. Nabanbi' bi'i quiu'.

Bönni' ni guyéajlě'ë didza' bē'ë Jesús, ate' söhuöjě'.

51 Tsanni ni' yu'ë nöza söhuöjě', duzxí'gala'gaquiě' lě' bönni' huen dxin queě' ate' gula'guíxjöi'ině' lě', ta'nně':

—Nabanbi' bi'i quiu'.

52 Gunábině' légaquiě' bátaxi gusí lo ruhuóaca ládxi'bi'. Tě' lě':

—Ba'ayi, idú huagubidza, burúaj xilá yú'ubi'.

53 Ní'irö gúquibe'eně' xúzibi' bi'i na', böácabi' cate' ni' bē'leně' Jesús lě' didza', en gudxě' lě': "Nabanbi' bi'i quiu'." Que lě' ni na' guyéajlě'ë Jesús, ate' gula'yéajlě' ca' Lě' bönachi nacúa' lidxě'.

54 Yöl-la' huáca ni naca le buropi beně' Jesús cate' ni' zoě' luyú Galilea, gudödi buzě'ë luyú Judea.

5

Ruúně' Jesús tu bönni' nacú'uniě' bin ga nazi'i le Betesda

1 Gudödi guca lě ni, guca laní quégaquiě' bönni' judío, ate' guyijě' Jesús Jerusalén.

2 Lu yödzo na', gala' ga tu'ú'uba' bö'cu' zxila', dē tu le zxön yudzu nisa, nazi'i le Betesda lu didza' hebreo, en nacúa' gayu' chila don que.

³ Yugu' lu chila na' dëgaquië' zían bönni' té'enë', bönni' nachul-la lógaquië', en bönni' biti' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'.

⁴ Caní raca, tu' ruhuötjë' tu gubáz lá'ayi queë' Dios tu chi'i huéaj, en röjtsu'ë lu nisa na', en ruté' nisa na'. Huóacatë' nu bönni' tsöjtsú'utië' lu nisa na' cate' rutá cuini ca naca bíti'tës yödzöhuë' raca queë'.

⁵ Zoë' tu bönni' ni', chiguca chizxunu' uruá' iz ré'enë'.

⁶ Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba rë'ënu' huóacu'?

⁷ Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

⁸ Jesús rë' lë':

—Guyaschi. Buá' le denu', en guzë'e.

⁹ La' böacatë' bönni' na', ate' bu'ë le gúti'në', en guzë'ë. Dza na' raca caní naca dza lá'ayi quégaquië' bönni' judío.

¹⁰ Ní'irö bönni' judío unná bë' gulé' bönni' na' nuhuóáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

¹¹ Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': “Buá' le denu', en guzë'e.” Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní li': “Buá' le denu', en guzë'e”?

¹³ Biti' nözinë' bönni' na' nuhuóáquië' nuzxi na', tu' chibuzë'ë Jesús lataj ni' tu' nacuá' bönachi zían ni'.

¹⁴ Gudödi guca lë ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböacu'. Bíti'rö gunu' dul-la', para cabí gaca quiu' tu le nácarö zí' ca lë na' guca quiu'.

¹⁵ Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'.

¹⁶ Que lë ni na' bönni' judío unná bë' gula'bía ládxi'gaquië' Jesús, en gulé'ënnë' ilútië' Lë', tu' runë' yugu' lë ni cate' naca dza lá'ayi quégaquië'.

¹⁷ Bubi'ë didza' Jesús, rë' légaquië':

—Xuzá' ná'atë runë' dxin, ate' neda' ca' runa' dxin.

¹⁸ Que lë ni na' gulé'ë'nirönë' bönni' judío unná bë' ilútië' Jesús, calëgasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

Yöl-la' unná bë' dë lu në'ë Zxí'inë' Dios

¹⁹ Ní'irö bubi'ë didza' Jesús, rë' légaquië':

—Le nácatē rea' libí'ili'. Biti' bi gaca guna' neda', Zxí'inē' Dios, rácasō quia', pero tuz lē na' rilé'eda' runē' Dios Xuz. Yúgu'tē le runē' Dios Xuz, lēasca' caní runa' neda', Zxí'inē'.

²⁰ Dios Xuz nadxí'inē' neda', Zxí'inē', en ruluí'inē' neda' yúgu'tē le runē', ate' yugu' le zxöntērō ca lē ni uluí'inē' neda', le ilún ga ubánili' libí'ili'.

²¹ Ca na' runē' Dios Xuz, rusubanē' nupa nátigaca, en rugú'ē légaquiē' yōl-la' na'bán, lēasca' caní runa' neda', Zxí'inē', runōdzja' quégaca bōnachi yōl-la' na'bán ca rē'ēni quézida'.

²² Cuntu nu ruchi'a rusörōē' Dios Xuz, pero chinudödē' lu na'a neda', Zxí'inē', yúgu'tē yōl-la' unná bē' para uchi'a usörōa' bōnachi.

²³ Caní naca para ilún bal yúgu'tē bōnachi neda', Zxí'inē', ca na' tun bal Dios Xuz. Nu bití' run bal neda', Zxí'inē', bití' run bal Dios Xuz, nasōl-lē'ē neda', Zxí'inē' na'.

²⁴ 'Le nácatē rea' libí'ili'. Bōnni' na' riyōnnē' didza' ruá'a, en réajlē'ē Dios Xuz na' nasōl-lē'ē neda' dē yōl-la' na'bán idú queē', ate' bití' irugu queē'. Náquiē' ca nu chinubán lu yōl-la' guti tu' chidē yōl-la' na'bán idú queē'.

²⁵ Le nácatē rea' libí'ili', za' dza, en chiridxín dza na', cate' ila'yōni nupa chinátigaca chí'a neda', Zxí'inē' Dios, ate' nupa ila'yōni xtídza'a, en ilún ca rnna, huóata' yōl-la' na'bán quéguequi.

²⁶ Ca na' dē lu nē'ē Dios Xuz unōdzjē' yōl-la' na'bán quégaca bōnachi, lēasca' caní benē' ga dē lu na'a neda', Zxí'inē', unōdzja' yōl-la' na'bán quégaca bōnachi.

²⁷ Lēasca' caní budödē' lu na'a yōl-la' unná bē' uchi'a usörōa' bōnachi, tu' naca' Bōnni' Guljē' Bōnachi.

²⁸ Biti' ubánili' ca naca lē ni, tu' huadxín dza cate' yúgu'tē nupa chinátigaca ila'yōni chí'a,

²⁹ en ulu'rúaj yeru ba. Ulu'bán nupa na' gulún le naca tsahui', en huóata' yōl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bē' le náquiē' Jesús

³⁰ Gunnē' ca' Jesús:

—Biti' bi gaca guna' la' néda'sō. Ca naca le riyōnda' rē' Xuza' neda', caní ruchi'a rusörōa', ate' ca na' ruchi'a rusörōa' naca tsahui', tu' cabí runa' ca rē'ēnisida' neda', pero ca rē'ēni quézinē' Xuza' nasōl-lē'ē neda', runa'.

³¹ Channō neda' runa' ba nalí que la' cuin caza', bití' naca lesaca' lē na' runa' ba nalí.

³² Zoa Nu yúbölō Nu run ba nalí quia' neda', Lē' Xuza', ate' nōzda' naca lesaca' le runē' ba nalí quia'.

33 Libí'ili' gusöl-la'li' bönni' yöjnébiguequiné' Juan, ate' lë na' benë' ba nalí quia' naca idütë li.

34 Neda' bití' naquinda' nu bönni' gunë' ba nalí quia', pero ruá'a didza' caní para uláli'.

35 Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu chí'isö guyaza ládxi'li' uzí'ili' xibé bení' queë'.

36 Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácgaca bë' gusöl-lë'ë Dios Xuz neda'.

37 Lësca' Dios Xuz nasöl-lë'ë neda' runë' ba nalí quia'. Catu caz biyönili' chí'ë, en catu caz bilé'eli' lahuë',

38 en cabí nazí' lu ná'ali' xtídzë'ë, tu' cabí réajlë'ëli' neda', Nu na' gusöl-lë'ë.

39 Rusédali' le nazúaj lu guichi lá'ayi, tu' réquili' huáta' yöl-la' na'bán idú queëli' ni'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'.

40 Biti' ré'ënilí' guídali' quia' neda' para gata' yöl-la' na'bán queëli'.

41 'Biti' riguilja' yöl-la' ba le ila'gú'u bönachi neda'.

42 Neda' núnbë'a libí'ili', en nözda' bití' nadxí'ili'-në' Dios.

43 Bidxina' ni uláz queë' Dios Xuz, ate' libí'ili' bití' rizí' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'.

44 ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'ali' tuli' ia'tuli', en bití' riguíljali' yöl-la' run zxön na' za' lu në'ë la's dui Dios?

45 Bití' uzóa ícjali' uzéguia' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxi'li'-në', sal-la' gútië' dza ni'te.

46 La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'.

47 Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

6

Rugahuë' Jesús zíanrö ca chi-un gayuá' bönachi
(Mt. 14:13-21; Mr. 6:30-44; Lc. 9:10-17)

1 Gudödi guca lë ni, guyijë' Jesús ia'tsölá'a Nísado' Que Galilea, nazí'i le ca' Nísado' Queë' Tiberias.

2 Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'.

3 Ní'irö gurenë' Jesús, guyijë' ga naca tu lu guíado', ga ni gurö'ölenë' yugu' bönni' usëda queë'.

4 Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto.

5 Cate' guchisa lahuë' Jesús, en bilé'enë' bönachi zián zá'gaca ga zoë', ní'irö rë' Felipe:

—¿Gazxi tsöjõ'uru' yöta xtila le ilágugaca bönachi zián ni?

6 Caní gunnë' Jesús para si' bë'ë Felipe na', tu' chinözinë' Lë'naca gunë'.

7 Bubi'ë didza' Felipe, rnnë':

—La'tu' sí'iru' yöta xtila len lázxjaru' que idú xunu' beo', biti' guequi láti'do' huéaj le ilágugaca bönachi zián ni.

8 Ní'irö tu bönni' usëda queë' Jesús, lë' Andrés, böchë'ë Simón Pedro, rë' Lë', rnnë':

9 —Ni zóabi' tubi' bi'i bönni', nuá'abi' gayu' yöta xtila néquiguequini zxoá' cebada, en chópaba' böla cuídido'. ¿Naru' huéqui'tse ugagu le do' ni cate' xö bönachi?

10 Ní'irö Jesús rë' légaquië':

—Guli'gún ga ila'bõ' bönachi zián ni lu yu.

Lataj na', rõ'öda' daca', ate' gula'bõ'ë idú ca chi-un gáyu'ë bönni' ni'.

11 Ní'irö gudélë'ë Jesús yugu' yöta xtila na'. Cate' chigudxë' Dios: "Xclenu", gudísië' le quégaquië' bönni' usëda queë', ate' légaquië' gula'guisië' le quégaca yúgu'të nupa na' rõ'gaca lu daca' ni'. Lësca' caní gulunë' quégacaba' böla cuídido' na', ate' gulahuë' tsca gulë'ënnë' ilahuë'.

12 Cate' chibulu'huóljanë', Jesús gudxë' yugu' bönni' usëda queë', gunnë':

—Buli'túbi le bizxaj nagá'anagaca, para cabí ilaca ditaj.

13 Bulu'tubë' ca', ate' bulu'lié' chinnu ga'börado' yugu' le bizxaj quégaca gayu' yöta xtila néquiguequini zxoá' cebada na', le bulu'gá'ana quégaquië' bönni' na' gulahuë'.

14 Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guídë' yödölió ni.

15 Tu' réquibe'enë' Jesús té'ënnë' ila'chë'ë Lë' bayudxi para ilunë' ga inná bé'enë' légaquië', que lë ni na' buzë'ë ni', sa'yéajë' tuzë' tu lu guí'a.

Rizë'e ni'ë Jesús lu nísado'

(Mt. 14:22-27; Mr. 6:45-52)

16 Cate' chizá' ral-la, yöjáquië' bönni' usëda queë' Jesús, ate' bila'dxinë' ra' nísado'.

17 Gula'benë' tu lë'e bárcodo' ni', en söjáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë.

18 Gusí lo recja bö' budunu' lu nísado' na', ate' riyasa ridxía nisa na'.

19 Cate' chibulu'sé'ë bárcodo' na', le guzá' le naca tsca rizá'aru' tu hórásö, ní'irö bila'lé'ené' Jesús rizé'e ni'ë lu nísado' na', en zé'ë ribíguë'ë ga na' zeaj barco na', ate' guladxi gula'dzöbiné'.

20 Ní'irö Jesús rë' légaquië':

—Neda' caz ni. Biti' gádxili'.

21 Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni sōjāquië'.

Bönachi zián tu'guilaj Jesús

22 Dza buropi ni', guléquibe'e bönachi zián na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlené' yugu' bönni' uséda queë' lë'e bárcodo' na', pero légacasë' na' yōjāquië'.

23 Ní'irö bila'rúaj ia'bal-la bárcodo' lu yōdzö Tiberias, ate' bila'dxín tu lataj le dë gála'sö ga ni' gulahuë' yōta xtila cate' ni' Xanru' Jesús gudxë' Dios: "Xclenu'" que.

24 Tu' bila'lé'ené' bíti'rö zoë' Jesús ni', en biti' nacu'ë bönni' uséda queë' ni', que lë ni na' gula'bené' lë'egaca bárcodo' na', ate' yōjāquië' Capernaum, tu'guiljé' Jesús.

Nāquië' Jesús yōta xtila nabánigaca tsaz bönachi

25 Cate' bila'dxín bönachi zián na' ia'tsölá'a nísado' na', yōjāca'gaquië' Jesús, en tē' Lë':

—Bönni' Usedi, ¿bátaxi bidxinu' ni'?

26 Bubi'ë didza' Jesús, rë' légaquië':

—Le nácatë rea' lib'ili': Ruguílajli' neda', calëga tu' bilé'eli' yugu' yöl-la' huáca bena', pero tu' gudáguli' yōta xtila ni', en böljali'.

27 Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljé' Bönachi, gunna' queëli', tu' bulu'ë lahui Xuza' Dios naca' Zxi'iné'.

28 Ní'irö gula'nábiné' Lë', ta'nnë':

—¿Bizxi run bayudxi guntu' para guntu' le raza ládxë'ë Dios?

29 Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'ëli' neda', naca' nu gusöl-lë'ë Lë'.

30 Ní'irö gula'nábiné' Lë', ta'nnë':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'?

31 Gulahuë' xuz gudödi queëru' yōta xtila nazí'i le maná lu lataj cá'asö, ca nazúaj lu guichi lá'ayi, rnna: "Yōta xtila que yehua' yubá Moisés bë'ë quégaquië', gulahuë'."

32 Bubi'ë didza' Jesús, rë légaquië':

—Le nácatë rea' libí'ili': Calëga Moisés na' bennë' queëli' yöta xtila que yehua' yubá, pero Xuza' Dios runnë' queëli' yöta xtila le naca idú que yehua' yubá.

33 Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödzölió ni.

34 Ní'irö tē' Lē':

—Xan, bännatica'sö queëtu' yöta xtila na'.

35 Jesús rë légaquië':

—Neda' caz naca' yöta xtila nabánigaca tsaz bönachi. Nu za'len neda', huölaj udzë'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios.

36 Naca ca na' chigudxi caza' libí'ili': "Sal-la' rilé'eli' neda', biti' ca' réajlë'ëli' neda'."

37 Yúgu'të nupa na' runnë' Xuza' quia', ídigaca quia', ate' nupa na' zaca quia', biti' usá'gaca'-në'.

38 Caní naca, tu' bötja' birúaja' yehua' yubá, calëga para guna' ca rë'ënda' neda' caz, pero para guna' ca rë'ënë' Dios Xuz, nasöl-lë'ë neda'.

39 Lë ni le rë'ënë' Xuza' nasöl-lë'ë neda', rë'ënë' cabí unítia' nitú nupa na' bennë' quia', pero usubana' léguequi dza údxi.

40 Lë ni le rë'ënë' Dios Xuz nasöl-lë'ë neda', rë'ënë' gata' yöl-la' na'bán quéguequi, yúgu'të nupa na' ila'lé'e neda', Zxí'inë', en ila'yéajlë' neda', ate' neda' usubana' léguequi dza údxi na'.

41 Ní'irö gula'nnë' queë' Jesús bönni' judío unná bë' tu' gunnë': "Neda' caz naca' yöta xtila na' bötaj, birúaj yehua' yubá."

42 Que lë ni na' ta'nnë':

—¿Naru' cabí bönni' ni Jesús, zxi'inë' José? Nunbë' cázaru' xuz xinë'ë. ¿Nacxi caz naca na', rnnë' bönni' ni: "Bötja' birúaja' yehua' yubá"?"

43 Ní'irö bubí'ë didza' Jesús, rë légaquië':

—Biti' innëli' quia' la' libí'isili'.

44 Biti' séqui'në' nitúë' bönni' guídë' quia' channö cabí idigu'ë quia' Xuza' nasöl-lë'ë neda' nu na', ate' neda' usubana' nu na' dza údxi.

45 Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

46 'Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz.

47 Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'.

48 Neda' caz naca' yöta xtila nabánigaca tsaz bönachi.

49 Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquië' gulátië'.

50 Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, biti' ca' gátië' bönni' na'.

51 Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödza' neda' naca xipéla'a, le runödza' para gata' yöl-la' na'bán quégaca bönachi yödzölió.

52 Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipélë'ë le gáguru'?

53 Que lë ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí gu'jali' xichöna', biti' ca' zóalen libí'ili' yöl-la' na'bán na'.

54 Núti'tës nu gagu xipéla'a, en gu'aj xichöna', dë que yöl-la' na'bán idú, ate' neda' usubana' nu na' dza údxi.

55 Caní gaca, tu' naca xipéla'a la' huagu idú, ate' xichöna' naca tu le naca idú para nu gu'aj le.

56 Núti'tës bönni' gahuë' xipéla'a, en gu'jë' xichöna', sóaléntica'së' bönni' na' neda', ate' neda' sóaléntica'sa' lë'.

57 Ca na' zoë' nabanë' Dios Xuz nasól-lë'ë neda', ate' neda' nabánida' Lë', lësca' caní ibáninë' neda' núti'tës bönni' gahuë' neda'.

58 Lë ni yöta xtila bötaj birúaj yehua' yubá, en biti' naca ca yöta xtila na' nazí'i le maná, lë na' gulahuë' xuz xtó'oli', en cate' bizá'a dza quégaquië', gulátië'. Núti'tës bönni' gahuë' yöta xtila ni sóatica'së' ibanë'.

59 Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lë ni tsanni ni rusédinë' bönachi Capernaum.

Didza' rúnnagaca queëru' yöl-la' na'bán idú

60 Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

61 Réquibe'enë' Jesús ta'nnë' bönni' usëda queë' que xtídzë', ate' gunábinë' légaquië', rnnë':

—¿Naru' run didza' ni libí'ili' zi'?

62 ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'aló?

63 Le naca queë' Dios Bö' Lá'ayi naca le runna yöl-la' na'bán queëli'. Le naca bëla'sö cuntú nu uzí' xibé. Didza' na' bë'lena'

libí'ili' nátagaca queë' Dios Bö' Lá'ayi, en rúnnagaca yöl-la' na'bán quegaca bönachi.

⁶⁴ Na'a, bál-lali' biti' réajlë'ëli'.

Gunnë' caní Jesús tu' nözinë' dza ni'te nupa na' biti' ta'yéajlë', enca' nu na' udödi Lë' lu ná'agaquië' bönni' ilútië' Lë'.

⁶⁵ Que lë ni na' gunnë':

—Que lë ni na' chigudxi caza' libí'ili': Biti' séqui'në' nitúë' bönni' tē'ë neda' channö Dios Xuz cabí gu'ë lë' lataj.

⁶⁶ Dza na' gulaca chopa ládxi'gaquië' zían bönni' usëda queë', en bítirö gula'dálenë' Lë'.

⁶⁷ Ní'irö Jesús gunábinë' idxínnutë' bönni' usëda queë' na', rë légaquië':

—¿Naru' ubíga'tsali' ca' libí'ili'?

⁶⁸ Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnnagaca queëtu' yöl-la' na'bán idú.

⁶⁹ Netu' réajlë'ëtu' Li', en núnbë'ëtu' Li', nacu' Cristo na' nasöl-lë'ë Dios, en nacu' ca' Zxí'inë' Dios ban.

⁷⁰ Bubi'ë didza' Jesús, rë' légaquië':

—Gurö caza' libí'ili' chínnulli' ni, pero tuë' bönni' ládajli' libí'ili' dzaga tu' xihui' lë'.

⁷¹ Didza' ni bē'ë Jesús ca naca queë' Judas Iscariote, zxí'inë' tu bönni' lë' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia'chinéajë' bönni' usëda queë' Jesús.

7

Bönni' böchi' cazë' Jesús biti' ta'yéajlë'ë Lë'

¹ Gudödi guca lë ni ridë' Jesús luyú Galilea. Biti' gú'unnë' tsejë' luyú Judea tu' tē'ënnë' bönni' judío unná bē' nacu'ë ni ilútië' Lë'.

² Dza ni' chizóa idxín laní quégaquië' bönni' judío cate' tu'subanë' ca gula'cu'ë xuz xtó'ogaquië' zxan libín lága'do'.

³ Que lë ni na' yugu' bönni' böchë'ë Jesús gulë' Lë', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'.

⁴ Channö rē'ënë' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, buluí' cuinu' lógaca yúgu'të bönachi.

⁵ Caní gula'nnë', tu' cabí ta'yéajlë'ë bönni' böchë'ë Jesús Lë'.

⁶ Ní'irö Jesús rë' légaquië':

—Biti' ridxini dza quia' para uluí'i lahua' lógaca bönachi, pero dza queëli' tséajli' ni' chizóa caz.

⁷ Bönachi yödzölió ni bití' tu'zóa libí'ili' tsölá'aló, pero tu'zóa neda' tsölá'aló tu' runa' ba nalí quegaquië', rnníá' naca xihui' le tunë'.

⁸ Gulí'tséaj libí'ili' laní na'. Bití' tseja' laní na' na'a tu' bití' ridxini dza quia'.

⁹ Cate' chigudxë' légaquië' lë ni, bugá'anë' luyú Galilea.

Sa'yéajë' Jesús laní quegaca bönachi judío

¹⁰ Gudödi söjáquië' bönni' böchë'ë Jesús laní na', ní'irö sa'yéajë' ca' Lë', calëga yálajdo', pero bagáchi'sö sa'yéajë'.

¹¹ Ga na' raca laní na', bulu'guiljë' bönni' judío unná bë' Jesús, ta'nnë':

—¿Gazxi zoë' bönni' na'?

¹² Bönachi zían ni' gulu'ida' didza' ca naca queë' Jesús. Bal-lë' ta'nnë':

—Náquië' dxi'a.

Ia'bal-lë' ta'nnë':

—Bití' náquië' dxi'a tu' rizí' yé'enë' bönachi.

¹³ Bití' bë'ë nitúë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

¹⁴ Cate' chibidxín gatsaj laní na', blë'ë Jesús ra' yudo', en busédinë' bönachi nacua' ni'.

¹⁵ Bulu'báinë' bönni' judío, ta'nnë':

—¿Nacxi caz naca, rácadë'ë bönni' ni, en bití' ca' nazëdë' que yudo'?

¹⁶ Bubi'ë didza' Jesús, rë' légaquië':

—Le rusédida' neda', calëga quia' naca, pero queë' Dios Xuz na' nasöl-lë'ë neda'.

¹⁷ Channö rë'enë' nu bönni' gunë' ca rë'enë' Dios, huéquibe'enë' bönni' na' channö nequi queë' Dios le rusédida' bönachi o channö rácasö quia' ruá'a didza'.

¹⁸ Nu bönni' ru'ë didza' rácasö queë', runë' caní para ilún bal bönachi lë', pero Bönni' na' rë'enë' ilún bönachi bal Nu nasöl-la' lë', Bönni' ni ru'ë didza' idütë' li, en bití' ca' rizí' yë'ë.

¹⁹ Moisés bennë' queëli' xibá queë' Dios, pero bití' runli' ca rinná bë' xibá na'. ¿Bizx que rizóa ribö'öli' gútili' neda'?

²⁰ Bulu'bí'i didza' bönachi zían na', të Lë':

—Tu' xihui' dzaga li'. ¿Nuzxi caz rizóa ribö'ö guti li'?

²¹ Bubi'ë didza' Jesús, rë' légaquië':

—Tu yöl-la' huáca bena', ate' rubánili' yúgu'tëli'.

²² Le nácatë Moisés bennë' queëli' lë na' narugu lu xipëla'li' le naca bë', pero calëga Moisés caz bennë' queëli' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipëla'gacabi' bi'i bönni'do' lë na' naca bë' néquiguequibi' queë' Dios.

²³ Channö ta'zí'ibi' lu xipëla'gacabi' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli'

neda' tu' buna'-nē' tu bönni', ate' böáquiē' dxí'ado' cate' naca dza lá'ayi?

²⁴ Biti' ral-la' uchi'a usörö lízili' ca', pero buli'chi'a buli'sörö ca naca le naca idútē li.

Riguíxjö'ē Jesús ga narúajē'

²⁵ Ní'irö gulu'ē didza' bal-lē' bönni' nacu'ē Jerusalén, ta'nnē':
—¿Naru' calēga bönni' ni Nu na' tu'guiljē' bönni' judío unná bē' para ilútiē' Lē'?

²⁶ Buli'yútsöca', yálajdo' ru'ē didza', en biti' bi tē' Lē'. ¿Naru' téquibe'enē' bönni' ta'nná bé'enē' rē'u, le nácatē bönni' ni náquiē' Cristo, Nu na' ral-la' inná be'e rē'u?

²⁷ Bönni' ni, nöz quéziru' gazxi bönni' Lē'. Cate' guidē' Cristo, cuntu nu inözi gazxi bönni' Lē'.

²⁸ Ní' zoē' Jesús rusédinē' bönachi chila yudo', en cate' biyönnē' didza' ni, ní'irö bē'ē zidzaj didza', rnnē':

—¿Naru' núnbe'etseli' neda', en nözitseli' gazxi bönni' neda'? Bida' ni, calēga rácasö quia', pero Dios caz nasöl-lē'ē neda', ate' Lē', biti' núnbē'ēli'-nē' libí'ili'.

²⁹ Neda' núnbe'eda'-nē', tu' za'a queē' Lē', ate' Lē' cazē' nasöl-lē'ē neda'.

³⁰ Ní'irö gulunē' bayudxi ila'zönē' Lē', pero cuntu nu guzxön Lē', tu' cabí ridxini dza queē' tsu'ē lu ná'agaquiē'.

³¹ Gula'yéajlē' zían bönachi ni' Lē', ta'nná:

—Cate' guidē' Cristo, ¿naru' gunē' zíanrö yöl-la' huáca ca le runē' bönni' ni?

Bönni' yudo' ta'söl-lē'ē nupa ila'zön Jesús

³² Bila'yönnē' bönni' yudo' fariseo yugu' didza' ni tuí'i bönachi ca naca queē' Jesús, ate' yugu' bixúz unná bē', en yugu' bönni' yudo' fariseo na' gula'söl-lē'ē ni'a ná'agaquiē' para tsöjxöngaquiē' Lē'.

³³ Ní'irö Jesús gunnē':

—Ia'tú chí'isö sóalena' libí'ili', ate' ní'irö huöja' ga zoē' Xuza' nasöl-lē'ē neda'.

³⁴ Uguíljali' neda', pero biti' udzölili' neda'. Ga ni' tsöjsóa' neda' biti' gaca guídali' libí'ili'.

³⁵ Ní'irö tē' luzá'agaquiē' bönni' judío, ta'nnē':

—¿Gazxi tséajtsē' bönni' ni, ga ni' biti' udzölriru'-nē'? ¿Naru' huayéajtsē' ga nacu'ē bönni' judío násilasigaquiē' idútē yödzöliö, en usédinē' yugu' bönni' zi'tu' ni'?

³⁶ ¿Bizxi rē'ēni inná didza' na' bē'ē: “Uguíljali' neda', pero biti' udzölili' neda'”, enca': “Ga ni' tsöjsóa' neda' biti' gaca guídali' libí'ili'”?

Nisa yegu le runna yöl-la' na'bán queēru'

³⁷ Cate' ni' naca dza údxi que laní na', dza na' naca lo, guzuínē' Jesús, en bē'ē zidzaj didza', rnnē':

—Channö zoë' nu bönni' ribidxi icja ládxi'da'ahuë', ral-la' guidë' bönni' na' ga zoa', en guí'jë'.

³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rnna: Lu icja ládxi'da'ahuë' bönni' na' ilén le naca ca nisa yegu, lë na' ulu'zí' xibé bönachi, gata' yöl-la' na'bán quéguequi.

³⁹ Didza' ni bë'ë Jesús ca naca queë' Dios Bö' Lá'ayi, Nu ralla' idisóalen bönni' na' ila'yéajlë'ë Jesús. Caní gunné' Jesús tu' cabí ridxíninë' Dios Bö' Lá'ayi, tu' cabí ruhuépinë' Jesús ga tsépisëtëre'.

Ta'rúaj choplö bönachi

⁴⁰ Cate' bila'yöni didza' ni, gula'nná bal-la bönachi zían na', ta'nná:

—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxí' lu në'ë Dios isól-lë'ë queëru'.

⁴¹ Ta'nnë' ia'bal-lë':

—Bönni' ni náquië' Cristo.

Ta'nná bal-la bönachi:

—¿Naru' irúajtsë' Cristo luyú Galilea?

⁴² Nazúaj lu guichi lá'ayi le rnna: “Cristo galjë' ladaj di'a dza queë' David, en gáquië' ca' bönni' Belén le guca ladzë' David na'.”

⁴³ Caní guca, bila'rúaj bönachi na' choplö tu' nözinë' Jesús.

⁴⁴ Të'ënnë' bal-lë' ila'zönë' Jesús, pero cuntú nu bi ben queë'.

Biti' ta'yéajlë'ë Jesús bönni' unná bë'

⁴⁵ Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo' fariseo ga na' nacu'ë bönni' yudo' na', ate' légaquië' gulë' ni'a ná'agaquië' na', ta'nnë':

—¿Bízx que bití' dichë'ëli'-në'?

⁴⁶ Bulu'bi'ë didza' ni'a ná'agaquië', ta'nnë':

—Cuntú nu bönni' ru'ë didza' ca ru'ë didza' Bönni' ni.

⁴⁷ Ní'irö bulu'bi'ë didza' bönni' yudo' fariseo na', ta'nnë':

—¿Naru' bë'tsali' lataj guzxí' yé'enë' ca' libí'ili'?

⁴⁸ ¿Naru' guyéajlë'tsë' Lë' nu bönni' unná bë' o nu bönni' yudo' fariseo?

⁴⁹ Libí'ili' dxíali' dö' tu' cabí rácali' xibá queë' Dios.

⁵⁰ Zoë' ca' Nicodemo ni', bönni' na' bidxinë' ga zoë' Jesús chi'i dzö'ölö, tu' náquië' ca' bönni' yudo' fariseo, ate' rë' légaquië':

⁵¹ —¿Naru' richúguru' queë' tu bönni' gátie' lu xibá queëru' channö cabí yöniru' lë' zí'aló para inöziru' bi benë'?

⁵² Ní'irö bulu'bi'ë didza' ia'zíca'rë' na', të' lë':

—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúë' bönni' ru'ë didza' uláz queë' Dios luyú Galilea.

⁵³ Ní'irö yöjhuöjgaquië' lidxi que queëgaquië'.

8

¹ Guyijë' Jesús ga naca lu Guí'a Yaga Olivo.

Nigula naguítsjanu xibá que yöl-la' nutsaga na'

² Cate' za' rení' budxinë' Jesús ra' yudo', ate' bila'dxín yúgu'të bönachi ga zoë'. Gurö'ë Jesús, rusédinë' légaquië'.

³ Ní'irö yugu' bönni' yudo' usedi, en yugu' bönni' yudo' fariseo duchë'ëgaquië'-nu tu nigula ga zoë' Jesús, tu gula'dzölinë'-nu ni' riguítsjanu xibá que yöl-la' nutsaga na'. Bulu'sudxinë'-nu lógaca bönachi na' tu'zë nágagaca Jesús,

⁴ ate' të' Lë':

—Bönni' Usedi, nigula ni guzxöntu'-nu ni' runnu dul-la' riguítsjanu xibá que yöl-la' nutsaga na'.

⁵ Lu xibá queë' Moisés, gunná bé'enë' netu' uládxí'tu'-nu guiöj nu nigula runnu caní, para gátinu. ¿Názxiga Li', nacxi rno'?

⁶ Caní gula'nnë' para ila'zí' bë'ë Jesús para ila'zéqui'në' ulu'zéguië' Lë' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibön në'ë.

⁷ Cate' gula'nábide'enë' Lë', ní'irö buzuínë' Jesús, en rë' légaquië':

—Núli' cabí nunli' dul-la' isí loli' uládxí'li'-nu guiöj.

⁸ Leyúbölö biyéchuë' Jesús, ruyúë' lu yu, en buguelë'ë ruzúajë' leyúbölö lu yu na'.

⁹ Cate' bila'yönnë' didza' ni, bulu'xösa ládxi'do'gaquië' légaquië', ate' bila'rúajë' tu tuë'. Gula'sí lógaquië' bönni' gúlarö ga bidxintë bönni' cuidí'. Nagá'anë' Jesús ní', dzáganu nigula na' Lë' gatsaj láhui'lö nupa na' tu'zë nágagaca Lë'.

¹⁰ Ní'irö buzuínë' Jesús leyúbölö, en cuntu nu bilé'enë' nu ruzegui lënu didza', pero túzínu nigula na', ate' rë'ë-nu:

—Nígúla, ¿gazxi nacuá' nupa na' bulu'zegui li' didza'? ¿Naru' cabí zoa nu bönni' richúguië' quiu'?

¹¹ Lënu rnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', bití' richuga' quiu'. Böaj lidxu', en bíti'rö gunu' dul-la'.

Náquië' Jesús bení' quégaca bönachi yödzölió

¹² Leyúbölö Jesús bë'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', bití' të' ga naca chul-la que dul-la', pero tu bení' sóalen bönni' na' le uluí' lë' naca gata' yöl-la' na'bán idú queë'.

¹³ Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsu'. Bití' naca lesaca' le runu' ba nalí. Nítisö naca.

¹⁴ Bubi'ë didza' Jesús, rë' légaquië':

—Sal-la' runa' ba nalí que la' cuinsa', idútë li naca le runa' ba nalí, tu' nözda' ga birúaja', en ga tseja', pero libí'ili' biti' nözili' gazxi za'a, en calëga gazxi tseja'.

15 Libí'ili' ruchi'a rusöröli' ca nácagaca le taca yödzölió ni, pero neda', rácasö quia' cuntunu bönni' ruchi'a rusöröa' queë'.

16 La'tu' uchi'a usöröa', ca nácate uchi'a usöröa', tu' calëga neda'sö uchi'a usöröa', pero Xuza' nasöl-lë'ë neda' gunë' neda' tsözxön.

17 Lësca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idútë li naca.

18 Neda' runa' ba nalí que la' cuinsa', ate' Xuza' nasöl-lë'ë neda', runë' ca' ba nalí quia'.

19 Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

20 Yugu' didza' ni bë'ë Jesús cate' ni' zoë' rusédinë' bönachi lu chila yudo', ga na' nacua' guí'ina gapa ta'gu'ë gun que yudo', pero cuntunu guzxön Lë', tu' cabí ridxini dza queë' tsu'ë lu ná'agaquië'.

Rnnë' Jesús: "Ga tseja' neda', biti' gaca guídali'"

21 Leyúbölö Jesús rë' légaquië', rnnë':

—Uzá'a yödzölió ni, ate' uguí'jali' nu usölä libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

22 Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

23 Jesús rë' légaquië':

—Libí'ili' nácali' que luyú dë cadxí'ilö ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni.

24 Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlë'ëli' naca caza' Nu usölä, ugá'ana dul-la' nabága'li', en gátili'.

25 Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te.

26 Zián le ral-la' guía' libí'ili', en uchi'a usöröa' le naca queëli'. Didza' idútë li ru'ë Xuza' nasöl-lë'ë neda', ate' didza' riyönda' ru'ë Lë', ru'í'lena' bönachi yödzölió ni.

27 Biti' gula'yéajni'inë' ru'í'lenë' légaquië' didza' ca naca queë' Dios Xuz.

28 Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'eli' naca caza' Nu rusölá, en biti' bi runa' rácasö quia', pero ca na' rulu'ínë' Xuza' neda', ca' ruá'a didza'.

29 Xuza' nasöl-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxe'ë Lë'.

30 Cate' bë'ë Jesús didza' ni, bönni' zían gula'yéajlë'ë Lë'.

Nupa nácaqaca zxí'inë' Dios, en nupa nadzúngaca lu na' dul-la'

31 Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnaa xtídza'a, gácali' idú bönni' usëda quia'.

32 Gúnbë'ëli' le naca idútë li, ate' le naca idútë li na' usölá libí'ili'.

33 Bulu'bi'ë didza', të' Lë':

—Abraham naquië' xuz gudödi queëtu', en cunttu nu ben netu' bönni' nadó'ogaca. ¿Rnnatso: "Usölá libí'ili"?

34 Jesús rë' légaquië':

—Le nácatë rea' libí'ili': Yúgu'të nupa tun dul-la', nadzúngaca lu na' dul-la'.

35 Nu naca bönni' nadó'o biti' ugá'anatica'sö lidxë' xan yu'u, pero nu naca zxí'inë' xan yu'u na' rugá'anatica'sö lidxi nu na' naca xan yu'u.

36 Caní naca, channö Nu na' naca Zxí'inë' Dios usölá libí'ili', le nácatë uláli'.

37 Nözda' naquië' Abraham xuz gudödi queëli', pero rizóa ribö'öli' gútili' neda', tu' cabí nazí' lu ná'ali' xtídza'a.

38 Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyönili' ga zoa xuz quézili'.

39 Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú zxí'ini xi'sóë' Abraham, gunli' ca na' benë' Abraham.

40 Na'a, rizóa ribö'öli' gútili' neda', sal-la' ruí'ilena' libí'ili' didza' idútë li, didza' na' biyönda' bë'ë Dios. Biti' benë' Abraham caní.

41 Libí'ili' runli' ca run xuz quézili'.

Ní'irö të' Lë':

—Netu' biti' ca' nácatu' bi'i lando'. Tuzë' Dios náquië' Xuztu'.

42 Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gusöl-lë'ë neda'.

43 ¿Bizx que biti' gaca tséajni'ili' didza' ruá'a? Naca tu' cabí rë'ënili' uzë' nágali' xtídza'a.

44 Xuz quézili' naca tu' xihui'. Néquili' que tu' xihui', en rě'ënili' gunli' le rizě ladxi' xúzili' na'. Dza ni'te naca tu' xihui' nu guti bōnachi, en cabí nazí' lu nē'e le naca idútě li, tu' cabí ruí'i didza' idútě li. Cate' rizi' yě' tu' xihui', ca naca caz ruí'i didza', tu' naca nu rizi' yě', en naca ca xúzgaca caz nupa ta'zí' yě'.

45 Tu' ruá'a neda' didza' idútě li biti' réajlě'ěli' neda'.

46 ¿Núzxilöli' gaca usubága'li' neda' dul-la'? Channö ruá'a didza' idútě li, ¿bizx que biti' réajlě'ěli' neda'?

47 Nu naca queë' Dios, ruzě nagui xtídzě'ë Dios, pero libí'ili', tu' cabí nácali' queë' Dios, biti' ruzě nágali' xtídzě'ë.

Cristo zoa cazě' zí'atělö ca Abraham

48 Ní'irö bulu'bi'ë didza' yugu' bōnni' judío, tě' Jesús:

—Catěz gunnatu' cate' gunnatu' nacu' bōnni' Samaria, ate' dzaga tu' xihui' Li'.

49 Bubi'ë didza' Jesús, rě' légaquië':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'alö.

50 Biti' runa' zxön cuina'. Zoa Nu run zxön neda', ate' Lě' ruchí'a rusöröë rě'u.

51 Le nácatě rea' libí'ili': Nu bōnni' si' lu nē'ë xtídzza'a, biti' ca' gatiě' bōnni' na'.

52 Ní'irö yugu' bōnni' judío na' tě' Lě', ta'nně':

—Na'a réquibe'etu' dzaga tu' xihui' Li'. Abraham gútiě', ate' gulatiě' ca' bōnni' gulu'ë didza' uláz queë' Dios, pero Li' rnno': "Nu bōnni' si' lu nē'ë xtídzza'a, biti' ca' gatiě' bōnni' na'."

53 ¿Naru' nácatěrötso' Li' zxön ca xúziru' Abraham? Gútiě' lě', ate' gulatiě' ca' bōnni' gulu'ë didza' uláz queë' Dios. ¿Nuzxi caz run cuinu'?

54 Bubi'ë didza' Jesús, rě' légaquië':

—Channö neda' guna' zxön cuina', yöl-la' zxön na' biti' bi gaca. Xuza' runě' neda' zxön, ate' libí'ili' rnnali' náquiě' Dios queéli'.

55 Libí'ili' biti' núnbě'ěli'-ně' Dios Xuz, pero neda' núnbě'a-ně'. La'tu' innía': Biti' núnbě'a-ně', gaca' nu rizi' yě' ca na' nácali' libí'ili', rizi' yě'ěli'. Na'a, le nácatě núnbě'a-ně', en nazí' lu na'a xtídzě'ë.

56 Xúzili' Abraham budzějaně' tu' ral-la' ilé'eně' dza soa' yödžolió ni, en sal-la' gútiě' dza ni'te, bilé'eně' le, en budzějade'eně'.

57 Ní'irö yugu' bōnni' judío na' tě' Jesús, ta'nně':

—Biti' yuí'inu' chi-un iz. ¿Naru' bilé'etsenu' Abraham?

58 Jesús rě' légaquië':

—Le nácatě rea' libí'ili': Zí'atělö ca soě' Abraham, neda' zoa caza'.

59 Ní'irö gula'guélé'ë guiöj para ulu'ladxé' Jesús, pero Lë' bunítitë cuinë', en burúajé' lö'a yudo' na'. Gudödë' gatsaj láhui'lö ga na' nacu'ë, ate' söhuöjé'.

9

Ruúnë' Jesús tu bönni' guljé' nachúl-latë lahuë'

1 Cate' gudödë' Jesús tu lataj, bilé'enë' tu bönni' ni' guljé' nachúl-latë lahuë'.

2 Gula'nábinë' Jesús bönni' usëda queë', ta'nnë':

—Bönni' Usedi, ¿nuzxi ben dul-la'? ¿Naru' bönni' ni o xuz xiné'ë tu' guljé' nachúl-latë lahuë'?

3 Bubi'ë didza' Jesús, rë' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xiné'ë, pero naca para ilá' lahui yöl-la' huáca queë' Dios ni'a queë' bönni' ni.

4 Run bayudxi gunru' xichinë' Xuza' nasöl-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntu nu gaca gun dxin.

5 Tsanni ni zoa' yödzölió ni, naca' bení' quégaca bönachi yödzölió.

6 Cate' Jesús budxi bë'ë didza' ni, gurú'unë' zxöna' lu yu, en benë' gúna'do' len zxöna' na', ate' bugu'ë guna' na' guiöj lahuë' bönni' na' nachul-la lahuë'.

7 Ní'irö rë' lë':

—Guyéaj yöjtibi lo' lu beaj nisa nazí'i le Siloé.

Siloé naca tu didza' hebreo le rna: Nasöl-la'.

Ní'irö bönni' na' nachul-la lahuë' guyijé' ni', yöjtibi lahuë'. Cate' buzé'ë ni' chirilé'enë'.

8 Ní'irö bulu'bani bönachi dzaga yu'u queë', en nupa ni' bila'lé'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

9 Bal-lë' ta'nnë':

—Lë' na'.

Ia'bal-lë' ta'nnë':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

10 Ní'irö gula'nábinë' lë', ta'nnë':

—¿Nacxi caz guca, gyalaj guiöj lo'?

11 Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guiöj lahua', en gudxë' neda': “Guyéaj ra' beaj nisa nazí'i le Siloé, yöjtibi lo'.” Guyija' ni', yöjtibi lahua', ate' guyálajtë guiöj lahua'.

12 Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

Yugu' bönni' yudo' ta'náb yúdxinë' bönni' na' guyalaj guiøj lahuë'

¹³ Ní'irö gula'chë'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo.

¹⁴ Tu' naca dza lá'ayi quégaquië' cate' benë' Jesús gúna'do' na', en gusaljë' guiøj lahuë' bönni' na' zí'alö nachul-la lahuë',

¹⁵ que lë' ni na' yugu' bönni' yudo' fariseo na' gula'nábinë' lë' leyúbölö nacxi guca guyalaj guiøj lahuë'. Lë' gudxë' légaquië':

—Budxíë' gúna'do' guiøj lahua', ate' yöjtiba' le, en rilé'eda'.

¹⁶ Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila'rúajë' choplö.

¹⁷ Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi rno' li' queë' bönni' na', gusaljë' guiøj lo'?

Lë' rnnë':

—Náquië' bönni' ru'ë didza' uláz queë' Dios.

¹⁸ Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en guyalaj guiøj lahuë', cate' bulu'lídzarë' xuz xinë'ë bönni' na' guyalaj guiøj lahuë',

¹⁹ ate' gula'nábinë' légaquië', ta'nnë':

—¿Naru' náquië' bönni' ni xzí'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

²⁰ Bulu'bi'ë didza' xuz xinë'ë na', të' légaquië':

—Nözitu' bönni' ni náquië' xzí'initu', en guljë' nachúl-latë lahuë',

²¹ pero nacxi guca, rilé'enë' na'a, biti' nöztu', en nuzxi na' gusalaj guiøj lahuë', biti' nöztu'. Guli'nabi-në' lë', tu' chináquië' bönni' chinaca. Lë' cazë' quíxjö'ë.

²² Caní gula'nnë' xuz xinë'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sedë' queë' Dios.

²³ Que lë' ni na' gula'nnë' xuz xinë'ë: “Guli'nabi-në' lë', tu' chináquië' bönni' chinaca.”

²⁴ Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ní'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

25 Ní'irö bubi'ë didza', rnnë':

—Channö náquië' bönni' dul-la' biti' nözda'. Tu le nözda'. Zí'alö nachul-la lahua', ate' na'a rilé'eda'.

26 Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guiöj lo'?

27 Bubi'ë didza', rë' légaquië':

—Chigúdxí caza' libí'ili', pero biti' gú'unili' si' lu ná'ali' xtídza'a. ¿Bizx que na' rë'ënili' yönili' leyúbölö? ¿Naru' rë'ënili' tá'ali' ca' Lë'?

28 Ní'irö bulu'lidza' zì'ë lë', ta'nnë':

—Li' do'o Lë', pero netu' dá'atu' Moisés.

29 Netu' nöztu' Dios bë'lenë' Moisés didza', pero ca naca queë' bönni' ni, biti' nöztu' nuzxi caz gusöl-la' Lë'.

30 Ní'irö bubi'ë didza' bönni' na', rë' légaquië':

—Lë' ni run ga rubánida'. Libí'ili' biti' nözili' nuzxi gusöl-la' bönni' ni, ate' Lë' gusaljë' guiöj lahua'.

31 Nöziru' biti' riyönnë' Dios yugu' bönni' dul-la', pero channö reaj ládxe'ë tu bönni' Dios, en runë' ca rë'ënë' Lë', Dios riyönnë' bönni' ni.

32 Dza ni'te biti' riyön nu gunná channö nu bönni' gusaljë' guiöj lahuë' tu bönni' guljë' nachúl-latë lahuë'.

33 La'tu' cabí náquië' bönni' ni queë' Dios, biti' bi gaca gunë'.

34 Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' li' ruséditsenu' netu'?

Ní'irö bulu'béajë' lë' ní'ilö.

Nupa nácaqaca chul-la niti

35 Biyönnë' Jesús ca gulunë' bönni' judío unná bë', bulu'béajë' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

36 Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

37 Jesús rë' lë':

—Chibilé'enu' Lë', ate' neda' ni ru'í'lena' li' didza', naca' Zxí'inë' Dios.

38 Ní'irö bönni' na', gyalaj guiöj lahuë', guyéaj ládxe'ë Jesús, en rë' Lë':

—Xan, réajlë'a Li'.

39 Jesús rnnë':

—Para uchi'a usöröa' bönachi bida' yödzölió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiguequi ta'lé'e.

40 Cate' yugu' bönni' yudo' fariseo na' nacuá'lenë' Jesús bila'yönnë' didza' ni, ní'irö të' Lë':

—¿Naru' nachul-la nanítitsatu'?

41 Bubi'ë didza' Jesús, rë' légaquië':

—La'náru' nachúl-lasö guió'j loli', biti' ibága'li' dul-la'. Na'a rnnali': "Rilé'etu'." Que lë ni na' nabága'li' dul-la'.

10

Rucúdzu'ë didza' Jesús que lë'a quégacaba' bö'cu' zxila'

¹ Gunnë' ca' Jesús:

—Le nácatë rea' libí'ili': Nu bönni' biti' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'.

² Nu bönni' razië' saca' ga nu riyaza náquië' bönni' run chi'i cazë' bö'cu' zxila' na'.

³ Para tsázië' bönni' ni, risalaj nu zoa run chi'i ga nu riyaza, ate' ta'yóniba' bö'cu' zxila' na' chi'ë, en tu'únbë'ëba'-në'. Lë' rulidzë'-ba' que queëba' ca légacaba', en rubéajë' yugu' bö'cu' zxila' na'.

⁴ Cate' chinubéajë'-ba' yúgu'tëba' bö'cu' zxila' néquigacaba' queë', röjnörüë' lógacaba', ate' bö'cu' zxila' na' röjnégacaba' lë', tu' tu'únbë'ëba' chi'ë.

⁵ Bönni' yúbölö biti' tsöjnégacaba' lë', pero ulu'zxúnnajba' queë', tu' cabí núnbë'gacaba' chí'igaquië' bönni' yúbölö.

⁶ Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

Náquië' Jesús ca bönni' rapa chi'ë-ba' bö'cu' zxila'

⁷ Ní'irö Jesús rë' légaquië' leyúbölö, rnnë':

—Le nácatë rea' libí'ili': Neda' naca' ca tu ga ta'yázaba' bö'cu' zxila'.

⁸ Chigula'lë'ë zían bönni' gula'nnë' nácaquië' Cristo, pero yúgu'të bönni' na' bila'dxinë' zí'alö ca neda', nácaquië' gubán, en ta'bán cazë', ate' biti' buluzë' nágaba' bö'cu' zxila' na' légaquië'.

⁹ Neda' naca' ca tu ga nu riyaza. Núti'tës bönni' tsázalenë' neda', ulë' bönni' na', en gáquië' ca tuba' bö'cu' zxila' rázaba', en rurúajba', en ridzóliba' le ráguba'.

¹⁰ 'Za'zë' bönni' gubán para cuanë'-ba', en gútië'-ba', en usunítië'-ba'. Neda' bida' para gata'yöl-la' na'bán idú quégaca bönachi náca'gaca ca bö'cu' zxila' quia'. Le nácatë gata' quégaquië' yöl-la' na'bán idú na'.

¹¹ Neda' run chí'igaca' bönachi quia' ca runë' bönni' na', lu yöl-la' dxi'i ladxi' queë' rapa chi'ë yugu' bö'cu' zxila'. Bönni' na' rapa chi'ë-ba' bö'cu' zxila' caní zoa cazë' udödë' yöl-la' na'bán queë' ni'a quégacaba' bö'cu' zxila' queë'.

¹² Tu bönni' nazxjë' rapa chi'ë-ba' bö'cu' zxila', cate' rilé'enë' zá'aba' bö'cu' guí'a sínia', rucá'anë'-ba' bö'cu' zxila' na', en ruzxúnnajë', ate' bö'cu' guí'a sínia' na' ráguya'aba' yugu' bö'cu'

zxila' na', en rusilásiba' légacaba'. Caní runë' bönni' na' rapa chi'ë-ba' bö'cu' zxila' tu' cabí náquië' idú nu run chi'i-ba' bö'cu' zxila', ate' biti' néquigacaba' que cazë' bö'cu' zxila' na'.

13 Ruzxúnajë' bönni' nazxjë' na' tu' rapa chi'ë-ba' bö'cu' zxila' na' para sí'isë' dumí, en biti' ruí'i ládxe'ë-ba' bö'cu' zxila' na'.

14-15 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbë'ë Xuza' neda', ate' neda' núnbë'a-në' Xuza', lësca' caní núnbë'egacada' bönachi quia' nácgaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequiba' quia' núnbë'gacaba' neda'.

16 Lësca' nacuá'aba' ia'zica'röba' bö'cu' zxila' quia' biti' nabábagacaba' ni. Lësca' légacaba' ral-la' tsöjxi'gaca'-ba'. Lé'gacaba' ulu'zë nágaba' chi'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

17 'Que lë ni na' nadxí'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti.

18 Cuntu nu bönni' séqui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

19 Cate' yugu' bönni' judío bila'yönnë' didza' ni, leyúbölö bila'rúajë' choplö ca téquinë' queë'.

20 Ziánë' ta'nnë':

—Yu'u bö' xihui' Lë', en nachixi icjë'. ¿Bizx que ruzë nágali Lë'?

21 Ia'bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiöj lógaquië' bönni' nachul-la lógaquië'?

Yugu' bönni' judío unná bë' tu'zöë' Jesús tsölä'alö

22 Raca beo' ziaga, en naca dza na' tunë' laní yödzö Jerusalén, tu'subanë' ca gula'gu'ë yudo' quégaquië' lu në'ë Dios.

23 Ridë' Jesús ra' yudo' ga naca chila que, nazí'i le Chila Queë' Salomón.

24 Yugu' bönni' judío unná bë' gula'gu'ë Jesús lë'alö, en të' Lë':

—¿Bátaxi caz usanu' runu' ga rö'ötu' böniga? Channö nacu' li' Cristo, ca nácatë gudíxjö'i netu'.

25 Jesús rë' légaquië':

—Chigudxi caza' libí'ili', pero biti' réajlë'ëli' neda'. Yugu' dxin runa' tu' dë lu na'a uláz queë' Xuza' nácgaca bë' Nu naca'.

26 Libí'ili' biti' réajlë'ëli' neda', tu' cabí nabábalenli' nupa nácgaca bö'cu' zxila' quia', ca na' chigudxi caza' libí'ili'.

27 Ta'yõniba' bö'cu' zxila' quia' chi'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'.

28 Neda' runödza' yõl-la' na'bán idú quégacaba', ate' biti' ca' ila'nítiba', ate' cuntu nu sequi' ubéaj lézacaba' lu na'a neda'.

29 Xuza' Dios bennë' quia' lézacaba', ate' Lë' nápatërë' yõl-la' huáca ca yúgu'të bõnachi, ate' cuntu nu sequi' ubéaj lézacaba' lu në'ë Xuza'.

30 Neda', en Dios Xuz, tuz nácatu'.

31 Leyúbölö yugu' bönni' judío unná bë' na' bulu'guélë'ë guiõj ulu'ladxë' Jesús.

32 Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládxili' neda' guiõj?

33 Bulu'bi'ë didza' bönni' judío unná bë' na', të' Lë':

—Ni'a que dxin dxi'a biti' uládxitu' li' guiõj, pero tu' cabí rnnío' dxi'a queë' Dios, tu' nacu' li' bõnáchisö, en run cuinu' Dios.

34 Bubi'ë didza' Jesús, rë' légaquië':

—¿Naru' cabí nazúaj lu guichi lu xibá queëli' ca gunné' Dios, rnna: “Neda' rnnía': Nácali' yugu' dios”?

35 Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí' lágacquië' dios, bönni' ni' Dios bë'lenë' légaquië' didza'.

36 Dios bubéajë' neda' quez queë', en gusöl-lë'ë neda' yödzülió ni. ¿Naru' rnnátsali' quia': “Li' biti' rnnío' dxi'a queë' Dios”, tu' gunniá': Zxí'inë' Dios naca'?

37 Channö cabí runa' dxin budödë' Xuza' Dios lu na'a, biti' ral-la' tséajlë'ëli' neda'.

38 Channö runa' dxin budödë' Dios lu na'a, sal-la' biti' réajlë'ëli' neda' caz, guli'tséajlë' le nácacaca bë' dxin na' runa', para guéquite'eli' náquië' Dios Xuz tuz len neda', ate' neda' ca' naca' tuz len Xuza'.

39 Leyúbölö gula'zóa gula'bö'ë ila'zönë' Jesús, pero Lë' bulë' lu náagaquië'.

40 Ní'irö guyijë' Jesús leyúbölö ia'tsolá'a yegu Jordán, ga ni' buquilë' Juan bõnachi nisa zí'atëlö, ate' bugá'anë' Jesús ni'.

41 Bila'dxin bõnachi zían ga zoë' Jesús, ta'nná:

—Le nácatë biti' benë' Juan nitú yõl-la' huáca zxön, pero yúgu'të le gunné' Juan na' ca ral-la' gaca queë' bönni' ni, idútë li zeaj naca.

42 Que lë ni na' gula'yéajlë'ë bönni' zían Jesús ga na' zoë'.

11

Le guca cate' gútië' Lázaro

1 Dza ni' ré'enë' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'.

² Nácanu María na' nigula zanë' Lázaro, bönni' na' ré'enë', en nácanu ca' nigula na' gulú'unu le rilá' zxixi ni'ë Xanru', en buzzinu ni'ë len guitsa' ícjanu.

³ Gula'söl-la'nu nigula zanë' Lázaro na' nu yöjödix Jesús, gunná:

—Xan, buyútsöca', ré'enë' Lázaro, bönni' na' nadxí'ínu'-në'.

⁴ Cate' biyönnë' Jesús didza' ni, gudxë' nupa nacuá' ni', rnnë':

—Yödzhüë' ni biti' naca le guti lë' tsaz, pero naca para ilá' lahui yöl-la' zxön queë' Dios, ate' ni'a que yödzhüë' ni ilá' lahui ca' yöl-la' zxön quia' neda', Zxí'inë' Dios.

⁵ Jesús nadxí'inë' Marta, en nigula zxílanu Marta na', en Lázaro na'.

⁶ Sal-la' nadxí'inë' Jesús légaquië', cate' biyönnë' ré'enë' Lázaro, bugá'anë' ga na' zoë' ia'chopa dza ca'.

⁷ Cate' bizá'a chopa dza na', Jesús gudxë' yugu' bönni' usëda queë', rnnë':

—Uyéajru' leyúbölö luyú Judea.

⁸ Ní'irö yugu' bönni' usëda queë' të' Lë', ta'nnë':

—Bönni' Usedi, si' gula'zóa gula'bö'ë bönni' judío unná bë' ni' ulu'ladxë' Li' guiöj. ¿Naru' uyéajtso' leyúbölö ni'?

⁹ Bubi'ë didza' Jesús, rë' légaquië':

—Nacuá' caz chinnu hora lahui' dza. Nu bönni' ridë' lahui' dza, biti' tsöjchëgu'ë, tu' rilé'enë', tu' zóalen lë' bení' zoa yödzhüé ni.

¹⁰ Channö ridë' bönni' na' chi'i dzö'ölö, röjchëgu'ë, tu' cabí zóalen bení' lë'.

¹¹ Cate' budxi bë'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

¹² Ní'irö yugu' bönni' usëda queë' të' Lë', ta'nnë':

—Xan, channö rásië', huöáquië'.

¹³ Gunnë' caní Jesús tu' chigútië' Lázaro, pero légaquië' téquinë' gunné': Rásisë' Lázaro.

¹⁴ Ní'irö Jesús gudxë' légaquië' yálajdo', gunné':

—Chigútië' Lázaro.

¹⁵ Rudzëjada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dë' Lázaro.

¹⁶ Ní'irö Tomás, bönni' na' tu'ë lë', Bönni' Bilidi' gudxë' ia'zíca'rë' bönni' usëda queë' Jesús, rnnë':

—Uyéajru' ca' rë'u, en gátillenru'-në'.

Náquië' Jesús Nu rusbán nupa chinátigaca, enca' Nu nabániru'

¹⁷⁻¹⁹ Dë yödzhö Betania gála'sö ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zían bönni' judío ga na' nacuá'anu Marta, en María, en tu'huë tsáhuë'ë

légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba.

²⁰ Cate' biyönninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'.

²¹ Marta na' rënu Jesús:

—Xan, la'tu' zu' ni, biti' gátië' bönni' zana'.

²² Lësca' na'a, nözda' yúgu'të le inábinu' Dios, Lë' gunnë' quiu'.

²³ Jesús rë'ë-nu:

—Ubanë' bönni' zanu'.

²⁴ Marta rënu Lë':

—Nözda' ubanë' cate' idxín dza údxí cate' ulu'bán nupa chinátigaca.

²⁵ Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz,

²⁶ ate' yúgu'të bönni' nabángaquië', en ta'yéajlë'ë neda', biti' ca' ilátië' tsaz. ¿Réajlë'u lë ni?

²⁷ Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxi' lu në'ë Dios isöl-lë'ë yödzölió ni.

Ribödxë' Jesús tu' ru'i ládxe'ë nigula zanë' Lázaro

²⁸ Cate' budxi bë'ënu Marta na' didza' ni, böajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' li'.

²⁹ Cate' biyönninu María didza' ni, la' guyástënu, zéajnu ga na' zoë' Jesús.

³⁰ Biti' rázinë' Jesús la' yödzödo' na', pero zóasë' ga na' yöjtságanu Marta Lë'.

³¹ Cate' yugu' bönni' judío na' nacuá'lenë' María na', en tu'huë tsáhuë'ë-nu bila'lé'enë'-nu guyásanu, en birúajnu carelô ga naca lu yu'u, ní'irö yöjnéhoaquië'-nu, ta'nnë':

—Uyéajnu ra' yeru ba tsöjchödxinu ni'.

³² Ní'irö bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

³³ Cate' bilé'enë' Jesús ribödxinu, en ta'bödxë' ca' bönni' judío na' dzágagaquië'-nu, ní'irö buí'innë', en gunnëda' ládxe'ë.

³⁴ Rnnë':

—¿Gazxi bucáchi'li'-në'?

Të' Lë':

—Gudá uyú'.

³⁵ Gurödxë' Jesús.

³⁶ Ní'irö gula'nnë' bönni' judío na', ta'nnë':

—Buli'yútsöca' ca nadxí'ide'enë' lë'.

37 Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

Rubanë' Lázaro lu yöl-la' guti

38 Leyúbölö gunnëda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lë'e guí'a guiöj, ate' da' tu guiöjta'a le nusayaj ga nu riyaza le.

39 Jesús gudxë' nupa nacua' ni', rnnë':

—Guli'cúa guiöj ni.

Ní'irö Marta, nigula zanë' bönni' nati na', rënu Lë':

—Xan, chirilë'ë siguti tu' chiguca tapa dza nátië'.

40 Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

41 Ní'irö gula'güë' guiöjta'a na' nusayaj ga nu riyaza yeru ba ga na' yu'ë bönni' nati na'. Buyüë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'.

42 Neda' nözda' riyöntiqui'sinu' neda', pero ruá'a didza' ni para ulu'z'í' xibé bönachi zían ni, en ila'yéajlë' Li' na' nasöl-lu'u neda'.

43 Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

44 Burúajë' bönni' na' gúquië' bönni' nati lu yeru ba, naröligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'lí lari' na' naröli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútië' Jesús

(Mt. 26:1-5; Mr. 14:1-2; Lc. 22:1-2)

45 Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxön María, en bila'lé'enë' lë na' benë' Lë'.

46 Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús.

47 Ní'irö bönni' yudo' fariseo na' bulu'dúbilenë' tsözxön bönni' yudo' tu' chi'a tu' söröë', en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca zxön.

48 Channö gü'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquínnajgaquië' yudo' lá'ayi queëru', en yödzo queëru'.

49 Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nözili',

50 en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödzo.

⁵¹ Calëga rácasö queë' bē'ë didza' ni, pero tu' náquië' bixúz lo iz na', que lë ni na' bē'ë didza' uláz queë' Dios ca ral-la' gátië' Jesús ni'a quégaca bönachi yödzö na'.

⁵² Gátië' Jesús, calëgasö ni'a que yödzö na', pero gátië' ca' para utubë' yugu' xzí'inë' Dios násilasigaquië', para ilácagaquië' tuz.

⁵³ Caní guca, la' dza ná'asö gulún xtídza'gaquië' ilútië' Jesús.

⁵⁴ Que lë ni na' bítirö gudë' Jesús yálajdo' gapa nacua' bönachi judío, pero buzë'ë ni', sa'yéajë' tu lataj gala' ga naca lataj cá'asö, ate' bidxinë' yödzö Efraín, ga ni' bugá'anë', ate' dzágagaquië' bönni' usëda queë' Lë'.

⁵⁵ Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödzö ni', ate' gula'benë', söjáquië' Jerusalén cate' si' idxín laní na' para tsöjpá'a cuíngaquië' ca naca que yudo'.

⁵⁶ Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'tué', ta'nnë':

—¿Bizxi rusáca'li'? ¿Huídatsë' laní, o bití' guídë'?

⁵⁷ Chigula'nná bē'ë yugu' bixúz unná bē', en yugu' bönni' yudo' fariseo channö nu nözi ga zoë' Jesús, ral-la' ududíxjö'i légaquië' para gaca tsöjxöngaquië' Lë'.

12

María rigú'unu le rilá' zxixi ni'ë Jesús

(Mt. 26:6-13; Mr. 14:3-9)

¹ Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzö Betania, ga na' zoë' Lázaro, bönni' na' gútië', en bubanë' lu yöl-la' guti.

² Gula'gu'ë tu gú'i huagu ni' le gahuë' Jesús. Gulú'unu María le ilahuë', ate' nütse'ë Lázaro ladaj bönni' rö'ölengaquië' Jesús ga na' tahuë'.

³ Ní'irö gudéla'nu María ca tu guíë le rilá' zxixi que yöj susén lasi idú, le nazáca'da', en gulú'unu le ni'ë Jesús. Buzzinu ni'ë len guitsa' ícjanu. Idútë lu yu'u na' guzé bö' zxixi.

⁴ Ní'irö bē'ë didza' tu bönni' usëda queë' Jesús, lë' Judas Iscariote, xzí'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

⁵ —¿Bizx que bití' gudó'o le rilá' zxixi na', le nazaca' lázxjaru' que tu iz, ate' huáca nu quisi dumí na' quégaca bönachi yechi'?

⁶ Gunnë' caní, calëga tu' ru'i ládxe'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'.

⁷ Ní'irö Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a.

⁸ Yugu' bönachi yechi' ila'cuá'lentica'sö libí'ili', pero neda' biti' ugá'anatica'sa' ga zóali'.

Tun xtídza'gaquië' bönni' judío unná bë' ilútië' Lázaro

⁹ Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calëgasö tu' zoë' Jesús ni', pero lësca' tu' tē'ënnë' ila'lé'enë' Lázaro, bönni' na' busubanë' Jesús lu yöl-la' guti.

¹⁰ Ní'irö gulún xtídza'gaquië' yugu' bixúz unná bë', ilútië' ca' Lázaro,

¹¹ tu' ta'yéajlë'ë zían bönni' judío Jesús ni'a queë' Lázaro na', en chinulá'alengaqüië' yugu' bixúz unná bë' na'.

Len yöl-la' ba zxön razië' Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'.

¹³ Ní'irö gula'guítsjë' zin, en bila'rúajë' söjxí'gala'gaquië' Jesús, ate' gulu'ë zidzaj didza', ta'nnë':

—¡Yöl-la' ba Dios! ¡Yöl-la' ba Bönni' ni zë'ë uláz queë' Xanru', para inná bé'enë' bönachi Israel!

¹⁴ Budzölinë' Jesús tuba' búrrodo', ate' gudxíë'-ba' ca na' nazúaj lu guichi lá'ayi, rnna:

¹⁵ ¡Biti' gádxili', libí'ili', zóali' yödzö Sión!

¡Buli'yútsöca', zë'ë Bönni' inná bé'enë' libí'ili'!

¡Dxíë'-ba' tuba' búrrodo'!

¹⁶ Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéguequinë' lë ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lësca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'.

¹⁸ Que lë ni na' ca' bila'rúajë' bönni' yöjxí'gala'gaquië' Jesús, tu' bila'yönnë' ca naca yöl-la' huáca ni benë' Lë'.

¹⁹ Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' biti' bi séqui'ru' gunru'. Buli'yú ca dá'gaca yúgu'të bönachi Lë'.

Yugu' bönni' zi'tu' tu'guiljë' Jesús

²⁰ Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxi'gaquië' Dios.

²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yuë' lahuë', ta'nnë':

—Bönni', rē'ēnitu' ilé'etu'-nē' Jesús.

²² Guyijē' Felipe na', en yōjōdxē' ca' Andrés. Ní'irō Andrés, en Felipe na' gulé' ca' Jesús.

²³ Bubi'ē didza' Jesús, rē' légaquiē':

—Chizóa idxín dza gátia' neda', Bönni' Guljē' Bönachi, huōja' xilatja' yehua' yubá.

²⁴ Le nácatē rea' libí'ili': Ugá'ana cá'asō tu xisedo' channō cabí igachi' luyú, en údxi que. Channō údxi que xisedo' na', ate' ilén, yénni'tērō unōdzaj.

²⁵ Nu bönni' ruí'i ládxi'dē'ē yōl-la' na'bán queē', unítie' le, tu gátie' tsaz bönni' na'. Nu bönni' bití' ruí'i ládxi'ē'ē yōl-la' na'bán dē queē' yōdzólió ni gun chí'ē le ga idxinrō dza gata' yōl-la' na'bán idú queē'.

²⁶ Channō rē'ēnē' nu bönni' gunē' xichina', ral-la' tē'ē neda' bönni' na', ate' ga ní' tsōjsóa' neda', ní' tsōjsóē' ca' bönni' na' runē' xichina'. Channō runē' xichina' nu bönni', Xuza' Dios gunē' bal bönni' na'.

Rigúxjō'ē Jesús ca si' ilútiē' Lē'

²⁷ Gunnē' ca' Jesús:

—Na'a rō'a bōniga neda'. ¿Nacxi innatsa'? ¿Naru' innía': Xuza', busólá neda' lu le gaca quia' na'a? Que lē ni na' bida', para guá' ilena' le ral-la' gaca quia' na'a.

²⁸ Xuza', ben ga ilá' lahui yōl-la' zxōn quiu'.

Ní'irō biyōn chí'i Nu ruí'i didza' yehua' yubá, rnna:

—Chibéna' ga nalá' lahui yōl-la' zxōn quia', ate' leyúbölō guna' ga ilá' lahui yōl-la' zxōn quia' na'.

²⁹ Bila'yōni bönachi zían nacuá' ní' chí'i ni, ate' ta'nná:

—Guziú' na' gunnē.

Ia'bal-la bönachi na' ta'nná:

—Tu gubáz lá'ayí queē' Dios bē'lenē' Lē' didza'.

³⁰ Ní'irō bubí'ē didza' Jesús, rē' légaquiē':

—Biyōn chí'i ni, calēga para uzi'a xibé neda', pero para uzí'ili' xibé libí'ili'.

³¹ Chibidxín dza uchi'a usörōē' Dios bönachi yōdzólió ni. Na'a chú'unē' Dios tu' xihui' ní'ilō, nu na' rinná be'e bönachi yōdzólió ni.

³² Na'a, channō ilútiē' bönni' neda', en ulu'chisē' neda' xitsá', guna' ga ulu'dubi yúgu'tē bönachi ga zoa'.

³³ Didza' ni bē'ē Jesús naca bē' ca gátie'.

³⁴ Bönachi zían na' tē Jesús, ta'nná:

—Netu' biyōnitu' nupa bulu'laba le rnna xibá queē' Dios, lē na' rnna: Sóatica'sē' Cristo. ¿Nacxi caz naca, rnno' Li': "Run bayudxi Bönni' Guljē' Bönachi, ulu'chisē' Lē' xitsá'"? ¿Nuzxi na' Bönni' Guljē' Bönachi?

³⁵ Ní'irō Jesús rē' légaquiē':

—Ia'tú chí'ido'osö sóalena' neda' libí'ili', en naca' bení' queéli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridé' ga chul-la niti biti' nöziné' gazxi sa'yéajé'.

³⁶ Tsanni ni zóalena' libí'ili', naca' bení' queéli'. Guli'tséajlé' neda' naca' bení' queéli' para ilé'eli' bení' na' naca idú.

Cate' Jesús budxi bē'ē didza' ni, yōjhuōjē' yōjcachi' lahuē' lógaquiē'.

Le run nigui bönachi judío, para cabí ila'yéajlé' Jesús

³⁷ Sal-la' benē' Jesús zían yöl-la' huáca lógaquiē', biti' gula'yéajlé'ē Lē'.

³⁸ Caní guca lē na' buzúajé' Isaías lu guichi, bönni' na' bē'ē didza' uláz queē' Dios, gunné':

Xan, ¿nuzxi caz guyéajlé' didza' bē'ētū'?

¿Nuzxi caz buluí'inē' Xanru' yöl-la' huáca queē'?

³⁹ Caní guca, biti' guca ila'yéajlé'ē Jesús. Guca ca na' gunné' ca' Isaías:

⁴⁰ Dios benē' ga gula'chul-la gula'nítie',

ate' guca zidi ládxi'do'gaquiē'

para cabí ila'lé'enē' len guiōj lógaquiē',

en cabí ila'yéajni'inē' lu icja ládxi'do'gaquiē'.

Biti' ulu'huóaquiē' quia' para úngaca'-nē'.

⁴¹ Bē'ē Isaías didza' ni tu' bilé'enē' yöl-la' zxön queē' Cristo, en bē'ē didza' ca naca queē' Lē'.

⁴² Sal-la' raca caní, gula'yéajlé' bönachi zían Jesús, ga bidx-intē gula'yéajlé'ē bal-lē' bönni' unná bē' Lē', pero tu' tádxinē' yugu' bönni' yudo' fariseo, biti' gulunē' ba nalí queē' yálajdo', para cabí ulu'béajé' légaquiē' tsaz ga na' tu'dubē' tu'sédē' queē' Dios.

⁴³ Caní gulunē' tu' tunrē' zxön le tun bönachi légaquiē' bal ca le runē' Dios légaquiē' bal.

Ilún didza' bē'ē Jesús ga irugu quégaca bönachi ilátigaca

⁴⁴ Bē'ē zidzaj didza' Jesús, rnnē':

—Nu bönni' réajlé'ē neda', calēga néda'sö réajlé'ē, pero réajlé'ē ca' Xuza' nasöl-lē'ē neda'.

⁴⁵ Lēasca' caní, nu bönni' rilé'enē' neda', rilé'enē' ca' Xuza' nasöl-lē'ē neda'.

⁴⁶ Neda' naca' bení', en bida' yōdzölió ni, para cabí ulu'gá'anē' ga chul-la yúgu'tē bönni' ila'yéajlé'ē neda'.

⁴⁷ Channó riyönnē' nu bönni' xtídza'a, en biti' runē' le bal, calēga neda' ichuga' queē' bönni' na' gátie', tu' bida' ni, calēga para ichuga' quégaca bönachi yōdzölió ni, pero para usólá' bönachi yōdzölió ni.

48 Nu bönni' ruzóë' neda' tsölá'alö, en biti' rizi' lu nëë xtídza'a, chizóa le ichugu queë' bönni' na'. Didza' na' chibé'lena' libí'ili' naca tu le ichugu queë' bönni' na' dza údxi.

49 Caní naca, ruá'a didza', calëga rácasö quia', pero Xuza' nasöl-lë'ë neda' gudxë' neda' le ral-la' innía', enca' ca ral-la' gu'a didza'.

50 Nözda' gunná bë'ë Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

13

Jesús riguibë' ní'agaquië' bönni' usëda queë'

1 Ní' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto. Nözinë' Jesús chibidxín dza queë' gátie', cate' ral-la' uzë'ë yödzölió ni, en huöjë' ga zoë' Xuzë'. Ca na' nadxí'inë' bönachi queë' nacua' yödzölió ni, na'a nadxí'inë' légaquië' ga idxintë gátie' uláz quégaquië'.

2 Satanás tu' xihui' chinagú'u yöl-la' Judas Iscariote, zxi'inë' tu bönni' lë' Simón, para udödë' Jesús lu ná'agaca nupa iluti Lë'.

3 Nözinë' Jesús ca naca, birúajë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' idütë yöl-la' unná bë' queë'.

4 Que lë ni na', cate' ni' tahuë', guzuinë' Jesús, en gudúë' lari' rixóa yenë'. Gudélë'ë tu lari' ruzxini ná'aru' le budë'ë lë'ë.

5 Ní'irö gudë'ë nisa tu lu zxiga' guië, ate' gusí lahuë' riguibë' ní'agaquië' bönni' usëda queë', en ruzxinë' ní'agaquië' len lari' na' da' lë'ë.

6 Cate' bidxinë' ga rë'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

7 Bubi'ë didza' Jesús, rë' lë':

—Lë ni runa', biti' réajni'ininu' na'a, pero huadzé tséajni'inu'.

8 Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxön.

9 Ní'irö Simón Pedro rë' Lë':

—Xan, calëgasö ni'a quibu', pero quibu' ca' na'a, en icja'.

10 Jesús rë' lë':

—Nu nayari, ní'asö run bayudxi tsari, tu' naca cazë' dxi'a idütë', ate' libí'ili' nácali' dxi'a, pero calëga yúgu'tëli'.

11 Gunnë' caní Jesús: “Calëga yúgu'tëli' nácali' dxi'a”, tu' nözinë' nülögaquië' na' udödi Lë'.

12 Gudödi gudibë' Jesús ní'agaquië', buguelë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queëli'?

13 Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'.

14 Na'a, channö neda' naca' Xanli', en Bönni' Usedi queëli', ate' gudiba' ní'ali', lësca' caní ral-la' gunli' libí'ili', quíbili' ni'a luzá'ali' tuli' ia'tuli'.

15 Tu le bulu'ida' libí'ili' para gunli' libí'ili' ca na' bena' neda'.

16 Le nácatë rea' libí'ili': Biti' nayëpisëtëre' tu bönni' huen dxin ca xanë', ate' bönni' gubáz bití' nayëpisëtëre' ca nu nasöl-la' lë'.

17 Channö réajni'ili' yúgu'të lë ni, bica' ba libí'ili' channö gunli' caní.

18 Didza' ni ruá'a bití' rea' yúgu'tëli'. Nöz quézida' nupa gurö caza' neda', pero run bayudxi gaca lë na' nazúaj lu guichi lá'ayi, le rnna: "Nu rágulen neda' tsözxön, nu ni tá'baga' neda'."

19 Na'a riguíxjö'ida' libí'ili' zí'alö ca gaca, para cate' gaca caní, tséajlë'ëli' zoa caza' neda'.

20 Le nácatë rea' libí'ili': Nu bönni' gunë' bal gubáz isöl-la'a neda', neda' ca' gunë' bal, ate' nu bönni' gunë' neda' bal, gunë' ca' bal Xuza', nasöl-lë'ë neda'.

Riguíxjö'ë Jesús ca gunë' Judas, udödë' Lë'

(Mt. 26:20-25; Mr. 14:17-21; Lc. 22:21-23)

21 Cate' Jesús budxi bë'ë didza' ni, bu'innë', ate' yálajdo' gunnë':

—Le nácatë rea' libí'ili': Tu bönni' nútsë'ë ladjali' udödë' neda'.

22 Ní'irö bulu'yú lo luzá'agaquië' tuë' ia'tuë' bönni' usëda queë', en gula'cu'ë böniga, ate' ta'naba ladxí'gaquië' nuzxi que na' gunnë' Jesús caní.

23 Tuë' bönni' usëda queë' Jesús, bönni' na' Jesús nadxí'inë' lë', zoë' cuita lë'ë.

24 Simón Pedro bulá'a bulu'isë' bönni' ni para inábinë' Jesús nuzxi que na' gunnë' caní.

25 Ní'irö bönni' na' zoë' cuita lë'ë Jesús rë' Lë':

—Xan, ¿nuzxi na' ru'u didza' que?

26 Bubi'ë didza' Jesús, rë' lë':

—Náquië' bönni' na' gu'a-në' yöta xtila nabisa.

Ní'irö busubísië' yöta xtila na', en bë'ë queë' Judas Iscariote, zxí'inë' tu bönni' lë' Simón.

27 Gudödi gudahuë' Judas yöta xtila na', guyaza Satanás tu' xihui' icja ladxí'da'ahuë'. Ní'irö Jesús rë' lë':

—Lë na' gunu', yöjentë na'a.

28 Biti' ta'yéajni'inë' ia'zíca'rë' bönni' usëda queë' röö'ogaquië' tahuë' bizx que na' Jesús gudxë' lë' caní.

29 Tu' nu'ë Judas buzudi dumí quégaquië', téquinë' bal-lë' Jesús gudxë' lë': Yöxí' le gáguru' laní, o gunné': Bë' lati' quégaca bönachi yechi'.

30 Cate' budxi gudahuë' Judas yöta xtila na', en ni' naca chi'i dzö'ölö, la' birúajtë'.

Tu xibá cubi

31 Cate' chibirúajë' Judas na', ní'irö gunné' Jesús:

—Na'a chizóa ilá' lahui yöl-la' zxön quia' neda', Bönni' Guljë' Bönachi, en ilá' lahui ca' yöl-la' zxön queë' Dios.

32 Channö ilá' lahui yöl-la' zxön queë' Dios ni'a quia' neda', Zxí'inë', lësca' Lë cazë' Dios gunë' ga ilá' lahui yöl-la' zxön quia' neda', Zxí'inë', en la' guntë' caní.

33 Libí'ili', zxi'ina'do', ia'tú chí'isö zóalena' libí'ili'. Uguíljali' neda', ate' ca na' chigúdxigaca'-në' bönni' judío, lësca' rea' libí'ili' na'a: Ga na' tseja' neda', bití' gaca guídali' rácasö queéli'.

34 Rea' libí'ili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida' libí'ili', lësca' caní ral-la' idxí'ili' luzá'ali' tuli' ia'tuli'.

35 Channö huadxí'i luzá'ali' tuli' ia'tuli', iléquibe'e yúgu'të bönachi dá'ali' neda'.

Rnnë' Jesús innë' Pedro bití' núnbë'ë Lë'

(Mt. 26:31-35; Mr. 14:27-31; Lc. 22:31-34)

36 Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', bití' gaca sá'lenu' neda' na'a, pero huadzé guídu' ga tseja' neda'.

37 Pedro rë' Lë':

—Xan, ¿bizx que bití' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

38 Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'inu' neda'? Le nácatë rea' li', zí'alö ca cödxiba' böra, li' tá'bágu'u tsonna luzuí, innó' bití' núnbë'u neda'.

14

Náquië' Jesús nöza tséajlenru' para idxinru' ga zoë' Dios Xuz

1 Rnnë' Jesús:

—Bití' cö'li' baniga lu icja ládxi'do'oli'. Guli'tséajlë' Dios, en guli'tséajlë' ca' neda'.

2 Lu yu'u lidxë' Xuza' lataj zían nacuá'. La'tu' cabí naca caní, neda' chigudxi caza' libí'ili'. Tseja' na'a, tsöjpa'a lataj queéli' ga tsöjsóali'.

³ Channö huayéaja', en tsöjpá'a lataj queéli' ga tsöjsóali', huöda' leyúbölö, ate' uchë'a libí'ili' lataj quia', para ga na' tsöjsóa' neda', tsöjsóali' ca' libí'ili'.

⁴ Nöz quézili' ga ni' tseja', en núnbë'ëli' ca' nöza.

⁵ Tomás rë' Lë':

—Xan, bití' nöztu' gazxi na' tseju'. ¿Nacxi caz gaca gúnbë'ëtu' nöza?

⁶ Bubi'ë didza' Jesús, rë' lë':

—Neda' naca caza' nöza, en naca' ca' le naca idútë li, en naca' ca' Nu nabánigaca bönachi. Ni'a quia' néda'sö gaca nu idxín ga zoë' Dios Xuz.

⁷ La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'eli'-në'.

⁸ Ní'irö Felipe rë' Lë':

—Xan, buluí'i netu' Xuzu', ate' nácatë queëtu'.

⁹ Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnnatso': "Buluí'i netu' Xuzu'?"

¹⁰ ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'lëna' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni.

¹¹ Guli'tséajlë' neda', zóalen caza'-në' Xuza', ate' Xuza' zóalen cazë' neda'. Channö cabí gaca gunli' caní, guli'tséajlë' neda' ni'a quégaca dxin ni runa'.

¹² Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxöntëro ca' gunë' bönni' na' tu' huöja' ga zoë' Dios Xuz.

¹³ Yúgu'të le inábali' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxön queë' Dios Xuz.

¹⁴ Bítí'tës bi inábali', en ugunli' dxin La' neda', neda' guna' le.

Jesús isöl-lë'ë Dios Bö' Lá'ayi, para idisóalënë' bönachi queë'

¹⁵ Rnnë' ca' Jesús:

—Channö nadxí'ili' neda', guli'gún le rea' libí'ili',

¹⁶ ate' neda' gáta'yua' lahuë' Dios Xuz, ate' Lë' isöl-lë'ë queéli' Nu yúbölö Nu gácalen libí'ili', Nu utipa ládxi'li', en sóalëntica'sö libí'ili'. Nu ni naca Dios Bö' Lá'ayi, Nu ruí'i didza' idútë li.

¹⁷ Bití' gaca ulu'z' bönachi yödzölió ni xibë' Lë', tu' cabí gaca ila'lé'e Lë', en bití' gaca ilúnbe'e Lë'. Zóalen cazë' libí'ili', ate' soë' lu icja ládxi'do'oli'.

¹⁸ Bití' ucá'ana' libí'ili' ca yugu' bi'i uzëbido'. Huöda' udusóalena' libí'ili'.

19 Ia'tú chí'ido'osö bíti'rö ila'lé'e bönachi yödzölió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanlí'.

20 Dza ní'rö cate' Dios Bö' Lá'ayi na' idisóalenë' libí'ili', inöz quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'.

21 Nu bönni' rizi' lu në'ë xtídza'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en uluí'i lahua' lahuë'.

22 Judas rë' lë', pero calëga Judas Iscariote, rnnë':

—Xan, ¿nacxi caz gaca uluí'i lo' lotu' netu', en biti' uluí'i lo' lógaca bönachi yödzölió?

23 Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládxi'da'ahuë'.

24 Bönni' na' biti' nadxí'inë' neda' biti' runë' ca rnna xtídza'a. Didza' na' biyönili' bë'a neda', calégasö quia' na', pero naca queë' Dios Xuz nasöl-lë'ë neda'.

25 'Rë caza' libí'ili' yugu' lë ni tsanni ni zóalena' libí'ili',

26 pero Dios Bö' Lá'ayi gácalenë' libí'ili', en utipë' ládxi'li'. Xuza' Dios isöl-lë'ë Lë' queëli' tu' ugunli' dxin La' neda'. Usédinë' libí'ili' yúgu'të, en usë'ë ládxi'li' ca naca yúgu'të didza' na' chigudxa' libí'ili'.

27 'Rucá'ana' queëli' le cuéqui dxi ládxi'li'. Runna' queëli' yöl-la' rö'ö dxi ládxi' quia'. Yöl-la' rö'ö dxi ládxi' na' runna' queëli' biti' naca ca le tunna queëli' bönachi yödzölió ni. Biti' ichixi icja ládxi'do'oli', en biti' gadxi idzöbili'.

28 Chibiyönili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udzéjali' cate' ni gudxa' libí'ili' huöja' ga zoë' Dios Xuz, tu' nayëpisëtëre' Dios Xuz ca neda'.

29 Na'a, chigudxa' libí'ili' zí'alö ca si' gaca, para cate' gaca caní, tséajlë'ëli' neda'.

30-31 'Bíti'rö gü'ílëna' libí'ili' didza' zían, tu' za' tu' xihui', nu rinná be'e bönachi yödzölió ni. Sal-la' biti' bi dë lu në'e bi gun quia' neda', ral-la' gaca caní para iléqui be'e bönachi yödzölió ni nadxí'ida'-në' Dios Xuz, en runa' ca na' chigudxë' neda' guna'. Gulichasa, uzá'aru' ni.

15

Ca naca que lubá uva, en ni'a në'e lubá na'

¹ Lëscá' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gü'una rapa chi'ë lubá na'.

² Ugüë' yúgu'tè ni'a nē'e lubá na' naca' neda', le cabí bi ta'bía, ate' uchi'ë yúgu'tè ni'a nē'e na' ta'bía, para ila'bía ia'lati'.

³ Libí'ili' chinácali' dxi'a ni'a que didza' na' chibé'lena' libí'ili'.

⁴ Guli'dá'tica'sö neda', ca na' neda' dá'tica'sa' ca' libí'ili'. Ca naca que ni'a nē'e lubá na', biti' gaca bi cuía rácasö que, channö cabí dá'tica'sö lubá na', lësca' caní naca queëli', biti' bi gaca gunli' channö cabí tá'tica'sili' neda'.

⁵ 'Naca' neda' ca lubá na', ate' libí'ili' nácali' ca ni'a nē'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a nē'e lubá na' ribía yenni', tu' channö nulá'alenli' neda', biti' bi gaca gunli'.

⁶ Nu bönni' biti' dá'tica'së' neda', gaca queë' ca raca quégaca ni'a nē'e lubá na' biti' nácgaca dxi'a, ta'ru'unë' ni'a nē'e na', ate' ila'bidxi. Cate' chinabídxigaca ni'a nē'e na', ulu'tubë' léguequi, en ila'gu'ë léguequi lu guí, ate' tséguigaca.

⁷ 'Channö tá'tica'sili' neda', en gunli' ca rna xtídza'a, huáca inábali' bi guë'ënilí, ate' neda' guna' lë na' inábali'.

⁸ Gunli' bal Xuza' Dios cate' gunli' xichinë', ate' gácali' ca ni'a nē'e lubá na' ta'bía, en caní gaca bë' nácali' idú bönni' ta'dë'ë neda'.

⁹ Ca na' nadxí'inë' Dios Xuz neda', lësca' caní nadxí'ida' libí'ili'. Guli'gúntica'sö ca ral-la' gunë' bönni' nadxí'ida'-në'.

¹⁰ Channö gunli' ca rea' libí'ili', gunli' ca ral-la' gunë' bönni' nadxí'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza lãdxë'ë Lë', Bönni' na' nadxí'inë' neda'.

¹¹ 'Yugu' didza' ni rea' libí'ili' para udzëjalenli' tsözxön neda', en gaca idú ca na' udzëjali'.

¹² Lë ni naca le rea' libí'ili' gunli': Guli'dxi'i luzá'ali' tuli' ia'tuli', ca na' neda' ca' nadxí'ida' libí'ili'.

¹³ Biti' gaca idxí'irönë' nu bönni' luzë'ë ca nu bönni' udödë' yöl-la' na'bán queë', gatië' para gácalenë' yugu' böchi' luzë'ë tu' nadxí'inë' légaquië'.

¹⁴ Libí'ili' nácali' böchi' luzá'a channö gunli' ca na' chigudxa' libí'ili' gunli'.

¹⁵ Bítirö innía' queëli' nácali' huen dxin quia', tu' cabí nözinë' bönni' huen dxin naca gunë' xanë'. Neda' chigunnía' queëli' nácali' böchi' luzá'a, tu' chibena' ga nözili' yúgu'tè le chigudxë' Xuza' neda' guna'.

¹⁶ Calëga libí'ili' guröli' neda', pero neda' guró caza' libí'ili', en buzóa' libí'ili' para tséajli' bi tsöjenli', ca na' tun ni'a nē'e lubá na' ta'bía yenni', ate' ugá'anatica'sö lë na' gunli'. Caní gaca, Xuza' Dios gunnë' queëli' yúgu'tè le inábali' Lë', en ugunli' dxin La' neda'.

17 Lë ni naca le rea' libí'ili' gunli': Guli'dxí'i luzá'ali' tuli' ia'tuli'.

Bönachi yödzülió tu'zóa tsölä'alö Jesús, en nupa dá'gaca Lë'

18 Gunnë' ca' Jesús:

—Channö bönachi yödzülió ni tu'zóa libí'ili' tsölä'alö, nözüli' chibulu'zöë' neda' tsölä'alö zí'alö ca tu'zöë' libí'ili' tsölä'alö na'a.

19 La'tu' nácali' tuz len bönachi yödzülió ni, huala'dxí'i bönachi yödzülió ni libí'ili' ca na' ta'dxí'i luzë'eguequi, pero tu'zóa bönachi yödzülió ni libí'ili' tsölä'alö tu' cabí nácali' tuz len léguequi, tu' gurö caza' neda' libí'ili', en guléaja' libí'ili' ladaj bönachi yödzülió ni.

20 Guli'tsöjné didza' na' chigudxa' libí'ili', gunnía': Biti' nayëpisëtë're' nu bönni' huen dxin ca xané'. Channö gula'bía ládxi'gaca bönachi neda', ila'bía ládxi'gaca ca' libí'ili'. Channö nacua' nupa tun ca rnna xtídza'a, ilún ca' ca rnna xtídza'li' libí'ili'.

21 Yúgu'të lë ni ilún bönachi queëli' tu' dá'ali' neda', tu' cabí núnbë'gaca Dios Xuz nasöl-lë'ë neda'.

22 'La'tu' cabí bida', en la'tu' cabí bë'lena' légaquië' didza', biti' ila'báguë'ë dul-la', pero na'a tu' bida' ni, biti' bi gaca ila'nnë' que dul-la' nabága'gaquië' le ubéaj légaquië' dxi'a.

23 Nu bönni' ruzóë' neda' tsölä'alö, ruzóë' ca' Xuza' Dios tsölä'alö.

24 La'tu' cabí bena' yugu' yöl-la' huáca ga nacu'ë, yugu' le cuntü nu ben ca gulaca, biti' ila'báguë'ë dul-la'. Na'a, bila'lé'enë' yugu' lë na' bena', ate' tu'zöë' neda' tsölä'alö, en tu'zöë' ca' Xuza' tsölä'alö.

25 Caní raca, para gaca ca rnna xtídzë'ë Dios, le nazí' lu ná'agaquië', le rnna: Tu'zöë' neda' tsölä'alö, en biti' zoa bizx que.

26 'Cate' idxinë' Dios Bö' Lá'ayi, Bönni' ru'ë didza' idútë li, en gácalenë' libí'ili', utipë' ládxi'li'. Isöl-la'a Bönni' na' queëli' uláz queë' Dios Xuz, ate' gunë' ba nalí quia' neda'.

27 Libí'ili' ca' gunli' ba nalí quia', tu' zóalen cázali' neda' tsözxön dza ni'te.

16

1 Gunnë' ca' Jesús:

—Yugu' didza' ni chigudxa' libí'ili', para cabí gaca chopá ládxi'li'.

2 Yugu' bönni' judío ulu'béajë' libí'ili' tsaz ga tu'dubë' tu'sëdë' queë' Dios, ate' idxín dza cate' nu bönni' gútië' libí'ili' guéquinë' dxin queë' Dios runë'.

3 Caní ilunë', tu' cabí núnbë'gaquië' Dios Xuz, en cabí núnbë'gaquië' neda'.

4 Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

Le gunë' Dios Bö' Lá'ayi

Gunnë' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'.

5 Na'a huöja', tsöjsóalena'-në' Dios Xuz, nasöl-lë'ë neda'. Biti' inábili' neda' nituli' libí'ili', biti' innali': ¿Gazxi tseju'?

6 Na'a, tu' rea' libí'ili' yugu' didza' ni, risëbi ládxi'li'.

7 Neda' rea' libí'ili' le naca idútë li. Gácarö dxi'a queëli' huöja', tu' channö cabí huöja', biti' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isöl-la'a-në', na' idisóalenë' libí'ili'.

8 Cate' guidë' Lë', gunë' ga iléquibe'e bönachi yödzölió ni nabága'gaca dul-la', en biti' núnbë'gaca le naca tsahui', ate' ichúguië' Dios quéguequi ilátigaca.

9 Nabága'gaquië' dul-la' tu' cabí ta'yéajlë'ë neda'.

10 Biti' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bíti'rö ila'lé'enë' neda'.

11 Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödzölió ni.

12 'Ia'zica' zían didza' rë'ënda' gü'ílana' libí'ili', pero biti' gaca tséajni'ili' na'a.

13 Cate' guidë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuza', en gunë' ga inözili' yúgu'të le ral-la' gaca.

14 Lë' gunë' neda' bal, tu' si'ë le nequi quia', en gunë' ga inözili' le.

15 Yúgu'të le nequi queë' Dios Xuz nequi quia'. Que lë ni na' gunniá' si'ë le nequi quia', en gunë' ga inözili' le.

Yöl-la' risëbi ládxi' queëli' huöáca yöl-la' rudzeja

16 Gunnë' ca' Jesús:

—Yetú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

17 Ní'irö bönni' usëda queë' gulë luzá'agaquië' tuë' ia'tué', ta'nnë':

—¿Bizxi rnna didza' ni rë' rë'u? Rnnë': “Ia'tú chí'ido'osö, en bíti'rö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz.”

18 Ní'irö gula'nnë':

—¿Bizxi caz rë'ëni inná didza' ni, gunnë': “Ia'tú chí'ido'osö”? Biti' réajni'itu' didza' ni ru'ë.

19 Réquibe'enë' Jesús të'ënnë' ila'nábinë' Lë', ate' rë' légaquië':

—¿Naru' rinábitsö luzá'ali' ca naca que didza' na' bē'a, gunniá': Ia'tú chí'ido'osö, en bití'rö ilé'eli' neda', ate' ia'tú chí'ido'osö ca' ulé'eli' neda'?

²⁰ Le nácatē rea' libí'ili': Cödxili', en isēbi lādxi'li', pero bönachi yödžölió ni ulu'dzeja cate' iluti neda'. Ní'irö sal-la' isēbi lādxi'li', yöl-la' risēbi ladxi' queēli' huóaca yöl-la' rudzeja cate' ulé'eli' neda'.

²¹ Tu nigula cate' chizóa gáljabi' bí'ido' queēnu, riguí'i rizáca'nu, tu' chibidxín dza queēnu, pero cate' chizóabi' tubi' bi'i bönni'do' queēnu, bití'rö rōjnenu lē na' butságanu, tu' rudžejanu tu' chigúlajbi' tubi' bi'i bönni'do' yödžölió ni.

²² Lēasca' caní raca queēli', risēbi lādxi'li' na'a, pero huóda' uduyúa' libí'ili', ate' ní'irö udzeja lādxi'li', ate' bití' séqui'nē' nu bönni' ugúē' yöl-la' rudzeja queēli' na'.

²³ 'Dza ní'irö bití' bi inábili' neda'. Le nácatē rea' libí'ili': Yúgu'tē le inábili' Dios Xuz, en ugunlí' dxin La' neda', Lē' gunnē' queēli'.

²⁴ Ga ridxintē na'a dza bití' rugunli' dxin La' neda' cate' bi rinábili'-nē' Dios Xuz. Guli'naba caní, ate' idéli'li' lē na' inábali', para gaca idú yöl-la' rudzeja queēli'.

Ridéli'nē' Jesucristo lu le raca yödžölió ni

²⁵ Gunnē' ca' Jesús:

—Yugu' lē na' chibē'lēna' libí'ili' didza' bucúdzu'a didza'. Huadxín dza cate' bití'rö gü'ílēna' libí'ili' didza' le rucúdzu'a didza', pero yálajdo' gü'ílēna' libí'ili' didza' ca naca queē' Dios Xuz.

²⁶⁻²⁷ Dza na' inábili'-nē' Dios, en ugunlí' dxin La' neda', ate' rea' libí'ili', bití' gun bayudxi gáta'yua' lahuē' Dios Xuz uláz queēli', tu' nadxí'inē' Lē cazē' Dios Xuz libí'ili'. Nadxí'inē' libí'ili' tu' nadxí'ili' neda', en réajlē'ēli' birúaja' ga zoē' Dios.

²⁸ Birúaja' ga zoē' Dios Xuz, en bidxina' yödžölió ni. Ia'tú ca', ucá'ana' yödžölió ni, ate' huója' ga zoē' Dios Xuz.

²⁹ Ní'irö yugu' bönni' usēda queē' gulē' Lē', ta'nnē':

—Na'a ru'u didza' yálajdo', en bití'rö rucúdzu'u didza'.

³⁰ Na'a réquibe'etu' nöz quézinu' Li' yúgu'tē, en bití' run bayudxi nu bi inabi yudxi Li', tu' riguí'xjöi'inu' netu' le si inábatu'. Que lē ni na' réajlē'ētu' birúaju' ga zoē' Dios.

³¹ Bubi'ē didza' Jesús, rē' légaquiē':

—¿Naru' réajlē'tsali' neda' na'a?

³² Buli'yú, huadxín dza, en chiridxín dza na', cate' gásilasili' que queēli', en ucá'anali' neda' tuza', pero bití' soa' tuza', tu' zóalen cazē' Dios Xuz neda'.

³³ Yugu' didza' ni chigudxa' libí'ili' para cuéqui dxi lādxi'li', tu' nácali' quia' neda'. Lu yödžölió ni gaca queēli' le usaca' zí' libí'ili', pero buli'tipa lādxi'li'. Neda' chibidéli'da' lu le raca yödžölió ni.

17

Jesús rinábinë' Dios gácalenë' nupa dá'gaca Lë'

¹ Cate' budxi bë'ë Jesús yugu' didza' ni, guchisa lahuë', ruyúë' yehua' yubálö, ate' rnnë':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'ínu', para gaca guna' ga ilá' lahui yöl-la' zxön quiu' Li'.

² Ben caní tu' chinudödu' lu na'a yöl-la' unná bë' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'.

³ Lë' ni naca yöl-la' na'bán idú na', tu' núnbë'gaquië' Li', nacu' la's dui Dios idú, en tu' núnbë'gaquië' ca' neda', Jesucristo, ate' Li' nasöl-lu'u neda'.

⁴ Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a.

⁵ Na'a, Xuz, ben ga ilá' lahui yöl-la' zxön napa' tsözxön len Li', para gaca quia' yöl-la' zxön guta' quia' tsözxön len Li' dza ni'te quez cate' si' gata' yödzölió.

⁶ Chibulu'a lahui le nacu' Li' lógaquië' bönni' ni bennu' quia', nupa na' guró cazu' Li' ladaj bönachi yödzölió. Guléquinë' bönni' ni quiu', ate' bénnagacu'-në' quia', ate' tunë' ca rnna xtídzu'u.

⁷ Na'a nözguequinë' yúgu'të lë' na' bennu' quia' zá'gaca lu no'o Li',

⁸ tu' chibudöda' lu ná'agaquië' didza' na' budödu' Li' lu na'a neda', ate' légaquië' nazi' lu ná'agaquië' le, en téquibe'enë' birúaja' ga zu' Li', ate' ta'yéajlë'ë Li' nasöl-lu'u neda'.

⁹ Neda' ráta'yua' Lo' gácalenu' légaquië'. Ráta'yua' Lo', calëga gácalenu' yúgu'të bönachi yödzölió, pero gácalengacu'-në' bönni' ni chibénnagacu'-në' quia', tu' néquiguequinë' quiu'.

¹⁰ Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca ná'cagaca nupa na' rulu'i lahui yöl-la' zxön quia'.

¹¹ Na'a, bíti'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chi'i nupa ni chibennu' quia', para ilácagaca tuz, ca na' ná'caru' rë'u tuz.

¹² Cate' ni' guzóalena' légaquië' yödzölió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitúë' bití' bunítia'-në', pero tuzë' bönni' na' náquië' ca zxí'ini tu' xihui', en narugu queë' gátië' tsaz. Caní raca ca nazúaj lu guichi lá'ayi.

¹³ Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégacaquië' ca na' raca quia' neda' yöl-la' rudzeja.

14 Neda' chibudöda' lu ná'agaquië' xtídz'u, ate' bönachi yödzölió ni tu'zóa légaquië' tsölá'aló tu' cabí nácagaquië' tuz len léguequi, ca na' naca quia' neda', bití' naca' tuz len bönachi yödzölió ni.

15 Ráta'yua' Lo', calëga cúagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'.

16 Bití' nácagaquië' tuz len bönachi yödzölió ni ca na' naca quia' neda', bití' naca' tuz len bönachi yödzölió.

17 Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u.

18 Ca na' benu' Li', gusöl-lu'u neda' ladaj bönachi yödzölió ni, lësca' caní runa' neda', risöl-la'gaca'-në' ladaj bönachi yödzölió.

19 Tu' nadxí'igacada'-në' rudödi cuina' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

20 'Ráta'yua' Lo', calëga quégacasë' bönni' ni, pero lësca' quégaquië' bönni' ni' ila'yéajlë'ë neda' ni'a que didza' ilu'ë bönni' ni.

21 Ráta'yua' Lo' gunu' ga ilácagaquië' tuz yúgu'të', en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquië' para ila'yéajlë' ia'zíca'rö bönachi yödzölió ni, Li' caz gusöl-lu'u neda'.

22 Yöl-la' zxön na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u.

23 Li' nacu' tuz len neda', ate' neda' naca' tuz len légaquië', para gaca idú ca nácagaquië' tuz, en caní iléquibe'e ia'zíca'rö bönachi yödzölió ni, Li' caz gusöl-lu'u neda', ate' nadxí'igacanu'-në' ca na' nadxí'inu' neda'.

24 'Xúza'do', ré'ënda' ila'cuá'lenë' neda' bönni' ni bénnagacu'-në' quia' ga na' tsöjsóa', para ila'lé'enë' yöl-la' zxön na' bennu' quia' dza ni'te cate' si' gunu' yödzölió tu' nadxí'inu' neda'.

25 Xuza' tsahui', bönachi yödzölió ni bití' núnbë'gaca Li', pero neda' nunbë' caza' Li', ate' yugu' bönni' ni chinöziguequinë' Li' caz gusöl-lu'u neda'.

26 Bena' ga nöziguequinë' le nacu' Li', en gunra' ca' ga ila'nözinë' lë ni para ca na' nadxí'inu' Li' neda', lësca' caní ila'dxi'i luzá'agaquië', ate' gaca caza' tuz len légaquië'.

18

Ta'zönë' Jesús

(Mt. 26:47-56; Mr. 14:43-50; Lc. 22:47-53)

1 Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudödë' ia'tsölá'a yegu Cedrón, en bidxinë' ga ni' nacua' yaga olivo ca', ate' lataj ni guyázalenë' yugu' bönni' usëda queë'.

² Lësca' Judas, bönni' na' udödë' Jesús, núnbë'è la' yëla na', tu' butubë' Jesús yugu' bönni' usëda queë' ni' zían luzuí.

³ Ní'irö guchë'è Judas tu cö' bönni' rójáquië' gudil-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yójáquië' ga ni' zoë' Jesús, nuá'agaquië' yugu' guí' yöri, en yugu' le tu'dí'inë'.

⁴ Ní'irö, tu' nözinë' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíljalí'?

⁵ Bulu'bi'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'.

⁶ Cate' Jesús gudxë' légaquië': “Neda' caz”, ní'irö bulu'bíguë'è cusi zxanlö, en gula'dzö'è lu yu.

⁷ Jesús gunábinë' légaquië' leyúbölö, rnnë':

—¿Nuzxi riguíljalí'?

Të' Lë':

—Jesús, bönni' Nazaret, riguíljatu'-në'.

⁸ Ní'irö bubí'ë didza' Jesús, rnnë':

—Chigúdxá' libí'ili': Neda' caz. Channö riguíljalí' neda', guli'güi'-gáquië' lataj tsójhu'ójgaquië' bönni' ni.

⁹ Caní gunné' Jesús para idxín didza' na' bë'è, gunné': “Nupa ni bennu' quia', nitúë' bití' bunítia'-në'.”

¹⁰ Ní'irö, tu' nu'è Simón Pedro tu guié' tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguië' guídi náguië' ibëla bönni' na'.

¹¹ Ní'irö Jesús rë' Pedro na':

—Bugú'u guié' tuchi' quiu' lidxi. ¿Naru' cabíral-la' quí'i saca'a lë na' chinunë' Xuza' ca gaca quia'?

Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' rójáquië' gudil-la, en bönni' na' nacu'è lu në'è, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúgui'è Lë'.

¹³ Ní'irö gula'chë'è Lë' zí'alö lahuë' Anás, tu' náquië' xto' xzí'inë' Caifás, bönni' náquië' bixúz lo iz na'.

¹⁴ Náquië' Caifás bönni' na' buzéajni'inë' yugu' bönni' judío unná bë', buluí'inë' légaquië' dxí'arö gaca gátie' tuzë' bönni', en calëga iníti idútë yödzö quégaquië'.

Rnnë' Pedro: “Bití' núnbë'a-në' Jesús”

(Mt. 26:69-70; Mr. 14:66-68; Lc. 22:55-57)

15 Simón Pedro, en ia'túë' bönni' usëda queë' Jesús yöjáquië' cúdzu'lë' Lë', söjnógaquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'.

16 Bugá'anë' Pedro ní'lö ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bë'lenë'-nu didza' nigula na' run chí'inu ga nu riyaza lö'a na', ate' benë' ga guyázië' Pedro lö'a.

17 Ní'irö nigula na' run chí'inu ga nu riyaza lö'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

18 Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéquigaquië' guí', ate' zuíguequinë' ra' guí' na', en tu'tsë'e cuíngaquië'. Lësca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

19 Ní'irö gunabi yúdxinë' bixúz lo Jesús para inözinë' nupxi dá'gaca Lë', en nacxi naca le rusedinë' Jesús bönachi.

20 Bubi'ë didza' Jesús, rë' lë':

—Lahui' lo bë'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en biti' bi didza' bë'a bagáchi'sö.

21 ¿Bixx que rinabi yúdxinu' neda'? Gunabi yudxi nupa ni' bila'yöni didza' bë'lëna' léguequi. Nözguequi quézinë' bönni' na' didza' na' bë'lëna' légaquië'.

22 Cate' budxi bë'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'tso' didza' lahuë' bixúz lo?

23 Bubi'ë didza' Jesús, rë' lë':

—Channö biti' gunní'a dxi'a, gudixjö' bízxilö didza' bë'a biti' naca dxi'a, en channö guca dxi'a didza' bë'a, ¿bixx que na' gudápu'u neda'?

24 Ní'irö Anás na' gusöl-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölö rnnë' Pedro: "Biti' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

25 Cate' ni' zuínë' Pedro ra' guí' rutsë'e cuinë', yugu' bönni' nacu'ë ni' gulë' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

26 Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

27 Leyúbölö gudá'baguië' Pedro, ate' la' gurödxi'tëba' böra.

Ridxinë' Jesús lahuë' Pilato

(Mt. 27:1-2, 11-14; Mr. 15:1-5; Lc. 23:1-5)

28 Ní'irö gula'chë'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazí'i le Pretorio. Chízá' rení' dza na', ate' biti' gula'yázië' yugu' bönni' judío yúlahui' na', tu' téquinë' ila'báguë'ë xíguia' channö ila'yázië' ni', le gun ga biti' gaca ilahuë' xtsö' Laní Pascua, laní na' tu'subanë' ca benë' Dios, bubéajë' bönachi Israel luyú Egipto.

29 Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni didza'?

30 Bulu'bi'ë didza', të' lë':

—La'tu' cabí nu'ë bönni' ni dö', biti' udöditu'-në' lo'.

31 Ní'irö Pilato rë' légaquië', rnnë':

—Libí'i cázali' guli'chë'ë, en buli'chi'a buli'sörö Lë' ca rinná bë' xibá queëli'.

Yugu' bönni' judío të' lë', ta'nnë':

—Biti' dë lu na'tu' nu gútitu'.

32 Caní guca para idxín xtídzë'ë Jesús, le bë'ë naca ral-la' gátie'.

33 Ní'irö buázië' Pilato yúlahui' na', ate' bulidzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

34 Bubi'ë didza' Jesús, rë' lë':

—¿Naru' rácasö quiu' rnno' caní, o gulë bönachi li' caní ca naca quia'?

35 Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

36 Ní'irö bubí'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' bönachi yödzölió ni.

37 Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödžölió ni, para guna' ba nalí que le naca idútë li. Yúgu'të nupa ni tun le naca idútë li tu'zë nágagaca didza' ruá'a.

³⁸ Pilato rë' Lë':

—¿Bizxi na' le naca idútë li?

Ta'chúguië' queë' Jesús gátie'

(Mt. 27:15-31; Mr. 15:6-20; Lc. 23:13-25)

Cate' budxi gunnë' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridžöliida' nu'ë bönni' ni.

³⁹ Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queëli' tuë' bönni' nadzunë'. ¿Rë'ënili' usana'-në' queëli' Bönni' Rinná Bé'enë' Bönachi Judío?

⁴⁰ Ní'irö yúgu'të' gulu'ë zidzaj didza' leyúbölö, ta'nnë':

—¿Calëga bönni' ni, pero Barrabás usanu'-në' queëtu'!

Barrabás na' náquië' gubán.

19

¹ Ní'irö Pilato guchë'ë Jesús, en benë' ga gula'guinë' yugu' bönni' röjáquië' gudil-la Lë'.

² Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxië' le icjë' Jesús, en bulu'gacuë' Lë' tu lari' tunna xiná chul-la ca naca le tácuë' bönni' ta'nná bë'ë.

³ Ní'irö gula'biguë'ë lahuë' Jesús, en tē' Lë':

—¿Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

⁴ Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inözili' biti' bi rudžöliida' le naca dö' nu'ë bönni' ni.

⁵ Ní'irö birúajë' Jesús, dxía icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

⁶ Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—¿Budë'ë lë'e yaga cruz! ¿Budë'ë lë'e yaga cruz!

Pilato rë' légaquië':

—Libí'i cázali' guli'chë'ë, en guli'tsöjdë'ë lë'e yaga cruz. Neda' biti' bi dö' budžöliida' nu'ë bönni' ni.

⁷ Ní'irö bönni' judío na' tē' lë':

—Dë queëtu' tu xibá, ate' rinná bë' xibá queëtu' na' ral-la' gátie' bönni' ni tu' gunnë' náquië' Zxí'inë' Dios.

⁸ Cate' biyönnë' Pilato didza' ni, gúdxirönë'.

⁹ Leyúbölö buázië' yúlahui' na', en rë' Jesús:

—¿Gázxitë bönni' Li'?

Biti' bi didza' bubí'ë Jesús.

10 Ní'irö Pilato rë' Lë':

—¿Naru' cabí ubí'itso' didza', quíxjöi'inu' neda'? ¿Naru' cabí nõzinu' dë lu na'a udá'a Li' lë'e yaga cruz, en dë lu na'a usana' Li'?

11 Bubi'ë didza' Jesús, rë' lë':

—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca li'.

12 La' ní'sö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, biti' ridzagu'-në' dxi'a César, bönni' rinná bé'enë' idútë yödzölió. Nu bönni' run cuinë' bönni' rinná bë'ë, ridá'báguë'ë César na'.

13 Cate' biyönnë' Pilato didza' ni, gunná bé'enë' nupa diguá'gaca Jesús, ate' gurö'ë xilatjë' ga ruchi'a rusöröë', lataj na' nazí'i le Lö'a Ga Zxóagaca Guiöjta'a, en ca naca didza' hebreo nazí'i le Gabata.

14 La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'enë' libí'ili'.

15 Gulu'ë zidzaj didza', ta'nnë':

—¡Bëtië'! ¡Bëtië'! ¡Budë'ë lë'e yaga cruz!

Pilato rë' légaquië':

—¿Rinábitseli' neda' udá'a-në' lë'e yaga cruz bönni' rinná bé'enë' libí'ili'?

Bulu'bi'ë didza' bixúz unná bë', ta'nnë':

—Cúnturö nu zoa rinná be'e netu'. Tuzë' César rinná bé'enë' netu'.

16 Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélë'ë Jesús, en gula'ché'ë Lë' ní'ilö.

Tu'dë'ë Jesús lë'e yaga cruz

(Mt. 27:32-44; Mr. 15:21-32; Lc. 23:26-43)

17 Birúajë' Jesús ni', nu'ë yaga cruz queë', sa'yéajë' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota.

18 Bulu'dë'ë Jesús lë'e yaga cruz ni', ate' bulu'dá'lenë' Lë' tsözxón lë'egaca yaga cruz ia'chopë' bönni'. Tsölá'a huéaj ta'dë'ë, ate' Jesús dë'ë gatsaj láhui'lö chopë' bönni' na'.

19 Gusöl-lë'ë Pilato tu bönni' nu'ë le buzúajë' lu guichi le buzöë' lë'e yaga cruz icjlë' Jesús, le rnna caní: "Jesús, Bönni' Nazaret, Bönni' Rinná Bé'enë' Bönni' Judío."

20 Bulu'labë' zían bönni' judío didza' ni, tu' zoa ga na' bulu'dë'ë Jesús lë'e yaga cruz gála'sö ra' yödzö, ate' didza' na'

nuzúajë' len didza' hebreo, en len didza' griego, en len didza' latín.

²¹ Yugu' bixúz unná bë' quégaquië' bönni' judío të' Pilato, ta'nnë':

—Biti' uzúaju', "Bönni' Rinná Bé'enë' Bönni' Judío." Buzúaj caní: "Bönni' ni gunnë': Inná bé'eda' bönni' judío."

²² Bubi'ë didza' Pilato, rë' légaquië':

—Le chinuzúaja', tsaz chinuzúaja'.

²³ Cate' yugu' bönni' na' rójáquië' gudil-la budxi bulu'dë'ë Jesús lë'e yaga cruz, gula'guélé'ë lari' gúcuë'. Gula'béajë' tápalö, tu cö' huéaj guta' que queégaquië'. Gula'guélé'ë ca' lari' guxóa yenë' Jesús, ate' lari' na' biti' nadía, pero naduba tuz ca naduba.

²⁴ Ní'irö yugu' bönni' na' rójáquië' gudil-la gulë luzá'agaquië' tuë' ia'tuë', ta'nnë':

—Biti' ichúguru' le, pero dxí'arö gaca uyuru' le gaca bë' para inöziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guisië' que queégaquië' lari' nacuá',

en que lari' quia' bulu'yúë' le naca bë'.

Caní gulunë' bönni' na' rójáquië' gudil-la.

²⁵ Xinë'ë Jesús, en nigula zxílanu xinë'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz.

²⁶ Cate' Jesús bilé'enë'-nu xinë'ë, en bilé'enë' ca' zoë' ni bönni' usëda queë' na' nadxí'inë', gudxë'-nu xinë'ë:

—Na'a, na' zoë' zxí'ínu'.

²⁷ Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

Le guca cate' gutië' Jesús

(Mt. 27:45-56; Mr. 15:33-41; Lc. 23:44-49)

²⁸ Gudödi ni, tu' nözinë' Jesús yúgu'të chiböa budzaga lahui, en para udxín le nazúaj lu guichi lá'ayi, gunnë':

—Ribidxa' nisa.

²⁹ Dë ni' tu zxiga' yudzu nupi zi. Ní'irö yugu' bönni' na' rójáquië' gudil-la bulu'gui'jë' nupi zi na' tu le bululu rizxupi nisa, ate' bulu'zóë' le tu lahui gui, en bulu'dë'ë le ru'ë Jesús para xupë'.

³⁰ Budxi gu'ë Jesús nupi zi na', gunnë':

—Chinácatë.

Ní'irö buzötaj icjë'. Burúajtë bö' naca cazë', gútië'.

Tu bönni' reajë' gudil-la runë'ë yaga tuchi' cuita lë'ë Jesús

³¹ Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lë'egaca yaga cruz cate' naca dza lá'ayi quégaquië', le naca tu dza lá'ayi zxöntë, que

lë ni na' yugu' bönni' judío guláta'yuë' lahuë' Pilato guíë' bönni' rōjáquië' gudil-la tsōjtítsjagaquië' xiguíchjagaquië' bönni' dá'gaquië' lë'egaca yaga cruz, en ulu'zōtjē' légaquië' lë'egaca yaga cruz na'.

³² Que lë ni na' gula'biguë'ë bönni' rōjáquië' gudil-la, ate' gula'guítsjē' xiguichjē' bönni' zí'alō, en lësca' caní gulunē' queë' ia'tuë' bönni' na' dá'lenē' Jesús lë'e yaga cruz.

³³ Cate' bila'dxinē' ga na' dē'ë Jesús, en bila'lé'enē' chinátië', bití' gula'guítsjē' xiguichjē'.

³⁴ Ní'irō tuë' bönni' na' reajē' gudil-la bunë'ë yaga tuchi' cuita lë'ë Jesús, ate' la' birúajtē rōn, en nisa.

³⁵ Neda', Juan, bilé'eda' lë ni, en runa' ba nalí que, ate' le runa' ba nalí naca idútē li. Nōz quézida' ruá'a didza' idútē li, para tséajlë'ëli' ca' libí'ili' ca naca queë' Jesús.

³⁶ Gulaca yugu' lë ni para budxín le nazúaj lu guichi lá'ayi, le rnna: "Bití' gatsaj nitú dxita yu'ë."

³⁷ Ia'tú le nazúaj ca' lu guichi rnna caní: "Ulu'yúë' bönni' na' bulu'në'ë lë' yaga tuchi'."

Tu'cáché'ë Jesús

(Mt. 27:57-61; Mr. 15:42-47; Lc. 23:50-56)

³⁸ Gudōdi guca yúgu'tē lë ni, guyijē' José, bönni' yōdzō Arimatea, bönni' dē'ë Jesús, pero bagáchi'sō tu' rádxinē' yugu' bönni' judío unná bē', ate' gunábinē' Pilato gu'ë lë' lataj u'ë Jesús. Pilato bē'ë lë' lataj. Ní'irō bidxinē' José ga na' dē'ë Jesús lë'e yaga cruz, ate' bu'ë Lë'.

³⁹ Lësca' bidxinē' Nicodemo ni', bönni' na' guyijē' zí'alō yōjyúë' Jesús chí'i dzō'ölō, nu'ë tu le nutsí'i nōri silá' que mirra, en tu le rilá' zxixi, le naca ca tu gayuá' guíë'.

⁴⁰ Ní'irō José, en Nicodemo na' gula'guélë'ë Jesús, en bulu'chōlinē' Lë' yugu' lári'do', ate' gula'gu'ë láchuilō lë na' nutsí'i nōri silá' que mirra, en le rilá' zxixi. Gulunē' ca nalébiguequinē' tunē' bönni' judío cate' tu'cáché'ë tu bönni' nati.

⁴¹ Gala' ga na' bulu'dë'ë Jesús lë'e yaga cruz dē tu luyú ga zeaj da' yaga olivo, ate' gatsaj láchuilō lataj na' zoa tu yeru ba cubi le nadaj lë'e guí'a guiōj, yeru ba na' cuntu nu ta'gü'inë'.

⁴² Lu yeru ba na' gula'gu'ë Jesús tu' dē gála'sō yeru ba na', en tu' naca dza tu'pë'ë bönni' judío que Laní Pascua.

20

Rubanë' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

¹ Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guiōjta'a na' busayaj ga nu riyaza yeru ba na'.

² Ní'irö böajnu carelö ga zoë' Simón Pedro, dzáguië' lë' ia'túë' bönni' usëda, bönni' na' Jesús nadxi'inë' lë', ate' rënu légaquië':
—Bulu'béajë' Xanru' yeru ba ni', en biti' nöztu' gazxi gula'gu'ë Lë'.

³ Ní'irö bila'rúajë' Pedro, en ia'túë' bönni' usëda na', söjáquië' ra' yeru ba na'.

⁴ Tsözxön ta'xíti'ë iropë', pero ia'túë' bönni' usëda na' guxíti'rë' carelö ca Pedro, ate' zí'alö lë' bidxinë' ra' yeru ba na'.

⁵ Biyéchuë', en buyúë' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero biti' guyázië' yeru ba na'.

⁶ Ní'irö bidxinë' Simón Pedro cúdzu'lë' ia'túë' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'.

⁷ Lësca' bilé'enë' lári'do' na' gula'xóë' icjë' Jesús, biti' dëlen ia'zica'rö lári'do' na', pero tsölá'alö nudubi quez.

⁸ Ní'irö guyázië' ca' ia'túë' bönni' usëda na' bidxinë' zí'alö ra' yeru ba na', en bilé'enë' ca na' naca, ate' guyéajlë'ë didza' bë'ë Jesús.

⁹ Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti.

¹⁰ Ní'irö iropë' bönni' usëda na' yöjhuöjgaquië' lídxigaquië'.

Rulu'i lahuë' Jesús lonu María Magdalena

(Mr. 16:9-11)

¹¹ Bugá'ananu María ní'ilö ra' yeru ba na', ribödxinu. Tsanni ni' ribödxinu, biyéchunu, buyunu lu yeru ba na'.

¹² Bilé'enu chopë' gubáz lá'ayi queë' Dios ni', nácugaquië' lari' chiguichi. Rö'ögaquië' ni', tuë' ícjälö ba na', en ia'túë' xiní'alö ba na' ga ni' gula'gu'ë Jesús.

¹³ Yugu' gubáz lá'ayi na' të' lënu, ta'nnë':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en biti' nözda' gazxi gula'gu'ë Lë'.

¹⁴ Cate' budxi gunnúnu caní, buécjanu, en bilé'enu-në' Jesús, zoë' ni', pero biti' réquibe'enu Jesús na'.

¹⁵ Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lë' bönni' rapa chí'ë latja na', rënu Lë':

—Bönni', channö li' bu'u-në', gudíxjöi'i neda' gazxi gulú'u-në', ate' neda' u'a-në'.

¹⁶ Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

¹⁷ Jesús rë'ë-nu:

—Biti' canu' neda', tu' cabí ruhuépinida' ga zoë' Xuza'. Na'a, guyéaj ga nacu'ë böchi' luzá'a, ate' yöjödxi-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queëli'."

¹⁸ Ní'irö guyéajnu María Magdalena na', yöjtíxjöi' inu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

Rulu'i lahuë' Jesús lógaquië' bönni' usëda queë'

(Mt. 28:16-20; Mr. 16:14-18; Lc. 24:36-49)

¹⁹ Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxinë' bönni' judío unná bë'. Ní'irö bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

²⁰ Cate' budxi gudxë' légaquië' didza' ni, bulu'inë' légaquië' në'ë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'.

²¹ Ní'irö Jesús rë' légaquië' leyúbölö, rnnë':

—Guli'zóa dxi ládxi'li'. Ca benë' Xuza', gusöl-lë'ë neda', lësca caní risöl-la'a libí'ili' tsöjenli' xichina'.

²² Cate' budxi gunné' caní, bulubë' lógaquië', en rë' légaquië':

—Guli'sí' Dios Bö' Lá'ayi.

²³ Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu biti' uniti loli' le, ugá'ana dul-la' que nu na' nun dul-la'.

Biti' réajlë'ë Tomás

²⁴ Tomás biti' zóalenë' légaquië' cate' Jesús buduyúë' légaquië'. Náquië' Tomás tuë' bönni' chínnuë' ni', en tu'ë ca' lë' Bönni' Bilidi'.

²⁵ Gudödi ni' ia'zica'rë' bönni' usëda na' gulë' Tomás, ta'nnë':

—Chibilé'etu'-në' Xanru'.

Tomás rë' légaquië':

—Channö cabí ilé'eda' në'ë ga gunné' bididaj, en unë'a xibön na'a ga na' guné'gaca bididaj na', en unë'a na'a cuita lë'ë ga na' gunné' yaga tuchi', biti' ca' tséajlë'a.

²⁶ Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, bulu'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

²⁷ Ní'irö Jesús rë' Tomás na':

—Bunë' xibön no'o ni, en buyú na'a ni. Bunë' no'o cuita lë'a ni, en bítirö gaca chopa ládxi'u, pero guyéajlë' neda'.

²⁸ Ní'irö bubi'ë didza' Tomás, rë' Lë':

—Xána'do', en Dios quia'.

29 Jesús rē' lē':

—Tomás, tu' bul'éenu' neda', réajlë'u. Bica' ba nupa ni' ila'yéajlë' neda' sal-la' bití' ila'lé'eni neda'.

Le rē'ëni gun didza' nazúaj lu guichi ni

30 Benë' Jesús zíanrö ca' yöl-la' huáca lógaquië' bönni' usëda queë', le cabí nazúajgaca lu guichi ni.

31 Yugu' lë ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

21

Rulu'i lahuë' Jesús lógaquië' gadxë' bönni' usëda queë'

1 Gudödi guca lë ni, leyúbölö bulu'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' bulu'i lahuë' lógaquië'.

2 Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzö Caná que luyú Galilea, en chopë' bönni' zxí'inë' Zebedeo, en ia' chopë' ca' bönni' usëda queë' Jesús.

3 Simón Pedro rē' légaquië':

—Tseaja' tsöjxöna'-ba' böla.

Të' lë' ia' zíca'rë', ta'nnë':

—Guntu' li' tsözxön.

Ní'irö yójáquië', en gula'benë' tu lë'e bárcodo', ate' rëla ni' nituba' böla bití' gula'zönë'-ba'.

4 Cate' chizá' rení', yöjsóë' Jesús luyú ra' nisa na', pero bití' téquibe'enë' bönni' usëda queë' Jesús Lë' na'.

5 Ní'irö Jesús rē' légaquië':

—Zxí'ina'do', ¿naru' cabí deba' lati' böla queëli'?

Bulu'bi'ë didza', të' Lë':

—Nituba'.

6 Ní'irö Jesús rē' légaquië':

—Guli'chilaj yöxaj böla queëli' tsölá'a ibëla barco, ate' söngacali'-ba'.

Ní'irö gula'chiljë' le, ate' bítirö guca ulu'béajë' le, tu' naguíraba' böla lë'e yöxaj böla na'.

7 Ní'irö bönni' usëda na' nadxí'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, “Xanru' na'”, böácuë' lari' gúcuë', tu' nagúë' le zí'alö, ate' guyázië' lu nisa.

8 Bila'dxinë' ia'zíca'rë' bönni' usëda na', tu'së'ë barco na', suná'ayöjgaquië' yöxaj ga na' dzö'öba' böla, tu' cabí naca zítu' ga dë luyú bidxi. Nácatë ca tu gayuá' löga' ní'aru'.

9 Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla láhuilö, en dë ca' yöta ni'.

10 Jesús rë' légaquië':

—Guli'diguá'a-ba' ni böla na' si' guzxõngacali'-ba'.

11 Gurenë' Pedro lë'e barco na', ate' gú'uyöjë' yõxaj na' zaca' luyú bidxi, nalíró-ba' böla zxõn, idú tu gayuá' yu' chí'inu-unba'. Sal-la' nácacacaba' böla zián, biti' birõza' yõxaj na'.

12 Ní'irõ Jesús rë' légaquië':

—Guli'dá gáguli'.

Biti' burúguinë' nitúë' bönni' usëda queë' na' inábinë' Lë', innë': "¿Nuzxi Li'?" Nõzguequi quézinë' náquië' Xanru'.

13 Ní'irõ gubíguí'ë Jesús, en gudélë'ë yõta na', enca' böla na', ate' bë'ë quégaquië'.

14 Lë ni naca le bunny luzuí buluí'i lahuë' Jesús lógaquië' bönni' usëda queë' gudödi bubanë' lu yöl-la' guti.

Jesús ru'ilenë' Simón Pedro didza'

15 Cate' budxi gulahuë', Jesús rë' Simón Pedro:

—Simón, zxí'inë' Jonás, ¿naru' nadxí'irõnu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nõz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla'do' quia'.

16 Jesús rë' lë' le buropi luzuí, rnnë':

—Simón, zxí'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nõz quézinu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'.

17 Jesús rë' lë' le bunny luzuí:

—Simón, zxí'inë' Jonás, ¿raza ládxa'u neda'?

Buí'innë' Pedro tu' le chibunny luzuí rinabi yúdxinë' lë', gunné': "¿Raza ládxa'u neda'?" Bubi'ë didza' Pedro, rë' Lë':

—Xan, yúgu'të nõz quézinu' Li'. Nõzinu' raza ládxa'a Li'.

Jesús rë' lë':

—Bugagu yugu' bö'cu' zxíla' quia'.

18 Le nácatë rea' li', cate' ni' nacu' ra'bando', rácasõ quiu' bugacu cuinu', en ca gunnásõ quiu' gudó'. Cate' igulu', ulí no'õ, ate' nu yúbölõ ugacu li' lari', en ichë' li' ga ni' biti' guë'ënnu' tseaju'.

19 Yugu' didza' ni bë'ë Jesús naca bë' naca gátie' Pedro, tsöjtë'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia'tú:

—Gudá' neda'.

Ru'ë didza' Jesús ca gaca queë' bönni' usëda na' nadxí'inë'

²⁰ Buécjē' Pedro, en bilé'enē' sōjnáhuē' légaquiē' bönni' usēda na' Jesús nadxí'inē' lē'. Náquiē' bönni' usēda na' gurō'ē cuita lē'ē Jesús cate' ni' gulahuē', en gudxē' Jesús: "Xan, ¿nuzxi na' udōdi Li'?"

²¹ Cate' Pedro bilé'enē' lē', rē' Jesús:

—Xan, ¿bizxi gunē' bönni' ni?

²² Jesús rē' lē':

—Channō rē'ēnda' ugá'anē' bönni' ni ga idxinrō dza huōda', biti' ral-la' cō'u bōniga. Gudá'a neda' li'.

²³ Guzé didza' ni ga nacu'ē böchi'ru' ta'yéajlē'ē Cristo. Téquinē' biti' gátiē' bönni' usēda na'. Jesús biti' gudxē' lē' biti' gátiē', pero caní gunnē': "Channō rē'ēnda' ugá'anē' bönni' ni ga idxinrō dza huōda', biti' ral-la' cō'u bōniga."

²⁴ Bönni' usēda ni naca' neda', Juan. Runa' ba nalí quéguequi lē ni, en nuzúaja' yugu' lē ni lu guichi, ate' nōzili' naca idútē li le runa' ba nalí.

²⁵ Ziánrō ca' le benē' Jesús. Channō nu uzúaj léguequi lu guichi tu tu, rusaca' quia' biti' guequi yōdzōlió ni ila'cuá' guichi na' ral-la' nu uzúaj. Ca' caz.

LE GULUNĒ' BÖNNI' GUBÁZ NASÖL-LĒ'Ē CRISTO Los Hechos

Le guzxí' lu nĕ'ĕ Dios, isöl-lĕ'ĕ Dios Bö' Lá'ayi

¹ Cate' buzúaja' lu guichi zí'alö, quiu' li', Teófilo, neda', Lucas, buzúaja' yúgu'tĕ le gusí lahuĕ' runĕ' Jesús, en rusédinĕ'

² ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguiĕ' Dios Bö' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' gurö cazĕ'.

³ Gudödi gudí'i guzxaquĕ'ĕ Jesús, gútiĕ'. Ní'irö bubanĕ', en buluí'i lahuĕ' lógaquiĕ' gubáz queĕ' na'. Buluí'inĕ' légaquiĕ' zían le gulaca bĕ' zoĕ' nabanĕ', le cabí gaca nu tá'baga'. Zían luzuí buluí'i lahuĕ' lógaquiĕ' idú ca choá' dza, en bĕ'lenĕ' légaquiĕ' didza' ca rinná bĕ'ĕ Dios.

⁴ Cate' ni' nacu'ĕ tsözxön, gunná bé'enĕ' légaquiĕ' cabí ulu'zĕ'ĕ Jerusalén. Jesús gudxĕ' légaquiĕ', rnnĕ':

—Guli'cöz ni' le guzxí' lu nĕ'ĕ Xuza' isöl-lĕ'ĕ queĕ'li' ca na' chibusiyön quezida' libí'ili'.

⁵ Gunnĕ' ca':

—Le nácatĕ Juan buquilĕ' bönachi nisa lu nisa. Na'a bití' tse xidzé gaca queĕ'li' le rulu'í yöl-la' ridila nisa ni, idisóalenĕ' Dios Bö' Lá'ayi libí'ili'.

Ruhuĕpĕ' Jesús yehua' yubá

⁶ Ní'irö yugu' bönni' ta'yéajlĕ'ĕ Jesús, nudúbigaquiĕ' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bĕ' bönachi Israel leyúbölö dza ni zóaru' na'a?

⁷ Jesús gudxĕ' légaquiĕ':

—Bití' nequi queĕ'li' inözili' bizxi dza o bizxi dzö' gunĕ' Dios Xuz le nuzóĕ' lu na' cazĕ'.

⁸ Sí'ili' yöl-la' huáca cate' guidĕ' Dios Bö' Lá'ayi idisóalenĕ' libí'ili'. Ní'irö gunli' ba nalí quia' neda' lu yödzo Jerusalén, en idú luyú Judea, en luyú Samaria, en ga idxíntĕli' idúte yödzo'lió.

⁹ Cate' budxi bĕ'lenĕ' légaquiĕ' didza' ni, tsanni ni' tu'yusĕ' ca' Lĕ', la' buĕpitĕ' xitsá' ga rö'ö tu böaj le bucache' Lĕ', ate' bítí'rö bila'lĕ'enĕ' Lĕ'.

¹⁰ Tsanni ni' tu'yúĕ' lúzxibalö cate' ni' buĕpĕ' Jesús, bulu'lu'í lógaquiĕ' chopĕ' gubáz lá'ayi ga na' nacu'ĕ, nácu'gaquiĕ' lari' chiguíchido'os.

¹¹ Chopĕ' ni gulĕ' légaquiĕ', ta'nnĕ':

—Bönni' Galilea, ¿bizx que ruyuli' lúzxibalö? Lë cazë' Jesús ni si' guzë'ë ga zóali', buëpë' yehua' yubá, lësca' caní huödë' leyúbölö ca na' chibilé'eli'-në' söhuöjé' yehua' yubá.

Ta'böë' Matías para tsázië' xilatjé' Judas

¹² Ní'irö gula'zë'ë ga na' rö'ö gu'ado' na' nazí'i le Gu'á Yaga Olivo, ate' yöjhuöjgaquië' Jerusalén. Gu'ado' ni dë gála'sö ga dë Jerusalén, tsca nazí'gaquië' lataj ta'zë'ë dza lá'ayi quégaquië'.

¹³ Cate' bulu'dxinë' yödzö ni', gula'benë' ga naca buropi cuía lu yu'u, ga ni' ta'cu'ë Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxi'inë' Alfeo, en Simón, bönni' na' ruí'i ládxe'ë ladzë', en Judas, böchë'ë Jacobo.

¹⁴ Yúgu'të bönni' ni tu'lidzë' Dios tsözxön, ate' yugu' böchë'ë Jesús, en María, xinë'ë Jesús, en ia'zica'rönu nigula ca' núngaquië' légaquië' tsözxön.

¹⁵ La' dza ná'asö guzuínë' Pedro gatsaj láhui'lö ga nacu'ë böchi' luzá'aru' na' ta'yéajlë'ë Cristo. Gulaca idú ca xópalalaj bönachi nupa nudúbigaca ni'.

¹⁶ Pedro gudxë' légaquië', rnnë':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunné' Dios Bö' Lá'ayi dza ni'të, le buzúajé' David lu guichi, ca guca queë' Judas, bönni' na' guchë'ë nupa ni' gula'zön Jesús.

¹⁷ Judas na' gubábalenë' rë'u, en bënlenë' rë'u tsözxön dxin ni.

¹⁸ Gula'zí'inë' tu la' yëla lazxaj que dö' na' bi'ë bönni' ni. Judas ni gubixë', en biröza' lë'ë, ate' bila'rúaj yúgu'të le dzö'ö lë'ë.

¹⁹ Cate' bila'yöni bönachi nacuá' Jerusalén lë ni, gulu'ë le la' yëla na' Acéldama, tu didza' hebreo le rna lu didza' xidza': La' Yëla Rön.

²⁰ Caní guca queë' Judas, ca na' nazúaj lu guichi lá'ayi nazí'i le Salmos, le rna:

Ugá'ana cá'asö lidxë',
en bití' idzöli nu soa yu'u na'.

Rna ca':

Nu yúbölö tsaza xilatjé'.

²¹⁻²² Run bayudxi na'a cöru'-në' tu bönni' gunë' rë'u tsözxön para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacuá'lenë' rë'u cate' ni' buquilé' Juan bönachi nisa, ga bidxintë dza buëpë' Jesús yehua' yubá, cate' buzë'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo.

²⁴ Ní'irö bulu'lidzë' Dios, ta'nnë':

—Xantu' Dios, nunbë' casu' icja lãdxi'do'gaca yúgu'të bönachi. Bulufí'netu' nulë' chopë' ni chigurö casu' Li'

²⁵ para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunítië' xilatjë' tu' benë' dul-la', ate' guyijë' xilataj cazë' lataj chul-la.

²⁶ Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzë'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

2

Dios Bö' Lá'ayi ridisóalenë' légaquië'

¹ Cate' chibidxín dza Pentecostés, nudúbigaquië' tsözxön yúgu'të bönni' ta'yéajlë'ë Cristo.

² Tsárido'os biyön bö le birúaj lúzxiba, le biyön ca riyön cate' recja bö' budunu', ate' biyön idútë lu yu'u ga na' rő'ögaquië'.

³ Bulu'lu'í lahui yugu' bululu gu'do' lu bö'ös lógaquië', ate' gula'guísi que queëgaquië'. Bidisóalengaca tu tuë'.

⁴ Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsca naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzö Jerusalén dza na', nácagaquië' bönni' ta'yéaj lãdxi'gaquië' Dios, en zá'gaquië' narúajgaquië' yúgu'të yödzö idútë yödzölió ni.

⁶ Cate' bila'yönnë' bö na', bulu'dubë' bönni' zían, ate' gula'bö'ë böniga, tu' bila'yönnë', ca naca xtídza'gaquië' que queëgaquië', tu'ë didza' bönni' na' ta'yéajlë'ë Cristo.

⁷ Gula'ná' badxë' yúgu'të', en bulu'bánninë, ta'nnë':

—Buli'yútsöca'. ¿Naru' calëga bönni' Galilea yúgu'të bönni' ni tu'ë didza'?

⁸ ¿Nacxi caz naca riyöniru' tu'ë xtídza'ru' ca naca didza' ru'íru' tu turu'?

⁹ Rë'u ni nácaru' bönni' zían yödzö, bönni' narúajgaquië' luyú Partia, en luyú Media, en luyú Elam, en luyú Mesopotamia, en luyú Judea, en luyú Capadocia, en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto, en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazi' lu ná'agaquië' le ta'yéajlë'ë bönni' judío Dios.

11 Lësca' nacu'ë ni yugu' bönni' narúajgaquië' Creta, en luyú Arabia. Riyõniru' tu'ë didza' ru'iru' que queëru', ate' ta'guíxjö'ë yugu' le zxön benë' Dios, le tun ga rubániru'.

12 Caní guca, bulu'báninë yúgu'të', en gula'bõ'ë bõniga. Gulë luzá'agaquië' tuë' ia'túë', ta'nnë':

—¿Bizxi caz lë ni?

13 Bulu'titjë' bal-lë', ta'nnë':

—¡Ta'zúdxinë'!

Libán benë' Pedro lógaca bõnachi zían

14 Ní'irõ Pedro guzuílenë' ia'chinéajë' gubáz na' nasõl-lë'ë Cristo, ate' gusí lahuë' ru'ë zidzaj didza', rë' légaquië':

—¡Libí'ili', bönni' Judea, en yúgu'tëli' nacuá'ali' yõdzõ Jerusalén! ¡Lë ni ral-la' inõzili'! ¡Buli'zë nágali' le guía' libí'ili'!

15 Netu' ni bití' rizúdxitu' ca na' réquili' libí'ili', tu' ni zóaru' sí gala' xsila, ate' cuntú nu rizudxi hora caní.

16 Lë ni naca le gunnë' Joel, bönni' bë'ë didza' uláz queë' Dios, gunnë':

17 Caní rnnë' Dios: Lë ni le gaca dza tsõjsétëgaca.

Isõl-la'a Bö' Lá'ayi quia', tsõjsóalenë' yúgu'të bõnachi.

Zxí'inili', bönni', en nigula, iluí'ibi' didza' uláz quia' neda'.

Yugu' bi'i ra'bán ila'lé'ebi' le ulu'a lahui,

ate' yugu' bönni' gula ila'nenë' yëla.

18 Cate' idxín dza ni' quísia' Bö' Lá'ayi quia',

tsõjsóalenë' huen dxin quia', bönni', en nigula,

ate' ilu'ë didza' uláz quia' neda'.

19 Ulu'a lahui lúzxiba xitsá' le ilún ga ulu'bani bõnachi,

ate' yõdzõlió ulu'a lahui le ilaca bë',

rõn, en guí', en dzõn ca bõaj.

20 Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

21 Ulu'lágaca yúgu'të nupa ni' ulu'lidza Lë' Xanru',

lu yõl-la' réajlë' quéguequi Lë'.

22 'Buli'zë nágali' lë ni guía' libí'ili', bõnachi Israel. Dios caz benë' bal Jesús, bönni' Nazaret ga zóali'. Dios bë'ë Lë' lataj benë' le tun ga rubániru', yugu' yõl-la' huáca, en le taca bë'. Yúgu'të lë na' benë' Dios lu në'ë Jesús, ca na' chinõz quézili'.

23 Lësca' caní, Dios bë'ë lataj nu budõdi Jesús lu ná'ali'. Caní guca, ca na' chigunná lãdxë'ë Dios gunë', en ca naca le chibucõzë' dza ni'te. Libí'i cázali' guzxonli'-në' Jesús, en bëtíli'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz.

24 Ní'irõ Dios caz busubanë' Jesús na'. Bubéajë' Lë' lu yõl-la' guti, tu' cabí guca ugá'anë' tsaz lu yõl-la' guti na'.

25 Ca naca lë ni, bē'ë didza' David uláz queë' Dios ca naca queë' Jesús, gunné':

Bilé'etiqui'sida'-nē' Xanru', zoë' lahua'.

Lë' zoë' cuita lë'a ibëla, rizönē' neda',
para cabí gaca nu bi gun quia'.

26 Que lë ni na' budzeja ládxa'a,
ate' lu yöl-la' rudzeja quia' bil-la'.

Que lë ni na' guna' löza Lë'
cate' idxín dza gátia'.

27 Xantu' Dios, nözda' biti' ucá'anú' neda'
lataj chul-la ga nacuá' nupa nátigaca.

Biti' gu'u lataj initi idútë le naca'.

Naca' bönni' nadxí'i quézinu' Li'.

28 Buzéajni'inu' neda' ca ral-la' guna'
para idéli'da' yöl-la' na'bán idú.

Gunu' ga udzējada' tu' zóalen cazu' neda'.

29 'Na'a, libí'ili', böcha'a. Naca bē' gútiē' xuz xtó'oru' David,
en bigáchē'ë yeru ba, ate' ba queë' na' dē ga zóaru' ga ridxintē
na'a dza.

30 David na' bē'ë didza' uláz queë' Dios, en gunözinē' benē'
tsutsu Dios didza' le guzxi' lu nē'ë queë', gunē' ga galjē' Cristo
ladaj di'a dza queë' si' zá'gaca, ate' Cristo na' inná bē'ë xilatjē'
David na'.

31 Tu' bilé'enē' David lë ni zí'alö, bē'ë didza' ca guca, bubanē'
Cristo, en ca guca, biti' bugá'anē' lataj chul-la ga nacuá' nupa
nátigaca, en biti' guniti le naca cazē'.

32 Dios busubanē' Jesús lu yöl-la' guti, ate' ca guca lë ni
yúgu'tëtu' runtu' ba nalí que.

33 Caní guca, len yöl-la' huáca queë', Dios buchisē' Lë' xitsá'
ga ni' nácatērē' zxön. Na'a, Cristo chigusöl-lē'ë Dios Bö' Lá'ayi
ni, ate' raca ca na' guzxi' lu nē'ë Dios gunē' lu nē'ë Cristo, ate'
Dios Bö' Lá'ayi na' runē' yugu' lë ni rilé'eli', en riyönili'.

34 Biti' buëpē' David na' yehua' yubá, pero lë cazē' David na'
gunné':

Xanru' Dios gudxē' Xana':

Gurö'i cuita lë'a ibëla ga naca lo

35 cate' gunra' ga ulu' zechu zxíbigaca nupa ta'dá'baga' Li' lo' Li'.

36 'Na'a, bönachi Israel, ral-la' inözili' le nácatë. Dios benē'
ga náquiē' Lë' cazē' Jesús ni Xanru', en Bönni' Rusölá, bönni' na'
budá'ali'-nē' lë'e yaga cruz.

37 Cate' yugu' bönni' ni' bila'yönnē' lë ni, gula'bö'ë böniga, ate'
gulē' Pedro, en ia'zica'rē' bönni' gubáz queë' Cristo, ta'nnē':

—Böchi'ru', ¿nacxi gúntsatu'?

38 Ní'irö Pedro gudxē' légaquiē':

—Buli'bí'i ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bõ' Lá'ayi idisóalenë' libí'ili', Nu na' isõl-lë'ë Dios.

³⁹ Queëli' nequi le guzxi' lu në'ë Dios, en quégaca zxi'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

⁴⁰ Yugu' didza' ni, en ia'bal-la zían didza' benë' ba nali Pedro, le guchízië' icja nágagaquië', gunnë':

—Guli'gún ga uláli', irúajli' ladjagaca bönachi tuá' dö' nacuá' dza ni zóaru' na'a.

⁴¹ Caní guca, gula'dila nisa nupa ni' gula'zì' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz.

⁴² Gulunë' yúgu'të' idútë le bulu'sédinë' gubáz nasõl-lë'ë Cristo légaquië'. Guláquië' tuz tuë' len ia'tuë', en gulahuë' tsõzxõn le rusá' ládxi'ru' ca gútië' Jesús, ate' gulunë' tsõzxõn, bulu'lidzë' Dios.

Ca tun bönachi queë' Cristo

⁴³ Gulunë' gubáz queë' Cristo zían le run ga rubániru', en zían le taca bë', pero guladxi gula'dzõbi ia'zica'rõ bönachi.

⁴⁴ Yúgu'të nupa na' ta'yéajlë' Cristo gulaca tuz, ate' bulu'ún tuz yúgu'të le dë quéguequi.

⁴⁵ Cate' bila'lé'enë' ta'yadzaj nupa nútsa'gaca ladjagaquië', ní'rõ yugu' bönni' bi dë quégaquië' gulúti'ë le, ate' gula'guisië' dumí na' que queégaca nupa ni' bi ta'yadzaj.

⁴⁶ Bulu'dubë' tsõzxõn chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsõzxõn, ate' bulu'dzéjanë', en gulaca idú ládxi'gaquië'.

⁴⁷ Gula'gu'ë Dios yõl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

3

Ruhuõáquië' tu bönni' biti' raza së'ë

¹ Tu dza ni' gula'benë' Pedro, en Juan, sõjáquië' tsõzxõn lu chila yudo', cate' tu'dubi bönachi tu'lidza Dios ni', le naca idú ridõdi xihuõ.

² Ga ni' ta'dödë' zoë' tu bönni' biti' raza së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí'i le Ra' Yu'u Lachi, para inábinë' nu bi unõdzjasõ queë' ladaj nupa ni' ta'yaza lõ'a yudo'.

³ Bönni' ni, cate' bilé'enë' Pedro, en Juan, sõjáquië' ta'yázië' lõ'a yudo', gúta'yuë' lógaquië' bi ulu'nõdzjasë' queë'.

⁴ Ní'irõ bulu'yúë' Pedro, en Juan lë', ate' Pedro gudxë' lë':

—Buyú netu’.

⁵ Ní’irö bönni’ na’ buzëda’ náguië’ légaquië’ tu’ runë’ löza bi ulu’nödztasë’ queë’.

⁶ Pedro gudxë’ lë’:

—Biti’ dë dumí plata, dumí oro quia’, pero le dësö quia’ gunna’ quiu’. Ni’a que yöl-la’ huáca que Lë’ Jesucristo, bönni’ Nazaret, guyasa, en guzë’e.

⁷ Ní’irö gudélë’ë Pedro në’ë ibëla bönni’ huë’ na’, en buchisë’ lë’, ate’ la’ böácatë ni’ë, en buguitaj bëchaj ni’ë bönni’ na’.

⁸ Ní’irö guzuínë’ bönni’ na’, ate’ guxíti’ë, en guzë’ë. Guyázalenë’ tsözxön Pedro, en Juan, lö’a yudo’, rizë’e ni’ë, en rixíti’ë, en rigü’ë Dios yöl-la’ ba.

⁹ Yúgu’të bönachi nacué’ ni’ ta’lé’e lë’ rizë’e ni’ë, en rigü’ë Dios yöl-la’ ba.

¹⁰ Caní guca, guládxinë’, en bulu’báninë ca naca lë na’ guca, tu’ bulu’únbë’ë lë’, náquië’ bönni’ na’ ribö’ë ra’ yudo’ ga nazí’i le Ra’ Yu’u Lachi, rinabë’ nu bi unödztasö queë’.

Didza’ bë’ë Pedro chila yudo’

¹¹ Tsanni ni’ bönni’ na’ biti’ guca së’ë, ate’ böáquië’, zönë’ ná’agaquië’ Pedro, en Juan, bulu’dubi yúgu’të bönachi ga na’ nacü’ë chila yudo’ nazí’i le: Chila Queë’ Salomón, ate’ gula’ná’ badxë’.

¹² Cate’ bilé’enë’ Pedro lë ni, gudxë’ bönachi na’:

—Libi’ili’, bönni’ Israel, ¿bizx que rubánili’ ca naca lë ni? ¿Bizx que ruyuli’ netu’, en réquitseli’ nétu’sö buntu’-në’ bönni’ ni, en bentu’ ga rizë’e ni’ë len yöl-la’ huáca queëztu’, o ni’a que le reaj ládxi’tu’-në’ Dios?

¹³ Naca lë ni le benë’ Dios. Náquië’ Dios quégaquië’ xuz gudödi queëru’ Abraham, en Isaac, en Jacob. Lë cazë’ bëntërë’ bal Jesús, Zxí’inë’. Jesús ni, libí’i cázali’ bëtili’-në’ lu ná’agaquië’ bönni’ ta’nná bé’enë’ libí’ili’. Cate’ gü’unnë’ Pilato usanë’ Jesús, gudá’baga’li’-në’.

¹⁴ Buzóali’ tsölá’alö Bönni’ Tsahui’, en Lá’ayi, ate’ gunábili’-në’ Pilato usanë’ queëli’ tu bönni’ rútië’ bönachi.

¹⁵ Caní guca, bëtili’-në’ Bönni’ runna cazë’ yöl-la’ na’bán idü queëru’. Ní’irö Dios busubanë’ Lë’ lu yöl-la’ guti, ate’ ca naca lë ni runtu’ ba nalí que.

¹⁶ Tu’ guyéajlë’ë bönni’ ni Jesús, böáca ni’ë. Rilé’eli’-në’, en núnbë’ëli’-në’. Tu’ réajlë’ë Jesús, Lë’ bunë’ dxí’ado’ bönni’ ni, ate’ rilé’eli’ yúgu’tëli’ le nácatë na’.

¹⁷ Na’a, böcha’a, nözda’ benli’ caní, bëtili’-në’ Jesús tu’ cabí guyéajni’ili’, en biti’ gula’yéajni’inë’ bönni’ ta’nná bé’enë’ libí’ili’.

¹⁸ Caní busudxinë’ Dios didza’ na’ bë’ë zí’alö, le gula’nnë’ bönni’ gulu’ë didza’ uláz queë’ ca ral-la’ qui’i sáquë’ë Cristo.

19 Que lë ni na', buli'bí'li ládxi'li', en buli'huóáca queë' Dios, para ugüë' dul-la' nabága'li', en gunë' ga huóáca ládxi'li'.

20 Ní'irö isöl-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rô queë', Bönni' na' inná bé'enë' libí'ili'.

21 Na'a, run bayudxi ugá'anë' yehua' yubá ni' cate' idxinrö dza uduhuénë' tsahui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te.

22 Lësca' caní Moisés gudxë' xuz xtó'oru', gunnë': "Xanru' Dios isöl-lë'ë queëli' tu bönni' galjë' ládjagaca di'a dza queëli'. Gáquië' bönni' gu'ë didza' uláz queë' Dios. Isöl-lë'ë Lë' queëli' ca na' gusöl-lë'ë neda'. Run bayudxi uzë' nágali'-në' ca naca yúgu'të le guié' libí'ili'.

23 Yúgu'të nupa biti' ulu'zë' nágagaca bönni' ni' gu'ë didza' uláz queë' Dios ila'niti, en ulu'lá'alen bönachi queë' Dios."

24 'Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'.

25 Libí'ili' nácali' zxí'ini xi'sóagaquië' bönni' gulu'ë didza' uláz queë' Dios, ate' nequi queëli' didza' rucá'ana tsahui', le bënlenë' Dios xuz xtó'oru', cate' ni' gudxë' Abraham: "Ni'a que le gunë' zxí'ini xi'sú' ilaca bica' ba yúgu'të bönachi yödzülió."

26 Cate' Dios busubanë' Zxí'inë' lu yöl-la' guti, gusöl-lë'ë Lë' zí'alö queëli' para gunë' ga gácali' bica' ba, en ucá'anali' le cabí naca dxi'a runli'.

4

Ta'dxinë' Pedro, en Juan lógaquië' bönni' yudo' tu'chi'a tu'söröë'

1 Tsanni ni' bönachi na' tuí'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsárido'os ga na' nacu'ë.

2 Gula'lenë' bönni' ni tu' tu'sédinë' Pedro, en Juan, bönachi, en të' léguequi ulu'bán nupa chinátigaca tu' bubanë' Jesús.

3 Ní'irö gula'zönë' Pedro, en Juan, ate' gula'gu'ë légaquië' lidxi gué' ga idxinrö dza yúbölö tu' chiridzö' dza na'.

4 Zían nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' biguiú'sö ta'yéajlë'ë Cristo ná'agaquië' idú chi-un gáyu'ë.

5 Dza buropi ni', yugu' bönni' unná bë', en bönni' gula tu'zéajni'inë' bönachi judío, en yugu' bönni' yudo' usëdi, bulu'dübë' lu yödzü Jerusalén.

⁶ Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'.

⁷ Ní'irö duchë'gaquië' Pedro, en Juan, ate' bulu'sudxinë' légaquië' gatsaj láchui'lö ga na' nacu'ë, en gula'nábinë' légaquië', ta'nnë':

—¿Bizxi yöl-la' unná bë' dë lu ná'ali' runli' lë ni? ¿Nuzxi budödi lu ná'ali' yöl-la' unná bë' ni?

⁸ Ní'irö Pedro gudxë' légaquië', zóalenë' Dios Bö' Lá'ayi lë', rnnë':

—Libi'ili', núlöli' rinná bé'eli' netu', bönachi Israel, en libí'ili', bönni' gula.

⁹ Na'a, ¿rinábitseli' netu' ca naca dxin dxi'a bentu' queë' bönni' huë' ni, en nacxi guca, böáquië' bönni' ni?

¹⁰ Riguíxjöi'itu' libí'ili' para ila'nözi yúgu'të bönachi Israel. Zoë' bönni' ni loli', nuhuöáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti.

¹¹ Dios bë'ë didza' ca naca queë' Jesús ni, cate' ni' gunné': "Libí'ili', bönni' rucua'ali' zö'ö, gurú'unali' guiöj na', pero gurö caza' neda' guiöj na' para gaca guiöjlen zö'ö."

¹² Cúnturö nu zoa nu gaca usölá bönachi, tu' cabí zoa yödzölió ni ia'túë' bönni' nuzöë' Dios, nu gaca usölá rë'u.

¹³ Cate' bila'lé'enë' nácagaquië' rugu ladxi' Pedro, en Juan, en guléquibe'enë' biti' nazédagaquië' que yudo', en nácagaquië' bönni' cá'asö, bulu'bábinë', ate' yöjnéguequinë' Pedro, en Juan na', gula'cuá'lenë' Jesús.

¹⁴ Lësca' bila'lé'enë' bönni' na' böáquië', zuínë' lógaquië', ate' biti' guca bi ila'nnë' quégaquië'.

¹⁵ Ní'irö gula'nná bé'enë' nupa ulu'béaj légaquië' ló'alö yu'u ga na' nudúbigaquië', ate' gulún xtidzë'ë la' légacasë'.

¹⁶ Gula'nnë':

—¿Nacxi gúntsaru' quégaquië' bönni' ni? Le nácate' gulunë' tu le run ga tu'bani bönachi, ate' nözigaca yúgu'të bönachi nacua' Jerusalén lë ni. Biti' gaca tá'baga'ru' le.

¹⁷ Na'a, para cabí sërö didza', en ila'yöni ziánrö ca' bönachi, uzeru' bach légaquië' para cabí iluí'ilenrë' bönachi didza' ca naca queë' Jesús na'.

¹⁸ Ní'irö bulu'lidzë' Pedro, en Juan, ate' bulu'zenë' bach légaquië' para cabí iluí'ilenrë' bönachi didza', en para cabí ulu'sédinë' légaquië' ca naca queë' Jesús.

¹⁹ Ní'irö bulu'bi'ë didza' Pedro, en Juan. Gulë' légaquië':

—Buli'chi'a buli'sörö libí'ili' channö naca tsahui' lahuë' Dios uzërö nágatu' xtidza'li' libí'ili' ca xtidzë'ë Dios.

²⁰ ¡Biti' gaca soa dxitu'! ¡Run bayudxi gü'itu' didza' que le bilé'etu', en le biyönitu'!

21 Ní'irō yugu' bōnni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzölinë' nacxi ilunë' légaquië' xíguia'. Caní gulunë' tu' guládxinë' le ilún bōnachi lu yödzo ní', tu' ta'gú'u Dios yöl-la' ba ni'a que lë na' guca.

22 Bōnni' na' böáquië', en guca queë' lë na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

23 Cate' bōnni' yudo' bulu'sanë' Pedro, en Juan, böajgaquië' ga na' nacu'ë luzá'agaquië', ate' bulu'siyönnë' légaquië' yúgu'të lë na' gula'nnë' yugu' bixúz unná bë', en bōnni' gula tu'z'éajni'inë' bōnachi judío.

24 Cate' bila'yönnë' lë ni, bulu'lidzë' Dios tsözxön, gula'nnë':

—Xantu' Dios, ¡zxöntërö nacu' Li'! ¡Li' nacu' Dios! ¡Benu' lúxiba! ¡Benu' luyú! ¡Benu' nísado! ¡Benu' yúgu'të le nacua' tu tu lataj na'!

25 Uláz quiu' Li' bë'ë didza' David, bōnni' huen dxin quiu', ni zóalenë' Dios Bö' Lá'ayi lë', gunnë':

¿Bizx que tun dzatsa bōnachi,
en ta'zá' ládxi'gaca le ruá' dö'?

26 Yugu' bōnni' ta'nná bë'ë yödzo'lió ni gulún dzatsë',
ate' guláquië' tuz bōnni' unná bë'.

Gula'dá'báguë'ë Xanru' Dios,
enca' Cristo, bōnni' gurö cazë' Lë'.

27 'Le nácatë guláquië' tuz Herodes, en Poncio Pilato, en yugu' bōnni' izá'a, en yugu' bōnni' Israel lu yödzo ni. Gula'dá'báguë'ë Jesús, Zxí'inu' lá'ayi, Bōnni' na' buzú' queëtu'.

28 Gulunë' yúgu'të le bucözu' zí'atélö, en guzxí' lu no'o, ate' guca ca na' benu' tsutsu xtídz'u ca ral-la' gaca.

29 Na'a, Xantu', buyú' le tu'zenë' bach netu', en ben ga gácatu' rugu ladxi', para güi'itu' xtídz'u, netu' bōnni' huen dxin quiu'.

30 Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gúngacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'inu' lá'ayi, netu'. ¡Ca' gaca!

31 Cate' budxi bulu'lidzë' Dios, guzxizi lataj ga na' nacu'ë, ate' Dios Bö' Lá'ayi guzóalenë' yúgu'të', ate' len yöl-la' rugu ladxi' quégaquië' gulu'ë xtídzë'ë Dios.

Tu'únë' tuz le dë quégaquië'

32 Bōnachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunnë' nu bōnni' nútsë'ë ládjagaquië' nequi queëzë' le dë queë', pero bulu'únë' tuz le dë quégaquië'.

³³ Len yöl-la' huáca zxön gula'guíxjö'ë gubáz na' nasól-lë'ë Xanru' Jesús ca bubanë' Lë', ate' le buzá' lãdxë'ë Dios quégaquië' gúcalen yúgu'të'.

³⁴ Cuntu nu bi biyadzaj nu nutsa' lãdjagaquië'. Caní guca tu' yúgu'të bönni' zoa bi dë quégaquië', xiyúgaquië', o lãdxigaquië', gulúti'ë le, ate' dumí que na' yöjuá'gaquië',

³⁵ en bulu'dödë' le lu ná'agaquië' gubáz na' nasól-lë'ë Cristo, ate' légaquië' gula'guísië' le que queégaca nupa bi biyadzaj quéguequi.

³⁶ Zoë' José ni', bönni' bulu'zóë' gubáz na' nasól-lë'ë Cristo ia'tú lë' Bernabé, le rnna lu didza' xidza', Bönni' Ruhuë Tsáhuë'ë. Nabábalenë' zxí'ini xi'sóë' Leví, en guljé' luyú Chipre.

³⁷ Bëti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasól-lë'ë Cristo.

5

Dul-la' gulunë' Ananías, en Safira

¹ Tu bönni' yúbölö lë' Ananías, bëti'ë tu cö' xiyúë'. Safira, nigula queë', bennu tsözxön lë'.

² Ananías na' bucachi' lanë' late' dumí que yu na', ate' nözinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasól-lë'ë Cristo. Rnnë':

—Tsca nisö guzxi'a.

³ Pedro gudxë' lë':

—Ananías, ¿naru' guyázatsö Satanás tu' xihui' lu icja lãdxi'do'ö, en ben ga rízí' yé'enu' Dios Bö' Lá'ayi, ate' bucachi' lanu' late' dumí que xiyú' na'?

⁴ Tsanni ni' nagá'ana yu na' lu no'ö, ¿naru' cabí nequi quez quiu'? Gudödi bëti'u le, ¿naru' cabí dë caz lu no'ö dumí que na'? ¿Bizx que gurö'ö icju' gunu' caní? Dios caz guzxi' yé'enu', calégasö bönnachi.

⁵⁻⁶ Cate' biyönnë' Ananías didza' ni, gudzö'ë, en gútité'. Ní'irö gula'bíga'tëbi' bi'i ra'bán, ate' bulu'chölibi' lë' lari', en guluá'abi' lë', en yöjçáchi'gacabi' lë'. Guladxi gula'dzöbi yúgu'të nupa ni' bila'yöni ca guca lë ni.

⁷ Ca tsonna hora gudödi ni', bidxinnu nigula queë' Ananías na' ni', en bití' nözinu lë na' guca queë' bönni' queënu.

⁸ Ní'irö Pedro gudxë'-nu:

—Gudíxjö'i' neda'. ¿Naru' guzxi'ili' tsca nisö xiyuli' na'?

Gunnánu:

—Ön, tsca nisö guzxi'itu'.

⁹ Ní'irö Pedro gudxë'-nu:

—¿Bizx que ben tuz xtídza'li guzxi' bē xíhui'li Dios Bō Lá'ayi? Buyútsöca'. Chizóa ulu'dxinbi' yugu' bi'i bulu'cáchi'bi'nē bōnni' quiu', ate' ulu'béajbi' ca' li'.

10 Ní'irō la' gudzō'tēnu xini'ē Pedro, en gútitēnu. Cate' gula'yázabi' bi'i ra'bán na', gula'lé'ebi'-nu chinátinu. Ní'irō bulu'béajbi'-nu, en yōjcáchi'gacabi'-nu cuita lē'ē bōnni' queēnu.

11 Que lē ni na' guladxi gula'dzōbi yúgu'tē bōnachi queē' Dios, ate' guladxi ca' yúgu'tē nupa bila'yōni ca guca lē ni.

Tunē' bōnni' gubáz nasōl-lē'ē Cristo le taca bē'

12 Gulunē' bōnni' gubáz na' nasōl-lē'ē Cristo zían le taca bē', en zían yōl-la' huáca zxōn lógaca bōnachi lu yōdzō. Yúgu'tē' bulu'dubē' tsōzxōn ga naca chila yudo' nazí'i le Chila Queē' Salomón.

13 Lada'j nupa ni' biti' ta'yéajlē' Cristo, cuntu nu burugui tsōjtá' légaquiē', ate' bōnachi lu yōdzō ni' gulún légaquiē' bal.

14 Ní'irō ia'bal-la bōnachi zían ca' gula'yéajlē' Cristo, bōnni', en nigula.

15 Cate' bila'lé'e bōnachi yugu' le tunē' bōnni' ni' ta'yéajlē'ē Cristo, yōjuá'agaca nupa te'e gapa naca la' nōza, ate' gula'xóē' léguequi lu da'a yaga, en ia'bal-la lu dá'asō, para cate' tōdē' ni' Pedro, tsa zxúl-lasō queē' cu'u zxul-la bal-la bōnachi huē' na', para ulu'huōáca.

16 Lēscá' bila'rúaj bōnachi yugu' dzaga yōdzō, en bila'dxín Jerusalén, nuá'agaca nupa te'e, en nupa ta'gu'i ta'zaca' tu' yú'ugaca bō' xihui' léguequi, ate' bulu'huōáca yúgu'téguequi.

Bōnni' yudo' ta'bía lādxi'gaquiē' bōnni' gubáz nasōl-lē'ē Cristo

17 Que lē ni na' bixúz lo, en bōnni' yudo' saduceo na' dá'gaquiē' bixúz lo, bulu'zxé'enē' Pedro.

18 Ní'irō bixúz lo na', en bōnni' na' dá'gaquiē' lē' gula'zōnē' gubáz na' nasōl-lē'ē Cristo, ate' gula'gu'ē légaquiē' lidxi guíē'.

19 Ní'irō bidxinē' gubáz lá'ayi queē' Xanru' chi'i dzō'ölō, ate' gusaljē' lidxi guíē' na', en bubéajjē' légaquiē'.

20 Gubáz lá'ayi na' gudxē' légaquiē', rnnē':

—Guli'tséaj, guli'tsōjsóa chila yudo', en guli'tsōjē'len bōnachi ni' didza', quíxjōi'ili' légaquiē' ca naca yōl-la' na'bán idú ni, en ca gaca ila'déli'nē' le.

21 Cate' bila'yōnnē' didza' ni ru'ē gubáz lá'ayi na', gula'yáziē' chila yudo' cate' za' reni' zílado', en bulu'sédinē' bōnachi.

La' ní'isō bulu'dubē' bixúz lo, en nupa nacuá'len lē' tsōzxōn, len bōnni' yudo' tu'chi'a tu'sörōē', en bōnni' gula tu'zéajni'inē' bōnachi Israel, ate' gula'sōl-lē'ē nupa tsōjaca lidxi guíē' para tsōjxi'gaquiē' yugu' gubáz na' nasōl-lē'ē Cristo, tu' téquinē' ni' nacu'ē lidxi guíē' na'.

22 Cate' ni'a ná'agaquië' bönni' yudo' na' bila'dxinë' ni', biti' yöjxáca'gaquië' légaquië' lu yu'u lidxi guië' na', ate' ní'irö bulu'huöajë' tsöjtíxjö'gaquië' ca'.

23 Gulë' bönni' yudo' tu'chi'a tu'söröë' na', ta'nnë':

—Le nácatë yöjxáca'tu' nayáyajtë lidxi guië, ate' nacua' nupa tun chi'i ra' lidxi guië na', pero cate' gusalajtu', cuntu nu yöjxáca'tu' lu yu'u na'.

24 Cate' bixúz lo, en yugu' bixúz unná bë', en bönni' nacua' lu në'ë ni'a ná'agaca bönachi yudo', bila'yönnë' didza' ni, gula'bö'dë'ë böniga tu' cabí nöziguequinë' bizxi guntë lë na' raca.

25 Ní'irö bidxinë' tu bönni' ni', en gudíxjöi'inë' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi guië nacu'ë chila yudo' tu'sédinë' bönachi.

26 Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' lë' ni'a ná'agaquië' na', ate' gula'chë'ë yugu' gubáz na' nasöl-lë'ë Cristo, pero biti' bi gulunë' quégaquië', tu' guládxinë' ulu'ládxí' bönachi nacua' ni' légaquië' guiöj.

27 Cate' chinachë'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

28 —¿Naru' cabí gúdxida'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idútë yödzö Jerusalén, en ré'ënili' usubága'li' netu' xíguia' tu' nözi yöl-la' guti queë' bönni' na'.

29 Ní'irö bulu'bi'ë didza' Pedro, en ia'zica'rë' gubáz na' nasöl-lë'ë Cristo, ta'nnë':

—Run bayudxi uzërö ná'gatu' xtídzë'ë Dios ca xtídzá'gaca bönachi.

30 Libí'ili' bëtili'-në' Jesús cate' ni' budá'ali'-në' lë'e yaga cruz, pero Dios quégaquië' xuz xtó'oru' busubanë' Lë'.

31 Jesús ni, Dios buzóa cazë' Lë' ga nayépisëtërë' cuita lë'ë ibëla, para gáquië' Bönni' Lo, en Bönni' Rusölá, en gunë' ga ulu'bí'i ládxi'gaca bönachi Israel, para gaca uniti lahuë' dul-la' nabága'gaquië'.

32 Ca naca lë ni, runtu' netu' ba nalí que, ate' lësca' runë' Dios Bö' Lá'ayi ba nalí que, Bö' na' risöl-lë'ë Dios quégaca nupa tun ca rnna xtídzë'ë.

33 Cate' bila'yönnë' bönni' yudo' tu'chi'a tu'söröë' na' lë ni, gula'lenë', en gulë'ënnë' ilútië' légaquië'.

34 Ní'irö guzuinë' tu bönni' yudo' ruchi'a rusöröë' lógaquië', lë' Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun lë' bal. Gudxë' nupa na' ulu'béaj yugu' gubáz na' nasöl-lë'ë Cristo lö'alö tu chí'ido'.

³⁵ Ní'irö gudxë' bönni' yudo' tu'chi'a tu'söröë' na', gunné':

—Libi'ili', bönni' Israel, buli'yutëz queëli' ca naca le rë'ënili' gunli' quégaquië' bönni' ni.

³⁶ Ral-la' tsöjnëli' ca guca zí'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayëpisëtërë'. Guláquië' bönni' yöjtá'gaquië' lë' idú tapa gáyu'ë bönni'. Yugu' bönni' röjáquië' gudil-la gulútië' lë', ate' gulásilasi yúgu'të nupa ni' yöjtá'gaca lë', ate' gunítisö ca' yúgu'të le benë' bönni' na'.

³⁷ Gudödi guca lë ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guízxaj lázagaquië', ate' yöjtá'gaca bönachi zían lë'. Lësca' gulútië' bönni' ni, ate' gulásilasi yúgu'të nupa ni' yöjtá'gaca lë'.

³⁸ Que lë ni na' rea' libi'ili': Guli'sán-gaquië' bönni' ni, en biti' bi gunli' quégaquië'. Channö naca quégacasö bönachi lë ni ta'nnë' o lë ni tunë', initi caz,

³⁹ pero channö naca queë' Dios, biti' gaca usunítili' le. ¡Buli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len lë'. Bulu'lidzë' yugu' gubáz na' nasöl-lë'ë Cristo, ate' gula'guinë' légaquië', en bulu'zenë' légaquië' bach para cabirö ilu'ilenë' bönachi didza' ca naca queë' Jesús. Ní'irö bulu'sanë' légaquië'.

⁴¹ Bila'rúajë' gubáz na' nasöl-lë'ë Cristo lógaquië' bönni' yudo' tu'chi'a tu'söröë' na'. Tu'dzëjanë' tu' bë'ë Dios légaquië' lataj gula'gu'i gula'záquë'ë tu' dá'gaquië' Jesús.

⁴² Yugu' dza bulu'sëditiqúi'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

6

Ta'böë' gadxi bönni' para ilácalenë' bönachi queë' Cristo

¹ Dza ni', tu' gula'yán bönachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntú nu ru'í le ilágunu nigula uzëbi quégaquië' bönni' ni' tu'ë didza' griego.

² Ní'irö idxínnutë' bönni' gubáz na' nasöl-lë'ë Cristo bulu'tubë' yúgu'të bönachi ni' ta'yéajlë' Cristo, ate' tē' légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönachi.

³ Que lë ni na', böchi' luzá'atu', guli'cö gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönachi légaquië' bal, en nácagaquië' bönni' ta'yéajni'i, en naca bë' Dios Bô' Lá'ayi zóalenë' légaquië'.

⁴ Netu' ni ulídzatica'stu'-nē' Dios, en uséditu' bönachi xtídzē'ē Dios.

⁵ Yúgu'tē' gula'yaza ládxi'gaquiē' didza' ni, ate' gula'böē' Esteban, tu bönni' réajlē'ē Cristo idú ládxi'ē, en zóalenē' Dios Bö' Lá'ayi lē'. Lësca' gula'böē' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquía, bönni' zí'aló butsé'ē ca runē' para tseaj ládxi'ē Dios ca tunē' yugu' bönni' judío.

⁶ Ní'irö bulu'sudxinē' bönni' na' gula'böē' lógaquiē' gubáz na' nasöl-lē'ē Cristo. Yugu' bönni' gubáz na' gula'xóa ná'agaquiē' légaquiē', ni' tu'lidzē' Dios.

⁷ Guzërö xtídzē'ē Xanru', ate' gula'yanda' bönachi ta'yéajlē' Cristo nacua' Jerusalén. Lësca' zían bixúz judío gula'zí' lu ná'agaquiē' le réajlē'ēru' Cristo.

Ta'zönē' Esteban

⁸ Esteban na' benē' le tun ga rubániru', en yugu' le taca bē' lógaca bönachi lu yödzö, zóalen yöl-la' huáca queē' Dios lē' le buzá' ládxi'ē queē'.

⁹ Ní'irö gula'yasē' bal-lē' bönni' nabábagaquiē' yu'u ga tu'dubē' bönni' judío, en tu'sedē' queē' Dios, nazí'i le Yu'u Quégaquiē' Bönni' Nadzángaqiē'. Bönni' narúajgaquiē' yödzö Cirene, en yödzö Alejandría, en luyú Cilicia, en luyú Asia, gulunē' légaquiē' tsözxön. Bönni' ni gula'díl-lalenē' Esteban didza'.

¹⁰ Biti' guca tá'baga'gaquiē' didza' ru'ē Esteban na', tu' bē'ē didza' len yöl-la' réajni'i, tu' zóalenē' Dios Bö' Lá'ayi lē'.

¹¹ Ní'irö gula'guíxjē' bönni' ila'zí' yē'ē, ila'nnē': "Netu' biyönitu' didza' ru'ē Esteban ni, rnnē' zī'ē queē' Moisés, en queē' Dios."

¹² Caní guca, bönni' ni gula'gu'ē xilá ládxi'gaca bönachi, tsözxön len bönni' gula tu'zéajni'inē', en yugu' bönni' yudo' usēdi. Yúgu'tē bönni' ni gula'bía di'ē Esteban na'. Gula'zönē' lē', en gula'ché'ē lē' lógaquiē' bönni' yudo' tu'chi'a tu'söröē'.

¹³ Lësca' bulu'cu'ē lógaquiē' nupa gula'guíxjö' le cabí nácatē, bönni' na' gula'nnē':

—Biti' zoē' dxisö bönni' ni rnnē' zī'ē que yudo' lá'ayi ni, en que xibá queē' Dios.

¹⁴ Biyönitu' didza' bē'ē bönni' ni ca gunē' Jesús, bönni' Nazaret, rnnē' usunítiē' yudo' ni, en utsē'ē yugu' le nalébiru' runru', yugu' lē na' gunná bé'enē' Moisés rē'u.

¹⁵ Ní'irö bönni' yudo' tu'chi'a tu'söröē', en yúgu'tē nupa rō'gaca ni' bulu'yúē' Esteban, ate' bila'lē'enē' lahuē', rna' ca rna' lahuē' tu gubáz lá'ayi queē' Dios.

7

Didza' bē'ē Esteban, le gunnē' uláz queē'

1 Ní'irō bixúz lo gunábinē' Esteban na', rnnē':

—¿Naru' nácatē caní?

2 Bubi'ē didza' Esteban, rnnē':

—Libi'ili', bōnni' gula, en libí'ili', bōcha'a. Buli'zē nágali' le guía' libí'ili'. Dios, Bōnni' nayēpisētērē', bulu'í lahuē' ga zoē' Abraham, xúziru' gudōdi, cate' ni' zoē' luyú Mesopotamia, cate' si' tsōjsóē' yōdzō Harán.

3 Dios gudxē' lē': "Birúaj ladzu', en bulá'alēn di'a dza quiu', atē' guyéaj luyú ni' ulu'ida' li'."

4 Ní'irō birúajē' Abraham luyú Mesopotamia le naca xiyúgaca bōnachi Caldea, atē' yōjsóē' yōdzō Harán. Lu yōdzō ni' gútiē' xuzē' Abraham na', atē' lē' buzē'ē ni', atē' Dios guchē'ē lē' luyú ga ni' zóaru' na'a.

5 Dios biti' bē'ē lē' lataj guequi queē' luyú ni. Calēga láti'sō bunōdzjē' queē' ga soē' luyú ni, pero guzxi' lu nē'ē Dios unōdzjē' queē' luyú ni, atē' tōdi gátiē' Abraham guequi luyú ni quégaca xzí'ini xi'sóē', sal-la' biti' nacuí'nibi' bi'i queē'.

6 Lēscá' caní Dios gudxē' Abraham: "Tsōjajúqiē' xzí'ini xi'sú' lu xiyúgaca bōnachi izá'a, atē' ni' ilácagaquiē' ca bōnachi zi'tu'. Ilunē' bōnni' luyú ni' ga ilácagaquiē' xzí'ini xi'sú' bōnni' nadó'ogaquiē'. Ulu'saca' zi'ē' légaquiē' idú ca tapa gayuá' iz."

7 Lēscá' Dios gudxē' lē': "Neda' uzōtja' bōnachi luyú ni', ga ni' ilácagaquiē' xzí'ini xi'sú' bōnni' nadó'ogaquiē', atē' tōdi ni' ulu'rúajē' ni', atē' ilunē' xichina' luyú ni."

8 Dios bēnlenē' Abraham tu didza' rucá'ana tsahui', en gunná bē'enē' lē' ichúguiē' lu xipēla'gaquiē' bōnni' biguíu' nacué' lidxē' tu le gaca bē' nazí' lu ná'agaquiē' didza' na' rucá'ana tsahui'. Gudōdi ni' gúquiē' Abraham xúzibi' bi'i Isaac, en cate' chigúquibi' xunu' gubidza, guchúguiē' lu xipēla'bi' lē' na' naca bē'. Isaac na', lēscá' caní benē' queēbi' bi'i Jacob, xzí'inē', en caní benē' ca' Jacob quégaca idxínmutēbi' bi'i bōnni' queē', nupa ni' gulaca xuz xtó'ogaca idxinnu cō' bōnachi Israel.

9 'Yugu' xuz xtó'oru' na', lu yōl-la' ruzxé'e quégaquiē', gulúti'ē-bi' bi'i José, bōchi'gaquiē', lu ná'agaquiē' bōnni' ni' gulúti'gaquiē'-bi' luyú Egipto. Dios guzóalēnē'-bi' bi'i José na'

10 en busölē'-bi' lu le gulaca queēbi'. Dios bē'ē-bi' yōl-la' réajni'i, le ben ga guyaza ládxē'ē-bi' Faraón, bōnni' rinná bē'enē' bōnachi Egipto, atē' Faraón na' budōdē' lu ná'abi' bi'i José yōl-la' unná bē' para gunná bē'ebi' bōnachi luyú Egipto, en yúgu'tē bōnachi nacué' lidxē' Faraón na'.

11 'Ní'irö gúcada' gubín idú luyú Egipto, en luyú Canaán ni, ate' gula'guí'i gula'zaca' yúgu'tè bönachi dza ni'. Biti' bidzöli le ilahuë' xuz xtó'oru'.

12 Cate' biyönnë' Jacob dë zxa' xtila luyú Egipto, gusöl-lë'ë yugu' xzí'inë', bönni' ni' nácagaquië' xuz xtó'oru', luyú ni'. Caní guca le zí'alö luzuí yöjáquië' ni'.

13 Cate' le buropi luzuí yöjáquië' luyú Egipto, benë' José ga bulu'únbë'ë böchë'ë lë'. Caní guca, gunözinë' Faraón nupa nácagaca di'a dza queë' José.

14 Ní'irö gusöl-lë'ë José didza', en benë' ga bidxinë' Jacob, xuzë', luyú Egipto, ate' dzágagaca di'a dza queë' lë'. Gulaca idú tsónnalalaj yu' chinu bönachi.

15 Caní guca, bidxinë' Jacob luyú Egipto, ga ni' gútië' lë', ate' gulátie' ca' xuz xtó'oru' luyú ni' cate' bizá'a dza que queëgaquië'.

16 Cate' gulátie' tu tu xuz xtó'oru', xzí'ini xí'sóagaquië' yöjuá'agaquië' légaquië' luyú Siquem, ate' ni' bulu'cáché'ë légaquië' yeru ba lu zxa' bulóaj na' gú'uë' Abraham lu ná'agaca xzí'inë' Hemor, bönni' Siquem na'.

17 'Gudödi zían iz, cate' bidxín dza ral-la' gaca le guzxi' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto.

18 Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto.

19 Bönni' unná bë' na' bi'ë dö' quégaca bönachi uládz queëru'. Busaca' zi'ë yugu' xuz xtó'oru' na', en benë' ga bulu'sané'-bi' bi'i bönni' huë'enido' que queëgaquië', para ilátibi'.

20 La' dza ní'isö gúljabí' ca' bí'ido' Moisés, ate' Dios guyaza ládxë'ë-bi'. Xuz xiná'abi' bulu'sculë'-bi' lídxigaquië' idú ca tsonna beo'.

21 Cate' bidxín dza ulu'sané'-bi' xuz xiná'abi' para gátibi' bí'ido' Moisés na', bidxinnu nigula xzí'inë' Faraón ga ni' bulu'cá'anë'-bi', ate' yöjxzí'inu-bi', en buscúlunu-bi' ca bi'i que cázanu.

22 Caní guca, bizédabi' bi'i Moisés yúgu'tè le táquië' bönni' Egipto, en gúcatëröbi' zxön ca naca didza' bë'ëbi', en ca nácagaca le benbi'.

23 'Cate' Moisés na' chiyú'ubi' choá' iz, gunná ládxi'bi' tsöjyubi' bönachi uládz queëbi', bönachi Israel.

24 Cate' bidxinbi' ga na' nacu'ë, bilé'ebi'-në' tu bönni' Egipto, rusaca' zi'ë tu bönni' uládz queëbi'. Ní'irö gúcalenbi'-në' bönni' uládz queëbi' na', en bëtibi'-në' bönni' Egipto na'. Caní guca, buzí labi' bi'i Moisés bönni' na' uláz queë' bönni' uládz queëbi'.

25 Gúquibi' Moisés huala'yéajni'inē' bönni' böchi'bi' gunē' Dios ga usölábi' lē cázabi' légaquiē', pero légaquiē' biti' gula'yéajni'inē'.

26 Ia'tú dza ca' yöjxáca'bi' ia'chopē' bönni' Israel, ta'dil-lē', ate' gú'unibi' cuéqui dxibi' légaquiē', en gúdxibi' légaquiē': "Libí'ili', böchi'li' naca. ¿Bíxq que ruá'ali' luzá'ali' dö'?"

27 Ní'irö bönni' na' ru'ē dö' que luzē'ē budxíguē'ē-bi' bi'i Moisés, gunnē': "¿Núzxitē buzóa li' para inná bé'enu' netu', en uchi'a usöröu' le runtu'?"

28 ¿Naru' ré'énitsenu' gútiu' ca' neda' ca benu' néaje, bëtiu'-nē' bönni' Egipto na'?"

29 Cate' Moisés biyönibi' didza' ni, buzxúnnaibi' ni', en yöjsóabi' luyú Madián ga ni' guzóabi' ca tu bönni' zí'tu'. Luyú Madián na' butsaga ná'alēbi'-nu nigula lu yödzö ni', ate' gúl'jagacabi' chópabi' bi'i bönni' queē'.

30 Cate' chigudödi choá' iz zoē' ni', buluí'i lahuē' tu gubáz lá'ayi queē' Dios ga zoē' lu guí' que yaga yötsi'do' régui, ga ni' naca lu lataj cá'asö, le rö'ö ra' guí'a nazí'i le Sinaí.

31 Cate' Moisés bilé'enē' guí' na', bubáninē', ate' gubígui'ē' gala' para ilé'enē' dxi'a, ate' biyönnē' chi'ē Xanru'.

32 Caní gudxē' Xanru' lē': "Neda' naca' Dios quegaquiē' xuz xto'o. Naca' Dios queē' Abraham, en Dios queē' Isaac, en Dios queē' Jacob." Ní'irö lu yöl-la' radxi queē', guxzizidē'ē Moisés, en bíti'rö burúguinē' uyüē'.

33 Xanru' gudxē' lē': "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni.

34 Le nácatē chibilé'eda' le ta'guí'i ta'zaca' bönachi quia' nacuá' luyú Egipto, en chibiyönda' ta'bödxí yeche'. Bötja', zoa' ni para usölá' légaquiē'. Gudá na'a, isöl-la'a li' luyú Egipto."

35 Sal-la' bönni' uládz queē' Moisés, bulu'cá'anē' lē' cá'asö, gula'nnē': "¿Núzxitē buzóa li' para inná bé'enu' netu', en uchi'a usöröu' le runtu'?" Dios gusöl-lē'ē lē' para gáquiē' bönni' unná bë', en bönni' rusölá, ca na' gubáz lá'ayi na' queē' Dios gudxē' Moisés, cate' buluí'i lahuē' lu yaga yötsi'do' régui ga na' zoē'.

36 Moisés ni bubéajē' bönni' uládz queēru' luyú Egipto. Guca caní gudödi benē' le gulún ga bulu'bani bönachi ni', en le taca bë' benē' luyú ni'. Lēasca' caní benē' lu nísado' nazí'i le Nísado' Xiná. Caní benē' lógaquiē' idú ca choá' iz lu lataj cá'asö.

37 Lē cazē' Moisés na' gudxē' bönachi Israel ni', gunnē': "Xanru' Dios isöl-lē'ē queéli' tu bönni' galjē' ladaj di'a dza queéli', ate' gáquiē' bönni' gu'ē didza' uládz queē' Dios. Isöl-lē'ē lē' queéli' ca na' gusöl-lē'ē neda'. Lē cazē' run bayudxi uzē nágali'-nē'."

38 Lēasca' lē cazē' Moisés na' guzóalenē' bönachi nudúbigaca queē' Dios lu lataj cá'asö, ate' gudzáguiē' gubáz lá'ayi queē'

Dios lë', Nu na' bë'len lë' didza' lu guí'a Sinaí na'. Moisés na' guzóalenë' xuz xtó'oru', ate' Dios budödë' lu në'ë xibá lá'ayi queë', le ruí'i didza' ca gaca ila'deli' bönachi yöl-la' na'bán, ate' budödë' Moisés xibá ni lu ná'agaca xzí'ini xí'sóagaquië' ga ridxintë queëru' rë'u.

39 Biti' gulë'ënnë' xuz xtó'oru' ilunë' ca rnna xtídzë'ë Moisés, pero bulu'zóë' lë' tsölá'alö, en gulë'ënnë' tsöjhuöjgaquië' luyú Egipto.

40 Cate' ni' zoë' Moisés na' lu guí'a Sinaí na', légaquië' gulë' Aarón, böchë'ë Moisés na', gula'nnë': "Rë'ënitü' gunu' yugu' dios queëtu', tu budó' guië', para tsöjnörugaca lotu'. Biti' nöztu' bi guca queë' Moisés, bönni' na' nubéajë' netu' luyú Egipto."

41 Ní'irö gulunë' tu budó' oro le naca ca tu bëdxido', ate' gulútië'-ba' bö'cu' xzí'á'do', en gulú'ugaquië'-ba' lo budó' oro na', ate' gulunë' laní lo budó' na' núngaquië'.

42 Que lë' ni na' Dios bucá'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzxiba. Ca naca lë' ni nazúaj lu guichi le gula'nnë' bönni' gulu'ë didza' uláz queë' Dios, le rnna:

Libí'ili', bönachi Israel,

¿naru' gulú'ugacatsali'-ba' quia' neda' böa' bëdxi ni' bëtigacali'-ba', en buzégui'gacali'-ba', lë' na' benli' lu lataj cá'asö idú ca choá' iz?

43 Biti' gulú'ugacali'-ba' quia' neda', pero biá'ali' le nequi que Moloc, budó' guiöj queëli'. Biá'ali' ca' tu le naca ca böläj lúzxiba nazí'i le Refán, lë' na' buzóali' ca dios queëli'.

Yugu' budó' guiöj budó' yaga ni,

la' libí'isili' benli' para guyéaj ládxi'li' léguequi.

Que lë' ni na', ubéaja' libí'ili' lu xiyuli',

en ichë'a libí'ili' zí'tu'rö ga dë luyú Babilonia.

44 'Cate' ni' gula'cu'ë xuz xtó'oru' lu lataj cá'asö, guta' quégaquië' yu'u lari' na' ga gulún chi'ë xibá queë' Dios, lë' na' naca bë' Dios caz zóalenë' légaquië'. Gulunë' tu yu'u lari' na' ca na' Dios gunná bé'enë' Moisés, cate' ni' gudxë' lë' gunë' le ca naca lë' na' bilé'enë', le buluí'inë' Dios lë' lu guí'a ni'.

45 Lë'sca' bulu'dödë' yu'u lari' na' lu ná'agaquië' xzí'inigaquië' ga bidxintë dza ni' gulu'ë xuz xtó'oru' le luyú ni, cate' ni' dzáguië' Josué légaquië', ate' gula'guë' xiyúgaca bönachi izá'a, nupa ni' bulágui'ë Dios lógaquië' xuz xtó'oru'. Caní gulunë' zían iz ga bidxintë dza zoë' David.

46 Dios guyaza ládxe'ë David na', ate' lë' gunábinë' Dios gu'ë lë' lataj gunë' tu yu'u ga soë' Dios queë' Jacob.

47 Biti' bë'ë Dios lë' lataj, ate' Salomón, xzí'inë' David na' benë' yu'u queë' Dios.

48 Caní benë' sal-la' biti' zoë Dios, Nu nácatërö lo, tu lu yudo' núngaca bönachi. Ca naca lë ni gunné' tu bönni' bë'ë didza' uláz queë' Dios, gunné':

49 Yehua' yubá naca ga rö'a rinná bë'a, ate' yödzülió naca xilibi ni'a.

Rnnë Xanru': "¿Naru' gúntsali' tu yu'u ga soa'?"

¿Naru' zóatsö tu lataj ga ral-la' uzí ládxa'a?

50 ¿Naru' cabí len na'a caza' bena' yúgu'të lë ni'?"

51 Ní'irö Esteban na' gudxë' yugu' bönni' yudo' tu'chi'a tu'söröë' na', gunné':

—Libí'ili', bönni' zidi, biti' bi raza icja nágalí'. Nazidi icja ládxi'do'oli' ca raca quégaca bönachi biti' núnbë'gaquië' Dios. Ridá'baga'tica'sili'-në' Dios Bö' Lá'ayi. Ca na' gulunë' xuz xtó'oli', runlí' ca' libí'ili'.

52 Gula'bía ládxi'gaquië' xuz xtó'oli' na' yúgu'të bönni' ni' gulu'ë didza' uláz queë' Dios. Lësca' gulútië' bönni' ni' gula'guíxjö'ë zí'alö ca ral-la' guídë' Cristo, Bönni' Tsahui', ate' na'a, cate' ni' bidxinë' Bönni' Tsahui' na', libí'i cázali' bëtili'-në' lu ná'agaquië' bönni' gulútië' Lë'.

53 Libí'i cázali' dë lu ná'ali' xibá queë' Dios, lë na' gubáz lá'ayi queë' Dios bulu'dödë' lu ná'agaquië' xuz xtó'oli', pero biti' runlí' ca rna.

Tútië' Esteban

54 Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu zxéatica' láyë'ë.

55 Ní'irö buyüë' Esteban na' lúzxibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayëpisëtëre'.

56 Ní'irö gunné':

—Buli'yútsöca'. Rilé'eda' nayalaj lúzxiba, ate' zuínë' Bönni' Guljë' Bönachi cuita lë'ë ibëla Dios.

57 Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bödxi'ë zidzaj, en tsözxón gula'bía di'ë Esteban na'.

58 Bulu'béajë' lë' ní'ilö ra' yödzo na', ga ni' bulu'ladxë' lë' guiöj. Yugu' bönni' ni' tunë' ba nalí'le tu'zéguië' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guiöj.

59 Cate' ni' tu'ladxë' Esteban guiöj, lë' bulidzë' Dios, gunné':

—Xána' Jesús. Buzí' bö' naca caza'.

60 Ní'irö biyéchuë', buzóa zxibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútitë'.

8

Saulo ribía ládxë'ë bönachi queë' Cristo

1-3 Saulo benë' tsözxön yugu' bönni' ni' gulútië' Esteban.

La' ní'sö yugu' bönni' ta'yéaj ládxi'gaquië' Dios guluá'agaquië' Esteban, ate' yöjácchi'gaquië' lë'. Gula'bödxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxía ládxë'ë bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi guié'.

Ní'irö gulásilasi ia'láti'sö cabí bidáchigaca yúgu'të bönachi queë' Cristo idú luyú Judea, en luyú Samaria, ate' légacasë' gubáz na' nasöl-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

4 Yugu' bönni' na' gulásilasië' yöjáquië' yúgu'të lataj, ate' gulunë' libán que didza' dxi'a.

5 Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo.

6 Bulu'dubë' yugu' bönni' ni', ate' idú ládxi'gaquië' bulu'zë' nágagaquië' didza' ru'ë Felipe na', tu' bila'yönnë' xtídzë'ë, en bila'lë'enë' yugu' le taca bë' runë'.

7 Caní guca, tu' benë' ga bulu'rúaj zían bö' xihui' yú'ugaca bönachi, ta'bödxí'a zidzaj, ate' bulu'huóaca zían nupa te'e huë' nacú'uni bin, en nupa bití' guca sá'gaca.

8 Caní guca, bulu'dzeja bönachi yödzö ni'.

9 Zoë' Simón, tu bönni' zí'alö gúquië' bönni' udzá' unë ya'a lu yödzö na', bönni' guzxí' yé'enë' bönachi Samaria na', gunné' lë' cazë' náquië' bönni' nayépisëtë'ë'.

10 Yúgu'të bönachi bulu'zëda' nágagaca bönni' ni, ga riguela' yugu' bönni' cá'asö ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxön queë' Dios."

11 Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' unë ya'a queë'.

12 Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula.

13 Ní'irö guyéajlë'ë ca' Simón na', en bidilë' nisa, ate' gudá'entica'së' tsözxön Felipe na'. Cate' bilé'enë' yugu' yöl-la' huáca zxön, en yugu' le taca bë' runë' Felipe, bubáinë' Simón na'.

14 Cate' yugu' gubáz na' nasöl-lë'ë Cristo nacué' Jerusalén bila'yönnë' ca guca lë ni, chinazí' lu ná'agaca bönachi luyú Samaria xtídzë'ë Dios, ní'irö gula'söl-lë'ë Pedro, en Juan ni'.

15 Cate' Pedro, en Juan na' bila'dxinë' ni', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi.

16 Ga bidxintë dza na', biti' ridxíninë' Dios Bö' Lá'ayi quégaquië'. Nadílagacasë' nisa para ilácagaquië' tuz len Xanru' Jesús.

17 Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

18 Cate' bilé'enë' Simón, bönni' udzá' na', le guca cate' gubáz na' nasöl-lëë' Cristo gula'xóa ná'agaquië' bönachi ni', bidisóalenë' Dios Bö' Lá'ayi légaquië', gu'unnë' quixxjë' légaquië' dumí,

19 ate' rë' légaquië':

—Benna ca' yöl-la' huáca ni quia', para cate' ixóa na'a nútí'tës bönachi, idisóalenë' Dios Bö' Lá'ayi nu na'.

20 Ní'irö Pedro gudxë' lë', rnnë':

—Initi dumí quiu' tsözxön len li', tu' réquinu' len dumí idéli'nu' yöl-la' huáca queë' Dios.

21 Biti' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios.

22 Bubí'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' li' ca naca lë ni rizá' ládxi'u.

23 Réquibe'eda' nabágu'u xíguia', en nadzunu' lu yalaj que tu' xihui'.

24 Ní'irö bubí'ë didza' Simón na', rë' légaquië':

—Buli'lidzë' Dios, gáta'yuli' lahuë' Xanru' ni'a quia' neda' para cabí gaca quia' nitú lë na' chigunnáli'.

25 Cate' Pedro, en Juan na' budxi gulunë' ba nalí queë' Cristo lu yödzo ni', en bulu'siyönnë' légaquië' xtídzë'ë Dios, gulunë' ca' libán que didza' dxi'a yugu' lu ládzagaquië' bönni' Samaria, ate' gudödi ni' yöjhuójgaquië' Jerusalén.

Felipe, en tu bönni' Etiopía

26 Ní'irö tu gubáz lá'ayi queë' Xanru' bë'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ni' nalá' nöza zeaj Jerusalén zéajtë yödzo Gaza, nöza na' ridödi lu lataj cá'asö.

27 Ní'irö guyu'ë nöza Felipe na', sa'yéajë'. La' nöza ni' yöjtságuië' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queënu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queënu dzö'ö lídxinu. Guyijë' Jerusalén bönni' ni para guyéaj ládxië' Dios.

28 Na'a, söhuöjè' ladzè', rø'è lu carreta queè', en rulabè' le nazúaj lu guichi ca gunné' Isaías, bönni' bè'è didza' uláz queè' Dios.

29 Ní'irø Dios Bö' Lá'ayi gudxè' Felipe na':

—Gubíga' ga zeaj carreta na', en guyéajlen le.

30 Cate' chigubíguè'è Felipe ni', biyönnè' ru'è didza' bönni' huödx na', rulabè' le nazúaj lu guichi ca gunné' Isaías, ate' gudxè' lè':

—¿Naru' réajni'inu' lè na' rulabu'?

31 Bubi'è didza' bönni' Etiopía na', gunné':

—¿Nacxi gaca tséajni'ida' channø cuntu nu zoa uzéajni'i neda'?

Ní'irø gúta'yuè' lahuè' Felipe cuenè', en cø'lenè' lè' tsözxøn lu carreta na'.

32 Lè na' nazúaj lu guichi rulabè', rna caní:

Ca bö'cu' zxíla'do',

gula'chè'è Lè' para ilútiè' Lè',

en ca bö'cu' zxíla'do',

biti' rnnèba' cate' nu richugu lítsa'ba',

ca' benè' Lè', biti' gusalaj ru'è bi innè'.

33 Bulu'cá'anè' Lè' cá'asø,

en biti' gulu'è lataj nu uchi'a usørø Lè'.

¿Nuzxi caz gaca inøzi xíguia' nabága'gaca bønachi uládz queè'?

La' légacasè' gulútiè' Lè'.

34 Bönni' huödx na' gunábinè' Felipe, rø' lè':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bè'è didza' uláz queè' Dios? ¿Naru' queè' cazè', o que nu yúbølø?

35 Ní'irø la' didza' nisø buguélè'è Felipe, en busiyönnè' lè' didza' dxi'a ca naca queè' Jesús.

36 Cate' ni' yú'ugaquiè' nøza søjáquiè', bila'dxinè' ga dè nisa, ate' bönni' huödx na' rø' Felipe, rnnè':

—Buyútsøca'. Ni dè nisa. ¿Naru' huácatsø idila' nisa?

37 Felipe gudxè' lè':

—Channø réajlè'u idú ládXu'u, huáca idilu' nisa.

Lè' bubi'è didza', rnnè':

—Réajlè'a Jesucristo, náquiè' Zxí'inè' Dios.

38 Ní'irø benè' ga guzóa dxisø carreta queè' na', ate' bulu'huøjtjè' irøpatè', yöjtsázagaquiè' lu nisa. Ní'irø Felipe buquilè' bönni' huödx na' nisa.

39 Cate' bulu'rúajè' lu nisa, Dios Bö' Lá'ayi buchè'è Felipe, ate' bönni' huödx na' bíti'rø bilé'enè' lè'. Ní'irø buguélè'è xinözè', söhuöjè' rudzèjanè'.

40 Cate' chiréquiè'enè' Felipe, zoè' lu yödzø Azoto. Gudødè' yúgu'tè yödzø ni', ate' benè' libán que didza' dxi'a, ga bidxintè' yödzø Cesarea.

9

Saulo ruhuóáquië' queë' Cristo

¹ Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo,

² en gunábinë' lë' tu guichi unná bë', le tsöju'ë lógaquië' bönni' unná bë' quégaca yu'u gapa tu'dubë' bönni' judío, en tu'sëdë' queë' Dios lu yödzö Damasco, ate' channö utsöjxáquië' yugu' bönni', en nigula ta'yéajlë'ë Jesús ni', gaca ichë'ë légaquië' nadzúngaquië' lu yödzö Jerusalén.

³ Tsanni ni' yú'ugaquië' nöza Saulo, en nupa nacué'len lë', söjáquië', en cate' chizóa ila'dxinë' Damasco, tsárido'os buzení'da' tu bení' za' lúzxiba, le buzení' ga ni' söjáquië'.

⁴ Ní'irö gudzö'ë Saulo lu yu, en biyönnë' chi'i Nu rë lë':

—Saulo, Saulo, ¿bizx que ribía ládXu'u neda'?

⁵ Saulo gunábinë' Lë', gunnë':

—¿Nuzxi lí', Xan?

Lë' gunnë':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queéba' bëdxi, run zi' cuinba' richégu'ba' yaga tuchi' túndë'ë-ba' zi'.

⁶ Ní'irö Saulo guxzízidë'ë, gúdxinë', en gunnë':

—Xan, ¿bizxi rë'ënu' guna'?

Xanru' gudxë' lë':

—Guyasa, en guyáz lu yödzö, ate' ni' isól-la'a quiu' nu guíë lí' le ral-la' gunu'.

⁷ Guládxinë' yugu' bönni' na' söjácalenë' Saulo, tu' bila'yönnë' chi'i na', sal-la' cuntu nu bila'lé'enë'.

⁸ Ní'irö böasë' Saulo luyú, en cate' guxá' guiöj lahuë', biti' ca' rilé'enë'. Que lë ni na' gula'guélë'ë në'ë, en gula'ché'ë lë' Damasco.

⁹ Guzöë' ni' tsonna dza nachul-la lahuë', en biti' bi gü'i gudahuë'.

¹⁰ Zoë' ca' Ananías, bönni' réajlë'ë Cristo, yödzö Damasco, ate' Xanru' buluí'i lahuë' ga zoë' ca tu lu yëla bëchigal, en gudxë' lë':

—Ananías.

Lë' bubi'ë didza', gunnë':

—Ni zoa', Xan.

¹¹ Xanru' gudxë' lë':

—Guyasa, en guyéaj ga naca la' nöza na' nazí'i le Nöza Li, ate' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios.

¹² Chibilé'enë' tu bönni' ca tu lu yëla bëchigal zë'ë tsazië' ga zoë', lë' Ananías, en ixóa në'ë lë' para huóalaj guiöj lahuë'.

¹³ Ní'irö bubi'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' quégaca bönachi ta'yéajlë' Li', nacua' Jerusalén.

14 Zë'ë ca' ni, dë lu në'ë uláz quégaquië' bixúz unná bë' sönë' yúgu'të nupa tu'lidza Dios len Lo' Li'.

15 Ní'irö Xanru' rë' Ananías na', rnnë':

—Guyéaj, tu' gurö caza' neda' bönni' ni para gunë' libán ca naca quia' lógaca bönachi izá'a, en lógaquië' bönni' ta'nná bé'enë' légaquië', enca' lógaca bönachi Israel.

16 Ulu'ída' lë' le zían le qui'i sáquë'ë uláz quia' neda', gunë' xichina'.

17 Ní'irö guyijë' Ananías ni', ate' guyázië' yu'u, en guxóa në'ë Saulo, ate' rë' lë':

—Böcha'a Saulo, Xanru' Jesús, Nu na' buluí'i lahui la' nöza ga ni' zo'o, gusól-lë'ë neda' para huóalaj guiöj lo', en idisóalenë' Dios Bö' Lá'ayi li'.

18 La' ní'isö gula'guínnaj le naca ca xilácuba' böla lu guiöj lahuë', ate' la' böáljatë guiöj lahuë'. Ní'irö guyasë' Saulo, en bidilë' nisa.

19 Gudödi ni' gudahuë', en böáca ládxë'ë. Ca chopa tsonna dza guzóalenë' yugu' bönni' ta'yéajlë'ë Cristo nacu'ë Damasco.

Runë' libán Saulo lu yödzo Damasco

20 La' gusí lotë' Saulo runë' libán queë' Cristo gapa naca lu yu'u ga tu'dubë' bönni' judío, en tu'sëdë' queë' Dios, rnnë':

—Jesús náquië' Zxi'ini cazë' Dios.

21 Bulu'báninë' yúgu'të bönni' ni' ta'yönnë' lë', ta'nnë':

—¿Naru' calëga bönni' ni bönni' na' busunítië' nupa nacua' Jerusalén, en tu'lidza Dios lu Lë' Jesús? Para gunë' caní bidë' ca' ni para ichë'ë légaquië' nadzúngaquië' lógaquië' bixúz unná bë'.

22 Bidíparö ládxë'ë Saulo, en benë' ga gula'bö'ë böniga bönni' judío nacu'ë Damasco, tu' buluí'inë' légaquië' Jesús naca cazë' Cristo, bönni' na' tunë' löza idinná bé'enë' légaquië'.

Rulë' Saulo lu ná'agaquië' bönni' judío

23 Cate' chigudödi zían dza, gulún xtídzagaquië' bönni' judío nacu'ë ni' ilútië' Saulo.

24 Réla, en të dza gula'bö' nísíë' yugu' bönni' judío ga nu ridödi lu zö'ö run chí'i yödzo na' para ilútië' lë', pero gúquibe'enë' Saulo le të'ënnë' ilunë' queë'.

25 Ní'irö yugu' bönni' ta'yéajlë'ë Cristo gula'guélë'ë Saulo chí'i dzö'ölö, ate' gula'gu'ë lë' tu lu ga'böra zxön naga' du, en bulu'zöjtë lë' ní'ilö lu zö'ö run chí'i yödzo na'.

Rudxinë' Saulo Jerusalén

26 Cate' budxinë' Saulo Jerusalén, gú'unnë' tsöjenë' tsözxön bönni' ni' ta'yéajlë'ë Cristo, pero yúgu'të' guládxinë' lë', tu' cabi téquinë' réajlë'ë Saulo na' Cristo.

27 Ní'irö bönni' na' lë' Bernabé gudélë'ë Saulo, en guchë'ë lë' ga na' nacu'ë bönni' gubáz nasöl-lë'ë Cristo. Busiyönnë' légaquië' ca na' guca queë' Saulo, bilé'enë' Xanru' la' nōza, ate' Xanru' caz bë'lenë' lë' didza', en ca na' benë' Saulo lu yödzö Damasco, len yöl-la' rugu ladxi' benë' libán ca naca queë' Jesús.

28 Ní'irö Saulo guzóalenë' légaquië' lu yödzö Jerusalén, ate' gudálenë' légaquië' tsözxön.

29 Lu yöl-la' rugu ladxi' benë' libán Saulo ca naca queë' Xanru', en gudíl-lalenë' didza' bönni' judío tu'ë didza' griego, ate' légaquië' gula'zóa gula'bö'ë ilútië' lë'.

30 Cate' guléquibe'enë' böchi'ru' ta'yéajlë'ë Cristo lë ni, gula'chë'ë Saulo lu yödzö Cesarea, ate' gula'söl-lë'ë lë' yödzö Tarso, le naca ladzë' Saulo.

31 Ní'irö guca tsahui' quégaca yúgu'të cö' bönachi queë' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxi'gaquië'. Gula'cu'ë lu yöl-la' radxi quégaquië' Xanru', ate' gula'yanë' tu' gúcalenë' Dios Bö' Lá'ayi légaquië'.

Pedro ruúnë' tu bönni' lë' Eneas

32 Ia'tú le guca, cate' Pedro yöjyüë' yugu' böchi'ru', bidxinë' ga nacu'ë bönni' ta'yéajlë'ë Jesús lu yödzö Lida.

33 Yöjxáquië' tu bönni' ni' lë' Eneas, chiguca xunu' iz dë ré'enë', nací'unië' bin.

34 Pedro gudxë' lë':

—Eneas, Jesucristo ruúnë' li'. Guyasa, en butubi xto'o.

La' guyásatë' Eneas na'.

35 Yúgu'të nupa nacuá' yödzö Lida, en yödzö Sarón bila'lé'e lë', ate' bulu'huóaca queë' Xanru', tu' chita'yéajlë' Lë'.

Rátinu Dorcas, en rubannu

36 Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Bennu nigula ni zían le nácgaca dxi'a le tácalen bönachi yechi'.

37 Le guca dza ni', güí'inu Dorcas na', en gútinu. Gudödi gula'guíbinu lënu, gula'guíxjë'-nu tu lu yu'u ga naca buropi cuía.

38 Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', ate' que lë ni na' gula'söl-lë'ë chopë' bönni' ga na' zoë', ate' guláta'yüë' lahuë', të' lë':

—Biti' tsenu' guídu' queëtu'.

³⁹ Ní'irö la' guyásatë' Pedro, sa'yéajlenë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bödxinu, en tu'lu'ínu lë' lari' quégaquië' bönni', en nigula, yugu' le bennu Dorcas cate' ni' zóalennu légacanu.

⁴⁰ Ní'irö Pedro bubéajë' ní'ilö yúgu'të nupa nacua' ni', ate' buzóa zxbë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guiöj lonu Dorcas. Cate' bilé'enu-në' Pedro, la' guyástënu, gurö'önu.

⁴¹ Gudélé'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', ate' busudxinë' Dorcas na' lógaquië', nabannu.

⁴² Ca guca lë ni guzë didza' idú lu yödzö Jope, ate' gula'yéajlë' bönachi zían Xanru' Jesús.

⁴³ Bugá'anë' Pedro yödzö Jope na' zían dza lu yu'u lidxë' Simón, bönni' runë' tsahui' guídi zxa bëdxi.

10

Le benë' Pedro lidxë' Cornelio

¹ Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' röjáquië' gudil-la, nazi'i lágaquië' Bönni' Italia Röjáquië' Gudil-la.

² Cornelio na' reaj ládxë'ë Dios, en rádxinë' Lë', ate' yúgu'të bönachi nacua' lidxë' núngaca lë' tsözxön. Runödzjë' Cornelio dumí zían le rácalen bönachi yechi', en rulídzatica'së' Dios.

³ Tu dza idú ridödi xihuö bilé'enë' Cornelio ca tu lu yëla bëchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rno', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nözinë' ca runu', rácalenu' bönachi yechi'.

⁵ Na'a, gusól-la' yugu' bönni' tsöjáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro.

⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, ate' zoa lidxë' ra' nísado'. Pedro na' guíë' li' le ral-la' gunu'.

⁷ Cate' chibuzë'ë gubáz lá'ayi na' bë'lenë' lë' didza', bulidzë' Cornelio chópabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzáguië' bönachi nacua' lidxë' Cornelio.

⁸ Cate' budxi busiyönnë' légaquië' yúgu'të le guca, gusöl-lë'ë légaquië' yödö Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'isö gurenë' Pedro ícjo'olö yu'u para ulidzë' Dios, ni' naca idú huagubidza.

¹⁰ La' ná'asö ridunë' Pedro, en gú'unnë' gahuë', ate' tsanni ni' tu'pë'ë queë', bilé'enë' le naca ca tu lu yëla bëchigal.

¹¹ Bilé'enë' nayalaj lúzxiba, en ruhuötaj tu le naca ca tu lari' guitsa' zxön ga zoë', le naga' idapa la'a.

¹² Lahui lari' na' dxíagacaba' yugu' böa' guixi' izá'a nacuá' tapa ni'a ná'agacaba', en yugu' böa' tá'ayöj lë'egacaba' lu yu, en yugu' böa' zoa xíligacaba'.

¹³ Ní'irö biyönnë' chí'i nu rë lë':

—Pedro, guyasa. Bëti-gacaba', en gudagu.

¹⁴ Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵ Le buropi luzuí biyönnë' chí'i nu na' gudxi lë':

—Le nunë' Dios dxi'a, bití' innó' que: "Bití' naca dxi'a."

¹⁶ Tsonna luzuí guca caní, ate' ní'irö la' buëpitë' lari' zxön na' lúzxiba.

¹⁷ Tsanni ni' rö'ë böniga Pedro, rizá' láchxë'ë bizxi sa'yéaj lë na' bilé'enë' ca tu lu yëla bëchigal, bila'dxinë' bönni' na' nasöl-lë'ë Cornelio légaquië' ra' yu'u, ta'nabë' gazxi zoa lidxë' Simón na'.

¹⁸ Cate' bila'dxinë' ni', bulu'lidzë' nupa nacuá' yu'u na', en gula'nábinë' légaquië' channö zoë' tu bönni' lë' Simón ni', zoa ia'tú lë' Pedro.

¹⁹ Tsanni ni' rizá' láchxë'ë Pedro ca naca lë na' bilé'enë', Dios Bö' Lá'ayi gudxë' lë', rnnë':

—Buyútsöca'. Chibila'dxinë' tsonnë' bönni' ni, tu'guiljë' li'.

²⁰ Guyaschi na'a, en bötaj zxan yu'u. Bití' gaca chopa láchxu'u tséajlenu' légaquië', tu' nasöl-la'a neda' yugu' bönni' ni.

²¹ Ní'irö bötjë' Pedro zxan yu'u ga na' nacu'ë bönni' na' nasöl-lë'ë Cornelio, en gudxë' légaquië':

—Neda' bönni' rugúlajli'. ¿Bizxi huen zá'ali' ni?

²² Bulu'bi'ë didza', të' lë':

—Cornelio, tu bönni' rinná bé'enë' bönni' röjáquië' gudilla, nasöl-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadxí'iguequinë' lë'. Ia'tú le guca, tu gubáz lá'ayi queë' Dios bë'lenë' lë' didza', en gudxë' lë' isöl-lë'ë nu udulídza li' guídu' lidxë' para yönnë' didza' gu'u.

²³ Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lë' tsözxön.

²⁴ Dza bunni ni', bila'dxinë' Cesarea. Chizöö' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadxí'irönë' lidxë'.

²⁵ Cate' guyázië' Pedro lö'a, birúajë' Cornelio yu'u, yöjtságuië' lë'. Biyéchuë' xini'ë Pedro, en guyéaj ládxe'ë lë' ca runru' queë' Dios caz.

²⁶ Pedro buchisë' lë', en gudxë' lë':

—Guyasa. Lësca' bönachi yödzölió naca' ca nacu' li'.

²⁷ Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'.

²⁸ Ní'irö Pedro gudxë' légaquië', rnnë':

—Libí'ili' nöz quézili' ca rinná bë' xibá queë' Moisés, rnna biti' ral-la' gunë' tu bönni' judío tsözxön o tsázalenë' nu bönni' izá'a. Na'a, Dios buluí'inë' neda' biti' ral-la' innía' queë' nitúë' bönni' náquië' cá'asö o biti' náquië' dxi'a.

²⁹ Que lë' ni na' cate' bulídzali' neda', la' bídatea', en biti' guca chopa ládxa'a. Rinaba' na'a, ¿bizx que na' bulídzali' neda'?

³⁰ Ní'irö bubí'ë didza' Cornelio, gunnë':

—Chiguca tapa dza ca zóaru' na'a, idú ridödi xihuö, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nácubi' lari' rëpi yösa beni', dluuí'lobi' neda'.

³¹ Caní gúdxibi' neda': "Cornelio. Dios riyönnë' le rulidzu'-në', en nözinë' ca runu', rácalenu' yugu' bönachi yechi'.

³² Na'a, isöl-lu'u nu bönni' lu yödzö Jope para tsöjlídzë' tu bönni' lë' Simón, zoa ia'tú lë' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lë' ca' Simón. Zoa lidxë' bönni' ni ra' nísado'. Cate' idxinë' Pedro na' ga zu', usiyönnë' li' didza' dxi'a."

³³ Caní guca, la' gusöl-la'tea' nu tsöjlidza' li', ate' tsáhui'do' benu' bidu' ga zóatu' ni. Que lë' ni na' zóatu' ni yúgu'tëtu', nudúbitu' lahuë' Dios para uzë' nágatu' le inná bé'enë' Dios li' innó'.

Didza' bë'ë Pedro lidxë' Cornelio

³⁴ Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u.

³⁵ Dios raza ládxe'ë bönachi idútë yödzölió, nupa na' tadxi Lë', en tun le naca dxi'a.

³⁶ Gusöl-lë'ë Dios xtídzë'ë ga nacuá' bönachi Israel, en gusöl-lë'ë nu ben libán que didza' dxi'a, le run ga raca dxi'a quégaca bönachi, lë' na' bídxín queëru' lu në'ë Jesucristo. Lë' cazë' náquië' Xanru' yúgu'tëru'.

³⁷ Libí'ili' nöz quézili' lë' na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa.

38 Nözili' ca benë' Dios le guca queë' Jesús, bönni' Nazaret. Gusöl-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsaui', en ruúnë' yúgu'të nupa gula'guí' gula'zaca' lu na' tu' xihui'. Caní benë', tu' guzóalenë' Dios Lë'.

39 Na'a, netu' runtu' ba nalí que yúgu'të lë na' benë' Jesús luyú Judea, en lu yödzö Jerusalén, en ca na' guca, gulútië' Jesús, cate' bulu'dë'ë Lë' lë'e yaga cruz.

40 Ní'irö Dios busubanë' Lë' cate' guca tsonna dza nátië', en benë' ga buluí'i lahuë' ga zóatu' netu'.

41 Biti' buluí'i lahuë' lógaca yúgu'të bönachi, pero lotu' netu' buluí'i lahuë'. Dios guröë' netu' dza ni'te para guntu' ba nalí queë' Jesús, ate' güí'i gudágulentu' Lë' tsözxön gudödi bubanë' lu yöl-la' guti.

42 Gunná bé'enë' Dios netu' guntu' libán lógaca bönachi, ate' runtu' ba nalí queë' Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca.

43 Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

44 Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' légaquië', yúgu'të nupa ni' ta'yöni libán runë' lë'.

45 Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxön len Pedro, tu' bidë' Dios Bö' Lá'ayi, Nu na' nasöl-lë'ë Dios Xuz. Bidisóalenë' bönachi ni' bití' nácagaca judío.

46 Caní gulunë' tu' bila'yönnë' tu'ë bönni' z'i'tu' na' didza' yúbölö, en tunë' Dios zxön.

47 Ní'irö bë'ë didza' Pedro, gunné':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

48 Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' guláta'yuë' lahuë' Pedro ugá'analënë' légaquië' ca chopa tsonna dza.

11

Didza' bë'ë Pedro lógaca bönachi queë' Cristo nacué' Jerusalén

1 Bila'yönnë' gubáz nasöl-lë'ë Cristo, en böchi'ru' nacué' luyú Judea ca na' bönni' bití' nácagaquië' judío gula'zí' lu ná'agaquië' xtídzë'ë Dios.

2 Cate' budxinë' Pedro Jerusalén, böchi'ru' judío gula'díl-lalenë' lë' didza'.

3 Gulë' Pedro:

—¿Bixx que yöjtsú'ulenu' bönni' biti' nácagaquië' judío, en gudágulenu' légaquië' tsözxön?

4 Ní'irö gusí lahuë' Pedro rusiyönnë' légaquië' idútë læ na' guca, rnnë':

5 —Guzóa' lu yödzö Jope, en cate' ni' rulidza'-në' Dios, bilé'eda' ca tu lu yëla béchigal tu le buluí'inë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxön, naga' idapa la'a, ate' bidxín ga na' zoa'.

6 Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacuá' tapa ní'agacaba', yugu' böa' guixi' sínia', en böa' tá'ayöj lé'egacaba' lu yu, en böa' zoa xíligacaba'.

7 Biyönda' chi'i nu gudxi neda': "Pedro, guyasa. Bëti-ba', en gudagu."

8 Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dxi'a."

9 Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dxi'a."

10 Tsonna luzuí guca caní, ate' ní'irö idútë læ na' bilé'eda' la' buëpitë lúzxiba.

11 La' ní'isö bila'dxintë' tsonnë' bönni' ra' yu'u ga na' zoa', narúajgaquië' yödzö Cesarea, nasöl-lë'ë légaquië' tu bönni' læ Cornelio. Sududíljagaquië' neda'.

12 Dios Bö' Lá'ayi gudxë' neda': "Guyéajlen légaquië', en cabí gaca chopa ládxi'u." Lëasca' izxópatë' böchi'ru' ni gula'zá'lenë' neda' tsözxön. Guyéajtu' Cesarea, ate' guyaztu' lidxë' tu bönni' zoë' ni'.

13 Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuínë' lahuë', en gudxë' læ: "Na'a isöl-la'gacu'-në' bönni' tsöjáquië' yödzö Jope, tsöjlídzagaquië' Simón, zoa ia'tú læ' Pedro.

14 Bönni' na' usiyönnë' li' naca gaca uló' li', en ulu'lágaca ca' yúgu'të bönachi nacuá' lidxu'."

15 Cate' ni' gusí lahua' ru'ílena' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö.

16 Ní'irö yöjneda' didza' na' bë'ë Xanru', gunnë': "Le nácaté Juan buquilë' bönachi nisa lu nisa, pero libí'ili', gaca queéli' le rulu'isö yöl-la' ridila nisa na', idisóalenë' Dios Bö' Lá'ayi libí'ili'."

17 Que læ ni na', channö Dios gusöl-lë'ë Dios Bö' Lá'ayi quégaquië', la' tuz ca benë' queëru' rë'u réajlë'ëru' Xanru' Jesucristo, ¿núzxitë neda' inná bé'eda'-në' Dios?

18 Ní'irö, cate' bila'yönnë' læ ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácagaquië' judío, tu'bí'í ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlë'ë Cristo

19 Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxi'gaquië' ia'zica'rö bönachi ta'yéajlë'ë Cristo, bulu'zxunnaj bönachi ni, en gulásilasi zían yödzö luyú Fenicia, en luyú Chipre, en lu yödzö Antioquía. Gulunë' libán ni' que xtidzë'ë Dios, pero lógacasö bönachi judío.

20 Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzö Antioquía, gulu'ilenë' ca' didza' yugu' bönni' izá'a. Gulunë' libán lógaquië' que didza' dxi'a ca naca queë' Xanru' Jesús.

21 Yöl-la' huáca queë' Xanru' guzóalen légaquië', ate' bönachi zían gula'yéajlë' Xanru', en bulu'huóaca queë'.

22 Cate' bidxín didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'söl-lë'ë Bernabé tséajë' Antioquía na'.

23 Cate' Bernabé na' bidxinë' Antioquía, bilé'enë' le ruzá' ládxë'ë Dios quégaquië', en budzëjanë'. Guchízië' icja nágagaquië' para ila'día'tica'së' queë' Xanru' idú ládxi'gaquië'.

24 Náquië' Bernabé na' tsahui', en idú zóalenë' Dios Bö' Lá'ayi lë', en idú ládxë'ë réajlë'ë Cristo. Ni'a que libán benë' Bernabé na', bönachi zían lu yödzö na' gula'yéajlë' Xanru'.

25 Gudödi ni', guyijë' Bernabé na' yödzö Tarso, yöjdiljë' Saulo. Cate' budzölinë' lë', buchë'ë lë' Antioquía.

26 Idú ca tu iz gula'cu'ë ni', tunë' tsözxön bönachi queë' Cristo, en tu'sëdinë' bönachi zían. Lu yödzö Antioquía na', gusí lo gula'zí lágaquië' cristiano le rna len didza' xidza': Bönachi Queë' Cristo, nupa ni' ta'yéajlë' Lë'.

27 Dza ni' bila'rúajë' Jerusalén, en yöjáquië' Antioquía bal-lë' bönni' tu'ë didza' uláz queë' Dios.

28 Guzuínë' Agabo, bönni' dzáguië' yugu' bönni' na', en uláz queë' Dios Bö' Lá'ayi buzéajni'inë' légaquië', gunnë':

—Si' gaca gubín idútë yödzölió.

Guca gubín na' cate' ni' rinná bë'ë Claudio, lu yödzö Roma.

29 Ní'irö gula'zí' lu ná'agaquië' bönni' ta'yéajlë'ë Cristo nacu'ë Antioquía, ila'söl-lë'ë tsca le dësö que queëgaquië', le gácalen böchi'ru' nacu'ë luyú Judea.

30 Caní gulunë', ate' lë na' bulu'nödzjë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

12

Tútië' Jacobo, en ta'gu'ë Pedro lidxi guíë

1 Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zí'ë légaquië'.

² Gunná bé'enē' bönni' gulútiē' Jacobo, böchē'ē Juan. Gulu'ē lē' guíē tuchi'.

³ Cate' gúquibe'enē' Herodes gula'yaza ládxi'gaquiē' bönni' judío lē ni, benē' ga gula'zönē' ca' Pedro. Gulaca lē ni dza ni' raca laní cate' tahuē' yōta xtila biti' nazí'i cúa zi que.

⁴ Gudödi gula'zönē' Pedro, gula'gu'ē lē' lidxi guíē, en bulu'dödē' lē' lu ná'agaquiē' tapa cō' bönni' rōjáquiē' gudil-la, nacu'ē tapē' tu huéaj cō' na', para uyúgaquiē' lē'. Yu'u ládxi'ē Herodes ubéajē' Pedro lógaca bönachi tōdi Laní Pascua, laní na' tu'subanē' ca benē' Dios, bubéajē' bönachi judío luyú Egipto.

⁵ Caní guca, nun chí'igacrē' Pedro lu yu'u lidxi guíē na', pero bönachi queē' Cristo bulu'lídzatica'sō Dios, ta'nábini Dios gácalenē' Pedro.

Dios rubéajē' Pedro lidxi guíē

⁶ Cate' si' idxín dza yu'u ládxi'ē Herodes ubéajē' Pedro lidxi guíē na', la' dzō' ní'sō dē' rásiē' Pedro, ate' nacu'ē chopē' bönni' rōjáquiē' gudil-la cuita lē'ē Pedro na', en núga'gaquiē' lē' chopa du guíē. Gula'cu'ē ia'bal-lē' bönni' rōjáquiē' gudil-la tapa chí'ē ga nu riyaza lidxi guíē na'.

⁷ Tsárido'os bulu'i'lahuē' tu gubáz lá'ayi queē' Xanru' ni', ate' buzení'da' bení' lidxi guíē. Gudanē' gubáz lá'ayi na' cuita lē'ē Pedro, ate' busubanē' lē', en gudxē' lē':

—Guyaschi.

Ní'irō bulu'huédxi du guíē na' naga' ni'a nē'ē Pedro.

⁸ Gubáz lá'ayi na' gudxē' lē', gunnē':

—Béga' lē'u, en gudá' xirachu'.

La' bentē' Pedro caní. Ní'irō gubáz lá'ayi na' gudxē' lē', rnnē':

—Guxóa lari' cúdzu'u, en gudá len neda'.

⁹ Burúajē' Pedro, sa'yéajlenē' gubáz lá'ayi na', pero biti' réquibe'enē' nácatē le runē' gubáz lá'ayi na'. Gúquinē' yélasō rinenē'.

¹⁰ Cate' chigula'dödē' ga nacu'ē bönni' zí'alō, en bönni' buropi cō', bönni' na' rōjáquiē' gudil-la tapa chí'ē, bila'dxinē' ga zoa le néquini guíē le nusayaj ga nu riyaza lidxi guíē na', ga nu rurúaj la' nōza que yōdzō. Ga nu riyaza na', rácasō que guyalaj. Cate' bila'rúajē' ni', gula'zē'ē ga ridzaga ia'turō nōza, ate' ni' gubáz lá'ayi na' la' bulá'alentē' Pedro.

¹¹ Ní'irō réquibe'enē' Pedro, ate' lu icja ládxi'da'azē' gunnē':

—Na'a chinözda' le nácatē gusól-lē'ē Xanru' gubáz lá'ayi queē', en busölē' neda' lu nē'ē Herodes, en lu yúgu'tē le gulē'ennē' bönni' judío ilunē' quia'.

¹² Tsanni ni' yu'ē nōza Pedro, rizá' ládxi'ē ca naca lē na' guca, ate' bidxinē' lídxinu María, xiná'abi' Juan, bi'i na' zoa

ia'tú labi' Marcos. Lu yu'u na' nudúbigaca bönachi zián ta'yéajlë' Cristo, en tu'lidza Dios.

13 Cate' bulidzë' Pedro ra' yu'u lö'a, birúajbi' bi'i nigula lëbi' Rode para inözibi' nuzxi na'.

14 Cate' búnbë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelö böajbi' lu yu'u, yöjtíxjöi'ibi' nupa nacua' ni', rnnabi':

—Zoë' Pedro ra' yu'u.

15 Ní'irö gulë' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixín queë' na'.

16 Tsanni na' biti' zoa dxíë' Pedro rulidzë' nupa nacua' lu yu'u. Cate' gula'saljë' yu'u, gula'nítisinë' cate' bila'lé'enë' lë'.

17 Ní'irö guchisa në'ë Pedro para ila'cu'ë dxisö, ate' busiyönnë' légaquië' ca benë' Xanru', bubéajë' lë' lidxi guié'. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

18 Cate' za' rení' dza na', bönni' röjáquië' gudil-la gula'bö'ë böniga nacxi guca, biti'rö yu'ë Pedro lidxi guié'.

19 Ní'irö gusöl-lë'ë Herodes nupa tsöjxi'gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bëtigaca yugu' bönni' na' röjáquië' gudil-la. Ní'irö buzë'ë Herodes luyú Judea, sa'yéajë' Cesarea, ate' bugá'anë' ni'.

Ca gútië' Herodes

20 Dza ní'sö rilenë' Herodes bönachi yödzö Tiro, en yödzö Sidón. Zí'alö bönachi lu xiyüë' Herodes na' gula'söl-la' le biyadzaj quégaca bönachi lu xiyúgaca yödzö Tiro, en Sidón na', pero tu' rilenë' Herodes légaquië', biti'rö bi ta'söl-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto unë quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulë'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'.

21 Ní'irö budxië' bë' Herodes dza yönnë' légaquië', ate' dza na' gurö'ë xilatjë' ga ruchi'a rusöröë' bi raca, nácuë' lari' nazaca', en benë' libán lógaquië'.

22 Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

23 La' ná'asö la' bë'të' gubáz lá'ayi queë' Xanru' lë' tu' buzië' lë' cazë' yöl-la' ba ral-la' gaca queë' Dios. Ní'irö gurö'ë Herodes na' buzuga', ate' gútië' tu' táguba' lë'.

24 Ní'irö guca libán que xtídzë'ë Xanru', ate' gula'yán nupa nazí' lu ná'agaca le.

Le zí'alö luzuí röjéngaquië' Bernabé, en Saulo libán

25 Cate' Bernabé, en Saulo chibulu'dödë' dumí na' lu ná'agaquië' bönni' gula tapa chi'ë bönachi queë' Cristo nacu'ë Jerusalén, bulu'zé'ë ni', yöjhuöjgaquië' yödzö Antioquía. Gula'chë'ë-bi' ca' bi'i Juan, zoa ia'tú labi' Marcos.

13

1 Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzö Antioquía, tunë' tu zxön bönachi queë' Cristo lu yödzö na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxönlenë' tsözxön Herodes, bönni' rinná bë'ë luyú Galilea).

2 Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Guli'béaj-gáquië' quez quia' Bernabé, en Saulo para tsöjéngaquië' dxin na' bulidza' légaquië' ilunë'.

3 Budxi gulunë' gubasa, en gulu'ilenë' Dios didza', ní'irö gula'xóa ná'agaquië' chopë' ni, en gula'söl-lë'ë légaquië'.

Yugu' gubáz nasöl-lë'ë Cristo tunë' libán luyú Chipre

4 Ní'irö yöjáquië' Bernabé, en Saulo yödzö Seleucia, tu' gusöl-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazí'i le Chipre.

5 Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dübë' bönni' judío luyú na', en tu'sëdë' queë' Dios. Nachë'gaquië'-bi' bi'i Juan para gunbi' légaquië' tu zxön.

6 Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë' yë'ë, en rnnë' ru'ë didza' uláz queë' Dios.

7 Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' rë'ënë' yönnë' xtídzë'ë Dios.

8 Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga bití' tséajlë'ë Dios bönni' rinná bë'ë. Bönni' udzá' na' lë' ca' Elimas tsa naca xtídzá'gaca bönachi izá'a ga na'.

⁹ Ní'irö Saulo, lè' ca' Pablo, buzóa tsutsu lahuë', zóalenë' Dios Bö' Lá'ayi lè'. Ruyúë' Elimas na'

¹⁰ en rë' lè':

—Li', bönni' rizi' yë', en bönni' huiá' dö', nacu' ca xzí'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinöza nu rë'ëni tséajlë' Lë'?

¹¹ Na'a, Xanru' usaca' zi'ë li', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudë' nilö ná'alö, riguiljë' nuzxi sön në'ë para ichë' lë'.

¹² Cate' bilé'enë' bönni' unná bë' na' lë na' guca, bubáinë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzö Antioquía luyú Pisidia

¹³ Ní'irö buzë'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'alénbi légaquië', en böajbi' Jerusalén.

¹⁴ Gudödi ni' bulu'zë'ë Perge na', en yöjáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sedë' queë' Dios, ate' lu yu'u na' gula'bö'ë.

¹⁵ Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'söl-lë'ë nu yöjödix Saulo, en Bernabé, gunné':

—Libi'ili', böchi'tu'. Channö nuá'alí' bi innali' le uzéajni'i netu', guli'nnë'.

¹⁶ Ní'irö guzuínë' Pablo, en guchisa në'ë para ila'cu'ë dxisö, gunné':

—Buli'zë nágali' le guía' libí'ili', bönni' Israel, en libí'ili', núlöli' rádxili'-në' Dios.

¹⁷ Xanru' Dios, Nu ta'yéaj ládxi'gaca bönachi Israel, gurö cazë' xuz xtó'oru', en benë' ga gula'yándë'ë cate' ni' nácagaquië' bönni' zi'tu' luyú Egipto. Len yöl-la' huáca zxön queë' bubéajë' légaquië' luyú ni'.

¹⁸ Idú choá' iz Dios biá' gulénë' quégaquië' cate' ni' gula'dë' idú luyú bidxi lu lataj cá'asö.

¹⁹ Cate' budxi busunítie' gadxi cö' yödzö gula'cuá' luyú Canaán, bunödzejë' xiyúgaca bönachi ni' quégaquië' xuz xtó'oru'.

²⁰ Gudödi ni', le guca idú ca tapa gayuá' yu' chi-un iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios.

²¹ Ní'irö gula'nábinë' Dios uzöë' tu bönni' unná bë' quégaquië'. Dios guröë' Saúl, xzí'inë' Cis, bönni' nababë'

di'a dza queë' Benjamín. Idú ca choá' iz gunná bé'enë' Saúl na' légaquië'.

22 Gudödi ni' Dios gudúë' Saúl na', ate' buzóë' David quégaquië' para inná bé'ë. Dios benë' ba nali queë' David ni, gunné': "Nözda' runë' David, xzí'inë' Isaí, le raza ládxa'a, en gunë' yúgu'të le rë'ënda' neda'."

23 Ladaj xzí'ini xí'sóë' David na' benë' Dios ga guljë' Jesús para gáquië' bönni' usölë' bönachi Israel, ca na' guzxí' lu në'ë Dios zí'atëlö gunë'.

24 Zí'alö cate' si' ilá' lahuë' Jesús, benë' Juan libán lógaca yúgu'të bönachi Israel para ulu'bí'i ládxi'gaca, en ila'dila nisa.

25 Cate' ni' chizóa údxi gunë' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guidë'. ¡Na'a, buli'yútsöca! Chizóë' idxinë' bönni' na' ga zoa' ni, ate' neda' bití' naca' lesaca' ilecja' xiráchuë' nudë'ë."

26 'Libí'ili', böcha'a, yugu' xzí'ini xí'sóë' Abraham, en núlöli' zóali' ni, en rádxili'-në' Dios. Dios caz gusöl-lë'ë queëli' didza' ni para uláli'.

27 Nupa nacuá' Jerusalén, en bönni' ta'nná bé'enë' légaquië' bití' bulu'únbë'ë Jesús, en bití' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátië'.

28 Sal-la' bití' budzöli le nabáguë'ë Jesús gátië', gula'nábinë' Pilato inná bé'enë' bönni' ilútië' Lë'.

29 Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zö'tjë' Lë' lë'e yaga cruz, en bulu'cáché'ë Lë' yeru ba.

30 ¡Ní'irö Dios busubanë' Lë' lu yöl-la' guti!

31 Zían dza bulu'i lahuë' Jesús lógaca nupa yöjácálen Lë' tsözxön cate' ni' buzë'ë luyú Galilea, en bidxinë' Jerusalén. Na'a, yugu' bönni' na' tunë' ba nali queë' lógaca bönachi.

32 'Caní naca, lësca' netu' ni rusiyöntu' libí'ili' didza' dxi'a ca naca lë na' guzxí' lu në'ë Dios gunë' quégaquië' xuz xtó'oru'.

33 Lë na' guzxí' lu në'ë Dios quégaquië', Lë cazë' benë' ga budxín queëru', nácaru' xzí'ini xí'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza' Li'."

34 Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gonna' quiu' le nácgaca bica' ba guzxí' lu na'a lahuë' David."

35 Que lë ni na' nazúaj ca' lu guichi, ga zoa ia'tú salmo, le rnna caní: "Bití' gu'u lataj ugá'anë' bönni' lá'ayi quiu' ga initi le naca cazë'."

36 Le guca queë David naca bë'. Gudödi benë dxin lógaca bönachi uládz queë, ca na' gunná bé'enë Dios lë, ní'irö gútië, ate' gula'gu'ë lë yeru ba ga nacu'ë xuz xtá'ahuë, ate' guniti le naca cazë'.

37 Na'a, ca naca queë Jesús na', Dios busubanë Lë, ate' biti' guniti le naca cazë' lu yeru ba.

38 Libí'ili', böcha'a, ral-la' inözili' lë ni rusiyöntu' libí'ili'. Dios runiti lahuë libí'ili' ca naca dul-la' nabága'li' ni'a que le benë Jesús ni.

39 Na'a, Dios ruúnë tsahui' yúgu'të nupa ta'yéajlë Jesús, rugúë' yugu' dul-la' na' le cabí guca ugúa xibá queë Dios, le bë'ë Moisés.

40 Guli'gún chi'i cuinli' na'a para cabí gaca queëli' le nazúaj lu guichi le gula'nnë bönni' gulu'ë didza' uládz queë Dios, le rnna caní:

41 Buli'yútsöca', libí'ili', bönni' cabí tunë neda' bal.

Ubánili', pero lu yöl-la' cabí réajlë queëli' gátili'.

Neda' guna' tu dxin dza ni zóali',

en sal-la' nu uluí'i libí'ili' le ruluí'i dxin na', biti' ca' tséajlë'ëli'.

42 Cate' bulu'rúajë Pablo, en yugu' bönni' na' dzágagaquië lë' lu yu'u ga na' tu'dubë bönni' judío, en tu'sedë queë Dios, ní'irö bönachi ni' guláta'yu lógaquië' ulu'sëdinë légaquië' ca naca lë ni cate' idxín ia'tú dza lá'ayi quégaquië'.

43 Cate' ni' bulu'rúajë lu yu'u na' bönni' nudúbigaquië' ni', zían bönni' judío, en bönni' nuhuöácagaquië' judío, yugu' bönni' ta'yéaj ládxi'gaquië' Dios, gulunë' tsözxön Pablo, en Bernabé. Chopë' ni' gulu'ilenë' légaquië' didza', en bulu'së'ë ládxi'gaquië' para ilácatica'së' tsutsu, ilunë' löza le ruzá' ládxië'ë Dios quégaquië'.

44 Ia'xunu' gubidza ca' cate' bidxín ia'tú dza lá'ayi quégaquië', bulu'dubë látu'biqui' yúgutë bönachi lu yödzö na' para ila'yönnë xtídzë'ë Dios.

45 Ní'irö bulu'zxé'enë bönni' judío biti' ta'yéajlë'ë, cate' bila'lé'enë bönachi zían na', ate' gula'nnë que didza' ruë Pablo, en gula'dá'báguë'ë le.

46 Ní'irö lu yöl-la' rugu ladxi' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' libí'ili' z'älö xtídzë'ë Dios, pero tu' rucá'anali' cá'asö didza' ni, en rusáca'li' queëli' biti' nácali' lesaca' sí'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a.

47 Lësca' caní gunná bé'enë Xanru' Dios netu' guntu' libán queë Cristo lógaca bönachi izá'a, en naca ca rnna didza' na' bë'ë Dios ca naca queë Cristo, gunné':

Nuzóa' Li' para gacu' bení' quégaca bönachi izá'a,

en gacu' Nu usólá bönachi idútë yödzölió.

48 Cate' bila'yöni bönachi izá'a nacuá' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú.

49 Caní guca, guzë xtídzë'ë Xanru', ate' bila'yöni bönachi yúgu'të yödzö nacuá' luyú ni'.

50 Ní'irö bönni' judío biti' ta'yéajlë'ë na' gula'gú'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gú'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'ilö lu xiyúgaquië'.

51 Ní'irö Pablo, en Bernabé bulu'quínnajë' yu bëchtö da' la' lábagaquië' le rulu'í nagá'ana xíguia' nabága'gaca bönachi lu yödzö na', ate' yöjáquië' lu yödzö Iconio.

52 Bulu'dzéjanë' bönni' yödzö Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

14

Le gulunë' Pablo, en Bernabé lu yödzö Iconio

1 Cate' bila'dxinë' Pablo, en Bernabé yödzö Iconio, gula'yu'ë tsözxön lu yu'u ga tu'dubë' bönni' judío, en tu'sëdë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo.

2 Ní'irö bönni' judío biti' ta'yéajlë'ë gula'gú'u yöl-lë'ë bal-lë' bönni' izá'a, para cabí ila'lé'enë' dxi'a böchi'ru' ta'yéajlë'ë Cristo.

3 Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxi' gulu'ë xtídzë'ë Dios, tu' tu'zxöni ládxi'gaquië' Xanru'. Lë cazë' Xanru' bulu'e naca iduté li didza' tu'ë ca naca le ruzá' ládxe'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi.

4 Ní'irö bönachi lu yödzö na' bila'rúaj choplö. Bal-lë' gula'dë'ë bönni' judío biti' ta'yéajlë'ë, ate' ia'bal-lë' gula'dë'ë Bernabé, en Pablo, gubáz na' nasöl-lë'ë Cristo.

5 Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë dó' quégaquië' gubáz na' nasöl-lë'ë Cristo, en ulu'ladxë' légaquië' guiöj.

6 Cate' téquibe'enë' Pablo, en Bernabé lë ni, bulu'zxúnnajë' ni', yöjáquië' yödzö Lистра, en Derbe luyú Licaonia, ate' gula'dödë' yúgu'të yödzödo' idú gásibi'ilö ni',

7 gapa ni' gulunë' libán que didza' dxi'a ca naca queë' Cristo.

Tu'ladxë' Pablo guiöj lu yödzö Lистра

8 Zoë tu bönni' lu yödzo Lистра biti' raca së'ë. Rõ'ösë' ni' tu cabí rizë'ë cate' ni' guljë', en catu caz guzë'e ni'ë.

9 Bönni' ni ruzë náguië' didza' ru'ë Pablo. Pablo buyúë' lë', en gúquibe'enë' réajlë'ë Cristo para huóáquië'.

10 Ní'irõ Pablo bë'ë zidzaj didza', en rë' lë':

—Guzuí.

La' guxítitë' bönni' na', en guzë'e ni'ë.

11 Cate' yugu' bönni' Lистра bila'lé'enë' lë na' benë' Pablo, gula'sí lógaquië' tu'ë zidzaj didza' lu didza' tu'ë bönni' Licaonia na', ta'nnë':

—¡Yugu' dios bönni' ni! ¡Nuhuõtjagaquië' ga zóaru', en tu'luí'í cuíngaquië' ca nácaquië' bönni'!

12 Gula'nnë' Bernabé na' náquië' Júpiter, ca lë' dios lo quégaquië', ate' gula'nnë' náquië' Pablo Mercurio, ia'tú dios quégaquië'. Caní gula'nnë' tu' ru'ë didza' Pablo ca na' ta'nnë' runë' Mercurio na'.

13 Zoa yudo' que Júpiter ga ni' nacu'ë, cuíta nõza ga ni' ta'yaza bönachi lu yödzo na'. La' bidxintë' bixúz que Júpiter na', nachë'ë-ba' yugu' bëdxi, en nu'ë ca' yugu' bregui' yõj, ate' dzágagaca bönachi zían lë'. Gulë'ënnë' ilútië'-ba' bëdxi na' lógaquië' Pablo, en Bernabé para ila'yéaj ládxi'gaquië' légaquië' ca tunë' quégaca dios quégaquië'.

14 Cate' Bernabé, en Pablo, gubáz na' nasöl-lë'ë Cristo, guléquibe'enë' lë ni, gula'chözë' lari' nácaquië'. Tu'huí'ininë' tu' tunë' bönni' ni le cabí ral-la' ilunë', ate' gula'xítie', en yõjcu'ë gatsaj láhui'lõ bönachi zían na', en gulu'ë zidzaj didza', të' légaquië':

15 —¡Libí'ili' bönachi! ¿Bizx que runli' caní? Lësca' bönni' ca libí'ili' nácatu', en riguíxjöi'itu' libí'ili' lë ni caz ral-la' ucá'anali', le cabí nácatë, para guéquili' queë' Dios ban. Dios ni benë' lúzxiba, en yödzülió, en nísado', en yúgu'të le nacua' tu tu lataj na'.

16 Yugu' iz chigula'dödi, gulún yúgu'të bönachi ca rnnasõ que queëguequi, ate' Dios biti' buzáguë'ë xinõzguequi,

17 pero benë' ga gulaca le tun ba nali' queë', yugu' le náca-gaca dxi'a benë' quégaquië'. Risöl-lë'ë queëru' nisa guiõj, en runë' ga ta'yán le rázaru'. Ruzölaj rudzé'enë' rë'u, en runë' ga rudzeja ládxi'ru'.

18 Sal-la' Bernabé, en Pablo gulë' légaquië' caní, cánnisõ bila'déli'në' bulu'záguë'ë xinõzguequi bönachi zían na', para cabí ilútië'-ba' bëdxi na' lógaquië'.

19 Ní'irõ bal-lë' bönni' judío biti' ta'yéajlë'ë, narúajgaquië' Antioquía, en Iconio, bila'dxinë' ni', ate' gula'gú'u yöl-lë'ë bönachi zían na'. Ní'irõ yúgu'të' bulu'ladxë' Pablo guiõj, en gulá'ayõjë' lë' ní'ilõ ra' yödzo na', tu' téquinë' chinátie'.

20 Ní'irö bulu'dubë' yugu' bönni' ta'yéajlë'ë Cristo idú gásibi'ilö ga dë' Pablo. Guyasë' lë', en buázië' lu yödzö na'. Cate' za' rení' ia'tú dza, burúajlenë' Bernabé, yöjáquië' yödzö Derbe.

21 Lu yödzö ni' gulunë' libán que didza' dxi'a ca naca queë' Jesucristo, ate' bönachi zían ni' gula'yéajlë' Cristo. Gudödi ni' yöjhuöjgaquië' Lистра, en Iconio, en Antioquia.

22 Cate' gula'dödë' Bernabé, en Pablo yugu' yödzö na', bulu'tipë' ládxi'gaquië' bönni' ni' ta'yéajlë'ë Cristo, en bulu'sé'ë ládxi'gaquië' ulu'gá'anë' tsutsu ca na' ta'yéajlë'ë Lë'. Gulë' légaquië':

—Rë'u tsaza cázaru' ga rinná bë'ë Dios, run bayudxi quí'i sáca'ru' zían le gaca queëru'.

23 Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulu'ilenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

Pablo, en Bernabé tu'dxinë' Antioquia luyú Siria

24 Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia.

25 Budxi gulunë' libán que xtídzë'ë Cristo lu yödzö Perge, yöjáquië' yödzö Atalia.

26 Bulu'zë'ë ni', ate' gula'benë' tu lë'e barco, en bulu'dxinë' yödzö Antioquia, ga na' nacu'ë bönni' queë' Cristo, bönni' na' gula'söl-lë'ë légaquië' tsöjéngaquië' libán, cate' ni' gula'gu'ë légaquië' lu në'ë Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'.

27 Cate' ni' bulu'dxinë' Antioquia, bulu'dubi bönachi queë' Cristo nacua' ni'. Ní'irö Pablo, en Bernabé bulu'siyönnë' légaquië' ca náca gaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'.

28 Pablo, en Bernabé bulu'gá'analenë' bönachi ni' ta'yéajlë' Cristo zían dza.

15

Tu'dubë' huen dxin queë' Cristo lu yödzö Jerusalén

1 Ní'irö bal-lë' bönni' narúajgaquië' luyú Judea bila'dxinë' yödzö Antioquia, ate' bulu'sédinë' böchi'ru', bönni' izá'a ni', ta'nnë':

—Channö cabí irugu lu xipéla'li' ca nalëbitu' runtu' ca na' gunná bë'ë Moisés, biti' gaca uláli'.

2 Ní'irö Pablo, en Bernabé gula'díl-lalenë' légaquië' didza', ate' gúcada' dzatsa. Gudödi ni', gula'böë' Pablo, en Bernabé len ia'bal-lë' bönni' böchi'ru' ni', para tsöjáquië' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi queë' Cristo ni', para iluí'ilenë'

légaquië' didza' ca naca lë ni raca, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzo Fenicia, en luyú Samaria, ate' bulu'siyönnë' böchi' luzá'aru' yugu' lataj ni' ca guca, bulu'huóáquië' bönni' izá'a queë' Cristo. Lë ni ben ga bulu'dzéjanë' yúgu'të böchi' luzá'aru' ni'.

⁴ Cate' bila'dxinë' Pablo, en Bernabé lu yödzo Jerusalén, yugu' bönni' queë' Cristo nacu'ë ni', enca' yugu' gubáz nasól-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'.

⁵ Ní'irö gula'zuinë' bal-lë' bönni' yudo' fariseo, bönni' ta'yéajlë'ë Cristo, en ta'nnë':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnaa bë' xibá queë' Moisés.

⁶ Ní'irö bulu'dubë' gubáz nasól-lë'ë Cristo len bönni' gula tapa chi'ë bönachi queë', para ulu'chi'a ulu'söröë' lë ni raca.

⁷ Gudödi gulu'ë zían didza', guzuinë' Pedro, en gudxë' légaquië':

—Libi'ili', böcha'a. Nöz quézili' ca guca dza ni'te, Dios gurö cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo.

⁸ Dios, Nu nunbë' caz le yu'u icja ládxi'do'gaca bönachi, buzöë' le naca bë' runë' légaquië' bal, gusól-lë'ë Dios Bö' Lá'ayi quégaquië', ca na' gusól-lë'ë Lë' queëru'.

⁹ Biti' butsë'ë ca benë' quégaquië', en queëru', en lësca' bunë' dxi'a icja ládxi'do'gaquië' tu' ta'yéajlë'ë Cristo.

¹⁰ Na'a, ¿bizx que run leli'-në' Dios, rusubága'li' yua' xiyéngaca böchi' luzá'aru'? Yua' ni, le naca le ta'nná bë' xibá queë' Moisés, bití' guca guá'aru' rë'u, en bití' guca ilu'ë xuz xtó'oru' le.

¹¹ Rë'u ni, réajlë'ëru' nuláru' ni'a que le buzá' ládxe'ë Xanru' Jesús queëru', en ca na' nuláru' rë'u, ulu'lë' ca' légaquië'.

¹² Cate' budxi bë'ë Pedro didza' ni, yúgu'të' gula'cu'ë dx-isö, ate' bulu'zë nágagaquië' didza' gulu'ë Bernabé, en Pablo. Bulu'siyönnë' légaquië' yugu' le taca bë', en le tun ga tu'bani bönachi, yugu' le benë' Dios lu ná'agaquië' ga nacuá' bönachi izá'a.

¹³ Cate' Bernabé, en Pablo budxi gulu'ë didza' ni, bubí'ë didza' Jacobo, gunnë':

—Libi'ili', böcha'a. Buli'zë nágali' le guía' libí'ili'.

¹⁴ Simón Pedro chigudíxjöi'i quézinë' rë'u ca benë' Dios, bulu'e lahui yöl-la' huáca queë' le zí'alö luzuí lógaca yugu'

bönachi izá'a para bubéajë' quez queë' bönachi nútsa'gaca ládjagaquië'.

15 Ca naca lë ni röjlözgaca xtídza'gaquië' bönni' gulu'ë didza' uláz queë' Dios, ca na' nazúaj lu guichi lá'ayi, rna:

16 Dza tödi lë ni huöda', en uchisa' Nu inná bë', bönni' na' tsázië' xilatjë' David.

Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bë'ë David

17 para ulu'guilaj ia'zica'rö bönachi Xanru'.

Ulu'guilaj bönachi izá'a Lë',

ate' si' láguequi: Bönachi Queë' Dios.

18 Caní rnnë' Xanru',

Nu na' dza ni'te ben ga naca bë' yúgu'të lë ni.

19 'Que lë ni na' runi neda' biti' ral-la' gun níguiru' bönachi izá'a, nupa tu'huóaca queë' Dios.

20 Ral-la' uzúajru' lu guichi quégaquië' ulu'cá'anë' yugu' le biti' ral-la' ilahuë', le nadödi lógaca budó' guiöj budó' yaga, en cabí ilunë' le ruá' dö', en cabí ilahuë' xipéla'gacaba' böa' guixi' biti' narúaj-gácaba' rön, en cabí ilahuë' xichönba' bíti'tës böa' guixi'.

21 Dza ni'te nacuá' yúgu'të yödzö nupa tun libán lu yu'u gapa tu'dubë' bönni' judío, en tu'sedë' queë' Dios. Tunë' libán ni' que le buzúajë' lu guichi Moisés. Tu'laba cazë' le yugu' dza lá'ayi.

22 Ní'irö gula'yaza ládxi'gaquië' gubáz nasöl-lë'ë Cristo, en bönni' gula tapa chi'ë, en yúgu'të bönachi queë' Cristo, ila'böë' bal-lë' bönni' ládjagaquië', en ila'söl-lë'ë légaquië' Antioquía. Tsöjácalenë' Pablo, en Bernabé. Chopë' na' gula'böë', légaquië' Judas, zoa ia'tú lë' Barsabás, enca' Silas. Nácagaquië' bönni' lo ládjagaquië' böchi'ru' ni'.

23 Bulu'zúajë' lu guichi le bulu'dödë' lu ná'agaquië' ilu'ë, le rna caní:

"Netu', gubáz nasöl-lë'ë Cristo, en bönni' gula tun chi'ë, en yugu' böchi'ru', rugápatu' libí'ili' Dios, böchi'tu', nácali' bönachi izá'a zóali' Antioquía, en yugu' yödzö luyú Siria, en Cilicia.

24 Biyönitu' ca tun bal-la bönachi bila'rúaj ga zóatu', nupa na' biti' nasöl-la'tu'. Dutsá'agaquië' libí'ili' len le ta'nnë', en tu'bequi böniga icja ládxi'do'oli', tu' ta'nná bë'ë irugu lu xipéla'li', en gunli' ca rinná bë' xibá queë' Moisés.

25 Que lë ni na' guyaza ládxi'tu' cate' chibén tuz xtídza'tu', gurötu' chopë' bönni', nupa isöl-la'tu' para uduyúgaquië' libí'ili'. Guídlengaquië' Bernabé, en Pablo, nupa na' nadxí'iru'.

26 Chiyöjáquië' Bernabé, en Pablo gapa guzóa bönadxi ilátië' tu' nadxí'iguequinë' Xanru' Jesucristo.

27 Caní naca, risöl-la'tu' Judas, en Silas ga zóali'. Chopë' ni ulu'siyönnë' libí'ili' lë ni ruzúajtu' lu guichi ni.

28 Dios Bö' Lá'ayi buluí'inë' netu' le raza ládxë'ë, en lësca' caní raza ládxi'tu' netu', bití' usubága'rötu' libí'ili' yua', le naca le rinná bë' xibá queë' Moisés, pero yugu' lë nisö run bayudxi gunli':

29 Bití' gáguli' le nadödi lógaca budó' guiöj budó' yaga.

Bití' gáguli' rön.

Bití' gáguli' xipëla'gacaba' böa' guixi' bití' narúaj-gácaba' rön.

Bití' gunli' le ruá' dö'.

Channö gun chi'i cuinli' para gunli' ca rna yugu' lë ni, gunli' dxi'a."

30 Caní guca, yugu' bönni' na' nasöl-la'gaquië' bila'dxinë' Antioquía. Bulu'tubë' bönachi queë' Cristo nacúa' ni', ate' gula'gu'ë guichi na' lu ná'agaquië'.

31 Cate' chibudxi bulu'labë' le, bulu'dzéjanë' ca naca le nazúaj lu guichi na', le ruhué tsahui' légaquië'.

32 Tu' nácagaquië' Judas, en Silas bönni' tu'ë didza' uláz queë' Dios bulu'huë tsáhuë'ë légaquië', en bulu'tipë' ládxi'gaquië' böchi'ru' ni', bulu'gunë' dxin didza' zían le gulu'ilenë' légaquië'.

33 Gudödi bulu'dzënë' Judas, en Silas ni' nababa dza, ní'rö böchi'ru' ni' bulu'zenë' légaquië' dxi'a didza' para tsöjhuöajgaquië' Jerusalén ga nacü'ë bönni' gula'söl-lë'ë légaquië'.

34 Guyaza ládxë'ë Silas bugá'anë' Antioquía.

35 Bulu'gá'anë' ca' Pablo, en Bernabé Antioquía na', ate' bulu'sédinë' bönachi, en gulunë' libán que xtídzë'ë Xanru'. Lësca' caní gulún zíanrö ca' bönachi.

Risí lahuë' Pablo röjenë' libán le buropi luzuí

36 Gudödi nababa dza Pablo gudxë' Bernabé:

—Uyéajru' leyúbölö tsöjyúgacaru'-në' böchi'ru' nacü'ë yúgu'të yödzo gapa chiyöjenru' libán que xtídzë'ë Xanru', para ilé'eru' nacxi raca quégaquië'.

37 Gú'unnë' Bernabé ila'chë'ë-bi' bi'i Juan Marcos, tséajlenbi' légaquië',

38 pero bití' guyaza ládxë'ë Pablo ila'chë'ë-bi' tséajlenbi' légaquië' tu' bulá'alenbi' légaquië' luyú Panfilia, en bíti'rö yöjénlenbi' légaquië' dxin queë' Xanru'.

39 Bití' guca tuz xtídzä'gaquië' Bernabé, en Pablo ga bidxintë bulu'lá'alenë' tuë' ia'tuë'. Bernabé guchë'ë-bi' bi'i Marcos, ate' gula'benë' tu lë'e barco, yöjáquië' luyú Chipre.

40 Pablo guröë' Silas para tséajlenë' lë'. Ní'irö yugu' böchi'ru' gula'gu'ë légaquië' lu në'ë Xanru', en gula'nábinë' Lë' uzá' ládxë'ë quégaquië', ate' bulu'zë'ë Pablo, en Silas ni'.

41 Gula'dödë' yugu' yödzo luyú Siria, en Cilicia, ate' bulu'tipë' ládxi'gaca bönachi queë' Cristo nacua' ni'.

16

Bi'i Timoteo runbi' tsözxön Pablo, en Silas

1 Gudödi ni' bila'dxinë' Pablo, en Silas yödzo Derbe, en yödzo Litra. Zóabi' tu bi'i bönni' ni', réajlë'ëbi' Cristo, lëbi' Timoteo. Nácabi' xzi'ininu tu nigula judío réajlë'ënu Cristo, pero xúzibi' biti' náquië' judío.

2 Yugu' böchi'ru' nacu'ë Litra, en Iconio tunë' ba nali queëbi', ta'nnë' runbi' le naca dxi'a.

3 Gú'unnë' Pablo tséajlenbi' bi'i ni lë', ate' gudélë'ë-bi', en guchúguië' lu xipéla'bi' ca tun bönachi judío. Caní benë' para cabí ila'nnë' queëbi' bönni' judío nacu'ë yugu' yödzo ni', tu nöziguequinë' yúgu'të' xúzibi' biti' náquië' judío.

4 Cate' Pablo, en nupa dzágagaca lë' gula'dödë' gapa nacua' yödzo ni', tu tu yödzo na' bulu'dödë' lu ná'agaquië' yugu' böchi'ru' nacu'ë gapa ni' yugu' xibá na' gulunë' gubáz nasól-lë'ë Cristo, en bönni' gula tapa chi'ë bönachi queë', nacu'ë Jerusalén. Bulu'dödë' yugu' xibá ni lu ná'agaquië' para ilunë' ca rinná bë' xibá na'.

5 Caní guca, bönachi yúgu'të' cö' bönachi queë' Cristo bila'dipa ládxi'gaca ca naca le réajlë'ëru' Cristo, ate' gula'yán tu tu dza.

Tu bönni' Macedonia rulidzë' Pablo lu yëla bëchigal

6 Pablo, en bönni' dzágagaquië' lë' gula'dödë' luyú Frigia, en luyú Galacia, tu' buzáguë'ë Dios Bö' Lá'ayi xinözgaquië', para cabí ilunë' libán que xtídzë'ë Xanru' luyú Asia.

7 Cate' bila'dxinë' luyú Misia, gulë'ënnë' tsöjáquië' luyú Bitinia, pero Dios Bö' Lá'ayi, Nu risól-lë'ë Jesús queëru', biti' bë'ë légaquië' lataj.

8 Ní'irö gula'dödë' gala' ga dë Misia, ate' yöjáquië' lu yödzo Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo.

9 Lu yödzo ni' Dios bulu'ínë' Pablo tu le bilé'enë' lu yëla bëchigal. Tu bönni' Macedonia bulu'í lahuë' lë', zuínë', en ráta'yüë' lahuë' Pablo, rnnë': "Gudödi ladztu', lu xiyú Macedonia, en gúcalen netu'."

10 Cate' bilé'enë' Pablo lë ni, lë na' bulu'í lahuí lë', la' bë' ládxi'tëtu' tséajtu' luyú Macedonia, tu' gúquibë'etu' Dios chibulidzë' netu' tsöjentu' libán que didza' dxi'a lógaca bönachi luyú ni'.

Le gulunë' Pablo, en Silas lu yödzö Filipos

11 Ní'irö gurentu' lë'e barco, en buzá'atu' Troas. Gudöditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis.

12 Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsölá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz quégaquië'. Lu yödzö nisö guzóatu' nababa dza.

13 Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Díos. Gurö'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'.

14 Nútsa'nu ládjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Díos, ate' buzë náganu didza' ru'ë Pablo, ate' Xanru' gúcalenë'-nu para guzxí' lu ná'anu didza' na' bë'ë.

15 Ní'irö bidílanu lënu nisa, ate' gula'dila ca' nisa bönachi nacuá' lídxinu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

16 Ia'tú le guca tu dza tsanni ni' zéajtu' ga na' rulidztu'-në' Díos, birúajbi' dutságabi' tu bi'i nigula netu' yu'u lëbi' bö' le run ga rinnë yá'abi'. Len yöl-la' rinnë ya'a queëbi' runbi' ga ta'zídë'ë dumí yugu' bönni' xanbi'.

17 Bi'i nigula ni sudunóbi'-në' Pablo, en netu', ru'íbi' zidzaj didza', rnnabi':

—¡Yugu' bönni' ni tunë' xichinë' Díos nayëpisëtërë'!
¡Tu'siyönnë' libí'ili' naca gaca uláli'!

18 Caní benbi' zían dza. Cate' bíti'rö guyaza ládxe'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' li'. ¡Burúaj icja ládxi'do'obi' bi'i nigula ni!

La' ní'isö burúajtë bö' na'.

19 Cate' bila'lë'enë' xanbi' chiburúaj bö' na' run ga rinnë yá'abi', en bíti'rö naca löza ila'zi'ë dumí ni'a queëbi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yé'ëyi.

20 Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácaquië' judío, en tunë' ga tu'tsatsa bönachi yödzö ni.

21 Tu'sëdinë' le cabíral-la' si' lu ná'aru', en biti'ral-la' gunru', tu' nabábaru' Roma.

22 Ní'irö bönachi zían ni' gula'dá'baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácugaquië' Pablo, en Silas, ate' gula'guinë' légaquië' gubá'ayi.

23 Gudödi gula'guinë'ë légaquië', gula'gu'ë légaquië' lidxi guié. Gula'nná bé'enë' bönni' rusayjë' lidxi guié na' gun chí'idë'ë légaquië'.

24 Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guié na', en gulu'ë ní'agaquië' yeru yaga ta'zön ní'agaquië'.

25 Idú guluhuëla Pablo, en Silas tu'lidzë' Dios, en tul-lë' yöl-la' ba queë' Dios, ate' ta'yönnë' yugu' bönni' nadzúngaquië' lidxi guié na'.

26 Ní'irö tsárido'os gudödi budó' zxu' bach. Caní guca ga bidxintë guzxizi xilibi zö'ö lidxi guié na', ate' la' gula'yálatë yúgu'të gapa nu riyaza, ate' bulu'huédxi ca' yugu' du guié nága'gaca bönni' nadzúngaquië' ni'.

27 Bubanë' bönni' na' rusayjë' lidxi guié. Cate' bilé'enë' nayálgagaca gapa nu riyaza lidxi guié na', gulecjë' guié tuchi' queë' para guti cuinë', tu' réquinë' chibulu'zxúnnajë' bönni' nadzúngaquië' lidxi guié na'.

28 Ní'irö Pablo zidzaj bulidzë' lë', gunné':

—¡Biti' bi gúni cuinu', tu' zóatu' ni yúgu'tëtu'!

29 Ní'irö bönni' na' gunabë' guí, ate' gudá'atë' lu yu'u lidxi guié na'. Guzxíidë'ë lu yöl-la' radxi, ate' biyéchuë' xiní'agaquië' Pablo, en Silas.

30 Cate' chinubéajë' légaquië' lidxi guié na', gudxë' légaquië':

—Libi'ili', bönni', ¿bizxi ral-la' guna' para ulá'?

31 Légaquië' të' lë':

—Guyéajlë'ë Xanru' Jesucristo, ate' uló' li', en lësca' caní ulu'lágaca bönachi nacua' lidxu'.

32 Gulu'ilenë' lë' didza' ca naca xtídzë'ë Xanru', dzágagaca lë' yúgu'të bönachi nacua' lidxë'.

33 La' ná'asö, ni' naca chi'i dzö'ölö la' guchë'të' légaquië', ate' yójtibë' légaquië' ga dxíagaquië' huë'. Gudödi ni', la' bidílatë' nisa, ate' gula'dila ca' nisa yúgu'të bönachi nacua' lidxë'.

34 Ní'irö guchë'ë légaquië' lidxë', en bë'ë le gulahuë'. Rudzéjanë' lë', en tu'dzeja ca' yúgu'të bönachi nacua' lidxë' tu' ta'yéajlë'ë Dios.

35 Cate' za' rení' dza na', yugu' bönni' yúlahui' gula'sól-lë'ë ni'a ná'agaquië', ate' gulë' bönni' na' rusayjë' lidxi guié:

—Busán-gáquië' bönni' na'.

36 Ní'irö bönni' na' rusayjë' lidxi guié gudíxjöi'inë' Pablo didza' ni, gunné':

—Gula'sól-lë'ë bönni' yúlahui' didza' usana' libí'ili'. Na'a, guli'rúaj, en buli'huöaj dxí'ado' ga rizóali'.

³⁷ Ní'irö birúajë' Pablo, en gudxë' yugu' ni'a ná'agaquië' bönni' yúlahui' na', gunnë':

—Chigula'guinë' netu' lógaca bönachi sal-la' biti' narúguini queëtu' ca rinná bë' xibá, en gula'gu'ë netu' lidxi guié, ate' netu' ni nabábatu' Roma. ¿Naru' tu'santsë' netu' bagáchi'sö? ¡Biti' ca' gaca! ¡lídigarë' légaquië' udusángaquië' netu'!

³⁸ Yöjhuöjgaquië' ni'a ná'agaquië' bönni' yúlahui' na', en bulu'siyönnë' yugu' bönni' yúlahui' didza' ni, ate' légaquië' guládxinë' cate' bila'yönnë' nabábagaquië' Pablo, en Silas Roma.

³⁹ Cate' bila'dxinë' lidxi guié ni', guláta'yuë' lógaquië' Pablo, en Silas cabí ulu'subáguë'ë légaquië' xíguia'. Ní'irö gula'béajë' légaquië' lidxi guié na', en guláta'yuë' lógaquië' ulu'rúajë' yödzö na'.

⁴⁰ Ní'irö bila'rúajë' Pablo, en Silas lidxi guié na', ate' gula'yázië' lídxinu Lidia. Cate' chibila'lé'enë' böchi'ru' nacu'ë ni', bulu'chízië' didza' icja nágagaquië', en la' bulu'zá'atë' ni'.

17

Yugu' bönachi Tesalónica tunë' dzatsa

¹ Gula'dödë' Pablo, en Silas lu yödzö Anfípolis, en lu yödzö Apolonia, ate' bila'dxinë' lu yödzö Tesalónica, ga ni' zoa tu yu'u ga tu'dubë' bönni' judío, en tu'sëdë' queë' Dios.

² Bugá'anë' Pablo ni' idú galaj dza, ate' ca run cazë', guyijë' ga zoa yu'u na' cate' naca dza lá'ayi quégaquië' bönni' judío, ate' bë'lenë' légaquië' didza'.

³ Buchila lá'anë', en buluí'inë' légaquië' rusëdi le nazúaj lu guichi lá'ayi run bayudxi qui'i sáquë'ë Cristo, Bönni' na' tunë' löza bönni' judío udusölë' légaquië', ate' tödi gátië' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali'! ¡Bönni' ni náquië' Cristo!

⁴ Ní'irö bal-lë' gula'yéajlë'ë Cristo, ate' gulunë' tsözxön Pablo, en Silas. Lësca' caní zían bönni' izá'a, bönni' ta'yéaj ládxi'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo.

⁵ Ní'irö yugu' bönni' judío biti' ta'yéajlë'ë, lu yöl-la' ruzxé'e quégaquië' Pablo, bulu'tubë' yugu' bönni' biti' nácagaquië' tsahui', bönni' ta'dasë' ca'. Cate' chibulu'tübë' bönachi zían, gulunë' ga gulún dzatsa idú lu yödzö na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa.

⁶ Cate' biti' bulu'dzölinë' Pablo, en Silas, gula'béajë' Jasón, en ia'zica'rë' böchi'ru' nacu'ë ni', ate' gula'ché'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idütë yödzölió chibila'dxinë' ca' ni.

⁷ Jason ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': "Zoë' ia'tué' bönni' rinná bë'ë, lë' Jesús."

⁸ Cate' bila'yönnë' yugu' bönni' lu yödzö, en yugu' bönni' yúlalui' na' lë ni, gula'bö'ë böniga.

⁹ Ní'irö, gudödi gula'zi'ë bönni' yúlalui' dumí le bulu'cá'anagarë' Jason, en ia'zícá'rë' bönni' na', bulu'sanë' légaquië'.

Le gulunë' Pablo, en Silas lu yödzö Berea

¹⁰ Ní'irö yugu' böchi'ru' ni' la' gula'söl-la'të' Pablo, en Silas, ni' naca chi'i dzö'ölö, ate' söjáquië' yödzö Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios.

¹¹ Gulácarë' tsahui' bönni' ni ca bönni' nacu'ë Tesalónica, tu' gula'zí' lu ná'agaquië' xtídzë'ë Xanru' idú ládxi'gaquië'. Yugu' dza bulu'labë' dxi'a le nazúaj lu guichi lá'ayi, para ilé'quibe'enë' channö nácatë lë na' rnnë' Pablo.

¹² Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo.

¹³ Ní'irö cate' gulé'quibe'enë' bönni' judío nacu'ë Tesalónica, lësca' riguíxjö'ë Pablo xtídzë'ë Dios lu yödzö Berea, yöjáquië' ni', en gulunë' ca' ni' ga gulún dzatsa bönachi zían.

¹⁴ Ní'irö yugu' böchi'ru' ni' la' gula'söl-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzö Berea.

¹⁵ Yugu' bönni' Berea na' gula'chë'ë Pablo lu yödzö Atenas. Ní'irö la' yöjhuöjgacatë' lu yödzö Berea, tu'ú'ë xtídzë'ë Pablo, para ilë' Silas, en bi'i Timoteo, tsójacatë' ga ni' zoë' Pablo.

Le benë' Pablo lu yödzö Atenas

¹⁶ Tsanni ni' zoë' Pablo ribözë' Silas, en bi'i Timoteo, lu yödzö Atenas, ruhu'ini ládxië'ë tu' rilé'enë' ta'yéaj ládxi'gaca yúgu'të bönachi yödzö na' yugu' budó' guiöj budó' yaga.

¹⁷ Que lë ni na' bë'lenë' bönni' judío, en bönni' ta'yéaj ládxi'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bë'lenë' nupa ta'dá lu yë'ëyi didza' ca naca xtídzë'ë Cristo.

¹⁸ Bal-lë' bönni' dá'gaquië' le tu'sëdinë' bönni' epicúreo, en le tu'sëdinë' bönni' estoico gulu'ilenë' Pablo didza'. Bal-lë' gula'nnë':

—¿Bizxi rë'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán quégaca dios zi'tu'.

Caní gula'nně' tu' runě' libán Pablo lógaquiě' que didza' dxi'a queě' Jesús, en que yöl-la' rubán.

¹⁹ Ní'irö gula'guélé'ě ně'ě Pablo, en gula'chě'ě lě' lu gu'a ga tu'dubě' tu'ě didza', nazí'i le Areópago, ta'nně':

—¿Naru' huácatsö yönitú' didza' cubi ni rusiyönnu' netu'?

²⁰ Rusiyönnu' netu' le tun ga rubánitu'. Rě'ěnitú' inözitu' bizxi rnna didza' ni ru'u.

²¹ Bítí'rö ta'yaza ládxi'gaquiě' iluně' bönni' Atenas na', en bönni' izá'a nacu'ě ni', pero ila'yönisině', en ilu'isě' didza' tu le cubi.

²² Ní'irö guzuíně' Pablo gatsaj láhui'lö lö'a Areópago na', gunně':

—Bönni' Atenas, yúgu'tě le rilé'eda' naca bě' reaj ládxi'da'ali' yugu' dios queéli'.

²³ Cate' gudöda' lu yödzö, en buyúgaca' yugu' le reaj ládxi'li', yöjxáca'a ca' tu nichu ga ni' nazúaj le rnna caní: “Tu Dios, Cuntu Nu Nunbě' Lě'.” Dios na' reaj ládxi'li'-ně' sal-la' bití' núnbě'ěli'-ně', Dios ni runa' libán queě' loli'.

²⁴ 'iDios ni beně' yödzölió, en yúgu'tě le nacuá' yödzölió ni! 'iNáquiě' Xani yehua' yubá, en Xani luyú ni, en bití' ca' zoě' tu yudo' núngaca bönachi!

²⁵ Bití' bi riyadzaj queě' le gaca ulu'nödzej bönachi, tu' runödzej' Lě' cazě' quégaca yúgu'tě bönachi yöl-la' na'bán, en yúgu'tě le riquíniru'.

²⁶ Lě' beně' tuzě' bönni' ga zá'gaca yúgu'tě bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'.

²⁷ Dios bucu'ě légaquiě' para ulu'guiljě' Lě', channö nácati'těs ila'dzölině' Lě' sal-la' ila'gán ila'zönsě'. Caní raca sal-la' bití' zoě' zi'tu' ga zóaru' tu turu'.

²⁸ Lě' cazě' runě' ga zóaru' nabanru', en bi gaca gunru', en le nácaru'. Naca ca na' gula'nně' bal-lě' bönni' nútsa'gaquiě' libí'ili', nupa bulu'zúaj le do' rúl-lali', le ta'nná: “Di'a dza queě' Dios nácaru'.”

²⁹ Na'a, channö nácaru' di'a dza queě' Dios, bití' ral-la' innaru' náquiě' Dios ca tu budó' guiöj budó' yaga, o tu le néquini oro, o plata, o guiöj, le núngaca bönachi ca naca tu le ta'guínnajsö ícjaguequi.

³⁰ Dios budödě' cá'asö yugu' le guluně' lu yöl-la' bití' réajni'i quégaquiě' yugu' iz chigula'dödi, pero na'a rinná bé'eně' yúgu'tě bönachi idútě yödzölió ulu'bí'i ládxi'gaca.

³¹ Dios chinulu'ě tu dza cate' uchi'a usöröě' yúgu'tě bönachi. Idú tsahui' naca ca uchi'a usöröě' légaquiě' lu ně'ě Jesús, bönni' na' buzóa cazě' Lě', ate' lógaca yúgu'tě bönachi beně' tsutsu gaca caní tu' busubaně' Lě' lu yöl-la' guti.

32 Cate' bila'yönnë' didza' bë'ë Pablo ca guca, zoa nu bubán lu yöl-la' guti, bulu'titjë' bal-lë', ate' ia'bal-lë' gula'nnë':

—Yöniguetu' ia'tú lë ni ru'u didza' que.

33 Ní'irö burúajë' Pablo gatsaj láchui'lö ga na' nacu'ë, söhuöjë'.

34 Bal-lë' gula'yéajlë'ë Cristo, en gulunë' tsözxön Pablo. Nútsë'ë Dionisio, bönni' areópago, ládjagaquië', ate' nútsa'nu ca' ládjagaquië' nigula na' lënu Dámaris. Ia'bal-lë' na' gula'yéajlë'ë ca' Cristo.

18

Le benë' Pablo lu yödzö Corinto

1 Gudödi guca lë ni, buzë'ë Pablo yödzö Atenas na', ate' guyijë' yödzö Corinto.

2 Yöjxáquië' Aquilo, tu bönni' judío ni'. Guljë' bönni' ni luyú Ponto, en si' bidxíngazë' yödzö Corinto na'. Buzë'ë luyú Italia len nigula queë', lënu Priscila, tu' gunná bë'ë Claudio, bönni' unná bë', ulu'rúajë' yúgu'të bönni' judío yödzö Roma. Guyijë' Pablo ga nacu'ë Aquilo, en Priscila na'

3 tu' naca tuz dxin tunë' Aquilo, en Pablo. Bugá'analenë' légaquië', ate' tsözxön gulunë' dxin, tunë' yugu' yu'u guídido'.

4 Cate' nácgaca dza lá'ayi quégaquië' bönni' judío, razië' Pablo lu yu'u ga tu'dubë' tu'sëdë' queë' Dios, ga ni' bë'lenë' légaquië' didza'. Gú'unnë' ulu'ínë' yugu' bönni' judío, en yugu' bönni' izá'a nacu'ë ni', naca idútë lí le riguíxjö'ë ca naca queë' Jesucristo.

5 Cate' bila'dxinë' Silas, en bi'i Timoteo ni', nuzá'agaquië' luyú Macedonia, nugu'ide'enë' Pablo, runë' libán que xtídzë'ë Dios, en runë' ba nalí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusölë' légaquië'.

6 Cate' bönni' judío nacu'ë ni' gula'dá'báguë'ë xtídzë'ë, en gula'nnë' zí'ë que, ní'irö Pablo gudxibë' lari' nácuë' para ulu'ínë' légaquië' bíti'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yöl-la' guti queëli', calëga neda' nabága'a le. Na'a, uyija' ga nacua' bönachi izá'a.

7 Ní'irö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sëdë' queë' Dios.

8 Crispo, bönni' lo que yu'u ga na' tu'dubë' tu'sëdë' queë' Dios guyéajlë'ë Xanru' Jesús, ate' dzágagaca lë' yúgu'të bönachi nacua' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa.

9 Ní'irö Lë cazë' Xanru' gudxë' Pablo lu yëla bëchigal, gunné':

—Biti' gádxinu', en bití' su' dxisö, quíxjö'u xtídza'a,

¹⁰ tu' zóalen caza' neda' li', ate' cuntú nu uzapa' në'e li' para guá' dö' quiu', tu' néquiquequi quia' bönachi zían lu yödzo ni.

¹¹ Bugá'anë' Pablo ni' idú ca tu iz yu' gatsaj, ate' busédinë' légaquië' xtídzë'ë Dios.

¹² Cate' bidxín dza rinná bë'ë Galión luyú Acaya, guláquië' tuz bönni' judío bití' ta'yéajlë', ate' gula'dá'báguë'ë Pablo, en gula'chë'ë lë' ga rö'ë ruchi'a rusöröë' Galión na'.

¹³ Gulë' Galión na':

—Bönni' ni rigú'u yöl-lë'ë bönachi para ilunë' bal Dios, ca ridá'baga' xibá queëtu'.

¹⁴ Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë naga' xtídza'li' ca ral-la' guna',

¹⁵ pero channö naca didza' bizxaj que dídza'sö, o que lágaca bönachi, en ca naca xibá queézili', guli'cá'ana tsahui' libí'sili', tu' cabí rë'ënda' neda' gaca' nu uchi'a usörö yugu' le caní.

¹⁶ Ní'irö Galión bulágui'ë légaquië' lu yu'u yúlahui'.

¹⁷ Ní'irö yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sëdë' queë' Dios, ate' gula'guínë' lë' lö'a yúlahui', pero bití' bë' ládxë'ë Galión lë na' raca.

¹⁸ Pablo bugá'anë' lu yödzo na' zían dza, ate' gudödi busiyönnë' böchi'ru' nacu'ë ni' didza', guyijë' yödzo Cencrea, ga ni' benë' yútusö icjë', tu' dë tu le nazi' lu në'ë lahuë' Dios gunë'. Ní'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo.

¹⁹ Cate' bila'dxinë' yödzo Éfeso, Pablo bulá'alënë' légaquië' ni'. Guyazië' lu yu'u ga tu'dubë' bönni' judío, en tu'sëdë' queë' Dios, ate' bë'lenë' nupa nacuá' ni' didza'.

²⁰ Yugu' bönni' ni' gulá'tayüë' lahuë' Pablo ugá'analenë' légaquië' ia'lati' xidzé, pero lë' bití' gú'unnë'.

²¹ Bë'lenë' légaquië' didza', gunnë':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö guë'ënnë' Dios.

Ní'irö gurenë' Pablo tu lë'e barco, en buzë'ë Éfeso na'.

Ridxinë' Pablo Antioquia, ate' risí lahuë' röjenë' libán le bunny luzuí

²² Gudödi bidxinë' Pablo yödzo Cesarea, gurenë' guyijë' Jerusalén, ga ni' yöjyüë' bönachi queë' Cristo, ate' ní'irö buzë'ë ni', en guyijë' Antioquia.

²³ Gudödi zoë' ni' nababa dza, buzë'ë ni', sa'yéajë' tu tu yödzö luyú Galacia, en Frigia. Benë' tsutsu böchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yödzö Éfeso

²⁴ Tu dza ni' bidxinë' Apolos, tu bönni' judío lu yödzö Éfeso. Guljë' bönni' ni lu yödzö Alejandría, en nabé'ede'enë' ru'ë didza', en nazëdadë'ë le nazúaj lu guichi lá'ayi.

²⁵ Chinazëdë' bönni' ni ca naca le réajlë'ëru' Xanru'. Idú ládxë'ë bë'ë didza', en ca nácatë busëdinë' bönachi ca naca queë' Jesús, sal-la' núnbë'ë tuz le ruquíla bönachi nisa ca benë' Juan.

²⁶ Gusí lahuë' Apolos ru'ë didza' idú ládxë'ë ga naca lu yu'u ga tu'dubë' bönni' judío, en tu'sëdë' queë' Dios. Cate' Priscila, en Aquilo bila'yönnë' didza' ru'ë Apolos na', gula'chë'ë lë' quez, en bulu'zéajni'irönë' lë' xibá queë' Dios.

²⁷ Cate' gú'unnë' Apolos tödë' luyú Acaya, bulu'tipë' ládxë'ë, ate' bulu'zúajë' tu lu guichi le tsöjuá'gaquië' quégaquië' bönni' teaj ládxë'ë Cristo luyú Acaya na', para ilunë' Apolos na' bal. Cate' bidxinë' Apolos luyú na', yugu' bönni' ni' teaj ládxë'ë Cristo bulu'zí'dë'ë xibé didza' ru'ë Apolos na', tu' ruzá' ládxë'ë Dios quégaquië'.

²⁸ Caní guca, tu' bucul-lë' Apolos na' yugu' bönni' judío ni' lógaca yúgu'të bönachi, tu' bugunë' dxin le nazúaj lu guichi lá'ayi, en bulu'e bönni' na' Jesús naca cazë' Cristo.

19

Le benë' Pablo lu yödzö Éfeso

¹ Tsanni ni' zoë' Apolos lu yödzö Corinto, gudödë' Pablo gapa nacuá' yödzö ia'lati' ra'lö, ate' bidxinë' Éfeso. Yöjxáquië' bal-lë' bönni' ta'yéajlë'ë Cristo ni'.

² Pablo gunábinë' légaquië', rnnë':

—¿Naru' bidisóalenë' Dios Bö' Lá'ayi libí'ili' cate' ni' guyéajlë'ëli' Cristo?

Gulë' lë':

—Biti' nayönitü' channö zoë' Dios Bö' Lá'ayi.

³ Ní'irö Pablo gunábinë' légaquië', rnnë':

—¿Nacxi guca le bidí'lali' nisa?

Ta'nnë':

—Ca buquíle' Juan bönachi nisa.

⁴ Pablo gunnë':

—Buquíle' Juan bönachi nisa, nupa ni' bulu'bí'i ládxi'guequi, ate' Juan caz gudxë' léguequi ral-la' ila'yéajlë' Bönni' na' si zá'tëlë' ca lë', ate' Bönni' ni naquië' Jesús, Lë' Cristo.

⁵ Cate' yugu' bönni' na' bila'yönnë' didza' ni ru'ë Pablo, bila'dilë' nisa tu' chita'yéajlë'ë Xanru' Jesús.

⁶ Cate' guxóa në'ë Pablo légaquië', en ni' rulidzë' Dios, bidisóalenë' Dios Bö' Lá'ayi légaquië', ate' gulu'ë didza' yúbölö, en gulu'ë didza' uláz queë' Dios.

⁷ Guláquië' bönni' ni idú chínnuë'.

⁸ Guzöë' Pablo idú ca tsonna beo' ni', ate' guyázië' lu yu'u ga tu'dubë' bönni' judío, en tu'sedë' queë' Dios, ate' lu yöl-la' rugu ladxi' benë' libán lógaquië'. Bë'lenë' légaquië' didza', en gú'unnë' ulu'ínë' légaquië' nácatë le riguíxjö'ë ca rinná bë'ë Dios.

⁹ Ní'irö bizídi icja ládxi'do'gaquië' bal-lë', en biti' gula'yéajlë'ë Cristo, ate' gula'nnë' zi'ë que xtídzë'ë Xanru' ga nacuá' bönachi zían na'. Ní'irö Pablo bulá'alenë' légaquië', ate' bubéajë' quez nupa ta'yéajlë' Cristo. Bë'lenë' bönachi ni ta'yéajlë' Cristo didza' yugu' dza ga na' tu'dubë' lu yu'u ga rusédinë' Tiranno bönachi.

¹⁰ Caní béntica'së' Pablo idú ca chopá iz, ate' caní guca, bila'yöni yúgu'të bönachi didza' ca naca queë' Xanru' Jesús, bönachi nacu'ë yugu' yödzo luyú Asia, bönachi judío, en bönachi izá'a.

¹¹ Dios benë' yugu' yöl-la' huáca zxön lu në'ë Pablo.

¹² Caní guca, bal-lë' bönni' gula'zi'ë yugu' lári'do' béguë'ë icjë' Pablo, en yugu' lari' tsölá'a bugalë' lë'ë, ate' yöjuá'gaquië' léguequi gapa nacuá' nupa te'e, ate' bulu'huóáquië' ca naca yödzo huë' que queégaquië', en bulu'rúaj bö' xihui' yú'ugaca bönachi na'.

¹³ Ní'irö bal-lë' bönni' judío udá dzaga tu'béajë' bö' xihui' gulë'ënnë' ulu'gunë' dxin Lë' Xanru' Jesús para ulu'béajë' yugu' bö' xihui' yú'ugaca bönachi, ta'nnë':

—Ni'a que Lë' Jesús, Nu na' runë' libán que Pablo, rinná bé'etu' libí'ili' urúajli'.

¹⁴ Caní gulunë' gadxi bönni' zxí'inë' Esceva, tu bönni' judío náquië' bönni' lo ládjagaquië' bixúz unná bë'.

¹⁵ Bubí'i didza' bö' xihui' na', gunná:

—Núnbe'a-në' Jesús, en núnbe'eda' bönni' lë' Pablo, pero libí'ili', ¿núzxitë libí'ili'?

¹⁶ Ní'irö guxíti'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guzxéqui'rönë' ca légaquië'. Caní guca, xiguídigacasë', en huë'gacatézë' bulu'zxúnnajë' gadxë' bönni' na' lu yu'u ni'.

¹⁷ Guzë didza' ca guca lë ni, ate' bila'yöni yúgu'të nupa nacuá' lu yödzo Éfeso, bönachi judío, en bönachi izá'a, ate' yúgu'të' guládxinë' Dios. Que lë ni na' gulunë' zxön Lë' Xanru' Jesús.

18 Lësca' bila'dxinë' zían bönni' ta'yéajlë'ë Cristo, en gula'xóalëpë' dul-la' nabága'gaquië', en gula'guíxjö'ë le chigulunë'.

19 Lësca' caní gulunë' zían bönni', zí'aló gulunë' yöl-la' udzá'. Dujuá'agaquië' yugu' guichi udzá' quégaquië', ate' bulu'zéguië' léguequi lógaca yúgu'të bönachi. Bulu'labë' tsca nazáca'gaca guichi na', le guca idú chi un mil dumí plata.

20 Caní guca, guzëda' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

21 Gudödi gulaca lë ni, benë' queë' Pablo tsejë' Jerusalén, pero zí'aló ral-la' tödë' yugu' yödzo luyú Macedonia, en luyú Acaya, ate' gunnë':

—Tödi tseja' Jerusalén, run bayudxi tseja' ca' Roma.

22 Ní'iró gusöl-lë'ë-bi' chópabi' bi'i bönni' tácalenbi' lë', légacabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

Tu'tsatsa bönachi lu yödzo Éfeso

23 Bulu'tsatsa bönachi Éfeso dza ni', ate' gula'dá'baguë'ë xtídzë'ë Xanru'.

24 Benë' Demetrio, bönni' gubëdxi guíë plata ga bulu'tsatsë'. Run cazë' yugu' lidxi budó' guiöj budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach.

25 Butubë' Demetrio na' ia'zica'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'.

26 Rilé'eli', en riyönili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': “Yúgu le núngaca bönachi biti' nácagaca dios.”

27 Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládxi'gaca-nu bönachi idütë luyú Asia, enca' idütë yödzölió.

28 Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatërönu zxön Diana, dios queëru' rë'u, bönachi Éfeso.

29 Caní guca, bulu'tsatsa bönachi idütë lu yödzo na', ate' guláquië' tuz, en carelö yöjáquië' lö'a yúlahui'. Gulá'ayöjë' Gayo, en Aristarco, bönni' Macedonia túngaquië' Pablo tsözxön, ga ni'.

30 Cate' gú'unnë' Pablo tsázië' ga nacuá' bönachi zían na', biti' ca' gula'ë lë' lataj bönni' ta'yéajlë'ë Cristo.

31 Lësca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxi'a. Gula'söl-lë'ë queë' nupa guláta'yu lahuë' biti' tsazië' lö'a yúlahui' na'.

32 Ga ni' tu'tsatsë', en ta'bödxi'ë, tu le ta'nnë' bal-lë', en ia'tú le ta'nnë' ia'zica'rë', tu' rō'ögacasë' barōli bönni' zían na' tu'tsatsë', en lá'tu'biqui' yúgu'tëgaquië' biti' nōzguequinë' bizx que na' nudúbigaquië' ni'.

33 Ní'irō yugu' bönni' judío gula'béajë' Alejandro ladaj bönachi zían na', ate' bulu'dxíguë'ë lë' lógaca bönachi zían na'. Bulu'e Alejandro na' len në'ë para ila'bō' dxisō, tu' gú'unnë' gu'ë didza' le gácalen yugu' bönni' judío na' lógaca yúgu'tëguequi.

34 Cate' guléquibe'enë' náquië' judío, yúgu'të' gulu'ë tsözxōn zidzaj didza' idú ca chopa hora, ta'nnë':

—¡Nácatërōnu zxōn Diana, dios queëru' rë'u bönachi Éfeso!

35 Ní'irō bönni' uzúaj que yúlahui' benë' ga gula'bō' dxisō bönachi zían na', gunnë':

—Bönni' Éfeso, nōzigaca yúgu'të bönachi zoa yudo' queënu Diana, dios zxōn, ni. Rë'u ni, bönachi Éfeso, run chí'iru' yudo' na', enca' budó' na' bōxaj ga zóaru', le birúaj lúzxiba.

36 Cuntu nu gaca tá'baga' lë ni. Que lë ni na' run bayudxi sóali' dxisō, en biti' bi gúntëzili'.

37 Nachë'gacali'-në' bönni' ni, en biti' ta'banë' le dzō'ō yudo', en biti' ta'nnë' xihuë'ë queënu dios queëli'.

38 Que lë ni na', channō zoa didza' bizxaj quégaquië' Demetrio, en yugu' bönni' gubëdxi guié plata nacua'lenë' lë', len núti'tës bönni', dë lataj ga nu uzë nagui légaquië', en zoa nu uchi'a usörō légaquië'. Ni' huáca ulu'zegui luzá'agaquië' didza' tuë' ia'túë'.

39 Na'a, channō dë ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bë' yúlahui'.

40 Zoa bönadxi nu uzegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

41 Cate' budxi bë'ë didza' ni, busöl-lë'ë bönachi zían na' nudúbigaca ni' tsöhuōjgaca lídxiguequi.

20

Sa'yéajë' Pablo luyú Macedonia, en luyú Grecia

1 Cate' gurō'ō dxi dzatsa na' guca lu yōdzō Éfeso, bulidzë' Pablo yugu' bönni' ta'yéajlë'ë Cristo, ate' guchízië' icja nágagaquië' didza'. Gudōdi ni' bunidë' légaquië', en la bulá'alentë' légaquië'. Birúajë' ni', ate' sa'yéajë' luyú Macedonia.

² Gudödë' yugu' yödzö luyú ni', ruzéajni'ide'enë' böchi'ru' nacu'ë ni', ate' gudödi ni' bidxinë' luyú Acaya.

³ Guzöë' Pablo ni' idú ca tsonna beo'. Cate' chizóa cuenë' tu lë'e barco para tsejë' luyú Siria, gúquibe'enë' ta'bö' nísie' bönni' judío lë' para ila'zönë' lë'. Que lë ni na' buguelë'ë nöza söhuöjë' luyú Macedonia, ate' bidxinë' yödzö Filipos.

⁴ Sópater, zxí'inë' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, sôjácalenë' tsözxön lë'.

⁵ Ní'irö yugu' bönni' ni yöjnörugaquië' lahuë' Pablo, yöjáquië' yödzö Troas, ga ni' gula'bözë' lë'.

⁶ Lu yödzö Filipos na', neda', Lucas, yöjtsaga'-në' Pablo. Cate' chigudödi laní cate' tahuë' bönni' judío yöta xtila biti' nazí'i cúa zi que, gurentu' tu lë'e barco, en buzá'atu' Filipos na'. Gudödi gayu' dza budzá'gatu' bönni' ni' yöjnörugaquië' lahuë' Pablo, yöjáquië' Troas, ate' ni' bugá'anatu' gadxi dza.

Le benë' Pablo lu yödzö Troas

⁷ Dza risí lo le gadxi dza bulu'dübë' bönni' ta'yéajlë'ë Cristo para ilahuë' yöta xtila le rusá' ládxi'ru' ca gútië' Jesucristo. Ní' rusëdinë' Pablo légaquië', en tu' ral-la' uzë'ë ni' cate' za' rení' dza na', xidzé bë'ë didza', ga bidxintë gudödi guluhuëla.

⁸ Ga ni' nudúbigaquië' naca lu yu'u xitsá', ate' nacuá' zían le ta'gú'u bení' ga na'.

⁹ Zóabi' bi'i Eutico ni', rö'öbi' ga ra'a lení' que yu'u na', ate' nadödirö yëla lobi' tu' ritunna libán runë' Pablo. Ga ni' rö'öbi' rásibi' bi'i na' naca ga bunni' cuía lu yu'u, ate' rásisibi' ca' gubíxitébi', böxjabi' ga bidxintëbi' znan yu'u. Nátitébi' bulu'lisë'-bi'.

¹⁰ Bötjë' Pablo znan yu'u na', ate' yöjxöë' lëbi', en bunidë'-bi'. Ní'irö gudxë' nupa nacuá' ni':

—Biti' gadxi idzöbili'. Nabanbi'.

¹¹ Cate' chibubenë' Pablo xitsá', gudélë'ë yöta xtila, gadahuë'. Ní'irö Pablo bë'lenë' légaquië' didza' ga bidxintë zila balö. Gudödi ni' burúajë' ni'.

¹² Bi'i bönni' ra'bán na' gubíxibi', bulu'chë'ë-bi' nabanbi', en bulu'zí' zxöndë'ë.

Ca guca bidxintu' Mileto

¹³ Gunörutu' lahuë' Pablo, en yöjchentu' tu lë'e barco, ate' gudöditu' ga bidxintu' yödzö Asón para tsöjtsá'gatu'-në' Pablo ni', para gaca ca na' chibén xtí'za'tu', tu' gú'unnë' Pablo tsejë' ni' sé'esi ni'ë.

¹⁴ Cate' chibudzá'gatu'-në' lu yödzö Asón na', gurénlenë' netu' lë'e barco, ate' guyéajtu' yödzö Mitilene.

15 Buzá' barco ni', ate' dza buropi bidxintu' tödi li ga zoa luyú bidxi nazi'i le Quío, ate' ia'tú dza ca' gudöditu' tödi li ga dë yödzö Samos, en bidxintu' yödzö Trogilio ga ni' guzóatu' tu chi'i. Ia'tú dza ca' bidxintu' yödzö Mileto.

16 Caní bentu' tu' chibenë' queë' Pablo tödisë' yödzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

Didza' bë'ë Pablo lu yödzö Mileto

17 Cate' ni' zoë' Pablo lu yödzö Mileto, gusöl-lë'ë nu yöjlidza bönni' gula tapa chi'ë bönachi queë' Cristo nacu'ë Éfeso.

18 Cate' bila'dxinë' ga zoë' Pablo, lë' gudxë' légaquië':

—Libí'ili' chinöz quézili' ca béntica'sa' ga zóali' ga gudela' bidxina' luyú Asia.

19 Yugu' dza bena' xichinë' Xanru' lu yöl-la' nöxaj ladxi', ga bidxintë gurödxá' ni'a queëli', ate' zían le guca quia' le guxzí' bë' neda' ni'a que le ruá' dö' gulunë' quia' bönachi judío biti' ta'yéajlë' Cristo.

20 Béntica'sa' libán ga zóali' que yúgu'të le ruzí'ili' xibé, en busérida' libí'ili' yálajdo' ga nudúbili', en gapa naca lu yu'u lídxili'.

21 Bena' ba nalí lógaca bönachi judío, en lógaca bönachi izá'a para ulu'bí'i ládxi'gaca, en ulu'huóaca queë' Dios, en ila'yéajlë' Xanru' Jesucristo.

22 Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'.

23 Yúgu'të yödzö ga ridá', riguixjöi'inë' Dios Bö' Lá'ayi neda', rë' neda' ila'gu'ë neda' lidxi guié bönni' judío biti' ta'yéajlë', en ulu'saca' zi'ë neda'.

24 Biti' bi runi neda' que lë na' gaca, sal-la' gátia' o cabí gátia', pero ruí'i ládxi'sida' údxi guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxi'a ca naca le ruzá' ládxi'ë Dios queéru'. Caní guna' len yöl-la' rudzeja.

25 'Na'a, yúgu'tëli' na' chibena' libán loli' ca rinná bë'ë Dios, nözda' bíti'rö ulé'eli' neda'.

26 Que lë ni na', le nácatë rea' libí'ili' na'a dza. Biti' nabága'a neda' queëli' nituli' libí'ili'.

27 Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios.

28 Que lë ni na', guli'gún chi'i cuinli', en guli'gún chi'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun chí'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'.

29 Chinözda', tödi uzá'a ga zóali', ila'yaza nupa ilé'eni ulu'suniti bönachi queë' Cristo ga zóali', iluné' ca tunba' bö'cu' guí'a sínia', tu'sunítiba' yugu' bö'cu' zxila'.

30 Ila'rúajë' bönni' nútsa'gaquië' ladjali', ate' ilu'ë didza' biti' nácatë para ulu'béajë' quégacasë' nupa ta'yéajlë' Cristo nútsa'gaca ladjali'.

31 Que lë ni na', guli'sóa ban ladxi', en guli'tsöjné ca bena' neda' idú ca tsonna iz, rëla, en të dza buchízia' icja nágali' tu tuli' ga bidxintë gurödxá' queëli'.

32 'Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ladxë'ë queëli', en gunë' ca rnna xtídzë'ë. Dios gunë' libí'ili' tsutsu, en gunë' ga idéli'li' gunli' tsözxön yugu' bönni' rö queë'.

33 Catu caz guzë ládxa'a le nequi quégaquië' böchi' luzá'a. Biti' guzë ládxa'a dumí, o lari' quégaquië'.

34 Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'.

35 Ca naca yúgu'të le bena', bulu'í'ida' libí'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné': "Uzí'irö xibé nu bi runödzej ca nu bi rizi'."

36 Cate' budxi bë'ë Pablo didza' ni, buzóa zxibë', ate' benë' tsözxön yúgu'të', bulu'lidzë' Dios.

37 Ní'irö gula'bödxë' yúgu'të'. Bulu'nidë' yenë' Pablo, en bulu'tsaga lahuë' lë'.

38 Caní gulunë' tu' bulu'huí'innë' ni'a que didza' na' bë'ë Pablo, gunné': "Bíti'rö ulé'eli' neda'." Yöjácalenë' tsözxön lë' ga na' gurenë' lu barco.

21

Sa'yéajë' Pablo Jerusalén

1 Gudödi bulá'alentu' légaquië', guyú'utë nöza barco na', ate' lirá guyéajtu' ga zoa luyú bidxi nazí'i le Cos. Dza buropi na', gudöditu' ia'tú lataj nazí'i le Rodas, ate' buzá'atu' ni', en bidxintu' yödzö Pátara.

2 Yöjxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nöza.

3 Gudöditu' ga nalá' Chipre, le guta' tsólá'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjca'ana yua' ni' le dzö'ö lë'e barco na'.

4 Lu yödzö Tiro na' yöjxáca'tu' tu bönni' réajlë'ë Cristo, ate' bugá'analentu' lë', en yugu' böchi'ru' ni' idú gadxi dza. Tu' chibulu'inë' Dios Bö' Lá'ayi légaquië' le ral-la' gaca queë' Pablo, gulë' lë' biti' tsejë' Jerusalén.

⁵ Cate' chibizá'a dza na', burúajtu' ni', ate' gula'zá'lenë' netu' tsözxön yúgu'të' len nigula que queëgaquië', en yugu' bi'i queëgaquië', ga bidxíntëtu' ní'ilö ra' yödzo na'. Ra' nísado' ni' buzóa zxi'bitu', en bulidztu'-në' Dios.

⁶ Budxi bunida' luzá'atu' tutu' ia'tutu', bubentu' lë'e barco, ate' légaquië' yöjhuöjgaquië' lídxigaquië'.

⁷ Buzá'atë barco na' lu yödzo Tiro, ate' ga yöjsé bidxín lu yödzo Tolemaida. Burúajtu' lë'e barco na' ni'. Bugápatu' Dios böchi'ru' nacu'ë ni', ate' bugá'analentu' légaquië' tu dza.

⁸ Cate' za' rení' ia'tú dza, burúajë' Pablo ni', ate' dzá'gatu'-në' netu' guyéajtu' yödzo Cesarea. Ni' guyú'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítse'ë gadxë' bönni' ni' bulu'cu'ë dza ni'te para ilácalenë' bönachi queë' Cristo.

⁹ Nacuá'abi' tapa bi'i nigula ra'bán queë' Felipe na', tuí'ibi' didza' uláz queë' Dios.

¹⁰ Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea.

¹¹ Bönni' ni buduyúë' netu', ate' gudélé'ë pan le néquini guídi queë' Pablo. Béguë'ë ni'a na' cuinë', en gunné':

—Caní rnnë' Dios Bö' Lá'ayi: “Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a.”

¹² Cate' biyönitu' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén.

¹³ Bubi'ë didza' Pablo, gunné':

—¿Bizxi ni runli', ribödxili', en rusuhuí'inili' neda'? Neda' chizóa caza' sina', calégasö ilúguië' neda', pero gátia' ca' lu yödzo Jerusalén ni'a queë' Xanru' Jesús.

¹⁴ Tu' cabí guzxéqui'tu'-në' didza', bítirö bi gúdxitu'-në', ate' gunnatu':

—Gaca ca raza ladxë'ë Xanru'.

¹⁵ Cate' chigula'dödi dza na', bupa'atu' queëtu', ate' guyéajtu' Jerusalén.

¹⁶ Gula'zá'lenë' netu' bal-lë' bönni' ta'yéajlë'ë Cristo, nacu'ë Cesarea, ate' dzá'guië' Mnasón, tu bönni' Chipre, légaquië'. Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

Pablo röjyüë' Jacobo

¹⁷ Cate' bidxintu' Jerusalén, len yöl-la' rudzeja queëgaquië' böchi'ru' ni' ta'yéajlë'ë Cristo gulunë' netu' bal.

¹⁸ Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chi'ë bönachi queë' Cristo nacu'ë Jerusalén.

19 Cate' Pablo chibugapë' légaquië' Dios, busiyönnë' légaquië' yúgu'të le benë' Dios lu në'ë lë' ga nacua' bönachi izá'a.

20 Cate' bila'yönnë' lë ni, gula'gu'ë Dios yöl-la' ba. Ní'irö gulë' Pablo:

—Nöz quézinu', böchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të' túndë'ë bal xibá queë' Moisés.

21 Chibila'yönnë' yugu' le tu'i didza' bönachi le ta'nnë quiu', ta'nná rigú'u yöl-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquië' biti' ila'chúguië' lu xpéla'gacabi' bi'i bönni'do' quégaquië', en biti' ilunë' bal yugu' le nalëbiru' runru' rë'u, bönachi judío.

22 ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni.

23 Na'a, ben lë ni rëtu' li'. Nacua'lenë' netu' ni tapë' bönni', chinazí' lu ná'agaquië' lahuë' Dios tu le ilunë'.

24 Guchë'ë yugu' bönni' ni, en ben légaquië' tsözxön gun dxi'a cuinli' ca naca que yudo', en gudizxaj li' le ral-la' ila'guizxjë' para ilún yútusö ícjagaquië'. Ní'irö ila'nözinë' yúgu'të bönni' judío biti' nácatë lë na' ta'nnë' quiu', pero lësca' li' runu' le naca dxi'a, en runu' ca rinná bë' xibá queë' Moisés.

25 Ca naca quégaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Biti' run bayudxi ilún chí'ë yugu' lë ni tunë' bönni' judío, pero tuz: Biti' ilahuë' le ta'gú'u bönachi lógaca budó' guiöj budó' yaga. Biti' ilahuë' rön.

Biti' ilahuë' xipéla'gacaba' böa' guixi' biti' narúaj-gácaba' rön. Biti' ilunë' le ruá' dö'.

Ta'zönë' Pablo lö'a yudo'

26 Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxön len légaquië' ca naca que yudo'. Ní'irö guyazië' lö'a yudo', para gaca bë' bizxi dza údxi ilunë' le tu'ún dxi'a cúngaquië', dza ni' ral-la' tsöjuá'agaquië' le ila'gu'ë lahuë' Dios que queëgaquië'.

27 Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zían, ate' gula'zönë' Pablo.

28 Gulu'ë zidzaj didza', ta'nnë':

—¡Guli'gácalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzo queëru', en xibá queë' Moisés, en yudo' queëru' ni. Na'a, chigulu'ë yugu' bönni' izá'a lu yudo' ni. Caní runë', run dí'tjanë' lataj lá'ayi ni.

29 Caní gula'nnë' tu' bila'lé'enë' Pablo zí'alö lu yödzo dzáguië' Trófimo, bönni' Éfeso, en téquinë' gulu'ë bönni' ni lu yudo'.

³⁰ Caní guca, bulu'dubi yúgu'tè bönachi yödzo, ate' bila'guiré' ni'. Ní'irö gula'zöné' Pablo, en gulá'ayöjë' lè', bulu'béajè' lè' lö'a yudo', ate' la' bulu'sáyjatè' ga nu riyaza lö'a yudo' na'.

³¹ Cate' chitequi quézinè' ilútiè' Pablo, bidxín didza' lahuè' bönni' lo rinná bé'enè' bönni' röjáquiè' gudil-la. Biyönnè' tun dzatsa yúgu'tè bönachi Jerusalén.

³² Bönni' lo ni la' butúbitè' bönni' röjáquiè' gudil-la, len bönni' ta'nná bé'enè' légaquiè', ate' carelö guyéajlenè' légaquiè' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enè' bönni' röjáquiè' gudil-la, en bönni' na' röjáquiè' gudil-la, bulu'sané' ta'guiné' Pablo.

³³ Ní'irö gubígui'è bönni' lo na', en guzxönè' Pablo, ate' gunná bé'enè' bönni' röjáquiè' gudil-la ilúguiè' lè' len chopa du guíe. Gudödi ni' gunábinè' bönachi zían ni', rnnè':

—¿Nuzxi caz bönni' ni, en bizxi benè'?

³⁴ Ta'bödxi'a bönachi zían na', que queégaca ca ta'nná. Caní guca, bití' bi guca tséajni'inè' bönni' lo na', tu' tu'tsatsa bönachi na', ate' gunná bé'enè' bönni' röjáquiè' gudil-la ila'chë'è Pablo lu yu'u zxön ga nagá'anagaquiè' bönni' na' röjáquiè' gudil-la.

³⁵ Cate' bila'dxinè' ga naca ni'yèpi' que yu'u zxön na', bönni' na' röjáquiè' gudil-la gulu'inè' Pablo, tu' dxíadi'igaca bönachi zían légaquiè',

³⁶ en zá'gaca cúdzu'lögaquiè', ta'bödxi'a, ta'nná:

—Guli'gútiè'.

Didza' bë'è Pablo uláz queè' lógaca bönachi

³⁷ Cate' ni' gula'sí lógaquiè' ila'gu'è Pablo lu yu'u zxön ni', lè' gudxè' bönni' lo na' rinná bé'enè' bönni' röjáquiè' gudil-la, gunné':

—¿Naru' gunnu' neda' lataj guía' li' tu didza'?

Bönni' lo na' gudxè' Pablo:

—¿Rácatso' didza' griego?

³⁸ ¿Naru' calëga li' bönni' Egipto na' dza lahui nisö butubè' yugu' bönni' gula'dá'baguè'è yúlahui', ate' guchè'è idú choá' gáyu'è bönni' huèti bönachi lu lataj cá'asö?

³⁹ Ní'irö Pablo gudxè' lè', gunné':

—Le nácatè naca' neda' bönni' judío. Gulja' Tarso, tu yödzo lo luyú Cilicia. Ráta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bë'è lè' lataj, ate' guzuínè' Pablo ga naca ni'yèpi', en guchisa në'è para ila'cuá' dxisö bönachi zían ni'. Cate' chigula'cu'è dxisö, Pablo bë'lenè' légaquiè' didza' lu didza' hebreo.

22

¹ Caní gunné' Pablo:

—Libí'ili', bönni' gula, en libí'ili' böcha'a. Buli'zë nágali' le guía' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzö Tarso luyú Cilicia, pero guzxöna' lu yödzö ni, ate' busédinë' Gamaliel neda' idú ca naca xibá quégaquië' xuz xtó'oru'. Bë'tica'sö ládxa'a guyéaj ládxa'a Dios ca runli' libí'ili' na'a.

⁴ Zí'alö gudxía ládxi'gaca'-në' bönni' nazi' lu ná'agaquië' xtídzë'ë Cristo, en guchë'gaca'-në' ga ilátië'. Guzxöngaca'-në', en gulú'ugaca'-në' lidxi guié, yugu' bönni', en nigula.

⁵ Lësca' huáca ilunë' ba nali' yugu' bixúz unná bë', en yugu' bönni' gula tu'zëajni'inë' que le gulunë'. Gulunë' guichi unná bë' le yöju'a ga nacu'ë böchi'ru' judío lu yödzö Damasco. Guyija' ni' para tsöjxöngaca' nupa ni' ta'yéajlë' Cristo, para idichë'gaca'-në' nága'gaquië' Jerusalén ni, para ilácagaquië' xíguia'.

Rigu'xjö'ë Pablo ca böáquië' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsálido'os guyëpi yösa bení' le za' lúzxiba, le buzení' ga na' sa'yéaja'.

⁷ La' yöjötá'tea' lu yu, en biyönda' chi'i Nu gudxi neda': "Saulo, Saulo, ¿bixz que ribía ládxi'u neda'?"

⁸ Ní'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u."

⁹ Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'.

¹⁰ Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' guié' li' ca naca yúgu'të le ral-la' gunu'."

¹¹ Tu' cabirö rilé'eda' tu' budí'i yösa bení' na' guyëpida' lahua', que lë ni na' yugu' bönni' dzágagaquië' neda' gula'guélë'ë na'a, ate' gula'ché'ë neda' ga bidxíntea' Damasco.

¹² 'Zoë' Ananías ni', tu bönni' runë' idútë ca rinná bë' xibá queë' Dios, ate' yugu' bönni' judío nacu'ë Damasco tunë' lë' bal.

¹³ Bidxinë' Ananías na' ga zoa', en gudxë' neda': "Saulo, böcha'a, huóalaj guiöj lo'." La' ní'sö böalaj guiöj lahua', ate' bilé'eda' lë'.

¹⁴ Lë' gudxë' neda': "Dios quégaquië' xuz xtó'oru', dza ni'te gurö cazë' li' para inözinu' le ré'ëni quézinë' Lë', en ilé'enu'-në' Bönni' Tsahui', Lë' cazë' Zxí'inë', en yönnu' le guié' Lë' cazë' li'.

15 Caní gaca, tu' ral-la' gunu' ba nalí queë' Lë' lógaca yúgu'të bönachi, usiyönnu' légaquië' ca naca le chibilé'enu', en le chibiyöninu'.

16 Na'a, ¿bizx que ridzenu'? ¡Guyasa, en bidila nisa! Bulidzë' Xanru' para únë' li' dxi'a, en ugúë' dul-la' nabágu'u."

Cristo gusöl-lë'ë Pablo para gunë' libán lógaca bönachi izá'a

17 Gunnë' ca' Pablo:

—Gudödi ni', cate' budxina' Jerusalén, en tsanni ni' rulidza'-në' Dios lu chila yudo', bilé'eda' tu le naca ca tu lu yëla bëchigal.

18 Bilé'eda'-në' Xanru', ate' gudxë' neda': "¡Guyéaj carelö! ¡Burúajtë Jerusalén ni, tu' cabí ilunë' bal bönni' ni le gunu' ba nalí quia'!"

19 Neda' gudxa'-në': "Xan, nözgaca quëzinë' ca bena' neda'. Guyázia' gapa naca lu yu'u ga tu'dubë' tu'sëdë' bönni' judío queë' Dios. Gudina' nupa ni' ta'yéajlë' Li', en gulú'ugaca'-në' lidxi guíë'.

20 Cate' ni' gulútië' Esteban, bönni' ni' benë' ba nalí quiu', lësca' zoa' neda' ni', en bena' tuz yugu' bönni' gulútië' lë' tu' ben chi'a lari' nácugaquië' bönni' na' bulu'ladxë' lë' guiöj."

21 Ní'irö Xanru' gudxë' neda': "Guyéaj, tu' risöl-la'a li' lógaca bönachi izá'a."

Pablo ru'ilenë' bönni' lo didza', bönni' rinná bé'enë' bönni' röjáquië' gudil-la

22 Nisö ze lo yugu' bönni' judío bulu'zë nágagaquië' didza' bë'ë Pablo, ate' ní'irö gula'bödxi'ë. Gulu'ë zidzaj didza', ta'nnë':

—¡Gulí'gútië' bönni' ni! ¡Bíti'rö ral-la' soë' ibanë'!

23 Ní'irö tu' ta'bödxi'ë, en ta'chözë' le nácugaquië' lu yöl-la' rilé quégaquië', en tu'chejë' bëchtö yu lu bö'ös,

24 bönni' lo na' rinná bé'enë' bönni' röjáquië' gudil-la gunná bë'ë ulu'gu'ë Pablo lu yu'u zxön na'. Lësca' gunná bé'enë' légaquië' ila'guinë' Pablo para quíxjö'ë le nácate', para ila'nözinë' bizx que na' ta'bödxi'ë bönni' judío caní queë' Pablo.

25 Cate' gulúgui'ë lë' du guídi para ila'guinë' lë', Pablo gudxë' tu bönni' nacu'ë lu në'ë bönni' röjáquië' gudil-la zoë' ni', rnnë':

—¿Naru' dë lataj quínili' neda'? Nababa' Roma, ate' cuntu nu buchí'a busörö neda' channö nabága'a xíguia'.

26 Cate' bönni' na' biyönnë' lë ni, guyijë' yöjtíxjöi'inë' bönni' lo na' rinná bé'enë' bönni' röjáquië' gudil-la. Rë' lë':

—¿Bizxi caz ni runru'? ¡Bönni' ni nababë' Roma!

27 Ní'irö bidë' bönni' lo na' ga zoë' Pablo, en gudxë' lë':

—¡Gudixjö'! ¿Naru' nababu' li' Roma?

Pablo gudxë' lë':

—Ön, nababa’.

²⁸ Bubi’ë didza’ bönni’ lo na’, gunné’:

—Neda’ ni, dumí zían gudizxja’ para ibaba’ Roma.

Ní’irö Pablo gudxë’ lë’:

—Neda’ gubaba’ Roma cate’ ni’ gulja’ tu’ nabábagaquië’ xuz xiná’a Roma.

²⁹ Cate’ bönni’ na’ chizóa ila’guinë’ lë’ bila’yönnë’ lë’ ni, la’ bulu’bígá’të’ ga zoë’ Pablo. Lësca’ gúdxinë’ bönni’ lo na’ cate’ gunózinë’ nababë’ Pablo Roma, tu’ chigunná bë’ë ilúguië’ lë’.

Ridxinë’ Pablo lógaquië’ bönni’ yudo’ tu’chi’a tu’söröë’

³⁰ Dza buropi ni’, gú’unnë’ bönni’ lo na’ inózinë’ gazxi ga rë’ bizxi na’ yugu’ bönni’ judío tu’zéguië’ Pablo didza’. Gunná bë’ë bulu’sedxë’ du guíë na’ náguë’ë Pablo, ate’ gunná bë’ë ulu’dubë’ bixúz unná bë’ judío, en yúgu’të bönni’ yudo’ tu’chi’a tu’söröë’. Ní’irö bubéajë’ Pablo ga na’ nagú’ugaquië’ lë’, ate’ buzöë’ lë’ lógaquië’.

23

¹ Ní’irö buyúdë’ë Pablo lógaquië’ bönni’ yudo’ tu’chi’a tu’söröë’ na’, en gunné’:

—Libí’ili’, böcha’a. Ga ridxintë na’a riböza’ dxí’ado’. Caní naca, bití’ zoa le ruxösa ládxi’da’ahua’ neda’ lahuë’ Dios.

² Ní’irö Ananías, bixúz lo, gunná bé’enë’ nupa nacué’ cuita lë’ë Pablo ila’gápë’ë ru’ë.

³ Pablo gudxë’ lë’:

—Lëzca’ caní Dios ubi’ë quiu’, li’, rulu’isö tsahui’ cuinu’. ¿Naru’ rö’ö cazu’ ruchi’a rusöröu’ neda’ ca rinná bë’ xibá, pero ridödi bë’tso’ ca rinná bë’ xibá na’, na’ rinná bé’enu’ ila’gápë’ë neda’?

⁴ Nupa nacué’ ni’ të Pablo:

—¿Naru’ rulidza zi’tso’-në’ bixúz lo queë’ Dios?

⁵ Pablo gudxë’ lógaquië’:

—Libí’ili’, böcha’a. Nazúaj lu guichi, rnna: “Biti’ ulidza zi’u nu rinná be’e bönachi uládz quiu’”, pero neda’ bití’ gúquibe’eda’ náquië’ bixúz lo.

⁶ Ní’irö gúquibe’enë’ Pablo bal-lë’ nácagaquië’ bönni’ yudo’ saduceo, ate’ ia’bal-lë’ bönni’ yudo’ fariseo. Ní’irö bë’ë zidzaj didza’ lógaquië’ bönni’ yudo’ tu’chi’a tu’söröë’ na’, gunné’:

—¡Libí’ili’, böcha’a! ¡Naca’ bönni’ fariseo, en naca’ zxi’inë’ tu bönni’ fariseo! ¡Na’a ruchi’a rusöröli’ neda’ tu’ runa’ löza ulu’bán nupa chinátigaca!

⁷ Cate’ bë’ë Pablo didza’ ni, bila’rúajë’ choplö yugu’ bönni’ yudo’ fariseo, en yugu’ bönni’ yudo’ saduceo, ate’ gula’dil-la dídžë’ë la’ légacasë’.

⁸ Caní gulunë’ tu’ ta’nnë’ bönni’ saduceo na’ bití’ ulu’bán nupa chinátigaca, en bití’ nacu’ë gubáz lá’ayi, en bití’ nacué’

bö' nácagaca caz bönachi, pero ta'yéajlë'ë bönni' yudo' fariseo nácagaca yúgu'të lë ni.

⁹ Que lë ni na' gula'bödxi'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídze'ë, ta'nnë':

—Rusáca'tu' queëtu' biti' bi dö' nu'ë bönni' ni. Channö tu bö' naca caz bönachi bë'len lë' didza', o channö tu gubáz lá'ayi queë' Dios bë'lenë' lë' didza', biti' ral-la' tá'baga'ru'-në' Dios.

¹⁰ Cate' chita'díl-lada' dídze'ë bönni' judío na', gúdxinë' bönni' lo na' rinná bé'enë' bönni' röjáquië' gudil-la, tu' réquinë' ulu'zxuzxaj ulu'quínnajë' Pablo. Ní'irö gunná bé'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'ché'ë lë' lu yu'u zxön ga na' nagá'anagaquië' bönni' na' röjáquië' gudil-la.

¹¹ Cate' chinaca chi'i dzö'ölö la' dza ná'asö, buluí'i lahuë' Xanru' ga zoë' Pablo, en gudxë' lë':

—Butipa ládxu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

Tun xtídza'gaquië' ilútië' Pablo

¹² Cate' za' rení ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë' na' gulún xtídza'gaquië', gula'nnë' biti' ca' ilë'aj ilahuë' ga idxinrö chigulútië' Pablo.

¹³ Nayanrö ca choá'gaquië' bönni' na' gulún tsutsu xtídza'gaquië' caní.

¹⁴ Yöjáquië' bönni' ni ga nacu'ë yugu' bixúz unná bë', en bönni' gula tu'zéajni'inë' bönachi judío, ate' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí guntu' caní. Biti' guí'aj gágutu' ga gútirötu'-në' Pablo.

¹⁵ Na'a, libí'ili', en bönni' yudo' tu'chi'a tu'söröë', guli'guié' bönni' lo rinná bé'enë' bönni' röjáquië' gudil-la idichë'ë Pablo cuxö para idxinë' ga nudúbili', innali' ré'ënili' inábili'-në' Pablo tu didza' gate ga rë'. Netu' cö'ö nistu'-në' la' nöza, ate' gútitu'-në' zí'alö ca idxinë' ni.

¹⁶ Biyönibi' bi'i bönni' queënu nigula zanë' Pablo ca na' ila'bö' nísie' Pablo, ate' guyéajbi', en guyú'ubi' yu'u zxön na', ate' yöjtíxjöi'ibi'-në' Pablo.

¹⁷ Pablo bulidzë' tuë' bönni' nacu'ë lu në'ë bönni' röjáquië' gudil-la en gudxë' lë':

—Guchë'ë-bi' bi'i ni lahuë' bönni' lo, tu' nuá'abi' didza' guiëbi'-në'.

¹⁸ Ní'irö bönni' na' gudélë'ë-bi', en guchë'ë-bi' ga na' zoë' bönni' lo na', ate' gudxë' lë':

—Bulídzë Pablo, bönni' na' yu'ë lidxi guié, neda', en gúta'yuë' lahua' idigu'a-bi' bi'i ni lo', tu' ré'ënibi' gü'ilenbi' li' didza'.

19 Bönni' lo na' gudélë'ë ná'abi', en guchë'ë-bi' quez, ate' gunábinë'-bi', rnnë':

—¿Bizxi na' ral-la' guío' neda'?

20 Lëbi' gúdxibi'-në':

—Chinúngaquië' didza' bönni' judío iláta'yuë' lo' ichë'u-në' Pablo cuxó, para idxinë' lógaquië' bönni' yudo' tu'chi'a tu'söröë'. Ilë' li' té'ënnë' ila'nábinë' lë' tu didza' gate ga rë',

21 pero biti' tséajlë'u le ila'nnë' tu' nadödi choá'gaquië' ila'bó'nisië' Pablo. Chigulún tsutsu xtídzë'ë gula'nnë' gunë' Dios légaquië' xíguia' channö cabí ilútië' lë'. Biti' bi ilë'aj ilahuë' ga idxinrö ilútië' lë'. Chizóagaquië' ta'bözë' si' lu no'o gunu' le ila'nábinë' li'.

22 Ní'irö bönni' lo na' rinná bé'enë' bönni' rójáquië' gudil-la gunná bé'enë'-bi' cuntu nu guiëbi' lë na' chigúdxibi' lë', ate' ní'irö busól-lë'ë-bi' bi'i ni.

Ridxinë' Pablo lahuë' Félix, bönni' rinná bë'ë luyú na'

23 Ní'irö bönni' lo na' bulidzë' chopë' bönni' nacu'ë tu gáyu'ë bönni' rójáquië' gudil-la lu ná'agaquië' tu tuë', ate' gunná bé'enë' légaquië' ulu'cözë' chopa gáyu'ë bönni' rójáquië' gudil-la ta'zë'e ní'agaquië', en tsónnalalay yu' chië' bönni' rójáquië' gudil-la dxíagaquië' böa', en chopa gáyu'ë bönni' rójáquië' gudil-la ilu'ë yaga tuchi' para tsöjáquië' yödzo Cesarea idú ridödi xtsö'.

24 Lësca' gunná bé'enë' légaquië' ulu'cözë'-ba' tu böa' cuië'-ba' Pablo, ate' ila'ché'ë lë' dxí'ado', cabí bi gaca queë', para idxinë' lahuë' Félix, bönni' lo rinná bë'ë uláz que Roma.

25 Gusól-lë'ë ca' tu guichi le rnna caní:

26 “Neda', Claudio Lisias, ruzúaja' quiu' lu guichi, bönni' lo unná bë', Félix. Rugapa' Dios li'.

27 'Bönni' ni risól-la'a-në' quiu', gula'zönë' bönni' judío lë', en gulë'ënnë' ilútië' lë'. Cate' gúquibe'eda' nababë' Roma, guchë'gaca'-në' bönni' rójáquië' gudil-la, en busólá'-në' lu ná'agaquië' judío na'.

28 Gú'unida' inözda' bizxi benë', lë na' tu'zéguië' lë' didza' bönni' judío, ate' guchë'a-në' lógaquië' bönni' yudo' tu'chi'a tu'söröë' légaquië'.

29 Cate' buédxididza', gunözda' tu'zéguië' lë' didza' ca naca le rinná bë' xibá quégaquië', en biti' bi nabáguë'ë bönni' ni para nu guti lë', o nu cu'u lë' lidxi guié.

30 Ní'irö cate' bidxín nu gudíxjöi'i neda' ta'bó' nisé' yugu' bönni' judío lë', la' gusól-la'tea' lë' ga zu', ate' gunná bé'egacada'-në' bönni' ni tu'zéguië' lë' didza' ila'dxinë' lo'

li', para ila'guíxjoi'iné' li' bi didza' nápagequié' lè'. ¡Dios gun tsáhuë'è li'!"

³¹ Ní'irö bönni' na' röjáquié' gudil-la gula'guél'è Pablo, en guluné' ca na' chigunná bé'ené' légaquié', ate' gula'ché'è lè' yödzo Antípatris, ni' naca chi'i dzö'ölö.

³² Cate' za' reni' ia'tú dza bönni' röjáquié' gudil-la ta'zè'e ní'agaquié' yöjhuöjgaquié' Jerusalén, ate' bönni' röjáquié' gudil-la dxíagaquié' böa' bulu'ú'è nöza, dzágagaquié' Pablo.

³³ Cate' bönni' na' röjáquié' gudil-la naché'gaquié' Pablo bila'dxiné' Cesarea, bulu'nödzej' guichi na' lu në'è bönni' rinná bë'è uláz que Roma, en bulu'sudxiné' Pablo lahué'.

³⁴ Gudödi bulabë' bönni' unná bë' guichi na', gunábiné' Pablo gazxi bönni' lè'. Cate' gúquibe'ené' nababë' luyú Cilicia,

³⁵ gudxé' lè':

—Yónida' le innó' cate' ila'dxín ni nupa tu'zegui li' didza'.

Ní'irö gunná bé'ené' ilún chi'è lè' lu yu'u yúlahui' ga ribö'è Herodes, bönni' rinná bë'è, para uchi'a usörö'è bönachi.

24

Pablo ru'è didza' uláz queë' lahué' Félix

¹ Cate' chibizá'a gayu' dza, bidxiné' Ananías, bixúz lo, ni', ate' dzágagaquié' lè' bal-lè' bönni' gula tu'zéajni'iné', en Tértulo, tu bönni' nazé'ede'ené' didza'. Bila'dxiné' lahué' bönni' unná bë', ate' gula'nné' queë' Pablo.

² Cate' chibulu'lidzë' Pablo, ate' bidxiné' ni', gusí lahué' Tértulo ruzégui'è lè' didza', rnné':

—Bönni' lo unná bë', Félix. Ni'a quiu' li' ruzi'tu' xibé le run tsahui' netu', ate' lu yöl-la' réajni'i quiu' rinná bé'enu' dxi'a bönachi uláz queëtu'.

³ Yúgu'tè lè' ni ruzi'tica'stu' xibé gáti'tës, ate' idú ládxi'tu' rëtu' li': "Xclenu'."

⁴ Na'a, para cabí upízjarötu' li', ráta'yua' lo' gun zxön ládxi'u, yönnu' tu le do' guiëtu' li'.

⁵ Gúquibe'etu' bönni' ni rigú'u yöl-lè'è bönachi, en runé' ga ta'dá'baguë'è yúlahui' yugu' bönni' judío nacu'è idútë yödzölió, en náquié' bönni' lo quegaquié' bönni' dá'gaquié' bönni' Nazaret na'.

⁶ Lësca' gú'unné' gun dítjané' yudo' queëtu'. Que lè' ni na' guzxöntu'-né', en gú'unitu' uchi'a usörötu' lè' ca naca xibá queëtu'.

⁷ Ní'irö Lisias, bönni' lo rinná bé'ené' bönni' röjáquié' gudil-la bidxiné' ga zóatu', en lu yöl-la' sínia' zxön bugüé' bönni' ni lu na'tu'.

⁸ Ní'irö gunná bé'ené' Lisias na' ídigaca nupa tu'zegui lè' didza' lo' li'. Na'a, li' caz, cate' rinabi yúdxinu'-né' Pablo ni, huáca inözinu' gate ga rë' yúgu'tè lè' ni ruzéguitu' lè' didza'.

⁹ Lësca' caní gula'nně' yugu' bönni' judío ni', gula'nně' naca caz caní.

¹⁰ Ní'irö butásö ně'ě bönni' rinná bě'ě uláz que Roma na' para gu'ě didza' Pablo, ate' lě' bubi'ě didza', gunně':

—Idú ládxa'a quíxjö'a ca naca le runa', tu' chinaca zían iz ruchí'a rusöröu' le raca quégaca bönachi ladztu'.

¹¹ Le bena' huáca inabu'. Biti' réquini chinnu dza bidxina' Jerusalén para tseaj ládxa'a-ně' Dios.

¹² Biti' yöjxáca'gaquiě' neda' nu ridíl-lalena' didza', en biti' bena' ga ulu'tsatsa bönachi ga naca chila yudo', en cabí lu yu'u ga tu'dubě' tu'sědě' queě' Dios, en cabí lu yödzö.

¹³ Biti' ca' gaca ulu'béaj liě' yugu' lě ni tu'zéguiě' neda' didza'.

¹⁴ Lě ni rixóalěpa' lo'. Ca runa' xichině' Dios quégaquiě' xuz xtó'otu' nalěbi ca le tu'sědině' légaquiě', pero bönni' judío ni tu'ě le: Le ridá'baga' Dios, tu' réajlě'a yúgu'tě le rinná bě' xibá queě' Dios, enca' yúgu'tě le bulu'zúajě' bönni' gulu'ě didza' uláz queě' Dios.

¹⁵ Ca na' légaquiě' tuně' löza Dios, lësca' neda' runa' löza Dios, usubaně' nupa chinátigaca, bönachi tsahui', en bönachi bití' nácagaca tsahui'.

¹⁶ Que lě ni na' ru'í ládxi'tica'sa' cabí ibága'a le gun ga uxös ládxi'da'ahua' neda' lahuě' Dios o lógaca bönachi.

¹⁷ 'Gudödi zoa' ga yúbölö idú chopa tsonna iz, budxina' ga nacua' bönachi uládz quia' para unödza' dumí le gácalen bönachi yechi', en unödza' le rigu'a lahuě' Dios.

¹⁸ Tsanni ni' runa' caní, bal-lě' bönni' judío narúajgaquiě' luyú Asia bidixáca'gaquiě' neda'. Ni' zoa' lö'a yudo', nubéaj dxi'a cuina' ca naca que yudo', en cabí nutuba' bönachi zían, en cabí nuna' ga ulu'tsatsa bönachi.

¹⁹ Yugu' bönni' judío ni' ral-la' ila'dxině' lo' li', en ulu'zéguiě' neda' didza' channö nápagaquiě' neda' didza'.

²⁰ Ila'nnátsöquiě' bönni' judío ni channö bulu'dzölině' bi le cabí naca dxi'a bena' cate' ni' bidxina' lógaquiě' bönni' yudo' tu'chi'a tu'söröě' légaquiě'.

²¹ Tuz cate' ni' zoa' lógaquiě', bě'a zidzaj didza', gunnía': "Ruchi'a rusöröli' neda' na'a tu' runa' löza ulu'bán nupa chinátigaca."

²² Cate' biyönně' Félix didza' ni, en dxí'ado' chinözině' ca naca que lě na' rusědině' Pablo, buzě láchui'sě' ca' didza' bizxaj ni, gunně':

—Cati' idxině' Lisias, bönni' lo rinná bé'eně' bönni' röjáquiě' gudil-la, údxi yönida' ca naca didza' bizxaj queéli'.

²³ Ní'irö Félix gunná bé'eně' tu bönni' nacu'ě lu ně'ě bönni' röjáquiě' gudil-la zoě' ni', gun chi'ě Pablo, pero gu'ě lě' lataj tě'

lō'a, en biti' uzáguë'ë xinözgaquië' böchi' luzë'ë duyúgaquië' lë' bi dxin ilunë' queë'.

²⁴ Chopa tsonna dza gudzé, bidë' leyúbölö Félix na'. Drusila, nigula queë' dzáganu lë'. Nácanu nigula judío. Félix bulidzë' Pablo, ate' buzë náguië' xtídzë'ë ca naca le réajlë'ëru' Jesucristo.

²⁵ Cate' bë'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöröë' Dios rë'u dza si' za', ní'irö gudxi bidzöbinë' Félix, en gudxë' Pablo:

—Guyéaj na'a. Cate' gapa' lataj ulidza' li'.

²⁶ Lësca' gú'unnë' Félix si'ë dumí le unödzejë' Pablo lë' para usané' lë', ate' que lë ni na', zían luzuí bulidzë' Pablo, en bë'lenë' lë' didza'.

²⁷ Cate' bizá'a chopa iz guyázië' Porcio Festo xilatjë' Félix, ate' tu' gú'unnë' Félix gunë' le tsaza ládxi'gaquië' bönni' judío, bucá'anë' Pablo nadzunë' lidxi guié'.

25

Ridxinë' Pablo lahuë' Festo, bönni' unná bë'

¹ Bidxinë' Festo yödzo Cesarea para tsázië' xilatjë', gáquië' bönni' unná bë' ulaz que Roma. Cate' bizá'a tsonna dza buzë'ë yödzo na', sa'yéajë' Jerusalén.

² Cate' bidxinë' Festo ni' yugu' bixúz unná bë', en yugu' bönni' lo quégaca bönachi judío bila'dxinë' lahuë' para ila'nnë' queë' Pablo, ate' guláta'yuë' lahuë' Festo

³ bi uzá' ládxe'ë quégaquië', isöl-lë'ë nupa tsöjxi'gaca Pablo, para udxinë' Jerusalén. Gulë'ënnë' ila'bö' nísie' lë' la' nöza para ilútië' lë'.

⁴ Bubi'ë didza' Festo, gudxë' légaquië':

—Lu yödzo Cesarea nadzunë' Pablo, ate' ral-la' tseja' ni' cuxö huidzaj nisö.

⁵ Que lë ni na', nútí'tëslöli' dë lu ná'ali', ral-la' sá'lenli' neda', en channö nabáguë'ë bönni' ni' xíguia', huáca uzéguili'në' didza' ni'.

⁶ Gudzenë' Festo Jerusalén idú ca xunu' gubidza, ate' ní'irö böajë' Cesarea. Cate' guzá' rení' ia'tú dza gurö'ë ga ruchi'a rusöröë', en gunná bé'enë' nupa tsöjxi'gaca Pablo.

⁷ Cate' chibidxinë' Pablo ni', yugu' bönni' judío narúajgaquië' Jerusalén gula'gu'ë lë' lë'alö, en zían le gula'nnë' queë'. Bulu'zéguië' lë' le tu'subáguë'ë lë' xíguia', pero biti' guca ulu'béaj lië' yugu' lë na' gula'nnë' queë'.

⁸ Ní'irö bë'ë didza' Pablo uláz queë', gunné':

—Biti' bi le ruá' dö' bena' que xibá quégaquië' bönni' judío, en cabí que yudo' quégaquië', en cabí queë' César, bönni' Roma, rinná bé'enë' rë'u.

9 Gú'unnë' Festo gunë' le ila'yaza ládxi'gaquië' bönni' judío, ate' bubí'ë didza', gudxë' Pablo:

—¿Rë'ënu' so'o Jerusalén, ga na' soa nu uchi'a usörö li' ca náçagaca lë ni ta'nnë' quiu'?

10 Bubi'ë didza' Pablo, gudxë' lë':

—Zoa caza' ga röö nu ruchi'a rusörö uláz queë' César, ga na' ral-la' uchi'a usöröu' neda'. Biti' bi huiá' dö' nuna' quegaquië' bönni' judío, ate' chinöz quëzinu' lë ni.

11 La'tu' nuna' tu le ruá' dö', o bititës le run ga ibága'a xíguia' gátia', biti' tá'baga'a gátia'. Na'a, channö cabí nuna' ca ta'nnë' quia' bönni' ni, cuntu caz nu dë lu në'e udödi neda' lu ná'agaquië'. Rinaba' tseja' lahuë' César ga udxí'a urö quia'.

12 Cate' Festo chibë'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

Ru'ë didza' Pablo lahuë' Agripa, bönni' unná bë'

13 Gudödi chopa tsonna dza, bidxinë' Agripa, bönni' rinná bë'ë lu yödzö Cesarea, dzáganu Berenice lë', duyúgaquië' Festo.

14 Cate' chigula'cu'ë ni' zían dza, Festo buluí'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni buca'anë' Félix lë' lidxi guíë.

15 Cate' guzóa' Jerusalén, yugu' bixúz unná bë', en bönni' gula tu'zëajni'inë', bila'dxinë' lahua', ate' gula'nnë' queë' bönni' ni. Gula'nábinë' neda' ichuga' queë' gátie'.

16 Neda' bubí'a didza', gudxa' légaquië' bití' nalébiguequinë' bönni' Roma ila'chúguië' queë' tu bönni' gátie' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë na' ta'nnë' queë'.

17 Que lë ni na', cate' bila'dxinë' légaquië' ni, bití' ca' gudzedá', pero cate' guzá' gyeani' ia'tú dza gurö'a ga ruchi'a rusöröa', ate' gunná bé'eda' nupa yöjxí'gaca bönni' ni.

18 Cate' gula'cu'ë ni bönni' na' tu'zëguië' lë' didza', bití' bi gula'nnë' queë' ca busaca' quia' ila'nnë'.

19 Gula'nnë' queë' bal-la didza' bizxaj ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö.

20 Tu' buchíxida' ca náçagaca lë ni, gunábida'-në' Pablo channö rë'ënë' tsejë' Jerusalén, ga ni' soa nu uchi'a usörö lë' ca náçagaca lë ni.

21 Ní'irö cate' gunabë' Pablo tsejë' lahuë' Augusto César para uchi'a usöröë' lë' ni', gunná bé'eda' bönni' rójáquië' gudil-la ilún chí'igarë' lë' cate' gála'rö dza isöl-la'a-në' lahuë' César.

22 Ní'irö Agripa gudxë' Festo na':

—Lëzca' neda' rë'ënda' yónida' le innë' bönni' na'.

Festo gudxë' lë':

—Cuxõ yõnnu' le innë'.

²³ Cate' za' rení' ia'tú dza, len ba zxõn bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bõnni' unná bë', ate' gula'sõl-lë'ë nupa tsõjxi'gaca Pablo.

²⁴ Ní'irõ Festo gudxë' Agripa, bõnni' unná bë':

—Bõnni' unná bë', Agripa, en yúgu'tëli' zóali' ni tsõzxõn len netu'. Ni zoë' rilé'eli'-në' bõnni' na', ta'nnë' queë' yúgu'të bõnni' judío nacu'ë Jerusalén, enca' nupa nacuá' ni, të' neda' ral-la' gátië'.

²⁵ Runi neda' biti' bi benë' le nabáguë'ë xíguia' gátië', pero tu' gunabë' lë cazë' tsejë' ga uchi'a usõrõë' Augusto César lë', que lë ni na' chinuna' quia' isõl-la'a-në' lahuë' Augusto.

²⁶ Tu' cabí nõzda' bi ral-la' uzúaja' lu guichi le uzegui bõnni' ni didza' para isõl-la'a lu në'ë César, xana', que lë ni na' nachë'a-në' loli', en le nácarõ lo, nachë'a-në' lo' li', Agripa, bõnni' unná bë', para cate' údxi rinábini yudxu'-në', ní'irõ inõzda' bi ral-la' uzúaja' lu guichi ca naca queë' bõnni' ni.

²⁷ Réquida' biti' naca dxi'a isõl-la'a-në' nu bõnni' náguë'ë ni channõ cabí gaca ulu'a le nabáguë'ë.

26

Didza' bë'ë Pablo uláz queë' lahuë' Agripa, bõnni' unná bë'

¹ Ní'irõ Agripa gudxë' Pablo:

—Dë lataj gu'u didza' uláz quiu'.

Buchila në'ë Pablo lahuë' Agripa, ate' gusí lahuë' ru'ë didza', rnnë':

² —Bõnni' unná bë', Agripa. Raza ládxa'a tu' dë lataj na'a gu'a didza' uláz quia' lo' li' ca naca yúgu'të le tu'zéguië' bõnni' judío neda' didza'.

³ Raza ládxi'ra' tu' núnbë'u yúgu'të le nalëbiguequinë' tunë' bõnni' judío, enca' yugu' lë ni ridíl-latu' didza'.

Yugu' le benë' Pablo zí'atëlõ

⁴ Gunnë' ca' Pablo:

—Nõzguequi quëzinë' yúgu'të bõnni' judío ca na' bena' ga gudéla'të cuídia' ga nacuá' bõnachi uládz quia', enca' lu yõdzõ Jerusalén.

⁵ Nõzguequi quëzinë' ca', en huáca ila'guíxjö'ë ca na' bena' dza ni'te. Guca' bõnni' fariseo. Yugu' bõnni' fariseo tuí'i ládxi'gacarë' ila'yéaj ládxi'gaquië' Dios ca tunë' ia'zíca'rë' bõnni' judío.

⁶ Na'a, zoa' ni loli' para nu uchi'a usõrõ neda' tu' runa' lõza Dios, usubanë' bõnni' nati, en gunë' ca na' guzxí' lu në'ë lógaquië' xuz xtó'otu'.

⁷ Tunë' löza yugu' bönni' idxinnu cö' di'a dza queëtu' ila'déli'në' lë na' guzxi' lu në'ë Dios. Que lë ni na' ta'yéaj lãdxi'gaquië' Dios, en tunë' xichinë' rëla, en tē dza. Tu' runa' löza lë ni, nuzéguigaquië' bönni' judío neda'. Caní naca, bönni' unná bē', Agripa.

⁸ Na'a, ¿naru' réquitseli' libí'ili' biti' naca le tséajlë'ëru', usub-anë' Dios bönni' nati?

Pablo gudxiá lãdxë'ë bönachi queë' Cristo

⁹ Gunnë' ca' Pablo:

—Lëzca' neda', zí'atëlö gúquida' le zían ral-la' guna', tá'baga'a-në' Jesús, bönni' Nazaret.

¹⁰ Caní bena' lu yödzo Jerusalén. Gulu'a zían bönachi ta'yéajlë' Jesús lidxi guié, tu' bulu'dödë' yugu' bixúz unná bē' lu na'a yöl-la' unná bē'. Cate' gulútië' bönachi ni', bénlena' légaquië' tuz didza'.

¹¹ Zían luzuí busaca' zi'a yugu' bönni' ni' para ulu'sán lãdxi'gaquië' ca ta'yéajlë'ë Cristo. Caní bena' gapa naca lu yu'u ga tu'dubë' bönni' judío, en tu'sedë' queë' Dios. Guléde'eda' légaquië', ate' gudxiá lãdxa'a légaquië' ga bidxintë guyija' gapa nacua' yödzo zi'tu' para tsöjxöngaca'-në'.

Rigúxjö'ë Pablo ca böáquië' queë' Cristo

¹² Gunnë' ca' Pablo:

—Para guna' caní guyija' yödzo Damasco, ate' bixúz unná bē' nasöl-la'gaquië' neda' nudödigaquië' lu na'a yöl-la' unná bē'.

¹³ Caní guca, bönni' unná bē', Agripa. Cate' ni' sa'yija' la' nöza, ni' naca idú huagubidza, bilé'eda' tu bení lúzxiba le buzení'rö ca gubidza. Buzení' ga na' zoa', en ga nacua' nupa söjácalen neda'.

¹⁴ Ní'irö yúgu'tëtu' gudzö'ötu' lu yu, ate' biyönda' chi'i nu bulidza neda'. Bë'ë didza' hebreo, gunnë': "Saulo, Saulo, ¿bizx que ribía lãdxu'u neda'? Run zí' cuinu', ridá'bagu'u neda'. Raca quiu' ca raca queë'ba' bëdxi, run zí' cuinba', richégu'ba' yaga tuchi' le túndë'ë-ba' zí'."

¹⁵ Ní'irö gudxa'-në': "¿Nuzxi li', Xan?" Xanru' gudxë' neda': "Neda' ni Jesús, Nu na' ribía lãdxu'u."

¹⁶ Na'a, guyasa, en guzuí, tu' buluí'i lahua' li' na'a, para uzóa' li' gunu' xichina', en gunu' ba nalí que lë ni chibilé'enu', enca' quégaca le uluí'ida' li', uluí'i lahua' ga zu'.

¹⁷ Usölá' li' lu ná'agaquië' bönni' uládz quiu', en lu ná'agaquië' bönni' izá'a, lógaca nupa ni' risöl-la'a li' na'a.

¹⁸ Risöl-la'a li' ga na' nacué para gunu' ga ulu'huóalaj guiöj lógaquië', en ulu'huóáquië' queë' Dios, en ulu'cá'anë' le naca chul-la' que dul-la', en ila'dxinë' lu bení'. Ulu'rúajë' lu na' Satanás tu' xihui', en ila'yázië' lu në'ë Dios. Channö

ila'yéajlë'ë neda', Dios uniti lahuë' légaquië', en ugüë' dul-la' nabága'gaquië', ate' ila'déli'në' ila'bábalenë' bönachi chin-ubéajë' Dios quez queë'."

Benë' Pablo ca naca le bulu'inë' Xanru' lë'

¹⁹ Gunnë' ca' Pablo:

—Qui lë ni na', bönmi' unná bë', Agripa, bitì' gudá'baga'a guna' le bulu'inë' Dios, zoë' yehua' yubá, neda'.

²⁰ Buzéajni'ida' nupa nacuá' yödzo Damasco, en gudödi ni' nupa nacuá' Jerusalén, en nupa nacuá' luyú Judea, en bönachi yugu' yödzo zì'tu' para ulu'bí'i ládxi'gaca, en ulu'huóaca queë' Dios, en ilún le ilaca bë' chibulu'bí'i ládxi'gaca.

²¹ Tu' bena' caní, yugu' bönmi' judío gula'zönë' neda' cate' ni' zoa' lö'a yudo', en gulë'ennë' ilútië' neda'.

²² Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönmi' cá'asö, en lógaquië' bönmi' lo. Bitì' ruá'a didza' yúbölö, pero ca gula'nnasë' zí'alö bönmi' gulu'ë didza' uláz queë' Dios, enca' ca gunné' Moisés ca ral-la' gaca.

²³ Gula'nnë': "Qui'i sáquë'ë Cristo, en tödi gátië', gáquië' nu isí lo ubán tsaz lu yöl-la' guti, para ulu'ë lahui naca löza ila'dxin bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'inë' Agripa para tséajlë'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazédado'o, chiguchixi icju'!

²⁵ Ní'irö Pablo gudxë' lë':

—Bitì' nachixi icja', rea' li', Festo, ate' didza' ni ruá'a naca iduté li, en naca lesaca'.

²⁶ Lë cazë' Agripa, bönmi' ni rinná bë'ë, nözinë' yugu' lë ni, en que lë ni na', idú ládxa'a ruá'a didza' lahuë' lë'. Nözinë' yugu' lë ni, tu' cabí guca bagáchi'sö lë na' guca.

²⁷ Bönmi' unná bë', Agripa. ¿Naru' réajlë'u le gula'nnë' bönmi' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'láti'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ni'a queë' Xanru' Dios rë'ënda', sal-la' ia'láti'sö o yenni', calégasö li', pero lësca' yúgu'të nupa ni ta'yöni neda', gácali' idú ca naca' neda', néquida' queë' Cristo, pero calëga gága'li' du guíë ca ni nága'a neda'.

³⁰ Cate' budxi bë'ë Pablo didza' ni, guzuínë' bönmi' lo unná bë' na', ate' gulazuínë' ca' bönmi' rinná bë'ë, en Berenice, en nupa rö'lengaca légaquië'.

³¹ Cate' bila'ruájë' quez, gulu'i xtídza'gaquië', ta'nnë':

—Biti' bi nunë' bönni' ni le nabáguë'ë xíguia' gátië', en calëga tsázië' lidxi guíë.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejë' lahuë' César ga uchi'a usöröë' lë'.

27

Ta'söl-lë'ë Pablo yödzo Roma

¹ Cate' chigulunë' quëgaquië' ila'söl-lë'ë netu' lë'e barco para tséajtu' yödzo Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' rójáquië' gudil-la nazí'i le: Bönni' Queë' Augusto Rójáquië' Gudil-la.

² Gurentu' tu lë'e barco que luyú Adramitio, le ral-la' tōdi yugu' yödzo gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzo Cesarea. Aristarco, tu bönni' yödz Tesalónica, le nababa luyú Macedonia dzáguie' netu'.

³ Cate' za' rení' ia'tú dza, bidxintu' yödzo Sidón, ate' ni' Julio, bönni' na' rinná bé'enë' bönni' rójáquië' gudil-la, lu yöl-la' dxi'i ladxi' queë', bë'ë Pablo lataj tsejë' ga nacu'ë böchi' luzë'ë para ilácalenë' lë' bi riyadzaj queë'.

⁴ Gudödi ni', bubentu' lë'e barco, ate' buzá'atu' ni'. Gudöditu' tsölá'a ga dë luyú bidxi Chipre ga rö'ö dxi bö' na' recja, tu' za' saca' lotu' bö' recja lu nísado' na'.

⁵ Ní'irö gudöditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yödzo nababa luyú Licia.

⁶ Bönni' na' rinná bé'enë' bönni' rójáquië' gudil-la, en nachë'ë netu', yöjxáquië' tu barco ni' narúaj yödzo Alejandría que luyú Egipto, barco na' zeaj luyú Italia ga rö' yödzo Roma. Gulu'ë netu' lë'e barco na'.

⁷ Guzá' barco na' tsahui' ládxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudöditu' tsölá'a luyú bidxi nazí'i le Creta ga rö'ö dxi bö' na' recja, en bidxintu' ga nalá' yödzo Salmón luyú Creta na'.

⁸ Lu yöl-la' rizáca'sö gudöditu' tsölá'a ga dë luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dë gala' ga na' dë yödzo Lasea.

⁹ Tu' chigudzéda'atu', chigula' zoa bönadxi gaca ditaj bíti'tës barco rizá' lu nísado' na', tu' chigudödi yugu' dza tunë' gubasa cate' si' idxín beo' ziaga cate' récjada' bö'. Que lë ni na' Pablo buzéajni'inë' légaquië',

¹⁰ rnnë':

—Libi'ili', bönni', réquibe'eda' ga tseaj barco ni, huazóa bönadxi gaca ditaj barco ni, en yua' dzö'ö lë'e, en lësca' soa bönadxi queëru' gátiru'.

11 Bönni' na', rinná bé'enë' bönni' rójáquië' gudil-la, guyéajlë'erë' le gula'nnë' bönni' na' dë lu në'ë barco, en bönni' xan caz, ca le gunné' Pablo.

12 Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë' ni' yugu' beo' ziaga, que lë ni na' la'tu'biqui' yúgu'të bönni' nacu'ë lë'e barco na' gulún tuz xtídza'gaquië' ulu'zë'ë ni', channö huáca ila'dxinë' ga ta'dxín barco lu yödzo Fenice, lësca' dë luyú bidxi na' nazí'i le Creta, le dë tsölá'a ga ribía gubidza, ate' gulë'ënnë' ulu'gá'anë' ni' yugu' beo' ziaga.

Recja bö' budunu' lu nísado'

13 Tu' recja tu bö'do' le za' saca' tsölá'a ga ridödi gubidza beo' ziaga, téquinë' chiraca ilunë' ca të'ënnë', ate' bulu'lisë' guié zi'i naga' du guié le ruzóa dxisö barco, ate' gudödi barco na' gala' ra' luyú bidxi na' nazí'i le Creta.

14 Ia'tú chí'isö ca', guyecja tu bö' budunu' za' lotu', nazí'i le Euroclidón.

15 Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga rë'ëni.

16 Cate' gudödi barco na' ga bidxintu' tsölá'a tu luyú bídxido' nazí'i le Cauda, tsölá'a ni' ga biti' récjada' bö', lu yöl-la' rizáca'sö buchísatu' bárcodo' ná'ayöj barco zxön na' yú'utu'.

17 Gudödi burentu' le lahui barco zxön na', ní'irö béga'ratu' barco zxön na'. Zxante barco na' buchölitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzótjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco.

18 Cate' za' rení' ia'tú dza, en ni' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lë'e barco na'.

19 Dza bunni, len na' cuintu' gurú'unatu' le tun dxin que barco na' lu nísado'.

20 Cate' chiguca zían dza biti' rilé'etu' gubidza, en nitú böljaj, en tu' récjada' bö' na' ruzéaj barco na' yú'utu', bíti'rö runtu' löza ulatu'.

21 Tu' chiguca zían dza biti' nágutu', guzuínë' Pablo gatsaj láhui'lö légaquië', en gudxë' légaquië':

—Libi'ili', bönni', dxí'arö guca la'tu' uzë nágali' neda', en cabí uzá'aru' luyú Creta, en cabí udutságaru' lë ni riguí'i rizáca'ru', en yugu' lë ni raca ditaj que barco ni.

22 Na'a, rea' libí'ili': Tsutsu guli'gún ládxi'li', tu' cabí gátili' nituli' libí'ili' tscali' zóali' ni, sal-la' gaca ditaj barco ni.

23 Caní gaca tu' budulu'i lahuë' neda' gudiyëla tu gubáz lá'ayi queë' Dios. Dios ni néquida' queë', en runa' xichinë'.

24 Gubáz lá'ayi na' gudxë' neda', gunné': "Pablo, biti' gádxinu'. Run bayudxi idxinu' lahuë' César. Tu' nadxí'inë' Dios li', usölë' yúgu'të bönachi nacua'len li' lë'e barco ni."

25 Que lë ni na', tsutsu guli'gún ládxi'li', tu' ruzxöni ládxa'a-në' Dios, gaca ca na' chigudxë' gubáz lá'ayi queë' neda'.

26 Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

27 Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquinë' bönni' tunë' dxin lu barco na' chizóa idxín barco gala' tu luyú bidxi.

28 Gula'ru'unë' du lu nísado' na', ate' gula'nözinë' galaj ösa naca ga bidxintë ga rë' lu nisa. Cate' gudödi barco na' ia'láti'do', gula'ru'unë' du na' leyúbölö, en gula'nözinë' chinaca chinu ösa.

29 Tu' guládxinë' tsöjdín barco na' lu guiöj, que lë ni na', tsölá'a láhuilö que barco gula'ru'unë' lu nísado' tapa guië zi'i nága'gaca du guië le tu'zóa dxisö barco lu nisa. Lu yöl-la' ruúbi ruguí'sö ládxi'do'gaquië' gula'bözë' tsení'.

30 Ní'irö gulë'ënnë' bönni' tunë' dxin lu barco ulu'zxúnnajë' lë'e barco na'. Bulu'zötjë' bárcodo' na' dë lahui barco zxön na' lu nísado'. Gulunë' ca të'ënnë' ilu'ë ia'lati' zi'tu' guië zi'i na' naga' du guië le ruzóa dxisö barco na', le zoa saca' tsölá'a láhuilö.

31 Ní'irö Pablo gudxë' bönni' na' rinná bé'enë' bönni' röjáquië' gudil-la, tsözxön len bönni' na' röjáquië' gudil-la, gunné':

—Channö cabí ulu'gá'anë' bönni' ni lë'e barco ni, biti' gaca uláli'.

32 Ní'irö bönni' na' röjáquië' gudil-la gula'chúguië' du naga' bárcodo' na', ate' gulu'ë lataj gubixi lu nísado'.

33 Cate' chizá' rení', Pablo gúta'yue' lógaquië' bi ilahuë' yúgu'të'. Gudxë' légaquië':

—Na'a chiguca chidá' dza rubéaj yëla loli', en runli' gubasa, biti' bi náguli'.

34 Que lë ni na', ráta'yua' loli' gáguli' para huóaca ládxi'li', tu' cabí gátili' nituli' libí'ili'.

35 Cate' Pablo budxi bë'ë didza' ni, gudélë'ë yöta xtila, en gudxë' Dios: "Xclenu'." Caní benë' lógaquië' yúgu'të'. Ní'irö buzxuzjë' yöta xtila na', en gusí lahuë' rahuë'.

36 Ní'irö bila'dipa ládxi'gaquië' yúgu'të', en gulahuë'.

³⁷ Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizxópatu'.

³⁸ Gudödi gulahuë', en bulu'huöljanë', ní'irö gula'ru'unë' zxoá' xtila dë lë'e barco na' lu nisa, para ulu'lahuë' yua' dzö'ö lë'e barco na'.

Raca ditaj barco lu nísado'

³⁹ Cate' chiguca lahui' dza, yugu' bönni' tunë' dxin lu barco na' bití' bulu'únbë'ë luyú na'. Bila'lé'enë' ga röjro' nisa zxön na' gatsaj láhui'lö luyú bidxi na', en dë lataj ni' ga naca lachi' ra' nísado'. Gulë'ënnë' ilunë' ga tsaza barco na' ga ni'.

⁴⁰ Ní'irö bulu'sedxë' yugu' du guíë nága'gaca yugu' guíë zi'i tu'zóa dxisö barco na', en bulu'sanë' léguequi, ate' gula'bixi lu nísado'. Bulu'sedxë' ca' du naga' në'e yaga le ruzecaj rudxí'i barco. Ní'irö bulu'chisë' lari' que le rutubi bö', le zoa tsölá'a láhuilö barco na', ate' ní'irö gusí lo ridödi barco saca' ga röjro' nísado' gatsaj láhui'lö luyú bidxi na'.

⁴¹ Cate' bidxín barco na' tu lataj ga ridzaga chopa nisa, ni' binidxi' tsölá'a láhuilö barco na' lu yuzxi lu nísado' na', ate' bugá'anasö barco na' ga ni'. Bítirö guca bi utá le, ate' tsölá'a cúde'lö barco na', gusí lo riguitsaj nísado' na' le, len yöl-la' rizá' que.

⁴² Ní'irö bönni' röjáquië' gudil-la gulë'ënnë' ilútië' bönni' nadzúngaquië', para cabí ila'zxúnnajë', ila'zxóë' lu nisa na'.

⁴³ Bönni' na' rinná bé'enë' bönni' na' röjáquië' gudil-la gú'unnë' usölë' Pablo, ate' gunná bé'enë' bönni' na' röjáquië' gudil-la cabí ilunë' ca na' té'ënnë'. Ní'irö gunná bé'enë' bönni' taca ila'zxóë' lu nisa, zí'alö légaquië' ila'yázië' lu nisa para ila'dxinë' luyú bidxi.

⁴⁴ Gunná bé'enë' ca' yugu' bönni' nagá'anagaquië' ila'zxóë' lu yaga dzö'ö láhuilö barco, en ia'bal-lë' láhuigaca yágado' que barco na'. Caní guca, bulu'lë' yúgu'të'. Canísö bila'dxinë' luyú bidxi na'.

28

Le benë' Pablo luyú bidxi nazí'i le Malta

¹ Cate' chibulatu' yúgu'tëtu', gunöztu' luyú bidxi ga na' zóatu' nazí'i le Malta.

² Bönni' xidza' nacu'ë luyú bidxi na' lu yöl-la' dxi'i ladxi' quégaquië' gulunë' netu' bal. Gula'béquië' guí', ate' bulu'lidzë' netu' yúgu'tëtu' iditsë'e cuintu', tu' ralaj guiój, en runda' ziaga.

³ Ní'irö Pablo gúchë'ë tu tsölén huága zxisi bídxido', en cate' gulu'ë le lu guí', birúajba' tuba' bëla sínia' lë'e huágado', rizzúnnajba' böchila que guí' na', ate' yöjtí'iniba' yen në'ë Pablo.

4 Cate' bönni' xidza' na' bila'lé'enë' bëla na', nála'ba' yen në'ë Pablo, gulë' tuë' ia'tué':

—Le nácatë bönni' ni náquië' nu ruti bönachi. Sal-la' bulë' lu nísado', dios queëru' lë' Tshui' biti' ru'ë lë' lataj soë' ibanë'.

5 Gudxibi në'ë Pablo, en busládzu'ë-ba' bëla sínia' na'. Yöjxóatëba' lu guí', ate' lë' biti' bi guca queë'.

6 Bönni' xidza' nacu'ë ni' tu'yúë' Pablo, bátacalö cö'ë gui, o tsö'ötë' gátie'. Ní'irö cate' chigudzé ta'bözë', en bila'lé'enë' biti' bi raca queë', ia'tú le guléquinë', ate' gula'nnë' naca cazë' tu dios.

7 Lataj ní'sö dë xiyúë' Publio, bönni' lo que luyú bidxi na', ate' bönni' ni benë' netu' bal. Lu yöl-la' dxi'i ladxi' queë' gulu'ë netu' lidxë' idú tsonna dza.

8 Dza na' dë' ré'enë' xuzë' Publio na', yu'ë xilá, en ré'enë' huë' rön. Guyázië' Pablo söjyúë' lë', en gudödi bulidzë' Dios, ní'irö guxóa në'ë bönni' huë' na', en bunë' lë'.

9 Tu' benë' Pablo lë ni, lësca' bila'dxín nupa te'e ga zoë', nacua' luyú bidxi ni', en bulu'huóáquië'.

10 Yugu' bönni' ni gulunë' netu' bal, en zían le gulunë' queëtu'. Cate' chizóa uzá'atu' luyú ni', bulu'nödzjë' yugu' le naquínitu' queëtu'.

Ridxinë' Pablo lu yödzö Roma

11 Cate' chiguca tsonna beo' zóatu' ni', ní'irö gurentu' tu lë'e barco que yödzö Alejandría, le bugá'ana luyú bidxi na' yugu' beo' ziaga. Barco ni dá'gaca tsölá'a láhuilö budó' yaga léguequi Cástor, en Pólux, dios bilidi' quégaca bönachi Alejandría na'.

12 Buzá'a barco na' ga ni', ate' bidxín yödzö Siracusa, ga ni' bugá'anatu' tsonna dza.

13 Buzá'atu' ni', ate' gudöditu' tsölá'alö luyú ni', en bidxintu' yödzö Regio. Cate' za' rení' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntëtu' yödzö Puteoli luyú Italia.

14 Lu yödzö na' yöjxáca'tu' yugu' böchi'ru' ta'yéajlë'ë Cristo, ate' guláta'yue' lotu' ugá'analentu' légaquië' idú xunu' dza. Cate' bizá'a dza na' buzá'atu' ni' para tséajtu' yödzö Roma, rizë'e ní'atu'.

15 Chibila'yönnë' böchi'ru' nacu'ë Roma chizóa idxintu' ni', ate' bila'rúajë' idixí'gala'gaquië' netu'. Bila'dxinë' tu yödzödo' nazí'i le Yë'ëyi Que Apio. Ia'bal-lë' bila'dxinë' tu lataj nazí'i le Tsonna Yu'u Quégaquië' Bönni' Yú'ugaquië' Nöza. Cate' Pablo bilé'enë' légaquië', bidipa ládxë'ë, en gudxë' Dios: "Xclenu'."

16 Cate' bidxintu' Roma, bönni' na' rinná bé'enë' bönni' röjáquië' gudil-la, guchë'ë bönni' na' nadzúngaquië', ate' budödë' légaquië' lu në'ë tu bönni' lo rinná bé'enë' bönni'

röjáquië' gudil-la, ate' bë'ë Pablo lataj soë' queëzë', zóalenë' lë' tu bönni' rejë' gudil-la ruyúë' lë'.

Runë' Pablo libán lu yödzo Roma

17 Cate' chigudödi tsonna dza, bulidzë' Pablo yugu' bönni' lo quégaquië' bönni' judío nacu'ë Roma. Cate' chibulu'dubë' ga na' zoë' Pablo, lë' gudxë' légaquië':

—Libí'ili', böcha'a, sal-la' biti' bi bena' quégaca bönachi ládzaru', en calëga que le nalëbiru' runru' ca na' gulunë' xuz xtó'oru', yugu' bönni' judío nacu'ë Jerusalén bulu'dödë' neda' lu ná'agaquië' bönni' Roma nacu'ë Jerusalén, ate' bulu'sayjë' neda' lidxi guié.

18 Ní'irö cate' chigula'nabi yúdxinë' neda' bönni' Roma, gulë'ënnë' ulu'sanë' neda', tu' guléquibe'enë' biti' nabá'ga'a xíguia' gátia'.

19 Yugu' bönni' judío ni' gula'dá'báguë'ë nupa na' gulë'ëni ulu'sán neda', ate' ben bayudxi gunaba' tseja' lahuë' César ga uchi'a usöröë' neda', en calëga para uzéguia' bönachi uládz queëru' didza'.

20 Que lë ni na' bulidza' libí'ili' para ilé'eda' libí'ili', en güi'lena' libí'ili' didza', tu' ná'ga'a du guié ni tu' runa' löza le runru' löza rë'u, bönachi Israel, gácatë lë na' guzxí' lu në'ë Dios gata' queëru'.

21 Ní'irö légaquië' gulë' Pablo:

—Biti' ridxini queëtu' guichi le za' luyú Judea ca naca lë na' raca quiu', en cuntu nu ridxini nu naca böchi'ru' judío, nu usiyöni netu' channö nu bi rnnë quiu' le ruá' dö'.

22 Na'a, rë'ënitü' yönitü' xtídzü'u, lë na' riguinnaj icju', tu' chinözitu' ta'nnë bönachi yúgu'të lataj quégaca nupa nazí' lu në'eguequi xibá cubi ni.

23 Caní guca, bulu'dxië' bë' tu dza, ate' dza na' bila'dxinë' zianë' ga na' zoë' Pablo. Gusí lahuë' Pablo zílado', ate' ni' gúl-li'ni buzéajni'inë' légaquië', en buchila lá'anë' le rinná bë'ë Dios. Gú'unnë' ulu'inë' légaquië' naca idütë li libán runë' queë' Jesús. Para gunë' caní bugunë' dxin le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

24 Bal-lë' gula'zí' lu ná'agaquië' didza' bë'ë Pablo, pero ia'bal-lë' biti' ca' gula'yéajlë'ë.

25 Tu' bila'rúajë' choplö, gula'sí lógaquië' tu'zë'ë ni', ate' Pablo gudxë' légaquië', rnnë':

—Didza' nácatë bë'ë Dios Bö' Lá'ayi, lë na' gunnë' Isaías, bönni' bë'ë didza' uláz queë' Dios, ca na' buzéajni'inë' xuz xtó'oru', gunnë':

26 Guyéaj lógaca bönachi ni', yöjödxi légaquië':

Yöni nágalí', pero biti' tséajni'ili'.

Uyuli' iná'ali', pero biti' ilé'eli'.

²⁷ Yugu' bönni' ni chinazidi icja ládxi'do'gaquië',
en biti' bi riyaza icja nágagaquië'.

Gulunë' ca tun nupa nachul-la guiöj lóguequi
para cabí ila'lé'e len guiöj lóguequi,
en cabí ila'yöni nágaguequi
para cabí ulu'zéajni'i ládxi'guequi,
en cabí ilé'ëni ulu'huöáca queë' Dios
para gaca una' léguequi.

²⁸ Na'a, ral-la' inözili' lë ni. Dios risöl-lë'ë netu' lógaca
bönachi izá'a para ulu'lágaca, ate' légaquië' ila'yönnë'.

²⁹ Cate' Pablo budxi bë'ë didza' ni, bila'rúajë' bönni' judío,
ta'díl-lada' dídze'ë la' légacasë'.

³⁰ Idú chopá iz bugá'anë' Pablo ni', zoë' tu lu yu'u ga na'
riguizxjë', ate' benë' bal yúgu'të nupa buduyúgaca Lë'.

³¹ Lu yöl-la' rugu ladxi' benë' libán ca rinná bë'ë Dios.
Busédinë' bönachi ca naca queë' Xanru' Jesucristo, ate' cuntunu
buzaga' xinözë'. ¡Ca' naca!

DIDZA' GUSÖL-LË'Ë PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en gurö cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios.

³ Bulu'zúajë' lu guichi yúgu'të le ral-la' gunë' Zxi'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David,

⁴ pero ca naca bö' naca cazë', le naca lá'ayi, naca bë' náquië' Zxi'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti.

⁵ Ni'a que le benë' Jesucristo ruzí'iru' xibé le ruzá' ládxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzölió Lë', en ilún ca rnna xtídzë'ë.

⁶ Bítsa'li' libí'ili' ladjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxi'inë' libí'ili', en bulidzë' libí'ili' para gácali' quez queë'. Rinábida'në' Xúziru' Dios, enca' Xanru' Jesucristo, gunnë' queëli' le ruzá' ládxë'ë queëru', en le ribequi dxi ládxi'ru'.

Rë'ënë' Pablo tsöjyüë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'në' Dios: "Xclenu" ca naca queëli' yúgu'tëli', ate' ta'guixjö' bönachi idútë yödzölió ca réajlë'ëli' Jesucristo.

⁹ Idú ládxa'a runa' xichinë' Dios, runa' libán que didza' dxi'a ca naca queë' Zxi'inë'. Nözinë' Dios rulídzatica'sa'në', en rinábida'në' gaca tsahui' queëli'.

¹⁰ Rinábitica'sida' Dios, channö naca le ré'ënë' Lë', gunnë' neda' lataj uduyúa' libí'ili'.

¹¹ Caní rinábida'në' tu' raca ládxa'a ilé'eda' libí'ili' para gaca guna' ga gata' queëli' tu le unödzjë' Dios Bö' Lá'ayi queëli', le gun ga gácali' tsutsu.

¹² Lë na' ré'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

¹³ Böchi' luzá'ado', ré'ënda' inözili' lë ni. Zían luzuí'bë' ládxa'a guída' ga zóali', pero ga ridxintë na'a biti' runni quia'. Ré'ënda'

guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönachi yödzölió ni.

14 Dē le ral-la' guna' quégaca yúgu'tē bönachi, quégaca bönachi nazēdagaca, en quégaca bönachi cabí nazēdagaca, quégaca bönachi ta'yéajni'í, en quégaca bönachi cabí ta'yéajni'í.

15 Que lē ni na', tsa gaca guna', zoa' ribōza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

16 Biti' ca' rutuí'ida' runa' libán que didza' dxi'a, tu' napa yöl-la' huáca queē Dios para gun ga ulu'lágaca yúgu'tē nupa ta'yéajlē le. Ga risí lo, rē'ēnē Dios ila'yönnē' bönni' judío le, atē tōdi na' ila'yöni ca' bönachi izá'a.

17 Didza' dxi'a ni ruluí'i rē'u gunē' Dios ga huóácaru' tsahui', channö uyéajlē'ēru' Lē', en biti' gaca chopa ládxi'ru'. Ca naca lē ni nazúaj ca' lu guichi lá'ayi, rna: "Nu naca tsahui' tu' réajlē' Dios, gata' yöl-la' na'bán que nu na'."

Xíguia' nabága'gaca bönachi

18 Dios, Nu zoa yehua' yubá, bulu'e lahui biti' rilé'enē' dxi'a yúgu'tē le ruá' dö', en le cabí naca tsahui' tun bönachi. Gunē' xíguia' yugu' bönni' na', lu yöl-la' bití' naca tsahui' quégaquiē' ta'dá'baguē'ē le naca idútē li.

19 Caní gaca quégaquiē' tu' nalá' lahui lógaca yúgu'tē bönachi le naca bē' zoa cazē' Dios, tu' buluí'i quézínē' Dios lē ni ga na' nacu'ē.

20 Dza ni'te cate' si' guta' yödzölió, ga ridxintē na'a dza, yugu' le nunē' Dios nácgaca bē' le cabí gaca ilé'eru' queē Dios, ca naca yöl-la' huáca idú queē, en le naca cazē' Dios. Que lē ni na', bití' gaca ila'nnē' bití' nabága'gaquiē' xíguia'.

21 Cate' ni' gulúnbē'ē Dios, bití' gula'yéaj ládxi'gaquiē' Lē' ca ral-la' tseaj ládxi'ru'-nē' Dios, en bití' gulē' Lē': "Xclenu'." Que lē ni na', cá'asō böáca le gula'zá' ládxi'gaquiē', atē gula'chul-la gula'nítíē' tu' nazidi icja ládxi'do'gaquiē'.

22 Sal-la' guléquinē' ta'yéajni'inē' yenni', bulu'huóáquiē' bönni' bití' bi nōzguequinē'

23 tu' bulu'cá'anē' yöl-la' bení' queē Dios Nu zóatica'sō, atē gula'yéaj ládxi'gaquiē' budó' guió' budó' yaga, budó' na' nácgaca ca yugu' bönni' tati cazē', en ca yugu' böa'do' zoa xílgacaba', en ca yugu' böa' guixi' ta'daba' lu yu, en ca yugu' böa' bēla tá'ayó' lē'ēba' lu yu ni.

24 Que lē ni na' Dios guléaj ládxi'ē légaquiē' para ilunē' yugu' le ta'zē ládxi'gaquiē' le ruá' dö', atē caní guca, bulu'cá'ana cuíngaquiē' lu yöl-la' stu' tuē' len ia'tué'.

25 Guca caní tu' bulu'cá'anē' xtídzē'ē Dios, le naca idútē li, atē gula'zí' lu ná'agaquiē' tu le cabí nácatē. Gulunē' bal, en

gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

²⁶ Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'.

²⁷ Lësca' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë' ia'tué', en gulunë' le tun ga nu rutuí'i, tu' gula'cuá'lenë' la' luzá'a bönni'gacasë'. Que lë ni na' gula'guí'i gula'záquië' lu xipëla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucá'anagaquië' Dios.

²⁸ Tu' cabí gulë'ennë' ilunë' Dios bal, que lë ni na' guléaj ládxi'ë Dios légaquië' para ilá'zá ládxi'gaquië' le bití' naca dxi'a, en ilunë' le cabí nazaca'.

²⁹ Túntica'së' yúgu'të le cabí naca tsahui', en yugu' le naca stu'. Tunë' le ruá' dö', en tu'huídi'në'.

Bití' ta'lé'enë' dxi'a luzá'agaquië', en tu'zxé'enë' luzá'agaquië'. Tutië' luzá'agaquië', en ta'díl-lalenë' luzá'agaquië'.

Ta'zí' yé'enë' bönachi, en zí'të nácaquië' xihui'.

Ta'nnë' que luzá'agaquië'.

³⁰ Ta'nnë' le cabí nácatë que luzá'agaquië'.

Bití' ta'lé'enë' Dios dxi'a, en nácaquië' bönni' bizxaj.

Tun cúngaquië' lo, en tun ba zxön cúngaquië'.

Ta'guiljé' le ruá' dö' ilunë', en ta'dá'baguë'ë xuz xiná'agaquië'.

³¹ Nácaquië' bönni' bití' ta'yéajni'inë', en tun díjtjagaquië' xtídza'gaquië'.

Bití' nácaquië' dxi'i ladxi' ca ral-la' ilácagaquië'.

Bití' tu'niti lahuë' luzá'agaquië'.

Bití' tu'huechi' ládxi'gaquië' luzá'agaquië'.

³² Nözguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nöziguequinë' lë ni, calëgasö caní tunë', pero ta'yaza ládxi'gaquië' nupa tun ca' caní.

2

Naca tsahui' ichúquië' Dios quégaca bönachi gátigaca

¹ Que lë ni na', bití' gaca ubéaj tsahui' cuinu', núti'tës nu nacu', richugu bë'u luzó'o. Cate' richugu bë'u luzó'o, rusub-aga' cuinu' xíguia', tu' richugu bë'u luzó'o, en lësca' runu' lí'.

² Nöz quéziru' ca ruchi'a rusöröë' Dios. Naca idútë li ca ruchi'a rusöröë' nupa tun le ruá' dö'.

³ Lí' richugu bë'u nupa tun le ruá' dö', en tuz ca runu' lí'.

¿Naru' réquitsenu' uló' lí' cate' uchi'a usöröë' Dios?

4 ¿Naru' rucá' anatso' cá' asö yöl-la' dxi'i ladxi' idú queë' Dios, en yöl-la' riböza zxön ladxi' queë', en ca runë', ridzenë' para lenë' li? ¿Naru' cabí nöz quézinu' ruzá' ládxe'ë Dios quiu' yöl-la' dxi'i ladxi' queë' para gunë' ga ubí'i ládxi'u?

5 Lu yöl-la' ládxi'do' zidi quiu' biti' rubí'i ládxi'u. Que lë ni na' rusubaga' cuinu' xíguia' gunë' Dios li' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca.

6 La' dza ní'sö ubí'i cazë' Dios que queë' bönni' tsca naca le gulunë' tu tuë'.

7 Unödzjë' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'.

8 Lu yöl-la' rilé queë', Dios gunë' xíguia' nupa ta'dá'baga', en biti' té'ëni ilún ca rnna le naca idútë li, pero tun ca rnna le cabí naca tsahui'.

9 Ila'guí'i ila'záquië', en huí'inida' ládxe'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a.

10 Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

11 Caní uchi'a usöröë' Dios bönachi, ate' Lë' biti' runë' bal le ta'nnasö bönachi.

12 Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátie', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'.

13 Caní gaca, tu' cabí nácagaquië' tsahui' lahuë' Dios yugu' bönni' ta'yönisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'.

14 Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'.

15 Nupa ni tu'luí'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'tué'.

16 Caní ubi'ë Dios quégagaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

17 Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios,

18 nöz quézili' le rë'ënë' Dios gunli', en le rusëdi libí'ili' xibá queë', en réquibe'eli' le nácatërö dxi'a.

19 Réquili' gaca ulu'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca.

20 Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li.

21 Na'a, libí'ili' rusédili' ia'zica'rö bönachi. ¿Naru' cabí ral-la' usëdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'?

22 Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guió' budó' yaga. ¿Naru' ribántsali' le dzö'ö lu yudo' quéguequi'?

23 Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en riguitsjali' xibá le gunná bë'ë Lë'?

24 Nazúaj lu guichi lá'ayi ca runli', rnnu: Ni'a que le runli' libí'ili' nupa biti' nátagaca judío ta'nnë' zi' queë' Dios.

25 Le nácatë ruzi'u xibé lë na' narugu lu xipëlu'u le naca bë' nazí' lu ná'ali' xibá queë' Dios channö runu' ca rinná bë' xibá na' queë' Dios, pero channö riguitsju' xibá le gunná bë'ë Lë', nuhuóacu' ca tu bönni' biti' néquinë' queë' Dios.

26 Que lë ni na', channö zoë' tu bönni' biti' narugu lu xipëlë'ë lë na' naca bë' nu nazí' i xibá queë' Dios, pero runë' idútë ca rinná bë' xibá queë' Lë', bönni' ni náquië' lahuë' Dios ca tu bönni' narugu caz lu xipëlë'ë lë na' naca bë' sal-la' biti' narugu lu xipëla' cazë'.

27 Bönni' na' biti' narugu lu xipëlë'ë lë na' naca bë' nu nazí' i xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'i nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipëla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'.

28 Biti' náquië' idú bönni' judío tu bönni' nácasë' caní lu yöl-la' bönáchisö queë', ate' biti' naca idú lë na' naca bë' le narúgusö lu xipëlë'ë nu bönni'.

29 Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipëlë'ë nu bönni' le naca bë' nu nazí' i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queë'ru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

3

1 Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipëlë'ë?

2 Yenni' ruzi'ë xibé, en zían ca ruzi'ë xibé. Le nácatërö lo, Dios gulu'ë lu ná'agaquië' yugu' bönni' judío didza' lá'ayi queë'.

3 Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'?

4 ¡Biti' ca' gaca! Ral-la' guéquibe'eru' rúntica'së' Dios ca rnna didza' bë'ë, sal-la' ta'zí' yë' yúgu'të bönachi. Ca naca queë' nazúaj lu guichi lá'ayi le rnna:

Gaca bë' nacu' tsahui' ni'a que didza' ru'u,
en uruju' tsahui' channö nu uchi'a usörö Li'.

5 Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'."

6 ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzölió ni'?

7 Cate' nu rizi' yë', Dios rnnë' biti' ru'i didza' nu na' ca runë' Lë'. Lë ni naca bë' naca idütë li didza' ru'ë Dios. Ta'nnë' bönni' le ta'zí' yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' nácagaquië' bönni' dul-la'.

8 ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnë' zi' queëru' ta'nná rusédiru' caní, ate' tsahui' naca ichúguië' Dios quéguequi.

Yúgu'tëru' nabága'ru' dul-la'

9 ¿Bizxi caz innaru' na'a? Ca naca queëtu' netu', bönni' judío, ¿nácárotu' tsahui' ca ia'zica'rö bönachi? ¡Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'të' nabága'gaquië' dul-la'!

10 Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

11 Cuntu nu réajni'i.

Cuntu nu riguilaj Dios.

12 Yúgu'të' ta'dë' ga yúbölö.

Yúgu'të' nanítigaquië'.

Cuntu nu run le naca dxi'a, cuntu nu caz.

13 Lubá'agaquië' nácagaca ca yeru ba nayáljagaca.

Len yöl-la' rinnësö quégaquië' ta'zí' yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

14 Len yugu' didza' tu'ë, tu'didza' yúdxinë' bönachi,
en ta'nnë' zi'ë quégaca bönachi na'.

15 Nacu'ë sina' tútigaquië' bönachi.

16 Gátitès ga ta'dödè tu'sunítiè', en tu'saca' zi'è luzá'agaquiè'.

17 Biti' ta'zéqui'nè' ila'bözè' dxí'ado'.

18 Biti' ca' tádxinë' Dios.

19 Nöziru' yúgu'tè didza' ni bē'è Dios, rē' yugu' bönni' na' dē lu ná'agaquiè' xibá queè'. Que lē ni na' cuntu nu gaca inná bití' nabaga' dul-la', ate' yúgu'tè bönachi idútè yödzölió, uchi'a usöröè' Dios quéguequi.

20 Tu'í' ládxi'gaquiè' yugu' bönni' judío ilunè' yugu' le rinná bē' xibá queè' Dios para ulu'huóáquiè' tsahui', pero cuntu nu huóáca tsahui' caní, tu' nuzóè' Dios xibá queè' para guéquibe'eru' nabágaru' dul-la'.

Uláru' tu' réajlè'èru' Jesucristo

21 Na'a, chibulu'í' lahui ca gaca huóácaru' tsahui' lahuè' Dios. Biti' gaca huóácaru' tsahui' tu' runru' ca rinná bē' xibá queè' Dios, sal-la' lu xibá queè' na', en lu guichi lá'ayi ga nazúajgaca le gula'nné' bönni' gulu'è didza' uláz queè' Dios, ru'í' didza' ca gaca huóácaru' tsahui'.

22 Dios caz runè' ga huóácaru' tsahui' tu' réajlè'èru' Jesucristo, ate' gunè' ga ulu'huóáca tsahui' yúgu'tè nupa ila'yéajlè' Lè'. Tuz ca nácagaca yúgu'tè bönachi

23 tu' núngaquiè' yúgu'tè dul-la', en bití' ca' nácagaquiè' tsahui' ca na' náquiè' Dios idú tsahui'.

24 Dios ruzá' ládxi'è queèru', en nunsè' rē'u tsahui' tu' böá'uè' Jesucristo rē'u.

25 Dios budödè' Jesucristo uláz queèru'. Lè' bulaljè' xichönè', le rigúa dul-la', lē na' uzí'iru' xibé channö uyéajlè'èru' Lè'. Caní benè' Dios para gaca bē' náquiè' tsahui' Lè' sal-la' lu yöl-la' riböza zxön ladxí' queè' budödisè' cá'asö yugu' dul-la' benru' dza ni'te.

26 Caní benè' Dios, bulu'í' cuinë' tsahui' dza ni zóaru' na'a, ate' rugá'anè' tsahui' sal-la' rugúè' dul-la' nabágaru' gaca bönachi, runè' ga tu'huóáca tsahui' nupa ta'yéajlè' Cristo.

27 ¿Naru' huácatsö gun ba zxön cuinru' ca naca queèru'? ¿Biti' ca' gácaru'! ¿Bizx que na'? Naca tu' nuláru', calèga tu' runru' ca rinná bē' xibá queè' Dios, pero tu' réajlè'èsiru' Jesucristo.

28 Na'a, rusácaru' queèru' nuhuóáquiè' tsahui' tu' bönni' tu' réajlè'è Jesucristo, en calèga tu' runè' ca rinná bē' xibá queè' Dios.

29 Ca naca Dios, ¿náquiè' Dios quégacasö bönachi judío? ¿Naru' cabí náquiè' ca' Dios quégaca bönachi izá'a? Ön, náquiè' ca' Dios quégaca bönachi izá'a na'

30 tu' zoa Tuz Nu naca Dios. Dios ni gunè' ga ulu'huóáquiè' tsahui' yugu' bönni' judío tu' ta'yéajlè'è Jesucristo, yugu' bönni' na' narugu lu xipéla'gaquiè' lē na' naca bē' nu nequi queè' Dios, en lēscá' caní gunè' ga ulu'huóáquiè' tsahui' yugu' bönni'

zi'tu' tu' ta'yéajlë'ë Jesucristo, en biti' narugu lu xipëla'gaquië' lë na' naca bë'.

³¹ Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¿Biti' ca' naca ca', pero nagá'anarö tsutsu xibá queë' na'!

4

Le benë' Abraham rusedi rë'u

¹ ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío?

² La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios.

³ Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'."

⁴ Channö zoa nu bönni' runë' xichinru', le riguízxjaru'-në' biti' naca tu le ruzá' ládxi'ru' queë', pero naca tu le ral-la'ru' queë' bönni' na'.

⁵ Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóáca tsahui' bönachi biti' nácatu' tsahui', rnnë' náquië' tsahui' lahuë' Lë' bönni' na', tu' réajlë'ë Lë'.

⁶ Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'.

⁷ Caní gunnë' David:

¿Bica' ba bönni' na' Dios runiti lahuë' le biti' naca tsahui' nunë', en rugüë' yugu' dul-la' nabáguë'ë!

⁸ ¿Bica' ba bönni' na', Dios biti' rusubáguë'ë lë' xíguia' tu' nözi dul-la' benë' bönni' na'!

⁹ ¿Naru' nácatu' bica' ba bönni' narugu lu xipëla'gaquië' lë na' naca bë', o nácatu' ca' caní nupa na' cabí narugu lë na' lu xipëla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'.

¹⁰ ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipële'ë lë na' naca bë', o guca zí'aló? Biti' guca cate' chinarugu lu xipële'ë, pero zí'aló guca.

¹¹ Abraham guyéajlë'ë Dios cate' ni' biti' narúguni lu xipële'ë lë na' naca bë'. Gudödi na' gurugu lu xipële'ë lë na' naca bë', le rulu'isö chinuhuóáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipëla'gaquië' lë na' naca bë'. Tu' ta'yéajlë'ë Dios, huáca innë' Dios nácatu' tsahui' lahuë' Lë'.

¹² Náquië' Abraham xuz xtó'ogaquië' yugu' bönni' judío ta'yéajlë'ë Dios. Calëgasö náquië' xúzgaquië' bönni' na' narugu lu xipëla'gaquië' lë na' naca bë', pero lësca' náquië' xúzgaquië'

bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipëlë'ë lë na'.

Le guzxí' lu në'ë Dios gata' queëru' tu' réajlë'ëru' Lë'

13 Guzxí' lu në'ë Dios bi unödzejë' queë' Abraham, en quégaca xzí'ini xi'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queë' Dios, pero tu' nuhuóacagaquië' tsahui' lahuë' Lë' tu' ta'yéajlë'ë Lë'.

14 La'tu' gata' yödzölió ni quégacasö nupa tun ca rinná bë' xibá queë' Dios, biti' gun bayudxi nu tséajlë' Lë', ate' nítisö gaca le guzxí' lu në'ë Dios.

15 Rulú'i xibá queë' Dios rë'u nabága'ru' xíguia', le run ga ichúguië' Dios queëru' gátiru'. Ga ni' biti' ridxini xibá queë' na', biti' gaca ila'dá'baga' bönachi le rinná bë' xibá na'.

16 Que lë ni na' uzí'iru' xibé le guzxí' lu në'ë Dios tu' réajlë'ëru' Lë', para gaca bë' naca tu le ruzá' lãdxë'ë queëru'. Caní naca, para gaca bë'da' gata' quéguequi yúgu'të xzí'ini xi'sóë' Abraham lë na' guzxí' lu në'ë Dios, calëgasö quégaquië' bönni' na' dë lu ná'agaquië' xibá queë' Dios, pero lë'sca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios.

17 Caní náquië' ca na' nazúaj lu guichi lá'ayi, le rnna: "Nuzóa' li' ca xúzgaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsca chizóa caz nu na' biti' zuíni.

18 Caní naca tu' gudxë' Dios Abraham na': "Ziántëro' ila'cuá' xzí'ini xi'sú'." Abraham guyéajlë'ë Dios, en benë' löza lë na' guzxí' lu në'ë Dios, sal-la' biti' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió.

19 Biti' guca Abraham chopá lãdxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúlãdë'ë, enca' ca naca queënu Sara queë', nácanu nigula huödx.

20 Biti' guca chopá lãdxë'ë, en biti' gúquië' tu' caréajlë' ca naca le guzxí' lu në'ë Dios gunë' queë', pero bidipa lãdxë'ë tu' guyéajlë'ë Dios, ate' gulu'ë Dios yöl-la' ba.

21 Idú lãdxë'ë benë' löza Dios, napë' yöl-la' huáca gunë' idútë lë na' guzxí' lu në'ë.

22 Que lë ni na', tu' guyéajlë'ë Abraham Dios, Dios buzóë' queë' náquië' tsahui'.

23 Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calëgasö para uzi'ë xibé Abraham,

²⁴ pero para uzí'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti.

²⁵ Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

5

Le rata' queëru' tu' rnnë' Dios nuhuóácaru' tsahui'

¹ Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que lë ni na' nuhuóácaru' tuz len Lë'.

² Tu' réajlë'ëru' Jesucristo, ruzí'iru' xibé le ruzá' ládxë'ë Dios queëru', le rutipa ládxi'ru'. Rudzéjaru' tu' runru' löza uzí'iru' ca' xibé yöl-la' zxön queë' Dios.

³ Calégasö caní rudzéjaru', pero rudzéjaru' ca' cate' riguí'i rizáca'ru', tu' chinöziru' le riguí'i rizáca'ru' rusedi rë'u cózaru' zxön ladxi'.

⁴ Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u.

⁵ Cate' runru' löza Lë', biti' ca' raca chopa ládxi'ru'. Caní naca, tu' nuhuóaj nudzë'e icja ládxi'do'oru' yöl-la' nadxí'i queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

⁶ Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni' nácaru' bönachi dul-la'.

⁷ Cuntu nu guë'ëni gati uláz queë' tu' bönni' tsahui'. Nadxi ca' nu urugui gati uláz queë' tu' bönni' náquië' idú dxi'a.

⁸ Dios rulu'ínë' rë'u ca nadxí'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'.

⁹ Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca.

¹⁰ Cate' ni' biti' rilë'ëru'-në' Dios dxi'a, gútië' Zxí'ínë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'.

¹¹ Rudzéjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'.

¹³ Zí'atëlö ga bidxintë xibá queë' Dios, gulún bönachi yödzölió ni dul-la', pero biti' busubáguë'ë Dios bönachi na'

xíguia' ca nupa ta'dá'baga' xibá queë' tu' nözi dul-la' na', tu' bití' ridxini xibá queë' quégaquië'.

14 Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' bití' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxí'ini xi'sóë'. Lë ni rulu'í rë'u ca ilaca tuz len Cristo yúgu'të nupa ila'yéajlë' Lë'.

15 Le rúnнасë' queëru' Dios bití' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atërö naca le ruzá' ládxe'ë queëru' Dios, en le rúnнасë' queëru'. Ruzá' ládxe'ë queëru' lë ni ni'a que le benë' yetuzë' Bönni', Jesucristo.

16 Le rúnнасë' Dios queëru' bití' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátie' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnнасë' Dios queëru' naca para huóácaru' tsahui' lahuë' Lë' sal-la' nabága'ru' dul-la' zían.

17 Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huóáca tsahui' lahuë' Dios tu' zoa le ruzá' ládxe'ë queëru' Dios ni'a que le benë' yetuzë' Bönni', Jesucristo.

18 Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóáca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'.

19 Bulu'huóáca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rnna xtídzë'ë Dios.

20 Guyú'u xibá queë' Dios yödzölió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxöntërö naca le buzá' ládxe'ë Dios quégaca bönachi.

21 Guta' yöl-la' huáca unná bë' que dul-la' guti rë'u. Lësca' caní le ruzá' ládxe'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chinátiru' para cabirö gunru' dul-la' tu' nabániru' në' Jesucristo

1 ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxe'ë Dios queëru'?

2 ¡Bití' gun cázaru' ca'! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'?

³ ¿Naru' cabí nõzili' ca na' naca queëru'? Channö bidílaru' nisa para huóácaru' tuz len Cristo, læ na' bidílaru' nisa ruluí' rë'u chigudödiru' lu yöl-la' guti tsözxön len Lë'.

⁴ Ca na' guca, gútilenru'-në' Cristo tsözxön, læsca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', læs caní ca' rë'u nubánlenru'-në' Jesús tsözxön para gácaru' bönachi idútë cubi queë'.

⁵ Channö nunru' Cristo tsözxön, gútiru' ca na' gútië' Lë', læsca' caní gunru'-në' tsözxön, ubanru' lu yöl-la' guti ca na' bubanë' Lë'.

⁶ Chinöz quéziru' læ ni, yöl-la' bönachi queëru' le guzóa zí'aló gudá'len Lë' tsözxön læ'e yaga cruz, para initi yöl-la' bönachi queëru' na' bénlenru' le dul-la', para cabirö inná be'e le naca dul-la' rë'u.

⁷ Channö nácaru' tuz len Nu na' guti tu' nõzi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'.

⁸ Na'a, channö nátilenru'-në' Cristo tsözxön, réajlë'ëru' ubánlenru'-në' ca' tsözxön,

⁹ tu' chinöziru' bubanë' Cristo lu yöl-la' guti, en bíti'rö gátie'. Que læ ni na' bíti'rö bi gaca gun yöl-la' guti na' queë' Lë'.

¹⁰ Ca na' guca, gútië' Lë', tu luzuísö gútië' tu' nõzi dul-la' quégaca yúgu'të bönachi, pero ca na' naca, zoë' nabanë', nabánlenë' Dios.

¹¹ Læsca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zóali' nabanli' para gunli' ca rna xtídzë'ë Dios tu' nácali' tuz len Xanru' Jesucristo.

¹² Que læ ni na', bití' güí'ili' lataj le naca dul-la', para cabí gun ga gunli' dul-la' lu le naca cázali' le gati caz. Bití' gunli' ca naca le rizé ládxi'li' le ruá' dö', lu le naca cázali'.

¹³ Bití' udödi cuinli' lu dul-la', bití' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a.

¹⁴ Bití' güí'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' ládxië'ë queëru'.

Le rucudzu' didza' ca naca que nu bönni' nadó'o

¹⁵ ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' ládxië'ë Dios rë'u? ¡Bití' ca' gunru' caní!

¹⁶ Chinöz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rna xtídzë'ë, tsaz nácali' bönni' nadó'ogaca queë' bönni' na' runli' ca rna

xtídžě'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídžě'ë Dios, Nu gun ga huöácali' tsahui'.

17 Na'a, ꞑXclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú ládxi'li' runli' ca rinná bē' xibá na' budödi cuinli' lu nē'e.

18 Tu' chinulali' lu na' dul-la', nuhuöácali' ca yugu' bönni' nadó'ogaca lu na' le naca dxi'a.

19 (Ruí'ilená' libí'ili' didza' ca tuí' didza' bönachi, tu' cabí réajni'ili' idútē lu yöl-la' bönachi queéli'.) Zí'alö budödi cuinli' len idútē le naca cázali' lu na' le ruá' dō', en lu na' le cabí naca tsahui', ate' gúcali' ca yugu' bönni' nadó'ogaca lu nē'eguequi, en benli' xichini le ruá' dō' na'. Na'a, guli'dödi idútē le naca cázali' lu na' le naca tsahui', para gácali' ca yugu' bönni' nadó'ogaca lu nē'e, en gunli' xichini lē na' naca tsahui' para gácali' bönachi narúajgaca quez queē' Dios.

20 Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'.

21 Na'a, ꞑnaru' buzí'itsali' xibé lē na' benli' zí'alö? Na'a lē na' benli' run ga rutuí'ili', en run ga nu gati tsaz.

22 Na'a chinulali' lu na' dul-la', en nácali' ca yugu' bönni' nadó'ogaca queē' Dios, en ruzí'ili' xibé le run ga nácali' bönachi narúajgaca quez queē' Dios, en le run ga dē queéli' yöl-la' na'bán idú.

23 Lazxaj nu run dul-la' naca yöl-la' guti, pero le rúnnašë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

1 Böcha'ado', núlöli' núnbē'ëli' xibá queē' Dios. Nöz quézili' rinná be'e xibá na' nu bönni' tsanni ni zoē' nabanē'.

2 Naca queéli' ca naca que tu nigula nutsaga ná'lennu-nē' bönni', yú'unu lu nē'ë bönni' queënu tsanni ni zoē' nabanē' ca rinná bē' xibá que yöl-la' nutsaga na', pero channö chinátiē', nurúajnu lu na' xibá na'.

3 Caní naca, tsanni ni zoē' nabanē' bönni' queënu, channö utsaga ná'lennu-nē' ia'tué' bönni', gunnu dul-la' le riguitsaj xibá que yöl-la' nutsaga na', pero channö chinátiē' bönni' queënu na', nurúajnu lu na' xibá na', ate' na'a, channö utsaga ná'lennu-nē' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

4 Lësca' caní raca queéli', böcha'a. Tu' dzágali'-nē' Cristo chinati cázali' libí'ili' para cabirö inná be'e libí'ili' le rinná bē' xibá na', para guéquili' que Nu yúbölö. Na'a chinéquili'

queë' Cristo, Nu na' bubán lu yöl-la' guti. Caní naca, para gaca gunru' le raza ládxë'ë Dios.

⁵ Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gulaca bë' le guzé ládxi'ru' le ruá' dö', le gulún dxin lu idútë le naca cázaru' para ilún ga gátiru'.

⁶ Na'a nuláru' lu na' xibá na' tu' nati cázaru' tscá naca le rinná bë' xibá na' gunná be'e rë'u zí'alö. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö' Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí buzéajni'i le rinná bë' xibá na' neda', bití' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxu'u le dë que luzó'o", bití' gunözda' naca dul-la' yöl-la' rizë ladxi' le dë que luzá'a.

⁸ Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizë ládxa'a yúgu'të le ruá' dö'. Ga bití' ridxini xibá na', bití' naca bë' le naca dul-la'.

⁹ Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'.

¹⁰ Dios gunná bë'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'.

¹¹ Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë.

¹³ ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca'! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatëro xihui' yúgu'të le naca dul-la'.

¹⁴ Nóziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que.

¹⁵ Na'a, bití' réajni'ida' le runa'. Ré'ënda' guna' ca rinná bë' xibá na', pero bití' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'.

¹⁶ Runa' dul-la' sal-la' bití' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que lë ni na' naca bë'da' naca dxi'a le rinná bë' xibá na'.

¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'.

18 Nözda' biti' zóalen neda' le naca dxi'a, o huáca innía', lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' lë na' naca dxi'a.

19 Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'.

20 Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

21 Caní naca le raca queëru' yúgu'tëru'. Cate' ré'ëni ru' gunru' le naca dxi'a, dzaga ré'u le run ga runru' le ruá' dö'.

22 Lu icja ládxi'da'ahua' raza ládxa'a xibá queë' Dios

23 pero ré'quibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

24 ¡Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'?

25 ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná be' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

8

Le runru' tu' zóalenë' Dios Bö' Lá'ayi ré'u

1 Que lë ni na', bíti'rö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bíti'rö tunë' ca ré'ëni yöl-la' bönáchisö quégaquië', pero ca ré'ëne' Dios Bö' Lá'ayi tunë'.

2 Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti.

3 Chinunë' Dios le cabí guca gun xibá na', tu' cabí bi guxzéqui' gun tu' nácaru' bönáchisö. Dios gusöl-lë'ë Xzí'ini cazë', ate' guljë' bönachi ca nácaru' ré'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabága'ru' ré'u, ate' caní guca, guchúguië' que dul-la' runru' lu yöl-la' bönáchisö queëru'.

4 Caní benë' para gaca gunru' idútë le naca tsahui' le rinná be' xibá queë', nülöru' na' bíti'rö runru' ca ré'ëni yöl-la' bönáchisö queëru', pero ca ré'ëne' Dios Bö' Lá'ayi runru'.

5 Bönni' tunë' ca ré'ëni yöl-la' bönáchisö quégaquië', tu'í ládxi'gaquië' le naca que yöl-la' bönáchisö quégaquië', pero bönni' tunë' ca ré'ëne' Dios Bö' Lá'ayi, tu'í ládxi'gaquië' le naca queë' Dios Bö' Lá'ayi.

6 Channö ru'í ládxi'siru' le naca que yöl-la' bönáchisö queëru', tsaz gátiru', pero channö ru'í ládxi'ru' le naca queë'

Dios Bö' Lá'ayi, chidě yöl-la' na'bán idú queëru', en ribózaru' dxi ladxi'.

⁷ Núti'tës nu ru'í ládxi'sö le naca que yöl-la' bönáchisö que, bití' rilé'e Dios dxi'a, tu' cabí run nu na' ca rinná bē' xibá queë' Dios, en bití' ca' gaca gun caní.

⁸ Que lē ni na', bönni' na' tunē' ca rē'ēni yöl-la' bönáchisö quegaquiē' bití' gaca ilunē' le raza ládxi'ē Dios.

⁹ Na'a, bítí'rö runlí' ca rē'ēni yöl-la' bönáchisö queēli', pero runlí' ca rē'ēnē' Dios Bö' Lá'ayi tu' zóalen cazē' Lē' libí'ili'. Tu bönni' bití' zóalenē' Dios Bö' Lá'ayi lē', Nu na' risöl-lē'ē Cristo queëru', bití' néquinē' queë' Cristo.

¹⁰ Tu' zóalenē' Cristo libí'ili', chinati caz idútē le guca cázali' tu' nözi dul-la', ate' na'a nabánili'-nē' Dios Bö' Lá'ayi tu' nunē' Dios libí'ili' tsahui'.

¹¹ Bö' Lá'ayi queë' Dios, Nu na' busubán Jesús lu yöl-la' guti, zóalenē' libí'ili'. Lē cazē' Dios, Nu busubán Jesucristo lu yöl-la' guti, runē' ga nubanlí' lu idútē le gúcali' le rati caz. Caní nunē' tu' zóalenē' Dios Bö' Lá'ayi libí'ili'.

¹² Que lē ni na', libí'ili' böcha'a, dē tu le ral-la'ru', pero calēga que yöl-la' bönáchisö queëru', para cabirö gunru' ca rē'ēni yöl-la' bönáchisö queëru' na'.

¹³ Channö runlí' ca rē'ēni yöl-la' bönáchisö queēli', gátíli' tsaz, pero channö len yöl-la' huáca queë' Dios Bö' Lá'ayi runlí' ga ila'niti le runlí' lu yöl-la' bönáchisö queēli', gata' yöl-la' na'bán idú queēli'.

¹⁴ Yúgu'tē nupa tun ca rē'ēnē' Dios Bö' Lá'ayi nácgaca xzí'inē' Dios.

¹⁵ Dios Bö' Lá'ayi na' zóalenē' libí'ili' bití' nuzóē' libí'ili' leyúbölö ca bönni' nadó'ogaca para gadxi idzöbílí', pero chinunē' ga nácali' xzí'inē' Dios caz, en runē' ca' ga rulídzaru'-nē' Dios, rnnaru': "Abba", le rnna: Dad.

¹⁶ Lē cazē' Dios Bö' Lá'ayi ruzéajni'inē' bö' naca cázaru', en runē' ga nöziru' nácaru' xzí'inē' Dios.

¹⁷ Channö chinácaru' xzí'inē' Dios, gata' ca' queëru' tsözxön len Cristo le nequi queë' Xúziru' Dios. Caní gaca queëru' channö riguí' rizáca'lenru'-nē' tsözxön Cristo para uzí'iru' xibé tsözxön len Cristo yöl-la' zxön queë' Dios.

¹⁸ Runi neda', yugu' lē ni riguí' rizáca'ru' na'a naca tu le cuídido'os tsca naca yöl-la' zxön na' gata' queëru' dza si' za'.

¹⁹ Ta'böza yúgu'tē le nunē' Dios, en ta'zē ládxi'gaca idxintē dza na' ulu'ē lahui Dios yugu' bönni' nácgasakiē' xzí'ini cazē'.

²⁰ Yúgu'tē lē na' nunē' Dios gula'dödi lu na' le run ga ila'niti, calēga tu' gulē'ēni caz gaca caní, pero tu' benē' Dios ga naca caní. Benē' ca' ga naca löza que idútē lē na' nunē',

21 ate' ulu'lágaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'zì' ca' xibé yöl-la' rusölá le nazáca'da' na' ulu'zì'ë xibé yugu' zxí'inë' Dios.

22 Nöziru' ta'guí'i ta'zaca' yúgu'të le nunë' Dios ga ridxintë na'a dza, ca na' riguí'i rizáca'nu tu nigula chizóa sóabi' bí'ido' queënu.

23 Riguí'i rizáca'a, calégasö yödzölió ni, pero riguí'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'íi rë'u ca ral-la' gaca cázaru'. Riguí'i rizáca'ru' tsanni ni ribözaru' dza ni' ulu'ë lahui Dios nácaru' idú zxí'inë', dza ni' únë' ca' idútë le naca cázaru'.

24 Tu' runru' löza lë ni, nuláru' rë'u, pero channö gaca ilé'eru' lë na' runru' löza, bitì' naca tu le ribözaru'. Bitì' ribözaru' le chirilé'eru'.

25 Na'a, channö runru' löza tu le cabí gaca ilé'eru', lu yöl-la' riböza zxon ladxi' ribözaru' le.

26 Lësca' caní rácalenë' Dios Bö' Lá'ayi rë'u cate' rudú ládxi'ru', tu' cabí nöziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxë'ë, tsa cabí gaca nu inná.

27 Dios ruyüé' le yu'u icja ládxi'do' gaca bönachi, en nözinë' le rë'ënë' innë' Dios Bö' Lá'ayi na', ate' Lë', ca rë'ëni quëzinë' Dios, rudödë' xtídza' gaca nupa néquiquequi quez queë' Cristo lahuë' Dios.

Nadéli'tëröru' tu' zóalenë' Cristo rë'u

28 Nöziru' tu'zì'ë xibé bönni' yúgu'të le raca quégaquië', bönni' na' nadxí'igüequinë' Dios, ate' bulidzë' Dios légaquië' ca nuzóa cazë' gunë'.

29 Yugu' bönni' na' gurö cazë' queë' Dios zí'atëlö, buzóë' ca' quégaquië' zí'atëlö ilácagaquië' ca naca cazë' Zxí'inë', para gáquië' Zxí'inë' lo ladaj zían böchë'ë.

30 Nupa na' buzóë' Dios quégaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zì'ë ca' xibé yöl-la' zxon queë'.

31 ¿Bizxi caz innaru' na'a ca nácgaca lë ni? Channö rácalenë' Dios rë'u, bitì' ral-la' gádxiru' sal-la' bi ilún bönachi queëru'.

32 Dios, idú ládxë'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxön len Zxí'inë' yúgu'të le dë'?

33 ¿Nuzxi caz gaca bi usubaga' nupa na' gurö cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'!

34 ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatëre' zxon, ate' rnnë' dxi'a uláz queëru' lahuë' Dios!

³⁵ Sal-la' bi raca queëru', nöz queziru' nadxí'inë' Cristo rë'u. Nöziru' nadxí'inë' rë'u:
sal-la' riguí'i rizáca'ru', o sal-la' risëbi ládxi'ru',
o sal-la' ta'bía ládxi'gaca bönachi rë'u,
o sal-la' ridunru', o sal-la' riyadzaj le gácuru',
o sal-la' zoa bönadxi queëru', o sal-la' ilútië' bönni' rë'u.

³⁶ Ca nácgaca lë ni nazúaj lu guichi lá'ayi, rnna:
Tu' néquitu' quiu' Li', túntica'sö bönachi ga gátitu'.
Nácatu' ca yugu' bö'cu' zxila',
nadödigacaba' lu na' nu guti légacaba'.

³⁷ Na'a, tu' zóalen rë'u Nu na' nadxí'i rë'u, nácatëro löza idéli'ru' lu le raca queëru'.

³⁸⁻³⁹ Que lë ni na' runi neda':
Biti' bi sequi' gun ga bítí'rö idxí'inë' Dios rë'u.
Nadxí'inë' rë'u tu' néquiru' queë' Xanru' Jesucristo.
Biti' sequi' gun caní yöl-la' guti o yöl-la' na'bán,
o yugu' gubáz lá'ayi o nupa ta'nná bë',
o yugu' yöl-la' huáca que tu' xihui',
o bítí'tës bi zoa o bítí'tës bi si' za',
o tu le dë xitsá'alö o tu le dë cadxí'ilö,
o bítí'tës bi nunë' Dios.

9

Dios gurö cazë' queë' bönachi Israel

¹ Ruá'a didza' idütë li tu' néquida' queë' Cristo, ate' röjlöz didza' ni le naca queë' Dios Bö' Lá'ayi le yu'u icja ládxi'da'ahua'. ¡Biti' rizi' yë'a!

² Ruhuí'inide'eda', en risëbitica'sö ládxa'a

³ tu' raca ládxa'a guna' ga ulu'lë' böchi' luzá'a, bönni' uládz quia'. La'tu' huácalen légaquië', guë'ëni quézida' ubéaj ládxië' Dios neda', en ulá'alena' Cristo.

⁴ Yugu' bönni' uládz quia' na' nácgacquië' zxi'ini xi'sóë' Israel, ate' Dios bë'ë légaquië' lataj ilácagacquië' zxi'ini cazë'. Yöl-la' zxön queë' Dios guzóalen légaquië', ate' Dios budödë' lu ná'agacquië' didza' rucá'ana tsahui', enca' xibá queë'. Bulidzë' légaquië' para tseaj ládxi'gacquië' Lë', ate' budödë' lu ná'agacquië' yugu' le guzxi' lu në'ë gunë' le ilún tsahui' bönachi.

⁵ Nácgacquië' zxi'ini xi'sóagacquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¡Rácatca'sö queë' yöl-la' ba! ¡Ca' gaca!

⁶ Sal-la' yúgu'të bönni' uládz quia' bití' nazi' lu ná'agacquië' Cristo, bití' ral-la' innaru': Nítisö böáca xtídzë'ë Dios. Calëga yúgu'të zxi'ini xi'sóë' Israel nácgacquië' idú bönachi Israel, nupa néquiquequi queë' Dios.

7 Sal-la' gúljagaquië' zían xzí'ini xi'sóë' Abraham, biti' guláquië' yúgu'të' idú xzí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' xzí'ini xi'sóë' Isaac ilaca idú xzí'ini xi'sú'."

8 Caní naca, nupa náca gaca xzí'inë' tu bönni' néquinë' queë' Dios, calëga yúgu'të' náca gacaquië' xzí'inë' Dios. Lësca' caní, náca gaca idú xzí'ini xi'sóë' Abraham núpasö na' náljagaca ni'a que lë na' guzxí' lu në'ë Dios.

9 Lë na' guzxí' lu në'ë Dios unödzejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

10 Calëgasö lë ni guca caní, pero lësca' cate' Rebeca ni nuá'anu-bi' yugu' bi'i bönni'do' queë' Isaac, xuz xtó'otu',

11-13 cate' ni' si' iláljabi', en biti' bi núnigacabi' le naca dxi'a o le ruá' dö', Dios gudxë'-nu Rebeca na', gunnë': "Bi'i bönni' zí'alö quiu' gunbi' xichinbi' bi'i buropi." Didza' ni röjloz lë na' nazúaj lu guichi ca gunnë' Dios, le rnna: "Bidxí'ida'-në' Jacob, en calëga Esaú." Caní guca, bugá'ana tsutsu le buzóë' tsaz Dios ca naca lë na' chiguró cazë'. Que lë ni na' biti' raca caní ni'a que tu le gaca ilún bönachi, pero naca caní tu' ribö cazë' Dios nu rulidzë'.

14 ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní!

15 Dios gudxë' Moisés, gunnë': "Huéchi' ládxa'a nu rë'ënda' huéchi' ládxa'a, en gü'i ládxa'a nu rë'ënda' gü'i ládxa'a."

16 Que lë ni na', biti' raca caní ni'a que le të'ëni caz bönachi, o tu' runë' bayudxi nu bönni', pero naca tu' rë'ëni quézinë' Dios, ruhuéchi' ládxe'ë bönachi.

17 Ca naca lë ni nazúaj lu guichi lá'ayi ca na' Dios gudxë' Faraón, gunnë': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë' yödzölió le naca' neda'."

18 Caní naca, Dios ruhuéchi' ládxe'ë nu rë'ëni quézinë', en lësca' caní runë' zidzaj icja ládxi'da'ahuë' nu bönni' rë'ënë' gunë' zidzaj icja ládxi'da'ahuë' bönni' na', ca na' benë' queë' Faraón na'.

19 Na'a guiëli' neda': "Channö caní naca, ¿bizx que rusubáguë'ë Dios bönachi xíguia'? ¿Nuzxi caz gaca tá'baga' le rë'ëni quézinë' Dios gunë'?"

20 ¿Biti' ca' naca caní! ¿Nuzxi caz li' rnníó' que Dios? ¿Naru' huácatsö tu yusu' néquini yu guié bönni' huen rö'ö, inná: "¿Bizx que benu' neda' caní?"

21 ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

22 Rě'eni quézine' Dios ulu'ë lahui ca gunë' xíguia' nu ruá' dō' en gunë' ga gaca bē' yōl-la' huáca queë', pero lu yōl-la' ribōza zxōn ladxi' queë' biá' gulënë' yugu' bōnni' ni' ral-la' ichúguië' quégaquië', yugu' bōnni' na' nabága'gaquië' xíguia', en run bayudxi usunítie' légaquië'.

23 Caní runë' Dios para gaca bē' nácatērō lesaca' yōl-la' ruzá' ladxi' queë', lē na' rulu'ë lahui lógaca nupa na' ruhuéchi' ládxë'ë, bōnni' na' buzóë' quégaquië' zí'atëlō ulu'zi'ë xibé yōl-la' zxōn queë'.

24 Yugu' bōnni' caní bulidzë' Dios. Calégasō bulidzë' netu', bōnachi judío, pero lēsca' bulidzë' bōnachi izá'a.

25 Ca naca lē ni nazúaj lu guichi lá'ayi ca na' bē'ë didza' Oseas uláz queë' Dios, gunnë':

Nupa biti' náca gaca bōnachi quia',
gu'a láguequi: Bōnachi quia',
ate' nupa na' biti' bidxí'ida',
gu'a láguequi: Nupa nadxí'ida'.

26 La' ná'asō ga gunniá' quéguequi:
"Biti' nácali' bōnachi quia'",
si' láguequi: "Yugu' zxi'inë' Dios ban."

27 Na'a, ca naca quégaca zxi'ini xi'sóë' Israel, Isaías gunnë':
Sal-la' ila'yanë' zxi'ini xi'sóë' Israel,
en iláquië' tsca naca yuzxi tu ra' yegu zxōn,
ulu'lë' nabábasë'.

28 Xanru' Dios la' guntë' ga gaca idútë
lë na' ichúguië' quégaca bōnachi yōdzōlió ni.

29 Lēsca' caní Isaías bē'ë didza' zí'atëlō, gunnë':
Dios, Xanru' unná bē' idú,
la'tu' cabí bucá'anë' queëru' yugu' zxi'ini xi'sóaru',
ugá'anaru' ca yōdzō Sodoma, en yōdzō Gomorra,
yugu' yōdzō na' busunítie' Dios.

Bōnachi Israel, en didza' dxi'a

30 ¿Bizxi caz innaru' na'a? Yugu' bōnni' biti' nabábagaquië'
Israel chibila'déli'në' nuhuóácagaquië' tsahui' lahuë' Dios, en
biti' gulunë' bayudxi ulu'huóáquië' tsahui' lahuë' Dios, pero
nuhuóácagaquië' tsahui' tu' ta'yéajlë'ë Dios.

31 Na'a, sal-la' gulunë' bayudxi yugu' bōnni' Israel ilunë' ca
rinná bē' xibá queë' Dios, le ral-la' gun ga ilácagaquië' tsahui',
biti' bila'déli'në' le ral-la' gata' quégaquië' tu' tunë' ca rinná bē'
xibá na'.

32 ¿Bizx que na' guca caní? Caní guca, tu' cabí gulunë' caní lu
yōl-la' réajlë' quégaquië' Dios, pero rácasō quégaquië' gulë'ënnë'
ilunë' ca rinná bē' xibá na', ate' que lē ni na' gula'chíxinë', o
huáca innaru': Yōjchégu'gaquië' lu lē na' nazí'i le: Guiōj Ga Nu
Rōjchegu'.

33 Ca naca lë ni nazúaj lu guichi lá'ayi, rnna:
 ¡Buli'yú! Uzóa'-në' yödzö Sión bönni' na'
 gáquië' ca tu guiöj ga nu tsöjchegu',
 guiöj na' gun ga nu ichixi inigui.
 Nu tséajlë' Lë', biti' ca' utuí'i nu na'.

10

1 Libí'ili', böcha'ado', le rizé ládxa'a, en le rinábida'-në' Dios
 gunë' quégaca bönachi Israel naca gunë' ga ulu'lë'.

2 Runa' ba nalí quégaquië', idú ládxi'gaquië' tuí'i ládxi'gaquië'
 Dios, pero calëga len yöl-la' réajni'i idú.

3 Biti' nözguequinë' ca runë' Dios, runsë' ga nácaru' tsahui',
 pero té'ennë' ilún cuíngaquië' tsahui' rácasö quégaquië', en
 biti' ta'cu'ë nöxaj ládxi' lahuë' Dios para gaca gunë' légaquië'
 tsahui'.

4 Budxi benë' Cristo le rë'ëni gun xibá queë' Moisés, benë' ga
 gaca ulu'huóaca tsahui' yúgu'të nupa ila'yéajlë' Lë'.

5 Ca naca que nu huóaca tsahui' tu' run ca rinná bë' xibá
 queë' Dios, buzúajë' Moisés lu guichi le rnna caní: "Bönni' na'
 gunë' idútë ca rinná bë' xibá na', soë' ibanë' tu' gunë' caní."

6 Na'a, ca naca que nu huóaca tsahui' tu' réajlë' Dios, rnna
 caní: "Biti' innó' lu icja ládxi'do'o, biti' innó': ¿Nuzxi caz cuen
 ni' yehua' yubá?" Lë ni naca, para gun nu na' ga huötjë' Cristo,

7 en biti' innó': "¿Nuzxi caz huötaj ga dë lataj que nupa
 chinátigaca?" Lë ni naca, para gun nu na' ga cuenë' Cristo,
 urúajë' lu yöl-la' guti.

8 Na'a, ¿bizxi caz rnna? Caní rnna: "Gala' ga zu' zoa caz
 xtídzë'ë Dios. Lu ru'u, en lu icja ládxi'do'o zoa xtídzë'ë na'." Lë
 ni naca didza' que le réajlë'ëru' Dios runtu' libán que, rnnatu':

9 "Channö didza' gu'u gaca bë' Jesús náquië' Xanu', en uyéaj
 lë'u idú ládxi'u Dios busubanë' Lë' lu yöl-la' guti, uló' li'."

10 Lu icja ládxi'do'oru' réajlë'ëru' Jesús para gácaru' tsahui',
 ate' len didza' ru'iru', rulu'iru' lahui le náquië' Jesucristo
 para uláru'.

11 Nazúaj lu guichi lá'ayi le rnna: "Biti' ca' ulu'tuí'i yúgu'të
 nupa ta'yéajlë' Lë'."

12 Dios, la' tuz ca ru'í'i ládxi'ë yugu' bönni' judío, enca' yugu'
 bönni' idútë yödzölió, tu' Lë cazë' Xanru' náquië' Xángaquië'
 yúgu'të', en nápadë'ë bi unödzejë' quégaca yúgu'të nupa tu'lidza
 Lë'.

13 Ca naca lë ni nazúaj lu guichi lá'ayi, rnna: "Ulu'lá yúgu'të
 nupa ulu'lidza Lë' Xanru'."

14 ¿Nacxi gaca ulu'lidzë' Lë' channö cabí ta'yéajlë'ë Lë'?
 ¿Nacxi gaca ila'yéajlë'ë Lë' channö catu caz bila'yönnë' ca naca
 queë'? ¿Nacxi gaca ila'yönnë' channö cuntú nu zoa nu gun
 libán lógaquië'?

15 ¿Nacxi caz gaca ilunë' libán channö cuntu nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' röjéngaquië' libán que le ribequi dxi ládxi'ru', en tunë' libán que didza' dxi'a."

16 Na'a, calëga yúgu'të' gula'zì' lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?"

17 Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

18 Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna:

Idútë yödzölió bila'yöni chí'iguequi.

Yúgu'të lataj bila'dxín xtídza'guequi.

19 Lësca' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',

tu' idxí'ida' bönachi bitì' nabábagaca libí'ili'.

Ni'a quégaca bönachi cabí ta'yéajni'i guna' ga leli'.

20 Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunné':

Bila'dzöli neda' nupa bitì' gula'guílaj neda'.

Bulu'i lahua' lógaquië' bönni' bitì' bi gula'nábinë' neda'.

21 Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi bitì' túngaca ca rnna xtídza'a, en ta'dá'baga' neda'."

11

Nupa nulágaca ladaj bönachi Israel

1 Na'a rnnía': ¿Naru' nusán në'ë Dios bönachi Israel? ¿Bitì' ca' naca caní! Neda' caz naca' bönni' Israel. Naca' zxi'ini xi'sóë' Abraham, en nababa' dí'a dza queë' Benjamín, zxi'ini cazë' Israel na'.

2 Dios bitì' nusán në'ë bönachi queë', nupa na' gurö cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné':

3 "Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' tē'ennë' ilútië' ca' neda'."

4 Na'a, ¿bizxi didza' bubi'ë Dios? Caní gunné': "Nun chí'igaca caza'-në' quia' tsónnalalaj yu' chi gáyu'ë bönni' bitì' tu'zechu zxi'bagaquië' lo budó' guió'j na' nazí'i le Baal."

⁵ Lësca' caní naca dza ni zóaru' na'a, nagá'anagaca bal-la bönachi Israel, nupa na' gurö cazë' queë' Dios tu' ruzá' ládxë'ë caní quégaquië'.

⁶ Channö naca le ruzá' ládxë'ë caní quégaquië', bití' naca ni'a que tu le gaca ilunë'. La'tu' guca ni'a que tu le gaca gunru', lë na' ruzá' ládxë'ë queëru' Dios bití'rö gaca tu le ruzá' ládxë'ë queëru'.

⁷ ¿Bizxi caz innaru' na'a? Lë na' gula'guíljë' bönni' Israel, bití' bila'déli'në', pero chibila'déli' le nupa ni' gurö cazë' queë' Dios, ate' ia'zica'rë' na', Dios benë' zidi icja ládxi'do'gaquië'.

⁸ Ca naca lë ni nazúaj lu guichi lá'ayi, rnna: "Dios benë' ga nácagaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, bití' ca' ta'yéajni'inë'. Caní naca quégaquië' ga ridxintë dza ni zóaru' na'a.

⁹ Ca naca lë ni bë'ë ca' David didza', gunnë':
Yugu' laní quégaquië' ulu'huóaca le ila'zön légaquië',
en ca tu yalaj ga ila'rölinë'.
Ilaca ca' le ilún ga ila'chíxinë',
en ca tu le uzí' lëbi légaquië'.

¹⁰ Ila'chul-la guiöj lógaquië', para cabí ila'lé'enë'.
Ila'yechu tsaz cúdzu'gaquië' tu' ilu'ë yua'.

Ca gaca ulu'lágaca bönachi bití' nácagaca judío

¹¹ Na'a rnnía': ¿Naru' gula'chíxinë' yugu' bönni' judío ga bidxintë gula'nítië' tsaz? ¿Bití' ca' guca ca'! Gula'dá'baguë'ë xtídzë'ë Dios, ate' na'a Dios ru'ë lataj ulu'lágaca nupa bití' nácagaca judío para gunë' ga ulu'zxé'enë' yugu' bönni' judío léguequi.

¹² Le gulunë' bönni' judío, gula'chíxinë', ben ga bidxín quégaca bönachi yödzölió ni le naca ca tu yöl-la' tsahui'. Channö caní guca, guta' yöl-la' tsahui' quégaca nupa bití' nácagaca judío tu' gula'nítië' yugu' bönni' judío, zxöntëro gaca le gata' quéguequi cate' yugu' bönni' judío na' ulu'huóáquië' queë' Dios.

¹³ Na'a rea' libí'ili' bití' nácali' judío, rnnía': Tu' naca' gubáz nasöl-lë'ë Dios lógaca nupa bití' nácagaca judío, runa' zxön lë na' dë lu na'a

¹⁴ para nadxi ca' huáca guna' ga ulu'zxé'enë' bönni' uládz quia' libí'ili', en caní guna' ga ulu'lé' bal-lë'.

¹⁵ Channö bulu'huóaca bönachi nacuá' idú yödzölió queë' Dios tu' bulu'nítië' yugu' bönni' judío xilátjagaquië', zxöntëro gaca le gata' quéguequi cate' ulu'huóazië' xilátjagaca cazë' na'. Gaca ca raca cate' tu'bángaca nupa chinátigaca.

¹⁶ Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

17 Nácagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yójtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'.

18 Que lë ni na', biti' gun ba zxön cuinli', biti' uzóali' tsölá'alö nupa nácagaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

19 Nadxi ca' innó': "Gula'rugu ni'a në'e yaga na' para gaca tsázia' neda' xilátjagaca."

20 Nácatë didza' ru'u, pero gula'rúguië' tu' cabí gula'yéajlë'ë, ate' yójtó'o li' yaga na' tu' réajlë'u Dios. Que lë ni na', biti' ral-la' gun ba zxön cuinu', pero ral-la' gádxinu' Dios.

21 Channö benë' Dios léguequi xíguia', nupa na' nácagaca caz ni'a në'e yaga dxi'a na', çnaru' cabí gunë' xíguia' ca' li'?

22 Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácatë rúndë'ë xíguia' nupa na' gula'chixi, pero náquië' dxi'i ladxi' len li'. Que lë ni na', ral-la' gúntica'su' ca sa'yéaj yöl-la' dxi'i ladxi' queë' na', para cabí ichúguië' ca' li' lu yaga queë' na'.

23 Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsójtá'gaquië' leyúbölö lu yaga na', tu' napë' Dios yöl-la' huáca gunë' ga tsójtá'gaquië' le leyúbölö.

24 Nacu' li' ca tu ni'a në'e gurugu lu yaga olivo guí'a, en yójtó'o yaga olivo dxi'a ga cuntu nu udá' tu ni'a në'e yaga guí'a. Yénni'tërö huáca quégaquië', nácagaca cazë' ni'a në'e yaga dxi'a na', huáca tsójtá'gaquië' leyúbölö lu yaga quéguequi cazë' na'.

Ca gaca ulu'lágaca bönachi Israel

25 Böcha'ado', rë'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queéli'. Bulu'huóaca bal-la bönachi Israel zidi ladxi', ate' caní iláquië' ga idxinrö dza chinayá zgaca yúgu'të bönachi biti' nácagaca judío ga rinná bë'ë Dios, nupa na' ral-la' ulu'lágaca.

26 Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Irúaj yödzö Siön Nu rusölá,

en ugúa le ruá' dö' nabága'gaca xzí'ini xi'sóë' Jacob.

27 Lë ni naca didza' dzaga gúnlena' légaquië'

cate' ugúa' dul-la' nabága'gaquië'.

28 Caní naca, gula'dá'baguë'ë didza' dxi'a, ate' Dios guléaj ládxë'ë légaquië' para gaca uláli' libí'ili', pero nadxí'inë' ca' légaquië', tu' gurö cazë' queë' xuz xtó'ogaquië'.

29 Tsaz runödzejë' Dios le runödzejë', en tsaz rulidzë' bönachi.

³⁰ Ca na' naca queëli', zí'atëlö bití' benli' ca rnna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'.

³¹ Lësca' caní naca quegaquië' na'a, bití' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a.

³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxöntërö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en bití' gaca nu inözi yugu' le runë' Dios.

³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'?

³⁵ ¿Nuzxi caz bi bunödzej queë' Dios para gun bayudxi bi ubi'ë Dios que?

³⁶ Yúgu'të le dë narúajgaca lu në'ë Dios, en taca lu në'ë, en nácgaca para uzi'ë xibéguequi. ¡Gácatíca'sö queë' Dios yöl-la' ba! ¡Ca' gaca!

12

Ral-la' udödi cuinru' quez queë' Dios

¹ ¡Böchi' luzá'ado! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios.

² Bítí'rö gunli' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca inözili' le naca dxi'a ré'enë' Dios gunli', lë na' raza ládxë'ë, en le naca idú.

³ Na'a, tu' zoa le buzá' ládxë'ë quia' Dios, rea' yúgu'tëli': Bití' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi ícjali', tsca naca yöl-la' réajlë' queëli' Dios le bennë' que queëli'.

⁴ Ca na' naca tuz idütë le naca cázaru', sal-la' zían le nagudi' dzágalenru', en calëga tuz dxin tun yúgu'të le zían na' nagudi' dzágalenru',

⁵ lësca' caní naca queëru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queëru' Dios, ate' nadzá'gaca tu tu tsca naca le buzá' ládxë'ë que queëru'. Bönni' na' Dios bunödzejë' queë' gu'ë didza' uláz queë', tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzejë' queë' gunë' xichinë',

dxí'ado' ral-la' gunë' dxin na'.
 Bönni' na' Dios bunödzejë' queë' usédinë' bönachi,
 dxí'ado' ral-la' usédinë' bönachi.
 8 Bönni' na' Dios bunödzejë' queë' uzéajni'inë' bönachi,
 dxí'ado' ral-la' uzéajni'inë' légaquië'.
 Bönni' bi unödzejë' que nu yúbölö,
 idú ládxë'ë ral-la' unödzejë'.
 Bönni' rinná bé'enë' bönachi,
 idú ládxë'ë ral-la' gunë' caní.
 Bönni' rácalenë' luzé'ë,
 len yöl-la' rudzeja ral-la' gunë' caní.

Yugu' le ral-la' gun nu nequi queë' Cristo

9 Ral-la' idxí'ili' luzá'ali' idú ládxí'li'.
 Buli'cá'ana le ruá' dö'.
 Guli'güi' ládxí'li' gunli' le naca dxi'a.
 10 Guli'dxí'i-guéquinë' luzá'ali'
 ca nadxí'igueli'-në' böchi' cázali'.
 Ca runli'-në' bal luzá'ali'
 ral-la' gunli' ga gácarë' lo ca nácali' la' cuínsili'.
 11 Buli'típatica'sö ládxí'li', en biti' gácali' xöhuëdi.
 Guli'gún xichinë' Xanru' idú ládxí'li'.
 12 Buli'dzeja tu' zoa le runli' löza.
 Guli'cöz zxön ladxi' cate' bi riguí'i rizáca'li'.
 Buli'lídatica'së' Dios.
 13 Buli'nödzej quegaca bönachi queë' Cristo
 tsca nayádzjaguequinë'.
 Guli'güi' lataj ga ila'cuá' nupa ta'dxín queëli'.
 14 Guli'nábinë' Dios gunë' dxi'a
 quegaca nupa ta'bía ládxí'gaca libí'ili'.
 Guli'naba gaca dxi'a quegaquië',
 en biti' udxí'ali' légaquië' dö'.
 15 Buli'dzéjalen nupa tu'dzeja.
 Guli'cödxilen nupa ta'bödxí.
 16 Guli'gaca tuz len luzá'ali'.
 Biti' gun ba zxön cuinli',
 pero guli'gún tsözxön yugu' bönni' nöxaj ladxi'.
 Biti' guéquilí' chinadéli'li' idútë yöl-la' réajni'i.
 17 Cuntu nu ubí'ili' que,
 biti' guá'ali' dö' que nu ruá' dö' queëli'.
 Guli'gún dxi'a quegaca yúgu'të bönachi.
 18 Channö huáca, tsca séqui'li', guli'cöz dxi'a
 len yúgu'të bönachi.
 19 Böchi' luzá'ado', biti' uzí' lëbili' bönachi la' libí'isili', pero
 guli'güi' lataj ubi'ë Dios quegaca bönachi na', tu' nazúaj lu
 guichi lá'ayi le rnna:
 Neda' caza' uzí' lëba'.

Neda' ubi'a quégaca bönachi.

Caní gunné' Xanru' Dios.

²⁰ Lësca' caní rnna:

Channö zoë' nu bönni' biti' ridzáguië' li' dxi'a,
en ridunë', bē'ë le gahuë'.

Channö ribidxë' nisa, bē'ë le guíjē'.

Cate' gunu' caní, gunu' ga utuí'në' bönni' na'.

²¹ Biti' gu'u lataj inná be'e le ruá' dö' li',

pero gunná be'e le ruá' dö' na',

ugunu' dxin le naca dxi'a.

13

¹ Yúgu'tëli' ral-la' gunli' ca ta'nnë' bönni' yúlahui'. Dios caz budödë' lu ná'agaquië' yöl-la' unná bē' nápagaquië', en nucu'ë xilátjagaquië' bönni' ni dë lu ná'agaquië' yöl-la' unná bē'.

² Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xiguaia'.

³ Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö rë'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'.

⁴ Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xiguaia' nu ruá' dö'.

⁵ Que lë ni na' run bayudxi gunli' ca rnnë' bönni' na' dë lu në'ë, calëgasö tu' budödë' Dios lu në'ë gunë' libí'ili' xiguaia', pero lësca' para soa dxi ládxi'do'oli' lahuë' Dios.

⁶ Que lë ni na' ca' riguixzaj lálzali' que yúlahui', tu' nácagaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

⁷ Guli'guíxzaj yúgu'të bönachi le rál-la'li' quégaquië'. Guli'guíxzaj lálzali' lu na' nu ral-la' quíxzaj lálzali'. Guli'guíxzaj dumí nu ral-la' quíxzajali'. Guli'gadxi nu ral-la' gádxili', en guli'gún bal nu ral-la' gunli' bal.

⁸ Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bē' xibá queë' Dios nu nadxí'i luzë'e.

⁹ Caní ta'nná bē' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' së ládxi'u le dë que luzó'o.

Yugu' xibá ni, en yúgu'të xibá ia'zíca'rö, údxi gun nu run ca rnna didza' rnna caní:

Bidxí'i luzó'o ca nadxí'i cuinu'.

¹⁰ Nu na' nadxí'i luzé'e bití' bi run que luzé'e le ruá' dö'. Caní naca, nu na' nadxí'i luzé'e run idú ca rinná'bè' xibá queë' Dios.

¹¹ Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusi loru' réajlè'ëru' Cristo.

¹² Ga zóaru' na'a naca ca chi'i dzö'ölö, ate' chizóa tōdi rēla na', pero ga na' zoë' Cristo naca ca lahui' dza, ate' chizóa tsōjsóaru' ni'. Que lē ni na' ral-la' ucá'anaru' le tun bōnachi ga naca chul-la que dul-la'. Ca na' rugacu cuinë' tu bōnni' rejē' gudil-la le run chi'i lē' lu gudil-la, ral-la' taru' lu beni' queë' Dios, le gun chi'i rē'u lu na' tu' xihui'.

¹³ Para gunru' caní ral-la' gunru' dxi'a ca ral-la' gun nu ridá lahui' dza.

Bití' ral-la' súdxiru', en cabí gágulè'ëru'.

Bití' ral-la' gunru' le ruá' dö', en calēga le gun ditaj rē'u.

Bití' ral-la' tíl-lalenru' luzá'aru', en cabí uzxé'ëru' luzá'aru'.

¹⁴ Na'a, ral-la' un cuinli' lu icja ládxi'do'oli' ca náquië' Xanru' Jesucristo, en bití' gü'i ládxi'li' gunli' le rizē ládxi'li' lu yöl-la' bōnáchisō queëli'.

14

Bití' ral-la' si' quídza'ru' bōchi' luzá'aru'

¹ Guli'güí' lataj nu réajlè' Cristo gun libí'ili' tsözxön sal-la' bití' naca idú ca réajlè' nu na' Lē'. Bití' tíl-lalenli' nu na' ca nácacaca le runi nu na' huáca nu gun.

² Ca naca lē ni, nacu'ë bōnni' runi légaquië' huáca ilahuë' yúgu'tē le tagu bōnachi, pero ia'bal-lē' bōnni', tu' cabí naca idú ca ta'yéajlè'ë Cristo, tágusë' le raza ruzóaru'.

³ Na'a, bōnni' na' rahuë' yúgu'tē bití' ral-la' uzóë' tsölá'alö nu bōnni' bití' rahuë' yúgu'tē, en lēscá' caní, bōnni' na' bití' rahuë' yúgu'tē bití' ral-la' si' quídzē'ë bōnni' na' rahuë' yúgu'tē, tu' nazí' lu nē'ë Dios iropē' bōnni' na' ta'yéajlè'ë Cristo.

⁴ ¿Nuzxi' caz lí', rizi' quídzu'u bōnni' huen dxin que nu yúbölö? Bōnni' na' náquië' huen dxin queë' Dios, lahuë' Xan cazē' urúajē' tsahui' o bití' urúajē' tsahui'. Channō urúajē' tsahui' lahuë' Dios, naca tu' gun cazē' Xanru' Dios ga urúajē' tsahui'.

⁵ Nadxi ca' zoë' nu bōnni' runrē' bal tu dza ca runē' bal ia'zica'rö dza, ate' bōnni' yúbölö, tuz ca runē' bal yúgu'tē dza. Tu turu' ral-la' usédada'aru' channō naca dxi'a le runru'.

⁶ Bōnni' na' runē' bal tu dza, runē' le bal para tseaj ládxi'ë Xanru', ate' bōnni' na' bití' runē' bal dza na', para tseaj ládxi'ë Xanru' bití' runē' bal dza na'. Lēscá' caní, bōnni' na' rahuë' yúgu'tē, rahuë' caní para tseaj ládxi'ë Xanru', en rē'ë Dios:

“Xclenu”, ate’ bönni’ na’ biti’ rahuë’ yúgu’të, biti’ rahuë’ le para tseaj lãdxë’ë Xanru’, en rë’ë ca’ Dios: “Xclenu’.”

⁷ Biti’ zoë’ nabanë’ queëzë’ nitüë’ bönni’ nabábalenë’ rë’u, en biti’ ratië’ queëzë’ nitüë’ bönni’.

⁸ Channö zóaru’ nabanru’, para tseaj lãdxi’ru’-në’ Xanru’ zóaru’ nabanru’, en channö gátiru’, para gaca yöl-la’ ba queë’ Xanru’ gátiru’. Caní naca, channö zóaru’ nabanru’ o channö gátiru’, nequi quéziru’ queë’ Xanru’.

⁹ Que lë ni na’ ca’ gútië’ Cristo, en bubanë’, para gáquië’ Xángaca nupa chinátigaca, en nupa nabángaca.

¹⁰ Na’a li’, ¿bizx que richugu bë’u böchi’ luzó’o? ¿Bizx que ruzú’ tsólá’alö böchi’ luzó’o? Yúgu’tëru’ idxinru’ lahuë’ Cristo ga uchi’a usöröë’ rë’u.

¹¹ Ca naca lë ni nazúaj lu guichi lá’ayi, rnna: Rnnë’ Xanru’: “Ni’a quia’ neda’ caz, ulu’ zechu zxíbigaca yúgu’të bönachi lahua’ neda’. Ila’guixjö’ yálajdo’ naca’ Dios.”

¹² Caní naca, uchi’a usöröë’ Dios yúgu’tëru’.

Biti’ ral-la’ gunru’ ga ichixi iníguinë’ böchi’ luzá’aru’

¹³ Que lë ni na’, bíti’rö ral-la’ ichugu bé’eru’ luzá’aru’, pero ral-la’ gun yúdxiru’ cabí gunru’ ga ichixi iníguinë’ böchi’ luzá’aru’, en para cabí gunru’ ga gunë’ dul-la’.

¹⁴ Nöz quézida’ biti’ bi dë le ráguru’ le gaca gun ga bíti’rö nácaru’ tsahui’ lahuë’ Dios, ate’ röjlöz lë ni didza’ bë’ë Xanru’ Jesús. Channö réquinë’ tu bönni’ zoa bi gaca gun ga bíti’rö náquië’ tsahui’ lahuë’ Dios, queë’ bönni’ ni, caní naca.

¹⁵ Channö rusuhuí’innu’ böchi’ luzó’o, tu’ ragu’ le runi lë’ biti’ ral-la’ gáguru’, biti’ runu’ ca ral-la’ gun nu nadxi’i böchi’ luzé’e. Biti’ bi ral-la’ gagu’ le gun ga gaca chopá lãdxë’ë bönni’ na’, gútië’ Cristo uláz queë’.

¹⁶ Que lë ni na’, biti’ bi gunli’ le gun ga ila’nnë xihui’ bönachi que le rusáca’li’ queëli’ naca tsahui’.

¹⁷ Cate’ rinná bé’enë’ Dios rë’u, biti’ ru’i lãdxi’ru’ le gu’aj gáguru’, pero ru’i lãdxi’ru’ gácaru’ tsahui’, en sóaru’ dxi ladxi’, en udzéjaru’, yugu’ le gaca gunru’ tu’ zóalenë’ Dios Bö’ Lá’ayi rë’u.

¹⁸ Núti’tës nu run xichinë’ Cristo ca nácacaca lë ni, run le raza lãdxë’ë Dios, ate’ urúaj dxi’a lógaca bönachi.

¹⁹ Que lë ni na’ ral-la’ gunru’ le ilún ga gata’ le ribequi dxi lãdxi’ru’ len yúgu’të bönachi, en le ilún tsutsu turu’ ia’turu’ ca réajlë’ëru’ Cristo.

²⁰ Biti’ bi ral-la’ gagu’ le gun ga gaca chopá ladxi’ nu na’ nuzóë’ Dios. Nácatë lë na’ ta’nná bönachi: “Yúgu’të dë lataj gáguru’”, pero gunru’ le ruá’ dö’ channö gunru’ ga ichixi iníguinë’ luzá’aru’ tu’ nözi lë na’ ráguru’.

²¹ Gácarö dxi'a cabí gagu' bëla', en cabí gu'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopá ládxi'ë, o le gun ga huöaj ládxi'ë ca réajlë'ë Cristo.

²² Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxösa ládxi'da'ahuë' lë' tu' nözi lë na' runi lë' dë lataj gunë',

²³ pero bönni' na' raca chopá ládxi'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

15

Ral-la' gunru' le raza ládxi'ë böchi' luzá'aru'

¹ Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Bití' ral-la' gunru' le raza ládxi'ru' la' cuínsiru'.

² Yúgu'tëru' ral-la' gunru' le raza ládxi'ë böchi' luzá'aru' para gaca dxi'a queë', en idipa ládxi'ë ca réajlë'ë Cristo.

³ Caní ral-la' gunru', tu' cabí benë' Cristo le guyaza ládxi'ë la' cuinsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' gulu'i nupa gula'nnë xihui' quiu' Li, Dios."

⁴ Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribözaru' zxön ladxi', en ruhuë tsahui' rë'u. Que lë ni na' zoa le runru' löza.

⁵ Rinábida'-në' Dios, Nu run ga ribözaru' zxön ladxi', en Nu ruhuë tsahui' rë'u, gunë' ga gunli' tuz ca rusáca'li' queéli', para gácali' ca na' rë'ënë' Jesucristo.

⁶ Caní ral-la' gunli' para gácali' tuz, cú'uli'-në' tsözxön yöl-la' ba Dios, Xuzë' Xanru' Jesucristo.

⁷ Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxí' lu në'ë ca' rë'u.

⁸ Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idütë li didza' ru'ë Dios, ate' benë' ga bulu'dxín le guzxí' lu në'ë Dios unödzejë' quégaquië' xuz xtó'otu'.

Yugu' bönachi izá'a ila'yöni didza' dxi'a

⁹ Bidë' ca' Cristo para benë' ga ila'gú'u Dios yöl-la' ba nupa bití' nácgaca judío tu' ruhuéchi' ládxi'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li' lógaca bönachi idütë yödzölió, en gul-la' quiu' yöl-la' ba.

¹⁰ Ga yúbölö nazúaj lu guichi lá'ayi le rnna:

Libí'ili', bönachi idútë yödzülió,
buli'dzéalén bönachi queë' Dios.

11 Ga yúbölö nazúaj ca' lu guichi lá'ayi le rnna:

Guli'cu'ë Xanru' yöl-la' ba,
yúgu'tëli' biti' nácali' judío.

Guli'tséaj ladxi' Lë',
yúgu'tëli' zóali' idútë yödzülió.

12 Lësca' caní buzúajë' Isaías lu guichi le rnna:

Ilá' lahui Nu nababa di'a dza queë' Isai.

Gaca lo Nu na' para inná be'e nupa biti' nácacaca judío.

Nupa ni ilún löza Lë'.

13 Rinábida'-në' Dios, Nu run ga runru' löza, gunë' ga
udzéjade'eli', en ga soa dxi ládxi'li' tu' réajlë'ëli' Lë', en gunë'
ga gaca idú ca runli' löza, tu' zóalén yöl-la' huáca queë' Dios Bö'
Lá'ayi libí'ili'.

14 Böchi' luzá'ado'. Chinöz quézida' rúntica'sili' le naca dxi'a,
en dëda' yöl-la' réajni'i queëli' para gaca uzéajni'ili' luzá'ali'.

15 Na'a naca' rugu ladxi', ruzúaja' queëli' lu guichi ni,
böcha'a, en rusá'a ládxi'li' tu' zoa le buzá' ládxi'ë Dios quia'
neda'.

16 Que lë ni na' runa' xichinë' Jesucristo lógaca bönachi biti'
nácagaca judío, en runa' libán que didza' dxi'a queë' Dios,
para gaca ugu'a bönachi biti' nácagaca judío lu në'ë Dios, nupa
na' guró cazë' Dios Bö' Lá'ayi queë' Lë'. Ilácagaquië' ca tu le
rigú'uru' lu në'ë Dios, le raza ládxi'ë Lë'.

17 Na'a, tu' rúnlena' tsözxön Jesucristo dxin, dë lu na'a tsaza
ládxa'a ca naca le nuna' lu xichinë' Dios.

18 Lësca' rurúguida' innía' ca naca lë na' benë' Cristo lu na'a
neda', benë' ga tun bönachi biti' nácagaca judío ca rnna xtídzë'ë
Dios. Lë ni benë' Lë', bugunë' dxin didza' bë'a neda', en yugu'
dxin bena' neda'.

19 Lu na'a neda' bugunë' dxin ca' le nácagaca bë' bulu'e lahui
Lë', en yugu' yöl-la' huáca zxön benë', en yöl-la' huáca na' queë'
Dios Bö' Lá'ayi le guzóalén neda'. Caní guca, gusí lahua' runa'
libán lu yödzü Jerusalén, ate' idú gásibi'ilö ga ridxintë luyú
Ilírico, chinuna' libán que didza' dxi'a ca naca queë' Cristo.

20 Bë' ládxa'a bena' libán que didza' dxi'a ga biti' bila'yöni
bönachi ca naca queë' Cristo. La'tu' guna' libán ga chibila'yöni
bönachi, guna' neda' ca runë' tu bönni' ruguéle'ë lahui dxin
zxön chinunë' bönni' yúbölö.

21 Ca bena' neda' naca ca na' nazúaj lu guichi lá'ayi le rnna:
Ila'lé'e nupa nacuá' ga cuntu nu ben libán queë' Lë',
en ila'yéajni'i nupa catu caz bila'yöni ca naca queë'.

Rë'ënë' Pablo tsejë' yödzü Roma

²² Que lë ni na', sal-la' zián luzuí gú'unida' guída' ga zóali', biti' guca guída'.

²³ Na'a, chibudxi bena' dxin quia' yugu' lataj ni, en chiré'ënda' zián iz guída' ga zóali'.

²⁴ Que lë ni na', cate' tseja' luyú España, tōda' ga zóali' libí'ili', tu' runa' löza uduyúa' libí'ili', en udzéalenda' libí'ili'. Tōdi ni huáca ugú'uli' neda' nōza.

²⁵ Na'a ral-la' tseja' Jerusalén, tsōju'a tu le gácalen nupa ni néquiguequi queë' Cristo.

²⁶ Caní guna', le gula'yaza ládxi'gaquië' bōnni' nacu'ë luyú Macedonia, en luyú Acaya, bulu'tubë' bi tu'nōdzjë' quéguequi bōnachi yechi' dzágagaca bōnachi queë' Cristo, nacu'ë Jerusalén.

²⁷ Gula'yaza ládxi'gaquië' bōnni' biti' nácagaquië' judío gulunë' lë ni. Le nácatë naca tu le rál-la'gaquië' quégaca bōnachi judío ni'. Channō bōnni' biti' nácagaquië' judío tu'zi'ë xibé le nácagaca queë' Dios ni'a que le núngaca bōnachi judío, lësca' ralla' ilácalenë' bōnachi judío na', ulu'gunë' dxin le dë quégaquië'.

²⁸ Que lë ni na', cate' údxid uōda' lu ná'agaca bōnachi judío lë na' bulu'nōdzjë' bōnni' ni, ní'rō tōda' ga zóali' libí'ili' cate' tseja' luyú España.

²⁹ Cate' guída' ga zóali', runa' löza idxínlena' yúgu'të le ruzi'iru' xibé ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'i ruchízië' Dios Bō' Lá'ayi icja ládxi'do'oru', ráta'yua' loli', bōcha'ado', ulídzali'-në' Dios tsōzxōn len neda', inábili'-në' gácalenë' neda'.

³¹ Guli'nabi-në' Dios gunë' ga ulá' neda' lu ná'agaquië' bōnni' biti' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsōju'a lu ná'agaquië' bōnni' nácagaquië' queë' Cristo, nacu'ë Jerusalén.

³² Guli'nabi-në' ca', channō naca ca rë'në' Dios, gunnë' neda' lataj idxina' queëli' len yöl-la' rudzeja quia', para uzí' ládxi'lëna' libí'ili'.

³³ Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

16

Tu'gapa Dios luzë'eguequi bōnachi queë' Cristo

¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bōnachi queë' Cristo nacua' yōdzō Cencrea.

² Uláz queë' Xanru' guli'sí' lu ná'ali'-nu nigula na', ca ralla' ilún bōnachi queë' Cristo. Guli'gácalen lënu, unōdzjali'

queënu bíti'tës bi riquínnu. Lë cázanu gúcalennu bönachi zían, en gúcalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo.

⁴ Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero lësca' yúgu'të böchi' luzá'aru' nabábagaquië' gapa nacuá' bönachi queë' Cristo biti' nácagaca judío, të'ë légaquië': "Xclenli'."

⁵ Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya.

⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'.

⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guíë', en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'alö ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'.

⁹ Guli'gapa Dios Urbano, bönni' na' bënlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'.

¹⁰ Guli'gapa Dios Apeles, bönni' na' naca bë' réajlë'ë Cristo. Guli'gapa Dios nupa nacuá' lídxë' Aristóbulo.

¹¹ Guli'gapa Dios Herodiön, bönni' uládz quia'. Guli'gapa Dios nupa nacuá' lídxë' Narciso, en ta'yéajlë'ë Xanru'.

¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu.

¹³ Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'.

¹⁴ Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacuá'lenë' légaquië'.

¹⁵ Guli'gapa Dios Filólogo, en Julia, en Nereo, en nigula zanë' Nereo na', enca' Olimpás, en yúgu'të böchi' luzá'aru' ta'yéajlë'ë Cristo, nacuá'lenë' légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queë'li'. Tu'gapë' Dios libí'ili' yúgu'të böchi' luzá'aru' nabábagaquië' gapa nacuá' bönachi queë' Cristo luyú ni.

¹⁷ Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacuá' bönachi caní

18 tu' cabí tun xichinë' Jesucristo. Tunë' dxin para bi gata' quégacasë', en ta'zì' ye'enë' yugu' bönni' nōxaj ladxi', tu'gunë' dxin didza' nōxaj ladxi', en didza' tséajlë'ëru' le cabí nácatë.

19 Rizë didza' ca na' runli' ca rnaa xtídzë'ë Xanru', ate' ta'yōni yúgu'të bōnachi. Que lë ni na' rudzējada' ni'a que le runli' libí'ili'. Na'a, ré'ënda' gácali' sina' gunli' le naca dxi'a, en calëga gunli' le ruá' dö'.

20 Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' lãdxë'ë queëli' le gácalen libí'ili'.

21 Bi'i Timoteo, bi'i na' rúnlenbi' neda' tsözxōn dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

22 Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguie' Xanru' neda'.

23 Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bōnachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

24 Rinábida'-në' Xanru' Jesucristo uzá' lãdxë'ë queëli' yúgu'tëli' le gácalen libí'ili'. ¡Ca' gaca!

Yöl-la' ba Dios

25 Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza.

26 Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bōnachi para gaca ila'yéajlë' Cristo, en ilún ca rnaa xtídzë'ë.

27 ¡Ni'a que le benë' Jesucristo, gácatica'sö yöl-la' ba queë' la's dui Dios, Nu rácatëro caz! ¡Ca' gaca!

DIDZA' ZÍ'ALÖ GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Ca rë'ëni quézinë' Dios bulidzë' neda', Pablo, para gaca' gubáz queë' Jesucristo. Böchi'ru' Sóstenes runë' neda' tsözxön.

² Rugapa' Dios libí'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' libí'ili' para guéquili' quez queë' tsözxön len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xángaquië', enca' Xanru'.

³ Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le ruzí'iru' xibé tu' néquiru' queë' Cristo

⁴ Rética'sa'-në' Dios: "Xclenu" ca naca queëli', tu' zoa le buzá' ládxë'ë Dios queëli' tu' nácali' tuz len Jesucristo.

⁵ Tu' nácali' tuz len Cristo, Dios chinagú'udë'ë xinözili' yúgu'të le nequi queë'. Rácalenë' libí'ili' ca naca yúgu'të didza' ruí'ili', en runë' ga réajni'ili' yúgu'të.

⁶ Caní naca, tu' guzxi' lu ná'ali' idú ládxi'li' le runtu' liná' lo ca naca queë' Cristo.

⁷ Que lë ni na', biti' bi riyadzaj queëli' que le runnë' Dios Bö' Lá'ayi queëru', tsanni ni ribózali' dza na' ilá' lahuë' Xanru' Jesucristo.

⁸ Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi innë queëli' dza ni huödë' Xanru' Jesucristo.

⁹ Dios runë' ca rnnë', en Lë cazë' bulidzë' libí'ili' para gácali' tuz len Zxí'inë', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰ Ni'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Biti' irúajli' choplö, pero guli'gaca tuz ca rizá' ládxi'li', en ca runi libí'ili'.

¹¹ Caní rea' libí'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídza'li'.

¹² Lë ni rnniá': Nadzá'lö didza' ruí'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo.

¹³ ¿Naru' birúajtsé' choplö Cristo? ¿Naru' gudá'atsa' neda', Pablo, lë'e yaga cruz uláz queëli'? ¿Naru' bidí'latsali' nisa para gácali' tuz len neda'?

14 Rea'në' Dios: "Xclenu", tu' cabí buquila' nisa niturö libí'ili', pero chópasë' Crispo, en Gayo.

15 Que lë ni na' bití' gaca innali' bidí'ali' nisa para gácali' tuz len neda'.

16 Lësca' buquila' nisa Estéfanos, en nupa nacua' lidxë'. Biti' röjneda' channö buquila' nisa nu yúbölö.

17 Gusöl-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo lë'e yaga cruz.

Cristo napa cazë' yöl-la' huáca, en yöl-la' réajni'i queë' Dios

18 Nupa nácgaca chul-la niti téquiguequi cá'asö naca libán runru' ca naca queë' Jesús, ca na' gútië' lë'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusölá rë'u.

19 Caní naca, tu' nazúaj lu guichi lá'ayi le rnna:

Guna' ga huóaca nítisö yöl-la' rácada'

quégaca nupa taca yenni'.

Tsölá'alö ucá'ana' yöl-la' réajni'i

quégaca nupa ta'yéajni'i yenni'.

20 ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibenë' ga böaca cá'asö yöl-la' réajni'i quégaca bönachi yödzölió ni.

21 Dios, lu yöl-la' réajni'i queë', bití' bë'ë lataj ilúnbe'e bönachi yödzölió ni Lë' ni'a que yöl-la' rácada' quégaquië'. Dios guyaza ládxë'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

22 Té'ënnë' yugu' bönni' judío ila'lé'enë' yöl-la' huáca nácgaca bë', ate' bönni' zítu' ta'guiljë' yöl-la' réajni'i.

23 Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zíca' rö bönachi téquiguequi cá'asö naca.

24 Bönni' na' bulidzë' Dios légaquië', sal-la' nácgacaquië' bönni' judío o bönni' zítu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios.

25 Téquiguequi bönachi yödzölió ni le benë' Dios naca bë' bití' bi nözinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi.

26 Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Bití' gula'cu'ë ladjali' zían bönni' ta'yéajni'inë' lu

yöl-la' bönáchisö quégaquië', en biti' gula'cu'ë ládjali' zían bönni' unná bē', en calëga zían bönni' nácagaquië' lo.

²⁷Téquiguequi bönachi yödzölió ni yugu' bönni' na' guröë' Dios biti' bi nözguequinë'. Caní benë' Dios para gunë' ga ulu'tuí' nupa ta'yéajni'í. Lësca' caní guröë' Dios nupa nacuídi'gaca yödzölió ni para gunë' ga ulu'tuí' nupa nál-lagaca.

²⁸Lësca' caní, téquiguequi bönachi yödzölió ni nupa na' guröë' Dios nácagaca cá'asö, en biti' bi nácagaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni.

²⁹Que lë ni na', cuntu nu gaca gun ba zxön cuini lahuë' Dios.

³⁰Dios caz benë' ga nácaru' tuz len Jesucristo, en benë' ga náparu' yöl-la' réajni' queë' Cristo. Tu' náquië' Cristo tuz len ré'u, nuhuóácaru' tsahui', en néquiru' quez queë' Dios, en nuláru'.

³¹Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

2

Libán runru' queë' Cristo, ca gudë'ë lë'e yaga cruz

¹Caní guca, böchi' luzá'ado', cate' bidxina' queëli'. Bena' libán loli' que xtídzë'ë Dios, calëga len yöl-la' réajni'í quia', en biti' bē'a didza' lu yöl-la' rácada' quia'.

²Cate' ni' guzóalena' libí'ili', bē' ládxa'a cabí gu'a didza' que le yúbölö, pero ca nácate' queë' Jesucristo bē'a didza', ca na' gudë'ë lë'e yaga cruz.

³Guzóalena' libí'ili' lu yöl-la' ricuidi' quia', ate' lu yöl-la' radxi quia' guxzízida'a.

⁴Bē'lēna' libí'ili' didza', en bēna' libán que xtídzë'ë Dios, calëga ca tu'í didza' bönachi lu yöl-la' rácada' quéguequisö, pero guzóalēnë' Dios Bö' Lá'ayi nēda', ate' guzóalēn yöl-la' huáca queë' Dios nēda', le guca bē' naca idútë li didza' bē'a.

⁵Caní bēna' para gaca tséajlë'ëli' Dios, calëga tu' biyönili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶Ruí'itu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzölió ni, en biti' naca ca le nápagaquië' bönni' ta'nná bē'ë dza ni zóaru' na'a, nupa na' ta'niti caz.

⁷Ruí'itu' didza' que yöl-la' rácada' nagachi', lë na' runödzjë' Dios, tu' bigachi' yöl-la' rácada' na' buzöë' Dios dza ni'te para uzí'iru' xibé.

⁸ Yugu' bönni' ta'nná bē'ē dza ni zóaru' na'a bití' gulúnbē'ē yöl-la' rácada' na'. La'tu' gulúnbē'ē le, bití' ulu'dē'ē Xanru' nayépisētērē' lē'e yaga cruz.

⁹ Naca ca na' nazúaj lu guichi lá'ayi le rnna: Chinupē'ē Dios le ulu'zí' xibé nupa nadxí'iguequi Lē', yugu' le cuntú nu ble'e, en bití' biyöni, en bití' gula'zá' ládxi'gaca bönachi ca naca que.

¹⁰ Na'a, Dios nuzéajni'inē' rē'u yugu' lē ni lu nē'ē Dios Bō' Lá'ayi, tu' ruyú cazē' Dios Bō' Lá'ayi yúgu'tē, enca' le yu'u icja ládxi'da'ahuē' Dios caz.

¹¹ ¿Naru' gaca inözinē' nu bönni' le yu'u icja ládxi'da'ahuē' ia'tuē' bönni'? Tuz bö' naca cazē' bönni' na' nözi lē na'. Lē'sca' caní, cuntú nu nözi le yu'u icja ládxi'da'ahuē' Dios. Tuzē' Dios Bō' Lá'ayi nözinē' lē ni.

¹² Rē'u ni, bití' nazí' lu ná'aru' tu bö' ridasö yödzölió ni, pero nazí' lu ná'aru' Dios Bō' Lá'ayi, Nu na' ruchíziē' Dios rē'u para gaca gúnbē'ēru' yugu' le buzá' ládxi'ē Dios que'ru'.

¹³ Yugu' lē na' buzá' ládxi'ē Dios que'ru' ru'íru' didza' que, calēga len didza' tu'sédinē' bönachi rē'u len yöl-la' rácada' quéguequi, pero len yugu' didza' rusédinē' Dios Bō' Lá'ayi rē'u. Caní naca, ruzéajni'íru' bönachi zóalenē' Dios Bō' Lá'ayi légaquiē' ca naca le rusédinē' Dios Bō' Lá'ayi rē'u.

¹⁴ Tu bönni' bití' zóalenē' Dios Bō' Lá'ayi lē bití' rizí' lu nē'ē le rusédinē' Dios Bō' Lá'ayi rē'u, tu' réquinē' cá'asö naca. Bití' gaca tséajni'inē' bönni' na' lē ni, tu' gaca guéquibe'enē' tuzē' bönni' zóalenē' Dios Bō' Lá'ayi lē' le nazaca' lē ni.

¹⁵ Tu bönni' zóalenē' Dios Bō' Lá'ayi lē' gaca guéquibe'enē' le nazaca' yúgu'tē, pero cuntú nu gaca guéquibe'e le nazaca' cazē' bönni' na'.

¹⁶ Nazúaj lu guichi lá'ayi le rnna: ¿Nuzxi caz nözi le rizá' ládxi'ē Xanru'? ¿Nuzxi caz gaca uzéajni'i Lē'?

Le rizá' ládxi'ē Cristo yu'u icja ládxi'do'oru' rē'u.

3

Nácaru' huen dxin tsözxön len Dios

¹ Que lē ni na', böchi' luzá'ado', bití' guca gü'ílena' libí'ili' didza' ca ru'ílena'-nē' didza' tu bönni' nudödi cuinē' lu nē'ē Dios Bō' Lá'ayi, pero bé'lēna' libí'ili' didza' ca ru'ílena' nu naca bönáchisö didza', bití' zóalenē' Dios Bō' Lá'ayi nu na'. Nácali' ca yugu' bí'i hué'ēni. Bití' nácali' tsutsu ca réajlē'ēli'-nē' Cristo.

² Busédida' libí'ili' le cabí naca böniga, lē na' guca ca nidxi' gü'í'ili'. Bití' busédida' libí'ili' le naca böniga ca bēla' gáguli'. Bití' guca tséajni'ili' le naca ca bēla' gáguli', en bití' rácali' na'a.

³ Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödöliö ni.

⁴ Cate' zóalen libí'ili' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵ ¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'.

⁶ Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxón xisedo' na' nadúz icja ládxi'do'oli'.

⁷ Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rixxón xisedo' na'.

⁸ Tuz ca nácaqaquië' bönni' razë', en bönni' rigu'ë nisa. Dios ubi'ë que queëgaquië' tsca naca dxin runë' tu tuë'.

⁹ Nácatu' huen dxin tsözxón len Dios, ate' libí'ili' nácali' ca la' yëla queë' Dios ga runtu' dxin.

Lësca' caní nácali' ca tu yu'u runë' Dios.

¹⁰ Ca naca le buzá' ládxi'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'.

¹¹ Dios chigulu'ë tu xilibi zö'ö le naca Lë cazë' Jesucristo, ate' cuntu nu gaca cu'u ia'tú xilibi zö'ö caní.

¹² Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiöj nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö.

¹³ Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' si' bë' dxin núngaca tu tu bönachi.

¹⁴ Channö dxin nunë' tu bönni' urúaj dxi'a lu guí' na', le naca ca tu zö'ö guchisë', Dios ubi'ë queë' ca sa'yéaj dxin nunë'.

¹⁵ Channö tsegui dxin nunë' tu bönni' le naca ca tu zö'ö guchisë', unítië' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

¹⁶ ¿Naru' cabí nözili' naca cázali' yudo' queë' Dios, ate' zoë' Dios Bö' Lá'ayi icja ládxi'do'oli'?

¹⁷ Channö nu usuniti yudo' queë' Dios, Dios usunítië' nu na', tu' naca lá'ayi yudo' queë' Dios, ate' libí'ili' naca cázali' yudo' na'.

18 Biti' si' ye'e cuinli'. Channö réqui nu nutsa' ládjali' rácada' ca tácada' bönachi yödzülió ni, ral-la' huóaca nu na' ca tu bönni' biti' bi nözinë', para gata' que yöl-la' rácada' le naca idú.

19 Nu bönni' napzë' yöl-la' rácada' que yödzülió ni náquië' tu bönni' biti' bi nözinë' lahuë' Dios. Nazúaj lu guichi lá'ayi le rnna: "Dios runë' ga ila'chixi ila'nigui nupa tácada', rugunë' dxin yöl-la' rácada' queguequi."

20 Lësca' caní rnna: "Xanru' nözinë' nítisö naca le ta'bequi ícjagaca bönachi tácada'."

21 Que lë ni na', biti' ral-la' gunli' zxön le gaca gunë' tu bönni'. Nequi queëli' yúgu'të.

22 Néquiguequi queëli':
Pablo, en Apolos, en Cefas,
en yödzülió ni,
en yöl-la' na'bán, en yöl-la' guti,
en dza ni zóaru' na'a, en dza si' za'.
Yúgu'të nequi queëli',
23 ate' libí'ili' néquili' queë' Cristo,
ate' Cristo néquinë' queë' Dios.

4

Dxin tunë' bönni' gubáz nasöl-lë'ë Cristo

1 Que lë ni na', ral-la' guéquili' nácatu' netu' huen dxin queë' Cristo, en nazi' lu na'tu' le nagachi' queë' Dios.

2 Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'.

3 Biti' bi ruí'í ládxa'a channö uchi'a usöröli' neda', o channö ulu'chi'a ulu'sörö bönachi yödzülió ni neda'. Biti' ca' ruchí'a rusörö cuina'.

4 Biti' ruxós ládxi'da'ahua' neda'. Lë ni biti' naca bë' biti' nabága'a xíguia'. Xanru' náquië' Nu ruchí'a rusöröë' neda'.

5 Que lë ni na', biti' ral-la' uchi'a usöröli' nu bönni' zí'aló ca idxín dza que. Guli'cöz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja ládxi'do' gaca yúgu'të bönachi. Ní'irö Dios ubi'ë que queégaca bönachi le gun bal léguequi ca ral-la' gaca queguequi.

6 Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxön tuë' bönni', en biti' uzóali' tsóla'aló ia'tué'.

7 ¿Nuzxi bentsö ga nacu' li' lo? ¿Bizxi caz bidéli'nu' li' le cabí bennë' Dios quiu'? Channö Lë' bénnasë' quiu' lë na' dë lu no'o, ¿bizx que run ba zxön cuinu', réquinu' rásasö quiu' bidéli'nu' lë na'?

8 ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queëli'? ¿Naru' réquitseli' rinná bë'ëli', sal-la' biti'

rinná bĕ'ĕtu' netu'? Ni'a queĕ' Xanru' Dios rĕ'ĕnda' inná bĕ'ĕli' para gaca inná bĕ'lentu' libí'ili' tsözxön.

⁹ Runi neda' naca queĕtu', bönni' gubáz queĕ' Dios, ca nuzóĕ' netu' zéajtu' xibánitĕ ca na' raca quégaquiĕ' bönni' chinarugu quégaquiĕ' ilátĕ' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdĕ'ĕ gubáz lá'ayi queĕ' Dios.

¹⁰ Tu' rĕ'ĕnĕtu' guntu' xichinĕ' Cristo, ruí'tu' bönachi lataj téquiguequi nácatu' bönni' bitĕ' bi nözquequinĕ', pero libí'ili' réquili' rácada'alĕ' tu' nácalĕ' queĕ' Cristo.

Libí'ili' réquili' chinál-lalĕ',

pero téquiguequi bönachi nacuídi'tu' netu'.

Tu'zóa bönachi netu' tsölá'alö,

pero tun libí'ili' bal.

¹¹ Ga ridxintĕ na'a dza, riduntu', en ribídxĕtu' nisa.

Bitĕ' dĕ' lari' gácutu'.

Tun bönachi netu' zĕ', en bitĕ' zoa lídxĕtu'.

¹² Rusaca' zĕ' cuintu', la' nétu'sö runtu' dxin.

Tu'lidza bönachi netu' zĕ',

pero netu' rinábatu' le gácalen léguequi.

Ta'bía ládxi'gaca bönachi netu',

pero ruá' rilentu' le.

¹³ Ta'nnĕ' queĕtu',

pero lu yöl-la' nöxaj ladxi' ruí'ilentu' légaquiĕ' didza'.

Ga ridxintĕ na'a dza nácatu' ca bĕbu que yödzölió ni, en ca tu le ta'ru'una yúgu'tĕ bönachi.

¹⁴ Ruzúaja' queĕli' canĕ lu guichi, calĕga tu' rĕ'ĕnda' guna' ga utuí'ili', pero rĕ'ĕnda' uzéajni'ida' libí'ili', runa' ca runĕ' tu bönni' ruzéajni'inĕ' yugu' zxf'ini cazĕ' tu' nadxf'inĕ' légacabi'.

¹⁵ Sal-la' gaca zĕán gáyu'ĕ bönni' ila'cuá'alĕn libí'ili', en ulu'sédinĕ' libí'ili' ca naca queĕ' Cristo, tuz nu zoa naca ca xúzili', nu na' ben ga néquili' queĕ' Cristo. Lu yöl-la' na'bán cubi le nápalĕ' tu' dzágali' Cristo, neda' caz naca' ca xúzili' tu' busiyönda' libí'ili' didza' dxĕ'a.

¹⁶ Que lĕ ni na', ráta'yua' lolĕ' güf'i ládxi'li' gunli' ca runa' neda'.

¹⁷ Que lĕ ni na' ca' risöl-la'a-bĕ' bi'i Timoteo ga zóali'. Tu' rúnlenbi' neda' dxin queĕ' Xanru' nácabĕ' ca zxf'ini caza', en nácabĕ' idú ladxi', atĕ' nadxf'ida'-bi'. Gunbi' Timoteo ga tsöjnéli' yugu' xibá rusédida' tu' néquida' queĕ' Cristo, yugu' le rusédida' yúgu'tĕ lataj lógaca yúgu'tĕ cö' bönachi queĕ' Cristo.

¹⁸ Bál-lalĕ' run ba zxön cuinli' tu' réquili' bĕti'rö udxina' ga zóali'.

¹⁹ Na'a, la' udxĕntea' ga zóali' channö Xanru' gunnĕ' neda' lataj. Nĕ'irö guéquibe'eda', calĕgasö didza' tu'ĕ bönni' tun

ba zxön cuíngaquië', pero guéquite'eda' channö zóalen yöl-la' huáca queë' Dios légaquië'.

²⁰ Channö nazí' lu ná'ali' rinná bé'enë' Dios libí'ili', biti' naca bé' naca caní tu' rnnásili' ca'. Naca bé' naca caní channö zóalen libí'ili' yöl-la' huáca queë' Dios.

²¹ ¿Bízxilö ré'ënili'? ¿Naru' ré'ënili' udxina' ga zóali' len gubá'ayi, para guna' libí'ili' zi', o len yöl-la' nadxí'i, en lu yöl-la' nöxaj ladxi'?

5

Pablo ruchi'a rusöröë' tuë' bönni' runë' le ruá' dö'

¹ Rizé didza' zóalenë' libí'ili' tuë' bönni' runë' le ruá' dö', tu' zóalenë' nigula queë' xuzë'. Le ruá' dö' caní biti' ca' tun bönachi biti' núnbë'gaca Dios.

² Libí'ili' run ba zxön cuinli', pero ral-la' huí'inili', en ubéajli' nu na' run dul-la' na' ga zóali'.

³ Sal-la' biti' zóalena' libí'ili' lu idútë le naca', le nácatë zóalena' libí'ili' lu bö' naca caza'. Ca chizóalen caza' libí'ili' chibuchi'a busöröa' nu na' run dul-la' na'.

⁴ Cate' udúbili' queë' Xanru' Jesucristo guna' libí'ili' tsözxön lu bö' naca caza'. Ní'irö, len yöl-la' huáca queë' Xanru' Jesús

⁵ buli'dödë' bönni' na' lu na' Satanás tu' xihui' para initi idútë le naca cazë', pero ulá bö' naca cazë' dza ni' huödë' Xanru'.

⁶ Biti' naca dxi'a gun ba zxön cuinli' ca naca le runli'. ¿Naru' cabí nözili' didza' na' rna: "Cua zído'os que yöta xtila gun ga chaxxaj idútë cúa nazí'i le"?

⁷ Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácatë chinácali'. Naca queëru' ca chizóaru' Laní Pascua cate' tahuë' yöta xtila biti' nazí' cúa zi que, en chigulútië'-ba' uláz queëru' bö'cu' zxila' que Laní Pascua na', bö'cu' zxila' na' náquië' Lë cazë' Cristo.

⁸ Que lë ni na' ral-la' gunru' laní na', calëga zóalen rë'u cúa zi gulás na' le ruluí'i le ruá' dö', en le cabí nazaca', pero ral-la' ugunru' dxin yöta xtila na' biti' nazí'i cúa zi que, yöta xtila na' ruluí'i le naca idú dxi'a, en le naca idútë li.

⁹ Cate' buzúaja' queëli' lu guichi zí'alö, gudxi caza' libí'ili' biti' gunli' tsözxön bönni' tunë' le ruá' dö'.

¹⁰ Gudxa' libí'ili' caní, calëga para ucuítali' tsaz ga nacué' bönachi yödzölió ni, nupa tun le ruá' dö', en ga nacué' bönachi ta'zë ládxi'gaca le dë que luzë'eguequi, en ga nacué' yugu' bönni' gubán, en bönachi ta'yéaj ládxi'gaca budó' guiöj budó' yaga. Para gunli' caní gun bayudxi irúajli' yödzölió ni.

¹¹ Le ré'ëni inná didza' na' buzúaja' queëli' zí'alö naca para cabí gunli' tu zxön tuë' bönni' rnnë' néquinë' queë' Cristo, pero runë' dul-la' le lë'e, o rizé ládxi'ë le dë que luzë'ë, o reaj ládxi'ë

tu budó' néquini, o rinné xihuë'ë, o rizúdxinë', o ribanë'. Biti' ca' gágulenli' tsözxón tuë' bönni' caní.

¹²⁻¹³ Biti' nequi quia' neda' uchi'a usöröa' nupa biti' nabábagaca rë'u. Dios uchi'a usöröë' léguequi. Libí'i cázali' ral-la' uchi'a usöröli' nupa nabábagaca libí'ili'. Que lë ni na', guli'cüé' ga zóali' bönni' xihui' na'.

6

Biti' ral-la' ichë'ëru' böchi' luzá'aru' lógaca bönachi yúlahui'

¹ Cate' ridil-la dídza'li' tuli' len ia'tuli', ¿nacxi caz rurúguili' tséajli' yúlahui' ga ulu'chi'a ulu'sörö nupa biti' ta'yéajlë' Cristo libí'ili'? Dxí'arö tséajli' lógaca bönachi queë' Cristo para ulu'chi'a ulu'sörö libí'ili'.

² ¿Naru' cabí nözili' nupa néquiguequi queë' Cristo ral-la' ulu'chi'a ulu'sörö yúgu'të bönachi yödzülió? Channö libí'i cázali' uchi'a usöröli' bönachi yödzülió, ¿naru' cabí nápalí' yöl-la' réajni'i uchi'a usöröli' didza' bizxaj caní?

³ ¿Naru' cabí nözili' ral-la' uchi'a usöröru' yugu' gubáz lá'ayi? Rúntërö bayudxi uchi'a usöröru' le taca yödzülió ga ni zóaru' na'a.

⁴ Na'a, channö raca tu le run bayudxi nu uchi'a usörö, lë na' raca yödzülió ni, ¿bizx que rucua'ali' nupa ulu'chi'a ulu'sörö le, nupa na' biti' bi dë lu në'eguequi ladjagaca bönachi queë' Cristo?

⁵ Rnní'a caní para guna' ga utuí'ili'. ¿Naru' cabí zóalen libí'ili' nu raca lati' nu gaca uchi'a usörö le raca quegaquië' böchi' luzá'ali'?

⁶ ¿Nacxi caz gaca tu bönni' réajlë'ë Cristo ichë'ë böchi' luzë'ë yúlahui' ga ulu'chi'a ulu'sörö bönachi biti' ta'yéajlë' Cristo légaquië'?

⁷ Le nácatë richixi riníguili' tu' ridil-la dídza'li'. ¿Bizx que biti' guá' ilenli' nu ruá' dö' queëli'? ¿Bizx que biti' guá' ilenli' nu rucáchi'lan le dë queëli'?

⁸ Libí'ili' ruá'ali' dö', en rucachi' lanli', ate' runli' caní quegaquië' böchi' luzá'ali' ta'yéajlë'ë Cristo.

⁹⁻¹⁰ ¿Naru' cabí nözili' biti' ila'yaza bönachi biti' nácgaca tsahui' ga rinná bë'ë Dios? ¿Biti' sí' ye'e cuinli'!

Biti' ca' tsaz ga rinná bë'ë Dios nu run le ruá' dö':
 Cuntu nu reaj ladxi' budó' guiój budó' yaga,
 en cuntu nu riguitsaj xibá que yöl-la' nutsaga na',
 en cuntu nu bönni' run cuinë' ca nigula,
 en cuntu nu bönni' zóalenë' la' luzë'e bönni'së',
 en cuntu nu bönni' gubán, en cuntu nu ruhuidi',
 en cuntu nu rizudxi, en cuntu nu rinné xihui',
 en cuntu nu rucáchi'lan.

Biti' ca' tsaz nu run caní ga rinná bë'ë Dios.

¹¹ Caní gúcali' bál-lali' libí'ili', pero na'a chinuhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bõ' Lá'ayi queë' Dios runë' ga raca caní.

Idútë le naca cázaru' nequi quez queë' Dios

¹² Ta'nná bönachi: "Yúgu'të dë lataj gunru'." Sal-la' nácatë didza' ni, biti' ral-la' gunru' yúgu'të. Sal-la' dë lataj guna' yúgu'të, biti' gu'a lataj bi inná be'e neda'.

¹³ Ta'nná ca' bönachi: "La' huagu naca le tsaz lë'ëru', ate' lë'ëru' naca ga tsudzu la' huagu." Nácatë didza' ni, pero idxín dza usunítië' Dios la' huagu, enca' lë'ëru'. Dios benë' idútë le naca cázaru', calëga para ugunru' le dxin gunru' le ruá' dö'. Naca para uzi'ë xibë Xanru', ate' Xanru' náquië' para uzi' xibë' idútë le naca cázaru'.

¹⁴ Dios busubanë' Xanru' Cristo lu yöl-la' guti. Lësca' caní, len yöl-la' huáca queë' usubanë' rë'u.

¹⁵ ¿Naru' cabí nõzili', idútë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Biti' ca' ral-la' gunli' caní!

¹⁶ ¿Naru' cabí nõzili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rnna: "Ílácagaquië' ca tuz bönachi iropë' na'."

¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', ní'ilo lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'.

¹⁹ ¿Naru' cabí nõzili' idútë le naca cázali' naca yudo' queë' Dios Bõ' Lá'ayi? Dios caz nuchizë' Dios Bõ' Lá'ayi na' libí'ili', ate' Lë' zoë' icja ládxi'do'oli'. Que lë ni na' biti' nequi queëzili' idútë le naca cázali'. Na'a, nequi queë' Dios.

²⁰ Dios gú'uë' libí'ili' len tu le zxön le gudizxjë'. Guli'gún dxin idútë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idútë le naca cázali', enca' bö' naca cázali'.

7

Rusëdinë' Pablo ca naca que yöl-la' nutsaga na'

¹ Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula.

² Tu' tunda' bönachi le ruá' dö' ga ni' zóali', yúgu'të bönni' nabábagaquië' libí'ili' ral-la' ila'cuá'lenë'-nu nigula que queëgaquië', ate' yúgu'të nigula ral-la' ila'cuá'lennu-në' bönni' que queëgacanu.

3 Bönni' na' zóanu nigula queë' ral-la' gunë' queënu nigula queë' ca naca yöl-la' run que yöl-la' nutsaga na', en la' lëbisö ral-la' gunnu nigula len bönni' queënu.

4 Biti' dë lu ná'asönu nigula le naca cázanu, pero bönni' queënu dë lu në'ë ca' le. Lëasca' caní, biti' dë lu ná'asë' bönni' le naca cazë', pero nigula queë' dë lu ná'anu ca' le.

5 Biti' ral-la' ila'dá'baguë'ë luzá'agaquië' bönni', en nigula na', nutsaga ná'agaquië'. Huácasö ca' channö ilunë' tuz didza' biti' ila'dzá'guië' tu chí'isö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xihui' gun ga tsázagaquië' nöza dul-la' tu' cabí gaca ila'nná be'e cuíngaquië'.

6 Lë ni rea' libí'ili' naca tu le runnë' Xanru' libí'ili' lataj. Biti' naca le gunná bë'ë.

7 Runi neda' gácarö dxi'a ulu'gá'anë' tuz yúgu'të bönni', ca na' zoa' tuza' neda'. Tu tuë' bönni' rizi'ë tsca le runödzejë' Dios queë' gunë'. Tuë' rizi'ë tu le runödzejë', ate' ia'túë' rizi'ë ia'tú le runödzejë'.

8 Na'a, rea' nupa zóagaca tuz, enca' yugu' nigula uzëbi, gácarö dxi'a queguequi ulu'gá'ana tuz ca na' zoa' tuz neda'.

9 Channö cabí gaca ila'nná be'e cuíngaquië', huáca ulu'tsaga ná'agaquië', tu' gácarö dxi'a ulu'tsaga ná'agaquië', en cabí ila'zë ládxi'gaquië' le ruá' dö'.

10 Rinná be'eda' nupa chinutsaga në'eguequi, en calëga néda'sö runa' xibá ni, pero Lë cazë' Xanru' runë' le, rnnë': "Biti' ulá'alennu tu nigula bönni' queënu."

11 Channö nu nigula ulá'alennu-në' bönni' queënu, ral-la' ugá'ananu túzinu, o huóacanu tuz len bönni' queënu na'. Lëasca' caní tu bönni' biti' ral-la' ucá'anë'-nu nigula queë'.

12 Na'a, néda'sö rea' ia'zíca'rö bönachi, en calëga rnnë' Xanru' caní, rnnía': Channö zoë' nu böchi' luzá'aru' réajlë'ë Cristo, ate' nigula queë' biti' réajlë'ënu Xanru', en channö rë'ëninu ugá'analennu lë', biti' ral-la' ulá'alennë'-nu.

13 Lëasca' caní rnnía': Channö zóanu nu nigula zanru' réajlë'ënu Cristo, ate' bönni' queënu biti' réajlë'ë Xanru', en channö rë'ënnë' ugá'analennë'-nu, biti' ral-la' ulá'alennu lë'.

14 ¡Caní ral-la' ilunë'! Bönni' cabí réajlë'ë na', Dios rilé'enë' lë' ca tu bönni' néquinë' quez queë' tu' náquië' tuz len nigula queë' réajlë'ënu Cristo, ate' nigula caní, biti' réajlë'ënu, Dios rilé'enë'-nu ca tu nigula néquinu quez queë' tu' nácanu tuz len bönni' queënu náquië' böchi' luzá'aru' réajlë'ë Cristo. La'tu' cabí naca caní, ilácabi' zxi'inigaquië' ca yugu' bi'i lan lahuë' Dios. Na'a, nácagacabi' quez queë' Dios.

15 Nu bönni' o nigula nu cabí réajlë' Cristo, channö rë'ëni ulá'alennu na' nutsaga ná'alennu, huáca ca'. Biti' run bayudxi

ugá'analen nu na' böchi' luzá'aru' o zanru' nu réajlë' Cristo, tu bulidzë' Dios rë'u para cözaru' tsáhu'i'do'.

16 ¡Caní ral-la' gaca! Nadxi ca' li', nigula, huáca gunu' ga ulë' bönni' quiu', ate' nadxi ca' li', bönni', huáca gunu' ga ulanu nigula quiu'.

17 Ral-la' gunru' tu turu' tsca le bennë' queëru' Xanru', enca' tsca guca queëru' cate' bulidzë' Dios rë'u para guéquiru' queë'. Rusëdida' yúgu'të cö' bönachi queë' Cristo xibá ni.

18 Channö Dios bulidzë' nu bönni' narugu lu xipëlë'ë le naca bë' néquinë' queë' Dios, ral-la' ugá'anë' caní, zoa lu xipëlë'ë lë na' naca bë'. Lësca' caní, channö Dios bulidzë' nu bönni' biti' narugu lu xipëlë'ë lë na' naca bë', biti' ral-la' ichúguië' lë na' lu xipëlë'ë.

19 Biti' bi nazaca' lë na' narugu lu xipëlë'ë tu bönni', en channö biti' narugu lu xipëlë'ë bönni' lë na' naca bë', biti' bi nazaca'. Le nácada' lesaca' naca gunru' ca rinná bë' xibá queë' Dios.

20 Ral-la' ugá'anë' tu tuë' bönni' ca na' gúquië' cate' ni' bulidzë' Dios lë'.

21 Channö bulidzë' li' cate' ni' nacu' bönni' nadó'o, biti' cö'u böniga tu' nacu' caní, pero channö gata' quiu' lataj iruju' lu na' xanu', buzí' xibé lataj na' gata' quiu' iruju'.

22 Channö bulidzë' Xanru' nu bönni' cate' ni' nado'ë, lahuë' Xanru' náquië' ca nu bönni' narúajë' lu në'ë xanë' na', para gunë' xichinë' Xanru'. Lësca' caní, channö bulidzë' Xanru' nu bönni' cate' ni' narúajë' lu në'ë xanë' na', bönni' ni náquië' ca tu bönni' nadó'o queë' Cristo.

23 Zxöntërö le gudizxjë' Dios, gú'uë' libí'ili'. Que lë ni na' biti' ral-la' guti' cuinli' lu ná'agaca bönachi.

24 Que lë ni na' ca', böchi' luzá'ado', ral-la' sóali' lahuë' Dios tsca guca queëli' tu tuli' cate' ni' bulidzë' Dios libí'ili'.

25 Ca naca quégaca nupa biti' nutsaga ná'agaca, biti' bi gunná bé'enë' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxi'ë' Xanru' neda'.

26 Tu' taca zían le raca queëru' dza ni zóaru' na'a, runi neda' gácarö dxi'a channö ulu'gá'anë' yúgu'të bönni' ca nácagaquië' na'a.

27 Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu.

28 Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni'-në' bönni', biti' gunbi' dul-la', pero ila'gu'i ila'zaca' nupa nutsaga ná'agaca yödzülió ni, ate' ré'ënda' guna' ga uláli' lu yöl-la' riguí'i rizaca' na'.

29 Na'a, rea' libí'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquië'-nu

nigula ral-la' iluí' ládxi'gaquië' Dios, ca runë' nu bönni' biti' nutsaga ná'alenë' nigula.

30 Lësca' caní, nupa ta'bödxi yechi' ral-la' ulu'dzeja lahuë' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahuë' Dios ca run nu biti' rudzeja, ate' nupa to'o ral-la' ilaca ca nu biti' bi dë que.

31 Nupa tu'gún dxin le dë yödzölió ni ral-la' ilaca ca nu biti' ruí'i ladxí' le dë yödzölió ni, tu' udödi quégaca le rilé'eru' yödzölió ni.

32 Ré'ënda' biti' ubi uguí'ili'. Tu bönni' biti' zóanu nigula queë' ruí'i ládxi'ë le nequi queë' Xanru', naca gunë' le raza ládxi'ë Xanru'.

33 Tu bönni' nutsaga ná'lenë'-nu tu nigula ruí'i ládxi'ë le raza yödzölió, naca gunë' le raza ládxi'nu nigula queë'.

34 Lësca' caní raza queënu tu nigula nutsaga ná'lennu-në' bönni', en queënu nigula na' zóanu túzinu. Nigula na' zóanu túzinu ruí'i ládxi'nu le nequi queë' Xanru', naca sóanu quez queë' Dios lu le naca cázanu, en lu bö' naca cázanu. Nigula na' nutsaga ná'lennu-në' tu bönni' ruí'i ládxi'nu le raza yödzölió ni, naca gunnu le raza ládxi'ë bönni' queënu.

35 Yugu' lë ni rea' libí'ili' para uzí'ili' xibé lë ni, en calëga para uzága'a xinözili'. Ré'ënda' gunli' le ral-la' gunli', para gunli' xichinë' Xanru' idú ládxi'li'.

36 Channö zoë' tu bönni' réquinë' biti' naca dxi'a ugá'anabi' túzibi' bi'i nigula ra'bando' queë', en chizóa iz queëbi', en ré'ënide'ebi' utsaga ná'alenbi'-në' bönni', huáca utsaga ná'alenbi'-në'. ¡Biti' gunbi' dul-la'!

37 Channö chinún tsutsu xtídzë'ë bönni' na', en biti' run bayudxi gunë' caní, en dë lu në'ë naca gunë', en chinún tsutsu xtídzë'ë ugá'anabi' túzibi', gunë' le naca dxi'a bönni' na'.

38 Caní naca, nu ruí'i lataj bi'i que utsaga ná'alenbi'-në' bönni', run le naca dxi'a, pero nu run ga ugá'anabi' túzibi' run le nácarö dxi'a.

39 Nigula na' nutsaga ná'lennu-në' bönni', rinná be'e xibá que yöl-la' nutsaga na' lënu tsanni ni zoë' nabanë' bönni' queënu. Channö gátie' bönni' queënu, gata' lu ná'anu utsaga ná'lennu-në' nu bönni' ré'ëninu, channö réajlë'ë Xanru' bönni' na'.

40 Runi neda' gácarönu bica' ba channö ugá'ananu túzinu, en réquida' Bö' Lá'ayi queë' Dios runë' neda' tzaxxón.

8

Le ta'gú'u bönachi lógaca budó' guiöj budó' yaga

1 Na'a, gu'a didza' ca naca que le ré'aj ráguru', lë na' gula'gú'u bönachi lógaca budó' guiöj budó' yaga. Ta'nná bönachi: "Yúgu'tëru' náparu' yöl-la' réajni'i." ¡Nácatë didza' ni!

Yöl-la' réajni'i caní run ga run ba zxön cuinru', pero yöl-la' nadxí'i queëru' luzá'aru' run ga rácalenru' luzá'aru'.

² Channö zoë' nu bönni' réquinë' chiréajni'inë', bití' bi réajni'ininë' ca ral-la' tséajni'inë',

³ pero nu bönni' nadxí'inë' Dios, Dios caz zóalenë' bönni' na'.

⁴ Na'a, ca naca que le rë'aj ráguru', lë na' gula'gú'u bönachi lógaca budó' guiøj budó' yaga, nõziru' bití' bi nazáca'gaca budó' guiøj budó' yaga na' yödzülió ni, en cúnturö nu zoa naca Dios.

⁵ Sal-la' nacuá' le téquiguequi bönachi nácagaca dios, le nacuá' lúxiba, en le nacuá' luyú, ate' zían le tu'lidza bönachi, en tuí'i lágaca: dios, enca': xan,

⁶ pero queëru' rë'u:

Tuzë' náquië' Dios, Lë' Xuz.

Lë' benë' yúgu'të le rilé'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë,

ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'aló gula'yéaj ládxi'gaca budó' guiøj budó' yaga, ga ridxintë na'a dza të'aj tahuë' le gula'gú'u bönachi lógaca budó' guiøj budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'.

⁸ Bití' gun le gu'aj gáguru' ga gunë' Dios rë'u bal. Channö gáguru' le, bití' gácaröru' dxí'a, en channö cabí gáguru' le, bití' gácaröru' cá'asö.

⁹ Dë lu ná'ali' gu'aj gáguli' bíti'tës. Guli'gún chi'i cuinli' para cabí gunli' ga ila'chixi ila'nigui nupa bití' naca idú ca ta'yéajlë' Cristo.

¹⁰ Nadxi ca' li' réquinu' napu' yöl-la' réajni'i ca naca lë ni, en huáca gagu' bíti'tës. Channö cö'u xilataj budó' guiøj budó' yaga, en gu'aj gagu' le gula'gú'u bönachi lo budó' guiøj budó' yaga na', ate' channö nu böchi' luzó'o bití' naca idú ládxi'ë ilé'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiøj budó' yaga na'.

¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxi'ë. ¿Naru' guntso' caní queë' böchi' luzó'o, ni'a que nu na' gútië' Cristo?

¹² Channö caní gunu', gunu' dul-la' tu' usubágu'u böchi' luzó'o xíguia', en gunu' ga ichixi iníguinë' tu' cabí naca idú ládxi'ë, en gunu' ca' dul-la' le ruzóa Cristo tsölá'alö.

¹³ Que lë ni na', channö le gu'aj gahua' gun ga ichixi iníguinë' böchi' luzá'a, bití'rö gahua' bëla' na', para cabí guna' ga gunë' böchi' luzá'a dul-la'.

9

Le dē lu nē'ē nu bōnni' gubáz nasōl-lē'ē Cristo

¹ ¿Naru' cabí naca' gubáz nasōl-lē'ē Cristo? ¿Naru' cabí nadéli'da' yōl-la' rusōlá? ¿Naru' cabí bilé'eda'-nē' Xanru' Jesús? ¿Naru' cabí nácali' queē' Cristo ni'a que dxin bena' neda' uláz queē' Xanru'?

² Nadxi ca' téquiguequi ia'zíca'rō bōnachi bití' naca' gubáz nasōl-lē'ē Cristo. Libí'ili' run bayudxi guéquili' naca' gubáz queē' Cristo. Tu' nácali' queē' Xanru', le naca cázali' naca bē' naca' gubáz nasōl-lē'ē Xanru'.

³⁻⁴ Nacuá' nupa ta'zí' quidza' neda'. Caní rubi'a didza', rea' légaquiē': Dē lu na'a inaba' le guí'aj gahua' tu' runa' dxin ni.

⁵ Lē'sca' caní dē lu na'a utsaga ná'alena'-bi' tubi' bi'i nigula zanru' réajlē'ēbi' Cristo para gunbi' neda' tsōzōn ga ridá', ca na' tunē' ia'zíca'rē' gubáz nasōl-lē'ē Cristo, en yugu' bōnni' bōchē'ē Xanru', enca' Pedro.

⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzōlitu' le gágutu'?

⁷ ¿Nuzxi caz bōnni' rejē' gudil-la, ate' riguizxjē' la' cuinsē'? ¿Nuzxi caz bōnni' rudē'ē tu la' yēla que lubá uva, en bití' rahuē' le ribía lubá na'? ¿Nuzxi caz bōnni' rapa chi'ē-ba' bō'cu' zxila', en bití' re'jē' nidxi' quégacaba'?

⁸ Bití' guéquili' la' néda'sō ruá'a caní didza'. Lē'sca' caní rna le nazúaj lu guichi lu xibá queē' Moisés.

⁹ Lu xibá queē' Moisés nazúaj lu guichi le rna: Bití' cu'u du rúa'aba' bēdxi cate' rulíbiba' zxoa' xtila. Bē'ē Dios didza' ni, calégasō tu' ruí'i lādxē'ē-ba' bēdxi,

¹⁰ pero para uzí'iru' ca' xibé rē'u. Que lē ni na' nazúaj lu guichi didza' na', ate' bōnni' na' rugá'anē'-ba' bēdxi, enca' bōnni' na' runē' ga tu'líbiba' bēdxi zxoa' xtila, iropē' na' ral-la' ilunē' löza ila'zi'ē que le rulá' luyú na'.

¹¹ Na'a, channō bentu' dxin ga zóali', le naca ca dxin guz gú'una, lē na' naca queē' Dios Bō' Lá'ayi, ¿naru' réquitseli' bití' ral-la' uzí'itu' xibé tu le do' dē queēli' ca na' ruzi'ē xibé bōnni' guz gú'una le rulapē'?

¹² Ia'zíca'rō bōnachi tu'zéajni'inē' libí'ili' tu'zi'ē xibé le dē queēli'. ¿Naru' cabí rála'tērō uzí'itu' xibé netu' le dē queēli'?

Catu caz buzi'tu' xibé lē ni dē lu na'tu', pero biá' gulentu' yúgu'tē para gaca guntu' libán que didza' dxi'a ca naca queē' Cristo.

¹³ Nōz quézili' ca raza quégaca nupa tun dxin que yudo', tu'zí' xibé gun que yudo'. Lē'sca' caní nupa ta'gú'u rōn quégacaba' bōa' bēdxi lu bucugu lá'ayi queē' Dios, tahuē' bēla' quégacaba' bōa' bēdxi na'.

14 Lësca' caní nuzóë' Xanru' ca ral-la' gaca quégaquië' bönni' tunë' libán que didza' dxi'a. Nupa tu'zi' xibé libán na' tunë' ral-la' ulu'gagu légaquië'.

15 Neda' catu caz buzi'a xibé lë ni dë lu na'a, ate' lë ni ruzúaja' lu guichi ni biti' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxi'a. Guë'ënitëra' gátia' ca gu'a lataj nu innë runa' libán na' tu' nazxja'.

16 Biti' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a.

17 La'tu' runa' libán tu' ré'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'.

18 ¿Bizxi lazxja' uzi'tsa' xibé channö? Ruzi'a xibé le raza ládxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

19 Na'a, sal-la' cuntu nu yu'a lu në'e, chibén cuina' ca tu bönni' nadó'o quégaca yúgu'të bönachi para gaca guna' ga ulu'lágaca ziánrö ca' bönachi.

20 Cate' runa' libán lógaca bönachi judío, run cuina' ca tu bönni' judío para gaca guna' ga ulu'lágaca bönachi judío na'. Bönachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'.

21 Cate' runa' libán lógaca bönachi izá'a, nupa biti' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lë'. Biti' rucá'ana' cá'asö xibá queë' Dios. Neda' runa' ca rinná bë' xibá queë' Cristo.

22 Run cuina' ca tu bönni' biti' naca idú ca réajlë'ë Cristo para gaca guna' ga ulu'lágaca nupa na' biti' naca idú ca ta'yéajlë' Lë'. Run cuina' ca nácagaca yúgu'të bönachi para gaca guna' ga ulu'lágaca bal-la bönachi na'.

23 Lu yúgu'të lë ni runa', runa' ga ta'yöni bönachi didza' dxi'a, para gaca uzi'a xibé tsözxön len libí'ili' didza' dxi'a na'.

24 Chinöz quézili' ca tunë' bönni' nútsa'gaquië' lu huitaj. Ta'xíti'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nútsa'gaquië' lu huitaj, para idéli'li' uzi'ili' xibé le ubi'ë Dios queëli'.

25 Yúgu'të bönni', cate' tu'pá'a cuíngaquië' para gaca ila'yázië' lu huitaj, ta'nná be'e cuíngaquië' lu yúgu'të le tunë'. Tunë' caní para ila'déli'në' tu bregui' zin le inítitë, pero idéli'ru' rë'u tu le uzí'tica'siru' xibé.

²⁶ Que lë ni na', naca' neda' ca tu bönni' idú láchxë'ë rixítí'ë. Naca' ca' ca tu bönni', idú láchxë'ë ridil-lë'. Biti' rucudxa' lu bö'ös.

²⁷ Ca runë' bönni' na' rulidzë' bönachi para tsöjtsázagaca lu huitaj, runa' ca' neda', runa' libán para ulu'lágaca bönachi. Bönni' na' nútsë'ë lu huitaj runë' ga gaca tsutsu idütë le naca cazë', en rinná bé'enë' le. Lësca' caní runa' neda', para cabí unítia' xilatja' lu dxin queë' Dios.

10

Biti' ral-la' tseaj láchxi'ru' budó' guiöj budó' yaga

¹ Rë'ënda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u zzul-la tu böaj yúgu'të'. Lësca' caní, gula'dödë' yúgu'të' gatsaj láchui'lö nísado'.

² Lu böaj ni', en lu nísado' ni', guca quégaquië' ca raca que nu ridila nisa. Lë na' guca quégaquië' guca bë' guláquië' tuz len Moisés.

³ Lësca' caní, gulahuë' yúgu'të' yöta xtildo' na' bunödzjë' Dios Bö' Lá'ayi quégaquië'.

⁴ Gulé'ajë' yúgu'të' nisa na' bunödzjë' Dios Bö' Lá'ayi quégaquië', tu' gulé'ajë' nisa birúaj lë'e guiöj na' bulu'e lahui Dios Bö' Lá'ayi, guiöj na' gula'báininë' légaquië'. Ca guca guiöj na' naca cazë' Cristo, nabániru' Lë'.

⁵ Sal-la' guca caní, bití' guyaza láchxë'ë Dios yúgu'të'. Que lë ni na' gulátíë' lu lataj cá'asö.

⁶ Yúgu'të lë ni naca tu le ruzéajni'i rë'u, para cabí së láchxi'ru' le ruá' dö', ca na' gula'zë láchxi'gaquië' légaquië'.

⁷ Biti' ral-la' tseaj láchxi'ru' budó' guiöj budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulë'aj gulahuë', ate' gula'yasë', en gulunë' laní que budó' na'."

⁸ Biti' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátíë' idú ca tsonna-uruá' milë'.

⁹ Biti' ral-la' si' bë'ëru' Xanru', ca na' gula'zí' bë'ë Lë' bal-lë' légaquië', ate' gulátíë' tu' guláguya'aba' bëla sínia' légaquië'.

¹⁰ Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítíë' légaquië'.

¹¹ Yúgu'të lë ni le gulaca quégaquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödzölió ni.

¹² Que lë ni na', nu réqui chinal-la, ral-la' gun chi'i cuini, para cabí ichixi inigui.

¹³ Ca naca le ta'zí' bë' libí'ili' raca ca' quéguequi yúgu'të bönachi. Dios runë' ca rnnë', en bití' gu'ë lataj bi si' bë' libí'ili' le

cabí gaca guá' ilenli', pero cate' bi si' bē' libí'ili', uluí'inē' libí'ili' naca gaca irúajli' lu na' tu' xihui', para gaca guá' ilenli'.

14 Que lē ni na', böchi' luzá'ado', biti' tseaj ládxi'li' budó' guióǵ budó' yaga.

15 Ruí'ilena' libí'ili' didza' ca ruí'ilena' didza' nupa ta'yéajni'. Buli'chi'a buli'söró didza' ni gu'a.

16 Cate' inábiru'-nē' Dios gun lá'ayē' le rē'ajru' cate' rusubanru' ca gútiē' Cristo, lē na' rē'ajru' ruluí'i nácaru' tuz len Cristo, en ruzí'iru' xibé le benē' Cristo cate' bulaljē' xichönē' cate' gútiē' lē'e yaga cruz. Lē'sca' caní, yöta xtila na' ruzxúzjaru', en ráguru', ruluí'i dzágaru'-nē' Cristo, en ruzí'iru' xibé le benē' Cristo cate' budödē' idútē le naca cazē' uláz queēru'.

17 Sal-la' zianru' nácaru', yúgu'tēru' ráguru' tuz yöta xtila na', en que lē ni na' nácaru' ca tuz bönachi.

18 Buli'yútsöca' ca tunē' bönni' Israel. Bönni' ni' tahuē' lahuē' Dios le ta'gu'ē lu bucugu lá'ayi queē', lē na' tahuē' ruluí'i dzágagaquiē' Dios.

19 ¿Bizxi rnna didza' ni ruá'a? Biti' rnniá' napa budó' guióǵ budó' yaga yöl-la' huáca, en le ta'gú'u bönachi lógaca budó' guióǵ budó' yaga na' biti' napa yöl-la' huáca.

20 Caní rnniá': Lē na' ta'gú'u bönachi biti' núnbē'gaquiē' Dios lógaca budó' guióǵ budó' yaga, ta'gú'u lógaca bö' xihui', en calēga lahuē' Dios. Rē'ēnda' biti' idzágalí' yugu' bö' xihui'.

21 Biti' gaca guí'jali' le ruluí'i nácaru' tuz len Xanru', enca' lē na' uluí'i nácali' tuz len yugu' bö' xihui'. Biti' gaca gáguli' le ruluí'i dzágaru'-nē' Xanru', enca' le uluí'i dzágalí' yugu' bö' xihui'.

22 ¿Naru' gúntsaru' ga uzxé'enē' Xanru'? ¿Naru' réquitseli' nápatēröli' yöl-la' huáca ca napē' Lē'?

Le dē lu ná'aru' gunru', en ca ral-la' idxí'igacru'-nē' böchi' luzá'aru'

23 Naca idútē li didza' na' rnna: "Yúgu'tē dē lu ná'aru' gunru'." Na'a, neda' rnniá': Calēga yúgu'tē ral-la' gunru'. Yúgu'tē dē lu ná'aru' gunru', pero calēga yúgu'tē gun ga gácarö idú ca réajlē'ēru' Cristo.

24 Ral-la' güi'ládxi'ru' gunru' le gun ga gaca dxi'a quégaquiē' böchi' luzá'aru', en calēgasö le gun ga gaca dxi'a que la' cuínsiru'.

25 Bítí'tēs bi tuti' bönachi lu yē'ēyi, huáca gáguli', en biti' bi ral-la' inábali' que, para cabí cuéqui böniga ládxi'do'oli'.

26 Nazúaj lu guichi le rnna: "Queē' Xanru' nequi yödzölió ni, enca' yúgu'tē le dē yödzölió ni."

27 Channö ulidzë' tu bönni' biti' réajlë'ë Dios libí'ili' para guídali' lidxë', ate' guë'ënili' tséajli', guli'gagu yúgu'të le cu'ë loli', en biti' bi inábali' que, para cabí cuéqui böniga ládxi'do'oli'.

28 Channö núti'tës nu guíë libí'ili': "Lë ni gula'gu'ë lo budó' guiøj budó' yaga", biti' gáguli' lë na' para gaca dxi'a que nu na' gudíxjöi'i caní libí'ili', en para cabí cuéqui böniga ládxi'da'ahuë'.

29 Rnniá': Para cabí cuéqui böniga ládxi'da'ahuë' bönni' na' gudíxjöi'inë' caní libí'ili', en calëga para cabí cuéqui böniga ládxi'do'oli' libí'i cázali'.

Nadxi ca' nu inábini neda', inná: "¿Bizx que ral-la' uzóa' tsólá'alö le dë lu na'a guna' tu' ribequi böniga ládxi'da'ahuë' bönni' yúbölö?"

30 Huáca inná ca' nu na': "Channö guía'-në' Dios: Xclenu', ni'a que lë na' rahua', ¿bizx que nu uzegui neda' didza' ni'a que lë na' rahua?"

31 Channö bi gáguli' o bi guí'jali', o bíti'tës bi gunli', guli'gún yúgu'të para gaca queë' Dios yöl-la' ba.

32 Biti' bi gunli' le gun ga ila'chixi ila'nigui bönachi judío, en biti' gunli' le gun ga ila'chixi ila'nigui bönachi biti' nácagaca judío, en biti' gunli' le gun ga ila'chixi ila'nigui bönachi queë' Dios.

33 Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en biti' ruí'i ládxa'a guna' le uzi'a xibé la' neda'sö, pero le ulu'zí' xibé ia'zica'rö bönachi para ulu'lágaca.

11

1 Guli'gún ca runa' neda', ca na' neda' ca' runa' ca benë' Cristo.

Le tunnu nigula lógaca bönachi queë' Cristo

2 Runa' libí'ili' zxön, böchi' luzá'ado', tu' röjnética'sili' neda', en nazi' lu ná'ali' xibá budöda' lu ná'ali'.

3 Na'a, ré'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxí'inë', Bönni' na' náquië' Cristo.

4 Channö tu bönni' rulidzë' Dios, o ru'ë didza' uláz queë' Dios, en dxía ícjë' xilu'ë, rucá'anë' Cristo cá'asö.

5 Na'a, channö tu nigula rulídzanu Dios, o ruí'ínu didza' uláz queë' Dios, en biti' bi zxoa ícjanu, rucá'ananu bönni' queënu cá'asö, en naca queënu ca naca queënu tu nigula narugu guitsa' ícjanu.

6 Channö tu nigula cabí bi zxoa ícjanu, ral-la' irugu ca' guitsa' ícjanu. Channö gun ga utuí'ínu nigula na' channö nu chugu guitsa' ícjanu, ral-la' bi ixóa ícjanu.

⁷ Tu bönni' biti' bi ral-la' udxía icjě' cate' ridxině' lahuě' Dios, tu' náquiě' ca naca cazě' Dios, ate' lě na' náquiě' bönni' ruluí'i lahui yöl-la' zxön queě' Dios, pero le nácanu nigula na' ruluí'i lahui yöl-la' zxön queě' bönni' queěnu.

⁸ Cate' beně' Dios bönachi, biti' bubéajě' bönni' na' lu nigula. Nigula na', lu bönni' na' bubéajě'-nu.

⁹ Lěsca' caní, biti' beně' Dios bönni' para uzí'inu xibě' nigula, pero beně' nigula para uzi'ě xibánu bönni'.

¹⁰ Que lě ni na', nigula na' ral-la' ixóa ícjanu le ruluí'i zoa nu rinná be'e lěnu tu' tu'yúě' gubáz lá'ayi queě' Dios rě'u.

¹¹ Na'a, lahuě' Xanru', tu bönni' riquinně'-nu nigula queě', ate' nigula na' riquíninu-ně' bönni' queěnu.

¹² Ca na' beně' Dios, bubéajě'-nu nigula lu bönni', lěsca' caní na'a, yúgu'tě bönni' nájlengaquiě'-nu nigula, ate' yúgu'tě rirúaj lu ně'ě Dios.

¹³ Buli'chi'a buli'söró la' libí'isili'. ¿Naru' ral-la' ulídzanu-ně' Dios tu nigula biti' bi zxa ícjanu?

¹⁴ ¿Naru' cabí rusědi libí'ili' yöl-la' nácatě quégaca bönachi, ral-la' utuí'ině' bönni' na' ru'ě lataj itunna guitsa' icjě'?

¹⁵ Na'a, channö natúnna guitsa' ícjanu tu nigula, naca yöl-la' lachi queěnu, tu' bě'ě Dios queěnu guitsa' ícjanu para usubín ícjanu.

¹⁶ Channö zoa nu guě'ěni tá'baga' didza' ni, canísö nazí' lu na'tu' runtu', en lěbisö tun yugu' cö' bönachi queě' Dios.

Bönachi Corinto tu' cá'ana cá'asö le rě'aj ráguru' para usubanru' ca gútiě' Xanru'

¹⁷ Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raca dxi'a queéli' cate' rudúbili' queě' Cristo, pero run ga raca queéli' le cabí naca dxi'a.

¹⁸ Risí lahua' ruzéajni'ida' libí'ili' lě ni ta'guíxjöi'i bönachi neda', ta'nná: "Cate' rudúbili' queě' Cristo, narúajli' choplö", ate' réajlě'a nadxi ca' naca caní.

¹⁹ Run bayudxi ila'cuá'alén libí'ili' nupa tu'sedi le cabí nácatě para ilaca bě' nupa nácacaca idú bönachi queě' Cristo.

²⁰ Que lě ni na', cate' rudúbili', lě na' ráguli' tsözxön biti' naca le rě'aj ráguru' para usubanru' ca gútiě' Xanru'.

²¹ Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxön, ate' que lě ni na' ridunli' bál-lali', ate' ia'bál-lali' rě'aj ráguli' ga ridxintě rizúdxili'.

²² ¿Naru' cabí zoa lídxili' ga huáca gu'aj gáguli'? Ca na' runli', rucá'anali' bönachi queě' Dios cá'asö, en runli' ga tu'tuí'i nupa biti' bi dě quéguequí. ¿Bizxi caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lě ni runli'.

Le rě'aj ráguru' para usubanru' ca gútiě' Xanru'

²³ Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquie' bönni' gulútië' Lë'. Gudélë'ë yöta xtila,

²⁴ en cate' budxi gudxë' Dios: "Xclenu'", buzxuzxjë' le, en gunné': "Guli'gagu. Lë ni naca xipëla'a le nayuzxaj uláz queëli'. Guli'gún caní, para usubanli' ca gaca quia' neda'."

²⁵ Lësca' caní, gudödi gulahuë', gudélë'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'."

²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluí'ili' lahui ca gútië' Xanru'.

Ca ral-la' gunru' cate' guí'aj gáguru' para usubanru' ca gútië' Xanru'

²⁷ Que lë ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipëlë'ë Xanru', enca' xichönë' cá'asö.

²⁸ Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni.

²⁹ Núti'tës nu rë'aj ragu lë ni, en biti' run le bal tu' cabí réquibe'e ruluí'i le guca queë' Xanru', rusubaga' cuini dul-la' ni'a que lë na' rë'aj ragu.

³⁰ Que lë ni na' te'e zían nupa dzágagaca libí'ili', en ta'cuídi', ate' ziónguequi chinátigaca.

³¹ La'tu' uchi'a usöröru' la' cuínsiru', biti' uchi'a usöröë' Xanru' rë'u.

³² Channö gun bayudxi uchi'a usöröë' Xanru' rë'u, usaca' zi'ë rë'u, para cabí irugu queëru' cate' ichúguië' quéguequi bönachi yödzölió ilátigaca.

³³ Que lë ni na', böchi' luzá'ado', cate' udúbili' para guí'aj gáguli' para usubanli' ca gútië' Xanru', guli'cöza luzá'ali'.

³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

12

Yugu' yöl-la' huáca runnë' queëru' Dios Bö' Lá'ayi

¹ Na'a, böchi' luzá'ado', rë'ënda' tséajni'ili' ca zeaj naca yöl-la' huáca runnë' queëru' Dios Bö' Lá'ayi.

² Nöz quézili' ca guca cate' ni' biti' réajlë'ënili' Cristo, bë'ëli' lataj gula'chë' bönachi libí'ili' ga yúbölö. Guyéaj ládxi'li' budó' guió'j budó' yaga, le cabí ta'nnë.

³ Que lë ni na', ruzéajni'ida' libí'ili' caní, rnnía': Ladaj yúgu'të nupa tu'í didza' uláz queë' Bõ' Lá'ayi queë' Dios, cuntú nu gaca innë xihui' queë' Jesús, en nitúë' gaca innë: "Jesús náquië' Xanru'", channö cabí zóalenë' Dios Bõ' Lá'ayi nu na'.

⁴ Na'a, nadzá'gaca tu tu le runnë' Dios Bõ' Lá'ayi queëru', pero tuzë' náquië' Bõ' Lá'ayi na'.

⁵ Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'.

⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queëru' para gunru' xichinë'.

⁷ Dios runnë' que queëru' tu le naca bë' náparu' yöl-la' huáca queë' Dios Bõ' Lá'ayi, lë na' ruzí'iru' xibë yúgu'tëru'.

⁸ Dios Bõ' Lá'ayi runödzejë' queë' tu bönni' yöl-la' huáca ru'ë didza' len yöl-la' rácada', ate' ia'túë' bönni', Lë cazë' Bõ' Lá'ayi runödzejë' queë' yöl-la' huáca ru'ë didza' lu yöl-la' réajni'i.

⁹ Lësca' caní, Lë cazë' Dios Bõ' Lá'ayi na' runödzejë' queë' ia'túë' bönni' yöl-la' réajlë' Cristo bi gunë', ate' ia'túë' bönni' runödzejë' queë' yöl-la' huáca ruúnë' nupa te'e.

¹⁰ Ia'túë' bönni' runödzejë' queë' yöl-la' huáca runë' yugu' yöl-la' huáca que yehua' yubá, ate' ia'túë' bönni' ru'ë lë' lataj ru'ë didza' uláz queë' Dios, ate' ia'túë' bönni' runödzejë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzejë' queë' ia'túë' bönni' yöl-la' huáca ru'ë didza' yúbölö le cabí nazëdë', ate' queë' ia'túë' bönni' yöl-la' huáca rudödë' didza' yúbölö na' biti' nazëdë'.

¹¹ Yúgu'të lë ni runë' Lë cazë' Dios Bõ' Lá'ayi, tu' runödzejë' que tu tu bönachi tsca rë'ëni quézinë'.

Yúgu'tëru' nácaru' ca tuz bönachi

¹² Ca na' naca tuz iduté le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácagaca tuz iduté le naca cázaru', lësca' caní naca queë' Cristo.

¹³ Tu' zóalenë' Lë cazë' Dios Bõ' Lá'ayi rë'u, lë ni naca queëru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zi'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj sí'iru' le runödzejë' cazë' Bõ' Lá'ayi.

¹⁴ Na'a, lu iduté le naca cázaru', zían le nagudi' dzágalenru', en calëga tuz.

15 La'tu' huáca gü'i didza' ní'aru', huanná: "Tu' cabí naca' nē'ë bönni', biti' néquida' queë'", didza' ni biti' gun ga biti' nequi queë' bönni' na'.

16 La'tu' huáca gü'i didza' nágaru', huanná: "Tu' cabí naca' guiøj lahuë', biti' néquida' queë' bönni' ni", didza' ni biti' gun ga biti' nequi queë' bönni' na'.

17 La'tu' naca guiøj loru' idútë le naca cázaru', ¿nacxi gaca yöniru'? La'tu' naca nágaru' idútë, ¿nacxi gaca ilé'e zXína'ru'?

18 Na'a, Dios nucu'ë yúgu'të le nagudi' dzágalenru' ca gú'uni quézinë' Lë'.

19 La'tu' naca tuz le nagudi' dzágalenru', bíti'rö soa idú ca naca cázaru'.

20 Na'a, ca nácaru', zían le nagudi' dzágalenru', pero tuz le nácaru'.

21 Que lë ni na', guiøj loru' biti' gaca guië ná'aru', inná: "Biti' riquinda' li'." Lësca' caní, ícjaru' biti' gaca guië ní'aru', inná: "Biti' riquinda' libí'ili'."

22 Na'a, yugu' le nagudi' dzágalenru', lë na' réquiru' nácacagarö cuídí'sö, lë ni naquíniröru'.

23 Lësca' caní, yugu' le nagudi' dzágalenru', le réquiru' nácacagarö cá'asö, lë ni rugácuröru' dxi'a, en yugu' le réquiru' biti' ral-la' ilá' lahui, rugácuröru' ca' dxi'a.

24 Biti' run bayudxi gunru' caní que le nácarö lachi que le néquiniru'. Dios benë' idútë le naca cázaru', en benë' ga nácarö lesaca' lë na' réquiru' rë'u nácarö cá'asö.

25 Caní benë', ate' biti' narúajgaca choplö le nagudi' dzágalenru', tu' tun chi'i luzë'eguequi tu ia'tú.

26 Channö gaca zi' tu le néquiniru', ilaca zi' tsözxön len le yúgu'të le néquiniru' na', en channö tu le néquiniru' zoa bi ruzí' xibé, yúgu'të le nagudi' dzágalenru' tu'zí xibé tsözxön le.

27 Na'a, libí'i cázali' dzágali' idútë le naca cazë' Cristo, ate' tu tuli' nácali' ca yugu' le nagudi' dzágalenë'.

28 Lësca' caní, ladaj bönachi queë' Cristo, Dios nucu'ë nupa tun xichinë'.

Ga naca lo nucu'ë yugu' bönni' gubáz queë' Cristo.

Ga naca buropi nucu'ë yugu' bönni' tu'ë didza' uláz queë'.

Ga bunny nucu'ë yugu' bönni' tu'sédinë' luzá'aru'.

Ní'irö nucu'ë nupa tun yugu' yöl-la' huáca que yehua' yubá.

Ní'irö nucu'ë nupa tu'ún nupa te'e.

Ní'irö nucu'ë nupa tácalen böchi' luzá'aru'.

Ní'irö nucu'ë yugu' bönni' tu'luí'inë' rë'u dxin gunru'.

Ní'irö nucu'ë yugu' bönni' tu'ë didza' yúbölö biti' nazédagaquië'.

29 Calëga yúgu'të' nácaqaquië' gubáz queë' Cristo.

Calëga yúgu'të' tu'ë didza' uláz queë' Dios.

Calëga yúgu'të' tu'sédinë' luzá'aru'.

Calëga yúgu'të' tunë' yugu' yöl-la' huáca que yehua' yubá.

³⁰ Calëga yúgu'të' dë lu ná'agaquië' ulu'únë' nupa te'e.

Calëga yúgu'të' tu'ë didza' yúbölö biti' nazëdagaquië'.

Calëga yúgu'të' tu'dödë' didza' yúbölö biti' nazëdagaquië'.

³¹ Guli'güi' ládxi'li' cu'ë Dios lu ná'ali' yugu' yöl-la' huáca na' náçagacarö lesaca'. Na'a, uluí'ida' libí'ili' tu le nácarö lesaca' ca yúgu'të' lë ni.

13

Yöl-la' nadxí'i

¹ Sal-la' gaca gu'a xtídza'gaca bönachi le cabí nazëda', enca' xtídza'gaquië' gubáz lá'ayi queë' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucödxiru' o guië rutil-laru' luzë'e.

² Sal-la' nazi' lu na'a gu'a didza' uláz queë' Dios en tséajni'ida' yúgu'të' le nagachi', en yúgu'të' didza' réajni'i, en sal-la' naca idú ca réajlë'a Dios ga ridxintë huáca cúa' yugu' gu'a, pero channö cabí nadxí'ida' luzá'a, biti' bi nazáca'a.

³ Sal-la' quísia' idútë' le dë quia' para ugahua' yugu' bönachi yechi', en sal-la' udöda' idútë' le naca' ga ulu'zegui bönachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lë na' runa'.

⁴ Nu bönni' nadxí'inë' luzë'ë, ribözë' zxön ladxi'.

Náquië' dxi'i ladxi', en biti' ruzxë'enë' luzë'ë.

Nadxí'inë' luzë'ë idú ládxe'ë.

Biti' run ba zxön cuinë', en biti' run cuinë' lo.

⁵ Biti' runë' le ruá' dö'.

Biti' rudúli'në' le dë queë'.

Biti' rilëtenë', en biti' röjnenë' dö' gulu'i bönachi queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë' li.

⁷ Ruá' rilenë' bíti'tës bi gun luzë'ë queë'.

Réajlë'tica'së' luzë'ë.

Rúntica'së' löza gun luzë'ë le naca dxi'a.

Ribözatica'së' zxön ladxi'.

⁸ Biti'rö tödi que yöl-la' nadxí'i. Huadödi que le dë lu ná'agaca bönachi iluí' didza' uláz queë' Dios. Huadxín dza cate' bíti'rö gata' lu ná'agaca bönachi iluí' didza' yúbölö le cabí nazëdagaca, ate' huadödi que yöl-la' réajni'i quéguequi bönachi.

⁹ Láti'do'os réajni'iru' na'a, en láti'do'os ca' ruí'iru' didza' uláz queë' Dios.

¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'.

¹² Na'a le rilé'eru' naca ca le rilé'eru' cate' ruyú cuinru' tu lu guíë dxíldo'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'.

¹³ Na'a, nacuá'tica'sö yöl-la' réajlë' queëru' Dios, en yöl-la' run löza queëru' Dios, en yöl-la' nadxí'i queëru' luzá'aru'. Nacuá' yonna ni, pero le naca lo naca yöl-la' nadxí'i.

14

Yugu' yöl-la' huáca runnë' queëru' Dios Bö' Lá'ayi

¹ Guli'gún bayudxi idxí'ili' luzá'ali', en guli'gü' ládxi'li' sí'ili' ca' yugu' yöl-la' huáca runnë' queëru' Dios Bö' Lá'ayi, en le naca lo, yöl-la' huáca gü'ili' didza' uláz queë' Dios.

² Nu ruí'i didza' yúbölö le cabí nazëda, calëga bönachi ruí'ilen didza' nu na'. Dios caz ruí'ilen didza' nu na', tu' cunttu nu zoa réajni'i didza' ruí'i nu na'. Dios Bö' Lá'ayi ru'ë nu na' lataj ruí'i didza' ca náca gaca le nagachi' queë' Dios.

³ Nu na' ruí'i didza' uláz queë' Dios, ruí'ilen bönachi didza' para gácarö idú ca ta'yéajlë' Cristo. Rutipa ládxi'guequi, en ruhuë tsahui' léguequi.

⁴ Nu na' ruí'i didza' yúbölö le cabí nazëda run tsutsu la' cuinsi, pero nu ruí'i didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a gü'ili' didza' yúbölö le cabí nazëdali' yúgu'tëli', pero le naca lo, rë'ënda' gü'ili' didza' uláz queë' Dios. Ruzí'iröru' xibé nu ruí'i didza' uláz queë' Dios ca ruzí'iru' xibé nu ruí'i didza' yúbölö le cabí nazëda, channö cabí zoa nu udödi didza' yúbölö na' le cabí nazëda, para ilaca tsutsu bönachi queë' Cristo.

⁶ Que lë ni na', böchi' luzá'ado', cate' guída' ga zóali', channö gü'ilena' libí'ili' didza' yúbölö le cabí nazëda', bití' bi uzí'ili' xibé. Uzi'isili' xibé didza' na' gü'ilena' libí'ili' le nuluí'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lëscá' caní raca que le ta'gú'u bö, yugu' le cabí nabángaca, ca naca gui rucödxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'?

⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá' cuini para tseaj lu gudil-la na'?

⁹ Lëscá' caní raca queëli'. Channö len lúdxí'li' gü'ili' didza' le cabí taca bönachi, bití' ca' ila'yéajni'i didza' gü'ili'. Caní gaca, nítisö gü'ili' didza'.

10 Le nácatë nacuá' zían didza' yúbölö tuí'i zían cö' bönachi izá'a lu yödzölió ni, ate' nacuá' bönachi ta'yéajni'i tu tu didza' na'.

11 Na'a, channö cabí réajni'ida' didza' ru'ë tu bönni', gaca' ca tu bönni' zi'tu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zi'tu'.

12 Lësca' caní naca queëli'. Ruí'ida' ládxi'li' sí'ili' yugu' le runnë' queëru' Dios Bö' Lá'ayi. Que lë ni na', guli'güí' ládxi'li' sí'ili' le ilún ga ilácarö tsutsu bönachi queë' Cristo.

13 Que lë ni na' ca', nu ruí'ida' didza' yúbölö le cabí nazëda ralla' ulidza Dios, en inabi Lë' gunnë' que yöl-la' huáca quixjö' le rë'ëni inná didza' na' ruí'ida' nu na'.

14 Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a.

15 ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba.

16 Channö lu bö' naca cazu' rulidza lá'ayu'-në' Dios, ate' zoa ni' nu riyönisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?"

17 Nadxi ca' dxí'ado' ru'u didza', rë'u-në' Dios: "Xclenu'." Channö cabí réajni'i didza' ru'u, bití' bi uzí' xibé nu na' riyöni.

18 Rea'-në' Dios: "Xclenu'", tu' ruí'ira' didza' yúbölö le cabí nazëda' ca yúgu'tëli'.

19 Lógaca bönachi queë' Dios guë'ënitëröda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntú nu gaca tséajni'i. Gaca usédida' ia'zica'rö bönachi tuzi channö ila'yéajni'i didza' gu'a.

20 Böchi' luzá'ado', bití' gácali' ca bí'ido' ca naca le rizá ládxi'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá ládxi'li'.

21 Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a gü'ílëna' bönachi ni didza'. Sal-la' guna' caní, bití' ulu'zë nágagaca xtí'dza'a." ¡Caní rnnë' Xanru'!

22 Caní naca, Dios ru'ë rë'u lataj ru'iru' didza' yúbölö le cabí nazëdaru' para gaca tu le naca bë' lógaca bönachi bití' ta'yéajlë', en calëga lógaca nupa ta'yéajlë' Cristo. Ru'ë rë'u lataj ru'iru' didza' uláz queë' Lë' le ulu'zí' xibé nupa ta'yéajlë' Cristo, en calëga bönachi na' bití' ta'yéajlë'.

23 Que lë ni na', cate' udúbili' tsözxön, yúgu'tëli' na' néquili' queë' Cristo, channö gü'íli' didza' yúbölö le cabí nazëdali' yúgu'tëli', ate' tsázagaca nupa nazëdagaca láti'do'os, o nupa bití' ta'yéajlë' Cristo, ¿naru' cabí ila'nná: "Nachixi ícjali"?"

24 Na'a, channö yúgu'téli' güi'ili' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquiube'e nu na' nabaga' xíguia', ate' Dios uchi'a usöröë' lë'. Caní guéquiube'e nu na', tu' tseajni'i didza' güi'ili' yúgu'téli'.

25 Guéquiube'e ca naca le rizá' ladxi' nu na', lë na' bigachi', ate' uzóa zxibi nu na', en tseaj ladxi' Dios, ate' inná: "Le nácatë Dios zóalenë' libí'ili'."

Ca ral-la' gunru' ga rudúbiru' queë' Cristo

26 Que lë ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguië' libí'ili' tu salmo, ate' rusédinë' ia'túë' tu xibá, ate' ia'túë' riguixjoi'inë' libí'ili' tu le buluf'inë' Dios lë', ate' ia'túë' ru'ë didza' yúbölö le cabí nazëdë', ate' ia'túë' rudödë' didza' yúbölö na' le cabí nazëdë'. Yúgu'të le gunli' ral-la' gaca le ulu'zí' xibé nupa tu'dubi queë' Cristo.

27 Cate' nacuá' ni' nupa tu'í didza' yúbölö le cabí nazëdagaca, biti' ral-la' güi'ili' didza' caní zianrö ca chopa tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'túë', pero run bayudxi soa nu udödi didza' yúbölö na' le biti' nazëdali'.

28 Channö cuntú nu zoa nu gaca udödi didza' yúbölö na' le cabí nazëdali', nu na' ru'í didza' yúbölö le cabí nazëda ral-la' soa dxisö ga na' nudúbili', ate' huáca güi'ilen Dios didza' na' lu icja ládxi'da'ahui.

29 Lëscá caní, yugu' bönni' tu'ë didza' uláz queë' Dios ral-la' ilu'ë didza' chopa tsónnasë', ate' ia'zica'rë' bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'.

30 Channö Dios ulu'inë' tu bönni' rö'ë ni' le rë'ëni inná xtídzë'ë, ral-la' soa dxisö nu na' ru'í didza'.

31 Yúgu'téli' huáca güi'ili' didza' uláz queë' Dios tu tuli' para izëdali' yúgu'téli', en idipa ládxi'li' ca' yúgu'téli'.

32 Yugu' bönni' tu'ë didza' uláz queë' Dios huáca ila'nná be'e cúngaquië', en ila'cu'ë dxisö.

33 Calëga Dios nu run ga rutsátsaru', tu' rë'ënë' Lë' gácaru' ba'a ladxi', ca na' runë' ga nacuá' yúgu'të cö' bönachi queë' Cristo.

34 Ral-la' ila'cuá'anú dxisö nigula queë'li' ga na' rudúbili'. Biti' dë lu ná'agacanu ilu'ínu didza' ni'. Ral-la' ila'cuá'anú nōxaj ca na' rinná bë' xibá queë' Dios.

35 Channö të'ëninu ila'yéajni'ínu ia'lati', ral-la' ila'nábinu bönni' que queëgacanu cate' ni' nacu'ë lídxigaquië'. Biti' ral-la' ilu'ínu didza' yugu' nigula ga na' rudúbiru' queë' Dios.

36 ¿Naru' réquitseli' bunödzejë' Dios xtídzë'ë lu ruá'ali' libí'isili'? ¿Naru' réquitseli' bidxín xtídzë'ë Dios queëzili' libí'ili'?

³⁷ Channö nu bönni' nútsë'ë ládjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queëli' lu guichi ni.

³⁸ Na'a, channö cabí ruí'i ládxe'ë didza' ni, biti' gü'i ládxi'li'-në' bönni' na'.

³⁹ Que lë ni na', böchi' luzá'ado', guli'güí' ládxi'li' gü'ili' didza' uláz queë' Dios, en biti' inná bé'eli' nu ruí'i didza' yúbölö le cabí nazëda.

⁴⁰ Ral-la' gunru' yúgu'të ca sa'yéaj, en lu yöl-la' ba'a ladxi'.

15

Bubanë' Cristo lu yöl-la' guti

¹ Na'a, böchi' luzá'ado', riguíxjöi'ida' libí'ili' ca naca didza' dxi'a na' bena' libán que ga zóali', lë na' guzxi' lu ná'ali', ate' run ga nácarö idú ca réajlë'ëli' Cristo.

² Ní'a que didza' ni uláli', channö gunli' ca rnna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

³ Ga gusí lo budöda' lu ná'ali' le budödë' Dios lu na'a neda'. Caní rnna: "Gútië' Cristo uláz queëru' tu' nabága'ru' dul-la'." Ca naca lë ni nazúaj lu guichi lá'ayi le rnna ben bayudxi benë'.

⁴ Rnna ca': "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rnna ben bayudxi guca queë'.

⁵ Gudödi ni' buluí'ihuë' Cristo, ate' bilé'enë' Pedro Lë', en gudödi ni' idxínmutë' gubáz queë' bila'lé'enë' Lë'.

⁶ Ní'irö buluí'ihuë' lógaquië' ziánrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxön. La'tu'biquí' yúgu'të' böchi'ru' ni nacu'ë nabángaquië' na'a, sal-la' bal-lë' chinátigaquië'.

⁷ Ní'irö Jacobo bilé'enë' Lë', en gudödi ni' buluí'ihuë' lógaquië' yúgu'të bönni' gubáz queë'.

⁸ Ga yöjsetë buluí'ihuë' ca' lahua' neda'. Ca guca lë ni, naca' ca tu bí'ido' gúljabi' cate' chigudödi dza ral-la' gáljabi'.

⁹ Caní naca, tu' nácara' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxia ládxa'a bönachi queë' Dios.

¹⁰ Na'a, tu' buzá' ládxe'ë quia' Dios naca' le naca' na'a, en calëga nítisö buzá' ládxe'ë quia'. Béntëra' neda' xichinë' ca ia'zica'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ladxi' queë', bugunë' neda' dxin.

¹¹ Na'a, channö bena' libán neda' o channö gulunë' libán ia'zica'rë' bönni', lë ni le runtu' libán que, en le guyéajlë'ëli' libí'ili'.

Ubanru' lu yöl-la' guti

12 Runtu' libán queë' Cristo ca na' bubanë' lu yöl-la' guti. Channö caní naca, ¿nacxi caz naca, rnnali' bál-lali': "Biti' ulu'bán nupa chinátigaca"?

13 La'tu' cabí ulu'bán nupa chinátigaca, biti' bubanë' Cristo,

14 en la'tu' cabí bubanë' Cristo, nítisö naca le bentu' libán que, en nítisö naca yöl-la' réajlë' queëli' Lë'.

15 Ia'stú, la'tu' cabí bubanë' Cristo, rizí' yë'ëtu' cate' runtu' ba nalí queë' Dios, rnnatu' busubanë' Cristo, ate' la'tu' cabí usubanë' nupa chinátigaca, Dios biti' busubanë' Cristo.

16 La'tu' cabí ulu'bán nupa chinátigaca, biti' bubanë' Cristo,

17 en la'tu' cabí bubanë' Cristo, nítisö naca yöl-la' réajlë' queëli' Lë', ate' nagá'anagaca dul-la' nabága'li'.

18 Lësca' caní, nupa na' chinátigaca, en gula'yéajlë' Cristo, tsaz gulati channö cabí bubanë' Lë'.

19 Channö tsánnisö ni zóaru' nabanru' huáca uzí'iru' xibë' Cristo, nácaröru' bayechi' ca yúgu'të bönachi.

20 Na'a, le nácatë bubanë' Cristo lu yöl-la' guti, en náquië' nu gusí lo bubán tsaz ladaj yúgu'të nupa ulu'bán tsaz lu yöl-la' guti.

21 Ca na' guyú'u yöl-la' guti ni'a que le benë' tuë' bönni', lësca' caní, ni'a que le benë' ia'tué' bönni' guyú'u yöl-la' rubán quégaca nupa chinátigaca.

22 Ca na' tati yúgu'të bönachi tu' náljlengaca Adán, lësca' caní ulu'bán yúgu'të nupa na' náljlengaca Cristo.

23 Tu tuë' ubanë' ca ral-la' gaca. Zí'alö bubanë' Cristo, ate' tödi ni ulu'bán nupa néquiquequi queë' Cristo cate' huödë'.

24 Ní'irö idxín dza údxi cate' ugúë' Cristo idútë le dë lu në'e, en idútë yöl-la' unná bë', en idútë yöl-la' huáca que tu' xihui', ate' udödë' yöl-la' unná bë' queë' lu në'e Dios Xuz.

25 Run bayudxi inná bë'ë Cristo ga idxinrö dza chibenë' Dios ga ulu'zechu zxíbigaca lahuë' Lë' yúgu'të nupa ta'dá'baga' Lë'.

26 Le ridá'baga' Lë' le usunítië' ga údxi naca yöl-la' guti.

27 Dios chinudödë' yúgu'të lu në'ë Zxí'inë' para inná bé'enë' le. Nazúaj lu guichi lá'ayi, rnna: "Budödë' yúgu'të lu në'ë para inná bé'enë' le." Na'a, naca bë' biti' budödi cuinë' lu në'ë Zxí'inë', tu' naca cazë' Lë' Nu rudödi yúgu'të lu në'ë Zxí'inë'.

28 Cate' idxín dza ni' chinudödë' Dios lu në'ë Cristo yúgu'të para inná bé'enë' le, ní'irö Lë' cazë' Zxí'inë' udödi cuinë' lu në'ë Dios, Nu na' budödi lu në'ë Zxí'inë' yúgu'të, ate' ga údxi, Dios inná bé'enë' tsaz yúgu'të.

29 Bál-lali' ridílali' nisa uláz quégaca nupa chinátigaca. Channö réquili' biti' ulu'bán nupa na' chinátigaca, ¿bizx que ridílali' nisa uláz quégaca nupa chinátigaca?

30 Zoa bönadxi queëtu' gátitu' yúgu'të dza. ¿Bizx que ruí'itu' lataj gaca caní channö cabí ubanru' lu yöl-la' guti?

31 Yúgu'të dza zoa bönadxi gátia'. Riguíxjöi'ida' libí'ili' lë ni, böchi' luzá'ado', tu' raza ládxa'a le bena'. Caní naca tu' bena' ga réajlë'ëli' Xanru' Jesucristo.

32 Channö tu' gú'unisida' gudíl-lalena' böa' guixi' sínia' lu yödzö Éfeso, ¿bizxi caz uzi'a xibé? Channö cabí ulu'bán nupa chinátigaca, ral-la' gunru' ca ta'nná bönachi: "Gui'aj gáguru' tu' huátiru' cuxö huidzaj."

33 Biti' gú'ili' lataj nu si' ye'e libí'ili'. Channö si' lu ná'ali' láti'do'os le cabí nácatë, idútëli' huöácali' chul-la niti.

34 Buli'bí'i ládxi'li', en biti' gunli' dul-la' tu' cabí núnbë'ëli'-në' Dios bál-lali' libí'ili'. Rnnía' caní para guna' ga utu'ili'.

Ca ilaca nupa ulu'bán lu yöl-la' guti

35 Nadxi ca' zoa nu inná: "¿Nacxi ulu'bán nupa chinátigaca? ¿Nacxi gaca idú ca nácatigaca cazë' cate' ulu'dxinë'?"

36 Li', bönni' bití' bi nözinë'. Lë na' rázu' luyú bití' ilén channö cabí initi.

37 Lë na' rázu' luyú naca tu xisédo'os, nadxi ca' que zxoá' xtila o que ia'tú guixi' cuando'. Lë na' rázu' bití' naca guixi' cuando' na' ral-la' ilén.

38 Dios runë' ga gaca guixi' cuando' ca nun cazë' que. Ca naca tu tu xisédo' na' runë' ga gaca guixi' cuando' que.

39 Lësca' caní, bití' naca lëbisö bëla' que queëgacaba' yúgu'tëba' böa' guixi'. Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguínmi, en ia'tú ca naca bëla' quégacaba' böla.

40 Lësca' caní nadzá' idú ca nácatigaca caz nupa nacué' yehua' yubá ca naca idú ca nácatigaca caz nupa nacué' luyú ni. Zoa tu yöl-la' lachi quégaca nupa nacué' yehua' yubá, en ia'tú ca naca yöl-la' lachi quégaca nupa nacué' luyú ni.

41 Zoa tu yöl-la' lachi que gubidza, en ia'tú que beo', en ia'tú quéguequi böläj lúzxiba. Yöl-la' lachi que tu böläj lúzxiba nadzá' ca naca yöl-la' lachi que ia'tú böläj lúzxiba.

42 Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz.

43 Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la.

44 Cate' rigachi' lu yeru ba naca tu bëla' que yödzölió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzölió ni, en ia'tú ca gaca le idzaga bö' naca cázaru'.

45 Nazúaj lu guichi lá'ayi le rnna: "Bönni' na' gusí lahuë' zoë' luyú ni, lë' Adán, Dios benë' lë' bönni' ban", pero Bönni'

na' guyázië' xilatjë' Adán, Lë' Cristo, Dios benë' ga náquië' Bö' nabániru'.

46 Biti' blë'ë zí'alö Bönni' na' náquië' Bö'. Bla' zí'alö nu na' naca bönáchisö, ate' ní'irö blë'ë Bönni' na' náquië' Bö'.

47 Bönni' ní' blë'ë zí'alö, gúquinë' yu. Bönni' na' blë'ë burópilö, Nu na' naca Xanru', birúajë' yehua' yubá.

48 Nupa nacuá' luyú ni nácgaca ca gúquië' bönni' na' gúquinë' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá.

49 Ca na' na'a dë queëru' tu bëla' le naca ca guca bëla' queë' bönni' na' gúquinë' yu, lësca' ral-la' huöéquiru' ca néquinë' Nu na' birúaj yehua' yubá.

50 Caní rë'ëni inná lë ni rea' libí'ili', böchi' luzá'ado', rnniá': Le néquini bëla', en rön bití' gaca tsaz ga ní' rinná bë'ë Dios, en lësca' caní, lë na' iníti bití' gaca idelí' lë na' soa tsaz.

51 Bulí'yútsöca', rea' libí'ili' tu le bigachí': Bití' gátiru' yúgu'tëru', pero Dios utsë'ë ca nácaru' yúgu'tëru'.

52 Tsárido'os gaca, tsca naca tu le rutásö guiöj loru', cate' cödxí lúzuba' böa' le röjsetë. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsë'ë le néquiniru' yúgu'tëru'.

53 Lë na' nácaru' le riniti ral-la' huöáca le soa tsaz, ate' le néquiniru', lë na' ral-la' gati, huöáca tu le catu caz gati.

54 Cate' lë na' riniti chinuhuöáca le soa tsaz, enca' lë na' ral-la' gati chinuhuöáca le catu caz gati, ní'irö idxín lë na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'në' Cristo.

55 Bítí'rö inná be'e yöl-la' guti rë'u.

Bítí'rö gaca yöl-la' guti bi gun queëru'.

56 Huáca bi gun yöl-la' guti queëru' tu' nabága'ru' dul-la', ate' nabága'ru' dul-la' tu' ridá'baga'ru' xibá queë' Dios.

57 ¡Xclenë' Dios! ¡Lë cazë' runë' ga nuláru' lu yöl-la' guti ni'a que le benë' Xanru' Jesucristo!

58 Que lë ni na', böchi' luzá'ado', guli'sóa tsutsu. Guli'gaca idú ládxi'li', gúntica'sili' xichinë' Xanru' tu' nöz quézili' bití' runlí' nítisö xichinë' Xanru'.

16

Yugu' bönachi Corinto tu'nödzej quégaquië' böchi'gaca ta'yádzjanë'

1 Na'a, ca naca que dumí na' unödzejali', le gácalen böchi'ru' ta'yéajlë'ë Cristo nacu'ë Jerusalén, guli'gún na'a ca na' gunná bé'eda' yugu' cö' bönachi queë' Cristo, nacuá' luyú Galacia.

² Yugu' dza domingo, tu tuli' ral-la' cú'uli' quez lati' dumí, tsca na' Dios runnë' queëli'. Guli'gún chi'i le, para cabí gun bayudxi bi utúbili' cate' idxina' ga zóali'.

³ Cate' ni' idxina' ga zóali', isól-la'a Jerusalén bönni' na' cöli' libí'ili'. Uzúaja' tu lu guichi le gun ga ilaca bé'gaquië', ate' ilu'ë dumí na' unödzejali'.

⁴ Channö ral-la' tseja' ca' neda', tsöjácalenë' neda'.

Le rë'ënë' gunë' Pablo

⁵ Guída' ga zóali' cate' údxi töda' yugu' yödzö luyú Macedonia, tu' run bayudxi töda' yugu' yödzö na'.

⁶ Réquida' ugá'analena' libí'ili' tu chi'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugu'uli' neda' nöza gáti'tës ga ral-la' tseja'.

⁷ Cate' guída' uduyúa' libí'ili' biti' rë'ënda' tödisa' ni'. Runa' löza sóalena' libí'ili' xidzé, channö gunnë' Xanru' neda' lataj.

⁸ Ugá'ana' ni lu yödzö Éfeso ga idxinrö dza Pentecostés

⁹ tu' dë lataj ni guna' tu dxin zxon queë' Xanru', sal-la' zían nupa ta'dá'bage' neda'.

¹⁰ Channö idxinbi' bi'i Timoteo ga na' zóali', guli'gü'i ládxi'li'-bi', para cabí ubi ugu'íbi' tsanni ni' sóaleni' libí'ili', tu' runbi' xichinë' Xanru' ca na' runa' neda' xichinë'.

¹¹ Que lë ni na', cuntu nu ral-la' uzóa lëbi' tsólá'aló. Guli'gácalen-bi', ugu'uli'-bi' nöza idú tsáhu'ido', para udxinbi' ga ni zoa' neda', tu' riböza'-bi' lëbi', enca' yugu' böchi'ru' túnlenë'-bi' tsözxón dxin.

¹² Ca naca queë' böchi'ru' Apolos, gúta'yua' lahuë' tsejë' tsöjyüë' libí'ili' tsözxón len yugu' böchi'ru', pero biti' rë'ënë' tsejë' na'a. Guidé' cate' séqui'në'.

Didza' ru'ë Pablo ga ruúdx

¹³ Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca rugu ládxi', en buli'tipa ládxi'li'.

¹⁴ Len yöl-la' nadxí'i guli'gún bíti'tës bi gunli'.

¹⁵ Na'a, böchi' luzá'ado', chinöz quézili' ca naca queë' Estéfanos, enca' quégaca di'a dza queë'. Nácagaca nupa gula'sí lógaca ta'yéajlë' Cristo ladaj bönachi nacua' luyú Acaya. Bulu'dödi cúngaquië' para ilunë' xichíngaca bönachi queë' Dios.

¹⁶ Ráta'yua' loli', böchi' luzá'ado', gunli' bal nupa nácagaca ca böchi'ru' na', enca' ca nácagaca nupa tunlen légaquië' tsözxón dxin, en tácalen légaquië'.

¹⁷ Rudzėjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queëli'.

¹⁸ Bulu'huë' tsáhuë'ë neda' ca na' bulu'huë' tsáhuë'ë ca libí'ili'. Guli'gún bal bönachi caní.

19 Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lídxigaquië' tu'gapë' Dios libí'ili'.

20 Yúgu'të böchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

21 Neda', Pablo, len na' cuin caza' ruzúaja' lu guichi lë ni, rnnía': Rugapa' Dios libí'ili'.

22 Nu biti' nadxí'i Xanru' Jesucristo, chinabía dö' nu na'.
Gudá Xanru'.

23 Rinábida'-në' Xanru' Jesucristo uzá' ladxë'ë queëli'.

24 Nadxí'ida' yúgu'tëli' tu' nácaru' tuz len Xanru' Jesucristo.
¡Ca' gaca!

DIDZA' BUROPI GUSÖL-LË'Ë PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

¹ Neda', Pablo, naca' gubáz queë' Jesucristo tu' rë'ënë' caní Dios. Bi'ì böchi'ru' Timoteo runbi' neda' tsözxön. Rugapa' Dios libí'ili', rudúbili' queë' Dios lu yödzö Corinto, enca' yúgu'tëli' néquili' quez queë' Dios luyú Acaya ga na' nababa Corinto.

² Rinábida'-në' Xúziru' Dios, en Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le gudí'i guzxáquë'ë Pablo

³ ;Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhuë tsáhu'i'tica'sö rë'u!

⁴ Dios ruhuë tsáhuë'ë rë'u cate' raca bíti'tës bi raca queëru', para gaca huë tsáhu'i'ru' ca' nupa bi raca quéguequi. Ruhue tsáhu'i'ru' légaquië' ca na' Dios ruhuë tsáhuë'ë rë'u.

⁵ Tsca ta'yán le riguí'i rizáca'ru', ca na' gudí'i guzxáquë'ë Cristo, lësca' caní ta'yán le tu'huë tsahui' rë'u, tu' nácaru' tuz len Cristo.

⁶ Que lë ni na', channö bi riguí'i rizáca'tu', raca caní queëtu' para gaca huë tsáhu'i'tu' libí'ili', en guntu' ga uláli'. Channö Dios ruhuë tsáhuë'ë netu', raca caní para gaca huë tsáhu'i'tu' libí'ili', ate' lu yöl-la' riböza zxon ladxí' queëli', gaca guá' ilenli' yugu' le quí'i sáca'li', ca na' raca ca' queëtu'.

⁷ Ruzxöni ládxi'tu'-në' Dios gúntica'së' ga gaca dxi'a queëli', tu' chinözitu' ca na' riguí'i rizáca'li' tsözxön len netu', lësca' caní ruzí'ili' xibé tsözxön len netu' le ruhuë tsáhuë'ë Dios rë'u.

⁸ Rë'ënitú' inözili', böchi' luzá'ado', ca naca le zían le gulaca queëtu' luyú Asia. Gudödité' bë' lë na' guca queëtu', ate' guca zítërö ca le guca guá' ilentu'. Ca' guca, bíti'rö bentu' löza sóatu' ibantu'.

⁹ Gúquitu' guca queëtu' ca raca quégaquië' bönni' chinarugu quégaquië' ilátie'. Guca caní queëtu' para cabí uzxöni ladxí'tu' la' cuínsitu', pero uzxöni ladxí'tu'-në' Dios, Nu rusubán nupa chinátigaca.

¹⁰ Dios busölë' netu' lu lë na' ben ga guzóa bönadxí gátitu', ate' rusölë' netu' yúgu'të dza. Runtu' löza usölë' Lë' netu' caní leyúbölö

¹¹ channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxön len

bönachi zían, uzá' ládxe'ë queëtu', ate' ila'nná: "Xclenë' Dios" ni'a queëtu'.

Riguíjõ'ë Pablo bizx que ridzenë' idxinë' Corinto

12 Lë ni le run ga rudzéjatu'. Bö' naca caztu' rulu'í netu', len yöl-la' ba'a ladxi' queëtu', en idú ládxi'tu' runtu' bi runtu' yödölió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxe'ë Dios queëtu', en calëga len yöl-la' réajni'í queëztu' bentu' caní.

13 Ruzúajsötu' queëli' lu guichi le gaca ulábalí', en le gaca tséajni'íli'. Raca ládxa'a tséajni'íli' idú

14 Lë na' réajni'íli' lati'. Ní'irö cate' idxín dza huödë' Xanru' Jesucristo, gaca gunli' netu' zxön ca na' netu' guntu' libí'ili' zxön.

15-16 Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uzí'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'.

17 ¿Naru' réquitseli' guzxí' yë'a tu' butsó'a ca guna'? ¿Naru' réquitseli' lu yöl-la' bönáchisö quia' runa' le rizá'asö icja', en bë'ësa' ca' didza' cate' gunnía': "Caní guna"?"

18 Ni'a queë' Xanru' Dios, Nu run idútë ca rnna xtídzë'ë, bití' bë'ësa' ca' didza' cate' bë'lëna' libí'ili' xtídzë'ë Dios.

19 Jesucristo, Zxi'inë' Dios, Nu na' bentu' libán que ga zóali', neda' len Silvano, en Timoteo, bití' ru'ísë' ca' didza'. Lë ru'ë didza' idútë li.

20 Cristo caz runë' ga naca idútë löza yúgu'të le guzxí' lu në'ë Dios, ate' ni'a queë' Lë' gaca innaru': "Ca' gaca", para gaca queë' Dios yöl-la' ba.

21 Dios caz runë' ga runtu' löza tsözxön len libí'ili' néquiru' queë' Cristo, en budödë' lu na'tu' dxin queë' runtu'.

22 Bennë' queëru' le naca bë' néquiru' queë', tu' guchízië' icja ládxi'do'oru' Dios Bö' Lá'ayi, Nu naca queëru' le run ga naca löza yúgu'të le gunnë' Dios queëru'.

23 Ni'a queë' Xanru' Dios, Nu nözi le rizá' ládxa'a, ruá'a didza' idútë li. Nözinë' Lë' bití' bida' ga zóali' lu yödzö Corinto, para cabí gun bayudxi guna' ga huí'inili'.

24 Bití' ré'ënitü' inná bé'etu' libí'ili' ca réajlë'ëli' Cristo, tu' chinácalí' tsutsu ca réajlë'ëli' Lë'. Ré'ënitü' guntu' le gun ga udzeja ládxi'li'.

2

1 Que lë ni na' bë' ládxa'a cabí guídatea' queëli' zí'alö, para cabí guna' ga huí'inili'.

2 Channö guna' neda' ga hu'ínili', ¿nuzxi caz gun ga udzėjada' neda'? ¿Naru' guntsa' ga hu'íni nu ral-la' gun ga udzėjada' neda'?

3 Que læ ni na' buzúaja' queëli' lu guichi zí'alö. Biti' gú'unida' guída' ga zóali', para cabí gunli' libí'ili' ga hu'ínida' neda', tu' ral-la' gácali' libí'i cázali' le gun ga udzėjada' neda'. Tu' ruzxöni ládxa'a libí'ili', nõzda' udzėjali' yúgu'tëli' channö udzėjada' neda'.

4 Cate' ni' buzúaja' queëli' lu guichi læ na', gusëbide'e ládxa'a, en bu'ínide'e ládxa'a ga bidxintë gurödxá'. Buzúaja' caní lu guichi, calëga para guna' ga hu'ínili', pero para inözili' ca nadxí'ide'eda' libí'ili'.

Ral-la' uniti loru' nu ruá' dö' cate' rubí'i ladxi'

5 Channö zoë' tu bönni' ni', bönni' na' busuhu'íninë' rë'u, calëga neda'sö busuhu'íninë', pero huáca innaru' busuhu'íninë' yúgu'tëli' libí'ili'. Rnnía': "Huaca innaru'", para cabí tödi bë' ichugu bë'a queë' bönni' na'.

6 Tscati' gaz xíguia' chibenli' látu'biqui' yúgu'tëli' queë' bönni' na'.

7 Na'a, ral-la' uniti loli' bönni' na', en utí'pali' ládxe'ë, para cabí tödi bë' hu'íninë', en para cabí gaca tsaz chopa ládxe'ë.

8 Que læ ni na' ráta'yua' loli' gunli' le gaca bë' nadxí'ili'-në' idú ládxi'li'.

9 Que læ ni na' ca' buzúaja' queëli' lu guichi læ na'. Gú'unida' si' bë'a libí'ili' para inözda' channö rúntica'sili' ca rna xtídza'a.

10 Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channö bi ben nu na' runiti lahua', runa' caní uláz queë' Cristo para gaca bi uzí'ili' xibé.

11 Caní runa', para cabí sequi' Satanás tu' xihui' ucúl-la rë'u, tu' chinöziru' yugu' le rë'ëni gun queëru'.

Gurö'ë böniga Pablo lu yödzö Troas

12 Cate' bidxina' lu yödzö Troas para guna' libán que didza' dxi'a queë' Cristo, bénnadë'ë Xanru' neda' lataj guna' libán ni'.

13 Sal-la' guca caní, gurö'a böniga tu' cabí yöjxáca'a-bi' bi'i böchi'ru' Tito ni'. Que læ ni na' buzá'alena' bönachi ni', ate' guyija' luyú Macedonia.

Idéli'ru' tu' zóalenë' Cristo rë'u

14 ¡Xclenë' Dios! Riché'tica'së' rë'u ca tu le naca bë' bidéli'në' Cristo yöl-la' rusölá queëru'. Dios rugunë' dxin rë'u para rulu'ë lahui ca gaca ilúnbë'e bönachi Cristo. Le nácaru' naca ca tu le rilá' zxixi, le riguisi gátitës.

15 Nácaru' ca tu nöri rilá' zxixi, le ruzégui'ë Cristo lahuë' Dios, en le riguísië' lógaca nupa nulágaca, en nupa nanítigaca.

16 Lógaca nupa na' nanítigaca nácaru' ca tu le rilá' siguti le naca bë' ilátie'. Lógaca nupa na' nulágaca nácaru' ca tu le rilá'

zxixi le naca bē' ibántica'siru'. ¿Nuzxi caz naca lesaca' gaca que caní?

¹⁷ Biti' runtu' ca tun zían bönachi, nupa tu'gún dxin xtídzē'ē Dios ca tu le tuti', en to'o. Tu' nasöl-lē'ē Dios netu', idú ládxi'tu' ru'itu' didza' lahuē' Lē' tu' nácatu' tuz len Cristo.

3

Ca naca didza' le ruún rē'u tuz len Dios

¹ ¿Naru' réquitseli' run ba zxön cuintu' cate' ru'itu' caní didza'? ¿Naru' runtsö bayudxi ulu'itu' libí'ili' tu guichi le rulu'i le nácatu'? ¿Naru' ral-la' inábitu' libí'ili' gúnnali' queétu' tu guichi caní, ca na' tun bal-la bönachi?

² Libí'i cázali' nácali' ca tu guichi le rulu'i le nácatu', le nazúaj lu icja ládxi'do'otu', ate' yúgu'tē bönachi gaca ulu'laba le, en tséajni'iguequi le.

³ Le nácali' nalá' lahui ca tu guichi nuzúajē' Cristo, le gusöl-lē'ē lu na'tu'. Biti' nazúaj tu lu guichi, pero Bō' Lá'ayi queē' Dios ban nuzúajē' le, calēga tu lu guiöjta'a, pero lu icja ládxi'do'oli' nuzúajē'.

⁴ Ru'itu' caní didza' tu' ruzxöni ládxi'tu'-nē' Dios tu' zóalenē' Cristo rē'u.

⁵ Biti' réquitu' bi gaca guntu' rásasö queétu', pero Dios runnē' queétu' yöl-la' huáca bi guntu'.

⁶ Dios caz bennē' queétu' yöl-la' huáca guntu' xichiné' lu didza' cubi na', le ruún rē'u tuz len Dios. Didza' ni biti' naca tu xibá nazúaj lu guichi, pero naca tu le nusédinē' Dios Bō' Lá'ayi rē'u. Xibá na' nazúaj lu guíchisö richugu queéru' gátiru', pero Dios Bō' Lá'ayi nabániru'.

⁷ Yugu' xibá queē' nazúajgaca lu guichi, Dios buzúajē' yugu' lu guiöjta'a, ate' bulu'e lahui yöl-la' bení' queē' cate' budödē' le lu nē'ē Moisés. Sal-la' gudödi que, guyépitērö yösa bení' lahuē' Moisés. Caní guca, biti' guca ulu'yú bönachi Israel lahuē' Moisés. Channö yöl-la' bení' caní yöjtsaga xibá na', ate' xibá na' richugu quégaca bönachi ilátigaca,

⁸ zxöntērö naca yöl-la' bení' na' dzaga yugu' le runē' Dios Bō' Lá'ayi.

⁹ Yöjtsaga yöl-la' bení' lē na' ben ga narugu quégaca bönachi ilátigaca. Zxöntērö naca yöl-la' bení' que lē na' run ga rnnē' Dios nácatu' tsahui' bönachi.

¹⁰ Tu' nácatērö lesaca' yöl-la' bení' na' nalá' lahui na'a, cuídísö nagá'ana yöl-la' bení' na' bilá' lahui cate' Dios bunödzejē' xibá queē' quégaca bönachi.

¹¹ Channö guzóa yöl-la' bení' que lē na' guzóa tu chí'ido'osö, zxöntērö naca yöl-la' bení' que lē ni sóatica'sö.

¹² Tu' zoa lē ni runru'löza, ru'itu' didza' lu yöl-la' rugu ladxi'.

¹³ Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti.

¹⁴ Gula'chul-la gula'nítië' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquië', lë na' gaca ugüë' tuzë' Cristo.

¹⁵ Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiöj lógaquië' le run ga nachul-la nanítigaquië'.

¹⁶ Cate' nu ruhuöáca queë' Xanru', rigúa lë na' run ga nachul-la naniti nu na'.

¹⁷ Cate' ni rnnatu': "Xanru'", ruí'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán.

¹⁸ Yúgu'tëru' rë'u biti' bi nusayaj loru'. Nácaru' ca tu guíë dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquië' Cristo caz, en ráta'rö queëru' yöl-la' bení' queë'.

4

¹ Dios buéchi' ládxë'ë netu', en budödë' lu na'tu' dxin ni runtu'. Que lë ni na' biti' raca chopa ládxi'tu'.

² Chibucá'anatu' le tun bönachi bagáchi'sö, en le tun ga rutuí'iru'. Cuntu nu rizi' yé'etu', en biti' rutsá'atu' xtídzë'ë Dios. Tu' ruí'itu' didza' que le naca idútë li, ruí'i ládxi'tu' guntu' le iléquibe'e yúgu'të bönachi naca dxi'a lahuë' Dios.

³ Channö zoa nu biti' réajni'ini didza' dxi'a runtu' ba nali que, nácacacasö nupa nachul-la nanítigaca biti' ta'yéajni'i le.

⁴ Biti' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení' que didza' dxi'a ca naca yöl-la' bení' queë' Cristo, Nu na' naca idú ca náquië' Dios caz.

⁵ Biti' runtu' libán que la' cuínsitu', pero runtu' libán queë' Jesucristo, en riguíxjö'ötu' náquië' Xanru', ate' netu' ni nácatu' huen dxin queéli' tu' nadxí'itu'-në' Jesús.

⁶ Dios, Nu ben ga buzení' bení' ga ni' guca chul-la, náquië' Nu rigú'u bení' icja ládxi'do'oru', le ruzéajni'i rë'u para gúnbë'ëru' yöl-la' bení' queë' Dios, lë na' ruzení' lahuë' Jesucristo.

Tu' réajlë'ëru' Dios runru' ca rë'ënë' Lë'

⁷ Yöl-la' tsahui' ni yu'u icja ládxi'do'oru' rë'u. Nácaru' ca yugu' yusu' yu, para gaca bë' nequi queë' Dios yöl-la' huáca zxön na', en calëga que cázaru'.

⁸ Tu'saca' zi' bönachi netu', pero biti' rudú ládxi'tu'. Rö'ötu' böniga, pero biti' raca chopa ládxi'tu'.

⁹ Ta'bía ladxi' bönachi netu', pero biti' rubéaj ládxi'ë Dios netu'. Ta'zé'ede'e netu' yu, pero biti' tu'suniti netu'.

¹⁰ Lu idú le naca caztu' rátitica'stu' tsözxön len Jesús, na' naca bë' lu le naca caztu' nabánitu' Lë'.

¹¹ Tsanni ni zóatu' nabantu', zóatica'sö bönadxi gátitu' tu' néquitu' queë' Jesús para gaca bë' nabánitu' Lë' lu le naca caztu' le riniti.

¹² Caní naca, zoa bönadxi queëtu' gátitu', pero ni'a que lë ni rata' yöl-la' na'bán queéli'.

¹³ Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a didza'." Lësca' caní raca queëtu', réajlë'ëtu' Dios, en que lë ni na' ru'itu' didza'.

¹⁴ Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'.

¹⁵ Raca caní yúgu'të lë ni para gaca bi uzí'ili' xibé. Channö ila'deli' ziánrö ca' bönachi le ruzá' ládxi'ë Dios queëru', ila'nnë': "Xclenë' Dios", ate' gaca yöl-la' ba queë' Dios.

¹⁶ Que lë ni na', biti' raca chopa ládxi'tu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'.

¹⁷ Le cuídí'sö riguí'i rizáca'ru' ni tu chí'ido'osö run ga gata' queëru' le uzí'da'aru' xibé le sóatica'sö, en le nácatërö lesaca' ca gaca gúnbë'ëru'.

¹⁸ Biti' ruí'i ládxi'ru' le rilé'ëru' luyú ni, pero le biti' gaca ilé'ëru' ruí'i ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

5

¹ Nöziru' cate' initi idútë le naca cázaru', le naca ca tu yu'u lári'do' yödzölió ni, Dios chinupë'ë tu le cubi queëru', le naca ca tu yu'u le zoa tsaz ni' yehua' yubá, lë na' nun cazë' Lë'.

² Que lë ni na' rinnë ládxi'ru' tu' rë'ëniku' tsú'uru' le cubi ni', lë na' naca ca tu lídxiru' ni' yehua' yubá.

³ Tsú'uru' le cubi ni' ca na' rácuru' tu lari', para cabí sóaru' ga biti' zoa idútë le naca cázaru'.

⁴ Tsanni ni zóaru' lu idútë le naca cázaru', le naca ca tu yu'u lári'do', rinnë ládxi'ru' lu yöl-la' risëbi ladxi' queëru'. Biti' runru' caní tu' rë'ëniku' ucá'anaru' idútë le naca cázaru', pero rë'ëniku' tsú'uru' tsaz le cubi ni'. Caní gaca, ucá'anaru' idútë le naca cázaru' le riniti, ate' tsú'uru' lu yöl-la' na'bán idú.

⁵ Dios chinupë'ë yúgu'të lë ni queëru', ate' guchízië' rë'u Dios Bö' Lá'ayi, Nu naca queëru' le naca bë' naca löza sí'iru' lë na' nupë'ë queëru'.

⁶ Que lë ni na' nadipa ládxi'ru'. Tsanni ni yú'uru' lu le naca cázaru', nöziru' zóaru' zi'tu' ga zoa lidxë' Xanru'.

⁷ Runru' ca runru' tu' réajlë'ëru'-në' Dios, en calëga tu' zoa bi rilë'ëru'.

⁸ Tu' runru' löza lë ni, ré'ëniuru' ucá'anaru' le naca cázaru' ni para tsöjsóalenru'-në' Xanru'.

⁹ Que lë ni na' ruí'i ládxi'ru' gunru' le raza ládxi'ë Xanru', channö ugá'anaru' lu idútë le naca cázaru' ni, o channö tsöjsóalenru'-në' Xanru' ni'.

¹⁰ Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöröë'. Ní'irö ubi'ë que queëru' tsca naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruín rë'u tuz len Dios

¹¹ Que lë ni na', tu' rádxitu'-në' Dios, ruí'i ládxi'tu' uzéajni'itu' bönachi. Nözinë' Dios ca naca le yu'u icja ládxi'do'otu', ate' ruzxöni ládxa'a nözili' dxi'a ca' libí'ili' lë na' yu'u icja ládxi'do'otu'.

¹² Biti' rubéaj cuintu' dxi'a loli'. Ré'ëniuru' gata' lataj queëli' gunli' netu' bal, para gaca ubí'ili' didza', bi guiëli' yugu' bönni' tun ba zxön cuíngaquië' ca na' tu'luí'isö lahui cuíngaquië', en calëga ca nácagaquië' lu icja ládxi'do'gaquië'.

¹³ Channö nachixi ícjatu', naca para gaca yöl-la' ba queë' Dios, en channö cabí nachixi ícjatu', naca para gaca bi uzí'ili' xibë.

¹⁴ Run bayudxi bi guntu' tu' nadxi'inë' Cristo rë'u, tu' chinöziru' tuz Nu guti uláz quégaca yúgu'të bönachi, en que lë ni na' naca quégaca yúgu'të bönachi tsca nátilengaca Lë' tsözxön.

¹⁵ Lë' gútië' uláz quégaca yúgu'të bönachi para cabirö ilunë' bönni' nabángaquië' le nequi quégacasë', pero le nequi que Nu na' guti uláz quégaquië', en bubán lu yöl-la' guti.

¹⁶ Que lë ni na', bíti'rö gúnbë'ëtu' bönachi tsca naca le nalá'gaca láhui'lö, en sal-la' canísö bénbë'ëtu'-në' Cristo, bití' núnbë'ëtu'-në' caní na'a.

¹⁷ Channö nuhuóaca núti'tës bönachi tuz len Cristo, chinaca bönachi cubi nu na'. Chigudödi que le gulaca zí'alö, ate' chinucúbigaca yúgu'të.

¹⁸ Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóaca yúgu'të bönachi tuz len Lë'.

¹⁹ Libán runtu' rnna caní: "Dios guzóalenë' Cristo, en benë' ga gaca ulu'huóaca bönachi yödzölió ni tuz len Lë', en bití' röjnenë' dul-la' gula'baga'." Budödë' lu na'tu' didza' dxi'a ni, ca gaca ulu'huóaca bönachi tuz len Dios.

²⁰ Na'a, nácatu' gubáz queë' Cristo, en raca na'a ca Dios caz ráta'yuë' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huóaca tuz len Dios.

²¹ Cristo biti' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

6

¹ Tu' runtu' dxin tsözxön len Dios, ráta'yutu' loli', rnnatu': Biti' udödili' cá'asö le ruzá' ládxe'ë Dios queëli'.

² Nazúaj lu guichi lá'ayi ca gunné' Dios le rnna: Tu dza buzá' ládxa'a quiu', biyönda' li', ate' dza bena' ga gaca uló', gúcalena' li'.

¡Buli'yútsöca! ¡Na'a naca dza ruzá' ládxe'ë queëru'! ¡Na'a naca dza gaca uláru'!

³ Biti' ré'ënitü' bi guntu' le gun ga nu ichixi inigui, para cabi soa nu ucá'ana cá'asö dxin ni runtu'.

⁴ Ni'a que bíti'tës bi runtu', ru'i ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ladxi' ruá' rilentu' yugu' le riguí'i rizáca'tu', en yugu' le riyadzaj queëtu', en yugu' le tun ga rö'ötu' böniga.

⁵ Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía di'i netu'. Gudödi bë' bentu' dxin, en biti' guta' lataj queëtu' gásitu' o bi gágutu'.

⁶ Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni'i, en tu' riböztu' zxön ladxi', en tu' nácatu' dxi'i ladxi', en tu' zóalenë' Dios Bö' Lá'ayi netu', en tu' naca idú ca nadxí'itu' luzá'atu'.

⁷ Ruí'itu' didza' idütë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

⁸ Nacuá' nupa tun netu' bal, enca' nupa tu'zóa netu' tsölá'alö. Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizi' yë'ëtu', ruí'itu' didza' idütë li.

⁹ Sal-la' nacuá' bönachi biti' núnbë'gaquië' netu', nacuá' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' nabantu'. Tunë' netu' xíguia', pero biti' tutië' netu'.

¹⁰ Tu'suhu'ini netu', pero rudzéjatica'stu'.

Nácatu' bönni' yechi', pero runtu' ga rata' yöl-la' tsahui' idú quegaca bönachi zián.

Sal-la' biti' bi dë queëtu', nequi queëtu' yúgu'të le dë.

¹¹ Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí'i ládxi'da'tu' libí'ili'.

¹² Channö cabi nácaru' tuz biti' naca tu' cabi ruí'i ládxi'tu' libí'ili', pero libí'i cázali' biti' ruí'i ládxi'li' netu'.

¹³ Na'a, ru'ílenu' libí'ili' didza' ca runë' tu bönni' ru'ílenë'-bi' xzí'inë' didza', rnnía': Buli'bí'i queëtu' ca rúnlentu' libí'ili'. Guli'güi' ladxi' netu'.

Nácaru' ca tu yudo' ga yu'ë Dios ban

¹⁴ Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

¹⁶ ¿Nacxi gácatsö ilaca tuz yudo' queë' Dios, en budó' guiöj budó' yaga?

Libí'i cázali' nácali' ca tu yudo' ga yu'ë Dios ban. Ca naca læ ni, Dios caz gunnë':

Sóalena' légaquië', en tálena' légaquië'.

Gaca' Dios quégaquië', ate' légaquië' iláquië' bönachi quia'.

¹⁷ Que læ ni na', gunnë' ca' caní:

Guli'rúaj ladjagaquië', en buli'lá'alén légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

¹⁸ Neda' gaca' xuz cázali', ate' libí'ili' gácali' xzí'ina', bönni', en nigula."

Caní rnnë' Xanru', Nu napa caz idútë yöl-la' huáca.

7

¹ Böchi' luzá'ado', néquiquequi queëru' yugu' læ ni guxzí' lu në'ë Dios. Que læ ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

Ca bulu'bí'i ládxi' gaca nupa ta'yéajlë' Cristo

² Guli'sí' lu ná'ali' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guxzí' yé'etu'.

³ Ruá'a caní didza', calëga para usubága'a libí'ili' xíguia', pero naca ca na' chigunnía' zí'alö, rnnía': Zoa' sina' ibánlena' libí'ili' o gátilena' libí'ili' tu' ruí'í ládxa'a libí'ili'.

⁴ Ruzxónida' ládxa'a libí'ili', en rúnda'a libí'ili' zxön. Sal-la' zían le riguí'i rizáca'tu', nadípada' ládxa'a, en rudzëjadë'e ládxa'a.

⁵ Cate' bidxintu' luyú Macedonia, ga ridxintë na'a dza, biti' rata' queëtu' lataj uzí' ládxi'tu', pero zían le taca queëtu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádxitu'.

⁶ Ní'irö Dios, Nu rutipa ladxi' nu chizóa gaca chopa ladxi', butipë ládxi'tu' cate' budxinbi' bi'i Tito ga guzóatu'.

⁷ Biti' gúcasö tu' budxinbi' queétu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' ré'ënide'eli' ulé'eli' neda', en ca na' ruhuí'inili' ni'a que læ na' guca ni', enca' ca ruí'i ládxi'li' neda'. Yúgu'të læ ni ben ga rudzeja ládxa'a.

⁸ Sal-la' le buzúaja' queéli' lu guichi zí'alö ben ga buí'inili', biti' ruhuí'inda' na'a. Zí'alö buí'inida' cate' gúquibe'eda' ben ga buí'inili' libí'ili' tu chí'ido',

⁹ pero na'a rudzédada', calëga tu' buí'inili', pero tu' ben yöl-la' ruhuí'ini queéli' na' ga bubí'i ládxi'li'. Dios bugunë' dxin yöl-la' ruhuí'ini queéli', para cabí ichixi iníguili' ni'a que le bentu' netu'.

¹⁰ Yöl-la' ruhuí'ini na' rugunë' dxin Dios run ga nu ubí'i ladxi' para ulá nu na', ate' que læ ni na' biti' ral-la' huí'iniru' que. Yöl-la' ruhuí'ini le naca que yödzölió ni run ga ilátigaca bönachi.

¹¹ Buli'yútsöca' ca bugunë' Dios dxin yöl-la' ruhuí'ini queéli' na'.

Ben ga ruí'i ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxí'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' biti' bi dul-la' nabága'li' ni'a que læ na' guca.

¹² Que læ ni na', sal-la' buzúaja' caní lu guichi na', biti' guca ni'a que nu na' ben dul-la', en calëga ni'a que nu na' gudí'i guzxaca', pero para gaca bë' lahuë' Dios le nácatë ruí'i ládxi'li' netu'.

¹³ ¡Lë ni butipa ládxi'tu'! Calëgasö bidipa ládxi'tu', pero rudzédade'e ládxi'tu' tu' rudzédabi' bi'i Tito ni'a que le benli' libí'ili', tu' butípali' ládxi'bi'.

¹⁴ Bena' libí'ili' zxön lobi' Tito, ate' biti' benli' ga utuí'ida'. Bë'lentica'stu' libí'ili' didza' idütë li, ate' læsca' caní naca idütë li didza' bë'lentu'-bi' Tito cate' bentu' libí'ili' bal.

¹⁵ Zeaj rácarö idú ca nadxí'ibi' bi'i Tito libí'ili' cate' röjnebi' ca na' benli' ca rnna xtídzá'tu', en ca na' benli'-bi' bal lu yöl-la' radxi Dios queéli' en lu yöl-la' nöxaj ladxi' queéli'.

¹⁶ Rudzédade'eda' tu' gaca uzxöni ládxa'a libí'ili' idú ládxa'a.

8

Ca ral-la' unödzej nu réajlë' Cristo le dë que

1 Na'a, böchi' luzá'ado', rě'ënitü' quíxjöi'itu' libí'ili' ca naca le buzá' ládxë'ë Dios quegaca yugu' cö' bönachi queë' Cristo luyú Macedonia.

2 Sal-la' yenni' gula'gu'i gula'záquië' lu yugu' le guzxí' bē' légaquië', bulu'dzėjade'enē', en idú ládxi'gaquië' bulu'nödzejadē'ë sal-la' nácagaquië' bönachi yechi'.

3 Neda' runa' ba nalí quegaquië', idú ládxi'gaquië' bulu'nödzejadē'ë tsca gula'zéquinē', en bulu'nödzejare' tsca gula'zéquinē'.

4 Gula'nábide'enē' netu', en guláta'yudē'ë lotu' güi'itu' légaquië' lataj tsözxön len netu' ilácalenē' böchi'ru' ta'yéajlē'ë Cristo.

5 Gulunrē' ca guqui ícjatu' ilunē'. Bulu'dödi cúngaquië' zí'alö lu nē'ë Xanru', enca' lu na'tu' netu', le naca le raza ládxë'ë Dios.

6 Que lē ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runödzejali' lu yöl-la' dxi'i ladxi' queëli', ca na' gusí lobi' benbi' zí'alö.

7 Nácali' lo ca naca yúgu'tē le runli',

ca réajlē'ëli' Cristo,

en ca réajni'ili',

en ca ruzéajni'ili' bönachi,

en ca ruí'i ládxi'li' luzá'ali',

enca' ca nadxí'ili' netu'.

Lësca' caní ral-la' gácali' lo ca gácalenli' luzá'ali', lu yöl-la' dxi'i ladxi' queëli' bi unödzejali' quegaquië'.

8 Biti' rinná bé'eda' libí'ili' gunli' caní. Ruá'a didza' ca tun ia'zica'rö bönachi, tu'nödzej idú ládxi'gaca, para guna' ga gunli' le gaca bē' naca idú ca nadxí'ili' luzá'ali'.

9 Nöz quézili' le buzá' ládxë'ë Xanru' Jesucristo queëru'.

Bilé'enē' yöl-la' tsahui'

pero para gácalenē' libí'ili'

böáquië' yechi'

para gata' queëli' yöl-la' tsahui',

tu' gúquië' Lē' yechi'.

10 Caní runi neda': Dxi'arö gaca queëli' údxi gunli' lē na' gusí loli' runli' chiguca tu iz. Gúcali' lo, calégasö ca bunödzejali', pero lësca' ca gú'unili' unödzejali'.

11 Na'a, idú ládxi'li' buli'siyudxi gunli' lē na' gusí loli' runli', idú ládxi'li' bunödzejali'. Buli'nödzej na'a tsca séqui'li'.

12 Channö rě'ënili' bi unödzejali', Dios runē' bal le runödzejali' tsca naca le dēsö queëli'. Biti' rinabē' unödzejaröli' tsca le dēsö queëli'.

13 Biti' rě'ënda' guna' ga unödzejali' le gácalen ia'zica'rö bönachi ga idxintē yadzaj queëli'.

14 Rě'ënda' gaca tuz ca dē queëli', en quegaquië'. Na'a dēda' queëli' le gaca unödzejali' para bi gata' quegaca nupa

ni' riyadzaj quéguequi. Ní'irö cate' bi yadzaj queéli', légaquië' huáca bi ulu'nödzjé' queéli' para caní gaca tuz ca dë queéli', en quégaquië' yúgu'téli'.

15 Lësca' caní nazúaj lu guichi lá'ayi le rnna: "Nu na' butúbida', biti' bugá'ana que, ate' nu na' butubi láti'do'os, biti' biyadzaj que."

Ca runbi' bi'i Tito, enca' nupa dzágagaca lëbi'

16 ꞑXclenë' Dios, tu' benë' Lë' ga ruí'i ládxi'bi' bi'i Tito libí'ili', ca na' ruí'i ládxa'a neda' libí'ili'!

17 Calégasö runbi' ca rnna xtídza'a bi rinábida'-bi', pero tu' ruí'i ladxí' cázabi' libí'ili', rácasö queëbi' gú'unibi' tsöyubi' libí'ili'.

18 Risöl-la'tu'-në' tsözxön len lëbi' böchi'ru' na' tun lë' bal yúgu'të cö' bönachi queë' Cristo, tu' runë' dxi'a dxin que didza' dxi'a.

19 Ia'stú, gula'bö yugu' cö' bönachi queë' Cristo bönni' ni, para tséajlenë' tsözxön netu' guá'atu' lë na' runödzejali', para gaca yöl-la' ba queë' Xanru', en gaca bë' ca' ruí'i ládxi'ru' luzá'aru' ta'yéajlë'ë Cristo.

20 Caní gaca, gunë' netu' tsözxön para cuntu nu bi gaca innë queëtu', ca rúnlentu' dumí na' runödzejada'ali', le gácalen bönachi yechi'.

21 Ruí'i ládxi'tu' guntu' le naca dxi'a, calégasö lahuë' Xanru', pero lësca' lógaca bönachi.

22 Risöl-la'tu'-në' ca' ia'tué' böchi'ru' tsözxön len légaquië', ate' zían luzuí guzxí' bë'ëtu' lë', ate' naca bë' rë'ënë' gácalenë' rë'u idú ládxe'ë. Ia'stú, tu' ruzxöni ládxe'ë libí'ili', rë'ënitëronë' ca' gácalenë' rë'u lu dxin ni.

23 Channö nu bi inaba ca nácabi' bi'i Tito, nácabi' luzá'a, rúnlenbi' neda' tsözxön dxin para gácalentu' libí'ili'. Channö nu bi inaba ca nácagaquië' ia'zíca'rë' böchi'ru' na', nasöl-la'gaca yugu' cö' bönachi queë' Cristo légaquië', ate' tunë' ga gaca yöl-la' ba queë' Cristo.

24 Guli'gún ga gaca bë' nadxí'ili' légaquië' para iléquibe'e yugu' cö' bönachi queë' Cristo runli' caní, en ila'nözi naca idútë li didza' dxi'a ruí'itu' ca naca queéli'.

9

Ca naca dumí rutúbiru' le gácalen yugu' böchi'ru'

1 Ca naca le runödzejali' quégaquië' böchi'ru' ta'yéajlë'ë Cristo, biti' run bayudxi uzúaja' queéli' lu guichi ni.

2 Chinözda' ca rë'ënili' gunli' lë ni, ate' ruá'a didza' lógaca bönachi ta'yéajlë' Cristo luyú Macedonia ni ca naca le dxi'a runli'. Riguíxjöi'ida' légaquië' ca naca queéli', zóali' luyú Acaya,

chiguca tu iz chizóa gunli' lè ni, ate' tu' ruí'i ládxi'li' gunli' lè ni, bidipa ládxi'gaca lá'tu'biqú' yúgu'tè bönachi ni ta'yéajlè' Cristo.

³ Na'a, risól-la'a yugu' böchi'ru' ni queéli' para gaca bē' naca idútè li didza' ruí'itu' ca naca queéli', ate' naca ca na' chigunnía' queéli', chizóa gunli' lè na' gácalen yugu' luzá'aru'.

⁴ Channō ila'zá'alēn bal-la bönachi Macedonia ta'yéajlè' Cristo neda' tsözxön, ate' gaca bē' bití' zuíni gunli' lè na', ní'irō utu'itu' tu' buzxöni ládxi'tu' libí'ili', ate' libí'i cázali' ca' ral-la' utu'ili'.

⁵ Que lè ni na' gúquida' ral-la' isól-la'a yugu' böchi'ru' ni para ila'dxinē' ga zóali' zí'alō ca neda', ate' ilácalenē' libí'ili' para udxí utúbili' lè na' guzxi' lu ná'ali' unödzejali'. Caní gaca, údxí utúbili' dumí na' zí'alō ca idxina', ate' gaca bē' runödzejali' tu' rē'ēni cázali', en calēga tu' rinná bé'etu' libí'ili' bi unödzejali'.

⁶ Guli'tsöjné lè na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxöni, sizxöni ca' uzí'.

⁷ Tu tuli' ral-la' unödzejali' tsca na' chinuzóali' icja ládxi'do'oli', en calēga lu yöl-la' ruhuí'ini queéli' o tu' run bayudxi, tu' nadxí'inē' Dios nu runödzej idú ladxi'.

⁸ Dios gaca gúnnadē'ē queéli' ca riquínili' para gata' queéli' yúgu'tè lè na' riquínili', ate' ugá'ana queéli' para gaca gácalenli' nu bi riyadzaj que.

⁹ Lēscá caní nazúaj lu guichi lá'ayi le rnna:

Idú ládxi'ē bunödzej' quégaca bönachi yechi'.

Naca bé'tica'sö yöl-la' dxi'i ladxi' queē'.

¹⁰ Dios, Nu runna queēru' bi gaz uzóaru', enca' bi gu'aj gáguru', gunnē' ca' queéli' bi unödzejali', le naca ca lè na' nu raza ruzóa, en gunē' ca' ga ila'yán le ilápalí' le nácagaca yugu' le dxi'a runlí'.

¹¹ Dios gunē' ga gáta'da' queéli' yöl-la' tsahui' para gaca unödzejada'ali'. Caní gaca, yugu' le unödzejali', lè na' quísitu' uláz queéli', gun ga ila'nná bönachi zían: "Xclenē' Dios."

¹² Lè na' runödzejali' le gácalen yugu' böchi'ru', calégasö gü'i quégaquiē' le ta'yádzjanē', pero gun ga ila'nnē': "Xclenē' Dios."

¹³ Cate' gunli' caní, ila'gu'ē Dios yöl-la' ba tu' gaca bē' runlí' ca rnna didza' dxi'a queē' Cristo ca na' rnnali' runlí'. Ila'gu'ē Lē' yöl-la' ba ca', tu' nácalí' dxi'i ladxi', runödzejali' quégaquiē', enca' quégaca ia'zícá'rö bönachi.

¹⁴ Ulu'lidzē' Dios, en ila'nábinē' Lē' gácalenē' libí'ili' tu' nadxí'iguequinē' libí'ili' ní'a que le buzá' ládxi'dē'ē Dios queéli'.

¹⁵ ¡Xclenē' Dios, bennē' tu le nácada' lesaca' queéli'!

10

Yöl-la' unná bē' dē lu nē'ē Pablo

¹ Ta'nná bönachi naca' nöxaj ladxi' cate' zóalena' libí'ili', pero cate' zoa' zitu' ga zóali' naca' rugu ladxi' ca ruzúaja' lu guichi. Tu' náquië' nöxaj ladxi', en dxi'i ladxi' Cristo, neda', Pablo, ráta'yua' loli'

² cabí gunli' ga gun bayudxi gaca' rugu ladxi' len libí'ili' cate' idxina' ga zóali'. Chizóa gaca' rugu ladxi' len nupa ni' ta'nná runtu' dxin ni lu yöl-la' bönáchisö queëtu'.

³ Le nácatë nácatu' bönachi, pero calëga rácasö queëtu' runtu' xichinë' Dios.

⁴ Yugu' le rudí'initu' lu gudil-la, biti' nácatu' ca le tu'dí'ini bönachi yödzülió ni lu gudil-la, pero yugu' le rudí'initu' lu gudil-la nápagaca yöl-la' huáca queë' Dios, le ruguntu' dxin para usunítitu' le nál-lagaca que tu' xihui'.

⁵ Rusunítitu' yugu' didza' biti' nácatë le tu'zxöni ládxi'gaca bönachi, en yúgu'të le tun ga tun ba zxön cuínguequi, en le tun ga cabí ilunbë' Dios. Runtu' ga gaca ila'nná bé'enë' yúgu'të le ta'zá ládxi'gaquië', lë na' tun ga ta'dá'baguë'ë Dios, ate' runtu' ca' ga tunë' ca rnnë' Cristo.

⁶ Tödi gunli' le gaca bë' naca idú ca runli' ca rna xtídzë'ë Cristo, sóatu' sina' guntu' xíguia' yúgu'të nupa ni' ta'dá'baguë'ë xtídzë'ë.

⁷ Ruyuli' le nalá' láchuisö. Channö réquinë' nu bönni' dzáguie' libí'ili' néquinë' queë' Cristo, ral-la' guéquibe'enë' ca' lë ni: Ca na' lë' néquinë' queë' Cristo, lësca' caní netu' néquitu' queë' Cristo.

⁸ Biti' ca' rutu'ida' sal-la' gudödi bë' ben ba zxön cuina' ca naca yöl-la' unná bë' budödë' Xanru' lu na'tu'. Lë na' dë lu na'tu' naca para guntu' ga gácarö idú ca réajlë'ëli' Cristo, en calëga para usunítitu' libí'ili'.

⁹ Biti' ré'ënda' guéquili' ré'ënda' gun gádxida' libí'ili' ni'a que le ruzúaja' queëli' lu guichi ni.

¹⁰ Nacuá' ni' nupa ila'nná: "Yugu' le ruzúajë' Pablo queëru' lu guichi, rulidza zì'ë rë'u, en ralë' didza', pero cate' zóalënë' rë'u runë' nöxaj ladxi', en didza' gúlado' ru'ë."

¹¹ Nu na' ruí'i caní didza' ral-la' guéquibe'e lë ni: Ca na' nácatu' cate' bi ruzúajtu' queëli' lu guichi tsanni ni zóatu' zitu' ga zóali', gácatu' ca' lu le guntu' cate' ni' sóalentu' libí'ili'.

¹² Le nácatë biti' nácatu' rugu ladxi' para innatu' nácatu' lëbi ca nácatu' nupa ni' tun ba zxön cuínguequi. Nácatu' nupa ni' yugu' bönni' biti' bi nözguequinë'. Lu le ta'za'sö ládxi'gaquië' tu'zöë' ca ral-la' ilaca bönachi, en tu'chi'a tu'söröë' la' légacasë' tsca naca lë na' ta'za'sö ládxi'gaquië'.

¹³ Netu' biti' gunrö ba zxön cuintu' ca ral-la' guntu', pero ca nácatë dxin budödë' Dios lu na'tu', ate' lu dxin ni, ral-la' guntu' le ga ni' zóali' libí'ili'.

14 Channö budödë' Dios lu na'tu' dxin guntu' ga zóali', bití' ca' gudödi bë'ëtu' ca bentu' cate' bidxintu' ga zóali', en bentu' libán que didza' dxi'a ga na' zóali'.

15 Bití' run ba zxön cuintu' ca naca dxin núngaca ia'zica'rö bönachi, pero ca nácasö dxin na' budödë' Dios lu na'tu'. Runtu' löza gácarö idú ca réajlë'ëli' Cristo para gaca guntu' dxin ga zóali' le nácarö lesaca', tsca naca le budödë' Dios lu na'tu' guntu'.

16 Ní'irö gaca guntu' libán que didza' dxi'a ga nacuá' yödzö dzö'ö zí'tu'rö ga zóali'. Caní gaca, bití' gun bayudxi gun ba zxön cuintu' ni'a que dxin núngaca ia'zica'rö bönachi, lë na' budödë' Dios lu në'eguequi.

17 Nazúaj lu guichi lá'ayi le rnna:
Nu rë'ëni bi gun zxön,
le ben cazë' Xanru' ral-la' gun zxön.

18 Nurúajë' dxi'a tu bönni' cate' rnnë' Xanru' nurúajë' dxi'a, en calëga cate' ru'ë caní didza' bönni' na' que la' cuinsë'.

11

Ca nácaqaquië' Pablo, en bönni' tun cuíngaquië' gubáz queë' Cristo

1 Ré'ënda' guá' ilenli' neda' tsanni ni gu'a didza' lu yöl-la' bití' bi nözi quia'. Bulí'sá' ládxi'li' quia'.

2 Ruí'i ládxa'a libí'ili' ca na' Dios caz ruí'i ládxe'ë libí'ili', tu' nácali' ca nácabí' tubí' bi'i nigula ra'bando', naca idú ládxi'bi', rusudxina'-bi' lahuë' Cristo para utsaga ná'alenbi' Lë cazë'.

3 Rádxida' idxín queëli' nu si' ye'e libí'ili', en gun ga usanli' ca nadxí'ili'-në' Cristo idú ládxi'li', ca na' guca queënu Eva, nigula queë' Adán, cate' guzxí' ye'e Satanás tu' xihui' lënu lu yöl-la' sina' que.

4 Caní rnnía' tu' idú ládxi'li' ruí'ili' nu za' queëli' lataj, en run libán que xibá queë' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá'gaca ca náca gaca Bö' Lá'ayi na', en didza' dxi'a na' guzxí' lu ná'ali' lu na'tu' netu'.

5 Réquida' bití' nácara' cuídi'sö ca nácaqaquië' bönni' ni nácatërögaquië' lo, ate' réquili' nácaqaquië' gubáz queë' Cristo.

6 Nadxi ca' naca' cuídi'sö ca ruá'a didza', pero bití' naca' cuídi'sö ca naca yöl-la' réajni'i napa'. Zían luzuí, en zían ca buluí'itu' libí'ili' ca naca yöl-la' réajni'i nápatu'.

7 Nadxi ca' bití' naca dxi'a tu le bena', bití' bi buquizxja' libí'ili' cate' bena' libán ga zóali' que didza' dxi'a. Ben cuina' cá'asö, ate' bena' ga gúcali' libí'ili' zxön.

8 Buguna' dxin le nequi quéguequi ia'zica'rö cö' bönachi queë' Cristo, tu' guzxí'a dumí bulu'nödzjé' légaquië' quia' para guca bena' dxin ga zóali' libí'ili'.

⁹ Cate' guzóalena' libí'ili', en biyadzaj quia', biti' busaca' zi'a nituli' libí'ili', pero lë na' biyadzaj quia', gulunnë' quia' böchi'ru' bila'rúajë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lëbisö ca guna'.

¹⁰ Ni'a que le naca idütë li queë' Cristo le zóalen neda', biti' soa' dxisö, gun ba zxön cuina' ca naca lë ni idú luyú Acaya.

¹¹ ¿Naru' réquitseli' rnnía' caní tu' cabí nadxí'ida' libí'ili'? Nözinë' Dios nadxí'ida' libí'ili'.

¹² Gúntica'sa' ca runa' na'a, para cabí gata' quégaquië' lataj ilún ba zxön cuíngaquië' bönni' ni' ta'nnasë' nácagaquië' gubáz queë' Cristo, en ta'nnë' tunë' xichinë' Lë' ca runtu' netu'.

¹³ Biti' ca' nácagaquië' gubáz nasöl-lë'ë Cristo. Ta'zí' yë'ë ca naca dxin tunë', en tun cuíngacasë' gubáz queë' Cristo.

¹⁴ Biti' ral-la' ubániru' ca tunë' bönni' na'. Lësca' Satanás caz, tu' xihui', rulu'i' cuini ca tu gubáz lá'ayi queë' Dios, ridë' lu bení'.

¹⁵ Que lë ni na' biti' ral-la' ubániru' channö yugu' huen dxin que tu' xihui' na' tu'lu'i' cuíngaquië' ca nupa tun xichini Nu na' naca tsahui'. Udxí quegaquië' ca sa'yéaj le tunë'.

Yugu' le gudí' i guzxaqué'ë Pablo

¹⁶ Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güi' neda' lataj gu'a didza' ca tu bönni' nachixi icjë', para gun ba zxön cuina' tu chí'ido'.

¹⁷ Didza' ni ruá'a biti' naca le rinná bë'ë Xanru', pero ruá'a didza' ca tu bönni' nachixi icjë', run ba zxön cuina'.

¹⁸ Nacu'ë zían bönni' tun ba zxön cuíngaquië' ca nácagaca le tunë' lu yöl-la' bönáchisö quégaquië'. Que lë ni na', neda' ca' gun ba zxön cuina'.

¹⁹ Tu' réquili' rácada'ali', idú ladxí'li' ruí'ili' lataj ilu'ë didza' yugu' bönni' nachixi ícjagaquië'.

²⁰ Ruí'ili' ca' lataj nu gun libí'ili' bönni' nadó'ogaca, o nu cúa le dë queëli', o nu inná be'e libí'ili', o nu ucá'ana libí'ili' cá'asö, o nu capa' rú'ali'.

²¹ Rutuí'ida' rnnía' lë ni: Biti' bentu' caní queëli' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxön cuini, neda' ca' gaca' rugu ladxi', en gu'a didza' ca tu bönni' nachixi icjë'.

²² ¿Naru' nácagaquië' bönni' hebreo?

Lësca' naca' neda'.

¿Naru' nácagaquië' bönni' Israel?

Lësca' naca' neda'.

¿Naru' nácagaquië' zxi'ini xi'sóë' Abraham?

Lësca' naca' neda'.

²³ ¿Naru' nácagaquië' huen dxin queë' Cristo?

Lësca' nácátëra' neda'.

(Na'a ruá'a didza' ca tu bönni' nachixi icjè' cate' rnnía' caní.)

Béntëra' dxin ca gulunè' légaquiè'.

Guyu'a lidxi guiè' ziánrö luzuí ca gula'yü'è légaquiè'.

Gula'zé'eda' neda' yu bönnachi ziánrö luzuí ca guca quégaquiè'.

Guzóa bönnadxi gátia' ziánrö luzuí ca guzóa quégaquiè'.

²⁴ Gayu' luzuí yugu' bönni' judío gula'guínè' neda' guídi.

Tu tu luzuí na' gula'guínè' neda' chënna uruá' luzuí.

²⁵ Tsonna luzuí gula'guínè' neda' gubá'ayi.

Tu luzuí bulu'ladxè' neda' guiöj.

Tsonna luzuí guzóa' tu lè'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

²⁶ Zián luzuí cate' ni' yu'a nöza,

gudöda' gapa guzóa bönnadxi quia' yugu' lu yegu,

en gapa guzóa bönnadxi quia' lu ná'agaquiè' gubán,

en gapa guzóa bönnadxi quia' lu ná'agaquiè' bönni' uládz quia',

en gapa guzóa bönnadxi quia' lu ná'agaquiè' bönni' zi'tu',

en gapa guzóa bönnadxi quia' lu yödzö,

en gapa guzóa bönnadxi quia' lu lataj cá'asö,

en gapa guzóa bönnadxi quia' lu nísado',

en gapa guzóa bönnadxi quia' lu ná'agaquiè' bönni' ta'zí' yë'ë, ta'nnè' ná'agaquiè' böchi'ru' ta'yéajlè'ë Cristo.

²⁷ Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubidxa' nisa.

Zián luzuí biti' guta' quia' bi gahua', o ga utsè'e cuina', o lari' gácua'.

²⁸ Ia'stú, yúgu'tè dza ruúbi ruguí'ida' tu' ruí'ida' ládxa'a yúgu'tè cö' bönnachi queè' Cristo.

²⁹ Cate' nu ricuidí', neda' ca' ricuídi'da'. Cate' nu run ga ichixi iníguiné' tu böchi'ru', rileda' nu run caní.

³⁰ Channö run bayudxi gun ba zxön cuina', gun ba zxön cuina' ca naca le ná'agaca bë' ricuídi'da'.

³¹ ¡Dios, Xuzè' Xanru' Jesucristo, gácatica'sö queè' yöl-la' ba! ¡Lè' nözinè' ruá'a didza' idútè li!

³² Cate' ni' guzóa' lu yödzö Damasco, bönni' ni' guta' lu në'ë uláz queè' bönni' rinná bë'ë, lè' Aretas, bucu'è yugu' bönni' gula'bö' nísie' para ila'zönè' neda',

³³ pero yugu' böchi'ru' ni' bulu'dödè' neda' tu ga ra'a bení' que yu'u, yu'a tu ga'böra zxön, en bulu'zötjè' neda' ní'ilö lu zö'ö run chi'i yödzö na'. Caní guca, bulá' lu ná'agaquiè' bönni' ni' gula'bö' nísie' neda'.

12

Yugu' le bulu'inè' Dios Pablo

¹ Le nácatë bití' ral-la' gun ba zxön cuina'. Sal-la' caní naca, na'a gu'a didza' ca nácacaga le bulu'inë' Xanru' neda', en le buzéajni'inë' neda'.

² Núnbë'a-në' tu bönni' réajlë'ë Cristo, chiguca chidá' iz zoa nu guchë' lë' yehua' yubá. Bití' nözda' channö guyijë' ni' lu idútë le naca cazë', o lu bö' naca cazë'. Tuzë' Dios nözinë'.

³ Nözda' guyázië' lataj lachi queë' Dios, nazí'i le paraíso. Bití' nözda' channö guyijë' ni' lu idútë le naca cazë', o cabí. Tuzë' Dios nözinë'.

⁴ Tsanni ni' zoë' ga na', biyönnë' le tun ga nu rubani, yugu' le bití' dë lataj nu gü'i didza' que.

⁵ Bönni' ni huáca guna' lë' zxön, pero bití' gun ba zxön cuina'. Tuz gun ba zxön cuina' tu' ricuídi'da'.

⁶ La'tu' guë'ënida' gun ba zxön cuina', bití' gaca' bönni' bití' bi nözinë', channö innía' le naca idútë li. Na'a, bití' gun ba zxön cuina' tu' cabí rë'ënda' nu gunrö neda' bal tsca le bilé'e bena' neda', o tsca naca didza' biyöni bë'a neda'.

⁷ Ní'irö, para cabí tödi bë' gun ba zxön cuina' tu' bilé'eda' lë na' tun ga nu rubani, Dios buzöë' tu huë' lu xipëla'a le riláda' ca rilá ga rinë' tu yötsi'. Huë' na' guca ca tu le bugún dxin tu' xihui', para busaca' zi' neda'. Caní guca quia' para cabí tödi bë' gun ba zxön cuina'.

⁸ Tsonna luzuí gúta'yua' lahuë' Xanru', en gunábida' Lë' ugüë' xihuë'a na'.

⁹ Xanru' gudxë' neda': "Nácatë quiu' le ruzá' ládxa'a quiu'. Uzítëru' xibé le ruzá' ládxa'a quiu' cate' ricuídi'nu'." Que lë ni na', rudzëjade'eda' tu' ricuídi'da'. Tu' raca caní quia', rácalentëro yöl-la' huáca queë' Cristo neda'.

¹⁰ Que lë ni na', tu' nadxí'ida'-në' Cristo, rudzëjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribía ladxi' neda', en cate' bi raca quia'. Cate' nacuídi'da', nápatëro caza' yöl-la' huáca queë' Lë'.

Pablo ruí'i ládxe'ë bönachi queë' Cristo nacua' Corinto

¹¹ Naca' tu bönni' bití' bi nözinë' tu' bë'a didza' ca naca le dxi'a bena' neda'. Libí'i cázali' benli' bayudxi bena' caní. Libí'ili' ral-la' gunli' neda' bal, ate' sal-la' bití' bi naca' neda', bití' ca' nácara' cuidi' ca nácacaguië' bönni' ni' nácada'gaguië' lo, ta'nnë' nácacaguië' gubáz queë' Cristo.

¹² Yugu' le bena' lu yöl-la' riböza zxön ladxi' quia' ga ni' zóali' nácacaga bë' naca' gubáz queë' Cristo. Bilé'eli' yugu' le bena', le nácacaga bë', en le tun ga nu rubani, en yugu' yöl-la' huáca zxön que yehua' yubá.

¹³ Tuz le cabí bena' ga zóali' le bena' ga nacua' ia'zica'rö cö' bönachi queë' Cristo. Bití' busaca' zi'a libí'ili' bi gúnnali' le guí'aj gahua'. Bulí'niti lo neda' tu' cabí bena' caní queëli'.

14 Chizóa guída' ga zóali' le bunni luzuí. Biti' bi inaba' gúnnali' quia'. Ré'ënda' gunna cuin cázali' quia', en calëga bi dë queëli'. Yugu' bi'i huë'ënido', biti' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' zxi'inigaquië'.

15 Idú ládxa'a utöa' yúgu'të le dë quia', en udödi cuina' ni'a queëli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queëli' neda'.

16 Nöz quézili' biti' busaca' zi'a libí'ili'. Na'a, bál-lali' innali' guca' sina', ate' len didza' biti' nácatë buzi'a xibali'.

17 ¿Naru' réquitseli' guzxí' yé'eda' libí'ili' cate' gusól-la'a yugu' gubáz quia' ga zóali'?

18 Gúta'yua' lobi' bi'i Tito tséajbi' ga zóali', ate' gusól-la'a-në' böchi'ru' na' tsözxön len lëbi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lëbisö ca runtu' bi'i Tito, en neda', enca' la' lëbisö didza' bë'ëtu'?

19 ¿Naru' réquitseli' rubéaj cuintu' dxi'a loli' libí'ili'? Lahuë' Dios ru'itu' didza' uláz queë' Cristo, böchi' luzá'ado', ate' yúgu'të le runtu' nácatë para gácarö idú yöl-la' réajlë' queëli' Cristo.

20 Rádxida' biti' gácali' ca ré'ënda' gácali' cate' guída' ga zóali', ate' neda' biti' gaca' ca ré'ënili' libí'ili' gaca'. Rádxida' ridil-la' dídza'li', en ruzxé'eli' luzá'ali', en rileli' luzá'ali', en rulidza' dítxali' luzá'ali', en rnnëli' que luzá'ali', en run ba zxön cuinli', en rutsátsali'.

21 Cate' guída' ga zóali', channö caní raca queëli', rádxida' gunë' Dios ga utuí'ida' ca naca queëli', ate' gun bayudxi cödxá' ni'a quégaca zían nupa ni' gulún dul-la', en biti' bulu'bí'i ládxi'gaca ca nácatë le cabí naca tsahui' gulúngaca, en yugu' le gula'zë ládxi'guequi le cabí naca dxi'a.

13

Pablo ruzéajni'inë' bönachi Corinto, en rugapë' Dios légaquië'

1 Le bunni luzuí ni guída' ga zóali'. Nazúaj lu guichi lá'ayi le rnna: "Run bayudxi ila'cuá' chopá tsonna nupa ilún ba nalí channö nu bi uzegui luzë'e didza'."

2 Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zi'tu', rnnía': Channö guída' ga zóali' leyúbölö biti' gaca' nöxaj ladxi' para til-la' légaquië'.

3 Rinábali' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Biti' ca' ricuídi'në' Cristo cate' bi runë' queëli', pero lu yöl-la' huáca zxön queë' runë' bi runë' queëli'.

⁴ Le nácatë gudëë lë'e yaga cruz ca nu ricuidi', pero zoë nabanë' tu' zóalen yöl-la' huáca queë' Dios Lë'. Netu' ca' ricuidi'tu' tsözxön len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵ Buli'yú cuinli' channö réajlë'ëli' Cristo o cabí. Guli'sí' bë' la' cuínsili'. ¿Naru' cabí nözili' zóalenë' Jesucristo libí'ili' channö le nácatë réajlë'ëli' Lë'?

⁶ Runtu' löza chinöz quézili' le nácatë netu' réajlë'ëtu' Cristo.

⁷ Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunli' libí'ili' le naca tsahui' sal-la' guéquili' richixi riníguitu' netu'.

⁸ Biti' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li.

⁹ Que lë ni na' rudzëjatu' cate' ricuidi'tu', ate' libí'ili' ridipa ládxi'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo.

¹⁰ Que lë ni na' ruzúaja' queëli' lu guichi lë ni tsanni ni zoa' zi'tu' ga zóali'. Ní'irö cate' guída' ga zóali' bití' gun bayudxi usaca' zi'a libí'ili', pero uguna' dxin yöl-la' unná bë' nudödë' Xanru' lu na'a, le naca para utipa' ládxi'li', en calëga para usunítia' libí'ili'.

¹¹ Na'a, böchi' luzá'ado', dipa ládxi'li'.

Guli'güi' ládxi'li' gaca idú ca réajlë'ëli' Cristo.

Guli'güi' ládxi'li' ca' lë ni rea' libí'ili'.

Guli'gaca tuz len luzá'ali', en guli'cöza dxi'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribözaru' dxi'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'.

¹³ Yúgu'të böchi' luzá'aru' ni tu'gapë' Dios libí'ili'.

¹⁴ Rinábida'-në' Dios gunë' ga gata' queëli' yúgu'tëli' le ruzá' ládxi'ë' Xanru' Jesucristo queëru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

DIDZA' GUSÖL-LË'Ë PABLO LUYÚ GALACIA

Ruzúajë' Pablo quégaca bönachi luyú Galacia

¹ Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusöl-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti.

² Ruzúaja' queëli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núngaquië' yugu' böchi'ru' ni tu zxön neda'.

³ Rinábida' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

⁴ Jesucristo caz budödi cuinë' lu yöl-la' guti tu' nözi dul-la' nabága'ru' para busölë' rë'u lu le naxihui' raca dza ni zóaru' na'a. Benë' caní tu' naca ca rë'ëni quézinë' Xúziru' Dios.

⁵ ¡Gácatica'sö queë' Dios yöl-la' ba! ¡Ca' caz!

Tuz naca le rinnë dxi'a queë' Jesucristo

⁶ Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxë'ë Jesucristo queëru', ate' na'a rë'ënili' si' ladxi' ná'ali' tu le rinnë dxi'a izá'a.

⁷ Le nácatë bití' ca' zoa ia'tú le rinnë dxi'a pero ruá'a caní didza' tu' nacu'ë bönni' tu'tsë'ë libí'ili', en té'ënë' ulu'tsë'ë le rinnë dxi'a queë' Cristo.

⁸ Channö zoa nu gun ba nalí que tu le rinnë dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'.

⁹ Chigunná caza' caní zí'alö, ate' na'a rnnía' caní leyúbölö: Channö zoa nu gun ba nalí que tu le rinnë dxi'a le cabí naca tuz ca naca lë na' chiguzxí' ladxi' ná'ali', rinábida'-në' Dios udxíë' dö' nu na'.

¹⁰ ¿Réquitseli' rë'ënda' cú'uli' neda' yöl-la' zxön cate' ru'a caní didza'? ¡Biti' ca'! Rë'ënda' urúaja' tsahui' lahuë' Dios. ¿Réquili' rë'ënda' uzaca' baládxil'engaca bönachi neda'? La'tu' rë'ënda' uzaca' baládxil'engaca bönachi neda', bití' gaca' huen dxin queë' Cristo.

Naca böáquië' Pablo bönni' gubáz queë' Cristo

¹¹ Ral-la' inözili' lë ni, böchi' zána'do'. Le rinnë dxi'a na' runa' ba nalí que bití' gulén icja lo ládxi'da'ahuiguequi bönachi.

¹² Cuntu nu bönni' budödë' lu na'a le rinnë dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinnë dxi'a queë'.

13 Chibiyõn quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nözili' ca bena', yenni' gudxía nahua' bõnachi queë' Dios ta'yija ladxi' Cristo, en gú'unda' usulu usunítia' léguequi.

14 Lu le tequi le bach Dios bönni' judío, guyépisëtëra' neda' ca lá'tu'biqui' yúgu'të luzá'a bönni' judío yú'ugaquië' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun cazë'.

15 Caní bena' neda', pero tu' náquië' dxi'i ladxi' Dios, gurö cazë' neda' zí'atëlö ca gulja', ate' bulidzë' neda' para guna' xichinë'.

16 Ní'irö, cate' gú'uni quézinë' Dios, benë' ga núnbë'a-në' zxi'inë', en gusöl-lë'ë neda' tsöjena' libán que le rinnë dxi'a ca naca queë' Lë' lógaca bõnachi izá'a. Cate' benë' caní, biti' yödilja' nu naca bõnachi nu usedi neda'.

17 Cabí guyija' yödzö Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

18 Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza.

19 Tsanni ni' zoa' ni' biti' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böchë'ë Xanru' bilé'eda'.

20 Didza' ni ruzúaja' queëli' lu guichi nácatë. Ni'a queë' Dios biti' ca' rizí' yë'a.

21 Gudödi ni' guyija', gudöda' yugu' yödz luyú Siria, en luyú Cilicia.

22 Yugu' dza ni' biti' núnbë'gaquië' neda' böchi'ru' tu'dubë' queë' Cristo gapa naca luyú Judea.

23 Gula'nözisinë' lë na' gúla'guixjö' quia' ia'zica'rö bõnachi, gula'nná: "Bõnni' na' gudxía nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítie'."

24 Caní guca, gula'gu'ë yöl-la' ba Dios tu' nözda' neda'.

2

Bõnni' gubáz queë' Cristo guzxi' lu ná'agaquië' Pablo

1 Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'.

2 Guyija' ni', en bë'lena' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinnë dxi'a lógaca bõnachi izá'a. Caní bena' tu' gú'unda' cabí ugá'ana nítisö dxin na' chibena', enca' dxin ni runa' na'a.

3 Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpëla'bi' lë na' naca bë' bõnachi queë' Dios ca tun cazë' bönni' judío.

⁴ Le nácatë gula'cuá' bal-la bönachi ni', nupa ni' ta'zí' yë', ta'ná nácatë bõchi'ru', ate' gulë'ëni ilún ga irugu lu xpëla'bi' Tito lë na' naca bë'. Yugu' bõnni' ni núngaquië' tu zxön rë'u pero tu'yusë' ca runru' para iléquite'ënë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulë'ënë' ilunë' ga huóácaru' leyúbölö huen dxin tsaz lu xibá na'.

⁵ Biti' ca' bë'tu' légaquië' lataj. Caní bentu' para gun chí'itu' le nácatë que le rinnë dxi'a para gaca uzí'ili' xibé le rinnë dxi'a na'.

⁶ Yugu' bõnni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ruí'í ládxa'a ca nácaquië'. Dios biti' ruchi'a rusöröë' rë'u ca tu'chí'a tu'sörö bönachi rë'u.

⁷ Biti' bi gula'nná be'e neda' tu' guléquite'ënë' Dios nudödë' lu na'a dxin queë', para tsöjena' libán que le rinnë dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinnë dxi'a lógaca bönachi judío.

⁸ Len yöl-la' huáca queë', Dios benë' neda' bõnni' gubáz queë' para usédida' bönachi izá'a, ca na' benë' Pedro bõnni' gubáz queë' para usédinë' bönachi judío.

⁹ Jacobo, en Pedro, en Juan, bõnni' ni' réquiru' yu'u lu na'agaquië' dxin queë' Cristo, guléquite'ënë' Dios nudödë' lu na'a dxin ni. Que lë ni na' guzxi' ladxí' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío.

¹⁰ Gulá'ta'yusë' lotu' tsönetu' gácalentu' bönachi yechi', ate' lë ni naca tu le ruí'tica'sö ládxa'a runa'.

Ca guca cate' Pablo gudíl-lalenë' Pedro lu yödzo Antiquía

¹¹ Cate' bidxinë' Pedro lu yödzo Antioquía, gudíl-lalena' lë' didza' tu' lë cazë' guchixinë' ca benë'.

¹² Caní guca tu' zí'atëlö gudágulenë' tsözxön yugu' bönachi izá'a ni'. Benë' caní ga bila'dxinrë' bal-la bõnni' dá'gaquië' Jacobo. Ní'irö gusí lahuë' rubíguië', en bítirö gudágulenë' tsözxön bönachi izá'a na' tu' gúdxinë' bi ilunë' bõnni' na' nazí' lu ná'agaquië' ilunë' ga irugu lu xpëla'gaca bönachi izá'a ca rinná bë' xibá queë' Moisés.

¹³ Ní'irö ia'zica'rë' bõnni' judío ni' ta'yija ládxe'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquië'.

¹⁴ Cate' bilé'eda' biti' tunë' ca naca le nácatë le rusedi rë'u le rinnë dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunní'a: "Lí' nacu' bõnni' judío, pero runu' lí' ca túngaca bönachi izá'a, en caléga ca tunë' bõnni' judío.

¿Bizx queë rë'ënu' gunu' ga ilúngaca bönachi izá'a ca tunë' bönni' judío?"

Nulágaca bönachi judío ca na' nulágaca ca' bönachi izá'a

¹⁵ Gudxa' ca' Pedro: "Rë'u ni nácaru' bönni' judío tu' nácagaquië' xuz xiná'aru' judío, en calëga bönachi izá'a, nupa cabí núnbë'gaca Dios.

¹⁶ Nöz quéziru' cuntu nu huóaca tsahui' lahuë' Dios tu' run nu na' tsca rinná bë' xibá queë' Moisés, pero huóaca tsahui' tuzi nu na' reja ladxi' Jesucristo. Lës caní ca' rë'u reja ládxi'ru' Jesucristo para huóacaru' tsahui' lahuë' Dios, en calëga tu' runru' tsca rinná bë' xibá queë' Moisés. Cuntu caz nu huóaca tsahui' lahuë' Dios tu' run tsca rinná bë' xibá queë' Moisés.

¹⁷ Na'a, réquiru' nuhuóacaru' tsahui' tu' reja ládxi'ru' Cristo, pero channö naca bë' nácaru' bönni' dul-la' ca nácagaca bönachi izá'a, ¿innátsaru' runë' Cristo ga runru' dul-la'?" ¡Biti' caz!

¹⁸ Channö ru'í ládxa'a uchisa' le chibuquinja', lë ni naca bë' riguitsja' xibá le gunná bë'ë Dios.

¹⁹ Tu' cabí guca uzóa' didza' xibá na' gunná bë'ë Moisés, guca quia' tsca chinátia'. Tu' caní naca, nulá' na'a lu xibá na' para soa' ibana', en guna' ca rë'ënë' Dios.

²⁰ Naca quia' ca chigútilena' tsözxön Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lë' zxí'inë' Dios, Bönni' na' bidxí'inë' neda', en budödi cuinë' lu yöl-la' guti uláz quia' neda'.

²¹ Biti' rë'ënda' uzóa' tsölá'alö le ruzá' ládxe'ë queëru' Dios. Channö huáca huóáquië' tsahui' tu' bönni' lahuë' Dios tu' runë' tsca rinná bë' xibá queë' Moisés, ní'irö nítisö gútië' Cristo."

3

Le rinná bë' xibá queë' Moisés, en le reja ládxi'ru' Cristo

¹ Libí'ili', tu' canöz, libí'ili', bönni' Galacia. ¿Nuzxi gulú'utsö libí'ili' nëbi para cabirö uzóali' didza' le nácatë? Gate ga rë' bulu'itu' libí'ili' le sa'yéaj ca gútië' Jesucristo lë'e yaga cruz.

² Gudíxjöi'i neda' lë ni. ¿Bidisóalenë' libí'ili' Dios Bö' lá'ayi tu' benli' ca rinná bë' xibá queë' Moisés o tu' guyija ládxi'li' le rinnë dxi'a biyönili'?

³ ¿Nacxi guca nácali' tu' canöz caní? Gusí loli' nácali' bönachi queë' Dios tu' zóalenë' libí'ili' Dios Bö' lá'ayi. ¿Réquitseli' huáca udxí gunli' ga guéquili' queë' Dios rácasö queëli'?

⁴ ¿Guca nítisö guca queëli' yúgu'të lë na' guzxaca' gudí'ili'? ¡Biti' ca' guca caní!

⁵ Cate' Dios risöl-lë'ë queëli' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runë' caní tu'

runli' ca rinná bē' xibá queē' Moisés o tu' reja lādxi'li' le rinnē dxi'a na' biyōnili'?

6 Lu guichi lá'ayi rnna: Abraham guyija lādxē'ē Dios, ate' Dios gunnē' náquiē' bōnni' tsahui' tu' guyija lādxē'ē Lē'.

7 Que lē ni na na' ral-la' inōzili', nupa na' ta'yija ladxi' Dios nácagaca idú zxi'ini xi'sóē' Abraham.

8 Lu guichi lá'ayi ruí'i didza' zí'atēlō ca gunē' Dios, innē' nácagaquiē' tsahui' bōnni' izá'a ila'yija lādxē'ē Lē'. Que lē ni na' Dios gudíxjōi'inē' Abraham zí'atēlō ca naca le rinnē dxi'a, gunnē': "Lu nē'ē Zxi'ini xi'sú' guna' ga gaca dxi'a quégaca bōnachi idutē yōdzōlió."

9 Caní naca, Abraham guyija lādxē'ē Dios, ate' Dios benē' ga guca dxi'a queē'. Lēs caní ca' na'a, Dios runē' ga raca dxi'a quégaca yúgu'tē nupa ta'yija ladxi' Lē'.

10 Nupa na' tu'zxōni ladxi' ulu'huōáca tsahui' tu' túngaca ca rinná bē' xibá queē' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'tē nupa na' cabí túngaca idutē ca rinná bē' xibá na' nabága'gaca xíguia'."

11 Na'a, naca bē' cuntu nu huōáca tsahui' lahuē' Dios tu' run nu na' le rinná bē' xibá na', tu' zoa lu guichi lá'ayi le rnna: "Nu na' nuhuōáca tsahui' lahuē' Dios soa ibán tu' reja ladxi' Lē'."

12 Ca na' nuhuōáca tsahui' lahuē' Dios nu na' reja ladxi' Cristo nadzá' ca naca que nu na' ruzxōni ladxi' nuhuōáca tsahui' tu' run ca rinná bē' xibá queē' Moisés. Zoa lu guichi lá'ayi le rnna: "Nu na' run idutē ca rinná bē' xibá na' soa ibán tu' run caní."

13 Cristo busölē' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu quégaca yúgu'tē nupa na' dá'gaca lē'e yaga."

14 Caní guca queē' Cristo para gaca gunē' Dios ca na' guzxi' lu nē'ē queē' Abraham, gunē' ga gaca dxi'a quégaca bōnachi izá'a lu nē'ē Jesucristo, en para gaca gunē' ga idisóalenē' Dios Bō' lá'ayi rē'u channō uyija lādxi'ru' Lē', ca na' guzxi' lu nē'ē Dios gunē'.

Le rinná bē' xibá queē' Moisés, en le guzxi' lu nē'ē Dios gunē' queēru'

15 Na'a, böchi' zána'do', uzúaja' queēli' tu le rucudzu' didza', tu le raca queēru'. Cate' chopá bōnni' chigulunē' tuz xtídza'gaquiē', en chigulunē' tsutsu didza' na', cuntu nu gaca utsá' didza' na', en cabí gaca nu bi udá' lē'e didza' na'.

16 Dios guzxi' lu nē'ē bi gunē' queē' Abraham, en que zxi'ini xi'sóē'. Ga zoa lu guichi lē ni, bití' rnna: "Quégaca zxi'ini xi'sú'", le ruí'i didza' que zían bōnachi, pero rnna: "Que zxi'ini xi'sú'." Lē ni ruí'i didza' que tuz bōnni', Lē' Cristo.

17 Lë ni na' le rë'ënda' inní'a': Dios benë' tuz didza' len Abraham, en guzxí' lu në'ë gunë' ca na' gunné'. Le nazúaj lu xibá queë' Dios, le benë' Dios tapa gayuá' yu' chi-uruá' iz gudödi ni' cate' gudxë' caní Abraham, bití' gaca ugúa lë na' guzxí' lu në'ë Dios gunë', en cabí gaca usulu le.

18 Na'a, channö ral-la' gunru' ca rinná bë' xibá na' para sí'ru' le guzxí' lu në'ë Dios gunsë', bíti'rö naca tu le guzxí' lu ná'asë' gunë'. Dios runsë' caní tu' caní guzxí' lu në'ë bi gunë' queë' Abraham.

19 Channö caní naca, ¿bizx queë' gunná bë'ë Dios xibá na' nazúajgaca lu didza' queë'? Dios gunná bë'ë caní para gaca bë' xíguia' nabága'ru', pero gúcasö caní ga bidxintë dza na' bilá' lahuë' zxi'ini xí'sóë' Abraham na', Bönni' na' guzxí' lu në'ë Dios gunë' queë' lë na'. Yugu' le gunná bë'ë Dios lu xibá queë', gusöl-lë'ë yödzölió ni lu ná'agaquië' gubáz lá'ayi queë', ate' Moisés budödë' didza' ca nácagaca xibá na'.

20 Bití' naquín nu udödi didza' cate' naca tuz nu run tuz didza', ate' Dios, tuz náquië'.

Bizx queë' gunná bë'ë Dios le zóagaca lu xibá queë'

21 Le nazúajgaca lu xibá queë' Dios, ¿ta'dá'gaca lë na' guzxí' lu në'ë Dios gunë'? ¡Bití' ca! La'tu' gunná bë'ë Dios tu xibá le gaca gun ga sóaru' ibanru' tsaz, ní'rö huáca huóácaru' tsahui' lahuë' Dios channö gunru' ca na' rinná bë' xibá na'.

22 Tsca naca lë na' nazúaj lu guichi lá'ayi, yúgu'tëru' nabága'ru' dul-la'. Caní naca para gaca sí'ru' lë na' guzxí' lu në'ë Dios gata' queëru' cate' tseja ládxi'ru' Jesucristo.

23 Zí'atëlö ga bidxín dza gaca tseja ládxi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'ë lidxi gufë. Caní guca ga bidxintë dza bilá' lahui gaca huóácaru' tsahui' channö uyija ládxi'ru' Lë'.

24 Caní naca, le nazúaj lu xibá queë' Dios gunná be'e rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóácaru' tsahui' lahuë' Dios channö uyija ládxi'ru' Lë'.

25 Na'a, tu' bidxín dza gaca huóácaru' tsahui' channö uyija ládxi'ru' Cristo, bíti'rö inná be'e rë'u lë na' busedi rë'u.

26 Yúgu'tëli' nácali' bí'i queë' cazë' Dios tu reja ládxi'li'-në' Jesucristo, en chinácali' tuz len Lë'.

27 Yúgu'të nupa nadílagaca nisa para huóácagaca tuz len Jesucristo, nuhuóácagaca ca náquië' Lë cazë'.

28 Bíti'rö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'.

29 Na'a, channö néquili' queë' Cristo, nácali' ca' xzí'ini xi'sóë' Abraham, ate' nazí'ili' lë na' guzxi' lu në'ë Dios gunnë' queë' Abraham.

4

1 Lë ni le ré'ënda' innía': Tsanni ni ribözabi' tu bi'i bönni'do' sí'ibi' bi ral-la' gunnë' xúzibi' queë'bi', ni' nácabi' bí'ido', en bití' nayëpisëtë'röbi' ca raca que tu nu naca tsaz huen dxin, sal-la' le nácatë nequi queë'bi' yúgu'të.

2 Tsanni ni' nácabi' bí'ido', nacuá' nupa tun chi'i lëbi', en tu'gún dxin le nequi queë'bi' ga idxintë dza chinuzóë' xúzibi' queë'bi'.

3 Lës caní raca ca' queëru'. Tsanni ni' gúcaru' ca bí'ido', gunná be'e xibá na' ré'u ca raca quégaca bönachi yödzölió ni.

4 Cate' bizá'a dza, Dios gusól-lë'ë xzí'ini cazë' ni. Gúquië' xzí'ininu tu nigula ca nácaru' ré'u, en gunná be'e le zoa lu xibá quégaca bönni' judío Lë'.

5 Caní guca queë' para guca busölë' nupa na' rinná be'e le zoa lu xibá léguequi, para gaca huöácaru' bi'i queë' Dios.

6 Para gaca bë' chinácali' bi'i queë' cazë', Dios guchizë' Dios Bö' lá'ayi ládxi'do'oli', ate' Lë cazë' rulidzë' Dios uláz queë'li', rnnë': "Xuza'."

7 Caní naca, chinácali' bi'i queë' Dios, en bití'rö nácali' ca yugu' bönni' tsaz nácagaquië' huen dxin. Na'a, tu' nácali' bi'i queë' cazë' Dios, Lë cazë' nazí' ladxi' në'ë guequi queë'li' le nequi queë' tu' nácali' tuz len Cristo.

Pablo ru'i ládxe'ë bönni' Galacia ta'yija ládxe'ë Cristo

8 Cate' ni' bití' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benli' dxin quégaca budó' néquini. Bití' ca' nácagaca budó' na' Dios.

9 Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë' ré'ënili' ubí'ili' yugu' lu xibá cané na' cabí nu uzí' xibé? ¿Rë'ënili' huöácali' huen dxin tsaz, en gunli' ca rinná bë' xibá na'?

10 Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz.

11 Rádxida' bi gaca queë'li'. ¿Naru' nuhuöáca nítisö dxin bena' para gúnbë'ëli' le nácatë?

12 Ráta'yua' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Bití' bi le cabí naca dxi'a benli' quia' neda'.

13 Chinöz quézili' bizx queë' na' gusí lahua' runa' libán loli' que le rinnë dxi'a. Bena' libán ni' tu' güf'ida'.

14 Bití' bucá'anali' neda' cané, en cabí buzóali' neda' tsölá'alö sal-la' bigútíli' ca guca yödzöhuë' quia' na'. Benli' neda' bal,

tuz ca gunli' bal tu gubáz lá'ayi queë' Dios, o ca runli' bal Jesucristo caz.

¹⁵ Budzéjalë'ëli' dza ni'. ¿Bizxi guca queëli' tu' cabirö raca caní? Lë ni gaca innía' ca guca queëli': La'tu' huáca gunli', bubéajli' guió'j lo quézili', le gúnnali' quia'.

¹⁶ Na'a, ¿réquili' nuhuöáca' tu nu riléde'e libí'ili' tu' gudxa' libí'ili' le nácatë'?

¹⁷ Bönni' ni' tu'tsë'ë libí'ili' tu'í ládxe'ë libí'ili', pero calëga para gaca dxi'a queëli'. Të'ënë' ilunë' ga ucá'anali' netu' para güi' ládxi'li' légaquië'.

¹⁸ Na'a, naca dxi'a zoa nu ruí'i ladxi' libí'ili', pero tuz channö naca para gaca dxi'a queëli'. Caní ruí'itica'sö ládxa'a libí'ili', en calëgasö cate' ni' zóalena' libí'ili'.

¹⁹ Libí'ili', zxi'ina'do'. Ca na' raca queënu nigula chizóa sóabi' bí'ido' queënu, riguí'i rizáca'nu, lës caní riguí'i rizáca'a neda' ni'a queëli' leyúbölö ga idxinrö dza gácali' idú ca náquië' Cristo.

²⁰ Nácaru la' zóalena' libí'ili' na'a para gaca güi'ilena' libí'ili' didza' nadzá'alö, tu' ruúbi ruguí'ilë'ëda' ni'a queëli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' rë'ënili' uzóa cuinli' lu xibá queë' Moisés, guli'ná'tsöca' didza' ni gu'a. ¿Catu caz buzë nágalí' le rnna xibá na'?

²² Rnna xibá na' caní: gula'cuá'abi' chópabi' bi'i bönni'do' queë' Abraham. Tubi' gúcabi' zxi'ininu tu nigula tsaz nácanu huen dxin, ate' ia'tubi' gúcabi' zxi'ininu nigula nazannu.

²³ Zxi'ininu nigula huen dxin na' gúlajbi' lu ni'a lu na' tu bönni' tsca tálajbi' yúgu'të bí'ido', pero zxi'ininu nigula nazannu na' gúlajbi' tu' guzxi' lu në'ë Dios gunë' ga gálajbi'.

²⁴ Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopá didza' Dios bënlenë' bönachi. Tu didza' na' naca le buzöë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácacaca ca zxi'ininu Agar, en nácacaca ca huen dxin tsaz lu xibá na'.

²⁵ Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzo Jerusalén na'a dza, tu' naca yödzo na' ca tu bönni' tsaz náquië' huen dxin tsözxön len nupa nacué' lu yödzo na'.

²⁶ Jerusalén na' zoa yehua' yubá nazán, ate' rë'u ni nácaru' bönachi uládz que yödzo ni'.

²⁷ Nazúaj lu guichi lá'ayi le rnna: Budzeja, nigula huödx, cabí nacué' zxi'inu'.

Lu yöl-la' rudzeja quiu' gurödxí'a, sal-la' catu caz guca quiu' le riguí'i rizáca'nu nigula

chizóa sóabi' bí'ido' queénu.

Budzeja tu' sal-la' nusán nē'eguequi bönachi li',

gunē' Dios ga ila'yántērō zxi'ínu'

ca bi'i queénu nigula zóalennu bönni' queénu.

²⁸ Libí'ili', böchi' zána'do', rē'u ni nácaru' ca gúcabi' Isaac, zxi'inē' Abraham. Nácaru' ca yugu' zxi'ini xi'sóē' Abraham, guzxi' lu nē'ē Dios gata' queē'.

²⁹ Dza ni', bi'i na' gúlajbi' ca tálajbi' yúgu'tē bí'ido', gudxia ná'abi' bi'i na' gúlajbi' tu' nözi yöl-la' huáca queē' Dios Bö' lá'ayi. Lēs caní raca ca' queēru' na'a, ta'bía no bönachi yödžölió ni rē'u.

³⁰ ¿Bizxi' rna le zoa lu guichi lá'ayi? Caní rna: “Gurú'una-nu nigula na' tsaz nácanu huen dxin tsözxön len zxi'ininu, tu' biti' gaca zxi'ininu nigula na' sí'ibi' tsözxön zxi'ininu nigula nazannu le guzxi' lu nē'ē Dios guequi queēbi' zxi'ininu nigula nazannu na'.”

³¹ Caní naca, böchi' zána'do'. Biti' nácaru' ca nácabi' zxi'ininu nigula na', tsaz gúcanu huen dxin, pero nácaru' ca zxi'ininu nigula nazannu na'.

5

Guli'gún chi'i cuinli', ugá'anali' lu yöl-la' nazán

¹ Chinazanru' tu' busanē' Cristo rē'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queē' Moisés para cabí gácali' ca tu bönni', tsaz naquiē' huen dxin.

² Buli'zē nágali' neda'. Neda', Pablo, rea' libí'ili', channö ru'ili' lataj nu ichugu lu xpéla'li' ca rinná bē' xibá na', biti' ca' uzí'ili' xibé le benē' Cristo.

³ Leyúbölö rē'ēnda' guía' núti'tēs bönni' ru'ē lataj nu ichugu lu xpélē'ē caní, run bayudxi gunē' idutē ca le rinná bē' xibá queē' Moisés.

⁴ Nuli' réquili' huóacali' tsahui' lahuē' Dios tu' runli' ca rinná bē' xibá na', chibulá'alenli'-nē' Cristo. Chibusán ná'ali' le ruzá' ladxē'ē Dios queēru'.

⁵ Rē'u ni ruzxöni ladxí'ru' huóacaru' tsahui' lahuē' Dios ni'a que yöl-la' huáca queē' Dios Bö' lá'ayi tu' reja ladxí'ru' Cristo.

⁶ Channö nácaru' tuz len Jesucristo, biti' bi run channö narugu lu xpéla'ru' ca rinná bē' xibá na' o channö cabí narugu caní lu xpéla'ru'. Le run bayudxi naca tseja ladxí'ru' Cristo, le run ga idxí'iru' luzá'aru'.

⁷ Dxí'ado' guca ca gusí loli' runli' dza ni'. ¿Nuzxi ben ga bucá'anali' le nácate'?

⁸ Biti' benē' Dios, Bönni' rulidzē' libí'ili', ga benli' caní.

⁹ Biti' gal-la ladxí'li' lē na' rna: “Láti'sö cúa zi que yöta xtila ruhuóázx idutē cúa ga nayú'u cúa zi na'.”

10 Tu' nácaru' tuz len Xanru', runa' löza ca naca queëli', sa' ládxi'li' tuz ca rizá' ládxa'a neda', ate' Dios gun zi'ë bönni' na' rutsë'ë libí'ili', núti'tës nu naca bönni' na'.

11 Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpëla'guequi ca rinná bë' xibá queë' Moisés. Channö runa' caní, ¿bizx queë ta'bía nahuë' bönni' judío neda'? La'tu' rusédida' caní, cuntu nu ilé neda' tu' runa' libán ca gútië' Cristo lë'e yaga cruz.

12 Ca naca que nupa ni' tu'tsá' libí'ili', t'ë'ëni irugu lu xpëla'li' lë na', nácöru la' ila'chugu tsaz cuínguequi.

13 Ca naca queëli', böchi' zána'do', Dios bulidzë' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizësö ládxi'li', pero para gunli' dxin que luzá'ali', tuli' ia'tuli', tu' nadxí'ili' luzá'ali'.

14 Yúgu'të le rinná bë' xibá queë' Dios rusudxín nu na' run ca rinná bë' xibá na' rna: "Ral-la' idxí'ínu' luzó'o ca nadxí'í cuínu'."

15 Channö rizí' quídza'li' luzá'ali' tuli' ia'tuli', runli' ca tunba' böa' guí'a sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

Le runru' lu yöl-la' bönáchisö queëru', en le runru' len yöl-la' huáca queë' Dios Bö' lá'ayi

16 Lë ni na' rea' libí'ili': Guli'güi' latja inná bé'enë' libí'ili' Dios Bö' lá'ayi, ate' ní'irö bítirö gunli' ca rizësö ládxi'ili' lu yöl-la' bönáchisö queëli'.

17 Yugu' le rizë ládxi'ru gunru' lu yöl-la' bönáchisö queëru' bití' röjlöz le rë'ënë' Dios Bö' lá'ayi gunru', ate' lë na' rë'ënë' Dios Bö' lá'ayi bití' röjlöz le rë'ëni'ru' gunru' lu yöl-la' bönáchisö queëru'. Chopa ni, bití' röjlözgaca, en que lë ni na' bití' gaca gunli' ca rë'ëni' quezili'.

18 Channö ru'ili' lataj inná bé'enë' Dios Bö' lá'ayi libí'ili', bítirö inná be'e xibá queë' Moisés libí'ili'.

19 Naca bë' le tun bönachi lu yöl-la' bönáchisö quéguequi. Tun dul-la' le riguitsaj xibá que yöl-la' nutsaga na', enca' dul-la' le lë'ë.

Tun yugu' le naxihui', en yugu' le catsahui'.

20 Téquiguequi le bach budó' néquiniguequi.

Tun yöl-la' gudzá'.

Tu'dí'i luzë'eguequi, en ta'díl-lalen léguequi.

Tu'zxé'e luzë'eguequi, en ta'lé nupa na', en tu'huídi'.

Ta'rúaj choplö, en tu'béaj tsölá'alö nupa dá'gaca léguequi.

21 Ta'zé ladxi' le dë que luzë'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' zí'alö, rnnía': Nupa túngaca caní biti' ca' ila'deli' ila'yú'u ga na' rinná bë'ë Dios.

²² Channö zóalen Dios Bö' lá'ayi rë'u runru' caní:

Nadxi'iru' luzá'aru'.

Rudzeja ládxi'ru'.

Zoa dxi ládxi'do'oru'.

Ribözaru' zxön ladxi'.

Ruí'i ládxi'ru' luzá'aru'.

Nácaru' dxi'i ladxi'.

Rusudxinru' xtídza'ru'.

²³ Nácaru' nöxaj ladxi'.

Rinná be'e cuinru'.

Biti' ca' gunná bë'ë Moisés rë'u para cabí gunru' yugu' le caní.

²⁴ Nupa néquiguequi queë' Cristo bíti'rö tun ca tē'ëni quez, en cabí tun le ta'zësö ladxi' lu yöl-la' bönáchisö queguequi.

²⁵ Dios Bö' lá'ayi runnë' yöl-la' na'bán queëru'. Lë' cazë' ral-la' inná bé'enë' rë'u ca naca yúgu'të le runru'.

²⁶ Biti' ral-la' gun ba zxön cuinru', en cabí utsá'aru' luzá'aru', en cabí uzxé'aru' luzá'aru' turu' ia'turu'.

6

Ral-la' gácalenru' luzá'aru' turu' ia'turu'

¹ Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bö' lá'ayi libí'ili', ral-la' gunli' ga ubí'i ládxi'ë bönni' na', pero run bayudxi gunli' caní lu yöl-la' nöxaj ladxi' queëli', en uyú cuinli' tsate' cu'u tu' xihui' libí'ili' nöza dul-la'.

² Gulí'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'enë' Cristo rë'u.

³ Channö zoa nu réqui chinadeli' yöl-la' nayëpisë, en biti' bi nadeli' nu na', nu ni na' rizi' ye'e la' cuinsi.

⁴ Tuhuéaj tuhuéajë' bönni' ral-la' uchi'a usöröë' que le runë'. Ní'irö channö urúajë' dxi'a, huáca gun ba zxön cuinë' ni'a que le chinunë', en biti' gun bayudxi uyüé' ca núngaca ia'zíca'rö bönachi channö ba benrë' dxi'a o cabí.

⁵ Tuhuéaj tuhuéajë' bönni' ral-la' gu'ë le nusubáguë'ë Dios lë'.

⁶ Channö zoa nu rusedi libí'ili' ca naca le rinnë dxi'a, ral-la' unödzejali' nu na' rusedi libí'ili' lati' que yúgu'të le do' dë queëli'.

⁷ Biti' si' ye'e cuinli' tu' cuntu nu gaca si' ye'e Dios. Ulápali' tsca naca le rázali'.

⁸ Channö le rázali' naca yugu' le runli' ca rizësö ládxi'li' lu yöl-la' bönáchisö queëli', le ulápali' gaca yöl-la' guti. Channö le rázali' naca yugu' le runli' ca raza ládxi'ë Dios Bö' Lá'ayi,

ulápalí' le gunnë' Dios Bö' lá'ayi queé'li', le naca yöl-la' na'bán idú.

⁹ Caní naca, bití' ral-la' huöa ládxi'ru' gunru' le naca dxi'a, tu' channö cabí huöa ládxi'ru', idxín dza uláparu'.

¹⁰ Que lë ni na', bätati'tës gata' queëru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija ladxi' Cristo.

Le buzúajë' Pablo lu guichi ga ruúdx

¹¹ Bulí'yú cate' bach didza' ni ruzúaja' lu guichi len na' cuina'.

¹² Nupa na' t'ëni ilún ga irugu lu xpéla'li' ca rinná bë' xibá queë' Moisés, túngaca caní para ulu'rúaj dxi'a lógaca bönachi, en cabí bi ilún quéguequi tu' túngaca libán ca gútië' Cristo lë'e yaga cruz.

¹³ Yugu' bönni' na' ta'zí' lu ná'agaquië' le narugu lu xpéla'gaquië' ca rinná bë' xibá queë' Moisés, bití' tu'zöë' didza' idutë' ca rna xibá na'. Të'ënë' ilunë' ga irugu lu xpéla'li' para gaca ilún ba zxön cúngaquië' tu' ta'nná bé'enë' libí'ili' para irugu lu xpéla'li' caní.

¹⁴ Ca naca quia' neda', cú'usa' yöl-la' ba le benë' Xanru' Jesucristo cate' gútië' lë'e yaga cruz. Tu' nözi le benë' Cristo lë'e yaga cruz, yugu' le dë yödzülió ni naca quia' ca tu le chinati, bití' ruí'i ládxa'a le, ate' neda' naca' quégaca bönachi yödzülió ni ca tu bönni' nati, bití' tuí'i ladxi' neda'.

¹⁵ Channö nácaru' tuz len Jesucristo, bití' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e ládxi'do'oru'.

¹⁶ Yúgu'të bönni' na' tunë' ca rinná bë' xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquië', en huéchi' ládxi'ë' légaquië'.

¹⁷ Na'a zë lo, cuntu nu bönni' ral-la' utsë'ë neda', tu' nácagaca bë' butsóa zóagaca lu xpéla'a naca' huen dxin queë' Xanru' Jesús.

¹⁸ Na'a, böchi' zána'do', rinábida'-në' Xanru' Jesucristo uzá ládxi'ë' queé'li' yúgu'tëli'. Ca' caz.

DIDZA' GUSÖL-LË'Ë PABLO YÖDZÖ ÉFESO

Pablo rugapë' Dios bönachi queë' Cristo nacua' Éfeso

¹ Neda', Pablo, naca' gubáz nasöl-lë'ë Jesucristo tu' gú'uni quézinë' Dios gaca' caní. Rugapa' Dios libí'ili', zóali' Éfeso. Néquili' quez queë' Dios, en réajlë'ëli' Jesucristo.

² Rinábida'-në' Xúziru' Dios, enca' Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'.

Le naca queë' Dios Bö' Lá'ayi rata' queëru'

³ ¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queëru' yúgu'të le naca dxi'a que yehua' yubá, le runë' Dios Bö' Lá'ayi ga rata' queëru'.

⁴ Zí'atëlö ca benë' Dios yödzölió ni, guró cazë' rë'u para guéquiru' quez queë' tsözxön len Cristo, en gácaru' bönachi lá'ayi queë', en gácaru' idú dxi'a lahuë' Lë'.

⁵ Dios bucözë' zí'atëlö si' lu në'ë rë'u ca xzí'ini cazë' tsözxön len Jesucristo, tu' guyaza ládxë'ë gaca caní, en tu' naca le gú'uni quézinë' gunë'.

⁶ ¡Ral-la' cú'utica'siru'-në' Dios yöl-la' ba ni'a que le buzá' ládxë'ë queëru', yugu' le bénnasë' queëru' tu' nácaru' tuz len Xzí'inë', Nu na' nadxí'inë'!

⁷ ¡Cristo böá'uë' rë'u cate' ni' gútië' uláz queëru' para gaca uniti lahuë' Dios rë'u ca naca dul-la' nabága'ru'! ¡Zxöntëro' naca le buzá' ládxë'ë Dios queëru',

⁸ lë na' rúnnadë'ë Lë' queëru'! ¡Lu yöl-la' rácada' queë', en lu yöl-la' réajni'i queë'

⁹ benë' Dios le bucözë' queëru', ate' buluf'inë' rë'u lë na' bigachi', le buzóa cazë' zí'atëlö usudxinë' lu në'ë Cristo!

¹⁰ Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të le dë, le nacua' yehua' yubá, en le nacua' yödzölió ni.

¹¹ Tu' nácaru' tuz len Cristo, Dios guró cazë' rë'u zí'atëlö para guequi queëru' le nequi queë' Xúziru' Dios, lë na' bucözë' queëru' ca naca le gú'uni quézinë' Dios, Nu run yúgu'të ca rë'ëni quézinë' Lë'.

¹² Caní benë' Dios para cú'uru'-në' yöl-la' ba ca naca yöl-la' zxön queë', rë'u ni ruzxöni ládxi'ru'-në' Cristo zí'atëlö ca ia'zica'rö bönachi.

¹³ Lësca' caní guca queéli'. Cate' biyönili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë'

queëli' le naca bē' nácali' queë', tu' guchíziē' icja ládxi'do'oli' Dios Bō' Lá'ayi, Nu na' guzxi' lu nē'ē Dios isōl-lē'ē queëru'.

14 Tu' zóalenē' Dios Bō' Lá'ayi rē'u, naca lōza guequi queëru' le nequi queë' Xúziru' Dios cate' údxi huóá'uē' rē'u, rē'u na' chinéquiru' queë'. Caní naca para gaca yōl-la' ba que yōl-la' zxōn queë'.

Pablo rinábinē' Dios gunnē' queëru' yōl-la' réajni'i

15 Que lē ni na', cate' biyōnda' ca réajlē'ēli'-nē' Xanru' Jesús, en ca nadxí'ili' yúgu'tē bōnachi queë' Dios, ga ridxintē na'a dza

16 biti' ca' rusana' rea'-nē' Dios: "Xclenu'", ca naca queëli'. Rōjneda' libí'ili' cate' rulidza'-nē' Dios.

17 Rinábida'-nē' Dios queë' Xanru' Jesucristo, Dios na' náquiē' Xúziru' nayēpisētērē', rinábida'-nē' isōl-lē'ē Dios Bō' Lá'ayi queëli', Bō' na' runna yōl-la' réajni'i queëru', en rulu'i rē'u ca naca cazē' Dios, para gaca idú ca núnbē'ëru'-nē'.

18 Rinábida'-nē' Dios uzéajni'inē' libí'ili' lu icja ládxi'do'oli' para gaca inōzili' ca naca le runru' lōza, lē na' bulidzē' libí'ili' para uzí'ili' xibé, en para inōzili' ca naca yōl-la' tsahui' que yehua' yubá, le guequi quégaca nupa néquiguequi queë' Dios,

19 enca' para inōzili' cate' zxōn naca yōl-la' huáca queë', le rácalen rē'u ni réajlē'ëru' Lē'. Yōl-la' huáca zxōn ni naca la' lēbisō na' bulu'e lahui Dios

20 cate' ni' busubanē' Cristo lu yōl-la' guti, en benē' ga gurō'ē cuita lē'ē Lē cazē' ga nayēpisētērē' ni' yehua' yubá.

21 Rinná bé'enē' nupa ni' ta'nná bē', en nupa ni' dē lu nē'eguequi, en nupa ni' nadéli'gaca yōl-la' huáca, en nupa ni' nácagaca xan. Cristo nayēpisētērē' ca yúgu'tē nupa nadéli'gaca yōl-la' unná bē' yōdzōlió ni, en lu yōdzōlió si' za'.

22 Dios budōdē' lu nē'ē Cristo yúgu'tē le dē para inná bé'enē' le, en buzōē' Lē' quégaca bōnachi queë' para gáquiē' Xanru' lu yúgu'tē le nequi queëru'.

23 Yugu' bōnachi queë' Cristo nácagaca ca idútē le naca cazē', ate' raquiē' Lē' idú lu le naca cazē' na'. Run cazē' Lē' ga raca idú yúgu'tē le dē.

2

Nuláru' tu' nadxí'inē' Dios rē'u

1 Dios chibennē' yōl-la' na'bán idú queëli', sal-la' gúcali' zí'atēlō ca bōnni' nátigaca tu' nōzi dul-la' nabága'li', en ni'a que dō' biá'ali'.

2 Dza ni' benli' lēbisō ca tun bōnachi bití' nácagaca tsahui' nacuá' yōdzōlió ni, en benli' ca gú'uni tu' xihui', nu rinná bē' lu bō'os, en rugún dxin nupa bití' túngaca ca rna xtidzē'ē Dios.

3 Lēsca' caní gúcaru' yúgu'tëru' rē'u. Benru' ca guzēsō ládxi'ru', en ca guyaza ládxi'ru' lu yōl-la' bōnáchisō queëru'.

Que lë ni na' gubága'ru' dul-la' lahuë' Dios le nun ga gunë' rë'u xíguia' ca gunë' quéguequi ia' zíca' rō bōnachi.

⁴⁻⁵ Ní'irō cate' ni' nácaru' ca bōnni' nátigaca tu' nōzi dul-la' gubága'ru', Dios busubanë' rë'u lu yōl-la' guti tsōzxōn len Cristo tu' buéchi' lādxe'ë rë'u, en bidxí'ide'enë' rë'u. Nuláli' tu' zoa le buzá' lādxe'ë Dios queëli'.

⁶ Dios busubanë' rë'u tsōzxōn len Cristo para gunë' ga cō'ōru' tsōzxōn len Lë' ga ni' rinná bē'ë yehua' yubá.

⁷ Caní benë' Dios, en bulu'ínë' bōnachi si' zá'gaca ca naca yōl-la' tsahui' que le buzá' lādxe'ë queëru', tu' budödë' Jesucristo ni'a queëru', le naca bē' ca nadxí'ide'enë' rë'u.

⁸ Nuláli' tu' zoa le buzá' lādxe'ë Dios queëli' tu' réajlë'ëli' Cristo. Busölë' libí'ili', calëga tu' nacuá' le naca dxi'a benli' libí'ili', pero tu' naca le runsë' Dios.

⁹ Cuntu nu gaca gun ba zxōn cuini tu' nulá, tu' cabí nulá nu na' tu' nacuá' le naca dxi'a nun nu na'.

¹⁰ Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácagaca dxi'a, le bucözë' zí'atëlō gunru'.

Rō'ō dxi icja lādxi'do'oru' lahuë' Dios ni'a que le benë' Cristo

¹¹ Guli'tsōjnë' ca gúcali' zí'atëlō. Gúcali' bōnachi izá'a, en que lë ni na' yugu' bōnni' judío, bōnni' na' ta'chúguië' lu xipëla'gaquië' le naca bē' dá'gaquië' Dios, en nazí' lágaquië' bōnni' narugu lu xipëla'gaquië', ta'nnë' nácali' libí'ili' bōnni' biti' narugu lu xipëla'gaquië'.

¹² Dza ni' nubíga'li' ga zoë' Cristo. Gúcali' bōnni' zi'tu' lógaca bōnachi Israel, en biti' buzí'ili' xibé didza' benë' tsutsu Dios, en guzxí' lu nē'ë bi gata' quégaca bōnachi queë'. Guzóali' yōdzöliō ni, biti' zoa le runli' löza, en biti' núnbë'ënili'-në' Dios.

¹³ ¡Na'a, nácali' tuz len Jesucristo! ¡Zí'atëlō nubíga'li' libí'ili' zi'tu' ga zoë' Dios, pero na'a nudxíguë'ë Dios libí'ili' gála'sō tu' gútië' Cristo uláz queëru'!

¹⁴ Lë cazë' Cristo runë' ga rō'ō dxi icja lādxi'do'oru' lahuë' Dios. Lë' benë' ga yugu' bōnni' judío, en yugu' bōnni' zi'tu' bulu'huoáquië' tuz bōnachi, en busúluë' yōl-la' rilé le guléaj légaquië' choplō ca tu zō'ō zxōn.

¹⁵ Lë ni benë' Cristo cate' gútië' uláz queëru', en gudúë' yugu' xibá, en yugu' le rinná bē' nazúajgaca lu xibá quégaca bōnachi judío, ate' chopa cō' bōnachi na', bunë' tuz bōnachi cubi, nupa nácagaca tuz len Lë cazë'. Caní benë', en gulequi dxíë' yōl-la' rilé na'.

¹⁶ Cate' gútië' Cristo lë'e yaga cruz, busúluë' yōl-la' rilé na', ate' chopa cō' bōnachi na', bunë' légaquië' ca tuz bōnachi, en gulequi dxíë' icja lādxi'do'gaquië' lahuë' Dios.

17 Caní guca, buluí'i lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zi'tu' ga zoë' Dios, enca' bönachi judío nacué' gála'sö.

18 Na'a, ni'a que le benë' Cristo, gaca ibíga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a.

19 Que lë ni na', libí'ili', bönachi izá'a, bíti'rö nácali' ca bönachi zi'tu' zóali' tu luyú biti' nequi queëli', pero nabábalenli' bönachi queë' Dios. ¡Chinácali' ca bí'i queë' cazë' Dios!

20 Libí'ili' nácali' ca tu yu'u zoa tsaz. Nácali' ca yugu' guiöj zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiöj lo que xilibi zö'ö na'.

21 Idütë yu'u na' le nácali' libí'i cázali' riyasa lahui xilibi zö'ö na' naca cazë' Cristo, en nacué' tu'lapa yugu' guiöj que, para gaca tu yudo' lá'ayi le naca tuz len Xanru'.

22 Libí'i cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

3

Náquië' Pablo huen libán que didza' dxi'a lógaca bönachi izá'a

1 Que lë ni na', neda', Pablo, yu'a lidxi guíë tu' runa' libán queë' Jesucristo para uzí'ili' xibé', libí'ili', bönachi izá'a.

2 Réquida' chinöz quézili' ca benë' Dios, budödë' lu na'a dxin runa' para uzí'ili' xibé' le ruzá' ládxë'ë queëru'.

3 Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queëli' lu guichi.

4 Cate' ulábalí' lë ni, gúnbë'ëli' le réajni'ida' ca naca le bigachi' ca naca queë' Cristo.

5 Dza ni'te cuntú nu buzéajni'inë' Dios ca naca le bigachi' na', pero na'a, lu në'ë Dios Bö' Lá'ayi, chibulu'ë lahui Dios ca naca, tu' bulu'inë' yugu' bönni' gubáz lá'ayi queë', en yugu' bönni' tu'ë didza' uláz queë'.

6 Caní rnna lë na' bigachi': "Ni'a que didza' dxi'a ila'deli' bönachi izá'a tsözxön len bönachi judío le nequi queë' Dios, ate' ulu'huöáquië' ca tuz bönachi, en ulu'zi'ë xibé' tsözxön len légaquië' le guzxi' lu në'ë Dios unödzejë' quégaquië' tu' dá'gaquië' Jesucristo."

7 Dios buzá' ládxë'ë quia' le bennë' quia'. Lu yöl-la' huáca zxön queë' benë' neda' huen libán que didza' dxi'a queë'.

8 Nacra' cá'asö ca yúgu'të bönachi queë' Dios, pero Lë' buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazáca'da'.

⁹ Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachi' queë' Dios, Nu ben yúgu'të le rilé'eru'.

¹⁰ Caní guca, para iléquibe'e yúgu'të nupa ta'nná bë', en nupa dë lu në'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácagaca bönachi queë' Cristo.

¹¹ Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo.

¹² Tu' nácaru' tuz len Cristo, nazí'iru' lataj ibíga'ru' idú ladxí'ru' lahuë' Dios, tu' réajlë'ëru' Lë'.

¹³ Que lë ni na' ráta'yua' loli' bití' gaca chopa ladxí'li' tu' nözi le riguí'i rizáca'a neda' para gácalena' libí'ili', le naca tu le uzí'ili' xibé.

Ca naca yöl-la' nadxí'i queë' Cristo

¹⁴ ¡Que lë ni na', ruzechu zxiba' lahuë' Xuzë' Xanru' Jesucristo!

¹⁵ Ca lë', nazí'i ca' lágaca yúgu'të bönachi queë', nupa nacua' yehua' yubá, en nupa nacua' yödzülió ni.

¹⁶ Rinábida'-në' Xúziru' Dios, lu yöl-la' zxön queë', le nazáca'da', gunnë' queë'li' yöl-la' huáca queë' Dios Bõ' Lá'ayi, en gunë' ga gálali' lu icja ladxí'do'oli'.

¹⁷ Rinábida'-në' Cristo soë' icja ladxí'do'oli' tu' réajlë'ëli' Lë'. Rinábida'-në' gunë' ga sóali' tsaz lu yöl-la' nadxí'i queë', en bití' tséaj bö' icja ladxí'do'oli' ca nadxí'ili'-në',

¹⁸ para gaca tséajni'ili' tsözxön len yúgu'të bönachi queë' Cristo ca naca yöl-la' nadxí'i queë', tsca ga ridxín ní'ilö, en ná'alö, en cadxí'ilö, en xitsá'alö.

¹⁹ Rinábida'-në' Dios gunë' ga gúnbë'ëli' yöl-la' nadxí'i na', le cabí gaca gúnbë'ëru' idú ca naca, para sóalen libí'ili' idú le naca cazë' Dios.

²⁰ ¡Na'a, yöl-la' ba Dios, Nu gaca gúntërö ca gaca inábaru' o ca gaca sa' ladxí'ru', ugunë' dxin yöl-la' huáca queë' lu icja ladxí'do'oru'!

²¹ ¡Gácatíca'sö queë' Dios yöl-la' ba lógaca bönachi queë' Cristo, en lahuë' Lë' cazë' Jesucristo, na'a dza, en yúgu'të dza zá'gaca! ¡Ca' gaca!

4

Dios Bõ' Lá'ayi nunë' rë'u tuz

¹ Na'a, neda' ráta'yua' loli', yu'a lidxi guié ni tu' runa' libán queë' Cristo, rinábida' libí'ili' gunli' idú ca ral-la' ilún nupa bulidzë' Dios para ilequi queë', ca na' bulidzë' ca' libí'ili'.

² Guli'gaca nöxaj ladxí', en dxi'i ladxí'. Guli'cöz zxön ladxí'. Guli'gúí' ladxí' luzá'ali' tuli' ia'tuli' lu yöl-la' nadxí'i queë'li'.

³ Guli'güí' ladxi' gácatíca'sili' tuz ca na' chinunë' Dios Bö' Lá'ayi libí'ili', gunli' caní lu yöl-la' riböza tsáhuí'do' queéli' le rutsaga libí'ili'.

⁴ Tuz naca idütë le naca cazë' Cristo le nadzágaru' rë'u.

Tuzë' náquië' Dios Bö' Lá'ayi dzáguië' rë'u.

Tuz naca le runru' löza, lë na' bulidzë' rë'u Dios para uzí'iru' xibé.

⁵ Tuzë' náquië' Xanru'.

Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru' yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru' yúgu'tëru'.

⁷ Tu turu' nazí'iru' tu yöl-la' huáca queë' Dios tsca naca le bennë' Cristo que queëru'.

⁸ Naca caní ca na' nazúaj lu guichi lá'ayi le rnna:

Buëpë' yehua' yubá, guchë'ë zían bönachi gula'dzúngaca.

Gudísië' quégaca bönachi le runödztasë' quégaquië'.

⁹ ¿Bizxi rë'ëni inná lë na' rnna: buëpë'? Rusëdi rë'u bötjé' zí'alö, en bidxinë' yödzülió cadxí'ilö ni.

¹⁰ Nu na' bötaj naca Bönni' na' buëpë' xitsá'tërö ni' yehua' yubá para budzë'ë yúgu'të len le naca cazë' Lë'.

¹¹ Cristo caz bennë' que queëru' yugu' yöl-la' huáca queë':

Bë' lataj bal-lë' bönni' iláquië' gubáz queë'.

Benë' ga tu'ë didza' uláz queë' Dios ia'bal-lë' bönni'.

Gusöl-lë'ë ia'bal-lë' tsöjéngaquië' libán que didza' dxi'a.

Bucu'ë ia'bal-lë' para ilún chi'ë bönachi queë'.

Bucu'ë ia'bal-lë' para ulu'sëdinë' bönachi queë'.

¹² Cristo caz bupë'ë bönachi queë' caní para gaca ilún xichinë', para ilún ga ilaca idú nupa nácataga ca idütë le naca cazë' Lë'.

¹³ Caní gaca ga idxintë dza huóácaru' tuz yúgu'tëru' ca réajlë'ëru' Cristo, en ca núnbë'ëru'-në' Zxí'inë' Dios. Gácaru' nál-la, en huóácaru' idú ca náquië' Lë' cazë' Cristo.

¹⁴ Bítirö gácaru' ca yugu' bí'ido', ca nácataga nupa na' tu'tsa'të ca túngaca, en nácataga ca tu le nachë' lu yegu, o ca tu le röjchë' bítitës bö' recja, tu' ta'zí' lu në'eguequi bítitës didza' nu rusëdi léguequi, nu na' rizí' ye'e léguequi len yöl-la' sina' que, en run ga ta'chixi ta'nigui.

¹⁵ Na'a, rë'u ni, tu' nadxí'iru' luzá'aru', ral-la' güí'iru' didza' le naca idütë li para gaca huóácaru' idú ca náquië' Cristo, en gácaru' tuz len Lë', Nu naca Xani idú le naca cazë', le nácaru' rë'u.

¹⁶ Cristo caz runë' ga rutsaga dxi'a idütë le naca cazë', le nácaru' rë'u, ate' idütë le naca cazë' na' naguela' tsözxön ni'a

que lë na' run tuz idútë le naca cazë'. Cate' tu turu' runru' xichinru', rë'u na' dzágaru' le naca cazë', idútë rizzõn, en raca idú, ca na' zeaj rácarö idú ca nadxí'iru' luzá'aru'.

Yöl-la' na'bán cubi náparu' tu' nácaru' tuz len Cristo

17 Uláz queë' Xanru' rea' libí'ili' lë ni, en rigu'a le lu ná'ali', rnnía': Bítí'rö gunli' ca tun nupa biti' núnbë'gaquië' Dios, nupa na' tun ca ta'za'sö ládxi'guequi,

18 en nachul-la nanítigaca icja ládxi'do'guequi. Tu' cabí nõzguequinë' le nácatë, en nazídigaquië', biti' nazí'gaquië' yöl-la' na'bán na' runnë' Dios queëru'.

19 Biti' ca' tu'tuí'inë'. Nudödi cuíngaquië' lu le ruá' dö'. Idú ládxi'gaquië' tunë' yúgu'të le cabí naca tsahui'.

20 Nupa ni' bulu'sedi libí'ili' ca naca queë' Cristo, biti' ca' bulu'sedi libí'ili' gunli' ca tun bönachi caní.

21 Le naca idútë li biyönili' ca naca queë' Cristo, en le nácali' queë' tu'sédinë' libí'ili' le naca idútë li na' zóalen Jesús.

22 Guli'nná be'e yöl-la' bönáchisö queëli' le gúcali' zí'alö, lë na' riniti ni'a que yöl-la' rizé ladxí' queëli' le ruá' dö' le guzxí' ye'e libí'ili'.

23 Ral-la' huóacali' cubi lu icja ládxi'do'oli', en lu bö' naca cázali'.

24 Ral-la' sí'ili' yöl-la' bönachi cubi le nunë' Dios ca naca cazë' Lë', le rulu'i cuini ni'a que le naca dxi'a, en le naca tsahui' runli', en run ga gaca gunli' caní.

25 Que lë ni na', bítí'rö si' yé'ëli'. Yúgu'tëru' ral-la' güi'ilenru' luzá'aru' didza' le nácatë, tu' dzágaru' yúgu'tëru' idútë le naca cazë' Cristo.

26 Channö hualéli', biti' ral-la' gunli' dul-la'. Biti' ileli' xidzé.

27 Biti' bi gunli' le güi' lataj tu' xihui' ucúl-la libí'ili'.

28 Nu bönni' ribanë' ral-la' usanë' yöl-la' gubán queë', en tsázië' huen dxin para gata' queë' bi unödzjë' quégaca nupa ta'yadzaj.

29 Biti' güi'ili' didza' xihui', pero guli'güi' didza' dxi'a, yugu' le ilácalen nu yöni, en ilún ga gaca dxi'a que nu na'.

30 Biti' usuhuí'inili' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usölë' libí'ili' lu dul-la'.

31 Guli'cúa ladaj libí'ili'

yöl-la' ruzxë'e, en yöl-la' ridzá'a,

en yöl-la' rilé, en yöl-la' ridil-la didza',

en yöl-la' rutsaga yudxi,

en yúgu'të yöl-la' biti' rilé'e luzá'ali' dxi'a.

32 Ral-la' gácali' dxi'i ladxí',

en huéchi' ládxi'li' luzá'ali' tuli' ia'tuli',

en uniti loli' luzá'ali' tuli' ia'tuli',

ca na' benë' Dios, buniti lahuë' libí'ili' tu' nácali' tuz len Cristo.

5

Ca ral-la' ilaca nupa nácacaca ca bi'i queë cazë' Dios

¹ Tu' nácali' ca bi'i queë cazë' Dios, ate' nadxí'inë' libí'ili', guli'güi' ladxi' gácali' ca náquië' Lë'.

² Ca naca yúgu'të le runli':

Ral-la' idxi'ili' luzá'ali' ca na' benë' Cristo.

Bidxi'inë' rë'u, en budödi cuinë' lu yöl-la' guti uláz queëru'.

Ben cuinë' ca böa' bëdxido' rútiru'-ba' lahuë' Dios tu' nözi dul-la' nabágaru'.

Gúquië' ca' ca tu le rilá' zxixi le raza ládxë'ë Dios le rigú'uru' lu bucugu lá'ayi queë'.

³ Tu' nácali' queë' Dios,

biti' ca' gunli' le ruá' dö',

en biti' gunli' le cabí ral-la' gunli',

en biti' uhuídi'li'.

Ní'irö cuntú nu gaca bi innë queëli'.

⁴ Biti' güi'ili' didza' xihui',

o didza' canöz, o didza' cá'asö,

yugu' le cabí ral-la' gunli',

pero nácarö dxi'a guiëli'-në' Dios: "Xclenu'."

⁵ Chinöz quézili' nitüë' bönni' runë' le ruá' dö' biti' ca' tsázië' ga rinná bë'ë Cristo tsözxön len Dios, o nu bönni' runë' le cabí ral-la' gunë', o nu bönni' ruhuídi'në'. Nu na' ruhuidi' naca ca nu reaj ladxi' budó' guiöj budó' yaga.

⁶ Biti' güi'ili' lataj nu si' ye'e libí'ili' len didza' biti' nácatë. Tu' nözi dul-la' caní Dios gunë' xíguia' nupa biti' túngaca ca rnna xtídzë'ë.

⁷ Biti' ca' gunli' tuz bönachi caní.

⁸ Zí'atëlö guzóali' ga naca chul-la' que dul-la', pero na'a zóali' lu bení', tu' nácali' tuz len Xanru'. Guli'gaca ca bönachi ta'dá lu bení',

⁹ tu' run bení' na' ga gácaru' dxi'i ladxi', en ga güi'iru' didza' le naca idútë li, en ga gácaru' tsahui'.

¹⁰ Guli'güi' ladxi' inözili' le raza ládxë'ë Xanru'.

¹¹ Biti' gútsa'li' nupa tun le ruá' dö', lë na' tunë' ga naca chul-la' que dul-la', pero buli'béaj ga liná' yugu' lë na' tunë'.

¹² Utuí'iru' güi'iru' didza' ca naca le tun bönachi na' bagáchi'sö.

¹³ Cate' bi ubéajru' ga liná', gaca bë' yúgu'të tsca nácacaca, tu' gun le naca bení' ga gaca bë' yúgu'të.

¹⁴ Que lë ni na' nazúaj lu guichi lë na' rnna:

Bubán, lí' na' rasiu'.

Guyasa ladaj nupa nátigaca.

Cristo uzení'ë quiu'.

15 Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca bönachi ta'yéajni'i.

16 Guli'si' xibé lataj dë queëli' tu' chizóaru' dza biti' raca dxi'a queëru'.

17 Biti' gácali' bönni' biti' bi nözguequinë'. Guli'güí' ladxi' tséajni'ili' le rë'enë' Xanru' gunli'.

18 Biti' súdxili', tu' gun yöl-la' rizudxi ga nítily' tsaz.

Guli'güí'ida' lataj inná bé'enë' Dios Bö' Lá'ayi libí'ili'.

19 Guli'güí'ilen luzá'ali' didza' tuli' ia'tuli',

ugunli' dxin yugu' le rul-la légaca salmo,

en yugu' le rul-la yöl-la' ba Dios,

en yugu' le rul-la nagu'ë Dios Bö' Lá'ayi icja ládxi'do'oru'.

Idú ládxi'ru' ral-la' gúl-laru' queë',

le cú'uru'-në' Dios yöl-la' ba.

20 Guli'gún dxin Lë' Xanru' Jesucristo,

en guli'guiëtica'së' Xúziru' Dios: "Xclenu'" ca naca yúgu'të.

Ca ral-la' gunru' quégaca di'a dza queëru'

21 Guli'gún ca rnna xtídza' luzá'ali' tuli' ia'tuli' para caní gunli'-në' Dios zxön.

22 Libí'ili', yugu' nigula, guli'gún ca rnna xtídza'gaquië' bönni' que queëli', ca na' ral-la' gunli' ca rnna xtídzë'ë Xanru'.

23 Caní ral-la' gunli', tu' rinná bé'enë' bönni' nigula queë' ca na' runë' Cristo, rinná bé'enë' bönachi queë'. Cristo náquië' ca' Nu rusölá bönachi queë', nupa na' dzágagaca le naca cazë' Lë'.

24 Ca na' tun bönachi queë' Cristo ca rnna xtídzë'ë, lësca' caní ral-la' ilunnu nigula ca rnna xtídza'gaquië' bönni' que queëgacanu ca naca yúgu'të le raca.

25 Libí'ili', yugu' bönni', ral-la' idxí'ili'-nu nigula que queëli' ca na' Cristo nadxí'inë' bönachi queë', en budödi cuinë', gútië' uláz quégaquië'.

26 Gútië' Cristo para bubéajë' quez queë' Dios bönachi queë' na', ate' nayárigaca tu lu nisa le naca xtídzë'ë.

27 Gútië' uláz quégaquië' para gaca usudxinë' légaquië' lahuë' Dios, nácagaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxi'a, cuntu nu gaca bi innë' quégaquië'.

28 Ral-la' idxí'ili'-nu nigula que queëli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'.

29 Cuntu nu bönni' runi zi' cuinë', pero rugahuë', en run chi'i cuinë', ca runë' ca' Cristo, ca rúnlenë' bönachi queë',

30 nupa dzágagaca idútë le naca cazë'.

¡Rë'u ni dzágaru' le naca cazë' Lë'!

¡Néquiniru' xipëlë'ë, en dxita queë'!

³¹ Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xinë'ë para tsöjsóalenë'-nu nigula queë', ate' irópatë' ulu'huóáquië' tuz."

³² Lë na' nazúaj lu guichi ni rulu'i lahui tu le naca idútë li, ate' neda' réquida' ruí'i didza' ca' ca naca queë' Cristo, en quégaca bönachi queë' na'.

³³ Lësca' ruí'i didza' ca naca queéli'. Yúgu'tëli' libí'ili', bönni', ral-la' idxí'ili'-nu nigula que queéli' ca na' nadxí'i cuinli', ate' yugu' nigula ral-la' ilunnu bal bönni' que queëgacanu.

6

¹ Libí'ili', yugu' b'íido', ral-la' gunli' ca rnna xtídza'gaquië' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'.

² Xibá zí'alö na' benë' Dios le nachë' tu le guzxí' lu në'ë gunë', naca lë na' rnna: "Ben bal xuz xinó'o,

³ ate' gaca dxi'a quiu', ate' xidzé su' ibanu' yödzölió ni."

⁴ Libí'ili', yugu' xuz, biti' gun leli' zxí'inili', pero buli'xön légacabi', en guli'sína' légacabi', en buli'sëdi légacabi' ca raza ládxë'ë Xanru'.

⁵ Libí'ili', núlöli' nácali' bönni' nadó'ogaca, guli'gún ca rnna xtídza'gaquië' xanli' luyú ni idú ládxi'li', gunli' légaquië' bal lu yöl-la' radxi queéli', en gunli' xichíngaquië' ca ral-la' gunli' xichinë' Cristo.

⁶ Guli'gún xichíngaquië', calëgasö cate' ni' tu'yué' libí'ili' para urúajli' dxi'a lógaquië', pero idú ládxi'li' guli'gún xichíngaquië' ca raza ládxë'ë Dios, ca na' ral-la' gunli' xichinë' Cristo.

⁷ Idú ládxi'li' guli'gún xichíngaquië', ate' caní gaca, gunli' xichinë' Xanru', en calëgasö xichíngaca bönachi.

⁸ Nöz quézili' ca gunë' Xanru'. Ubi'ë que queëru' tsca naca le dxi'a runru' sal-la' nadzanru', o sal-la' nácaru' bönni' nadó'ogaquië'.

⁹ Libí'ili', nacuá' queéli' bönni' nadó'ogaca, guli'gún dxi'a caní quégaca huen dxin queéli' na', en biti' uzéli' ba nadx légaquië'. Guli'tsöjné ca naca queéli', yú'uli' lu në'ë Xanru' zoë' yehua' yubá la' ca nácatë quégaquië', ate' Lë' biti' rutsë'ë ca runë' que que bönachi.

Dios runnë' queëru' le tun chi'i rë'u

¹⁰ Na'a, böchi' luzá'ado', guli'gaca tsutsu tu' nácali' tuz len Xanru', en zóalen libí'ili' yöl-la' huáca zxön queë'.

¹¹ Guli'gún chi'i cuinli', ugunli' dxin yugu' le runnë' Dios queëru', le tun chi'i rë'u, para gaca sóali' tsutsu cate' guë'ëni si' bë' tu' xihui' libí'ili'.

¹² Biti' ridíl-lalenru' bönachi néquiguequini bëla', en dxita, pero ridíl-lalenru' yöl-la' unná bë' quégaca bö' xihui' ta'dá lu bö'ös, en dzáagaca nupa ta'nná bë', en nupa nadéli'gaca yöl-la' unná

bë', en nupa dë lu ná'agaca, nupa nacuá' yödzölió ni ga naca chul-la que dul-la'.

¹³ Que lë ni na':

Guli'sí' yúgu'të le runnë' queëru' Dios le tun chi'i rë'u, para cate' idxín queëru' dza ni' ilaca le ná'agaca xihui', gaca guá' ilenli', en cate' údxi gunli' caní, ugá'anali' tsutsu.

¹⁴ Guli'sóa tsutsu.

Guli'sí' le naca idútë li,

le gaca queëli' ca tu guídi guga' lë'ëli'.

Guli'gaca tsahui' tu' gun chi'i libí'ili' le naca tsahui' ca run tu lari' yödx run chi'i luchu'ë bönni' rejë' gudil-la.

¹⁵ Guli'sóa sina' para gunli' libán que didza' dxi'a

le ribequi dxi icja ládxi'do'oru' lahuë' Dios,

ca na' ruzóa cuinë' sina',

en ridë'ë xiráchuë' tu bönni' rejë' gudil-la.

¹⁶ Le naca lo, yöl-la' réajlë' queëli' Cristo

gaca queëli' ca tu le naca tsutsu uzëli' loli',

para cabí gál-la' yugu' le usán tu' xihui' libí'ili',

le ná'agaca ca yaga túchi'do' zoa guí' láhuilöguequi.

¹⁷ Yöl-la' rusölá gaca queëli' ca tu lu'u guié le gun chi'i ícjali'.

Xtídzë'ë Dios gaca queëli' ca tu guié tuchi'

le runnë' Dios Bö' Lá'ayi queëru',

para utíl-lalenru' le naca xihui'.

¹⁸ Guli'gún yúgu'të lë ni,

en buli'lidzë' Dios inábili'-në' gácalenë' libí'ili'.

Buli'lidzatica'së' Dios zóalenë' Dios Bö' Lá'ayi libí'ili'.

Para gunli' caní ral-la' usubán ládxi'li' en cabí huöaj ládxi'li', inábili'-në' Dios gácalenë' nupa néquiguequi queë'.

¹⁹ Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ládxi' cate' guna' libán para uzéajni'ida' bönachi ca naca le bigachi' que didza' dxi'a.

²⁰ Dios budödë' lu na'a didza' dxi'a na' para guna' libán que, ate' tu' bena' caní yu'a lidxi guié ni. Buli'lidzë' Dios channö, inábili'-në' gunë' ga gaca' rugu ládxi' para guna' libán que didza' dxi'a ca ral-la' guna'.

Ruúdx didza' bë'ë Pablo

²¹ Tíquico, böchí'ru' na' nadxí'iru'-në', en runë' xichinë' Xanru' idú ládxi'ë, quíxjöi'inë' libí'ili' idú ca raca quia', en ca runa' neda' ni.

²² Que lë ni na', isöl-la'a-në' queëli', ate' ulu'ínë' libí'ili' ca raca queëtu', ate' caní utipë' ládxi'li'.

²³ Rinábida'-në' Xúziru' Dios, enca' Xanru' Jesucristo gunë' ga soa dxi icja ládxi'do'oli', en gata' queëli' yöl-la' nadxí'i le dzaga yöl-la' réajlë' queëli' Cristo, yúgu'tëli' na' néquili' queë'.

²⁴ Le ruzá' ládxe'ë Dios queëru' gaca queëli', yúgu'tëli' na' nadxí'ili'-në' Xanru' Jesucristo, naca idú yöl-la' nadxí'i queëli' Lë'. ¡Ca' gaca!

DIDZA' GUSÖL-LË'Ë PABLO YÖDZÖ FILIPOS

Pablo rugapë' Dios bönachi queë' Cristo nacua' Filipos

¹ Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios libí'ili', réajlë'ëli' Cristo, en libí'ili', dë lu ná'ali' xichinë' Cristo, en libí'ili', run chí'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo.

² Rinábida'-në' Xúziru' Dios, enca' Xanru' Jesucristo gunnë' queëli' le ruzá' ládxe'ë queëru', en gunë' ga soa dxi icja ládxi'do'oli'.

Pablo rinábinë' Dios bi gunë' quegaca bönachi ta'yéajlë' Cristo

³ Rea'-në' Dios: "Xclenu'", cate' rizá' ládxa'a queëli'.

⁴ Cate' rulidza'-në' Dios, en rinábida'-në' gácalenë' libí'ili', rudzeja ládxa'a

⁵ tu' röjneda' ca bënlenli' neda' tsözxön dxin que didza' dxi'a. Gusí loli' runli' dxin na' dza ni' si' biyönili', en runli' le ga ridxintë na'a dza.

⁶ Dios gusí lahuë' runë' tu le naca dxi'a lu icja ládxi'do'oli'. Ruzxöni ládxa'a Lë' gúntica'së' caní ga idxintë dza huödë' Jesucristo.

⁷ Ca na' rizá' ládxa'a queëli' naca ca ral-la' guna' tu' nadxí'ide'eda' libí'ili'. Yúgu'tëli' ruzí'ili' xibé tsözxön len neda' le ruzá' ládxe'ë Dios queëru', tsanni ni yu'a lidxi guië, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queëli' tsaz.

⁸ Nözinë' Dios ca nadxí'ide'eda' libí'ili'. Naca ca na' nadxí'ide'enë' Lë cazë' Jesucristo rë'u.

⁹ Rinábida'-në' Dios gunë' ga idxí'iröli' luzá'ali', en gáta'da' queëli' yöl-la' rácada', en yöl-la' réajni'i idú

¹⁰ para gaca cöli' le nácatëro dxi'a. Channö gaca caní queëli', gácali' idú dxi'a, ate' cuntu nu gaca bi innë' queëli' dza ni huödë' Cristo.

¹¹ Le nácali' naca bë' le naca dxi'a runë' Cristo lu icja ládxi'do'oli' para ilá' lahui yöl-la' zxön queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹² Böchi' luzá'ado', rë'ënda' inözili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a.

13 Caní guca, yúgu'të ni'a ná'agaquië' bönni' yúlahui', en ia'zica'rë' bönni' ni nõzguequinë' yu'a lidxi guié ni tu' runa' xichinë' Cristo.

14 Tu' yu'a neda' lidxi guié ni ben ga látu'biqui' yúgu'të böchi'ru' nácaqacarë' rugu ladxi', ate' tu'zxöni ládxi'gaquië' Xanru', en bití'rö tádxinë' tunë' libán que xtídzë'ë Dios.

15 Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxi'gaquië'.

16 Yugu' bönni' tu'zxé'enë' na' tunë' libán queë' Cristo lu yöl-la' run ba zxön cuíngaquië', en calëga idú ládxi'gaquië'. Të'ënnë' ulu'saca' zi'ë neda' tsanni ni yu'a lidxi guié.

17 Yugu' bönni' idú ládxi'gaquië' na', lu yöl-la' nadxí'i quégaquië' tunë' libán queë', tu' nõzguequinë' Dios caz budödë' lu na'a dxin runa', runa' libán que didza' dxi'a.

18 Biti' run lë na' ga rō'a böniga. Rudzëjada' tu' raca libán queë' Cristo nácati'tës, sal-la' tunë' libán idú ládxi'gaquië' o bití' tunë' le caní.

Na'a, rudzëjaröda'

19 tu' chinözida' ulá' lu le raca quia', yu'a lidxi guié ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risöl-lë'ë Jesucristo queëru'.

20 Caní rë'ënda', en ruzxöni ládxa'a-në' Dios, gunë' ga bití' utu'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatíca'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'.

21 Ca runi neda', channö zoa' nabana', naca para gaca' ca náquië' Cristo, en channö gátia', naca tu le uzí'ira' xibë.

22 Channö huáca guna' dxin le gácalen didza' dxi'a queë' Cristo channö sóasa' ibana', bití' nõzda' bízxilö ral-la' cōa'.

23 Naca böniga cōa'. Rë'ënda' gátitea' para tsöjsóalentea'-në' Cristo, tu' gácatë'rö dxi'a quia',

24 pero runrö bayudxi sóasa' ibana' para séqui'da' gácalena' libí'ili'.

25 Tu' chinözida' naca caní, nõzda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzëjaröli' tu' réajlë'ëli' Lë'.

26 Caní naca, udusóalena' libí'ili' leyúbölö, le gun ga tsaz ládxi'li'-në' Jesucristo ni'a que le gunë', gácalenë' neda'.

27 Guli'gü'sö ladxi' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayönida' nácali' tsutsu, en nácali' tuz, runli' tsözxön dxin que le réajlë'ëru' le za' queëru' ni'a que didza' dxi'a.

28 Biti' gü'ili' nupa bití' ta'lé'e libí'ili' dxi'a lataj ilún gadxi libí'ili'. Lë ni ulufí' légaquië' ila'nítië', pero uláli' libí'ili', le gaca bë' rácalenë' Dios caz libí'ili'.

29 Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lësca' ca rigu'i rizáca'li' cate' runli' xichinë'.

30 Na'a, gaca gunli' neda' tsözxön güi'í ládxi'ru' gunru' libán que didza' dxi'a. Bilé'e quézili' ca gud'i guzáca'a cate' bena' caní zí'alö, ate' riyönili' ca rigu'i rizáca'a ca' na'a.

2

Gúquië' Cristo nöxaj ladxi', ate' bidéli'në' yöl-la' zxön

1 Cristo runë' ga rutipa ládxi'li',
en lu yöl-la' nadxi'i queë' ruhuéchi' ládxi'ë libí'ili',
en runë' ga nácali' tuz len Dios Bö' Lá'ayi,
en ga nadxi'ili' luzá'ali',
en ga ruhuéchi' ládxi'li' luzá'ali' tuli' ia'tuli'.

2 Na'a guli'gún ga udzéjarö ládxa'a. Para gunli' caní, ral-la' gácali' tuz len luzá'ali', en gaca lëbisö ca nadxi'ili' luzá'ali' tuli' ia'tuli'. Lësca' caní ral-la' gácali' tuz lu bö' naca cázali', en ca rizá' ládxi'li'.

3 Ca naca le runli', biti' bi ral-la' gunli' lu yöl-la' rudul-li' queëli', o para gun ba zxön cuinli', pero dxi'ado' ral-la' gunli' yúgu'të, en cabí guéquili' nadéli'röli' libí'ili' ca luzá'ali'.

4 Guli'güi' ladxi' gaca dxi'a ca' que luzá'ali', en calëga queézili'.

5 Ral-la' gácali' nöxaj ladxi' ca na' gúquië' Jesucristo nöxaj ladxi'.

6 Lë' naca cazë' lëbisö ca náquië' Dios caz, pero biti' gúquinë' ral-la' gunë' bayudxi ugá'anë' lëbisö ca na' náquië' Dios.

7 Bucá'ana cazë' yúgu'të le napë', en ben cuinë' ca tu bönni' nadó'o. Guljë' ca talaj bönachi, en gúquië' idú bönachi.

8 Cate' ni' náquië' bönni', gúquië' nöxaj ladxi', en benë' ca rnna xtídzë'ë Dios, en gútië'. Gudë'ë lë'e yaga cruz ca na' raca queë' nu bönni' nabáguë'ë dul-la'.

9 Que lë ni na' Dios buchisë' Lë', en benë' ga náquië' lo ni yehua' yubá, en benë' ga lë' tu le nácatëro lo ca yúgu'të lágaca bönachi.

10 Caní benë' Dios para cate' ila'yöni ca na' lë' Jesús, ulu'zechu zxíbigaca yúgu'të nupa nacué' yehua' yubá, en lu yödzölió, en lu lataj chul-la.

11 Yúgu'të' ila'guíxjö'ë yálajdo' Jesucristo náquië' Xanru' para gaca yöl-la' ba queë' Xúziru' Dios.

Ral-la' gácaru' ca tu le ta'gú'u bení yödzölió ni

12 Que lë ni na', böchi' luzá'ado', ca na' benli' ca rnna xtídzä'a cate' ni' zóalena' libí'ili', runrö bayudxi gunli' ca rnna xtídzä'a na'a, tsanni ni zoa' zitu' ga zóali'. Guli'gún xichinë' Xanru' ga idxintë dza údxi usölë' libí'ili'. Guli'gún caní lu yöl-la' radxi queëli' Lë', en lu yöl-la' rixxizi.

13 Lë cazë' Dios runë' dxin lu icja lãdxi'do'oli'. Runë' ga rë'ënilì' gunli' le raza lãdxë'ë Lë', en runë' ca' ga séqui'li' gunli' lë na'.

14 Guli'gún yúgu'të le ral-la' gunli', en biti' bi innëli' que, en biti' til-la dídza'li'.

15 Caní ral-la' gunli', para cabí gaca nu bi innë queëli', pero caní gácali' ca zxí'ini cazë' Dios, nácali' idú dxi'a yödzülió ga ni zóali' ladaj bönachi biti' nácgaca tsahui', en nucá'anagaca Dios. Libí'ili' rigú'uli' bení' lãdjagaquië' ca na' ta'gú'u bení' bõlaj lúzhiba cate' ni naca chul-la,

16 cate' ru'íli' lógaquië' didza' ibániguequinë'. Channö caní gunli', huáca udzëjade'eda' ni'a que le naca cázali' dza huödë' Cristo, tu' inözda' biti' guca nítisö guzóa bönadxi gátia', en calëga nítisö bena' dxin.

17 Yöl-la' réajlë' queëli' Cristo naca tu le raza lãdxë'ë Dios. Salla' gun bayudxi gátia' para gaca idú yöl-la' réajlë' queëli' Lë', udzëjada', en uzí'lena' xibé tsözxön yúgu'tëli'.

18 Lësca' caní ral-la' udzëjali' libí'ili', en uzí'lenli' tsözxön neda' xibé.

Ca tunbi' bi'i Timoteo, en bi'i Epafrodito

19 Channö caní rë'ëne' Xanru' Jesús, runa' löza isöl-la'tea'-bi' bi'i Timoteo ga zóali', ate' ní'irö udzëjada' cate' huödabi' ududíxjöi'ibi' neda' cãtëze raza queëli'.

20 Túzibi' lëbi' rizá' lãdxi'bi' ca na' rizá' lãdxa'a neda', en ru'ída' lãdxi'bi' libí'ili'.

21 Yúgu'të bönni' ia'zica'rö, le naca quégacasë' tu'í lãdxi'gaquië'. Biti' tu'í lãdxi'gaquië' xichinë' Cristo.

22 Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsözxön dxin que didza' dxi'a, ate' nácabi' quia' ca tubi' bi'i bönni' rúnlenbi'-në' tsözxön xúzibi' dxin.

23 Isöl-la'a-bi' bi'i Timoteo ga zóali' cate' inözda' nacxi gaca quia' ni

24 sal-la' ruzxöni lãdxa'a-në' Xanru' gunë' ga uduyútea' libí'ili'.

25 Lësca' réquida' run bayudxi isöl-la'a-bi' bí'i böchi'ru' Epafrodito ga zóali'. Bi'i ni bénlenbi' neda' tsözxön dxin queë' Cristo, ate' gudíl-lalentu' tu' xihui'. Libí'í cázali' gusöl-la'li'-bi' ga zoa' para gácalenbi' neda'.

26 Lë cázabi' rë'ënibi' uduyúbi' libí'ili', en ru'ída' lãdxi'bi' libí'ili' tu' biyönili' ben bayá' queëbi'.

27 Le nácatë gü'ibi', en guqui gátibi', pero buéchi' lãdxë'ë-bi' Dios, en calëgasö lëbi', pero buéchi' lãdxë'ë ca' neda', para cabí isëbirö lãdxa'a ca na' risëbi lãdxa'a na'a.

28 Que lë ni na', gú'uniröda' isöl-la'a-bi' queëli' para gaca udzëjali' leyübölö cate' ulé'eli'-bi', en bíti'rö isëbi lãdxa'a neda'.

²⁹ Guli'sí' lu ná'ali' lēbi' lu yōl-la' rudzeja queēli', tu' nácabi' bi'i bōchi'ru' réajlē'ēbi' Cristo. Guli'gún bal yúgu'tē bōnachi nácagaca ca nácabi' lēbi',

³⁰ tu' guzóa bōnadxi queēbi' gátibi' tu' benbi' xichiné' Cristo, en tu' gúcalenbi' neda' uláz queēli'.

3

Le naca idú tsahui'

¹ ¡Na'a, bōchi' luzá'ado', buli'dzeja tu' nácali' tuz len Xanru'! Biti' rupizxaj neda' uzúaja' queēli' leyúbölö lē na' buzúaja' queēli' zí'alö, tu' gácalen lē ni libí'ili'.

² Guli'gún chi'i cuinli' lógaca nupa ni' tuá' dö'. Nácagaca ca yugu' bō'cu' sínia', nupa na' tun bayudxi irugu lu xipéla'gaquiē' bōnni' le naca bē' nazí' lu ná'gaquiē' xtídzē'ē Dios.

³ Rē'u nadéli'ru' lē na' naca idútē li, le naca bē' nazí' lu ná'aru' le runnē' queēru' Dios. Tu' réajlē'ēru' Dios, zóalenē' Dios Bō' Lá'ayi rē'u, ate' rudzéjaru' tu' nácaru' tuz len Jesucristo. Biti' ca' ruzxōni ládxi'ru' tu le runru' rácasō queēru'.

⁴ La'tu' ruzxōni ládxi'ru' lē ni, lēsca' neda' chinadéli'da' bi uxxōni ládxa'a. Channō zoē' nu bōnni' réquinē' ulé' tu' nacúa' le nunē', neda' nadéli'rōda' ca bōnni' na':

⁵ Gurugu lu xipéla'a lē na' naca bē' cate' ni' gúquida' xunu' dza. Gulja' ladaj di'a dza quégaca bōnachi Israel.

Nababa' xzí'ini xi'sóē' Benjamín.

Xuz xiná'a nácagaquiē' idú bōnachi hebreo.

Guca' bōnni' yudo' fariseo ca na' bena' ca rinná bē' xibá queē' Dios.

⁶ Bē'da' ládxa'a xibá na' ga bidxintē gudxía ládxa'a bōnachi queē' Cristo.

Tsca gaca gáquiē' tsahui' tu bōnni' tu' runē' ca rinná bē' xibá na', cuntu nu bi guca inné quia'.

⁷ Na'a, yúgu'tē lē na' bena' zxōn zí'alö, nuzóa' tsölá'alö tu' néquida' queē' Cristo.

⁸ Calégasō yugu' lē na', pero nuzóa' ca' tsölá'alö yúgu'tē le dē, para gaca gúnbe'eda'-nē' Xanru' Jesucristo, le nácaterō lesaca' ca yúgu'tē lē na'. Para gúnbe'eda' Lē' gurú'una' ní'ilö yúgu'tē, en réquida' naca ca bēbu, para uzi'a xibē' Cristo,

⁹ en para gaca' tuz len Lē'. Nuhuōaca' tsahui', calēga tu' runa' ca rinná bē' xibá na', pero Dios caz bunē' neda' tsahui' tu' réajlē'a Cristo, ca na' ruúnē' tsahui' yúgu'tē nupa ta'yéajlē' Lē'.

¹⁰ Rē'ēnisida' gúnbē'a-nē' Cristo, en sóalen yōl-la' huáca queē' Dios neda', lē na' busubán Cristo lu yōl-la' guti, ate' guna' Lē' tsózxōn, qui'i saca'a ca na' gudí'i guzxáquē'ē Lē', en soa' siná' gátia' ca gútiē' Lē',

11 tu' runa' löza Dios, usubanë' ca' neda' lu yöl-la' guti.

Le runru' para idxinru' xilátjaru'

12 Biti' rnnía' chinadéli'da' yúgu'të lë ni gunnë' quia', en biti' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'.

13 Böchi' luzá'ado', biti' ca' nadéli'da' yugu' lë ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'.

14 Runa' ca runë' tu bönni' rixíti'dë'ë para idxinë' xilatjë' para idéli'në' tu le uzi'ë xibé. Caní runa' para idéli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

15 Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'.

16 Na'a, ca naca lë na' bidéli'ru', ral-la' gúntica'siru' caní.

17 Böchi' luzá'ado', guli'gún ca na' runa' neda'. Chibulu'itu' libí'ili' ca ral-la' gunli'. Buli'yú ca tun nupa na' tun ca na' bentu' netu'.

18 Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxixi quia', rnnía': Le tunë' zían bönni' run ga nácagaquië' ca nupa biti' ta'lé'e Cristo dxi'a, tu' tu'zöë' tsólá'alö le ben cazë' Lë' lë'e yaga cruz.

19 Yugu' bönni' tunë' caní, tsöjáquië' lu guí' gabila, tu' naca le ta'zësö ládxi'gaquië' dios quégaquië', ate' tun ba zxön cuíngaquië' ni'a que lë na' ral-la' gun ga ulu'tuí'inë'. Tuí'i ládxi'së le dë yödzölió ni,

20 pero rë'u ni ruí'i ládxi'ru' le dë yehua' yubá ga nabábaru', en ribözaru' dza huödë' Xanru' Jesucristo, Nu rusólá rë'u, urúajë' yehua' yubá na'.

21 Lë' utsë'ë idútë le naca cázaru', le riniti caz, en gunë' ga huóaca ca naca idútë le naca cazë' Lë', le sóatica'sö. Caní gunë' len yöl-la' huáca zxön queë' le ugunë' dxin para inná bé'enë' yúgu'të.

4

Ral-la' udzéjalentica'siru'-në' Xanru'

1 Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxí'ide'eda' libí'ili', en rë'ënda' uduyúa' libí'ili'. Runli' ga rudzëjada', en nácali' ca tu le ruzi'a xibé.

2 Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiguequi queë' Xanru'.

3 Na'a, böcha'a idú, rë'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzáquië' Clemente, en ia'zíca'rë' luzá'a na' netu'.

Chinazúajgaca lágaquië' yehua' yubá ga na' nazúajgaca lágaca nupa chinadéli'gaca yöl-la' na'bán idú.

⁴ ¡Buli'dzéjalentica'sö-në' Xanru'!

Leyúbölö, rnnía': ¡Buli'dzeja!

⁵ ¡Guli'gaca dxi'i ladxi' len yúgu'të bönachi!

¡Chizóa huödë' Xanru'!

⁶ Biti' ubi ugu'ili', pero guli'nabi-në' Dios le riquínili', en guli'guié': "Xclenu" ca naca yúgu'të lë na' rinábali'.

⁷ Dios gunë' ga gaca queëli' le cuéqui dxi icja ládxi'do'oli', lë na' nadódirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá' ládxi'li' tu' nácali' tuz len Jesucristo.

Ral-la' sa' ládxi'ru' le nácaqaca dxi'a

⁸ Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba,

en le naca idútë li, en le naca idú,

en le naca tsahui', en le naca ba'a,

en le naca lachi, en le ral-la' gunru' bal.

⁹ Guli'gún ca na' busédida' libí'ili', lë na' guzxí' lu ná'ali' tscá na' bë'léna' libí'ili' didza', en tscá na' bena' ga ni' zóali'. Dios, Nu runna queëru' le ribequi dxi icja ládxi'do'oru' sóalenë' libí'ili'.

Le tsahui' gulunë' yugu' bönni' Filipos queë' Pablo

¹⁰ Rudzéjalenda'-në' Xanru' tu' ruí'i ládxi'li' neda' leyúbölö. Biti' rnnía' gul-la ládxi'li' neda', pero biti' guta' queëli' lataj gácalenli' neda' zí'alö.

¹¹ Lësca' caní, biti' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'.

¹² Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia' o zoa bi riyadzaj quia'.

¹³ Yúgu'të huazéqui'da' tu' rutipë' Cristo ládxa'a.

¹⁴ Benli' dxi'a cate' ni' gúcalenli' neda', en butípali' ládxa'a cate' gudí'i guzxáca'a.

¹⁵ Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tscá nacuá' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusöl-la'li' quia' bi bunödzejali', tu' guzxí' lu ná'ali' libán bena' neda'.

¹⁶ Tsanni ni' guzóa' yödzo Tesalónica, tu' chopa luzuí gusöl-la'li' quia' le bunödzejali' cate' ni' biyadzaj quia'.

¹⁷ Biti' ruí'i ládxa'a bi si'a, pero rë'ënda' gáta'rö queëli' le uzí'ili' xibé yehua' yubá.

18 Rea' libí'ili': Chiguzxi'a yúgu'të lë na' gusöl-la'li' quia', ate' gudödité bë' tsca le biyádzjada'. Ben ga naca caní lë na' gusöl-la'li' lu ná'abi' bi'i Epafrodito. Lë na' bunödzejali' naca ca tu le rilá' zxixi le ridxintë lahuë' Dios, en ca tu le rigú'uru' lahuë' Dios le raza ládxe'ë.

19 Dios gunnë' queëli' yúgu'të le riyadzaj queëli', tsca naca yöl-la' tsahui' rö'ö yehua' yubá, tu' nácali' tuz len Jesucristo.

20 ¡Gácatíca'sö queë' Xúziru' Dios yöl-la' ba! ¡Ca' gaca!

Yugu' bönachi queë' Cristo tu'gapa Dios luzë'eguequi

21 Uláz quia' neda', guli'gapa Dios nupa ni' néquiguequi queë' Dios tu' nácacaca tuz len Jesucristo. Tu'gapë' Dios libí'ili' böchi' luzá'aru' núngaquië' neda' tsözxón ni.

22 Lësca' yúgu'të nupa ni' néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacu'ë lidxë' bönni' rinná bë'ë idú luyú Roma tu'gapë' Dios libí'ili'.

23 Rinábida'-në' Xanru' Jesucristo uzá' ládxe'ë queëli' yúgu'tëli'. ¡Ca' gaca!

DIDZA' GUSÖL-LË'Ë PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

¹ Neda', Pablo, naca' gubáz queë' Jesucristo tu' ré'ënë' Dios caní, ate' dzágabi' bi'i böchi'ru' Timoteo neda'.

² Rugapa' Dios libí'ili', zóali' Colosas. Nácali' böchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queëli', en gunë' ga soa dxi icja ládxi'do'oli'.

Pablo rulidzë' Dios, en rë' Lë': "Xclenu"

³ Rética'stu'-në' Dios, Xuzë' Xanru' Jesucristo: "Xclenu" cate' rulidztu'-në' Dios, en rinábitu'-në' bi gunë' queëli'

⁴ tu' biyönitu' didza' ca réajlë'ëli' Jesucristo, en ca nadxí'ili' yúgu'të nupa néquiguequi quez queë' Dios.

⁵ Caní runli' tu' runli' löza le nuzóë' Xanru' queëli' ni' yehua' yubá, lë na' biyönili' que cate' bë'lentu' libí'ili' didza', le naca löza sí'ili' ni'a que didza' dxi'a.

⁶ Didza' dxi'a na' bidxín queëli' ca ridxín ca' idútë yödzölió. Run dxin, en raca libán que, idútë yödzölió, la' tuz ca raca ga zóali', dza ni'te ga ridxintë na'a dza, cate' ni' biyönili', en bénbë'ëli' idútë le ruzá' ládxë'ë queëru' Dios.

⁷ Epafras, bönni' nadxí'iru'-në', busëdinë' libí'ili' lë ni. Lë rúnlenë' netu' tsözxön dxin, en rácalenë' libí'ili'. Náquië' huen dxin idú queë' Cristo.

⁸ Bönni' ni gudíxjöi'inë' netu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

⁹ Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le ré'ëni quézinë' Lë', en gunnë' queëli' yúgu'të yöl-la' rácada', en yöl-la' réajni'i le rigu'ë Dios Bö' Lá'ayi rë'u.

¹⁰ Caní rinábitu'-në' para gaca gunli' ca ral-la' ilún nupa néquiguequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácarö idú ca núnbë'ëli'-në' Dios.

¹¹ Rinábitu'-në' utipë' ládxi'li', en gunnë' queëli' yöl-la' huáca idú queë', para gaca guá' ilenli' yúgu'të, en cözali' zxön ladxi', en udzeja ládxi'li'.

¹² Lu yöl-la' rudzeja queëli' guli'guié' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözxön nupa néquiguequi quez queë'.

13 Dios Xuz na' busölë' rë'u lu na' nu rinná bë' lataj chul-la, en budödë' rë'u ga na' rinná bë'ë Zxí'ini cazë', Nu nadxí'inë'.

14 Zxí'inë' na' böá'uë' rë'u, tu' gútië' uláz queëru', ate' buniti lahuë' rë'u ca naca dul-la' gubágaru'.

Nuhuóácaru' tuz len Dios tu' gútië' Cristo uláz queëru'

15 Cristo náquië' tuz ca náquië' Dios caz, Nu bití' gaca ilé'eru'. Zoa cazë' Lë' zí'atëlö ca yúgu'të le benë' Dios.

16 Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' nácgaca lataj lo, en yugu' yöl-la' unná bë', en le nápagaca yöl-la' zxön, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'.

17 Cristo zoa cazë' zí'alö ca yúgu'të le dë, ate' yúgu'të nacua'tica'sö ni'a queë' Lë'.

18 Cristo náquië' Xángaca bönachi queë', en runödzjë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtëré' ca yúgu'të le dë.

19 Caní guca, tu' guyaza ládxë'ë Dios Xuz sóalen Cristo idútë le naca cazë' Lë'.

20 Ni'a que le benë' Cristo, Dios benë' ga gaca ulu'huóáca tuz len Lë' yúgu'të le dë, le nacua' luyú, en le nacua' lúzxiba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

21 Libí'ili', zí'atëlö nulá'aleni'-në' Dios, en gúcali' ca yugu' bönni' bití' ta'lé'enë' Dios dxi'a lu icja ládxi'do'oli' ni'a que dö' biá'ali', pero na'a chibunë' libí'ili' tuz len Lë'.

22 Caní guca, tu' budödi cuinë' Cristo, en gútië' uláz queëli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntú nu bi gaca innë queëli'.

23 Caní gaca channö ugá'anali' tsutsu ca réajlë'ëli' Cristo. Gácali' ca tu yu'u zxoa ga rë' xilibi zö'ö que, en bití' tseaj bö' ládxi'do'oli' ca runli' löza didza' dxi'a biyónili', lë na' raca libán que idútë yödzölió le benë' Dios zxañ lúzxiba. Dios buzóë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

24 Rudzéjada' na'a ca naca le riguí' rizáca'a para gácalena' libí'ili', en ruúdxí rizá'a lu idútë le naca' le riguí' rizáca'léna' tsözxön Cristo uláz que idú le naca cazë' Lë', le naca bönachi queë'.

25 Dios benë' ga naca' huen dxin quégaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios.

²⁶ Ruzéajni'ida' bönachi le nagachi', lë na' bigachi' dza ni'te, ate' cuntu nu benbë' le, pero na'a Dios chibuluf'inë' bönachi néquigüequi quez queë' ca naca que.

²⁷ Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení' queë'."

²⁸ Runtu' libán queë' Cristo, en rusá'atu' ládxi'gaca yúgu'të bönachi, ate' rusëditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácagaca tuz len Jesucristo.

²⁹ Para gaca caní runa' dxin, en ruí'i ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

2

¹ Ré'ënda' inözili' ruí'ida' ládxa'a runa' le gácalen libí'ili', enca' le gácalen bönachi yödzö Laodicea, en le gácalen ca' yúgu'të nupa bití' ila'lé'eni neda'.

² Runa' caní para ila'dipa ládxi'gaquië', en iláquië' tuz lu yöl-la' nadxí'i, en ulu'zi'ë xibé yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'e le bigachi' queë' Dios Xuz, lë na' naca cazë' Cristo.

³ Lu në'ë Cristo ruzí'iru' xibé yúgu'të yöl-la' tsahui' que yöl-la' rácada', en yöl-la' réajni'i.

⁴ Lë ni rea' libí'ili', para cabí gaca nu si' ye'e libí'ili', nu gü'i didza' tséajlë'ëru' le cabí nácatë.

⁵ Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queëli', en nácali' tsutsu ca réajlë'ëli' Cristo.

⁶ Que lë ni na', ca na' guzxí' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'.

⁷ Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazédali'. Guli'guíëtica'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chi'i cuinli' para cabí gü'i'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácagaca idútë li, ca naca le ta'lëbi tun bönachi, en ca naca le tu'sedi bönachi le naca que yödzölió ni, en calëga le naca xtídzë'ë Cristo.

⁹ Idútë le naca cazë' Dios zóalen Cristo sal-la' böáquië' bönachi,

¹⁰ ate' libí'ili' nápali' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'.

11 Narugu lu xipéla'gaquië' bönni' judío le ruluí'i dá'gaquië' Dios, pero libí'ili', tu' dzágali' Cristo, zóalen libí'ili' le ruluí'i néquili' queë' Dios, le cabí néquini lu ni'a lu ná'agaca bönachi. Yugu' bönni' judío tu'gúë' tu guídido', pero libí'ili', nadúa iduté yöl-la' bönachi queëli' le bénlenli' dul-la'. Caní naca queëli' tu' benli' tsözxön Cristo cate' gútië' lë'e yaga cruz.

12 Cate' bidí'ali' nisa guca ca bigáchi'lenli'-në' Cristo tsözxön yeru ba, en bubánlenli'-në' tsözxön tu' guyéajlë'ëli' Dios, len yöl-la' huáca queë' busubanë' Cristo lu yöl-la' guti.

13 Zí'atëlö gúcali' ca nupa chinátigaca tu' nözi dul-la' gubága'li', en bití' guzóalen libí'ili' le ruluí'i néquili' queë' Dios, pero na'a Dios nunë' ga nabánlenli'-në' tsözxön Cristo, en buniti lahuë' libí'ili' ca naca yúgu'të dul-la' gubága'li'.

14 Dios busúluë' yugu' le nabága'ru' le nazúajgaca lu xibá queë', lë na' tu'zegui rë'u didza'. Bugúë' lë na' nabága'ru', en budë'ë le lë'e yaga cruz ca tu le nabáguë'ë Cristo.

15 Cate' gútië' Cristo lë'e yaga cruz, bugúë' yöl-la' huáca unná bë' quégaca bö' xihui' unná bë', en quégaca bö' xihui' dë lu në'eguequi yöl-la' huáca, tu' bulu'e lahui le ná'agaca bö' xihui' na', en bugúë' iduté le guta' lu në'eguequi.

Ral-la' güi'i ládxi'ru' le naca que yehua' yubá

16 Que lë ni na', bití' güi'ili' lataj nu uzegui libí'ili' didza' ca naca le rë'aj ráguli', o tu' cabí runli' zxön yugu' dza laní, o tu' cabí runli' zxön beo' si' ruzë, o tu' cabí runli' zxön yugu' dza lá'ayi quégaca bönachi.

17 Yúgu'të lë ni naca ca tu bixín que le ral-la' gaca, ate' le ruluí'i yúgu'të lë ni náquië' Cristo caz.

18 Bití' güi'ili' lataj nu gun ga unítili' le ral-la' sí'ili', nu runda' bayudxi ga ilaca nöxaj ládxi'gaca bönachi, en ilún zxön yugu' gubáz lá'ayi. Tu'gutsa' cuíngaquië' le cabí bila'lé'enë', en tun ba zxön cuíngaquië' ca naca le dzö'ösö ícjagaquië' lu yöl-la' bönáchisö quégacaquië'.

19 Nu run caní bití' da' Cristo. Náquië' Xanru', en ruzóë' tsutsu iduté le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxön iduté le naca cazë' ca ré'ënë' Dios uxönë' le.

20 Libí'ili' chinátilenli'-në' Cristo para cabirö ila'nná be'e xibá que yödzülió libí'ili'. ¿Bizx que runli' tsa ni nácali' que yödzülió, en runli' ca ta'nná bë' xibá que?

21 Caní ta'nná yugu' xibá que yödzülió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

22 Yúgu'të lë ni ila'niti cate' chibugunru' léguequi dxin. Caní nácagaca le ta'nná bē' bōnachi, en yugu' xibá nazí' lu nē'eguequi.

23 Le nácate, yugu' xibá ni, téqui bōnachi nápagaca yöl-la' réajni'i. Tun ga tu'luí'i cuínguequi ca bōnachi yudo', en ga tu'luí'i cuínguequi nōxaj ladxi', en ga tu'saca' zígaca idútë le zeaj naca caz, pero xibá ni biti' ca' tácalen rē'u para gaca inná bé'eru' yugu' le rizé ládxi'ru' lu yöl-la' bōnáchisō queēru'.

3

1 Na'a, channō nubánlenli'-nē' Cristo, guli'güi' ladxi' le nácagaca que yehua' yubá ga ni' rō'ë Cristo cuita lē'ë ibëla Dios, ga náquiē' lo.

2 Guli'sá' ladxi' le taca xitsá'alō, en calëga le taca luyú ni.

3 Naca queëli' tsca chinátili', ate' yöl-la' na'bán queëli' rapa chi'ë Cristo ga ni' zoa cazë' Dios.

4 Cristo nabánili' libí'ili'. Cate' uluí'i lahuë' Lë', ní'irō uluí'i loli' ca' libí'ili' tsözxön len Lë' lu bení' queë'.

Yöl-la' na'bán gula, en yöl-la' na'bán cubi

5 Que lë ni na', guli'gún ga ila'niti le nacué'len libí'ili' que yödžolió ni:

Yugu' le ruá' dō', en le nácagaca xihui',
en yugu' le rizé ládxi'li' le ruá' dō',
en yugu' le rizé ládxi'li' le naca xihui',
en yöl-la' ruhuidi'.

Yöl-la' ruhuidi' naca lëbi ca nu reaj ladxi' budó' guiōj budó' yaga, tu' cabí reaj ladxi' Dios nu ruhuidi'.

6 Tun bōnachi yugu' le caní, ate' gunë' Dios xíguia' yúgu'të nupa biti' túngaca ca rnna xtídzë'ë.

7 Yugu' dul-la' caní benli' ca' libí'ili' cate' ni' nadōdili' lu nē'eguequi.

8 Na'a, bítirō gunli' yugu' lë ni:

Bítirō idzá'ali', en bítirō leli'.
Bítirō nu gunli' zi', en bítirō innë xíhui'li'.
Bítirō innali' le ruá' dō'.

9 Biti' si' yé'eli' luzá'ali' tuli' ia'tuli' tu' chinucá'anali' le gúcali' zí'alō, en yugu' le benli' zí'alō.

10 Chinácali' bōnachi cubi, ate' tu tu dza ricúbili', ruhuōácarōli' ca naca Nu na' bun libí'ili', para gúnbë'ëli' Lë' idú ca náquiē' Lë'.

11 Tu' chidzágaru'-nē' Cristo:

Bítirō nácaru' bōnni' zi'tu', en bōnni' judío.

Bítirō nácaru' bōnni' narugu lu xipéla'gaquië' le naca bē' nu da' Dios, en bōnni' biti' narugu lu xipéla'gaquië' lë na' naca bē'.

Bítirō nácaru' bōnni' ta'yéajni'inë', en bōnni' biti' ta'yéajni'inë'.

Bíti'rö nácaru' bönni' nadó'ogaquië', en bönni' biti' nadó'ogaquië'.

Na'a, Cristo náquië' yúgu'të le nácagaca lesaca', en dzáguië' yúgu'tëru'.

¹² Dios nadxí'inë' libí'ili', en guröë' libí'ili' para guéquili' quez queë'. Que lë ni na', ral-la':

Güf'i ládxi'li' luzá'ali', en gácali' dxi'i ladxi', en nöxaj ladxi', en cuidi' ladxi', en cözali' zxön ladxi'.

¹³ Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benë' Cristo, buniti lahuë' libí'ili'.

¹⁴ Le nazáca'tërö ca yúgu'të lë ni, ral-la' idxí'ili' yúgu'të bönachi, tu' naca yöl-la' nadxí'i le run ga nácaru' tuz, en ga nácaru' idú.

¹⁵ Guli'güi' lataj le ribequi dxi icja ládxi'do'oru' inná bë' lu icja ládxi'do'oli', lë na' runnë' Dios queëru'. Que lë ni na' bulidzë' libí'ili', para gácali' tuz lu idútë le naca cazë' Cristo. Guli'guíë' Dios: "Xclenu'."

¹⁶ Guli'sí' lu ná'ali' xtídzë'ë Cristo le gaca queëli' tu yöl-la' tsahui' zxön. Tu' zóalen libí'ili' yöl-la' réajni'i queë' Dios, buli'sedi, en buli'zëjni'i luzá'ali' tuli' ia'tuli'. Idú ládxi'li' guli'gul-la yugu' salmo queë' Dios, en yugu' le rul-la yöl-la' ba, en yugu' le rul-la lá'ayi, ate' guiëli'-në' Dios: "Xclenu'."

¹⁷ Yúgu'të le runli', le naca didza' ruí'ili' o le naca dxin runli', guli'gún yúgu'të lu Lë' Xanru' Jesús, en guiëli'-në' Dios Xuz: "Xclenu'", dzáguië' Cristo libí'ili'.

Le ral-la' gunru' que luzá'aru' tu' néquiru' queë' Cristo

¹⁸ Libí'ili', nigula nutsaga ná'aleni' bönni' queëli', guli'gún ca rnna xtídzá'gaquië' bönni' que queëli' ca ral-la' gunli', tu' néquili' queë' Xanru'.

¹⁹ Libí'ili', bönni' nutsaga ná'aleni' nigula queëli', guli'dxí'i nigula que queëli', en biti' uzéli' bach légacanu.

²⁰ Libí'ili', bi'i ra'bán, guli'gún ca rnna yúgu'të xtídzá'gaquië' xuz xiná'ali'. Lë ni raza ládxi'ë' Xanru'.

²¹ Libí'ili', núlöli' nácali' xúzgaca bí'ido', biti' tódi bë' usína'li' zxí'inili', para cabí huőaj ládxi'gacabi'.

²² Libí'ili', núlöli' nácali' bönni' nadó'ogaquië', guli'gún ca rnna yúgu'të xtídzá'gaquië' xanli' luyú ni. Calégasö gunli' caní cate' tu'yúé' libí'ili' ca na' tun nupa té'ëni ilún ga ila'yaza ládxi'gaca bönachi, pero idú ládxi'li' guli'gún xichíngaquië' ca ral-la' ilún nupa tadxi Dios.

23 Ca naca yúgu'tè le runli', guli'gún idú ládxi'li',
gaca ca runli' xichinë' Xanru',
en calégasö ca runli' xichíngaca bönachi.

24 Chinöz quézili' ubi'ë Xanru' queéli',
gunné' queéli' le chinupë'ë Dios quegaca nupa nácgaca zxi'ini
cazé'.

Caní gaca, tu' runli' xichinë' Xanru' Jesucristo.

25 Nu ruá' dö', ubi'ë Xanru' que nu na' ca naca dö' ruá' nu
na', tu' cabí utsë'ë Dios ca ral-la' ubi'ë que quegaca bönachi.

4

1 Libí'ili', núlöli' nácali' xángaca bönachi,
guli'gún le naca tsahui', en le naca dxi'a
ca rugunli' dxin yugu' bönni' huen dxin queéli'.
Guli'tsöjné zoa ca' Xanli' yehua' yubá.

2 Libí'ili', yúgu'téli',
buli'lídzatica'së' Dios.
Buli'subán ládxi'li' ulídzali'-në' Dios,
en guli'guié': "Xclenu."

3 La' ná'asö cate' rulídzali'-në' Dios, guli'nabi-në' ca' gácalenë'
netu', en gunné' netu' lataj quíxjö'ötu' xtídzë'ë Xanru', para
gaca uzéajni'itu' bönachi le bigachi' ca naca queë' Cristo. Tu'
runa' caní nadzuna' lidxi guié ni.

4 Guli'nabi-në' ca' Dios, gunné' neda' lataj usalaj lá'ana' le
bigachi' na' ca ral-la' guna'.

5 Lu yöl-la' réajni' queéli', guli'gún le runli' lógaca nupa biti'
ta'yéajlë' Cristo. Guli'gunda' dxin yugu' dza uzá' ládxi'ë Dios
queéli', gunli' xichinë'.

6 Ral-la' gü'ili' didza' ca raza ládxi'ë Dios, en ca ral-la' gun
nupa néquiquequi queë'. Ral-la' inözili' ca' naca ral-la' ubi'ili'
didza', bi guiéli' tu tu bönachi.

Yugu' bönachi queë' Cristo tu'gapa Dios luz'eguequi

7 Tíquico quíxjöi'inë' libí'ili' le raca quia' ni. Náquië' böchi'ru'
nadxí'iru'-në'. Náquië' ca' huen dxin idú queë' Xanru', en
rúnlenë' neda' tsözxön dxin queë' Xanru'.

8 Que lë ni na' risöl-la'a-në' ga zóali', para uzéajni'inë' libí'ili'
le raca quia', en utipë' ládxi'li'.

9 Onésimo, böchi'ru' na' nabábalenë' libí'ili' sa'yéajlenë' lë'
tsözxön. Náquië' ca' böchi'ru' nadxí'iru'-në', en réajlë'ë Xanru'.
Chopë' ni ulu'siyönnë' libí'ili' yúgu'tè le raca ni.

10 Aristarco, bönni' na' yú'ulenë' neda' tsözxön lidxi guié
rugapë' Dios libí'ili'. Bi'i Marcos, bi'i bönni' queënu nigula
zanë' Bernabé rugápabi' Dios ca' libí'ili'. Chigudxa' libí'ili'
bi gunli' queébi' bi'i Marcos na'. Channö huídabi' ga zóali',
guli'gún-bi' bal.

11 Bönni' ni lë' Jesús, en zoa ia'tú lë' Justo lësca' rugapë' Dios libí'ili'. Nacuá' zían bönachi judío ta'yéajlë' Cristo, pero tsónnasë' ni ladaj bönachi judío tunë' dxin que le rinná bë'ë Dios tsözxön len neda', en tu'hui' zxöndë'ë neda'.

12 Epafras, bönni' ni nababë' ca' libí'ili' rugapë' Dios libí'ili'. Náquië' huen dxin queë' Cristo, en idú ládxe'ë rulidzë' Dios, en ráta'yutica'së' lahuë' gácalenë' libí'ili' para gácali' idú ladxi', en sóali' ca' sina' gunli' yúgu'të le rë'ëni quézinë' Dios.

13 Runa' ba nalí queë' Epafras na', ru'ida' ládxe'ë libí'ili' enca' nupa nacua' yödzö Laodicea, en nupa nacua' yödzö Hierápolis.

14 Demas, enca' Lucas tu'gapë' Dios libí'ili'. Náquië' Lucas bönni' na' ruúnë' bönachi, ate' nadxí'iru'-në'.

15 Guli'gapa Dios böchi'ru' nacua'ë Laodicea, enca' Ninfas, en bönachi queë' Cristo nacua' lídxinu Ninfas na'.

16 Cate' údxi ulábali' guichi ni ga ni' zóali', guli'gún ga ulu'laba le bönachi queë' Cristo nacua' Laodicea. Buli'laba ca' libí'ili' guichi na' ila'söl-la' bönachi Laodicea na' queëli'.

17 Guli'guié' Arquipo: "Bë' ládxe'u gunu' dxin na' budödë' Xanru' lu no'o."

18 Neda', Pablo, ruzúaj caza' lu guichi dídza'do' ni, rnnía': Rugapa' Dios libí'ili'. Guli'tsöjné ca' raca quia' nadzuna' lidxi guié' ni. Rinábida'-në' Dios uzá' ládxe'ë queëli' le naca dxi'a. ¡Ca' gaca!

DIDZA' ZÍ'ALÖ GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

¹ Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquië' neda' Silvano, en bi'i Timoteo. Rinábida'në' Xúziru' Dios, enca' Xanru' Jesucristo uzá' ládxë'ë queëli', en gunë' ga soa dxi icja ládxi'do'oli'.

Yugu' le taca bë' ta'yéajlë' bönachi Tesalónica Dios

² Rëtica'stu'-në' Dios: "Xclenu'" cate' röjnetu' ca naca queëli' yúgu'tëli'. Röjnética'stu' libí'ili', bi rinábitu'-në' Dios ni'a queëli' cate' rulidztu'-në'.

³ Röjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatíca'sili' tsutsu tu' runli' löza Xanru' Jesucristo.

⁴ Böchi' luzá'atu', Dios nadxí'inë' libí'ili', ate' nöztu' gurö cazë' Lë' libí'ili'.

⁵ Caní naca, tu' bidxín queëli' didza' dxi'a runtu' libán que, calëga len dídza'sö, pero lësca' len yöl-la' huáca bidxín queëli', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quezili' ca gúcatu' ga zóali' tu' nadxí'itu' libí'ili'.

⁶ Libí'ili' butsó' cuinli', ate' runli' ca runtu' netu', enca' ca benë' Xanru', tu' guzxí' lu ná'ali' xtídzë'ë, ate' sal-la' gudí'i guzxáca'da'ali', budzëjali' tu' zóalenë' Dios Bö' Lá'ayi libí'ili'.

⁷ Caní naca, chinácali' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya.

⁸ Caní naca, tu' guzë xtídzë'ë Xanru' ni'a queëli'. Calëgasö luyú Macedonia, en luyú Acaya, pero lësca' yúgu'të lataj guzë dídza' ca réajlë'ëli' Dios. Caní naca, bití' bi run bayudxi innatu',

⁹ tu' ta'guixjö' la' léguequisö bönachi ni' queëtu' ca benli' netu' bal, en ca na' butsó' cuinli'. Bucá'anali' yugu' budó' guiöj budó' yaga, en böácali' queë' Dios para gunli' xichinë' Dios ban, Nu naca idú Dios.

¹⁰ Na'a, ribözali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusólá rë'u lu dul-la', para cabí soa le gun ga ichúguië' Dios queëru' dza si' za'.

2

Xichinë' Dios benë' Pablo yödzö Tesalónica

¹ Böchi' luzá'atu', nöz quézili' biti' guca nítisö dxin queë' Dios bentu' cate' ni' bidxintu' ga zóali'.

² Nözili' ca guca queëtu' lu yödzö Filipos, ca na' gudí'i guzxáca'tu', ate' guluá' dö' bönachi ni' queëtu'. Ní'irö cate' bidxintu' ga zóali' gúcatu' rugu ladxi' tu' guzóalenë' Dios queëru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'.

³ Cate' ni' guchízatu' icja nágali' xtídzë'ë Dios, bë'ëtu' didza', calëga tu' nazí'i ye'e netu', en calëga tu' bi guzé ládxi'tu' le dë queëli', en biti' guzxi' yé'etu' libí'ili'.

⁴ Tu' nuzxöni ládxië'ë Dios netu', budödë' lu na'tu' guntu' libán que didza' dxi'a queë', ate' canísö ru'itu' didza'.

⁵ Nöz quézili' catu' caz bë'lentu' libí'ili' didza' le gun zxön libí'ili', en biti' gulëaj tsahui' cuintu' ca run nu bi rizë ladxi' le dë queëli'. Nöz quézinë' Dios naca caní.

⁶ Biti' gudíljatu' yöl-la' ba le naca que yödzölió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasöl-lë'ë Cristo

⁷ guzóalentu' libí'ili' dxi'i ládxi'do', en bentu' ca runnu xiná'agacabi' bi'i huë'ënido', run chí'inu légacabi' dxi'iládxi'do'.

⁸ Caní guca, bidxí'ide'etu' libí'ili', ga bidxintë gú'unitu' udöditu' lu ná'ali', calëgasö didza' dxi'a queë' Dios, pero lá'tu'biqui' udödi caztu' yöl-la' na'bán queëtu', tu' nadxí'ide'etu' libí'ili'.

⁹ Röjneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en të dza bentu' dxin para cabí usaca' zí'itu' nituli' libí'ili'.

¹⁰ Libí'ili' na' réajlë'ëli' Cristo, huáca gunli' ba nalí, ate' nözinë' Dios ca na' gudá'entu' libí'ili' idú ca raza ládxië'ë Dios, en idú dxí'ado', en ca na' cuntu nu gaca bi innë que.

¹¹ Lësca' caní nözili' ca bentu' ca runë' tu bönni' quégacabi' zxi'inë', guchízatu' icja nágali', en butípatu' ládxi'li' tu tuli'.

¹² Busá'atu' ládxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení queë'.

¹³ Que lë ni na' ca', rëtica'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyönili' bë'ëtu' didza', calëga ca xtídza' bönáchisö, pero ca le nácate' naca, xtídzë'ë Dios naca. Xtídzë'ë na' run dxin lu icja ládxi'do'oli' libí'ili', réajlë'ëli' Cristo.

¹⁴ Böchi' luzá'atu', raca queëli' ca raca quégaca bönachi queë' Dios, nupa néquiguequi queë' Jesucristo luyú Judea. Caní naca tu' chigudí'i guzxáca'da'ali' lu ná'agaca bönachi uládz queëli', lëbisö ca na' gula'guí'i gula'záquië' légaquië' lu

ná'agaca bönachi uládz quégaquië', nupa ni' ná'agaca bönni' judío.

15 Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládxi'gaquië', en bulu'láguë' ca' netu'. Biti' tunë' le raza ládxië' Dios, tu' cabí ta'lé'enë' dxi'a yúgu'të bönachi izá'a.

16 Tu'záguë'ë ca' xinöztu', para cabí guntu' libán lógaca bönachi izá'a na' bití' nabábagaca légaquië', tu' ru'ilentu' léguequi didza' para ulu'lágaca. Caní' raca, tu'zántica'së' dul-la' nabága'gaquië', en chinabága'gaquië' xíguia' le run ga ichúguië' Dios quégaquië'.

Pablo rë'enë' tsöjyúë' böchi'ru' nacu'ë Tesalónica

17 Na'a, böchi' luzá'atu', ruhu'ínitu' ca' runë' tu bönni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lë ni na', ru'í ládxi'rötu' ulé'etu' loli', tu' rizëda' ládxi'tu' guntu' caní.

18 Que lë ni na' ca' gú'unitu' guídatu' ga zóali', ate' neda', Pablo, le nácatë bë' ládxa'a guída' chopa tsonna luzuí, pero Satanás, tu' xihui', buzaga' xinöztu'.

19 ¿Bizxi caz naca le run ga runtu' löza, o le run ga rudzëjatu', o le ral-la' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí'í cázali' na'?

20 Libí'í cázali' nácali' le run ga nácatu' bica' ba, en le run ga rudzëjatu'.

3

1 Que lë ni na', cate' bíti'rö guca guá' ilentu', ben xtídza'tu' ugá'anatu' chópatu' lu yödzo Atenas,

2 ate' gusöl-la'tu'-bi' bi'í böchi'ru', Timoteo ga zóali'. Nácabi' bi'í huen dxin queë' Dios, en rúnlenbi' neda' tsözxön libán que didza' dxi'a queë' Cristo. Gusöl-la'tu'-bi' ga zóali' para cuéquibi' libí'ili' tsutsu, en ichízabi' icja nágali' ca ral-la' tséajlë'ëli' Cristo,

3 para cabí soa nu gaca chopá ladxi' ni'a que le tu'saca' zí' bönachi ni netu'. Nöz quézili' zóaru' yödzülió ni para guá' ilenru' le caní.

4 Lë'sca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zí' rë'u, le gaca ca na' chiguca queëtu', ate' nöz quézili' lë na'.

5 Que lë ni na', cate' bíti'rö guca guá' ilena', gusöl-la'a-bi' bi'í Timoteo ga zóali', para ududíxjöi'ibi' neda' ca naca queéli' ca réajlë'ëli'-në' Cristo, en channö cabí gulú'u tu' xihui' libí'ili' nöza dul-la', nu na' rigú'u bönachi nöza dul-la', en channö cabí böáca nítisö dxin na' bentu' ga zóali'.

6 Cate' buzá'abi' bi'í Timoteo ga zóali', en budxinbi' ga zóatu', busiyönbi' netu' le naca dxi'a. Bë'ëbi' didza' ca na' réajlë'ëli'

Cristo, en ca na' nadxí'igacali'-nē' yugu' böchi' luzá'aru', en ca na', lu yöl-la' dxi'i ladxi' queéli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' libí'ili'.

⁷ Que lē ni na', böchi' luzá'atu', cate' ni' gudí'i guzxáca'tu' yúgu'tē lē ni, en zían le guca queētu', bidxín didza' queētu' le buí'i zxön netu' cate' biyönitu' ca réajlë'ëli'-nē' Cristo.

⁸ Na'a, nuhuöáca ládxi'tu' tu' riyönitu' rö'öli' tsutsu ca réajlë'ëli'-nē' Xanru'.

⁹ ¿Nacxi caz gaca guíetu'-nē' Dios: "Xclenu'" ca ral-la' guntu' ni'a que yúgu'tē le run ga rudzeja ládxi'tu' lahuë' Dios queëru' ni'a que le nácali' libí'ili'?

¹⁰ Bayudxi rulidztu'-nē' Dios, en rinábitu'-nē' rēla, en tē dza para gaca ulé'etu' libí'ili', en usá'atu' le riyadzaj queéli' ca naca le réajlë'ëli'-nē' Cristo.

¹¹ Na'a rinábitu'-nē' Xúziru' Dios, enca' Xanru' Jesucristo, cu'ë netu' nöza ga idxintu' ga zóali'.

¹² Lēasca' rinábitu'-nē' Xanru' gunē' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'tē bönachi, ca na' netu' nadxí'itu' ca' libí'ili'.

¹³ Rinábitu'-nē' gunē' ga gaca tsutsu, en idú dxi'a icja ládxi'do'oli' lahuë' Xúziru' Dios ca sa'yéaj le naca lá'ayi, ate' gunē' caní ga idxinrö dza huödë' Xanru' Jesucristo, dzágagaca bönachi lá'ayi queë' Lē'.

4

Le runru' le raza ládxe'ë Dios

¹ Ia'stú, böchi' luzá'atu', ni'a queë' Xanru' Jesús ráta'yutu' loli', en richízatu' icja nágalí' para gunlí' ca naca le chinazédali' lu na'tu' ca ral-la' gunlí' le raza ládxe'ë Dios. Ca na' chirunlí', ca' ral-la' gúntica'sili'.

² Chinöz quézili' yugu' le gunná bé'etu' libí'ili' uláz queë' Xanru' Jesús.

³ Le ré'ënē' Dios naca gácali' idú dxi'a, en bítirö gunlí' le cabí naca tsahuí',

⁴ en inözili' tu tuli' nacxi ral-la' sóalenli'-nu nigula que queéli' idú ca sa'yéaj le naca lá'ayi, en gunlí' légacanu bal.

⁵ Biti' ral-la' sóalenli'-nu nigula queéli' lu yöl-la' rizë ladxi' le ruá' dö', ca na' tun bönachi bití' nabábagaca Dios, en bití' núnbë'gaca Dios.

⁶ Ca nácgaca lē ni, cuntu nu ral-la' tödi bē', en cabí sí' ye'e böchi' luzé'e bagáchi'sö, tu' ichúguië' Lē cazë' Xanru' quégaca yúgu'tē nupa tun le caní, gunē' ca na' chigúdxitu' libí'ili', en bentu' ba nalí que loli'.

⁷ Dios bulidzë' rē'u, calëga para gunru' le ruá' dö', pero para gácaru' idú dxi'a.

⁸ Caní naca, nu ruzóa tsölá'alö lë ni, calëga bönáchisö ruzóa tsölá'alö, pero Dios caz ruzóa tsölá'alö, tu' gusöl-lë'ë Lë cazë' Dios Bö' Lá'ayi queëru', Nu ruí'i caní didza'.

⁹ Biti' run bayudxi uzúaja' queëli' lu guichi ca ral-la' idxí'igacali'-në' böchi' luzá'ali', tu' chinazédali' la' libí'isili' lu në'ë Dios idxí'ili' luzá'ali' tuli' ia'tuli'.

¹⁰ Le nácatë nadxi'igacali'-në' yúgu'të böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-në' ca' yúgu'të böchi' luzá'ali'.

¹¹ Ráta'yutu' loli' ca', güi'í ládxi'li' cözali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' libí'ili'.

¹² Gunná bé'etu' libí'ili' caní para gaca gunli' le naca dxí'ado' lógaca nupa bití' nabábagaca libí'ili', en caní gaca, bití' bi yadzaj queëli'.

Ca gaca cate' huödë' Xanru' Jesucristo

¹³ Lësca', böchi' luzá'atu', ré'ënitú inözili' ca raca quégaca nupa chinátigaca, para cabí huí'inili' ca tun ia'zíca'rö bönachi bití' zoa le tun löza.

¹⁴ Channö réajlë'ëru' gútië' Jesús, en bubanë', lësca' caní ral-la' uzxöni ládxi'ru'-në' Dios gunë' ga huödalengaca tsözxön Jesús nupa ni' chigulati, en gula'yéajlë' Lë'.

¹⁵ Que lë ni na' rigu'íxjöi'itu' libí'ili' xtídzë'ë Xanru' le rnna caní: "Ré'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati."

¹⁶ Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo.

¹⁷ Ní'irö ré'u ni zóaru' nabanru', en nagá'anaru' luyú ni, uchisë' ré'u tsözxön len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóaléntica'siru'-në' Xanru'.

¹⁸ Que lë ni na', guli'huí' zxön luzá'ali' tuli' ia'tuli' ca nácgaca didza' ni.

5

¹ Na'a, ca naca dza na', o rëla na' cate' ilaca lë ni, bití' run bayudxi uzúaja' queëli' lu guichi, böchi' luzá'atu'.

² Libí'ili' chinöz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'í dzö'ölö.

³ Cate' ila'nná bönachi: "Raca dxi'a queëru', en bití' bi gaca queëru'", ní'irö la' idxintë le usuniti léguequi, lë na' idxín quéguequi ca na' ridxín le rigu'í rizáca'nu nigula na'

chizóa sóabi' bí'ido' queénu, ate' cuntu nu nutsa' ladaj bönachi yödzölió ni nu ulá cate' gaca lë na' gaca dza na'.

⁴ Na'a, böchi' luzá'atu', biti' zóali' chul-la niti, en que lë ni na' biti' idxin dza ni' queéli' bagáchi'sö ca ridxinë' bönni' gubán.

⁵ Yúgu'tëli' nácali' bönachi que bení', en que lahui' dza. Biti' nácaru' bönachi que chí'i dzö'ölö, en calëga que le naca chul-la.

⁶ Que lë ni na', biti' ral-la' tódi yëla loru' ca raca quegaca nupa biti' nabábagaca rë'u, pero ral-la' usubán ládxi'ru', en cözaru' ba'a ládxi'do'.

⁷ Nupa tasi, chí'i dzö'ölö tasi, en nupa ta'zudxi, chí'i dzö'ölö ca' ta'zudxi.

⁸ Na'a, rë'u ni, nácaru' que lahui' dza, en ral-la' cözaru' ba'a ládxi'do', tu' chinácuru' zxaru' le run chí'i rë'u, le naca yöl-la' réajlë' queëru' Dios, en yöl-la' nadxí'i, ate' le runru' löza uláru' naca ca tu lu'u guié le run chí'i ícjaru'.

⁹ Caní naca, tu' nuzóë' Dios rë'u ni, calëga para idxinru' ga ichúguië' queëru', pero para uláru' tu' ruzxöni ládxi'ru'-në' Xanru' Jesucristo,

¹⁰ tu' gútië' Jesús uláz queëru' para sóaru' ibanru' tsözxön len Lë' cate' huödë', sal-la' chinátiru' o sóaru' ibanru' dza ni'.

¹¹ Que lë ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízië' icja nágagaquië' böchi' luzë'ë ta'yéajlë'ë Cristo

¹² Ráta'yutu' loli', böchi' luzá'atu', gúnbë'ëli' nupa tun xichinë' Xanru' ga zóali', nupa na' ta'nná be'e libí'ili' uláz queë' Xanru', en tu'sá ládxi'li'.

¹³ Ráta'yutu' loli' ca', gunli' légaquië' bal lu yöl-la' nadxí'i queéli', tu' tunë' dxin na'. Guli'cöza dxí'ado' tuli' len ia'tuli'.

¹⁴ Lësca' caní richízatu' icja nágali', böchi' luzá'atu', para usá'ali' ládxi'gaca nupa biti' túngaca dxin, en utípali' ládxi'gaca nupa tu'huöaj ládxi'guequi, en gácalenli' nupa biti' naca tsutsu ca ta'yéajlë' Cristo, en gácali' nōxaj lādxi' lógaca yúgu'të bönachi.

¹⁵ Guli'gún chí'i cuinli' para cabí uzi' lëbi luzá'ali', en cabí guá'ali' dó' que nu ruá' dó' queéli', pero guli'gü' ládxi'li' gúntica'sili' le naca dxi'a que luzá'ali' tuli' ia'tuli', en quegaca yúgu'të bönachi.

¹⁶ Buli'dzéjatica'sö,

¹⁷ en buli'lídzatica'së' Dios,

¹⁸ en guli'guié' Lë': "Xclenu'."

Caní ral-la' gunli' ni'a que yúgu'të le raca queéli', tu' nácgaca lë ni le rë'ënë' Dios gunli' tu' nácali' queë' Jesucristo.

¹⁹ Biti' uzóa dxili' le rulídzatica'së' Dios Bö' Lá'ayi libí'ili'.

²⁰ Biti' uzóali' tsölá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxi'a.

22 Biti' bi gútsa'li' le ruá' dö'.

23 Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chi'ë bö' naca cázali', en icja ládxi'do'oli', en idútë le nácali', ate' cuntu nu gaca bi innë queëli' dza ni' huödë' Xanru' Jesucristo.

24 Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

Pablo rigu'ë yugu' böchi' luzë'ë lu në'ë Dios

25 Böchi' luzá'atu', buli'lidzë' Dios, en inábili'-në' gácalenë' netu'.

26 Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queëli'.

27 Ni'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagaquië' Cristo.

28 Rinábida'-në' Xanru' Jesucristo uzá' ládxe'ë queëli' le nácgaca dxi'a queë'. ¡Ca' gaca!

DIDZA' BUROPI GUSÖL-LË'Ë PABLO YÖDZÖ TESALÓNICA

Pablo rugapë' Dios bönachi queë' Cristo nacué' Tesalónica

¹ Neda', Pablo, rugapa' Dios libí'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'.

² Rinábitu' Xúziru' Dios, en Xanru' Jesucristo, uzá' ládxë'ë queëli', en gunë' ga soa dxi icja ládxi'do'oli'.

Dios ichúguië' quégaca bönachi dul-la' ila'nítigaca cate' huödë' Cristo

³ Ral-la' guíetica'stu'-në' Dios: "Xclenu" ca naca queëli', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxí'ili' luzá'ali' tuli' ia'tuli' zeaj rácarö idú.

⁴ Que lë ni na', len yöl-la' rudzeja riguixjö'ötu' ca naca queëli' lógaca bönachi queë' Dios ni, tu' ribözali' zxön ladxi', en réajlë'ëli' Dios sal-la' ta'bíada' ládxi'gaca bönachi libí'ili', en riguí' rizáca'da'ali', pero ruá' rilenli' yúgu'të.

⁵ Yugu' lë ni taca bë' naca tsahui' ca ruchi'a rusöröë' Dios bönachi. Ru'ë lataj riguí' rizáca'li' na'a, para gácali' lesaca' tsázali' ga ni' rinná bë'ë Lë'.

⁶ Naca tsahui' ca gunë' Dios, ubi'ë quégaca nupa tu'saca' zi' libí'ili', gunë' ga ila'guí' ila'zaca' nupa na'.

⁷ Ia'stú, libí'ili' riguí' rizáca'li' na'a, ate' ubi'ë Dios queëli', gunë' ga uzí' ládxi'li' tsözxön len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxön, en ulu'lu'ë lahui yöl-la' huáca zxön queë'.

⁸ Ilá' lahuë' Cristo dza ni' ca tu guí' zxön cate' ni' gunë' zi' nupa biti' núnbë'gaca Dios, en biti' túngaca ca rnna didza' dxi'a queë' Xanru' Jesucristo.

⁹ Yugu' bönni' caní, uzí' lëbë' légaquië', ate' tsaz tsöjtsázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'.

¹⁰ Caní gaca dza ni' cate' huödë' para gaca queë' yöl-la' ba ni'a que le náca gaca bönachi lá'ayi queë', ate' ulu'bani ni'a que le benë' ga náca gaca yúgu'të nupa ta'yéajlë' Lë'. Caní gaca ca' queëli' tu' guyéajlë'ëli' le bentu' ba nalí que loli' ca naca queë' Jesús.

¹¹ Que lë ni na' ca', rulídzatica'stu'-në' Dios queëru', en rinábitu'-në' gácalenë' libí'ili', en gunë' ga gácali' lesaca' idéli'li'

lë na' bulidzë' libí'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruí'i ládxi'li' gunli' le naca dxi'a, en yúgu'të dxin runli' lu yöl-la' réajlë' queëli' Lë'. Len yöl-la' huáca queë' Dios huáca gunli' lë ni.

¹² Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' libí'ili' bica' ba ni'a que le gunë' Lë', gaca ca naca le buzá' ládxe'ë queëli' Dios queëru', enca' Xanru' Jesucristo.

2

Ulu'í'lahuë' Bönni' Xihui'

¹ Na'a, ca naca que dza huödë' Xanru' Jesucristo, en ca gaca, uduubë' rë'u queë' Lë', ráta'yutu' loli', böchi' luzá'atu',

² para cabí guí'ili' lataj nu gun chixi libí'ili' ca náca gaca le guzxi' lu ná'ali'. Biti' cuéqui böniga icja ládxi'do'oli' ni'a que bi ta'nnë' bönni' ta'zi' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tuí'i bönachi, o ni'a que bi nazúaj tu lu guichi ta'nnë' netu' gusöl-la'tu', le rnna: "Chigudödi dza huödë' Xanru'."

³ Biti' ca' guí'ili' lataj nu si' ye'e libí'ili', tu' cabí idxín dza ni' huödë' Jesús channö cabí ila'lá' lahui zí'alö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila.

⁴ Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të le nequi queë' Dios, o le tun zxön bönachi lu yöl-la' run Dios bal quéguequi. Gunë' bönni' na' caní ga idxintë cö'ë ca Dios caz lu yudo' ga naca xilatjë' Dios, en gun cuinë' ca Dios.

⁵ ¿Naru' cabí röjneli' busiyönda' libí'ili' yugu' lë ni cate' ni zóalena' libí'ili'?

⁶ Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'.

⁷ Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'.

⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítie' lë' len le tsëpi yösa bení' que dza huödë'.

⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bönachi.

¹⁰ Len yöl-la' huáca que le cabí nácatë, gunë' caní lógaca nupa ila'niti tu' cabí gula'zi' lu në'eguequi idú ládxi'guequi le naca idútë li, para ulu'láguequi.

11 Que lë ni na' Dios gu'ë lataj idxín quéguequi tu nu run yöl-la' huáca, nu si' ye'e léguequi para ila'yéajlë' le cabí nácatë.

12 Caní gaca para ila'baga' xíguia' yúgu'të nupa bití' gula'yéajlë' le naca idútë li, pero gula'yaza ládxi'gaca le cabí naca tsahui'.

Nupa gurö cazë' Dios para ulu'lágaca

13 Böchi' luzá'atu', libí'ili' na' nadxí'inë' Xanru' libí'ili', ralla' guiética'stu'-në' Dios: "Xclenu'" ni'a que le naca queëli', tu' chigurö cazë' Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li.

14 Para gaca caní queëli', Dios caz bulidzë' libí'ili', para idéli'li' gunli' tsözxón Xanru' Jesucristo lu bení' queë'. Caní gaca ni'a que didza' dxi'a runtu' libán que.

15 Que lë ni na', böchi' luzá'atu', guli'sóa tsutsu, en guli'gún chi'i didza' na' nazëdali', le bé'entu' libí'ili', en buzúajtu' queëli' lu guichi.

16-17 Rinábitu'-në' Xanru' Jesucristo, en Xúziru' Dios, utipë' ládxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queëru' le ruhuí' zxöntica'sö rë'u, en le naca dxi'a runru' löza, yugu' lë na' buzá' ládxe'ë Dios queëru'.

3

Le ral-la' inábiru'-në' Dios

1 Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bönachi, para gaca ni ca na' guca ga ni' zóali' libí'ili'.

2 Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bönachi Dios.

3 Na'a, tu' runë' Xanru' ca rnnë', gunë' ga gácali' tsutsu, en gun chi'ë libí'ili', para cabí idzunli' lu na' tu' xihui'.

4 Ruzxöni ládxi'tu'-në' Xanru' ca naca queëli', gunli' yugu' lë ni si' gunábitu' libí'ili', ca na' chirunli'.

5 Rinábitu'-në' Xanru' usë'ë ládxi'li' para idxí'ili'-në' Dios, en cözali' zxön ladxí' ca na' benë' Cristo.

Ca run bayudxi gunru' dxin

6 Ni'a que Lë' Xanru' Jesucristo ruchí'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en bití' tunë' ca naca xibá buséditu' libí'ili'.

7 Nöz quézili' ral-la' gunli' ca runtu' netu'. Bití' gudásitu' ca' netu' ga ni' zóali'.

8 Bití' gudágusötu' le bénnali' queëtu', pero lu yöl-la' ruúbi ruguí'i, en lu yöl-la' ricuidí' bentu' dxin rëla, en te dza para cabí usaca' zí'itu' nituli' libí'ili'.

⁹ Caní bentu' para gácatu' loli' ca tu le ruluí'i libí'ili' ca ral-la' gunli', sal-la' dē lu na'tu' inábatu' bi gunli' queētu'.

¹⁰ Lēasca' cate' ni' guzóalentu' libí'ili', buchí'atu' libí'ili' caní, le rnna: "Channö cabí rē'ēnē' nu bönni' gunē' dxin, biti' gü'ili' le gahuē'."

¹¹ Canísö rnnatu' tu' riyönitu' nútsa'gaquiē' ladjali' yugu' bönni' ta'dasē' ca', biti' bi dxin tunē', pero ta'dasē' ca' bi tun bi ta'nnē'.

¹² Ní'a queē' Xanru' Jesucristo ruchí'atu' yugu' bönni' tunē' caní, en richízatu' icja nágagaquiē' ilunē' dxin lu yöl-la' riböza dxí'ado', para gaca ilahuē' le nequi quegacasē'.

¹³ Na'a, böchi' luzá'atu', biti' soa dxili', güntica'sili' le naca dxi'a.

¹⁴ Channö núti'tēs bönni' biti' gunē' ca rnna xtídza'tu', le ruzúajtu' lu guichi ni, guli'gún ga gaca bē'ē bönni' na', en biti' gunli' tsözxön lē' para utuí'inē'.

¹⁵ Biti' ral-la' ilé'eli'-nē' ca tu bönni' biti' rilé'enē' libí'ili' dxi'a, pero guli'sá' lādxē'ē ca böchi' cázali'.

Pablo rigu'ē lu nē'ē Dios yugu' böchi'ru' nacu'ē Tesalónica

¹⁶ Rinábitu'-nē' Xanru' güntica'sē' ga cuía dxi icja lādxí'do'oli' ca naca yúgu'tē le runli', en sóalenē' yúgu'tēli'. Lē cazē' runē' ga rō'ö dxi icja lādxí'do'oru'.

¹⁷ Neda', Pablo, len na' caza' ruzúaja' lu guichi ni le rugapa' Dios libí'ili', ate' naca tu le naca bē' yúgu'tē guichi risöl-la'a. Canísö ruzúaja' lu guichi.

¹⁸ ¡Le ruzá' lādxē'ē Xanru' Jesucristo queēru' gaca queéli' yúgu'tēli'! ¡Ca' gaca!

DIDZA' ZÍ'ALÖ GUSÖL-LĒ'Ē PABLO QUEËBI' BÍ'I TIMOTEO

Pablo rugapë' Dios bí'i Timoteo

¹ Neda', Pablo, naca' gubáz nasöl-lë'ë Jesucristo. Caní naca' tu' caní gunná bë'ë Dios, Nu rusólá rë'u, enca' tu' gunná bë'ë caní Xanru' Jesucristo, Nu na' runru' löza.

² Rugapa' Dios lí', böcha'ado' Timoteo. Nacu' ca zxi'ini caza' tu' benru' tsözxön xichinë' Dios. Rinábida'-në' Xúziru' Dios, enca' Xanru' Jesucristo uzá' ládxe'ë quiu', en huéchi' ládxe'ë lí', en gunë' ga soa dxi icja ládxi'do'o.

Pablo rusë'ë ládxi'bi' Timoteo ca naca xibá cabí naca idú

³ Ráta'yua' lo' na' a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lë' bönni' ni' cabí ulu'sédinë' tu xibá yúbölö,

⁴ en cabí ilunë' zxon yugu' didza' ridasö, en lágaca zióntërö cö' xuz xtó'ogaca bönachi, yugu' le tun ga tu'i ládxi'gaca bönachi le náçagaca nítisö. Yugu' le caní bití' tun tsutsu bönachi queë' Dios ca naca le ta'yéajlë' Lë'.

⁵ Le rë'ëni gun lë ni rea' lí', naca para ila'dxi'i bönachi luzë'eguequi, naca idú ládxi'gaca, en gaca dxi'a le ta'zá' ládxi'gaca, en gaca idú le ta'yéajlë' Dios.

⁶ Ca náçagaca lë ni, bití' bulu'rúajë' bal-lë' bönni' dxi'a, pero gula'guélë'ë tu nöza yúbölö, en tunë' bal yugu' le bití' nácatë.

⁷ Té'ënnë' ulu'sédinë' bönachi ca naca le rinná bë' xibá queë' Dios, sal-la' bití' ta'yéajni'inë' lë na' tu'sédinë', en bití' ta'yéajni'inë' le ta'nnë' nácatë.

⁸ Rë'u nöziru' naca dxi'a xibá gunná bë'ë Dios, channö nu rugún le dxin ca ral-la' gun.

⁹ Lë ni nöziru': Dios gudixjë' xibá queë', calëga para inná be'e bönachi tsahui', pero para inná be'e bönachi caní:

Nupa ta'dá'bagá' le rinná bë' xibá na'.

Nupa bití' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa bití' túngaca Dios zxon.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

¹⁰ Nupa tun le ruá' dö'.

Yugu' bönni' nacua'lenë' la' löjödxi bönni'gaquië'.

Nupa ta'bán yugu' bí'ido'.

Nupa ta'zí yë'.

Nupa tun tsutsu xtídza'guequi, ta'nná le cabí nácatë.

Nupa ta'dá'bagá yugu' xibá tsahui'.

¹¹ Nöziru' naca caní tu' bidxín queëru' didza' dxi'a buzá' láchë'ë Dios queëru'. Lë' náquië' lá'ayi, en budödë' lu na'a didza' dxi'a na' runa' libán que.

Pablo rë' Cristo: "Xclenu" tu' buéchi' láchë'ë lë'

¹² Rea'-në' Xanru' Jesucristo, Nu rutipa láchxa'a, "Xclenu" tu' buzxöni láchxë'ë neda', en buzóë' neda' guna' xichinë'.

¹³ Caní benë' sal-la' zí'alö neda' gunné' zi'a queë', en gudxía láchxa'a bönachi queë', en zían le bi'a dö' quéguequi, pero Cristo buéchi' láchxë'ë neda', tu' bena' caní lu yöl-la' bití' réajni'i quia' cate' ni' bití' réajlë'ënida' Lë'.

¹⁴ Na'a, zxöntëro naca le buzá' láchxë'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

¹⁵ Didza' idütë li lë ni, en le naca lesaca' ila'zí' lu ná'agaca yúgu'të bönachi, le rnna: Lë cazë' Jesucristo bidë' yödzölió ni para busölë' bönachi dul-la', ate' busölë' neda' sal-la' nácara' bönni' dul-la' ca yúgu'të bönachi.

¹⁶ Que lë ni na' buéchi' láchxë'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxön ladxí' idú queë', para gaca' tu le rulu'i lógaca nupa ila'yéajlë' Lë', en gata' quéguequi yöl-la' na'bán idú.

¹⁷ Na'a rnnía': ¡Yöl-la' ba Dios, Nu rinná bë'tica'sö, Nu catu caz údxi que, en Nu bití' gaca ilé'ëru', la's dui Dios Nu nözi caz yúgu'të! ¡Queë' Lë' gácatíca'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Zxí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú láchxë'ë rejë' gudil-la, en para uzi'u xibé yugu' le gula'guíxjö' zí'alö nupa ni' gulu'i didza' uláz queë' Dios ca gaca quiu'.

¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja láchxi'do'o. Chigula'chixi gula'nigui bal-la bönachi, nupa bulu'zóa tsölá'alö le réajlë'ëru' Cristo.

²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nnë' zi'ë que le nequi queë' Dios.

2

Le rusedi rë'u ulídzaru'-në' Dios

¹ Que lë ni na' le naca lo le richízia' icja nágagaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunné' bi riquíniru', en ca ral-la' guiëru'-në': "Xclenu." Yugu' lë ni ral-la' gunru' uláz quéguequi yúgu'të bönachi.

² Lësca' caní ral-la' gunru' uláz quégaca nupa ta'nná bē', en quégaca yúgu'tē nupa nácagaca lo. Caní ral-la' gunru' para gaca dxi'a queëru', en gata' queëru' yöl-la' riböza tsáhui'do'. Ral-la' gunru' caní lu yöl-la' réajlë' queëru' Dios, en lu yöl-la' ba'a ladxi' queëru'.

³ Lē ni naca dxi'a, en le raza láchxë'ē Dios, Nu rusölá rē'u.

⁴ Dios caz ré'ënē' ulu'lágaca yúgu'tē bönachi, en ré'ënē' ilúnbē'e le naca idútē li.

⁵ Tuzē' náquiē' Dios, en tuzē' bönni' ruúnē' dzaga Dios, en bönachi. Nu ni naca Jesucristo, Nu gulaj bönachi.

⁶ Lē cazē' budödi cuinë' lu yöl-la' guti, le benē' tu' nözi dul-la' nabága'gaca yúgu'tē bönachi. Dios benē' ba nalí queē' cate' bidxín dza queē' gútiē'.

⁷ Ca naca lē ni, Dios buzóē' neda' para guna' libán que, en gaca' gubáz nasöl-lē'ē Cristo, para usédigacada' bönachi izá'a ca naca le réajlë'ëru' Cristo, en ca naca le naca idútē li. Rilítēda', en bití' ca' rizí' yē'a.

⁸ Na'a, ré'ēnda' ulu'lidzē' bönni' Dios, en iláta'yuē' lahuē' gátí'tēs, nácagaquiē' idú dxi'a, en cabí ila'lenē' luzá'agaquiē', en cabí ila'dil-la dídza'gaquiē'.

⁹ Lësca' caní, ré'ēnda' ilácunu nigula le naca ba'a. Le naca lachi le ral-la' ulu'luí'ínu lahui naca yöl-la' nöxaj ladxi', en le naca idú ladxi', en calēga le tu'pá'asinu icja lógacanu len oro, en yugu' bugá, en lari' nazáca'da'.

¹⁰ Yugu' le dxi'a tunnu ulu'luí'i lahui le nácagacanu ca na' run le tácunu le naca ba'a. Caní ral-la' ilunnu nigula núnbē'gacanu Dios.

¹¹ Ral-la' ila'cuá'anu yugu' nigula dxisö cate' nu rusedi légacanu, en ila'cuá'anu nöxaj.

¹² Bití' runna' yugu' nigula lataj ulu'sédinu, en calēga ila'nná bé'enu yugu' bönni'. Ral-la' ila'cuá'anu dxisö ga nudúbigaca bönachi queē' Cristo.

¹³ Caní ral-la' gaca, tu' buzóē' Dios zí'alö Adán, ate' gudödi na' buzóē'-nu Eva.

¹⁴ Adán na', bití' guzxi' ye'e tu' xihui' lē', pero nigula queē', guzxi' ye'e lēnu. Caní guca, gudítsjanu xibá queē' Dios,

¹⁵ pero ulanu nu nigula ruzóanu-bi' bí'ido' channö gúntica'sinu ca röjlöz le réajlë'ëru' Dios, en yöl-la' nadxí'i, en channö gácanu idú dxi'a, en idú ladxi'.

3

Ca ral-la' ilácagaquiē' bönni' tapa chí'ē bönachi queē' Cristo

¹ Dídza' idútē li lē ni rna: Channö ruí'i láchxë'ē nu bönni' gáquiē' nu gapa chí'i bönachi queē' Cristo, dxin dxi'a rizé láchxë'ē.

² Nu bönni' rapa chi'ë bönachi queë' Cristo run bayudxi gáquië':

Tu bönni' cuntu nu gaca bi inné queë'.

Zoa túzinu nigula queë'.

Ral-la' gáquië' ban ladxi', en idú ladxi', en nöxaj ladxi'.

Ral-la' gu'ë ga ila'cu'ë böchi'ru' ta'dxinë' lidxë'.

Ral-la' gáquië' bönni' nazéqui'de'enë' usédinë' bönachi.

³ Biti' gáquië' bönni' re'jë', en calëga bönni' sínia'.

Biti' gaquië' bönni' rizé ládxi'së' si'ë dumí.

Ral-la' gáquië' bönni' dxi'i ladxi', en zxön ladxi'.

Biti' gáquië' bönni' ruhuídi'në'.

⁴ Ral-la' gáquië' bönni' rinná bé'enë' dxi'a bönachi nacuá' lidxë'.

Ral-la' ilunbi' xzí'inë' ca rnna xtídzë'ë lu yöl-la' run bal xúzgacabi'.

⁵ ¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacuá' lidxë'?

⁶ Biti' ral-la' gáquië' tu bönni' si' gusi lahuë' t'ë'ë Cristo, para cabí tödi bë' gun ba zxön cuinë', en biti' gaca queë' ca na' guca que tu' xihui', nu ben ba zxön cuini, ate' Dios guchúguië' que tsöjgá'ana lataj chul-la.

⁷ Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' bönachi queë' Cristo

⁸ Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zé ládxi'së' dumí.

⁹ Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gaquië'.

¹⁰ Yugu' bönni' ni ral-la' si' bé'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi inné quégaquië'.

¹¹ Lësca' caní, nigula que queëgaquië' ral-la' ila'cuá'anu idú ládxi'gacanu, en cabí ilácanu unnë que luzë'e. Ral-la' ilácanu zxön ladxi', en ilácanu li ladxi' lu yúgu'të le tunnu.

¹² Yugu' bönni' ilácalenë' bönachi queë' Cristo ral-la' soa túzinu nigula que queëgaquië'. Lësca' ral-la' ila'nná bé'enë' dxi'a xzí'inigaquië', enca' bönachi ulidxi que queëgaquië'.

¹³ Run bayudxi gaca caní, tu' ta'déli'në' lataj ga ilún bal bönachi xtídzá'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë'ëru' Jesucristo.

Le bigachi' que le reaj ládxi'ru'-në' Dios

14 Yugu' didza' ni ruzúaja' quiu' lu guichi, sal-la' runa' löza uduyútea' li'.

15 Channö huadzéda', ruzúaja' quiu' didza' ni para inözinu' naca ral-la' gunu' lógaca bönachi nacua' lidxë' Dios, nupa nácagaca bönachi queë' Dios ban, en nácagaca tsutsu, en ta'guíxjö' dxi'a le naca idútë li. Nácagaca ca yugu' ya'zxön, en le nunída'gaca zö'ö, le nácagaca tsutsu, en ta'zön yu'u.

16 Le nácatë, zxöntëro naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios buluí'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödzülió Lë'.

Dios buchisë' Lë' xitsá' ga nayëpisëtëre'.

4*Nupa ulu'huöaj ládxi'gaca ca naca le réajlë'ëru'-në' Cristo*

1 Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huöaj ládxi'gaquië' ca naca le réajlë'ëru' Cristo. Ulu'zë nágagaquië' xtídza'gaca bönachi nacua'len bö' ta'zí' yë' léguequi, ate' ulu'zë nágagaquië' yugu' xibá queguequi bö' xihui'.

2 Ulu'zë nágagaquië' xtídza'gaca bönachi tu'lu'isö tsahui' cuínguequi. Yugu' bönachi na' tuí'i didza' le cabí nácatë, en chinazidi ládxi'do'guequi, para cabí uxösa léguequi.

3 Caní naca, tu'záguë'ë xinözguequi nupa t'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzí'iru' xibé, lë na' huáca ilágugaca nupa ta'yéajlë' Dios, nupa na' chinúbë'gaca le naca idútë li, en t'ë Dios: "Xclenu'" cate' tahuë' le.

4 Dxi'a naca yúgu'të le benë' Dios, en biti' bi ral-la' uzóaru' tsölá'alö channö ráguru' le, en rëru'-në' Dios: "Xclenu'."

5 Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

6 Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazëdu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u.

7 Gurú'una yugu' didza' ridasö que yödzülió ca naca didza' tuí'inu yugu' nigula gula. Béntica'sö le gun ga gacu' tsutsu para gunu' ca ré'ënë' Dios.

⁸ Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca rě'ëně' Dios. Cate' runru' caní, lě ni run ga runru' löza sóaru' ibanru' yödžölió ni, enca' sóaru' ibanru' dza zá'gaca, tōdi uzá'aru' yödžölió ni.

⁹ Didza' idútě li lě ni, en le naca lesaca' ila'z'í lu ná'agaca yúgu'tě bönachi.

¹⁰ Que lě ni na', rusáca'da' zi' cuinru' runru' dxin, tu' runru' löza Dios ban. Cristo gútiě' para usölě' yúgu'tě bönachi. Tu'z'í xibé le beně' nupa na' ta'yéajlě' Lě'.

¹¹ Gunná be'e, en busedi bönachi ilún yugu' lě ni.

¹² Cuntu nu ral-la' uzóa li' tsölá'alö tu' nacu' bi'i ra'bán, pero ral-la' gunu' le uluí'i nupa ta'yéajlě' Dios ral-la' ilún ca runu' li'. Caní uluí'inu' légaquiě':

Len didza' ru'u, en len le runu'.

Ca nadx'ínu' luzó'o, en ca ru'u lataj zóaleně' Dios Bö' Lá'ayi li'. Ca runu' ca rno', en ca nacu' idú tsahui'.

¹³ Tsanni za'a idxina' quiu', bě'tica'sö ladxi' ulabu' guichi lá'ayi lógaca bönachi nacua' ga ni' zu'. Guchiza icja nágagaquiě' lě ni, en busedi légaquiě'.

¹⁴ Biti' udödu' cá'asö le buzá' ládxě'ě Dios quiu', lě na' benně' quiu' ca na' gula'nná nupa ni' guluí'i didza' uláz queě' Dios, cate' ni' bönni' gula tapa chi'ě bönachi queě' Cristo gula'xóa ná'agaquiě' li', en bulu'lidzě' Dios.

¹⁵ Béntica'sö yugu' lě ni. Bě'tica'sö ládxu'u gunu' caní, para ila'lé'e yúgu'tě bönachi ca na' zeaj ridéli'nu' le nequi queě' Cristo.

¹⁶ Gudapa chi'i cuinu', en gudapa chi'i xibá rusédiru'. Béntica'sö yugu' lě ni, ate' channö gunu' caní, uló' li', en ulu'lágaca ca' nupa ila'yöni li'.

5

Ca ral-la' gunbi' Timoteo ni'a quégaca bönachi queě' Cristo

¹ Biti' uzenu' bach yugu' bönni' gula, pero guchiza icja nágagaquiě' didza', tsca nácagaquiě' xuz cazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' cazu'.

² Guchiza icja nágagacanu nigula gula didza', tsca nácagacanu xiná' cazu'.

Guchiza icja nágagacabi' bi'i nigula ra'bán didza', tsca nácagacabi' bi'i zan cazu', ca na' röjlöz le naca idú dxi'a.

³ Ben bal yugu' nigula ba guti bönni' que queėgacanu, nácagacanu túzinu.

⁴ Channö zóanu tu nigula caní nacua'abi' bi'i queěnu o xzí'ini xi'sóanu, ral-la' ila'zédabi' ilunbi' ca rě'ëně' Dios, para ilácalenbi' z'í'alö bönachi nacua' lédxigacabi', en ulu'b'í'ibi'

quégaquië' xuz xiná'agacabi'. Lë ni naca dxi'a, en le raza lãdxë'ë Dios.

⁵ Na'a, nigula na' nagá'ananu túzinu, runnu löza Dios, ate' rëla, en te dza rinábatica'sinu lahuë' Dios, en rulídzanu Lë' ni'a quégaca bönachi queë',

⁶ pero nigula túzinu na' runnu ca naca le rizë lãdxi'nu nácanu ca tu nigula chinátinu cate' ni zóanu nabannu.

⁷ Lësca' caní, gunná be'e bönachi nacua' ga ni' zu', para ilún ca sa'yéaj yugu' lë ni, para ilaca bönachi cuntú nu gaca bi innë quéguequí.

⁸ Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' bönachi nacua' lidxë', chigudá'baguë'ë le réajlë'ëru' Cristo, en nácarë' xihui' ca nu cabí réajlë' Dios.

⁹ Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí buca'ananu-në' bönni' queënu para sóalennu-në' ia'tué' bönni'.

¹⁰ Run bayudxi soa nu gun ba nalí queënu ca nácgaca le dxi'a runnu.

Gácalenli'-nu channö buscúlunu-bi' yugu' bí'ido', en channö ruí'ínu ga ila'cuá' böchi'ru' zá'gaquië' yödzö zi'tu', en channö ruí'ínu le ilë'aj ilágugaca bönachi queë' Dios, en channö rácalennu nupa ta'guí'i ta'zaca', en channö rúntica'sinu yúgu'të le naca dxi'a.

¹¹ Yugu' nigula túzinu bití' yu'igacanu tsónnalalaj iz, bití' ibábagacanu nupa gácalenli', tu' ilunnu ca ta'zësö lãdxi'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö.

¹² Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö.

¹³ Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unnë que luzë'e, en tsöjgútsa'gacanu ga yúbölö, en ila'nnanu le cabí nácatë.

¹⁴ Que lë ni na', ré'ënda' ulu'tsaga ná'gacanu leyúbölö nigula túzinu caní yú'ugacanu iz cuidí', en ulu'scúlanu-bi' yugu' bí'ido', en ila'nná bé'enu bi'i nacua'abi' yu'u que queëgacanu, para cabí ilu'ínu nu ridá'baga' rë'u lataj bi innë queëru', rë'u na' réajlë'ëru' Cristo.

¹⁵ Caní ral-la' gaca, tu' chibulu'bíga'nu bál-lagacacnu, ate' tunnu ca ré'ëni Satanás tu' xihui'.

¹⁶ Channö nútí'tës bönni' o nigula nu réajlë' Cristo, nacua'anu nigula túzinu lídxigaca nupa na', ral-la' ilácalen légacanu, para cabí ulu'saca' zi' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

17 Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bē'ë dxi'a, en béntērō ca' bal yugu' bönni' gula na' tunē' dxin, tunē' libán, en tu'sédinē' bönachi.

18 Nazúaj lu guichi lá'ayi le rnna: "Biti' cu'u du ruá'aba' bēdxi na' rulíbiba' zxoá' xtila." Rnna ca': "Náquiē' lesaca' nu bönni' huen dxin si'ë lazxjē'."

19 Biti' si' lu no'o didza' ruí'i nu ruzegui didza' tu bönni' gula rapa chi'ë bönachi queë' Cristo, channō cabí nacuá' chopa tsonna nupa tun ba nalí que le benē'.

20 Nupa túntica'sō dul-la', busidxi léguequi lógaca yúgu'tē bönachi queë' Cristo para iladxi ia'zícá'rō bönachi ni' Dios.

21 Ni'a queë' Xanru' Dios, en Xanru' Jesucristo, en ni'a quégaquiē' gubáz lá'ayi rō queë', rinná bé'eda' li' gunu' ca ta'nná didza' ni. Tuz ca ral-la' uchi'a usörōu' yúgu'tē bönachi, en biti' gunu' bal tuzē' bönni'.

22 Cuntu nu bönni' ixóatē no'o, cabí gunu' ga gáquiē' huen dxin queë' Cristo, para cabí ibágu'u le runē' channō gunē' bönni' na' dul-la'.

23 Bítirō guí'ju' nísasō. Tu' rúntica'sō bayá' lē'u ral-la' guí'ju' láti'do' xisi uva nal-la para cō' dxi'a lē'u.

24 Yugu' dul-la' quéguequi bal-la bönachi ila'lá' lahui zí'alō cate' si' ila'dxín ga uchi'a usörōē' Dios léguequi, ate' tōdi ni ila'lá' lahui dul-la' nabága'gaca ia'zícá'rō bönachi.

25 Lēasca' caní, ila'lá' lahui dxin dxi'a núngaca bönachi, ate' channō cabí nalá'gaca lahui, cuntu nu bönni' gaca ucáchē'ē tsaz dxin na' nunē'.

6

1 Yúgu'tē bönni' nadó'ogaca ral-la' ilúndē'ē bal xángaqüē', para cabí gaca nu innē' zí' que La lá'ayi queë' Dios, en que xibá queë'.

2 Nupa ni' nacu'ē xángaca ta'yéajlē'ē Cristo, biti' ral-la' ulu'cá'ana cá'asō légaquiē' tu' nácagaquiē' böchi'guequi. Ral-la' ilunrō dxi'a xichíngaqüē' tu' ta'yéajlē'ē Cristo, bönni' ni' tu'zi'ē xibé dxin dxi'a na', tu' nadxí'inē' Lē cazē' légaquiē'. Ca naca lē ni, busēdi bönachi nacuá' ni', en guchiza le icja nágagaquiē'.

Le reaj lādxi'ru'-nē' Dios le ruzí'iru' xibé

3 Channō zoa nu bönni' rusēdinē' xibá yúbölō, en biti' rusēdinē' yugu' didza' dxi'a queë' Xanru' Jesucristo, ca naca xibá na' rusedi rē'u ca ral-la' gunru' ca rē'ēnē' Dios,

4 bönni' ni run ba zxōn cuinē', en biti' bi nōzinē'. Didza' biti' naca dxi'a rizé lādxē'ē ca nácagaca didza' böniga, en didza' bizxaj, yugu' le tun ga tu'zxé'e bönachi luzē'eguequi, en ta'díl-lalen luzē'eguequi didza'. Lēasca' tun didza' caní ga

ta'nně zi' bönachi que luzě'eguequi, en ta'zá' ládxi'gaca que luzě'eguequi le cabí nácate.

⁵ Lěsca' caní tun ga ta'díl-latica'sě' didza' bönni' bití' ta'yéajni'ině', nupa bití' nazi' lu ně'eguequi le naca idútě li. Téquini huáca ila'zí' dumí zían channö ilúngaca tsözxön nupa ta'yéaj ládxi'gaca Dios. Gucuíta ga nacuá' bönachi caní.

⁶ Zxön naca le ruzí'iru' xibé cate' len yöl-la' riböza zxön ladxi' reaj ládxi'ru'-ně' Dios.

⁷ Bití' bi nuá'aru' cate' ridxinru' yödžölió, en lěsca' caní, bití' bi uá'aru' cate' uzá'aru' yödžölió ni.

⁸ Que lě ni na', channö dēsö queěru' le gáguru', en le gácuru', ral-la' udžéjaru'.

⁹ Yugu' bönni' tě'ěnně' gata' quégaquiě' yöl-la' tsahui', gaca quégaquiě' le si' bě' légaquiě' le xihui', ate' ila'yu'ě lu yalaj que tu' xihui', ate' lu yöl-la' bití' bi nōzi quégaquiě' zían le ila'zě ládxi'gaquiě', le ilún ditaj légaquiě'. Yugu' lě ni ulu'suniti légaquiě', en ilún ga ila'nítiě' tsaz.

¹⁰ Tu' ta'zě ládxi'gaca bönachi dumí, lě ni run ga tun yúgu'tě le cabí naca tsahui'. Bal-lě' bönni', tu' ta'zě ládxi'gaquiě' le, bulu'cá'aně' le gula'yéajlě'ě Cristo, en chiraca quégaquiě' zían le tu'saca' zi' légaquiě'.

Nu run dxin queě' Cristo naca ca tu bönni' rejě' gudil-la

¹¹ Na'a, bönni' queě' Dios, gucuíta ga raca le caní.

Bě'tica'sö ládxi'u gunu' le naca tsahui', en le rě'ěně' Dios.

Guyéajlě'tica'sě' Cristo, en bidxi'i yugu' luzó'o.

Bě' ladxi' gacu' zxön ladxi', en nōxaj ladxi'.

¹² Ca runě' tu bönni' idú ládxi'ě rejě' gudil-la,

ben dxin que le réajlě'ěru' Cristo, ate' beni quiu' yöl-la' na'bán idú.

Para gaca caní bulidzě' Dios lí'. Dxi'a guca le gunnó' yalaj lulu ca réajlě'u Cristo, lě na' gunnó' lógaca zían nupa tun ba nalí que didza' bě'u.

¹³⁻¹⁴ Ni'a queě' Xanru' Dios, Nu na' nabánigaca yúgu'tě le nacuá', enca' ni'a queě' Jesucristo, Nu ben ba nalí le naca dxi'a le gunně' yálajdo' lahuě' Poncio Pilato, rinná bé'eda' lí' gun chi'u yugu' lě na' gunná bé'eně' Cristo rě'u. Ral-la' gacu' idú tsahui', en bití' bi gunu' le gú'i lataj nu bi inně' quiu', ga idxintě dza ni' ulu'i lahuě' Xanru' Jesucristo.

¹⁵ Cate' idxín dza na' huödě' Jesús, Dios ulu'ě lahui Lě'.

¡Dios náquiě' lá'ayi!

¡Tuzě' Lě' dě lu ně'ě yöl-la' unná bě',

en rinná bé'eně' yúgu'tě nupa ta'nná bě',

en náquiě' ca' Xángaca yúgu'tě nupa nácagaca xan!

¹⁶ ¡Tuzě' Lě' zóatica'sě'!

¡Zoě' lu bení' ga bití' gaca nu idxín rácasö que!

¡Catu caz nu bilé'e Lë', en bití' gaca nu ilé'e Lë'!
 ¡Queë' Lë' gácatíca'sö le run Lë' bal, en yöl-la' unná bë'!
 ¡Ca' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cúngaquië', en para cabí ulu'zxöni ládxi'gaquië' yöl-la' tsahui' na' bití' naca löza. ¡Ral-la' ilunë' löza Dios ban, Nu rúnnada' queëru' yúgu'të le ruzí'iru' xibé!

¹⁸ Gunná be'e légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzejë' quégaca bönachi yechi', en iluí'i ládxi'gaquië' léguequi.

¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Böcha'ado' Timoteo, ben chi'i le nadödi lu no'o. Gucuíta ga nacuá' nupa tuí'i didza' cá'asö, en yugu' didza' bití' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun.

²¹ Bal-la bönachi gula'zí' lu në'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinávida'-në' Dios uzá' ládxi'ë' quiu' le nácagaca dxi'a queë'.
 ¡Ca' gaca!

DIDZA' BUROPI GUSÖL-LË'Ë PABLO QUEËBI' BI'I TIMOTEO

Pablo rugapë' Dios bi'i Timoteo

¹ Neda', Pablo, naca' gubáz nasöl-lë'ë Cristo. Caní naca' tu' rë'ënë' Dios gaca' caní, para caní gaca le guzxi' lu në'ë, gunnë' queëru' yöl-la' na'bán idú, le ruzá' láchxë'ë Jesucristo queëru'.

² Rugapa' Dios li', böcha'ado' Timoteo. Nacu' ca zxi'ini caza' tu' benru' tu zxön xichinë' Cristo, ate' nadxi'ida' li'. Rinábida-në' Xúziru' Dios, enca' Xanru' Jesucristo, uzá' láchxë'ë quiu', en huéchi' láchxë'ë li', en gunë' ga cö' dxi icja láchxi'do'o.

Timoteo ral-la' gunbi' ba nalí queë' Jesucristo

³ Rea'-në' Dios: "Xclenu'" ca naca quiu' cate' rulidza'-në' Dios. Biti' rizóa dxía' rinaba' ni'a quiu' rëla, en te dza lahuë' Dios, Nu na' runa' xichinë' idú láchxa'a ca na' gulunë' xuz xtá'ahua'.

⁴ Cate' röjneda' ca na' gurödxu', rizë láchxa'a ulé'eda' li', para gaca udzëjada' idú láchxa'a.

⁵ Rea'-në' Dios: "Xclenu'" tu' zoa le run ga röjneda' ca réajlë'u Cristo idú láchxu'u. Lësca' caní, gula'yéajlë'ënu xinó'o gula Loida, enca' xinó'o Eunice Lë' zí'aló ca li', ate' runa' löza, lësca' caní réajlë'u Lë' na'a.

⁶ Tu' naca caní, rusá'a láchxu'u para usabanu' le bennë' Dios quiu', lë na' bidxín quiu' cate' ni' guxóa na'a li', en bulidza'-në' Dios.

⁷ Bö' na' bennë' Dios queëru' biti' naca tu bö' le gun ga gádxiru', pero bennë' queëru' Bö' Lá'ayi Nu run ga náparu' yöl-la' huáca, en run ga nadxi'iru' luzá'aru', en run ca' ga rinná be'e cuinru'.

⁸ Que lë ni na', biti' utuí'inu' gunu' ba nalí queë' Xanru', en biti' utuí'inu' ca raca quia' neda' ni, nadzuna' lidxi guié tu' runa' xichinë', pero ben tsözxön nupa ta'guí'i ta'zaca' tu' tun libán que didza' dxi'a. Dios gunnë' yöl-la' huáca quiu' para gunu' caní.

⁹ Dios caz busölë' rë'u, en bulidzë' rë'u para gácaru' idú dxi'a. Biti' bulidzë' rë'u tu' zoa le dxi'a benru', pero bulidzë' rë'u tu' gú'uni quézinë' Lë', en tu' ruzá' láchxë'ë caní queëru'. Dza ni'te buzóë' caní queëru' zí'atëlö ca guta' yödzölió ni, tu' néquiru' queë' Jesucristo.

¹⁰ Na'a, chibulú'i lahui le ruzá' láchxë'ë Dios queëru', tu' bulú'i lahuë' Jesucristo Nu rusölá rë'u. Bugüë' yöl-la' guti, en bulu'e lahui yöl-la' na'bán idú na', le cabí ca' initi. Caní naca ca rna didza' dxi'a.

11 Cristo buzóe' neda' para guna' libán que didza' dxi'a na', en para gaca' gubáz quee' para usédigacada' bönachi izá'a.

12 Que lë ni na' rigu'i rizáca'a ca' yugu' le raca quia' ni, pero biti' rutuí'ida', tu' núnbë'a Nu na' réajlë'a. Runa' lóza Lë', napë' yöl-la' huáca gapa chi'ë le budöda' lu në'ë ga idxintë dza ni huödë'.

13 Didza' dxi'a na' biyönnu' bena' libán que ral-la' gaca quiu' tu le rulu'i ca ral-la' usédinu' bönachi ca réajlë'ëru' Jesucristo, en ca nadxí'iru' Lë'.

14 Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

15 Chinöz quézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj ládxi'gaquië' neda'. Figelo, en Hermógenes nabábagaquië' bönni' ni.

16-17 Rinábida'-në' Xanru' Dios huéchi' ládxe'ë bönachi nacuá' lidxë' Onesiforo, tu' butipë' ládxa'a bönni' ni zían luzuí. Cate' bidxinë' Roma, idú ládxe'ë buguiljë' neda', ate' budzölinë' neda'. Biti' butuí'inë' ni'a quia' neda' tu' nadzuna' lidxi guié ni, nága'a du guié.

18 Rinábida'-në' Xanru' huéchi' ládxe'ë lë' dza ni' idxinë' lahuë' Dios. Chinöz quézinu' ca na' gúcalenë' bönni' ni rë'u, cate' ni' guzóaru' yödzö Éfeso.

2

Ral-la' gácabi' Timoteo ca tu bönni' idú ládxe'ë rejë' gudil-la

1 Na'a, xzí'ina'do', butipa ládxi'u ca naca le ruzá' ládxe'ë Jesucristo quiu'.

2 Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönachi.

3 Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxe'ë rejë' gudil-la.

4 Nu bönni' rejë' gudil-la, biti' ca' gútsë'ë yugu' le tun bönachi yödzölió ni, para tsaza ládxe'ë bönni' na' nuzóë' lë' gáquië' bönni' queë' rejë' gudil-la.

5 Lësca' caní, nu nutsa' lu huitaj, biti' bi ideli' channö cabí run ca ral-la' gun.

6 Nu bönni' gúz gú'una runë' dxin, zí'alö lë' uzi'ë xibé lë na' razë'.

7 Busá' ládxi'u lë ni rea' li', ate' Xanru' caz gunë' ga tséajni'inu' yúgu'të.

8 Yöjné ca guca queë' Jesucristo. Guljë', en gúquië' xzí'ini xi'sóë' David, en gudödi gútië', bubanë' lu yöl-la' guti. Caní rna didza' dxi'a runa' libán que.

⁹Tu'runa' libán que didza' dxi'a, rigu'í rizáca'a le raca quia', ga ridxintè nága'a lidxi guíë ni, ca raca queë' tu bönni' huía' dö', pero biti' ca' nága'tè xtídzë'ë Dios.

¹⁰Que lë ni na' ruá' riléna' yúgu'tè lë ni tu' nadxí'ida' nupa guröë' Dios, para ulu'lë' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'.

¹¹Catëz naca lë ni rnna:

Channö nátülenru' Lë', sóalenru'-në' ca' ibanru'.

¹²Channö guá' ilenru' le quí'í sáca'ru', inná bë'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³Sal-la' biti' runru' ca rnnaru', Lë' rúntica'së' ca rnnë'.

Lë' biti' gaca tá'baguë'ë le náquië'.

Nu bönni' huen dxin queë' Cristo rurúajë' dxi'a

¹⁴Busá' ládxi'gaca nupa nacué' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí'ila'dil-la dídzë'ë ca nácagaca didza' cabí' nazáca'gaca. Yugu' didza' caní tun ga ila'niti nupa tu'zë' nuguí' léguequi.

¹⁵Bë'tica'sö ládxi'u urúaju' dxi'a lahuë' Dios para gacu' ca tu bönni' huen dxin biti' rutuí'inë' ca naca dxin nunë'. Dxi'ado' ral-la' ugunu' dxin didza' idütë' li.

¹⁶Na'a, gucuíta ga nacué' nupa tuí'í didza' biti' nazaca', en didza' cá'asö, tu' tun didza' caní ga ilunrë' le cabí' rë'ënë' Dios.

¹⁷Ila'zë' didza' tu'ë' ca rizxön huë' nudzu' le ridúdu' rilá. Himeneo, en Fileto nabábagaquië' nupa tuí'í didza' caní.

¹⁸Iropë' ni gula'chixi gula'níguinë' ca naca le naca idütë' li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baröli bal-la bönachi ga ridxintè biti'rö ta'yéajlë' Cristo.

¹⁹Le benë' tsutsu Dios zóatica'sö, en dë tu le naca bë', le rnna: "Núnbë'ë Dios nupa néquiguequi queë'." Rnna ca': "Gulí'cuíta ga raca le ruá' dö', yúgu'tëli' libí'ili' néquili' queë' Cristo."

²⁰Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga biti' naca liná'.

²¹Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'tè dxin dxi'a.

²²Gurú'una le tun ga nu së ládxi' le ruá' dö' ca raca quégaquië' bönni' ra'bando'. Bë' ládxi' gacu' tsahui'. Ben le run ga réajlë'u Cristo, en le run ga nadxí'inu' yugu'luzó'o, en le run ga ribözu' dxi'ado'. Ca nácagaca lë ni, ben tsözxön nupa tu'lidza Xanru', naca idú dxi'a icja ládxi'do'guequi.

²³Na'a, gurú'una yugu' didza' cá'asö, en didza' biti' nazaca', tu' chinöz quézinu' tun didza' caní ga ta'dil-la didza' bönachi.

²⁴ Bönni' huen dxin queë' Xanru' biti' ral-la' tál-lalenë' bönachi didza', pero ral-la' gáquië' nōxaj ladxi' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxi'.

²⁵ Lu yöl-la' nōxaj ladxi' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i ládxi'gaquië' para ilúnbë'ë le naca idútë li.

²⁶ Caní ulu'lë' lu yalaj que tu' xihui' ga nadzúngaquië', ate' ulu'huóaquië' tsahui' para ilunë' ca ré'ënë' Dios.

3

Ca ilaca bönachi dza tsöjsétëgaca

¹ Lësca' ral-la' inözinu' lë ni: Dza tsöjsétëgaca ilaca dza ila'gu'i ila'zaca' bönachi.

² Yugu' dza ni' ila'cu'ë bönni' ilácagaquië' caní:

Ila'dxi'i la' cuíngacasë', en ulu'huídi'në'.

Ilún ba zxön cuíngaquië', en ulu'lu'i cuíngaquië' zxön.

Ila'nnë' zi'ë que le naca lá'ayi.

Ila'dá'baguë'ë xuz xiná'agaquië'.

Ilácagaquië' bönni' cabí ta'yaza ládxi'gaquië'.

Biti' ilunë' ca ré'ënë' Dios.

³ Biti' ila'dxi'inë' ca ral-la' ilunë'.

Ilácagaquië' zidzaj ladxi'.

Ila'nnë' que luzá'agaquië'.

Biti' ila'nná be'e cuíngaquië'.

Ilácagaquië' bönni' dza'a.

Biti' ila'lë'enë' dxi'a le naca dxi'a.

⁴ Ilácagaquië' hueti luzë'e, en biti' ila'dzáguië' dxi'a.

Ulu'lu'i cuíngaquië' ca bönni' nayépisëgaquië'.

Ila'dxi'inë' le ila'yázasö ládxi'gaquië', en calëga Dios.

⁵ Ulu'lu'i cuíngaquië' ca bönni' núnbë'gaquië' Dios.

Ila'dá'baguë'ë le ruzá' ládxi'ë Dios queëru'.

Gucuíta ga nacué' bönachi caní.

⁶ Lësca' caní, lu yöl-la' banísa quégaquië' ila'yazë' gapa naca lu yu'u, en ila'zí' yé'enë' yugu' nigula biti' bi nözguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en ilu'i ládxi'gacanu yugu' le ila'zësö ládxi'gacanu le cabí nazaca'.

⁷ Ila'yönitica'sinu nigula ni didza' ilún libán que bönachi, pero biti' ca' ila'déli'nu ila'yéajni'ininu le naca idútë li.

⁸ Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo.

⁹ Biti' ila'déli'rönë', pero gaca bē' nácagaquië' bönni' biti' bi nözguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

Le rigü'ë Pablo lu ná'abi' bi'i Timoteo

¹⁰ Nöz quézinu' ca naca le rusédida' bönachi, en ca runa'. Nözinu' ca' le ruí'i ládxa'a guna', en ca réajlë'a Cristo, en ca naca' nöxaj ladxi', en ca nadxí'ida' luzá'a, en ca riböza' zxön ladxi'.

¹¹ Nözinu' ca' yugu' le gula'bía ládxi'gaca bönachi neda', en yugu' le gudí'i guxzáca'a, le gulaca quia' lu yödzö Antioquía, en lu yödzö Iconio, enca' lu yödzö Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölé' neda' lu yúgu'të lë na'.

¹² Yúgu'të nupa té'ëni ilaca idú dxi'a tu' néquiguequi queë' Jesucristo, lësca' ila'guí'i ila'záquië' yugu' le ila'bía ládxi'gaca bönachi légaquië'.

¹³ Na'a, bönni' tuá' dö', en bönni' ta'zí' yë'ë ilácarë' xihui'. Ila'zí' yé'enë' bönachi, ate' ila'zí' ye'e bönachi ca' légaquië'.

¹⁴ Na'a, ben chí'i yugu' le buzëdu', en le guzxi' lu no'o, tu' nunbë' cazu' nupa bulu'sedi li'.

¹⁵ Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo.

¹⁶ Yúgu'të le nazúajgaca lu guichi lá'ayi guchízië' Dios icja ládxi'do'gaca bönachi queë', nupa na' bulu'zúaj lu guichi didza' na' bē'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'.

¹⁷ Caní run, para gaca sina' nu naca queë' Dios, en gácada' gun yúgu'të le naca dxi'a.

4

¹⁻² Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bē'ë. Bë' ladxi' gunu' lë ni channö raca dxi'a quiu' o biti' raca dxi'a. Lu yöl-la' zxön ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'.

³ Caní ral-la' gunu' tu' idxín dza cate' biti' ulu'zë nágagaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'.

⁴ Ulu'cá'anë' le naca idútë li, en ila'zí' lu ná'agaquië' yugu' didza' ridasö.

⁵ Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zi'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín.

⁷ Ca runë' tu bönni' idú ládxi'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo.

⁸ Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchí'a rusöröë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxi'i Lë', en idú ládxi'guequi ta'böza dza huödë'.

Le buzúajë' lu guichi Pablo gunbi' Timoteo

⁹ Bë' ladxi' guídateo' ga ni zoa'

¹⁰ tu' guléaj ládxi'ë Demas neda', tu' nadxí'inë' le ruzi'ë xibë yödzölió ni, ate' guyijë' yödzö Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'.

¹¹ Tuzë' Lucas zóalenë' neda'. Guchë'ë-bi' bi'i Marcos para guídalenbi' li' tsözxön, tu' nácabi' gúnlenbi' neda' tsözxön xichinë' Cristo.

¹² Gusöl-la'a-bi' bi'i Tíquico lu yödzö Éfeso.

¹³ Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴ Alejandro, bönni' gubëdxi guié, zían le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'.

¹⁵ Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶ Cate' le zí'aló luzuí bidxina' lógaquië' bönni' yúlahui', cuntunu gúcalen neda', pero bulu'béaj ládxi'gaca yúgu'të bönachi neda'. Biti' rë'ënda' uzí' lëbë' Dios légaquië'.

¹⁷ Guzóalenë' Xanru' neda', en butipë' ládxa'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busölë' Xanru' neda', ate' guca quia' tsa burúaja' lu ruá'aba' bëdxi guixi'.

¹⁸ Lë cazë' Xanru' usölë' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatíca'sö queë' yöl-la' ba yúgu'të dza zá'gaca! ¡Ca' gaca!

Pablo rugapë' Dios bönachi queë' Cristo

¹⁹ Bugapa Dios Priscila, en Aquilo, enca' bönachi nacúa' lidxë' Onesíforo.

²⁰ Bugá'anë' Erasto lu yödzö Corinto, ate' buca'ana'-në' Tróximo luyú Mileto tu' ré'enë'.

²¹ Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá' ládxë'ë Dios quiu'! ¡Ca' gaca!

DIDZA' GUSÖL-LĚ'Ě PABLO QUEĚBI' BI' I TITO

Pablo rugapë' Dios bi'i Tito

¹ Neda', Pablo, naca' huen dxin queë' Dios, en gubáz nasöl-lě'ě Jesucristo. Gusöl-lě'ě neda' para guna' ga ila'yéajlě' bönachi chigurö cazë' Dios, para ulu'únbë' le naca idútë li ca ral-la' gun nu nunbë' Dios.

² Caní naca' tu' runa' löza uzi'a xibé yöl-la' na'bán idú le guzxi' lu nē'ě Dios gunnë' queëru' dza ni'te, cate' si' gusí lo rata' yúgu'të le dë, ate' run cazë' Lě' le nazi' lu nē'ě gunë'.

³ Cate' bidxín dza que, Dios bulu'e lahui xtídzë'ě, le gulu'ě lu na'a guna' libán que. Caní gunná bé'enë' Dios, Nu busölá rë'u, neda'.

⁴ Rugapa' Dios li', böcha'ado' Tito. Nacu' idú zxi'ini caza' tu' naca lěbisö ca réajlě'ëru' Cristo. Rinábida'-në' Dios Xuz, en Xanru' Jesucristo Nu busölá rë'u, uzá' lădxë'ě quiu', en huéchi' lădxë'ě li', en gunë' ga soa dxi icja lădxi'do'o.

Dxin queë' Cristo runbi' bi'i Tito luyú Creta

⁵ Que lě ni na' bucá'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chi'ě bönachi queë' Cristo nacua' tu tu yödzö ni', ca na' chigunná bé'eda' li' gunu'.

⁶ Nu bönni' gula rapa chi'ě bönachi queë' Cristo ral-la' gáquië': Bönni' cuntú nu bi gaca innë queë'.

Zoa túzinu nigula queë'.

Yugu' zxi'inë' ral-la' ila'yéajlě'ëbi' Cristo.

Biti' soa nu gaca innë quégacabi' ta'dá dzágasibi' ca',

o ta'dá'baga'bi' xuz xiná'agacabi'.

⁷ Nu bönni' rapa chi'ě bönachi queë' Cristo run bayudxi:

Biti' runë' le gü'i lataj nu bi innë queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribíxjanë',

o bönni' rizë lădxi'së' dumí.

⁸ Ral-la' gu'ě ga ila'cu'ě böchi'ru' ta'dxinë' lidxë'.

Ral-la' së lădxë'ě gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gădxinë' Dios, en inná be'e cuinë'.

⁹ Ral-la' gun chi'ě didza' idútë li ca chinazëdë',

para gaca ichízië' icja náagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nnë que.

¹⁰ Caní ral-la' gáquië' tu' ta'dá'baguë'ë zían bönni', en tu'ë didza' biti' nazaca', en ta'zí' yé'enë' bönachi. Zían bönni' tunë' caní nácagaquië' judío.

¹¹ Yugu' bönni' ni, run bayudxi gunu' ga tsayaj ru'ágaquië', tu' tunë' ga ta'chixi ta'nigui yúgu'të bönachi nacuá' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zí'isë' dumí.

¹² Tuë' bönni' gubábë' bönachi Creta ga na' zu', bönni' na' bë'ë didza' uláz que yudo' quégaquië', gunné': "Ta'zí' yé'tica'së' bönni' Creta, en nácagaquië' ca böa' gu'a sínia'. Nácagaquië' bönni' huágulë'ë xöhuëdi."

¹³ Didza' ni benë' ba nalí quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo,

¹⁴ en para cabí ulu'zë' nágagaquië' yugu' didza' ridasö quégaquië' bönni' judío, en biti' ilunë' ca ta'nná bë' bönachi nucá'anagaca le naca idútë li.

¹⁵ Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en biti' ta'yéajlë', biti' bi naca dxi'a, pero nácagaca xihui' ga ridxintë le ta'bequi ícaguequi, en le ta'zá' ládxi'gaca.

¹⁶ Ta'nnë' núnbë'gaquië' Dios, pero le túngaquië' biti' röjlöz le ta'nnë' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

2

Xibá dxi'a le ral-la' usëdiru'

¹ Na'a, ral-la' gu'u didza' le röjlöz xibá dxi'a.

² Busedi yugu' bönni' gula:

Biti' ral-la' ilë'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxí'inë' luzá'agaquië', en ila'bözë' zxön ladxi'.

³ Busedi yugu' nigula gula:

Ilunnu le raza ládxe'ë Dios.

Cabí ila'nnënu que luzá'agacanu, en cabí ilë'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi' para ila'dxí'inu bönni' que queégacanu, enca' xzí'inigacanu.

⁵ Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le gü'i lataj nu innë zi' que xtídzë'ë Dios.

⁶ Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

⁷ Ral-la' gúntica'su' le naca dxi'a,

ulu'inu' bönachi caní ca ral-la' ilúngaca.

Ca rusédinu' ral-la' ulu'í' nacu' idú ladxi', en ba'a ladxi'.

⁸ Ral-la' usédinu' didza' dxi'a le cabí gaca nu bi inné que.

Caní gunu' ga utu'í' iné' bōnni' ridá' bagu'ë,
en bití' gaca bi inné' queéli' runli' le ruá' dö'.

⁹ Busedi bōchi'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nōxaj lógaquië' xángaquië'.

Ral-la' ilunë' yúgu'të le ila'yaza ládxi'gaquië' xángaquië'.

Bití' ral-la' tá'baga'gaquië' le ta'nná bē'ë.

¹⁰ Bití' bi ulu' cáchi'lanë'.

Ral-la' ulu'lu'í' cuíngaquië' tsahui' ca naca yúgu'të le tunë'.

Caní ulu'í' lo naca dxi'a xibá queë' Dios, Nu busölá rē'u.

¹¹ Cristo, bōnni' na' buzá' ládxi'ë Dios queëru' chibulu'í' lahuë' lógaca yúgu'të bōnachi para ulu'lágaca.

¹² Lë' rusédinë' rē'u ucá'anaru' le cabí raza ládxi'ë Dios, en cabí sē ládxi'ru' le naca que yōdzōlió ni, pero cōzaru' zxōn ladxi', en gácaru' tsahui' dza ni zóaru' na'a, en gunru' ca rē'ëni quézinë' Dios.

¹³ Ral-la' cōzaru' le runru' löza le gun ga gácaru' bica' ba, lë na' gaca dza ni' cate' ulu'í' lahuë' Jesucristo lu bení' idú queë'. Náquië' Dios zxōn, Nu rusölá rē'u.

¹⁴ Lë cazë' budödi cuinë' uláz queëru', para böá'uë' rē'u lu yúgu'të le naca xihui', ate' ruúnë' rē'u tsahui' para gácaru' bōnachi queë', en gü'í' ládxi'ru' gunru' le naca dxi'a.

¹⁵ Yugu' lë ni bē' didza', en guchiza icja nágagaca bōnachi ni', ate' len yöl-la' unná bē' gudil-la léguequi. Béntica'sō caní, para cabí si' lataj nu ucá'ana cá'asō xtídzu'.

3

Le ral-la' ilún bōnachi ta'yéajlë' Cristo

¹ Busá' ládxi'gaquië' bōchi'ru' ni' ilunë' ca ta'nnë' bōnni' dë lu ná'agaquië', en bōnni' yúlahui', para ilunë' ca rnna xtídzagaquië'. Ral-la' ila'cu'ë sina' ilunë' le naca dxi'a.

² Bití' bi le ruá' dö' ral-la' ila'nnë' que luzá'agaquië', en bití' ila'díl-lalenë' légaquië' didza', pero ral-la' ilácagaquië' nōxaj ladxi', en idú ladxi' lógaca yúgu'të bōnachi.

³ Lësca' rē'u, zí'alō gúcaru' yugu' bōnni' bití' ta'yéajni'inë', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzë ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buzxé'aru' luzá'aru'. Bití' bila'lé'e bōnachi rē'u dxi'a, ate' rē'u bití' bilé'aru' dxi'a luzá'aru' turu' ia'turu'.

⁴ Ní'irö bulu'e lahui Dios, Nu rusölá rē'u. Naca bē' náquië' idú dxi'a, en nadxi'inë' yúgu'të bōnachi,

⁵ tu' busölë' rë'u, calëga tu' zoa bi le naca dxi'a benru' rë'u, pero tu' buéchi' ládxë'ë rë'u. Bunë' rë'u dxi'a, en benë' ga nácaru' bönachi cubi. Dios Bö' Lá'ayi rucubë' rë'u.

⁶ Dios gusöl-lë'ë Dios Bö' Lá'ayi queëru' tu' néquiru' queë' Jesucristo, Nu rusölá rë'u.

⁷ Buzá' ládxë'ë queëru', en bunë' rë'u tsahui' para gata' yöl-la' na'bán idú queëru', le runru' löza gunnë' queëru'.

⁸ Didza' idútë li lë ni nuzúaja' lu guichi. Rë'ënda' usédide'enu' yugu' bönni' ni' yugu' lë ni para iluí'i ládxi'gaquië' ilúntica'së' le naca dxi'a tu' ta'yéajlë'ë Dios. Lë ni naca dxi'a, en nácada' lesaca' ila'zí' lu ná'agaca yúgu'të bönachi.

⁹ Na'a, biti' gu'u lataj nu gü'i didza' le cabí nazaca', o nu gü'i ladxi' ca nácgaca lágaca zióntërö cö' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridil-la didza' ca naca que xibá queë' Moisés, tu' cabí bi nazáca'gaca le caní, ate' cuntu nu uzí' xibé didza' caní.

¹⁰ Channö zoa nu bönni' ni', rubéajë' choplö bönachi queë' Cristo, tödi usó'o ládxë'ë tu ia'tú luzuí, bubéajë' bönni' na'.

¹¹ Nöz quézinu' chibóáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que lë na' runë'.

Le buzúajë' Pablo lu guichi le gunbi' bi'i Tito

¹² Cate' isól-la'a-në' Artemas o Tíquico ga zu', bë' ladxi' guídu' ga ni zoa' lu yödzo Nicópolis, tu' chinuna' quia' ugá'ana' ni yugu' beo' ziaga.

¹³ Zenas, bönni' na' rudödë' didza' ca rinná bë' bönachi yúlahui', enca' Apolos, ila'dxinë' ga ni' zóali'. Bugú'u légaquië' nöza lu yöl-la' rácalen, para cabí bi yadzaj quégaquië'.

¹⁴ Busedi yugu' böchi' luzá'aru' ilúntica'së' le naca dxi'a, en bi ulu'nödzejë' quégaca nupa bi riyadzaj quéguequi, para gaca bë' caní le nácgacaquië' queë' Cristo.

Pablo rugapë' Dios bönachi queë' Cristo

¹⁵ Yúgu'të nupa nacué'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë' Dios. Le ruzá' ládxë'ë Dios queëru' gácalen yúgu'tëli'. ¡Ca' gaca!

DIDZA' GUSÖL-LË'Ë PABLO QUEË' FILEMÓN

Pablo rugapë' Dios Filemón

¹ Neda', Pablo, dzágabi' neda' bi'i böchi'ru' Timoteo. Nadzuna' lidxi guié tu' runa' xichinë' Jesucristo. Rugapa' Dios li', Filemón. Nacu' bönni' nadxí'itu', en runu' xichinë' Cristo ca runtu' netu'.

² Rugapa' Dios Apia, nigula quiu'. Nácanu zanru' réajlë'ënu Cristo. Rugapa' Dios ca' zxi'inu', Arquipo. Nácabi' queë' Jesucristo ca tu bönni' rejë' gudil-la, tu' runbi' xichinë' Lë' ca runtu' netu'. Lë'sca' rugapa' Dios bönachi queë' Cristo tu'dubë' lu yu'u lidxu'.

³ Rinábida'-në' Xúziru' Dios, enca' Xanru' Jesucristo, uzá' ládxë'ë queëli', en gunë' ga soa dxi icja ládxi'do'oli'.

Ca runë' Filemón tu' réajlë'ë Cristo

⁴ Rética'sa'-në' Dios queëru' "Xclenu'", en röjnética'sida' li' cate' rulidza'-në'.

⁵ Caní runa' tu' ridxín quia' didza' ca nadxí'inu'-në' Xanru' Jesús, en réajlë'u Lë', en nadxí'inu' ca' yúgu'të bönachi rö queë'.

⁶ Rinábida'-në' Dios gunë' ga gunda' dxin libán runu' ca naca le réajlë'u Cristo, para ulu'zì' xibé nupa nacué' ni' yúgu'të le naca dxi'a, le ruzá' ládxë'ë Jesucristo queëru'.

⁷ Rudzëjada', en ruzí' zxöna' tu' nadxí'inu' yugu' böchi'ru', en benu' li', böcha'a, ga bulu'huóaca ládxi'gaca bönachi ta'yéajlë' Cristo.

Filemón ral-la' uniti lahuë'-bi' Onésimo, bi'i nadó'o queë'

⁸ Que lë ni na', sal-la' dë lu na'a tu' naca' gubáz nasöl-lë'ë Cristo inná bé'eda' li' ca ral-la' gunu',

⁹ ráta'yua' lo' len yöl-la' nadxí'i, neda' ni chinaca' bönni' gula, en yu'a lidxi guié tu' runa' xichinë' Jesucristo.

¹⁰ Ráta'yua' lo' uláz queëbi' Onésimo, bi'i na' bena' ga böácabi' queë' Cristo, en que lë ni na' nácabi' ca zxi'ini caza' ga ni nadzuna' lidxi guié.

¹¹ Bi'i ni, zí'alö biti' gúcabi' lesaca' quiu', pero na'a nácabi' lesaca' quiu' li', enca' quia' neda'.

¹² Bi'i ni rusöl-la'a-bi' ga zu'. Ben bal lëbi' ca neda' caz runu' bal, tu' nadxí'ida'-bi'.

¹³ Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi guié tu' runa' libán que didza' dxi'a,

¹⁴ pero biti' bi rě'ënda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' rě'ëni quézinu' ca'.

¹⁵ Nadxi ca' que lë ni na' buzá'abi' Onésimo ga zu' tu chí'ido' para udxinbi' tsaz ga zu'.

¹⁶ Na'a, bíti'rō gácabi' quiu' ca tu bi'i nadó'o, pero gácabi' quiu' ca bi'i böchi' cazu', tu' nácabi' bi'i böchi'ru' réajlě'ëbi' Cristo, en nadxí'iru'-bi'. Nácabi' caní quia' neda', ate' ral-la' gácarōbi' ca' caní quiu', calégasō ca böchi' luzó'o, pero lësca' ca bi'i böchu'u réajlě'ëbi' Xanru' Jesucristo.

¹⁷ Que lë ni na', channō nunu' neda' tuz, ben lëbi' bal ca neda' caz runu' bal.

¹⁸ Channō bi xíguia' benbi' quiu' o channō bi rál-la'bi' quiu', gunnátěz neda' ral-la'a.

¹⁹ Neda', Pablo, len na'a caza' ruzúaja' quiu' lu guichi lë ni: Neda' caz quixxa' bi rál-la'bi', en calëga guía' li': Lësca' ral-lu'u quia' yúgu'të le dë quiu' tu' bena' neda' ga napu' yöl-la' na'bán idú.

²⁰ Ca' gaca, böcha'a. Channō dë le uzi'a xibó' tu' néquiru' queë' Xanru', ben lë na' chigúta'yua' lo' tu' naca' böchu'u réajlě'a Cristo, ate' caní gunu' ga huóaca ládxa'a.

²¹ Ruzúaja' quiu' lu guichi ni, tu' ruzxōni ládxa'a li', gunu' ca rnna xtídza'a, en nōzda' gunu' ia'lati' ca lë na' chigúta'yua' lo'.

²² Lësca' rinaba' lo' upó'o quia' ga soa' lu yu'u lidxu', tu' runa' lōza urúaja' lidxi guié ni, ate' guída' ga zóali' tu' rulídzali'-në' Dios, en rinábali' lahuë' ni'a quia' neda'.

Pablo ruzúajë' lu guichi le rugapa Dios Filemón

²³ Epafra, bönni' yú'ulenë' neda' tsözxōn lidxi guié ni tu' runë' xichinë' Jesucristo, rugapë' Dios li'.

²⁴ Lësca' tu'gapë' Dios li' Marcos, en Aristarco, en Demas, en Lucas, yugu' bönni' ni túnlenë' neda' tsözxōn dxin queë' Cristo.

²⁵ Rinábida'-në' Xanru' Jesucristo uzá' ládxe'ë queëli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bé'lenē' rē'u didza' lu ru'ē Zxí'ini cazē'

¹ Zián luzuí, en zián ca benē' Dios, bé'lenē' xuz xtó'oru' didza' dza ni'te lu ruá'agaquiē' bōnni' gulu'ē didza' uláz queē'.

² Na'a, ga ruúdxí xtídzē'ē, dza ni zóaru' na'a, Dios bé'lenē' rē'u didza' lu ru'ē Zxí'ini cazē'. Dios buzóē' Lē' para guequi queē' Zxí'inē' yúgu'tē le nequi queē' Lē', ate' lu nē'ē Zxí'inē' na', Dios benē' yōdzölió ni.

³ Zxí'inē' na' náquiē' ca tu le rulu'í lahui yöl-la' zxön queē' Dios, en ca náquiē' Zxí'inē' rulu'í lahui idú le náquiē' Dios caz. Run cazē' ga nacuá'tica'sö yúgu'tē, rugunē' dxin didza' ru'ē, en yöl-la' huáca queē'. Cate' budxi benē' le ruún rē'u dxi'a que le naca dul-la' nabága'ru', yöjchö'ē cuita lē'ē ibēla Dios, Nu rö'ö rinná bē' xitsá'terö.

Zxí'inē' Dios nayēpisētērē' ca yugu' gubáz lá'ayi

⁴ Zxí'inē' Dios nayēpisētērē' ca yugu' gubáz lá'ayi queē' Dios, tu' nácatērö lo le lē', lē na' Dios gulu'ē Lē' tu' náquiē' Zxí'ini cazē', ca lágaquiē' gubáz lá'ayi queē' na'.

⁵ Dios catu caz gudxē' tuē' gubáz lá'ayi queē' ca na' gudxē' Zxí'inē'. Gunnē':
Zxí'ina' nacu'. Buzóa' Li' na'a.

Catu caz bē'ē didza' queē' tuē' gubáz lá'ayi ca na' bē'ē didza' ca naca queē' Zxí'inē'. Gunnē':
Naca' Xuzē', ate' Lē' náquiē' Zxí'ina'.

⁶ Lē'sca' caní, cate' Dios buzóē' Bi'i que cazē' lu yōdzölió ni, gunnē':

Yúgu'tē gubáz lá'ayi queē' Dios ila'yéaj ládxi'gaquiē' Lē'.

⁷ Ca nácaquiē' gubáz lá'ayi queē', rnna:
Lē' runē' ga nácaquiē' gubáz lá'ayi queē' ca bö' recja, ate' gubáz lá'ayi huen dxin queē', runē' ga nácaquiē' ca guí'.

⁸ Na'a, ca naca cazē' Zxí'inē', rnnē':
Ga rö'u rinná bē'u, inná bē'tica'su', Dios.

Tsahui' naca ca rinná bē'u.

⁹ Nadxí'inu' le naca tsahui', en calēga le ruá' dö'.
Que lē ni na' Dios budödē' lu no'o yöl-la' unná bē', en benē' ga ruzí'itēru' Li' xibé yöl-la' unná bē'
ca le tu'zí'i xibé luzó'o.

¹⁰ Lē'sca' caní rnnē':
Li', Xan, cate' gusí lo, benu' yōdzölió,
ate' len ná'asu' buzú' lúzxiba.

¹¹ Huadödi quéguequi, pero Li', tsaz idí'u.
Yúgu'tē itēbigaca ca ritēbi lari',

¹² en ca lari' utubu' léguequi, en utsó'o léguequi,
pero Li', catu caz utsá' cuinu'
en catu caz igulu'.

¹³ Dios catu caz gudxë' tuë' gubáz lá'ayi queë' ca gudxë'
Zxí'inë', gunnë':

Guró'ö cuita lë'a ibëla
cate' gunra' ga ulu'zechu zxíbigaca lo'
nupa biti' ta'lé'e Li' dxi'a.

¹⁴ Yúgu'të gubáz lá'ayi queë' Dios nácaquië' bö' huen dxin
queë' Dios, ate' nasöl-lë'ë légaquië' para ilácalenë' nupa ni
nulágaca.

2

Biti' ral-la' ucá'anaru' cá'asö yöl-la' rusölä

¹ Que lë ni na', ral-la' gü'i ládxi'röru' le chibiyöniru', para
cabí gaca chopá ládxi'ru'.

² Guca bë' naca idütë li didza' na', le bidxín dza ni'te
lu ná'agaquië' gubáz lá'ayi queë' Dios, ate' yúgu'të nupa
gula'dödi bë' ca rnna didza' na', en biti' gulún ca rnna, Dios
benë' léguequi xíguia' ca na' röjölz le gulúngaca.

³ Lësca' caní biti' ca' uláru' rë'u lu xíguia' na' channö
ucá'anaru' cá'asö yöl-la' rusölä ni, le benë' Lë cazë' Xanru'
libán que zí'alö, ate' nupa bila'yöni Lë' bulu'lu'i rë'u naca
idütë li.

⁴ Lësca' caní Dios caz benë' tsözxön légaquië' ba nalí, tu' benë'
le náca gaca bë', en le tun ga rubániru', en yugu' yöl-la' huáca
zxön. Gudísië' ca' yugu' le runödzejë' Dios Bö' Lá'ayi quégaquië'
tsca gú'uni quézinë' Dios.

Dios benë' ga böáquië' Jesús idú ca nácaru' rë'u

⁵ Dios biti' budödë' yödzo'lió si' za' lu ná'agaquië' gubáz lá'ayi
que yehua' yubá queë', lë na' ru'í'ru' didza' que.

⁶ Na'a, ca naca lë ni, nazúaj lu guichi lá'ayi didza' bë' nu run
ba nalí le rnna:

Dios, rubánide'eda' tu' ru'í' ládxi'u bö'nachi.

Rubánide'eda' tu' rácalenu' léguequi.

⁷ Ia'láti'sö cá'asö ca yugu' gubáz lá'ayi que yehua' yubá quiu'
benu' bö'nachi.

Buzú' quéguequi yöl-la' zxön, en yöl-la' run bal,
en budödu' yúgu'të le benü' Li' lu në'eguequi.

⁸ Yúgu'të budödu' lu në'eguequi para ilá'nná be'e le.

Nazúaj lu guichi lá'ayi lë na' rnna: "Budödu' lu në'eguequi
yúgu'të." Biti' bi bucá'anë' le cabí budödë' lu në'eguequi, pero
ga ridxintë na'a dza, biti' rilé'eru' yu'u lu në'eguequi yúgu'të.

⁹ Réquibe'eru' le guca queë' Jesús. Tu chí'sö, Dios benë' ga
böáquië' ia'láti'sö cuidi' ca yugu' gubáz lá'ayi que yehua' yubá

queë'. Guljê' bônachi para gútië', ate' gudí'i guz xáquë'ë Jesús lu yöl-la' guti uláz quégaca yúgu'të bônachi, tu' buzá' l ádxë'ë Dios queëru' caní. Tu' benë' Jesús caní, Dios benë' ga rata' queëru' yöl-la' zxön, en yöl-la' run bal.

¹⁰ Dios benë' yúgu'të le rilé'eru', en runë' ga nacué'tica'sö. Dios benë' ca ral-la' gunë' cate' benë' ga naca bē' náquië' Cristo idú tsahui' ni'a que le gudí'i guz xáquë'ë. Caní benë' Dios queë' Cristo, Nu bideli' yöl-la' rusólá para gaca ichë'ë bônachi zían yehua' yubá queë'.

¹¹ Cristo ruúnë' tsahui' bônachi para ilequi quez queë' Dios. Tuzë' náquië' Xúzguequi nupa na' ruúnë' Cristo tsahui', en Xuz cazë'. Que lë ni na', biti' ca' rutuí'inë' Zxí'inë' Dios cate' rnnë' nácagaquië' böchi' luzë'ë.

¹² Ca naca lë ni nazúaj lu guichi lá'ayi le rnna:

Usiyönda' böchi' luzá'a ca nacu' Li', Dios.

Gatsaj láhui'lö bônachi tu'dubi quiu',

gul-la' yöl-la' ba quiu'.

¹³ Lësca' caní rnnë':

Uzxöni l ádx'a-në' Dios.

Ga yúbölö nazúaj le rnnë':

¡Buli'yútsöca' neda', en yugu' zxi'inë',

nupa na' Dios bennë' quia'!

¹⁴ Que lë ni na', tu' néquiguequinë' bëla' en rön yugu' zxi'inë' na', lësca' caní Cristo ben cuinë' ca nácagaquië'. Guljê' bëla' en rön. Caní guljê' para guca gútië', en caní guca busunítie' yöl-la' huáca unná bē' que tu' xihui', nu na' dë lu nē'e guti bônachi.

¹⁵ Caní benë' Cristo para guca busanë' yúgu'të nupa gulaca ca bönni' nadó'ogaquië' tsanni ni nacué' nabángaca, tu' guladxi yöl-la' guti.

¹⁶ Naca bē' biti' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' zxi'ini xi'sóë' Abraham.

¹⁷ Que lë ni na', ben bayudxi böáquië' Cristo idú ca nácagaquië' böchi' luzë'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' l ádxë'ë bônachi, enca' para gunë' le gun ga gata' lu nē'ë ugüë' dul-la' nabága'gaca bônachi.

¹⁸ Na'a, tu' gudí'i guz xáquë'ë Lë cazë' Cristo, ate' guzxi' bë' tu' xihui' Lë', que lë ni na' napë' yöl-la' huáca gácalenë' nupa ni, rizí' bë' tu' xihui' léguequi.

3

Jesús nayëpisëtërë' ca Moisés

¹ Que lë ni na', böchi' luzá'ado', libí'ili' na' nácali' quez queë' Dios tu' bulidzë' Dios libí'ili', buli'yú dxi'a ca náquië'

Jesucristo. Náquië' gubáz nasól-lë'ë Dios, enca' bixúz lo que le nazí' lu ná'aru'.

² Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios.

³ Nayëpisëtërë' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'.

⁴ Yúgu'të yu'u, zoa nu ben le, pero Dios náquië' Nu ben yúgu'të le rilé'eru'.

⁵ Le nácatë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios,

⁶ pero Cristo runë' ca rnna xtídzë'ë Dios, en náquië' Zxí'ini cazë', ate' nacua' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzëjalenru' lë na' runru' löza.

Dë lataj ga ulu'zí' ládxi'gaca bönachi queë' Dios

⁷ Que lë ni na', nazúaj lu guichi ca rnnë' Dios Bö' Lá'ayi le rnna:

Na'a, channö riyönili' didza' ru'ë Dios,

⁸ biti' gácali' zidi lu icja ládxi'do'oli' ca na' gulaca nupa ni' gula'dá'baga' Dios cate' ni' gula'zí' bë' Lë' lu lataj cá'asö.

⁹ Gula'zí' bë'ë xuz xtó'oli' neda' ni' sal-la' bila'lé'enë' le bena' idú ca choá' iz.

¹⁰ Que lë ni na' guléda' bönachi dza ni', en gunniá':

"Ta'chíxítica'sinë' ca ta'zá' ládxi'gaquië'.

Biti' té'ënnë' ila'nózinë' le rë'ënda' ilunë'."

¹¹ Que lë ni na' guléda' légaquië', en bena' tsutsu xtídz'a, gunniá':

"Biti' ila'yázië' ga ulu'zí' ládxi'gaquië' tsözxön len neda'."

¹² Guli'gún chi'i cuinli', böchi' luzá'ado', para cabí gácali' nituli' libí'ili' tu bönni' xihui' cabí réajlë'ë, en para cabí usanli'në' Dios ban.

¹³ Na'a, buli'zëajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'.

¹⁴ Yúgu'tëru' gunru' tsözxön Cristo channö gácaru' tsutsu ga idxinrö dza údxi, ca na' gusí lo ridipa ládxi'ru'.

¹⁵ Caní ral-la' gunru' tsanni ni rnna:

Na'a, channö riyönili' chi'ë Dios, biti' gácali' zidi lu icja ládxi'do'oli', ca na' gulaca nupa ni' gula'dá'baga' Dios.

16 ¿Nupxi na' bila'yöni xtídzë'ë Dios, en gula'dá'baga' Lë'? Gulún caní yúgu'të nupa ni' bubéajë' Moisés léguequi luyú Egipto.

17 ¿Nupxi na' gulénë' Dios idú ca choá' iz? Gulaca nupa ni' gulún dul-la', ate' gulati lu lataj cá'asö.

18 ¿Nupxi ni' benë' tsutsu xtídzë'ë Dios, gunné' biti' ila'yaza ga ulu'zí' ládxi'guequi tsözxön len Lë'? Gulaca nupa ni' biti' gulún ca rnna xtídzë'ë Dios.

19 Na'a, réquibe'eru' biti' guca ila'yázië' tu' cabí gula'yéajlë'ë Dios.

4

1 Na'a, tsanni ni nagá'ana le guzxi' lu në'ë Dios queëru' para gaca tsú'uru' lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'.

2 Biyönru' rë'u didza' dxi'a ca na' bila'yönnë' légaquië', pero légaquië' biti' bulu'zi'ë xibé didza' na' bila'yönnë', tu' cabí gula'yéajlë'ë Dios cate' bila'yönnë' le.

3 Rë'u ni réajlë'ëru' Dios, en tsú'uru' lataj queë' ga uzí' ládxi'ru'. Raca ca na' gunné' Dios:

Que lë ni na' guléda' légaquië'

en bena' tsutsu xtídzä'a, gunniá':

Biti' tsú'ugaquië' ga ulu'zí' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë' yödzölió ni, en chiruzí' ládxi'ë.

4 Nazúaj lu guichi lá'ayi ga ru'í' didza' ca naca que dza igadxi, le rnna: "Buzí' ládxi'ë Dios dza igadxi yugu' lu dxin benë'."

5 Ga yúbölö rnna: "Biti' tsú'ugaquië' ga ulu'zí' ládxi'lenë' neda'."

6 Nupa ni' bila'yöni zí'alö didza' dxi'a, biti' guyú'ugaca ni' tu' cabí gulún ca rnna xtídzë'ë Dios. Que lë ni na', ral-la' tsú'ugaca bönachi yúbölö ni'.

7 Que lë ni na' ca', Dios bulu'e tu dza yúbölö, gunné': "Na'a dza." Caní naca, cate' chigudödi iz zían, bë'ë didza' Dios lu ru'ë David, ca na' nazúaj lu guichi lá'ayi le rnna:

Na'a dza, channö riyönili' didza' ru'ë Dios,

biti' gácali' zidi lu icja ládxi'do'oli'.

8 La'tu' benë' Josué ga bulu'zí' ládxi'gaquië' cate' gula'yu'ë lu xiyúgaquië', biti' bë'ë Dios didza' gudödi ni' que ia'turö dza cate' nu uzí' ládxi'len Lë'.

9 Que lë ni na', nagá'ana quégaca bönachi queë' Dios lataj ila'délinë' ga ulu'zí' ládxi'gaquië'.

10 Nupa tsú'ugaca ga ulu'zí' ládxi'lengaca Dios, ulu'zí' ládxi'gaquië' lu dxin tunë', ca na' buzi' ládxi'ë Dios yugu' lu dxin benë' Lë'.

11 Que lë ni na', ral-la' gü'i ládxi'ru' tsú'uru' ga ni' uzí' ládxi'lenru'-në' Dios. Biti' ral-la' tá'baga'ru' xtídzë'ë ca na' gulún nupa ni' bití' gula'yéajlë' Dios, en bití' gula'yu'ë ni'.

12 Xtídzë'ë Dios naca ban caz, en napa caz yöl-la' huáca. Richúgurö ga rë' ca guië tuchi' natuchi' iropa ru'í. Richugu ridxín ga ta'dzaga bö' naca cázaru', en le zoa lu icja ládxi'do'oru', enca' rōxaj ga ridxintë lu dxita lu bin. Run ga naca bē' le ribequi ícjaru', en le rizá' ládxi'ru'.

13 Bití' bi gaca ucáchi'ru' ga bití' gaca ilé'enë' Dios le. Yúgu'të le nun cazë' Dios nalá' lahui, en narúaj ga liná' lahuë' Dios. Lahuë' Lë' run bayudxi quíxjö'öru' le nunru'.

Jesús náquië' bixúz lo, Nu nácatërö zxön

14 Zoa queëru' tu bixúz lo, nácatërë' zxön, Nu na' gudödi ni' yehua' yubá, Jesús, Zxí'inë' Dios. Que lë ni na' ral-la' ugá'anaru' tsutsu ca naca le nazí' lu ná'aru'.

15 Zoa queëru' tu bixúz lo, Nu gaca huéchi' ladxi' rë'u ca nácgaca le raca queëru', tu' guzxí' bē' tu' xihui' Lë cazë' idútë ca na' rizi' bē' tu' xihui' na' rë'u, pero bití' bi dul-la' benë' Lë'.

16 Que lë ni na', idú ládxi'ru' ral-la' ibíga'ru' gala' ga rō'ë rinná bē'ë Dios, Bönni' ruzá' ladxë'ë queëru', en inábaru' lahuë' huéchi' ladxë'ë rë'u, en uzá' ladxë'ë queëru', para gácalenë' rë'u cate' bi raca queëru'.

5

1 Dios ribö cazë' núti'tës bixúz lo ladaj bönachi, en ruzöë' lë' para gunë' yugu' le runë' lahuë' Dios uláz quégaca bönachi, en cu'ë lahuë' Dios yugu' le tu'nödzej bönachi, en yugu' böa' bëdxi tútigaquië'-ba' lu bucugu lá'ayi tu' nözi dul-la' nabága'gaquië'.

2 Bixúz lo na', tu' raca queë' lëbisö ca raca quégaca bönachi, gaca gáquië' zxön ladxi' len nupa nácgaca yugu' bönni' canöz, en nupa ta'chixi ta'nigui.

3 Que lë ni na', tu' náquië' bixúz lo na' bönáchisö, ral-la' cu'ë lahuë' Dios böa' bëdxi na' tútigaquië'-ba' lu bucugu lá'ayi ni'a que dul-la' nabaga' cazë', ca na' runë' ca' ni'a que dul-la' nabága'gaca bönachi.

4 Cuntu nu gaca gun cuini bixúz lo, pero Dios rulidzë' nu ral-la' gaca bixúz lo, ca na' bulidzë' Aarón.

5 Lëscá caní guca queë' Cristo. Bití' ben cuinë' bixúz lo, pero Dios buzöë' Lë' ca bixúz lo. Ca naca lë ni, Dios gudxë' Lë':
Li' nacu' Zxí'ina'.
Buzóa' Li' na'a.

6 Lëscá caní gudxë' Lë' le nazúaj ga yúbölö, gunné':
Li' nácatíca'su' bixúz,

ca na' gúquië' Melquisedec bixúz.

⁷ Cristo, cate' ni' zoa cazë' yödzölió ni, bulidzë' Dios, en gúta'yue' lahuë'. Gurödxí'ë, en gurödxë' lahuë' Dios, Bönni' guca usölë' Lë' lu yöl-la' guti, ate' Dios biyönnë' Lë' tu' gúdxinë' Lë' idú ládxe'ë.

⁸ Sal-la' gúquië' Zxí'inë' Dios, bizëdë' gunë' ca rnna xtídzë'ë Dios tu' gulaca queë' yugu' le gudí'i guzzáqueë'ë.

⁹ Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusölë' tsaz yúgu'të nupa tun ca rnna xtídzë'ë.

¹⁰ Ní'irö Dios buzöë' Lë' para gáquië' bixúz lo ca na' gúquië' Melquisedec na' bixúz lo.

Zoa bönadxi queëru' huöaj ládxi'ru', en tá'baga'ru'-në' Cristo

¹¹ Ca naca lë ni, zían le ral-la' gú'ilentu' libí'ili' didza', le naca böniga quíxjöi'itu' libí'ili', tu' cabí réajni'inili'.

¹² Chigudödi dza ral-la' gaca usédili' bönachi xtídzë'ë Dios, tu' chibiyönili' xidzé, pero riquínili' nu quíxjöi'i libí'ili' leyúbölö yugu' le cabí naca böniga nazí' lu në'e nu si' réajlë'. Nagá'anali' ca yugu' bi'i huë'ënido' ta'quínibi' nidxi', en calëga la' huagu tsutsu.

¹³ Yúgu'të bönni' naquíniguequinë' nu usedi légaquië' lë na' biti' naca böniga, nácagaquië' ca yugu' bí'ido' té'ajbi' nidxi'. Biti' nazëdagaquië' ca sa'yéaj le naca tsahui'.

¹⁴ La' huagu tsutsu tu'zí' xibé nupa chinál-lágaca, nupa na' gaca iléquibe'e le naca dxi'a, en le cabí naca dxi'a, tu' nugúngaquië' dxin yöl-la' réajni'i quëgaquië'.

6

¹ Que lë ni na', biti' ral-la' usédatica'siru' yugu' xibá buzëdaru' cate' si' gusílo riyöniru' ca naca queë' Cristo. Ral-la' tsöjnöröru' para gácaru' idú bönachi queë' Cristo. Biti' naquíni usëdaru' leyúbölö yugu' xibá biti' naca böniga:

ca ral-la' ubí'i ládxi'ru',

en ca bíti'rö gunru' le ruá' dö',

en ca ral-la' tséajlë'ëru'-në' Dios,

² en ca naca xibá que le ridílaru' nisa,

en ca rixóa ná'aru' bönachi ta'yéajlë' Cristo,

en ca ral-la' ulu'bán nupa nátigaca,

en ca gunë' Dios, ichúguië' quëgaca bönachi tuá' dö'.

³ Caní gunru' channö gunnë' Dios rë'u lataj.

⁴⁻⁶ ¿Naru' huácatsö gunru' ga ulu'bí'i ládxi'gaca leyúbölö nupa tu'huöaj ládxi', en ta'dá'baga' Dios? Channö bidxín quëgequi bení' queë' Dios, en bulu'zí' xibé le runödzejë' Dios zoë' yehua' yubá, en gulaca tuz len Dios Bö' Lá'ayi, en channö bulu'zí' xibé didza' dxi'a queë' Dios en yöl-la' huáca que dza si' za', en channö ní'irö tu'huöaj ládxi', en ta'dá'baga' Dios,

biti' ca' gaca nu gun ga ulu'bí'i ládxi'gaca leyúbölö, tu' gaca tsca ulu'dá' leyúbölö Zxí'iné' Dios læ'e yaga cruz en ilún tsca ulu'titaj Lè' lahui' lógaca bönachi.

⁷ Nupa tun caní nácagaca ca yu na' ruzí' xibé nisa guiöj le ribixi láhuilö zían luzuí. Channö yu na' runödzej le tu'zí' xibé nupa tá'ana yu na', raza ládxi'ë Dios le,

⁸ pero channö ruzóasö yu na' lubá yötsi', en bèsigá', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ru'itu' caní didza', libí'ili' na' nadxí'itu', réquitu' ruzí'ili' xibé le nácagacarö dxi'a, le tu'zí' xibé nupa nulágaca.

¹⁰ Dios náquië' tsahui', en biti' gal-la ládxi'ë dxin tsahui' benli', en yugu' le benli' tu' nadxí'ili' Lè'. Gúcalenli' nupa néquiguequi quez queë' Dios, en runli' xichínguequi.

¹¹ Na'a, ré'ënitü' güi'li ládxi'li' luzá'ali' tu ia'tuli', en gunli' caní ga idxinrö dza údxi, para gata' idú queëli' læ na' runli' löza.

¹² Ré'ënitü' cabí gácali' xöhuëdi, pero gunli' ca tun nupa ta'yéajlè' Dios, en ta'böza zxön ladxi', para idéli'li' yugu' le guzxí' lu në'ë Dios gunnè' queëru'.

¹³ Caní gaca, tu' benè' tsutsu Dios xtídzè'ë cate' guzxí' lu në'ë bi gunnè' queë' Abraham. Tu' cabí zoa nu nácara' lo ca Dios, que læ ni na' buzetaj cuinë', cate' ni' benè' tsutsu xtídzè'ë.

¹⁴ Caní gunnè' Dios: "Le nácatè guna' ga gaca dxi'a quiu', en guna' ga ila'yánda'abi' zxi'ini xi'sú'."

¹⁵ Gulözè' Abraham zxön ladxi', ate' bidéli'nè' le guzxí' lu në'ë Dios gunnè' queë'.

¹⁶ Cate' tu bönni' runè' tsutsu xtídzè'ë, ruzötjè' nu nácatèrö lo ca læ', ate' læ ni ruzóa dxisö yúgu'tè didza' bizxaj, tu' nunè' tsutsu xtídzè'ë.

¹⁷ Que læ ni na' Dios benè' tsutsu le guzxí' lu në'ë gunè', en buzötaj cuinë', tu' gú'unnè' ulu'inè' nupa ulu'zí' xibé le guzxí' lu në'ë unödzejè' quéguequi, nácada' löza, en tsaz naca le nuzóa lahuè' gunè'.

¹⁸ Le guzxí' lu në'ë Dios, en le benè' tsutsu, chopa ni catu caz idzá'gaca, en ca naca quégaca chopa ni, biti' gaca si' yè'ë Dios. Caní benè' Dios para gácada' löza queëru' tu le huè tsahui' rè'u. Ruzxöni ládxi'ru' Lè' idéli'ru' læ na' runru' löza le gunnè' sí'iru'.

¹⁹ Lè na' runru' löza ruzóatica'sö tsutsu icja ládxi'do'oru', en naca ca tu du guiè ruzóa dxisö barco. Lè na' runru' löza run chi'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' rö'ö yehua' yubá.

²⁰ Guyáziè' Jesús uláz queëru' ca Nu röjnöru loru' ga ni' zoë' Dios, ate' Dios nuzóè' Lè' náquië' tsaz bixúz lo ca na' gúquiè' Melquisedec bixúz lo.

7

Jesús náquië' bixúz lo ca gúquië' Melquisedec

¹ Melquisedec gúquië' bönni' na' gunná bë'ë lu yödzö Salem, enca' bixúz queë' Dios, nayëpisëtërë'. Cate' suzë'ë Abraham, söhuöjë' gudödi guca gudil-la cate' bucul-lë' yugu' bönni' ta'nná bë'ë, birúajë' Melquisedec na', yöjtságuië' Abraham, en gunábinë' Dios gun lá'ayë' Abraham.

² Abraham bë'ë queë' tu cö' tu' chi cö' que yúgu'të le bidéli'në' lu gudil-la na'. Ca lë' Melquisedec na' rnna lu didza' xidza': "Bönni' Unná Bë' Tsahui'", en náquië' ca' Bönni' unná bë' que yödzö Salem, le rnna lu didza' xidza': "Bönni' Unná Bë' Ribequi Dxíë'."

³ Biti' zoa lu guichi le rnna gula'cu'ë xuz xinë'ë, o xuz xtá'ahuë', en biti' nazúaj dza guljë' o dza gútië', pero náquië' ca náquië' Zxí'inë' Dios tu' náquië' tsaz bixúz lo.

⁴ Buli'yútsöca' na'a, ca na' gúquië' zxön Melquisedec na', tu' lë' cazë' xúziru' Abraham bë'ë queë' tu cö' tu' chi cö' que lë' na' guléajë' lu ná'agaquië' bönni' ta'nná bë'ë ni' bucul-lë' lu gudil-la.

⁵ Lu xibá queë' Moisés, Dios rinná bé'enë' yugu' xzí'ini xi'sóë' Leví, nupa nácgaca bixúz, ila'zi'ë tu cö' tu' chi cö' que le ta'zí' bönachi Israel, sal-la' nácgaca di'a dza quégaquië', tu' nácgacaquië' yúgu'të' xzí'ini xi'sóë' Abraham.

⁶ Melquisedec na' biti' náquië' di'a dza quégaquië', pero guzxi'ë tu cö' tu' chi cö' lu në'ë Abraham, nu na' bideli' yugu' le guzxi' lu në'ë Dios gunnë' queë'. Lësca' Melquisedec na' gunábinë' Dios gun lá'ayë' Abraham,

⁷ ate' cuntu nu gaca tá'baga' lë' na' rnna: Nu nadéli'rö lahuë' Dios rinábini Dios gun lá'ayë' nu nacuíd'i'rö.

⁸ Na'a, dza ni zóaru' na'a, nupa ta'zí' tu cö' tu' chi cö' lu ná'agaca bönachi nácgaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'.

⁹ Na'a, huáca innaru' queë' Leví, en quégaca xzí'ini xi'sóë', nupa na' ta'zí' tu cö' tu' chi cö' lu ná'agaca bönachi, lësca' gula'guíxjë' tu cö' tu' chi cö' cate' ni' Melquisedec na' guzxi'ë tu cö' tu' chi cö' lu në'ë Abraham, xuz gula gudödi quégaquië'.

¹⁰ Caní naca, tu' huáca innaru' Abraham ni' nu'ë lë'ë Leví, en yugu' xzí'ini xi'sóë' cate' ni' yöjtságuië' Melquisedec lë', tu' cabí náljaniguequinë'.

¹¹ Ta'zí' bönachi Israel xibá gunná bë'ë Moisés lu ná'agaca bixúz, nupa nácgaca xzí'ini xi'sóë' Leví ga nababë' ca' Aarón, bixúz lo. Na'a, la'tu' guca ulu'huöáca bönachi idú tsahui' lahuë' Dios tu' tun ca rinná bë' xibá queë' Moisés, biti' ben bayudxi soa ia'tué' bixúz ca gúquië' Melquisedec, en calëga ca gúquië' Aarón.

12 Channö rutsë'ë Dios ca ral-la' gáquië' bixúz, run bayudxi utsë'ë ca' ca naca xibá queë'.

13 Xanru', Nu na' nazúaj lu guichi ca naca queë' yugu' lë ni, nababë' ia'turö cö' xzi'ini xi'sóë' Israel ca le nababë' Leví na', ate' que cö' xzi'ini xi'sóë' ga nababë' Xanru', cuntu nu guca bixúz lahuë' Dios.

14 Naca caní tu' naca bë' guljë' Xanru' lu cö' di'a dza queë' Judá, ate' Moisés biti' bë'ë didza' queë' Judá na' cate' bë'ë didza' quégaca nupa ral-la' ilaca bixúz.

15 Nácatërö bë' lë ni ni'a que le raca na'a. Ca na' gúquië' Melquisedec bixúz, chibuluí'i lahuë' ia'turë' bixúz, Jesús.

16 Bönni' ni, biti' gúquië' bixúz tu' rinná bë' xibá ca ral-la' ilaca di'a dza queë', pero náquië' bixúz tu' napë' yöl-la' huáca que yöl-la' na'bán le catu caz údxi.

17 Nazúaj lu guichi lá'ayi le run ba nalí queë' le rnna:
Tsaz nacu' bixúz
ca na' gúquië' Melquisedec bixúz.

18 Na'a, nadúa xibá gula ni', tu' cabí gudapa yöl-la' huáca unná bë', en biti' bi guca gun.

19 Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarö dxi'a, le run ga gaca ibíga'ru' gala' ga zoë' Dios.

20 Cate' benë' Dios ga náquië' Jesús bixúz, benë' tsutsu xtídzë'ë.

21 Dios biti' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunnë':

Bena' tsutsu xtídzá'a neda', Xanu', gunnía':

“Biti' utsá'a ca guna'.

Tsaz nacu' bixúz

ca na' gúquië' Melquisedec bixúz.”

22 Que lë ni na', Cristo náquië' Nu run ga naca löza didza' rucá'ana tsahui' le nácarö dxi'a ca lë na' guca zí'alö.

23 Yugu' bixúz ni' guláquië' bönni' zían, tu' cabí guca ulu'gá'anë' yödzölió ni tu' gulatië',

24 pero tu' zóatica'së' Jesús, tsaz náquië' bixúz, en biti' gaca nu huóaza xilatjë' para gaca bixúz.

25 Que lë ni na', tsaz gaca usölë' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quégaquië' lahuë' Dios.

26 Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxön bönachi dul-la', pero nayëpisëtërë' ca yúgu'të le nacua' ni' yehua' yubá.

27 Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bëdxi lahuë' Lë' tu' nözi dul-la' nabága'gaca cazë', ate'

gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljë' xichõn cazë' tu' nözi dul-la' nabága'gaca yúgu'të bönachi.

²⁸ Lu xibá queë' Moisés bönachi biti' nácagaca idú dxi'a nácagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxí'ini cazë' bixúz lo, tu' náquië' idú tsahui' ca ral-la' gáquië' bixúz.

8

Jesús náquië' Bixúz Lo queëru'

¹ Na'a, ca rna læ na' si' gunnía', naca caní: Zoa queëru' tu Bixúz Lo caní. Gurö'ë cuita læ'ë ibëla Dios, ate' rö'ë, rinná bë'ë yehua' yubá ni'.

² Lë' runë' dxin ca Bixúz Lo lu lataj nácaterö lá'ayi, le naca yudo' le naca idútë, læ na' buchisë' Xanru', en calëga bönachi.

³ Dios rucu'ë yúgu'të bixúz lo para ila'gu'ë yugu' le tu'nödzej bönachi, enca' xichõngacaba' böa' bëdxi lahuë' Dios. Que læ ni na' ben bayudxi soa bi gulu'ë Cristo lahuë' Dios.

⁴ La'tu' zoë' luyú ni, biti' ca' gáquië' bixúz, tu' nacu'á'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés.

⁵ Yugu' bixúz ni tunë' dxin que tu le rulu'isö, en le naca ca tu bixín que læ na' rö'ö yehua' yubá. Caní naca, tu' gúdxidë'ë Dios Moisés cate' si' uchisë' yú'udo' na' néquini guídi, gunné': "Buyútsöca', ben yúgu'të idú ca naca læ na' bulu'ida' li' lu gu'a ni'."

⁶ Na'a, Bixúz Lo queëru' ni runë' dxin que le nácaterö lesaca', ate' ni'a que le benë' Lë' zoa tu didza' rucá'ana tsahui' queëru' le nácaterö lesaca', en le ru'i didza' que le nácaterö lesaca' guzxí' lu në'ë Dios gata' queëru'.

⁷ La'tu' gudapa didza' na' rucá'ana tsahui' le guzóa zí'alö idútë yöl-la' huáca, biti' ben bayudxi soa didza' buropi ni rucá'ana tsahui'.

⁸ Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Buli'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

⁹ Biti' gaca ca guca didza' rucá'ana tsahui' na',

læ na' bénlena' xuz xtó'ogaquië',

dza ni' gudéla'a ná'agaquië',

en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui',

neda' bucá'ana' légaquië', rnnë' Xanru'.

¹⁰ Que lë ni na', caní gaca didza' ucá'ana tsahui'
gúnlena' bönachi Israel
tödi yugu' dza ni', rnnë' Xanru'.

Uchízia' icja ládxi'do'gaquië' xibá quia'
en uzúaja' le lu icja ládxi'do'gaquië'.

Ní'irö gaca' Dios quégaquië'
ate' légaquië' iláquië' bönachi quia'.

¹¹ Biti' gun bayudxi nu usedi luzë'e, inná:
Bénbë'ë Xanru', tu' ilúnbë'ë yúgu'të' neda',
ga isí lo nu naca cá'asö, ga idxintë nu naca lo.

¹² Huéchi' ládxa'a légaquië',
en uniti lahua' le cabí naca tsahui' gulunë',
en bíti'rö tsöjneda' dul-la' nabága'gaquië'.

¹³ Cate' ni' ru'ë Dios didza' que tu didza' cubi rucá'ana
tsahui', naca tu' chibigula lë na' guzóa zí'alö, ate' chizóa idúa
lë na' nagula, en chinaca gulasi.

9

Lataj lá'ayi dë luyú, en lataj lá'ayi dë yehua' yubá

¹ Na'a, didza' rucá'ana tsahui' na' guzóa zí'alö, dzágagaca
xibá le ca ral-la' ila'yéaj ládxi'gaca bönachi Dios, en lataj lá'ayi
bidzága le guca que luyú ni.

² Caní naca lataj lá'ayi na' néquini guídi. Lu lataj na' dë
láhuilö, nazí'i le Lataj Lá'ayi, gula'cuá' le nuá' guí', en bucugu
lá'ayi ga ni' gula'gu'ë yugu' yöta xtildo' lahuë' Dios.

³ Cúdzi'lö le buropi lari' nal-la' lu yu'u na' zoa lataj ni' nazí'i
le, Lataj Idú Lá'ayi,

⁴ ate' lu lataj ni' gula'cuá' tu bucugu néquini oro ga na'
bulu'zégui'ë nöri, enca' tu guí'ina ga yu'u didza' rucá'ana
tsahui', en nacu guí'ina na' oro. Lu guí'ina na' gula'cuá'
zxíga'do' na' néquini oro, le nadzá' yöta xtildo' na' nazí'i le
maná, enca' xuyaga queë' Aarón, lë na' bubö' ni'a në'e, enca'
yugu' guiöj blaga na', nazúaj láhuilöguequi didza' rucá'ana
tsahui'.

⁵⁻⁶ Lahui guí'ina na' gula'cuá' chopa gubáz lá'ayi
néquiguequini oro, légaca querubín que lataj ga buluí'i lahuë'
Dios, ate' bulu'zxóa xiliguequi láhuilö lataj ga ni' gulu'ë bixúz
lo rön tu' nözi dul-la'. Caní bulu'cu'ë yugu' lë ni. Biti' dë lataj
uzúaja' na'a idütë ca nácagaca lë ni.

Ta'yázatica'së' yugu' bixúz lu lataj zoa láhuilö, ga na' tunë'
dxin quégaquië' que le ta'yéaj ládxi'gaquië' Dios.

⁷ Tuzë' bixúz lo guyázië' lu lataj buropi ni' tu luzuísö tu iz,
en bi'ë rön le gulu'ë lahuë' Dios tu' nözi dul-la' nabaga' cazë',
enca' tu' nözi dul-la' nabága'gaca bönachi, dul-la' gulunë' le
cabí guléquibe'enë'.

8 Caní ruzéajni'iné' Dios Bö' Lá'ayi rē'u, biti' ca' guca idxinru' lahuē' Dios caz tsanni ni' tu'gunē' dxin lataj lá'ayi na' zoa láhuilö lu yu'u lá'ayi na' néquini guídi, lē na' bidzága didza' rucá'ana tsahui' le guzóa zí'alö.

9 Yugu' lē ni naca tu le rulu'ísö que le raca na'a dza. Yugu' le gula'gu'ē lahuē' Dios, en rön quégacaba' böa' bēdxi na' gulútiē'-ba' lahuē' Dios biti' guca ulu'ún idú dxi'a icja lādxi'do'gaquiē' bönni' ni' gula'yéaj lādxi'gaquiē' Dios caní.

10 Yugu' lē ni bulu'i lahui quégacasö le gulē'aj gulahuē', en ca ral-la' ila'guíbi cúngaquiē', en quégaca xibá ca ral-la' gaca que idú ca zeaj naca cazē'. Yugu' lē ni buzóē' Dios quégaquiē' ga bidxintē dza ral-la' utsē'ē yúgu'tē.

11 Na'a, chibudulu'i lahuē' Cristo, en náquiē' Bixúz Lo que le naca idú dxi'a, le bilá' lahui ni'a que le benē' Lē'. Lataj lá'ayi ga na' guyáziē' Lē' nácarö lo, en nácarö idú, en biti' néquini lu ni'a lu náagaca bönachi, en biti' naca que luyú ni.

12 Na'a, chiguyáziē' Cristo lu lataj lá'ayi na', calēga len xichōngacaba' bēdxi'do', en xichōngacaba' chivo, pero len rön queē' cazē'. Guyáziē' lu lataj idú lá'ayi tu luzuísö, ate' caní guca, benē' ga nuláru' tsaz.

13 Le nácatē xichōngacaba' bēdxi, en chivo, en dö queē'ba' bēdxi'do' bulu'zégui'ē-ba', yugu' le gula'gu'ē lu ícjagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquiē' dxi'a idú ca zeaj naca cazē' ca naca que yöl-la' yudo' quégaquiē'.

14 Na'a, gúntērö ca' xichōnē' Cristo, tu' budödi cuinē' queē' Dios, en gúquiē' idú tsahui', ate' zóalenē' Dios Bö' Lá'ayi Lē', Nu zóatica'sö. Na'a, xichōnē' Cristo ruún idú dxi'a icja lādxi'do'oru' lu yugu' le gubága'ru' le tun ga nu gati, para gaca gunru' xichinē' Dios ban.

15 Que lē ni na' náquiē' Jesucristo Nu ben tsutsu didza' cubi rucá'ana tsahui', tu' gútiē' Lē', en bugúē' dul-la' gula'baga' bönachi cate' ni' zoa didza' gula rucá'ana tsahui'. Gútiē' ca' para gaca ila'zi'ē lē na' guzxi' lu nē'ē Dios unödzejē' quégaquiē' bönni' bulidzē', le zóatica'sö.

16 Cate' ratiē' nu bönni', en nucá'anē' tu didza' ca ral-la' ila'guísiē' le nequi queē', run bayudxi gaca bē' chinátiē' bönni' na' para gaca ilunē' ca rnna didza' na' nucá'anē'.

17 Cate' chinátiē' bönni' na', gaca ilunē' ca rnna didza' na', pero tsanni ni zoē' nabanē', biti' ca' gaca ilunē' ca rnna didza' na'.

18 Que lē ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'ísö zoa nu guti.

19 Cate' ni' gudíxjöi'iné' Moisés bönachi ni' ca nácgaca yúgu'tē xibá queē' Dios, gudélē'ē rön quégacaba' bēdxi'do', en

quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le nē'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi.

²⁰ Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna."

²¹ Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios.

²² Ca na' rinná bë' xibá na', látu'biqúi' yúgu'të ral-la' un dxi'a rön léguequi, ate' channö cabí tu'laljë' rön, bití' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'isö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichöngacaba' böa' bëdxido' caní.

²⁴ Bití' guyázië' Cristo lataj lá'ayi néquini lu ni'a lu ná'agaca bönachi, lë na' naca tu le rulu'isö ca naca le naca idú, pero guyázië' yehua' yubá caz para gaca uluí'i lahuë' na'a lahuë' Dios uláz queëru'.

²⁵ Bixúz lo zoë' luyú ni razië' lataj nácatëro lá'ayi tu tu iz len rön quégacaba' böa' bëdxi, pero bití' run bayudxi tsázië' Cristo zían luzuí para udödi cuinë' lahuë' Dios.

²⁶ La'tu' guca caní, gun bayudxi qui'i sáquë'ë Cristo, en gátië' zían luzuí dza ni'te cate' guta' yödzülió ga ridxintë na'a dza, pero na'a cate' naca dza údxi, tsaz buluí'i lahuë' tu luzuísö, en budödi cuinë' lahuë' Dios, cate' gútië' para bugúë' dul-la' nabága'ru'.

²⁷ Ca na' run bayudxi ilátigaca bönachi tu luzuísö ate' tödi ni' uchi'a usöröë' Dios léguequi,

²⁸ lësca' caní, gútië' Cristo tu luzuísö, cate' budödi cuinë' lahuë' Dios para bugúë' dul-la' nabága'gaca bönachi zían. Na'a, uluí'i lahuë' le buropi luzuí, calëga para ugúë' dul-la', pero para usölë' tsaz nupa ta'böza Lë'.

10

¹ Xibá na' gunná bë'ë Moisés guca tu le rulu'isö ca zeaj naca le tsahui' si' zá'gaca, en bití' guca idú ca nácgaca. Que lë ni na', xibá na' queë' Moisés bití' guca un idú tsahui' nupa ni' bila'dxín lahuë' Dios, en biá'gaca rön quégacaba' böa' bëdxido', lë na' gula'gú'utica'së' lahuë' Dios yugu' iz.

² La'tu' guca un légaquië' idú tsahui', bití' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní

quégaquië' nabága'gaquië' dul-la' channö chibulu'huöáquië'
idú tsahui'.

³ Rön ni' gula'gu'ë lahuë' Dios yugu' iz busá' ládxi'gaquië'
nabága'gaquië' dul-la'.

⁴ Caní guca, tu' cabí guca xichöngacaba' bédxi, en chivo ugúa
dul-la'.

⁵ Que lë ni na', cate' bidxinë' Cristo yödzölió ni, gudxë' Dios
ca na' nazúaj lu guichi lá'ayi le rnna:

Biti' rë'ënu' nu cu'u rön quégacaba' böa' bédxi lo'
pero benu' ga naca' bönáchisö.

⁶ Biti' raza ládxi'u nu uzegui'-ba' böa' bédxi lo',
o nu cu'u xichöngacaba' lo' tu' nözi dul-la'.

⁷ Ní'irö gunniá': Ni zoa' para guna' ca rë'ënu' Li', Dios.
Naca ca na' nazúaj lu guichi lá'ayi ca gaca quia'.

⁸ Lë na' nazúaj zí'alö rnna: "Biti' rë'ënë' Dios nu cu'u rön
quégacaba' böa' bédxi lahuë'." Didza' ni ruluí'i rë'u bíti'rö raza
ládxi'ë Dios lë ni sal-la' lu xibá queë' Moisés rinná bé'enë' Dios
nu gun caní.

⁹ Gudödi ni' rnna: "Ni zoa' para guna' ca rë'ënu' Li', Dios."
Didza' ni ruluí'i rë'u rugüë' Dios lë na' gula'gu'ë lahuë' zí'alö,
en ruzóë' xilataj le gulu'ë Zxí'ini cazë' lahuë'.

¹⁰ Na'a, Dios ruúnë' rë'u idú tsahui' tu' benë' Cristo ca rë'ënë'
Dios cate' ni' budödi cuinë' lahuë' Dios uláz queëru', en gútië'
tu luzuísö.

¹¹ Le nácatë yúgu'të bixúz luyú ni zuíguequinë' yugu' dza, en
tunë' xichíngaquië', en la' tuz ca tunë', ta'gu'ë lahuë' Dios zían
luzuí xichöngacaba' böa' bédxi, yugu' le cabí gaca ulu'gúa dul-
la'.

¹² Na'a, Cristo, tu le gulu'ë tsaz lahuë' Dios tu luzuísö tu' nözi
dul-la', ate' ní'irö yöjchö'ë cuita lë'ë ibëla Dios.

¹³ Ribözë' ni' dza gunë' Dios ga ulu'zechu zxíbigaca lahuë'
nupa bití' ta'lé'e Lë' dxi'a.

¹⁴ Ni'a que tuz le gulu'ë lahuë' Dios, tsaz benë' ga nácgaca
idú tsahui' nupa na' bunë' dxi'a, en bubéajë' léguequi quez
queë' Dios.

¹⁵ Lësca' caní Dios Bö' Lá'ayi runë' ba nalí loru', tu' gunné'
zí'alö lë na' nazúaj lu guichi le rnna:

¹⁶ Caní gaca didza' ucá'ana tsahui' gúnlena' légaquië'
tödi yugu' dza ni', rnnë' Xanru'.

Uchízia' icja ládxi'do'gaquië' xibá quia',
en uzúaja' le lu icja ládxi'do'gaquië'.

¹⁷ Gudödi na' gunné':
Bíti'rö tsöjneda' dul-la' nabága'gaquië'
en dö' biá'gaquië'.

¹⁸ Que lë ni na', channö chinadúa dul-la', bíti'rö run bayudxi
nu bí cu'u lahuë' Dios tu' nözi dul-la'.

Huáca ibíga'ru' gala' ga zoë' Dios

19 Na'a, yugu' böchi' luzá'ado', idú ládxi'ru' gaca idxinru' lahuë' Dios caz, ni'a que xichönë' Jesucristo.

20 Tséajlenru' tu nöza cubi, en idú tsahui' le nuzóë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljé' Cristo ni'a queëru' tu' budödë' idútë le naca cazë'.

21 Jesús náquië' queëru' tu bixúz nayëpisëtërë', en rinná bé'enë' bönachi queë' Dios.

22 Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queëru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' rë'u, ate' gudibë' idútë le naca cázaru' len le naca tu nisa nácatërö idú.

23 Ral-la' gácaru' tsutsu, en cabí gaca chopa ládxi'ru' ca naca le runru' löza que le nazi' lu ná'aru', le guzxí' lu në'ë Dios gunnë' queëru', ate' Lë' runë' ca rnnë'.

24 Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'.

25 Bal-la bönachi bití'rö tu'dubi len rë'u. Biti' ral-la' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilé'ëru' chizóa idxín dza huödë' Xanru'.

26 Channö zéajlenru' runru' dul-la' tödi núnbë'ëru' le naca idútë li, bití' ca' nagá'ana bi gaca cú'uru' lahuë' Dios le ugúa dul-la'.

27 Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, lë na' uzéguítica'sö nupa ta'dá'baga' Dios.

28 Cate' nu bönni' buzóë' xibá queë' Moisés tsölá'alö, gulútië' lë' channö chopa tsonna bönachi gulún ba nalí que le benë', ate' cuntú nu buéchi' ladxi' bönni' na'.

29 Na'a, nu bönni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibága'rë' ca' xíguia'. Nu bönni' gunë' caní ucá'anë' cá'asö Dios Bö' Lá'ayi, Nu ruzá' ladxi' queëru' le riquíniru'.

30 Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzí' lëbi. Neda' ubi'a quégaca bönachi, rnnë' Xanru'." Lësca' caní gunné': "Xanru' uchi'a usöröë' bönachi queë'."

31 Ral-la' gadxi idzöbi nu ral-la' si' xíguia' lu në'ë Dios ban.

32 Guli'tsöjné yugu' dza chigula'dödi cate' ni' si' bidxín queëli' bení, ate' biá' gulenli' zían le bulu'saca' zi'ë libí'ili'.

33 Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benlí' tsözxön ca' nupa gula'guí' gula'zaca' caní.

³⁴ Caní guca, tu' buéchi' ládxi'li' nupa nadzúngaca lidxi guié, en lu yöl-la' rudzeja queéli' biá' gulenli' nupa gula'béaj lídxili' yugu' le guta' queéli'. Caní benli' tu' nózili' nequi queéli' le nácaro dxí'a, en le zóatica'sö ni' yehua' yubá.

³⁵ Na'a, biti' ucá'anali' lè na' runli' löza, le naché' tu le zxön ubi'è Dios queéli'.

³⁶ Run bayudxi cözali' zxön ladxi', para cate' chibenli' ca rë'ënè' Dios, sí'ili' le guzxi' lu nè'è gunnè' queéli', ca na' nazúaj lu guichi lá'ayi, ca gunnè' Dios le rnna:

³⁷ Ia'tú chí'ido'osö idxinè' Bönni' na' ral-la' guídè'.

Biti' ca' tsenè'.

³⁸ Ní'irö nu naca tsahui' lahua' neda', ulá nu na' tu' réajlè' neda'.

Channö huőaj ladxi', en tá'baga' neda',

bíti'rö tsaz ládxa'a nu na'.

³⁹ Na'a, ré'u ni, biti' nácaru' ca nupa tu'huőaj ladxi', en ta'dá'baga' Dios, en ila'niti, pero réajlè'èru' Cristo, en nadéli'ru' yöl-la' rusólá.

11

Ca naca yöl-la' réajlè' queèru' Dios

¹ Na'a, tu' réajlè'èru' Dios, naca löza queèru' sí'iru' le runru' löza, ate' naca bè' zoa le cabí gaca ilé'èru'.

² Caní gula'yéajlè'è xuz xtó'oru' Dios, ate' que lè ni na' nazúaj lu guichi lá'ayi ca guca quégaquiè' le rnna: Bulu'rúajè' tsahui' lahuè' Dios.

³ Tu' réajlè'èru' Dios, réquibe'èru' benè' Lè' yödzölió ni len didza' bè'èsè'. Lësca' caní, cate' benè' Dios yúgu'tè le rilé'èru', bugunè' dxin le cabí nalá'.

⁴ Tu' guyéajlè'è Abel Dios, gulu'è rön queèba' böa' bédxido' lahuè' Dios, tu le nácatèrö lesaca' ca le gulu'è Caín lahuè' Dios, en que lè ni na' Dios benè' ba nalí queè' Abel na', gunnè' náquiè' tsahui', en benè' bal lè na' gulu'è lahuè'. Sal-la' chinátiè' Abel na', ga ridxintè na'a dza, naca tsca ru'è didza', tu' guyéajlè'è Dios.

⁵ Tu' guyéajlè'è Enoc Dios, gudödè' ni' yehua' yubá, en biti' ca' gútiè', ate' bíti'rö nu budzöli lè', tu' buchè'è Dios lè', ate' nazúaj lu guichi lá'ayi ca naca queè' le rnna: "Zí'aló ca buchè'è Dios lè', benè' Enoc le raza ládxe'è Dios."

⁶ Na'a, channö cabí réajlè'èru' Dios, biti' gaca gunru' le raza ládxe'è Lè', ate' para ibíga'ru' gala' ga zoè' Dios, run bayudxi tséajlè'èru' zoa cazè' Lè', en rubi'è que nu ruí'i ladxi' Lè'.

⁷ Cate' ni' Dios buzéajni'inè' Noé ca ral-la' ilaca le cabí rilé'eninè' Noé na', tu' guyéajlè'è Noé Dios, benè' ca rnna xtídzè'è Dios. Bupè'è barco zxön na' nazí'i le Arca, ate' lè'e barco na' bulu'lá bönachi di'a dza queè' Noé. Tu' guyéajlè'è

Noé Dios, benë' ga naca bë' narugu quégaca bönachi yödzölió ilátigaca, ate' bidéli'në' gúquië' tsahui' lahuë' Dios, le ta'deli' nupa ta'yéajlë' Lë'.

8 Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nözinë' gazxi na' ral-la' tsejë'.

9 Tu' guyéajlë'ë Abraham Dios, gúquië' ca tu bönni' zi'tu', en guzóë' luyú na' Dios guzxí' lu në'ë unödzjë' queë'. Guzóë' lu yu'u guídido', en lëbisö ca gulunë' Isaac, en Jacob, xzí'ini xi'sóë' Abraham, nupa ni' guzxí' lu në'ë Dios unödzjë' quéguequi lë na' guzxí' lu në'ë unödzjë' queë' Abraham.

10 Caní benë' Abraham, tu' benë' löza idéli'në' yödzö na' rö'ö tsaz xilibi zö'ö que, le nuzöë' Dios xilibi zö'ö que, ate' gulu'ë le ga na' zoë' Lë cazë'.

11 Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bë'ë queënu yöl-la' huáca buzóanu-bi' bí'ido'. Buzóanu-bi' bi'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxí' lu në'ë queënu.

12 Que lë ni na', sal-la' chibigúladë'ë Abraham, gula'cuá'abi' zióntë'röbi' xzí'ini xi'sóë'. Gula'cuá'abi' tsca rö'öba' böläj lúxiba, en tsca rö'ö yuzxi tu ra' nisa zxön, cuntu nu gaca ulaba légacabi'.

13 Yúgu'të bönni' ni gulátië', en biti' gula'zi'ë lë na' guzxí' lu në'ë Dios unödzjë' quégaquië', pero gula'yéajlë'ë Dios, ate' zi'tu' zí'tu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquië' ca bönni' zi'tu', en bönni' ta'dazë' yödzölió ni.

14 Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'.

15 La'tu' gula'zá' ládxi'gaquië' caní que luyú ga ni' bila'rúajë', le nácatë ulu'dzölinë' nacxi huöajgaquië' ni',

16 pero gula'zá' ládxi'gaquië' que luyú na' nácarö dxi'a, le rö' yehua' yubá. Que lë ni na' biti' rutuí'në' Dios cate' ta'nnë' náquië' Dios quégaquië', tu' chinupë'ë tu yödzö quégaquië'.

17 Tu' guyéajlë'ë Abraham Dios, cate' guzxí' bë'ë Dios lë', budödë'-bi' bi'i Isaac queë' lahuë' Dios ca na' tu'dödë'-ba' yugu' böa' bëdxi tútigaquië'-ba' lahuë' Dios. Guzóë' sina' Abraham gútië'-bi' bi'i bönni' zí'alö queë' na' lahuë' Dios sal-la' nácabi' bi'i na' guzxí' lu në'ë Dios unödzjë' queë'.

18 Caní benë' sal-la' gudxë' Dios lë', gunnë': "Lu ná'abi' bi'i Isaac quiu' ichísagaca'-bi' xzí'ini xi'sú'."

19 Caní benë' Abraham, tu' gúquibe'enë' napë' Dios yöl-la' huáca usubanë'-bi' lu yöl-la' guti, ate' ca tu lugá'a luséqui', huáca innaru' buzi'ë-bi' lu yöl-la' guti sal-la' biti' guti cázabi'.

20 Tu' guyéajlë'ë Isaac Dios, gunábinë' Dios gun lá'ayë'-bi' bi'i Jacob, enca' bi'i Esau ca zeaj naca le ulu'z'í'ibi' xibé dza si' za'.

21 Tu' guyéajlë'ë Jacob Dios, cate' ni' chizóa gátië' gunábinë' Dios gun lá'ayë'-bi' tu tubi' xz'ínë' José, ate' guyéaj ládxe'ë Dios, ni' nayéchuë' lu xiyaga queë'.

22 Tu' guyéajlë'ë José Dios, cate' ni' chizóa gátië', bë'ë didza' que dza na' ila'rúajë' xz'í'ini xi'sóë' Israel luyú Egipto, ate' gunná bë'ë ca ral-la' ilu'ë dxita queë' luyú ga na' tsöjcu'ë.

23 Tu' gula'yéajlë'ë Dios, cate' gúljabí' bí'ido' Moisés, xuz xiná'abi' bulu'cáche'ë-bi' idú ca tsonna beo', tu' bila'lé'enë' nácabi' bi'i bönni'do' na' lachi, en biti' guládxinë' bönni' rinná bé'enë' bönachi Egipto, bönni' na' gunná bë'ë ilútië'-bi' yugu' bi'i bönni'do' na'.

24 Tu' guyéajlë'ëbi' Moisés Dios, cate' guzxönbi', bíti'rö bë'ëbi' lataj nu uzóa lëbi' bi'i bönni' queënu nigula xz'ínë' Faraón, bönni' na' rinná bé'enë' bönachi Egipto.

25 Caní benbi' tu' gúquibi' nácarö dxi'a nu usaca' zi' lëbi' tsözxön len bönachi queë' Dios ca uz'í'ibi' xibé tu chí'sö yugu' le tu'z'í' xibé nupa tun dul-la'.

26 Gúquibi' nácarö lesaca' nu ulidza ditaj lëbi', ca na' gaca ca' queë' Cristo, ca idéli'bi' yugu' yöl-la' tsahui' quégaca bönachi Egipto, tu' guzá' ládxi'bi' ca naca le ubi'ë Dios queëbi'.

27 Gudödi ni', tu' guyéajlë'ë Moisés Dios, birúajë' luyú Egipto, en biti' gúdxinë' yöl-la' rilé queë' bönni' rinná bé'enë' bönachi Egipto, ate' biá' gulénë' ca run nu rilé'e Dios, Nu na' biti' gaca ilé'eru'.

28 Tu' guyéajlë'ë Moisés Dios, benë' Laní Pascua ca gunná bé'enë' Dios lé', en buchéajë' rön ra' yu'u lídxigaquië', para cabí guti xz'ínigaquië' nu na' ral-la' usuniti yugu' bi'i bönni' z'í'aló quégaca bönachi Egipto.

29 Tu' gula'yéajlë'ë yugu' bönni' Israel Dios, gula'dödë' luyú bidxi gatsaj láchui'lö nísado' nazí'i le Nisa Xiná. Cate' gulë'ënnë' ila'dödë' ca' bönni' Egipto ni', gula'yépinë' nisa, en gulátigaquië' lu Nisa Xiná na'.

30 Tu' gula'yéajlë'ë bönni' Israel Dios, cate' budxi gula'dödë' idú gásibi'ilö yödzö Jericó yugu' dza idú gadxi dza, bila'guínnaj yugu' zö'ö gulún chí'i yödzö na'.

31 Tu' guyéajlë'ënu Rahab Dios, nigula ru'ínu lataj bönachi, biti' gútinu tsözxön len bönachi Jericó na' biti' gulún ca rna xtídzë'ë Dios, tu' bennu bal bönni' Israel na' buduyúlangaquië' le rácalen bönachi Jericó.

³² ¿Bízxi rō ral-la' innía'? Riyadzaj lataj uzúaja' ca gulunë' Gedeón, en Barac, en Sansón, en Jefté, en David, en Samuel, enca' yugu' bönni' gulu'ë didza' uláz queë' Dios.

³³ Tu' gula'yéajlë'ë Dios, bulu'zõtjë' zían yödzö zxön.

Gulunë' le naca tsahui', ate' gula'déli'në' le guzxí' lu në'ë Dios unödzejë' quégaquië'.

Bulu'sayjë' ruá'agacaba' bëdxi guixi'.

³⁴ Bulu'lë' yugu' lu guí' zxön.

Bila'ruájë' lu ná'agaca nupa gulë'ëni iluti légaquië' len guié tuchi'.

Dios bunë' légaquië' tsutsu cate' ni' gula'cuídi'në'.

Bulu'huóáquië' ca' tsutsu lu gudil-la.

Bulu'láguie' bönni' guizxi yu rójáquië' gudil-la quégaquië' bönni' zi'tu'.

³⁵ Yugu' nigula dza ni' bulu'zí'inu bi'i que queégacanu nubángacabi' lu yöl-la' guti.

Ia'bal-lë' bönni' ni' gulátië' lu ná'agaquië' bönni' ni' bulu'saca' zi'ë légaquië', en tu' cabí gulë'ënnë' ulu'cá'anë' Dios, biti' gula'zi'ë lataj nu usán légaquië'. Caní gulunë' para ila'déli'në' yöl-la' rubán lu yöl-la' guti, lë na' guléquinë' nazáca'rö.

³⁶ Ia'bal-lë' biá' guléngaquië' yöl-la' rutitaj, en xíguia' que gubá'ayi, ate' gula'dzunë' lidxi guié, nága'gaquië' du guié.

³⁷ Bulu'ladxi' bönachi bal-lë' guiöj, en gula'chözë' ia'bal-lë'. Gula'zí' bë'ë légaquië', en gulútigaca ziángaquië' len guié tuchi'. Gula'dödë' ná'alö ní'ilö, nácugaquië' guídi zxágacaba' bö'cu' zxila', en chivo. Guláquië' yechi', en gula'guí'i gula'záqué'ë, ate' bulu'dxía bönachi légaquië' dö'.

³⁸ Caní guláquië' bönni' na', ate' biti' gulaca bönachi yödzölió ni lesaca' ulu'zí' xibégaquië'. Gula'dasë' lu lataj cá'asö, en yugu' lu guí'a, ate' gula'cuá'asë' yugu' zxan bulóaj, en yugu' yeru luyú.

³⁹ Yúgu'të' bulu'ruájë' tsahui' lahuë' Dios tu' gula'yéajlë'ë Lë', sal-la' biti' gula'zi'ë luyú ni le guzxí' lu në'ë Dios unödzejë' quégaquië'.

⁴⁰ Caní guca, tu' nupë'ë Dios ni'a queëru' tu le nácarö dxi'a para cate' únë' légaquië' idú dxi'a, rë'u ni gunru' légaquië' tsözxön.

12

Ral-la' uyuru'-në' Cristo

¹ Que lë ni na', lësca' rë'u, tu' nacuá' idú gásibi'ilö ga ni zóaru' zióntërö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazöngaca rë'u, ate' lu yöl-la' riböza zxön ladxi'

queëru', ral-la' gunru' xichinë' Dios, le naca tsca xítiru' lu huitaj le zoa loru'.

² Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queëru' Lë'. Jesús gudí' guzxáquë'ë lë'e yaga cruz, en biá' gulënë' yöl-la' rutufí' que, tu' gú'unnë' idéli'në' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná bë'ë.

³ Buli'yúë' Jesús, ca na' gudí' guzxáquë'ë le bulu'saca' zi'ë bönni' dul-la' Lë', para cabí icuídi'li', en para cabí gaca chopá ládxi'li'.

⁴ Ga ridxintë na'a dza, bití' bi biá' gulenli' ga idxintë nu gun libí'ili' huë' tu' ridá'baga'li' le naca dul-la'.

⁵ Nadxi ca' chizá' ral-la ládxi'li' lë na' ruzéajni'inë' Dios libí'ili'. Nácali' ca yugu' xzí'ini cazë', ca na' nazúaj lu guichi le rnnë':

Zxí'ina', bití' uzú' tsölá'aló le gunë' Xanru',

cate' usëdi uzéajni'inë' li',

en bití' huóaj ládxi'u cate' uní'inë' li'.

⁶ Xanru' runí'inë' nu nadxi'inë',

en rusëdi ruzéajni'inë' yúgu'të nupa ta'zí' lu në'e ilaca xzí'ini cazë'.

⁷ Ral-la' guá' ilenli' le uní'inë' Dios libí'ili', tu' runë' Dios caní queëli' tsca nácali' xzí'ini cazë'. Bití' ca' zóabi' tubí' bí'ido' bití' uní'inë'-bi' xúzibi'.

⁸ Na'a, channö cabí runí'inë' Dios libí'ili' ca na' runë' quégaca yúgu'të xzí'ini cazë', ní'irö nácali' ca yugu' bí'i lan, en bití' nácali' idú xzí'inë' Dios.

⁹ Ia'stú, cate' ni' nácaru' bí'ido', gula'cu'ë xuz xiná'aru' luyú ni, bulu'ní'inë' rë'u, pero runru' légaquië' bal. Ca' naca, ral-la' gúnroru' ca rnna xtídzë'ë Xúziru' zoë' yehua' yubá para sóaru' ibanru' tsaz.

¹⁰ Yugu' xuz xiná'aru', tu chí'isö bulu'ní'inë' rë'u tsca le guléquisinë' naca dxi'a, pero cate' runí'inë' Dios rë'u, naca para gaca tu le uzí'iru' xibé, para gácaru' idú lá'ayi ca naca cazë' Lë'.

¹¹ Le nácatë bití' nalá' lahui na'a le uzí'iru' xibé que le runí'inë' rë'u, pero run ga ruhuí'iniru'. Channö güí'iru' lataj usëdi rë'u le runí'inë' rë'u, gun ga cözaru' dxi'ado', en ga gácaru' tsahui'.

Soa bönadxi queëru' channö cabí uzë nágaru' chi'ë Dios

¹² Que lë ni na' buli'ún tsutsu ná'ali' le röjxéqui'guequi, enca' xzíbili' le ta'zxizi, en idipa ládxi'li' para gunli' le naca dxi'a.

¹³ Guli'sóa nōza tsahui', para cabí gunli' ga ucá'ana nu ricuidi' ladxi' nōza na', pero guli'gún ga huóaca ladxi' nu na'.

14 Guli'güi' ládxi'li' cözaleni' dxi'a yúgu'të bönachi, en gácali' tsahui' lahuë' Dios, tu' channö cabí gunli' caní, biti' gaca ilé'eli'-në' Xanru'.

15 Guli'gún chi'i cuinli' para cabí soa nu ucá'ana le ruzá' ládxi'ë Dios queëru', en para cabí soa nu gaca ca tu guixi' silá', para cabí utsá' libí'ili', en cabí gun ga cabí gácali' tsahui' zianli' libí'ili'.

16 Guli'gún chi'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benë' Esaú, zxi'inë' Isáac. Esaú na' bëti'ë le ral-la' gata' lu në'ë tu' náquië' bi'i bönni' huaca queë' xuzë' para guzxi'ë tu le do' gudahuë'.

17 Chinöz quézili' ca na' guca queë' Esaú gudödi ni' cate' gú'unnë' idéli'në' le inabë' xuzë' lahuë' Dios para gaca le tsahui' queë'. Buéchi' ládxi'ë xuzë' lë', pero biti' guta' lataj ubí'i ládxi'ë Esaú na' sal-la' gudilaj ládxi'ë le len yöl-la' ribödxí queë'.

18 Ca raza queëli' biti' naca ca guca quégaquië' bönni' Israel. Légaquië' gula'biguë'ë gala' ga zoa tu guí'a le gaca nu can, ate' guyegui guí'a ni', en böáca chul-la lahui' dza tu' gurö'ö böaj gasaj, en guyécjada' bö'.

19 Bila'yönnë' ta'bödxí lúzuba' böa', enca' chi'ë Dios Nu bë' didza'. Cate' bila'yönnë' lë ni, guláta'yue' lahuë' Moisés para cabirö güi'ilenë' Dios légaquië' didza'.

20 Caní gulunë' tu' cabí guca guá' iléngaquië' lë na' gunná bé'enë' Dios légaquië', gunné': "Channö tsöjlíbibá' tuba' böa' guíxi'do'os guí'a ni, ral-la' ulu'ládxi'ë-ba' guiöj, o ulu'dödë'-ba' yaga tuchi'."

21 Lë na' bila'lé'enë' ben gádxida' légaquië', ate' Moisés gunné': "Radxi ridzöbida', en rizzízida'a."

22 Na'a, libí'ili' ral-la' gádxitëroli' tu' ribíga'li' gala' tu lu guí'a nazí'i le Sión, en ga zoa yödzö queë' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi' yu queë' Dios.

23 Ribíga'li' gala' ga ni' nudúbigaca zxi'ini cazë' Dios lahuë' Lë', nupa na' nazúajgaca laguequi lu guichi ni' yehua' yubá, enca' ga zoë' Dios Nu ruchi'a rusöröë' yúgu'të bönachi, en ga na' nacuá' yugu' bö' gulaca cazë' yugu' bönni' tsahui', tu' bunë' Dios légaquië' tsahui'.

24 Ribíga'li' ca' ga zoë' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rön queë' le run ga runiti lahuë' Dios rë'u, rön na' run le nácarö dxi'a ca le ben xichönë' Abel, lë na' ben ga guchúguië' Dios queëbi' bi'i böchë'ë.

25 Que lë ni na', guli'gún chi'i cuinli' para cabí tá'baga'li' Nu na' ruí'i didza'. Biti' ca' bulu'lá nupa ni' gula'dá'baga' nu

na' bulidza légaquië' luyú ni. Nácatëro löza biti' ca' uláru' rë'u channö tá'baga'ru' Nu na' rulidza rë'u, zoë' yehua' yubá.

²⁶ Dza ni' guxzizi luyú ni tu' biyön chi'ë Dios, pero na'a chiguzxi' lu në'ë, gunnë': "Ia'tú luzuísö, en calëgasö luyú uxízia', pero lúzxiba ca' uxízia'."

²⁷ Cate' ni' rnnë': "Ia'tú luzuísö", lë ni rulu'fi rë'u ral-la' udúa yugu' le gaca ila'zxízi, lë na' rö'ö yödzölió ni, ate' ulu'gá'ana le cabí gaca ila'zxízi, lë na' rö' yehua' yubá.

²⁸ Que lë ni na', tu' ral-la' idéli'ru' tu lataj ga inná bë'ëru', le cabí izxizi, ral-la' guiëru'-në' Dios: "Xclenu", ate' lu yöl-la' ba'a ladxi', en lu yöl-la' radxi Lë' tseaj ládxi'ru' Lë' ca na' raza ládxi'ë Lë',

²⁹ tu' náquië' Dios queëru' ca tu guí' le rusuniti le cabí naca idú tsahui'.

13

Le ral-la' gunru' le raza ládxi'ë Dios

¹ Ral-la' idxí'tica'sili' luzá'ali' tuli' ia'tuli'.

² Guli'tsöjné ral-la' uzóali' lídxili' nu idxín ga zóali'. Cate' gulún caní bal-la bönachi, bulu'cuá' lídxiguequi gubáz lá'ayi que yehua' yubá queë' Dios, sal-la' biti' gulëquibe'e nácagaquië' gubáz lá'ayi.

³ Guli'tsöjné nupa nadzúngaca lidxi guíë tsca nunli' légaquië' tsözxön, nadzunli' ca' lidxi guíë. Guli'gü' ládxi'li' yugu' bönni' ta'bía ládxi'gaca bönachi légaquië', tsca libí'ili' riguí' rizáca'lenli' légaquië' tsözxön.

⁴ Ral-la' gunli' bal yöl-la' nutsaga na', ate' tu tuë' bönni' ral-la' sóalenë'-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

⁵ Biti' bi uhuídi'li', pero guli'tsaza ládxi'li' tsca le dë queéli' na'a, tu' chigunnë' Dios: "Catu caz ucá'ana' li', en biti' ca' ubéaj ládxa'a li'."

⁶ Caní naca, huáca innaru' idú ládxi'ru' lë na' rnna: Xanru' náquië' Nu rácalen neda'.

Biti' ca' gádxida' bi gun bönachi quia'.

⁷ Guli'tsöjné yugu' bönni' tu'yúë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

⁸ Lëbisö ca náquië' Jesucristo, néaje, en na'a, en cá'tica'sö.

⁹ Biti' güi'ili' lataj yugu' xibá izá'a, en xibá nadzá' ichë'gaca libí'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá' ládxi'ë Dios queéli', en calëga ca nácagaca xibá que le rë'aj ráguru', lë na' biti' ulu'zí' xibé nupa tu'fi ládxi'gaca léguequi.

10 Zoa queëru' tu bucugu lá'ayi, le cabí ulu'zí' xibé nupa tun dxin que didza' rucá'ana tsahui' na' bilá' zí'alö.

11 Bixúz lo que yu'u lá'ayi na' gulu'ë xichöngacaba' böa' bédxi lu lataj idú lá'ayi tu' nözi dul-la', pero bulu'zéguië bëla' cá'asö quégacaba' ga naca ní'ilö ra' yödzö.

12 Lësca' caní gudí'i guzxáque'ë Jesús ní'ilö ra' yödzö para bunë' bönachi dxi'a len rön queë cazë'.

13 Tsöjtá'aru'-në' Jesús, sal-la' ila'béaj bönachi rë'u lu yödzö, en sí'iru' tsözxön len Lë' lë na' bulu'lidza ditaj bönachi Lë'.

14 Biti' zoa tu yödzö queëru' yödzölió ni le soa tsaz, pero riguíljaru' lë na' si' za'.

15 Que lë ni na', ral-la' cú'utica'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca tu le rigú'uru' lahuë' Dios. Len ruá'a cuinru' guiëru'-në' Dios: "Xclenu'" ni'a que le náquië' Lë'.

16 Biti' gal-la ládxi'li' gunli' le naca dxi'a, en gácalenli' luzá'ali' tuli' ia'tuli', tu' naca lë ni ca tu le rigú'uru' lahuë' Dios le raza ládxi'ë Lë'.

17 Guli'gún ca rnna xtídza'gaquië' böchi'ru' tu'yúë' libí'ili', en guli'güi' lataj ila'nná bé'enë' libí'ili', tu' tapa chi'ë bö' naca cázali', ca tunë' yugu' bönni' ral-la' ila'guíxjö'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxi' quégaquië', tu' cabí uzí'ili' xibé dxin na' ilunë' lu yöl-la' risëbi ladxi' quégaquië'.

18 Buli'lidzë' Dios, inábili'-në' gácalenë' netu', tu' runtu' löza soa dxi icja ládxi'do'otu', para cabí uxösa netu', ate' ruí'i ládxi'tu' gúntica'situ' le naca dxi'a.

19 Le nácarö lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayöntë.

Dios uzá' ládxi'ë queëru' le gácalen rë'u

20 Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz,

21 rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca rë'enë' Lë', ate' gunë' queëli' le raza ládxi'ë Lë', tu' néquili' queë' Jesucristo. ¡Queë' Cristo gácatíca'sö yöl-la' ba! ¡Ca' gaca!

22 Ráta'yua' loli', böchi' luzá'ado', güi' ládxi'li' didza' ni ruzéajni'i libí'ili', tu' naca láti'do'os lë ni ruzúaja' queëli'.

23 Ral-la' inözili' chiburúajbi' bi'i Timoteo, bi'i böchi'ru'do', lidxi' guië, ate' channö idxíntëbi' ga zoa' ni, gunbi' neda' tsözxön uduyútu' libí'ili'.

²⁴ Buli'gapa Dios böchi'ru' tu'yüë' libí'ili', enca' yúgu'të
bönachi rö queë' Dios. Tu'gapa Dios libí'ili' bönachi ta'yéajlë'
Cristo nacué' luyú Italia.

²⁵ ¡Dios uzá' lãdxë'ë queëli' yúgu'tëli'! ¡Ca' gaca!

LE BUZÚAJĚ' LU GUICH SANTIAGO

Santiago rugapë' Dios bönni' judío ta'dë'ë Cristo

¹ Neda', Jacobo, naca' huen dxin queë' Dios, enca' queë' Xanru' Jesucristo. Rugapa' Dios libí'ili', nácali' idxinnu cō' di'a dza quégaca bönachi Israel, násilasili' idú yōdzölió ni.

Yöl-la' réajni'i le runnë' Dios queëru'

² Böchi' luzá'ado', cate' gaca bi gaca queëli' le si' bē' libí'ili', ral-la' udzėjali' idú lādxi'li'

³ tu' nōz quézili', cate' bi raca queëli' le rizi' bē' libí'ili' ca réajlë'ëli' Cristo, lë ni rusedi libí'ili' cōzali' zxōn ladxi'.

⁴ Guli'güi' lādxi'li' gaca idú yöl-la' zxōn ladxi' queëli', para údxi gácali' bönni' ta'yéajni'inë', en biti' bi yadzaj queëli' ca nácagaca lë ni.

⁵ Channō zoa ladaj libí'ili' nu biti' réajni'ini, nu na' ral-la' inabi-në' Dios, ate' Dios caz gunnë' yöl-la' réajni'i que, tu' runōdzjë' yōdxi yana' quégaca yúgu'të bönachi, en biti' ca' réqui quézinë' gunnë' queëru'.

⁶ Na'a, nu bi rinabi-në' Dios, run bayudxi tséajlë' Lë', en cabi gaca chopa ladxi'. Nu raca chopa ladxi', raca que ca raca que bidxina' que nísado' cate' rutá bö' le, ruzéaj bö' le nilö ná'alö.

⁷ Nu naca caní biti' ral-la' gun löza si' bi unōdzjë' Xanru'.

⁸ Bönni' na' reaj bö' lādxi'da'ahuë' biti' ridzölinë' nácalö gunë'.

⁹ Channō zoë' tu bönni' böchi'ru' réajlë'ë Cristo, en náquië' cá'asō yōdzölió ni, ral-la' udzéjanë' tu' chinadéli'në' tu lataj lo lahuë' Dios.

¹⁰ Bönni' böchi'ru' na' rilé'enë' yöl-la' tsahui' queë' ral-la' udzéjanë' cate' runë' Dios ga bítirō ruzxōni lādxi'ë lë na' dë queë'. Nu ruzxōni ladxi' yöl-la' tsahui' que, gaca que nu na' ca raca que xiyija guíxi'do', la' ridödité que.

¹¹ Caní naca, tu' gaca que nu na' ca raca que xiyija guíxi'do' na' cate' rilén gubidza, en rudzá'ada', la' ribídxité guixi' na', en riguínnej xiyija, en riniti yöl-la' lachi que. Lësca' caní gaca queë' bönni' rilé'enë' yöl-la' tsahui' queë', inítië' tsanni ni runë' dxin riguiljë' yöl-la' tsahui' na'.

Le ta'zì' bē' rë'u

¹² Bica' ba bönni' böchi'ru' na' ruá' rilenë' le rizi' bē' lë'. Cate' chiburúajë' tsahui', idéli'në' yöl-la' na'bán idú, ca na' rideli' nu nutsa' lu huitaj, nu rideli' tu bregui' zin. Bönni' böchi'ru' na' náquië' bica' ba tu' idéli'në' yöl-la' na'bán idú na' guzxi' lu në'ë Dios unōdzjë' quégaca nupa nadxi'iguetqui Lë'.

¹³ Cate' bi raca queëru' le run ga guë'ë niru' gunru' le ruá' dö', bití' ral-la' innaru': "Dios rizí' bē' è rē' u len le naca xihui'." Dios bití' rizí' bē' è nu bönni' len le cabí naca dxi'a.

¹⁴ Na'a, channö nu bi raca que le rizí' bē' le len le cabí naca dxi'a, naca tu' rizé ladxi' le ruá' dö', ate' lē ni ben ga gú' uni gun le ruá' dö'.

¹⁵ Lē na' rizé ládxi' ru' le ruá' dö' run ga gunru' dul-la', en cate' chibudxi benru' dul-la' na', la' dul-la' ná' asö rusubaga' rē' u xíguia' gátiru'.

¹⁶ Böchi' luzá' ado', bití' si' ye' e la' cuínsili'.

¹⁷ Yúgu'tē le naca dxi'a, en yúgu'tē le naca idú le ruzí' iru' xibé, zá' gaca saca' xitsá' alö, en ta' rúaj ga zoë' Xúziru' Dios, Nu ben yugu' le ta' yēpi yōsa lúzxiba, yugu' le tu'tsá' cuínguequi, pero Lē' bití' rutsá' cuinë', en bití' rutsé' è ca runē', rúnntica'sē' queëru' le naca tsahui'.

¹⁸ Ca rē' èni quézinë' Dios, benē' ga nácaru' bönachi cubi queë'. Bugunē' dxin didza' queë' le naca idútē li, para gácaru' ca tu gulapa zí' alö queë' ladaj yúgu'tē nupa na' gurö cazē' Dios.

Le reaj ládxi' ru'-nē' Dios le naca li ladxi'

¹⁹ Que lē ni na' rea' libí' ili', böchi' luzá' ado', yúgu'tēli' ral-la' sóali' sina' yōnili', pero bití' ral-la' innētēzili', en bití' ilētēzili'.

²⁰ Nu na' riletēz bití' run le naca tsahui' lahuē' Dios.

²¹ Que lē ni na', guli' cá' ana yúgu'tē le ruá' dö', en yúgu'tē le zían le cabí naca tsahui', ate' lu yöl-la' nōxaj ladxi' guli' sí' lu ná' ali' didza' na' chinayaza icja ládxi' do' oli', tu' huáca gun didza' ni ga uláli'.

²² Na'a, guli' gún ca rnna didza' ni, en cabí yōnisili', tu' channö yōnisili' didza' ni, si' ye' eli' la' cuínsili'.

²³ Nu riyōnisö didza' ni, en bití' run ca rnna, nu ni naca ca tu bönni' ruyúé' lahuē' tu lu guié dxili,

²⁴ tu' ruyú cuinë', en söhuöjē', ate' la' ral-latē ládxi' è ca rinē' è.

²⁵ Na'a, nu bönni' bití' ral-la ládxi' è le riyōnnē', pero ruí' i ládxi' è xibá queë' Dios le naca idú li, en le gaca gun ga uláru', ate' ugá' anē' tsutsu, en gúntica'sē' ca rinná bē' xibá na', gaquiē' bica' ba ca naca yúgu'tē le runē'.

²⁶ Channö nu bönni' ladaj libí' ili' réquinē' naca dxi'a ca reaj ládxi' è Dios, pero bití' rapa chi' è lúdxē' è para cabí innēsē' ca', bönni' ni rizí' yé' enē' la' cuinsē', ate' bití' raza ládxi' è Dios ca reaj ládxi' è bönni' na' Lē'.

²⁷ Le reaj ládxi' ru'-nē' Dios, le naca idú, en le naca dxi'a, naca gácalenru' yugu' bi' i uzēbido', enca' yugu' nigula nagá' ananu túzinu, cate' ta' guí' i ta' zaca' nupa na', en cabí gútsa' ru' le cabí naca tsahui' le raca yödzölió ni.

2

Tuz ca ral-la' gunru' bönachi bal

1 Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi.

2 Channö tsázië' tu bönni' ga na' nudúbili', en nagu'ë xibön në'ë le néquini oro, en nácuë' lari' nazáca'da', ate' tsázië' ca' tu bönni' yéchi'do', nácuë' lari' cá'asö,

3 channö gunli' bal bönni' na' nácuë' lari' nazáca'da', en guiëli'-në': "Gurö'ölen rë'u ga ni naca dxi'a", pero guiëli' bönni' yéchi'do' na': "Ná'asö guzu'", o guiëli'-në': "Gurö'i lu yu ni."

4 Channö caní runli', rutsá'ali' ca runli' bal tu tu luzá'ali', en run cuinli' ca nu ruchí'a rusörö luzë'e, biti' naca dxi'a ca rizá' ládxi'li'.

5 Böchi' luzá'ado', buli'zë nágali' lë ni. Dios gurö cazë' yugu' bönni', sal-la' téquiquequi bönachi yödzo'lió ni náca'gaquië' cá'asö, para ila'déli'në' yöl-la' tsahui' lahuë' Lë' tu' ta'yéajlë'ë Cristo, en gata' quégaquië' lataj ga ni' rinná bë'ë Lë'. Gata' quégaquië' lë na' guxzí' lu në'ë Dios unödzejë' quégaca nupa ta'dxi'i Lë'.

6 Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquië', ate' bönni' na' dë yöl-la' tsahui' quégaquië' tu'saca' zi'ë libí'ili', tu' tu'gunë' libí'ili' dxin. Lë'sca' tu'dödë' libí'ili' lu ná'agaquië' bönni' yúlahui'.

7 Yugu' bönni' na' dë yöl-la' tsahui' quégaquië' ta'nnë' zi'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dá'gaca Cristo."

8 Runli' dxi'a channö runli' idú ca rinná bë' xibá lo, le nazúaj lu guichi, en rna caní: "Ral-la' idxí'inu' luzó'o ca nadxí'i cuinu'."

9 Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queë' Dios, tu' riguítjsjali' xibá na'.

10 Channö runë' tu bönni' idú ca rinná bë' xibá queë' Dios, pero channö ichíxinë' ca naca tuz le rinná bë' xibá na', chin-abáguë'ë xíguia' que idútë le rinná bë' xibá na'.

11 Lë cazë' Dios gunné': "Biti' gunu' dul-la' le riguítjsaj xibá que yöl-la' nutsaga na'", en gunné' ca': "Biti' gútiu' bönachi." Na'a, channö cabí runu' dul-la' le riguítjsaj xibá que yöl-la' nutsaga na', pero rútiu' bönachi, nabágu'u xíguia' que idútë xibá queë' Dios.

12 Ca innali', en ca gunli', ral-la' gunli' ca ral-la' ilún nupa uchi'a usöröë' Dios légaquië' ca rinná bë' xibá na', le run ga uláru'.

13 Nupa cabí tu'huechi' ládxi'gaca luzë'eguequi, uchi'a usöröë' Dios léguequi, ate' cuntu nu huéchi' ladxi'léguequi, pero nupa na' tu'huechi' ládxi'gaca luzë'eguequi ulu'rúaj dxi'a cate' uchi'a usöröë' Dios léguequi.

Le ral-la' gunru' tu' réajlë'ëru' Cristo

14 Böchi' luzá'ado', bití' bi uzi'ë xibé tu bönni' channö in-nasë': "Réajlë'a Cristo", pero bití' runë' le naca tsahui'. Bití' gaca ulé' bönni' na' channö innasë' réajlë'ë Cristo.

15 Channö nacu'ë böchi' luzá'aru' ta'yéajlë'ë Cristo, en bití' dë le ilácuë', en calëga le ilahuë',

16 ate' channö tu nu dzaga libí'ili' guiësö légaquië': "Böaj lídxili' tsáhui'do'. Chibölaj budzé'eli'", pero channö cabí unödzej quégaquië' lë na' ta'yádzjanë', bití' ca' gúcalen légaquië'.

17 Lësca' caní raca que nu bönni' rnasë' réajlë'ë Cristo. Channö cabí runë' le naca bë' naca idú ca réajlë'ë Lë', bití' naca lesaca' yöl-la' réajlë' queë'.

18 Nadxi ca' guië' tu bönni' luzë'ë: "Li' réajlë'ësu' Cristo, ate' neda' runa' le naca tsahui'. Bití' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'ida' lí' réajlë'a Cristo ni'a que le naca tsahui' runa'."

19 Lí' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'.

20 Lí, bönni' bití' bi nözinë'. Ral-la' inözi quézinu' channö zoa nu rnasö réajlë' Cristo, pero bití' run le naca tsahui', bití' naca lesaca' yöl-la' réajlë' Lë' que nu na'.

21 Naca bë' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' bití' buzégui'ë-bi'.

22 Na'a gaca inözili' ca guca queë' Abraham. Lë na' benë' guca bë' guyéajlë'ë Dios. Ca' naca, guca bë' naca idú ca guyéajlë'ë Dios ni'a que lë na' benë'.

23 Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bilé'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë': "Luzë'ë Dios."

24 Na'a, rilé'ë quézili' naca bë' rurúajë' tu bönni' dxi'a ni'a que le runë', en calëgasö tu' réajlë'ë Dios.

25 Lësca' caní guca queënu Rahab, nigula bë'ënu bönachi lataj. Lësca' naca bë' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélë'ë yöjhuöjgaquië' nöza yúbölö.

26 Ca na' raca que idütë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, bití' naca lesaca'.

3

Yugu' le rnna lúdxiru'

¹ Böchi' luzá'ado', biti' guntëz zían cuinli' bönni' tu'sédiré' bönachi, tu' chinöz quézili' zítërö uchi'a usöröë' Dios rë'u, núlöru' rusédiru' bönachi.

² Yúgu'tëru' runru' zían le richixi riníguiru'. Channö cabí richixi riníguiné' tu bönni' ca naca didza' ru'ë, bönni' ni náquië' idú tsahui', en raca inná be'e cuiné' ca naca yúgu'të le runë'.

³ Cate' rigú'uru' guíë ruá'agacaba' böa' para gunru' ga ilunba' ca rë'ëneru', gaca inná bé'eru' légacaba' lu idútë le tunba'.

⁴ Buli'yú ca' ca raca quéguequi barco. Sal-la' zxöntërö naca tu barco, en récjada' bö' ruzéaj le, cuídi'do'os naca në'e xiyágui barco na' le ruzecaj rudxí'i barco para tseaj gátitës ga guë'ënnë' bönni' rusë'ë le.

⁵ Lësca' caní naca lúdxiru'. Sal-la' cuídi'do'os naca, zióntërö le rnna lúdxiru' na'. Buli'yútsöca' ca run guí'. Sal-la' guí'do'os ribíbiru', tu guí'a sibi huayégui.

⁶ Lësca' lúdxiru' na' naca ca tu guí'. Yúgu'të le ruá' dö' raca yödzólió ni rnna lúdxiru', en tu' dzaga lúdxiru' na' idútë le naca cázaru', que lë ni na' run ga raca xihui' idútë le nácaru'. Le rnna lúdxiru' ribequi guí', le ruzegui' rë'u ca naca yúgu'të le runru', ate' tu' rnna caní lúdxiru' na', naca que tsca chinaguéla'të guí' le nabequi' tu' xihui'.

⁷ Yúgu'tëba' böa' guixi' ta'daba' luyú, en yugu' böa' zoa xiligacaba', en yugu' böa' tá'ayöj lë'ëba' lu yu, enca' yúgu'tëba' böa' dzö'öba' lu nísado', huáca ila'nná be'e bönachi luyú ni légacaba',

⁸ pero cuntu nu bönni' gaca inná bé'enë' lúdxë'ë, tu' rnna lúdxiru' le ruá' dö', en biti' gaca nu uzaga' xinözi. Zióntërö le rnna lúdxiru' le naca ca tu le nachë' yöl-la' guti.

⁹ Len la' lúdxiru' ná'asö rulidza tsáhui'ru'-në' Dios Xuz, en rulidza dítjaru' ca' yugu' bönni', ate' benë' Dios légaquië' ca naca cazë' Lë'.

¹⁰ Caní naca, len la' ruá'asiru' na' rulidza tsáhui'ru' bönachi, en rulidza dítjaru' bönachi. Böchi' luzá'ado', biti' ral-la' gaca caní.

¹¹ Biti' ca' ta'lén nisa siziá', en nisa zöna' la' tuzi ga ta'lén.

¹² Böchi' luzá'ado', tu yaga higo biti' gaca cuía le ribía yaga olivo, ate' tu lubá uva biti' gaca cuía le ribía yaga higo na'. Lësca' caní, nitú ga rilén nisa biti' gaca ila'lén nisa zöna', en nisa siziá'.

Yöl-la' réajni'i le naca idú

¹³ Channö zoë' tu bönni' ládjali' rácadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquië' caní ni'a que le naca tsahui' runë'.

¹⁴ Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, biti' ral-la' gun ba zxön

cuinli' ca naca yöl-la' réajni'i queéli'. Nu run caní rizi' yë', en ridá'bagá' le naca idútë li.

¹⁵ Yöl-la' réajni'i caní biti' naca le runödzejë' Dios, pero que yödzülió ni naca, enca' quégaca bönachi yödzülió ni, en que tu' xihui'.

¹⁶ Yugu' bönni' tu'zxé'enë' luzá'agaquië', en té'ënnë' ila'gú'u bönachi légaquië' yöl-la' ba, lësca' ta'dil-la dídžë'ë, en tunë' yúgu'të le ruá' dö'.

¹⁷ Yugu' bönni' nápaagaquië' yöl-la' réajni'i na' runödzejë' Dios: Tunë' le naca idú tsahui', en ta'bözë' dxí'ado'.

Nácagaquië' zxön ladxi', en nöxaj ladxi'.

Tu'huechi' ládxi'gaquië' bönachi,

en tunë' le naca dxí'a.

Tuz ca tu'chi'a tu'söröë' luzá'agaquië',

en biti' ta'béaj bë'ë luzá'agaquië'.

¹⁸ Nupa tu'i ládxi'gaca ila'bequi dxí le raca, ta'böza dxí'ado', para gaca ca' dxí'a idútë le zeaj naca caz.

4

Nupa tun zxön le nacua' yödzülió

¹ ¿Bizx que na' ridíl-lali', en raca didza' bizxaj queéli'? Raca caní queéli' tu' rizé ládxi'li' zían le rizé ládxi'li' tu tuli', en que lë ni na' ridíl-lalenli' luzá'ali'.

² Zían le ruhuidi'li', en tu' cabí rizi'ili' le, que lë ni na' rútili' bönachi. Ruzxé'eli' le dë que luzá'ali', en tu' cabí ridéli'li' le, que lë ni na' rizóa ribö'öli', en ridíl-lali'. Biti' rata' queéli' le ré'ënilí', tu' cabí rinábali'-në' Dios lë na'.

³ Sal-la' zoa bi rinábali', biti' bi rizi'ili', tu' cabí naca dxí'a ca rinábali', tu' ré'ënilí' lë na' rinábali' para ugunli' le dxin ca raza ládxi'sili'.

⁴ Libí'ili', bönachi nusanli'-në' Dios, ¿naru' cabí nözili' channö runli' zxön le nacua' yödzülió ni, chinuhuóacali' ca nu biti' rilé'e Dios dxí'a? Núti'tës nu ré'ëni gun zxön le nacua' yödzülió ni, nuhuóaca ca nu biti' rilé'e Dios dxí'a.

⁵ Biti' rnasó ca' le nazúaj lu guichi lá'ayi le rnna: "Dios risöl-lë'ë Dios Bö' Lá'ayi queëru', Nu zóalen rë'u, ate' Lë' nadxí'inë' rë'u, en rudúli'në' rë'u channö rusanru'-në'."

⁶ Na'a, zxöntëro le ruzá' ládžë'ë Dios queëru', tu' nazúaj lu guichi lá'ayi le rnna: "Dios ruzáguë'ë xinözguequi nupa tun ba zxön cuínguequi, pero ruzá' ládžë'ë quégaca nupa nácagaca nöxaj ladxi'."

⁷ Que lë ni na', guli'sóa nöxaj ladxi' lahuë' Dios. Guli'nná be'e tu' xihui', ate' uzxunnaj ga zóali'.

⁸ Guli'güi' ládxi'li' sóalenli'-në' Dios, ate' Lë' idisóalenë' libí'ili'. Libí'ili', bönachi dul-la', guli'gaca tsahui', en bíti'rö gunli' dul-la'. Libí'ili', núlöli' reax bö' ládxi'do'oli', en chopa le nadxí'ili', guli'gún dxi'a icja ládxi'do'oli'.

⁹ Guli'sëbi ládxi'li', en buli'huí'ini, en guli'cödxí. Na'a ruzxídxili, pero ral-la' cödxili'. Rudzėjali', pero ral-la' huí'inili'.

¹⁰ Guli'gaca nõxaj ladxi' lahuë' Xanru', ate' Lë' gunë' ga tsëpisëli'.

Biti' ral-la' ichugu bë'ëru' le run luzá'aru'

¹¹ Böchi' luzá'ado', bití' innëli' que luzá'ali' tuli' ia'tuli'. Nu bönni' rinnë' que böchi' luzë'ë, en rilaga yudxë' le runë', bönni' ni rinnë' que xibá queë' Dios, en ruchi'a rusöröë' le rinná bë' xibá na'. Na'a, channö ruchi'a rusöröu' le rinná bë' xibá na', run cuinu' nu ruchi'a rusöröë' le, en bití' runu' ca rinná bë' xibá na'.

¹² Na'a, tuzë' náquië' Dios, Nu ben xibá na', en náquië' ca' Nu ruchi'a rusöröë' le runru'. Lë' cazë' gaca usölë' bönachi o usunítie' bönachi na'. Na'a, ¿núzxitë run cuinu', rilaga yudxu' luzó'o?

Biti' gaca gunru' löza le gaca cuxö huidzaj

¹³ Na'a, buli'zë' nágali', núlöli' rnnali': "Cuxö huidzaj tséajtu' yödzo ni', ate' sóatu' ni' tu iz, en zían le gá'utu', en úti'tu', ate' caní gáta'da' dumí queëtu'."

¹⁴ Biti' nõzili' bizxi gaca cuxö huidzaj. ¿Nacxi caz naca queëru', tsca zóaru' yödzülió ni? Nácaru' ca böchila le nalá' tu chí'ido'osö, en la' rinítite'.

¹⁵ Que lë ni na', caní ral-la' innali': "Channö guë'ënnë' Xanru', sóaru' ibanru', en tu ia'tú le gunru'."

¹⁶ Na'a, libí'ili', lu yöl-la' run ba zxön queëli' rigú'uli' yöl-la' ba la' cuínsili'. Yúgu'të le caní le runli' zeaj naca le ruá' dö'.

¹⁷ Channö nõziru' le naca dxi'a le ral-la' gunru', en bití' gunru' lë na', runru' dul-la'.

5

Santiago rusë'ë ládxi'gaquië' bönni' dë yöl-la' tsahui' quégaquië'

¹ Libí'ili', bönni' rilé'eli' yöl-la' tsahui', guli'cödxí, en guli'cödxí'a, tu' si' za' dza ilé'eli' yöl-la' yechi'.

² Chinaca ditaj yöl-la' tsahui' queëli', ate' chinutögacaba' le ráculi' böljado' que.

³ Chinaca que dumí oro, en dumí plata queëli' ca naca que guíë nazön yöni que, ate' yöni que na' naca ca tu le ruzegui libí'ili' didza', ate' gaca queëli' ca tu guí' le usuniti libí'ili'. Caní gaca queëli', tu' busó' butúbili' queézili' yöl-la' tsahui' dza ni zóaru' chirösetëgaca.

4 ¡Buli'yútsöca! Yugu' bönni' huen dxin gula'lapë' yöla queëli' chita'naba yúdxinë' lázxjagaquië', tu' cabí riguízxi'anili' légaquië', ate' lë na' ta'nabë' bönni' huen dxin na' chibidxín didza' na' lahuë' Xanru', ate' Lë rinná bé'enë' ni'a në'ë guizxi yu.

5 Benli' ga buné'eli', en güi' gudágutica'sili' le rnnasö queëli' lu yödzölió ni. Buxón cuinli', pero chizóa idxín dza údxí queëli'. Gaca queëli' ca raca queëba' bédxi renni', chibú'u dza gútiru'-ba'.

6 Richúguli' quégaquië' bönni' tsahui', en rútili' légaquië', ate' légaquië' biti' ta'dá'baguë'ë libí'ili' cate' rútili' légaquië'.

Cözaru' zxön ladxí, en ulídzaru'-në' Dios

7 Na'a, böchi' luzá'ado', guli'cöza zxön ladxí' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxön ladxí' ribözë' guiöjsiu', en guiöj cusu lin, ate' tödi ni' ulapë', en utubë' yöz zían.

8 Lësca' caní, libí'ili' na' réajlë'ëli' Cristo, guli'cöza zxön ladxí', en buli'tipa ladxí'li', tu' chizá' gala' dza huödë' Xanru'.

9 Böchi' luzá'ado', biti' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca! ¡Chirudzaga lo udxinë' Xanru', ate' uchi'a usöröë' le runli'!

10 Böchi' luzá'ado', buli'yú ca guca quégaquië' bönni' gulu'ë didza' uláz queë' Xanru'. Nácagaquië' ca tu le rulu'i rë'u ca ralla' qu'i sáca'ru', en cözaru' zxön ladxí'.

11 Na'a, nucuá'aru' légaquië' ca yugu' bönni' guláquië' bica' ba, nupa ni' gula'gu'i gula'zaca'. Chibiyönili' ca benë' Job. Gulözë' zxön ladxí' sal-la' gudí'i guz xáca'dë'ë, ate' nözili' ca' ca benë' Xanru' queë' ga búdxitë. Ruhuéchi'da' ladxë'ë Xanru' rë'u, en ru'i ladxë'ë rë'u.

12 Böchi' luzá'ado', le nácatërö lo naca lë ni rea' libí'ili': ¡Biti' uzötjali' Nu zoa yehua' yubá, en biti' uzötjali' le nacua' luyú ni, en biti' uzötjali' bítitës bi run tsutsu xtídzali'! Cate' innali' "Ön" ral-la' innásili' "Ön." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuë' Dios.

13 Channö riguí' rizáca' nu dzaga libí'ili', ral-la' ulidza Dios nu na'. Channö zoa nu rudzeja, ral-la' gul-la yöl-la' ba nu na'.

14 Channö re'e nu dzaga libí'ili', ral-la' ulidza bönni' gula tapa chi'ë bönachi queë' Cristo, para ulu'lidzë' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'.

15 Cate' ulu'lidzë' Dios, en ta'yéajlë'ë gunë' Cristo ga huöáquië' bönni' huë' na', ní'irö gunë' Xanru' ga huöása uzóë', en channö benë' dul-la' bönni' huë' na', Xanru' uniti lahuë' lë'.

16 Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' libí'ili',

para urúaj yödzöhuë' na' ré'eli'. Le rulidzë' tu bönni' tsahui' Dios, le runë' idú ládxe'ë, nácada' lesaca'.

¹⁷Elías, bönni' ni' bë'ë didza' uláz queë' Dios, gúquië' tu bönni' yödzölió ca nácaru' rë'u, pero cate' bulidzë' Dios, en gunábinë' Lë' para cabí galaj guiöj, idú tsonna iz yu' xopa beo' biti' gulaj guiöj luyú ni.

¹⁸Gudödi ni' bulidzë' Dios leyúbölö, ate' böálaj guiöj, ate' bunödzej le gulazë' yugu' bönni' dza ni'.

¹⁹Böchi' luzá'ado', lë ni ral-la' inözili'. Channö nunbë' nu bönni' dzáguië' libí'ili' le naca idútë li, en richixi riníguinë', ate' zoa nu gun ga ubí'i ládxe'ë bönni' na' richixi riníguinë',

²⁰nu na' gun ga ubí'i ládxe'ë bönni' dul-la' na' gudë' ga yúbölö, usölë' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!

DÍDZA'DO' ZÍ'ALÖ BUZÚAJĚ' PEDRO

Pedro rugapě' Dios nupa ta'dá' Cristo

¹ Neda', Pedro, naca' gubáz nasöl-lě'ě Jesucristo. Ruzúaja' queěli' lu guichi ni, libí'ili' násilasili' zí'tu' gapa dē lądzali', zóali' luyú Ponto, en luyú Galacia, en luyú Capadocia, en luyú Asia, en luyú Bitinia.

² Gurō cazě' Xúziru' Dios libí'ili' ca na' bucözě' dza ni'te, para guéquili' quez queě' lu ně'ě Dios Bō' Lá'ayi, en gunli' ca rnna xtídzě'ě Cristo, en gácali' idú tsahui' ni'a que xichöně' Cristo. Rinábida'-ně' Dios uzá' lądxě'ě queěli', en guně' ga soa dxi icja lądxi'do'oli'.

Le rúntica'siru' löza

³ ¡Yöl-la' ba Dios, Xuzě' Xanru' Jesucristo! ¡Lu yöl-la' ruhuéchi' ladxi' zxön queě' bucubě' yöl-la' na'bán queěru' tu' busubaně' Jesucristo lu yöl-la' guti! ¡Lě ni run ga rúntica'siru' löza,

⁴ en gun ga idéli'ru' lě na' rapa chi'ě Dios queěru' yehua' yubá! Lě na' rapa chi'ě Dios, le unödzejě' quégaca bönachi queě', bití' initi, en bití' itěbi, en bití' igula.

⁵ Tu' réajlě'ěli' Lě', lu yöl-la' huáca zxön queě', Dios gun chi'ě libí'ili' cate' idxinrō dza ni' uzí'ili' xibé yöl-la' rusólá idú na' chinupě'ě queěru', en ulu'ě lahui dza údxi.

⁶ Que lě ni na' rudzėjadě'eli', sal-la' na'a ral-la' quí'i sáca'li' tu chí'ido' tu' taça zían le ta'zí' bě' libí'ili'.

⁷ Tu' ruá' rilenli' yugu' lě na' ta'zí' bě' libí'ili', naca bě' naca idú ca réajlě'ěli' Cristo. Lěsca' caní rizi' bě'ěru' oro, le initi, cate' ruchí'aru' le lu guí'. Que lě ni na', cate' chinazí' bě' yöl-la' réajlě' queěli' Cristo, le nácarō lesaca' ca oro, gaca queěli' yöl-la' zxön, en yöl-la' run bal dza ni' uluí' lahuě' Jesucristo.

⁸ Libí'ili' nadxí'ili'-ně' Cristo sal-la' catu caz bilé'eli' Lě'. Réajlě'ěli' Lě' sal-la' bití' rilé'eli'-ně' na'a, ate' rudzėjali'. Yöl-la' rudzeja zxön queěli' le cabí gaca quíxjō'ōru' tsca naca, naca idútě li.

⁹ Caní naca, tu' ridéli'li' yöl-la' rusólá que bō' naca cázali', le rata' queěli' tu' réajlě'ěli'-ně' Cristo.

¹⁰ Dza ni'te yugu' bōnni' gulu'ě didza' uláz queě' Dios bulu'sedě' dxí'ado' ca naca yöl-la' rusólá na' dē queěru' na'a, ate' gulu'ě didza' ca naca le ruzá' lądxě'ě Dios queěru'.

¹¹ Bō' Lá'ayi dzáguiě' Cristo buzėjajni'ině' zí'atělō bōnni' na' gulu'ě didza' uláz queě' Dios, en buluí'ině' légaquiě' ca ral-la' quí'i sáquě'ě Cristo, enca' ca gaca queě' yöl-la' zxön tōdi na'. Que lě ni na' guluí' lądxi'gaquiě' ila'nōzině' bátaxi gaca

lë ni, en nuzxi na' gaca que lë na' bulu'ínë' Bö' dzáguie' Cristo légaquie'.

¹² Dios bulu'ínë' bönni' na' gulu'ë didza' uláz queë' biti' naca tu le ila'lé'enë' légaquie', pero rë'u ni rilé'eru' lë na' gulu'ë didza' que, ate' libí'ili' riyónili' na'a ca naca que. Yugu' bönni' tunë' libán que didza' dxi'a tu'ë didza' que lë ni, ate' zóalen yöl-la' huáca queë' Dios Bö' Lá'ayi légaquie', Nu na' risól-lë'ë Dios zoë' yehua' yubá queëru', ate' t'ënnë' gubáz lá'ayi queë' Dios ila'nózinë' ca naca lë na' gulu'ë didza' que dza ni'te.

Dios rulidzë' rë'u para gácaru' lá'ayi

¹³ Que lë ni na', guli'sóa ban ladxi', en guli'cözatica'sö bá'ado'. Idú ládxi'li' buli'zxöni ládxi'li' lë na' uzá' ládxi'ë queéli' Dios dza ni' uluf'i lahuë' Jesucristo.

¹⁴ Guli'gún ca rnna xtídzë'ë Dios, en biti' gü'ili' lataj yugu' le rizë ládxi'li' ila'chë' libí'ili' ga yúbölö, ca na' benli' dza ni' biti' núnbë'ënili'-në' Dios.

¹⁵ Ral-la' gácali' lá'ayi ca naca yúgu'të le runli', ca na' náquie' lá'ayi Dios, en bulidzë' libí'ili' para guéquili' queë'.

¹⁶ Lësca' caní nazúaj lu guichi lá'ayi, ca na' gunné' Dios le rnna: "Guli'gaca lá'ayi, tu' naca' neda' lá'ayi."

¹⁷ Rëli'-në': "Xuztu" cate' rulídzali'-në' Dios, ate' Lë', lëbisö ca ruchi'a rusöröë' yúgu'të bönachi tsca naca le núngaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládxi'li'.

¹⁸ Dios busölë' libí'ili' lu lë na' gúcali' dza ni' cate' benli' ca nácagaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', calëga len tu le initi ca naca oro, en plata,

¹⁹ pero len xichönë' Jesucristo le nácatëro lesaca', tu' budödi cuinë', en gúquie' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'.

²⁰ Dios gurö cazë' Cristo zí'atëlö ca benë' yödzölió ni, ate' dza ni zóaru' na'a benë' ga bulu'i lahuë' para uzí'ili' xibë'.

²¹ Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquie' lo. Caní naca, réajlë'ëli'-në' Dios, en ruzxöni ládxi'li' Lë'.

²² Na'a, chinún cuinli' dxi'a tu' runli' ca rnna le naca idútë li, en naca idú ca nadxi'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'.

²³ Chiböáljali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sö.

²⁴ Caní naca, tu' nazúaj lu guichi lá'ayi le rnna:

Yúgu'të bönachi nácagaca ca naca guixi'.

Yöl-la' lachi quéguequi naca ca xiyija guixi' na'.

Ribidxi guixi' na', en riguinnaj xiyija,

²⁵ pero xtídzë'ë Dios zóatica'sö.
Didza' ni bidxín queëli' lu didza' dxi'a.

2

¹ Que lë ni na', guli' cá'ana yúgu'të le ruá' dö'. Bítirö si' yë'ëli', en bití' ubéaj dxi'a cuinli' lógaca bönachi. Bítirö uzxé'eli', en bití' innëli' que luzá'ali'.

² Ral-la' së ládxi'li' le naca queë' Dios Bö' Lá'ayi para gálali' ca na' tunbi' bi'huë'ënido', ta'zë ládxi'bi' nidxi'. Caní ral-la' gunli' ga idxinrö dza uláli',

³ channö réquibe'eli' náquië' Xanru' dxi'i ladxi'.

Cristo náquië' ca tu guiöj naca ban

⁴ Guli'biga' ga zoë' Xanru'. Náquië' ca tu guiöj naca ban. Náquië' ca tu guiöj bulu'cá'ana bönachi cá'asö pero naca tu le gurö cazë' Dios le nazáca'tërö.

⁵ Lësca' caní, libí'ili' nácali' ca yugu' guiöj nabángaca. Guli'güi' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queë' Dios, ate' lu në'ë Jesucristo gaca udödili' yugu' le runnë' Dios Bö' Lá'ayi queëli' lahuë' Dios, lë na' raza ládxië'ë Dios.

⁶ Que lë ni na' nazúaj ca' lu guichi lá'ayi le rnna:

Rigu'a lu zö'ö yödzö Sión tu guiöj lo squin zö'ö,
le gurö caza' neda', en naca lesaca'.

Nu réajlë' Lë', bití' ichixi inigui.

⁷ Naca guiöj ni queëli' libí'ili' na' réajlë'ëli' Cristo tu le nazáca'da', pero quégaca nupa bití' ta'yéajlë' Cristo, naca ca na' nazúaj lu guichi lá'ayi le rnna:

Guiöj na' bulu'zöë' bönni' tu'cu'ë zö'ö tsölá'alö,
tu' guléquinë' naca cá'asö,
guiöj ni chinaca guiöj lo squin zö'ö.

⁸ Lësca' caní nazúaj lu guichi lá'ayi le rnna:

Guiöj ni gun ga tsöjchégu'gaca bönachi,
en gun ga tsöjtsö'ögaca.

Le nácatë yöjchégu'gaquië' bönni' bití' ta'yéajlë'ë Cristo, tu' gula'chíxinë' cate' bulu'zöë' xtídzë'ë Dios tsölá'alö. Dios bucu'ë légaquië' para ilunë' caní.

Nupa néquiguequi quez queë' Dios

⁹ Libí'ili' nácali' bönachi gurö cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzö nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulidzë' libí'ili' para birúajli' ga naca chul-la que dul-la', en guyázali' lu bení' idú queë'.

¹⁰ Zí'atëlö bití' gúcali' bönachi queë' Dios,

pero na'a chinácali' bönachi queë'.
 Zí'atëlö cuntu nu buéchi' ladxi' libí'ili',
 pero na'a Dios caz ruhuéchi' ládxë'ë libí'ili'.

Zóaru' nabanru' para gunru' ca rë'ënë' Dios

11 Böchi' luzá'ado', nácali' ca bönachi zi'tu', en ridásili' yödzölió ni. Que lë ni na', ráta'yua' loli', biti' güí'ili' lataj ila'nná be'e le rizësö ládxí'li' libí'ili', yugu' le ta'díl-lalen bö' naca cázali'.

12 Guli'gún le naca dxi'a lógaca bönachi biti' núnbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

13 Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' idütë yödzölió, tu' náquië' bönni' lo unná bë',

14 o channö náquië' bönni' rinná bé'enë' tu yödzö, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a.

15 Caní rë'ënë' Dios gunli' para ila'bö' dxíë' yugu' bönni' biti' bi nözguequinë', en biti' núnbë'gaquië' Lë', cate' ila'lé'enë' le naca dxi'a na' runli'.

16 Guli'gaca ca yugu' bönni' nazángaquië', pero biti' ugunli' dxin yöl-la' nazán queëli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

17 Guli'gún bal yúgu'të bönachi.

Guli'dxí'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idütë yödzölió.

Le gudí'i guzxáquë'ë Cristo ruzéajni'i rë'u ca ral-la' gunru'

18 Núlöli' nácali' bönni' nadó'ogaca, guli'gadxi bönni' xanli', en guli'gún légaquië' bal, calégasö gunli' bal yugu' bönni' xanli' na' nácagaquië' tsahui', en tuí'i ládxí'gaquië' libí'ili', pero guli'gún bal ca' yugu' bönni' xanli' na' tu'saca' zi'ë libí'ili' lu dxin runli' quégaquië'.

19 Channö quí'i sáca'li', en biti' bi nabága'li', ate' guá' ilenli' lë na' tu' réquili' naca ca rë'ënë' Dios, urúajli' tsahui' lahuë' Dios.

20 Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', ¿nacxi caz uzí'ili' xibé sal-la' len yöl-la' riböza zxön ladxi' queëli' guá' ilenli' lë na' gaca queëli'? Channö ribözali' zxön ladxi', en ruá' rilenli' le riguí'i rizáca'li', ate' benli' le naca dxi'a, ní'irö urúajli' dxi'a lahuë' Dios.

21 Dios bulidzë' libí'ili' para quí'i sáca'li' caní, tu' gudí'i guzxáquë'ë Lë' cazë' Cristo uláz queëli', en buzóë' queëli' tu le rulu'i libí'ili' ca ral-la' gunli', para quí'i sáca'li' ca na' gudí'i guzxáquë'ë Lë'.

22 Cristo biti' bi dul-la' benë', en catu caz guzxi' yë'ë.

23 Cate' bulu'dídza' yúdxinë' Lë',
biti' butsagui yúdxinë' légaquië'.

Cate' bulu'saca' zi'ë Lë',
biti' buzenë' légaquië' le bach,
pero budödi cuinë' lu në'ë Dios,
Nu na' ruchí'a rusöröë' le runru' ca sa'yéaj.

24 Lë cazë' Cristo guzxi'ë dul-la' queëru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queëru' para huóácaru' rë'u dxi'a.

25 Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chi'ë bö' naca cázali'. Náquië' queëli' ca tu' bönni' uyú bö'cu' zxila'.

3

Ca ral-la' ilún nupa nutsaga ná'gaca

1-2 Lësca' caní, libí'ili' nigula, ral-la' gunli' bal bönni' que queëli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dxi'a runli', en ca na' nácali' ba'a ladxi', en runli' légaquië' bal, sal-la' biti' bi didza' ru'ílenli' légaquië' ca naca queë' Cristo.

3 Yöl-la' lachi queëli' biti' naca le zoa láchuisö, tsca rupá'ali' ícjali', en tsca nácagaca le néquini oro nusí' cuinli', en lari' nazáca'da' náculi'.

4 Yöl-la' lachi queëli' ral-la' gaca le yu'u icja ládxi'do'oli'. Yöl-la' lachi le ridiá'tica'sö naca yöl-la' nöxaj ladxi', en yöl-la' ba'a ladxi', le nazáca'da'gaca lahuë' Dios.

5 Lësca' caní guca yöl-la' lachi quégacanu nigula gula'yéaj ládxi'nu Dios, nigula na' gula'cuá'anu dza ni'te. Bulu'zxöni ládxi'nu Dios, en gulunnu bal bönni' que queëgacanu.

6 Caní bennu Sara, tu' bennu ca rna xtídzë'ë Abraham, bönni' queënu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxi'a, en biti' bi gádxili'.

7 Lësca' caní, libí'ili', bönni', ral-la' gü'i ládxi'li' nigula que queëli'. Guli'gún légacanu bal, calégasö tu' nöta'gacanu ca yöl-la' nál-la queëli', pero lësca' tu' nadéli'gacanu yöl-la' na'bán na' runnë' Dios queëru', lébisö ca nadéli'li' libí'ili'. Guli'gún caní para cabí uzaga' tu' xihui' xinözili' cate' ulídzali'-në' Dios.

Huagu'i huazáca'ru' sal-la' gunru' le naca dxi'a

8 Ga ruúdxitë, guli'gaca tuz tuli' len ia'tuli' yúgu'tëli', en guli'gü' ládxi'li' luzá'ali' tuli' ia'tuli'. Guli'gaca dxi'i ladxi', en zxön ladxi'.

⁹ Biti' ubí'ili', cabí guá'ali' dö' que nu ruá' dö' queéli', en biti' utsaga yúdxili' nu rutsaga yudxi libí'ili', pero caní ubí'ili', inábili'-nè' Dios gunè' ga gaca bica' ba nu na', tu' bulidzè' Dios libí'ili' para gácali' bica' ba.

¹⁰ Caní naca le nazúaj lu guichi lá'ayi le rnna:
Nu bönni' rē'ēnē' uzi'ē xibé yöl-la' na'bán queē', en cözē'
dxí'ado',
ral-la' ucá'anē' didza' xihui', en cabirö si' yē'ē.

¹¹ Ral-la' ucá'anē' le ruá' dö', en gunè' le naca dxí'a.
Ral-la' gü'i ládxe'ē cözē' zxön ladxí', en gúntica'sē' caní,

¹² Xanru' rapa chi'ē yugu' bönni' tsahui'
en ruzē náguiē' le tu'lidzē' Lē',
pero ruzáguē'ē xinözguequi nupa tua' dö'.

¹³ ¿Nuzxi caz guá' dö' queéli' channö ru'í ládxi'li' gúntica'sili'
le naca tsahui'?

¹⁴ Sal-la' quí'í sáca'li' cate' runli' le naca tsahui', gácali' bica'
ba. Cuntu nu gádxili', en bití' ubi uguí'ili'

¹⁵ pero buli'zxöni ládxi'li'-nè' Cristo, en gü'íli' Lē' lataj inná
bé'enē' lu icja ládxi'do'oli'. Guli'sóa sina' quíxjöi'ili' yúgu'tē
nupa ila'nabi libí'ili' bizx que runli' löza Cristo, en gunli' lē ni
lu yöl-la' nöxaj ladxí' queéli', en lu yöl-la' run bal nupa na'.

¹⁶ Guli'gúntica'sö le naca dxí'a lahuē' Dios, en channö nacué'
nupa ta'nnē xihui' que le naca tsahui' runli' tu' réajlē'ēli'
Cristo, ní'irö ulu'tuí' tu' nözi le ta'nnē queéli'.

¹⁷ Channö quí'í sáca'li', dxí'arö gaca channö naca tu' runli' le
naca dxí'a, en calēga tu' ruá'ali' dö', channö Dios rē'ēnē' quí'í
sáca'li' caní.

¹⁸ Lē cazē' Cristo gudí'í guzáquē'ē, en gútiē' uláz queēru'
para bugúē' dul-la' nabága'ru'. Lē' náquiē' dxí'a, pero gútiē'
ni'a queēru', yugu' bönni' dul-la'. Caní benē' para bunē' rē'u
tuz len Dios. Lu yöl-la' bönachi queē' gútiē' pero lu bö' naca
cazē' ni zoē' nabanē' lu le cubi le naca cazē'.

¹⁹ Lu bö' naca cazē' guyijē' yöjenē' libán lógaca bö'
nadzúngaca.

²⁰ Bö' ni gulaca cazē' yugu' bönni', dza ni'te gula'dá'baguē'ē
xtídzē'ē Dios, dza ni' zoē' Noé, cate' ni' gulözē' Dios lu yöl-la'
riböza zxön ladxí' queē', en bití' busiúdxē' légaquiē', tsanni ni'
benē' Noé barco zxön na'. Lē'e barco na' bulu'lá nabábasö
bönachi lu nisa. Gulaca xunu' bönachi, bönni', en nigula.

²¹ Nisa ni' naca tu le rulu'í ca naca nisa ga na' ridílaru' nisa,
le naca bē' nuláru' lu yöl-la' guti tu' bubanē' Jesucristo lu yöl-
la' guti. Lē na' ridílaru' nisa bití' naca tu le run dxí'a le nácaru'
láhuisö, pero rulu'í ru'í ládxi'ru' gaca dxí'a icja ládxi'do'oru'
lahuē' Dios.

²² Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadéli'gaca yöl-la' zxön.

4

Ral-la' ugunru' dxin yöl-la' huáca queë' Dios para gunru' xichinë' Cristo

¹ Que lë ni na', ca na' gudí'i guzxaquë'ë Cristo lu le naca cazë', lëasca' libí'ili' ral-la' soa cözali' quí'i sáca'li'. Nu na' riguí'i rizáca'a tu' da' le naca tsahui' chibucá'ana dul-la'.

² Na'a isí lo, ral-la' gúntica'sili' ca rë'në' Dios, en calëga ca rizësö ládxi'li' lu yöl-la' bönachi queëli'.

³ Tsca'ti' gaz le chibenli' chibenli'. Bítirö gunli' ca na' tun nupa bití' núnbë'gaca Dios. Dza ni'te benli' yugu' le cabí ral-la' gunli'. Guzë ládxi'li' le ruá' dö'. Guzúdxili'. Gudödi bë' güí'i gudáguli', en guyéaj ládxi'li' budó' guiöj budó' yaga, le rigútinë' Dios.

⁴ Na'a, tu'báninë' bönni' tunë' caní tu' cabirö runli' tsözxön légaquië' cate' tunë' le ruá' dö' caní, en que lë ni na' tu'tsaga yúdxinë' libí'ili'.

⁵ Légaquië' run bayudxi ulu'luí'i cuíngaquië' lahuë' Dios, ate' Lë' chizóa uchi'a usöröë' nupa nabángaca, en nupa chinátigaca.

⁶ Que lë ni na' guca libán que didza' dxi'a lógaca nupa chinátigaca, nupa na' Dios buchí'a busöröë' léguequi cate' ni' gula'cuá' yödzölió ni, ca na' ruchi'a rusöröë' yúgu'të bönachi. Guca libán lóguequi para ila'cuá' lu yöl-la' na'bán lu bö'nácagaca caz, ca na' zoa cazë' Dios lu yöl-la' na'bán.

⁷ Chizóa idxín dza údxi que yúgu'të le dë. Que lë ni na', guli'gaca ba'a ladxi', en bulí'subán ládxi'li' para gaca ulídzali'në' Dios.

⁸ Tu' runtë bayudxi, guli'dxí'i luzá'ali' tuli' ia'tuli', ate' channö dzágali' lu yöl-la' nadxí'i, gácali' sina' uniti loli' yugu' luzá'ali' tua' dö' queëli'.

⁹ Guli'güí' lataj ila'cuá' böchi' luzá'ali' lídxili', en bití' innëli' quégaquië'.

¹⁰ Ral-la' ugunli' dxí'ado' dxin yugu' le buzá' ládxe'ë Dios queëli', en gácalenli' luzá'ali' tuli' ia'tuli'.

¹¹ Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácatica'sö queë' Dios yöl-la' ba, en yöl-la' unná bë'! ¡Ca' gaca!

Le ila'guí'i ila'zaca' bönachi ta'yéajlë' Cristo

¹² Böchi' luzá'ado', bití' ubánili' tu' nözi le ta'zí' bë'da' libí'ili'. Bití' naca tu le cabí núnbë'gaca bönachi.

13 Guli'dzėjade'e tu' dē lataj queēli' gunli'-nē' tsōzxōn Cristo lu le rigui' rizáquē'ē Lē' nī'a que bōnachi queē' para gaca udzėjali' ca' dza na' huödē' Cristo, cate' ilé'eli' yōl-la' zxōn queē'.

14 Channō tu'dzaga yudxi bōnachi libí'ili' tu' dá'ali' Cristo, bica' ba libí'ili', tu' naca bē' zóalenē' Dios Bō' Lá'ayi libí'ili', Nu na' za' yehua' yubá. Bōnachi yōdzōlió ni tu'dzaga yudxi Lē', pero libí'ili' runli'-nē' bal.

15 Channō rigui' rizáquē'ē nu bōnni' dzáguie' libí'ili', ral-la' gaca caní tu' dē'ē Cristo, en calēga tu' rútiē' bōnachi, o ribanē', o ru'ē dō', o tu' yōjgútsē'ē ga yúbölö.

16 Na'a, channō núlōli' rigui' rizáca'li' tu' dá'ali' Cristo, biti' ral-la' utu'ili', pero guli'cu'ē Dios yōl-la' ba tu' nazí' lali' bōnachi queē' Cristo.

17 Chibidxín dza isí lahuē' Dios uchi'a usöröē' bōnachi rö queē'. Channō zí'alö uchi'a usöröē' rē'u, ¿nácxitērö gaca quégaca nupa biti' túngaca ca rnna didza' dxi'a queē' Dios?

18 Channō naca bōniga ulu'lágaca nupa tun le naca dxi'a, ¿nácxitērö gaca quégaca nupa ta'dá'baga' Dios, en tun dul-la'?

19 Caní naca, yugu' bōnni' ni ta'gui' ta'zaquē'ē tu' rē'ēnē' Dios gaca caní, ral-la' ilúntica'sē' le naca tsahui', en ulu'dödē' bō' nácagaca cazē' lu nē'ē Dios, tu' ben cazē' Lē' légaquie', en runē' ca rnna xtídzē'ē.

5

Pedro ruzéajni'inē' nupa ta'yéajlē' Cristo

1 Na'a, ruzéajni'ida' libí'ili', bōnni' gula tapa chí'ili' nupa néquiguequi queē' Cristo, tu' naca' neda' ca' bōnni' gula ca nácali' libí'ili', en bilé'eda' le gudí' guzáquē'ē Cristo, ate' guna' ca' tsōzxōn libí'ili', uzí'iru' xibé yōl-la' zxōn na' ilá' lahui.

2 Guli'gaca ca bōnni' tu'yúē' bō'cu' zxila', gun chí'ili' bōnachi na' Dios gulu'ē lu ná'ali'. Guli'gún caní idú ládxi'li' ca rē'ēnē' Dios, en calēga tu' run bayudxi queēli', o tu' rizē ládxi'li' dumí. Guli'gún xichinli' tu rē'ēnisili',

3 en calēga tu' rē'ēnili' inná bé'esili' nupa na' nagu'ē lu ná'ali'. Guli'gúí ládxi'li' gácali' tu le ruluí' ca ral-la' ilaca nupa na' run chí'ili'.

4 Caní naca, cate' ulu'í' lahuē' Cristo, bōnni' lo uyú bō'cu' zxila', idéli'li' tu le uzí'ili' xibé le catu caz initi.

5 Lē'sca' caní, bi'í cuidi', guli'gún ca ta'nnē' yugu' bōnni' gula. Yúgu'tēli' ral-la' gunli' bal luzá'ali', tuli' ia'tuli', lu yōl-la' nōxaj ladxi' queēli', tu' nazúaj lu guichi lá'ayi le rnna: Dios ruzáguē'ē xinōzguequi nupa tun ba zxōn cuínguequi pero rácalenē' nupa nácagaca nōxaj ladxi'.

6 Guli'sóa nōxaj ladxi' lu nē'ē Dios, ate' Lē' uchisē' libí'ili' cate' izá'a dza.

⁷ Guli'cú'u yúgu'të le run ga ruúbi ruguí'ili' lu në'ë Dios, tu' ruí'i ládxe'ë libí'ili'.

⁸ Guli'gaca ba'a ladxi', en buli'subán ládxi'li', tu' zoa tu' xihui', nu bití' rilé'e libí'ili' dxi'a, ridá idú gásibi'ilö, en naca ca tuba' bëdxi guixi' ribödxi'aba', riguiljba' nu gáguba'.

⁹ Guli'gaca tsutsu ca réajlë'ëli' Cristo, en guli'zága' xinöza tu' xihui', tu' nözili' ta'guí'i ta'záquë'ë böchi' luzá'ali' idútë yödzölió ni ca na' riguí'i rizáca'li' libí'ili'.

¹⁰ Ní'irö cate' chigudí'i guxzáca'li' tu chí'isö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxe'ë queëru' yúgu'të le ruzí'iru' xibé, en bulidzë' rë'u para uzí'iru' xibé yöl-la' zxön queë' le zóatica'sö tu' nácaru' tuz len Jesucristo.

¹¹ ¡Gácatíca'sö yöl-la' ba, en yöl-la' unná bë' queë' Lë'! ¡Ca' gaca!

Pedro ruzenë' didza' nupa ta'dá' Cristo

¹² Dídza'do' ni ruzúaja' queëli' lu guichi lu në'ë Silvano. Réquida' náquië' böchi'ru' idú ladxi'. Rë'ënda' utipa' ládxi'li', en runa' ba nalí loli', le nácatë lë ni naca le ruzá' ládxe'ë queëru' Dios. ¡Guli'gaca tsutsu tu' ruzí'ili' xibé lë ni!

¹³ Yugu' bönachi queë' Cristo nacua' Babilonia tu'gapa Dios libí'ili'. Dios gurö cazë' léguequi ca na' guröë' libí'ili'. Lësca' bi'i Marcos rugápabi' Dios libí'ili'. Nácabi' ca zxí'ini caza'.

¹⁴ Guli'gapa Dios luzá'ali' tuli' ia'tuli', en lu yöl-la' nadxí'i queëli' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'tëli' na' néquili' queë' Jesucristo. ¡Ca' gaca!

DÍDZA 'DO' BUROPI BUZÚAJĚ' PEDRO

Pedro rugapě' Dios nupa ta'dá' Cristo

¹ Neda', Simón Pedro, naca' huen dxin queě' Jesucristo, en gubáz nasöl-lě'ě Lě'. Rugapa' Dios libí'ili', réajlě'ěli'-ně' Jesús. Lěbisö ca nazáca'gaca yöl-la' réajlě' queěli' Lě', en yöl-la' réajlě' queětu' Lě'. Dios beně' ga réajlě'ěli' Lě' tu' naca cazě' tsahui', en tu' náquiě' ca' Xanru' Jesucristo, Nu na' rusölá rě'u, tsahui'.

² Rinábida'-ně' Dios guně' ga gata' queěli' idútě le ruzá' lădxě'ě queěru', en guně' ga soa dxi icja lădxi'do'oli' tu' núnbě'ěli'-ně' Dios, enca' Xanru' Jesús.

Le năcagaca nupa ta'yéajlě' Cristo

³ Lu yöl-la' huáca zxön queě', Dios chibenně' queěru' yúgu'tě le riquíniru' para gata' queěru' yöl-la' na'bán idú, en para gácaru' ba'a ladxi', tu' núnbě'ěru' Nu na' bulidza rě'u para gata' queěru' yöl-la' zxön queě', en le naca tsahui' queě'.

⁴ Tu' runě' caní, beně' ga gaca uzí'iru' xibé yugu' le zxön, en le naca tsahui' guzxí' lu ně'ě gunně' queěru', ate' tu' naca caní nuláru' lu le ruá' dō' raca yōdzōlió ni tu' ta'zě lădxi'gaca bōnachi le cabí naca tsahui'. Nuláru' para gácaru' ca náquiě' Lě cazě' Dios.

⁵ Que lě ni na':

Channö réajlě'ěli' Cristo,

guli'gü' lădxi'li' gácali' dxi'i ladxi'.

Channö chinácali' dxi'i ladxi',

guli'gü' lădxi'li' gata' ca' queěli' yöl-la' rácada'.

⁶ Channö nápalí' yöl-la' rácada',

guli'gü' lădxi'li' inná be'e cuinli'.

Channö rinná be'e cuinli',

guli'cōza zxön ladxi'.

Channö ribōzali' zxön ladxi',

guli'sóa ba'a ladxi'.

⁷ Channö zóali' ba'a ladxi',

guli'dxí'i luzá'ali'.

Channö nădxí'ili' luzá'ali',

guli'dxí'i ca' yúgu'tě bōnachi.

⁸ Channö caní runli', en zeaj rácarō idú ca runli' caní, lě ni gun ga bití' gaca nítisö yöl-la' réajlě' queěli' Lě', ate' tseaj gácarō idú ca núnbě'ěli'-ně' Xanru' Jesucristo.

⁹ Nu bōnni' bití' ruí' lădxě'ě guně' caní, náquiě' ca tu bōnni' nachul-la nanítiě', tu' chizá' ral-la lădxě'ě buně' Cristo lě' tsahui', en bugúě' yugu' dul-la' gubáguě'ě zí'atělō.

10 Que lë ni na', böchi' luzá'ado', ral-la' güi'terö ládxi'li' guéquibe'eli' bulidzë' Dios libí'ili', en guró cazë' libí'ili'. Channö gunli' caní, bití' ca' ichixi iníguili'.

11 Caní gaca, idú ládxe'ë Dios gúnнасë' queëli' lataj tsázali' ga inná bë'tica'së' Xanru' Jesucristo, Nu rusölá rë'u.

12 Que lë ni na' gúntica'sa' ga tsöjnéli' yugu' lë ni sal-la' chinöz quézili' le, en rugunli' dxin le naca idútë li na' chiguzxí' lu ná'ali'.

13 Runi neda' ral-la' usubana' ládxi'li' ca náca gaca lë ni tsanni ni zoa' nabana'.

14 Ral-la' guna' caní tu' nözda' si' gátia'. Xanru' Jesucristo chigudxi cazë' neda' gaca caní quia'.

15 Que lë ni na' ruí'ida' ládxa'a guna' ga tsöjnética'sili' yugu' lë ni tödi gátia'.

Nupa bila'lé'e yöl-la' zxön queë' Cristo

16 Bití' bë'lentu' libí'ili' tu didza' ridasö lu yöl-la' sina' queëtu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'.

17 Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyön chi'ë Dios, le birúaj lataj bení' queë', cate' gunné': "Bönni' ni náquië' Zxí'ina'. Nadxí'ida' Lë', en raza ládxa'a Lë'."

18 Netu' biyön quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

19 Lë na' guca, naca bë'da' zeaj nácatë didza' gulu'ë yugu' bönni' uláz queë' Dios, ate' ral-la' güi'i ládxi'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca bölj hui sila queëru'.

20 Lë ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bë'ë tu bönni' uláz queë' Dios.

21 Yugu' didza' gulu'ë yugu' bönni' uláz queë' Dios bití' ca' gulu'ë tu' gulë'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxi'do'gaquië'.

2

Ca náca gaca nupa tu'sédinë' le cabí nácatë

1 Yugu' bönni' ta'zí' yë'ë gula'cuá'lenë' bönachi Israel, en gula'nnë' náca gacquië' bönni' tu'ë didza' uláz queë' Dios. Lë'sca' caní yugu' bönni' ila'zí' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queëli' ucá'anali' le naca idútë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'.

² Zianli' libí'ili' gunli' légaquië' tsözxón lu le ruá' dö' ilunë', ate' tu' gunli' bál-lali' caní' ila'nnë xihui' bönachi que didza' dxi'a le naca idütë li.

³ Lu yöl-la' ruhuidi' quégaquië' ulu'sédinë' libí'ili' le cabí' nácate, para gata' quégaquië' dumí' queëli'. Chinarugu quégaquië' bönni' ni, ate' naca löza ila'nítië' tsaz.

⁴ Dios biti' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiüdxë' Dios légaquië'.

⁵ Lësca' caní, biti' buniti lahuë' bönachi gula'cuá' dza ni'te cate' gusöl-lë'ë nisa guiøj le busuniti yödžölió le beti bönachi nácagaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queë' Noé na' lu nisa.

⁶ Lësca' caní, Dios guchúguië' quégaca bönachi gula'cuá' yödžö Sodoma, en yödžö Gomorra. Busunítië' léguequi lu guí', ate' bulu'huóaca dö. Le guca quéguequi naca tu le ruluí'i le run gadxi nupa tua' dö'.

⁷ Cate' busunítië' yugu' yödžö na', Dios busölë' Lot, tu bönni' tsahui', lu guí' na'. Buí'inida' ládxë'ë Lot cate' bilé'enë' le xihui' gulún bönachi tuá' dö' na'.

⁸ Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxë'ë yúgu'të dza ni'a que yugu' le cabí naca tsahui' gulúngaca.

⁹ Caní naca, Xanru' nözinë' usölë' nupa na' tadxi Lë' lu na' nu run ga tsázagaca bönachi nöza dul-la', pero nucözë' xíguia' gunë' nupa biti' nácagaca tsahui' ga idxinrö dza ichúguië' quéguequi ila'niti tsaz.

¹⁰ Ichúguda'arö quégaquië' bönni' ni tunë' yugu' le ta'zë ládxë'ë le ruá' dö', en ta'dá'baguië' yöl-la' unná bë' queë' Xanru'. Nácagaquië' rugu ladxi', en zidi ladxi'. Biti' tádxinë' tu'lidza ditjë' gubáz lá'ayi ta'dë' lu bení'.

¹¹ Gubáz lá'ayi na' nápagacatëre' yöl-la' unná bë', en yöl-la' huáca ca yugu' bönni' na', pero gubáz lá'ayi na' biti' tu'huázxjanë' nu ulu'zéguië' didza' lahuë' Xanru'.

¹² Yugu' bönni' ni nácagaquië' ca böa' guixi', biti' bi ta'yéajni'iba', pero náljagacaba' para nu sön légacaba', en guti légacaba'. Ta'nnë xihue'ë que le cabí ta'yéajni'inë', ate' ila'nítië' tsaz ca raca quégacaba' böa' guixi' na'.

¹³ Dios ubi'ë quégaquië' le ila'guí' ila'záquë'ë, tu' bulu'saca' zi'ë bönachi. Téquinë' naca xibágaquië' tu'zi'ë xibé le raca na'a dza. Nácagaquië' ca tu huë' nudzu', en tu le run ditaj cate'

ni' tahuë' tsözxön len libí'ili', ate' tu'dzéjanë' tu' ta'zí' yé'enë' libí'ili'.

14 Lu yöl-la' rizë ladxi' quégaquië' le ruá' dö' tu'yüë'-nu yugu' nigula. Biti' nacu'ë dxisö túngaquië' dul-la'. Túngaquië' ga ta'chixi ta'nigui nupa biti' nácagaca tsutsu ca ta'yéajlë' Cristo. Ta'guílatica'së' yugu' le tu'huídi'në'. Dios chin-uchúguië' quégaquië' ilátigaquië'.

15 Bulu'cá'anë' le naca idútë li, ate' nachul-la nanítigaquië'. Tunë' ca benë' Balaam, xzí'inë' Beor, bönni' ni' bidxí'inë' dumí, ate' benë' le ruá' dö' tu' nazxjë'.

16 Dios buzenë' le bach Balaam na' tu' benë' le ruá' dö' na'. Tuba' búrrodo' bé'lenba' lë' didza' ca na' tu'í didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'baga' queë'.

17 Nácagaquië' bönni' ni ca tu buduá' chibuí'i nisa que, enca' ca tu böaj le richë' bö' budunu'. Chinabá'a xilátjagaquië' lataj chul-la.

18 Caní nácagaquië' tu' tu'ë didza' yugu' le zxön lu yöl-la' biti' bi nözi quégaquië', en tu'gunë' dxin yugu' le ta'zë ládxi'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti.

19 Të' bönachi ila'deli' yöl-la' rusölá, pero légaca cazë' nadzúngaquië', en tunë' bayudxi le ruá' dö'. Nadzúngaquië' yúgu'të bönni' lu na' bi rinná be'e icja ládxi'do'gaquië'.

20 Channö bulu'lë' lu le cabí naca tsahui' nacuá' yödzölió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatërë' xíguia' ga röjsetë ca le gula'báguë'ë zí'aló.

21 Dxí'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'.

22 Chibudxín quégaquië' didza' na' rnna:
Ruhuécjaba' bö'cu', ruhuöáguba' le si' gúbaba'.
Ruyázaba' cuchi na' si' gudíbiru'-ba' lu guna'.

3

Naca löza huödë' Xanru'

1 Didza' ni naca le buropi ruzúaja' queëli' lu guichi, böchi' luzá'ado'. Lu irópatë guichi na' ruí'i ládxa'a usubana' ládxi'li' ca nácagaca lë ni.

2 Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasöl-lë'ë Lë' libí'ili'.

³ Ral-la' tsöjnéli' lë ni naca lo. Dza tsöjsétëgaca ulu'lu'i lahuë' bönni' ilunë' le ta'zë lãdxë'ë le ruá' dö'.

⁴ Ulu'titjë', ila'nnë': "¿Gazxi caz lë na' guzxi' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yúgu'të raca tuz ca guca cate' gusí lo rata' yödzölió ga ridxintë na'a dza."

⁵ Tu'zöë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa.

⁶ Len nisa ca' busunítië' Dios yödzölió dza ni'te cate' ni' gusöl-lë'ë nisa guiöj le beti yugu' bönachi dul-la'.

⁷ Lúzxiba, en yödzölió ni le nacué' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégui'ë léguequi dza ni' ichúguië' quégaca bönachi biti' nácgaca tsahui' gátigaca.

⁸ Biti' gal-la lãdxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácgaca queë' ca tu dza.

⁹ Biti' ridzenë' Xanru' gunë' le guzxi' lu në'ë gunë'. Téquiguequi bal-la bönachi ridzenë', pero ribözë' zxön ladxi', en ruá' rilenë' rë'u tu' cabí rë'ënë' initi nitú bönachi, pero rë'ënë' ulu'bí'i lãdxi'gaca yúgu'të bönachi.

¹⁰ Tsárido'os idxín dza huödë' Xanru' ca ridxinë' tu bönni' gubán chi'i dzó'ölö. Lu dza na' huadödi que lúzxiba len tu bö zxön. Ila'niti yúgu'të le nacué' lu guí' zxön. Ila'yegui yödzölió ni, en le nacué' yödzölió ni.

¹¹ Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios.

¹² Ral-la' cözali' dza huödë' Xanru', en guí'i lãdxi'li' gunli' ga idxinrö bayön dza ni' cate' initi lúzxiba, ate' ila'niti yúgu'të le nacué' ni lu guí'.

¹³ Caní gaca, pero rë'u ribözaru' le guzxi' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lë ni na', böchi' luzá'ado', tsanni ni ribözali' yugu' lë ni, guli'güi' lãdxi'li' gácali' idú tsahui' lahuë' Dios, ate' gunli' ga cuntu nu bi gaca innë queëli', en cözali' dxí'ado' cate' idxinrö dza ni'.

¹⁵ Ral-la' inözili' ribözë' Dios zxön ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queëli' lu guichi, zóalen lë' yöl-la' réajni'i na' bëë Xanru' queë'.

¹⁶ Yúgu'të lu guichi ruzúajë', ru'ë didza' ca nácgaca lë ni, sal-la' nútsa'gaca ca' léguequi yugu' didza' nácgaca böniga tséajni'iru'. Yugu' didza' caní tu'chíxinë' bönni' biti' nözguequinë', en bönni' biti' naca idú lãdxi'gaquië'. Lësca'

caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinöz quézili' lë ni, böchi' luzá'ado'. Que lë ni na' guli'gún chi'i cuinli', para cabí ila'zí' ye'e bönachi biti' náca gaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo.

¹⁸ Guli'güí' ládxi'li' gácarö idú ca núnbë'ëli'-në' Xanru' Jesu-cristo, Nu rusölá rë'u, ate' ruzí'ili' xibë'. ¡Yöl-la' ba Lë' na'a dza, en yúgu'të dza zá'gaca! ¡Ca' gaca!

DÍDZA'DO' ZÍ'ALÖ BUZÚAJĚ' JUAN

Didza' nabániru'

¹ Rusiyöntu' libí'ili' ca naca queë' Bönni' na' zoa cazë' dza ni'te, le biyöñitu' bë'ë didza', en le bilé'etu' ca naca queë', en le buyutu' benë' Bönni' na'. Gudantu' Lë'. Bönni' ni náquië' Jesús, lë' ca' Didza' Nabánigaca Bönachi.

² Bönni' na' nabánigaca bönachi buluí'i lahuë', ate' bilé'etu' Lë'. Runtu' ba nalí queë', en ruluí'itu' libí'ili' ca naca queë' Bönni' na' nabániru'. Bönni' ni guzóalenë' Dios Xuz, en chibuduluí'i lahuë' ga zóaru'.

³ Le bilé'etu', en le biyöñitu' rusiyöntu' libí'ili' para gácali' ca' libí'ili' tuz len netu'. Le nácatë naca yöl-la' tuz queëru' len Dios Xuz, enca' len Jesucristo Zxí'inë' Dios.

⁴ Ruzúajtu' queëli' lu guichi lë ni para gaca udzëjaru' idú ládxi'ru'.

Dios náquië' bení'

⁵ Lë ni naca didza' biyöñitu' bë'lenë' Jesús netu', ate' le rusiyöntu' libí'ili'. Caní rna: Dios náquië' bení', ate' nitú le naca chul-la que dul-la' biti' zóalen Lë'.

⁶ Channö innaru': "Nácaru' tuz len Dios", pero channö runru' le naca chul-la que dul-la', lë ni naca bë' rizí' yë'ëru', en biti' runru' le naca idütë li.

⁷ Na'a, channö runru' le naca tsahui', en ridaru' lu bení' ca na' Lë' náquië' tsahui', en zoë' lu bení', nácaru' tuz turu' len ia'turu', ate' xichönë' Jesucristo, Zxí'inë' Dios ruún rë'u dxi'a, en rugúa yúgu'të dul-la' nabága'ru'.

⁸ Channö rnnaru': "Biti' bi dul-la' runru'", rizí' yë'ëru' la' cuínsiru', en biti' nazi' lu ná'aru' le naca idütë li.

⁹ Channö ixóalëpiru' lahuë' Dios dul-la' nabága'ru', Lë' runë' ca rnnë', en náquië' tsahui'. Uniti lahuë' dul-la' nabága'ru', en únë' rë'u tsahui', ugüë' yúgu'të le ruá' dö' dzaga rë'u.

¹⁰ Channö innaru': "Biti' bi dul-la' nabága'ru'", naca ca innaru': "Dios rizí' yë'ë", ate' biti' runru' ca rna xtídzë'ë.

2

Cristo náquië' Nu rudödi xtídzaru' lahuë' Dios

¹ Libí'ili', zxí'ina'do', ruzúaja' queëli' lu guichi lë ni, para cabí gunli' dul-la'. Na'a, channö nútí'tës nu gun dul-la', zoa nu rudödi xtídzaru' lahuë' Dios Xuz, Lë' Jesucristo, Nu naca tsahui'.

² Naca cazë' Bönni' budödi cuinë', en gútië' para bugúë' dul-la' nabága'ru' lahuë' Dios. Calëgasö gútië' para bugúë' dul-la'

nabága'ru' rē'u, pero gútiē' ca' para bugúē' dul-la' nabága'gaca bönachi idútē yödzölió.

³ Channö runru' ca naca le gunná bé'enē' rē'u, nöziru' chinúnbē'ēru' Lē'.

⁴ Nu rnna: "Neda' núnbē'a-nē' Dios" pero biti' run ca rinná bē' xibá queē', nu ni rizi' yē', en biti' run le naca idútē li.

⁵ Nu run ca rnna xtídzē'ē Dios, le nácatē nadxí'i nu ni Dios ca ral-la' gun. Channö runru' caní, nöziru' néquiru' queē' Dios.

⁶ Lē'sca' caní, nu rnna: "Neda' néquida' queē' Cristo", ral-la' gaca nu na' ca na' gúquiē' Cristo cate' gudē' yödzölió ni.

Tu xibá cubi

⁷ Böchi' luzá'ado', ruzúaja' queéli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyönili' dza ni'te.

⁸ Lē'sca' naca ca ruzúaja' queéli' lu guichi tu xibá cubi, lē na' le nácatē benē' Jesús ca rnna, ate' runli' ca' libí'ili' ca rnna, tu' chiridödi que le naca chul-la' que dul-la', ate' bení' idú chiruzení'.

⁹ Nu rnna: "Zoa' lu bení'", pero biti' rilé'e dxi'a böchi' luzé'e, nu ni ni run le naca chul-la' que dul-la'.

¹⁰ Nu nadxí'i böchi' luzé'e zoa lu bení', ate' le run ga nu ichixi inigui biti' zóalen nu na'.

¹¹ Le naca chul-la' que dul-la' run ga nu biti' rilé'e dxi'a böchi' luzé'e, en ga ridá nu na' ga chul-la. Biti' nözi ga zeaj, tu' run le naca chul-la na' ga nachul-la naniti nu na'.

¹² Ruzúaja' queéli' lu guichi, zxí'ina'do', tu' chibunít lahuē' Dios dul-la' nabága'li', tu' runē' le guzxí' lu nē'ē gunē'.

¹³ Ruzúaja' queéli' lu guichi, libí'ili' nácali' xuz, tu' núnbē'ēli' Nu na' zoa caz dza ni'te. Ruzúaja' queéli' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queéli' lu guichi, zxí'ina'do', tu' núnbē'ēli'-nē' Dios Xuz. Chibuzúaja' queéli' lu guichi, libí'ili' nácali' xuz, tu' núnbē'ēli' Nu na' zoa caz dza ni'te. Chibuzúaja' queéli' lu guichi, bi'i ra'bán, tu' nácali' bi'i nál-la, en nazí' lu ná'ali' xtídzē'ē Dios, en chibucúl-lali' tu' xihui'.

¹⁵ Biti' idxí'sili' yödzölió ni, en calēga le dē yödzölió ni. Channö zoa nu nadxí'i yödzölió, biti' nadxí'i Dios Xuz.

¹⁶ Caní naca, tu' naca le tun bönachi yödzölió ni le cabí rē'ēnē' Dios Xuz, pero naca le té'ēni bönachi yödzölió ni.

Tunē' le riyaza ladxi' yöl-la' bönáchisö quégaquiē'.

Tunē' le ruá' dö' le ridani guiöj lógaquiē'.

Tun ba zxön cuíngaquiē' ni'a que le dē quégaquiē'.

Caní nácgaca le ruá' dö' tunē'.

¹⁷ Huadödi que yödzölió ni, enca' que le ta'zē ladxí'gaca bönachi, pero nu run ca rē'ēnē' Dios sóatica'sö.

Nu ruí'í didza' idútë li, en nu rizi' yë'

¹⁸ Zxí'ina'do', chizóaru' dza údxi, en ca na' chibiyónili' huidë' bönni' ridá'báguë'ë Cristo, lësca' na'a chigusí lo nacu'ë zían bönni' ta'dá'baguë'ë Cristo. Que lë ni na' nöziru' chizóaru' dza údxi.

¹⁹ Bila'rúajë' bönni' caní ládjaru', pero biti' guláquië' tuz len rë'u. La'tu' guláquië' tuz len rë'u, ila'cuá'lentica'së' rë'u. Na'a, bila'rúajë' para gaca bë' biti' nácagaquië' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen libí'ili', ate' nöz quézili' yúgu'të.

²¹ Buzúaja' queéli' lu guichi, tu' chinözili' le naca idútë li, en calëga tu' cabí nözili' le. Nözili' ca' biti' ca' rizi' yë' nu nözi le naca idútë li.

²² ¿Nuzxi caz na' nu rizi' yë'? ¿Naru' cabí naca nu na' ridá'baga' náquië' Jesús Nu gusól-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Zxí'inë' Dios.

²³ Núti'tës nu ridá'baga' Dios Zxí'ini, biti' ca' zóalenë' Dios Xuz nu na'. Núti'tës nu rnna yálajdo' Jesús náquië' Zxí'inë' Dios, lësca' zóalenë' Dios Xuz nu na'.

²⁴ Na'a, guli'güi' lataj le biyónili' dza ni'te ugá'analentica'sö libí'ili'. Channö le biyónili' dza ni'te ugá'analentica'sö libí'ili', lësca' libí'ili' ugá'analentica'sili'-në' Dios Zxí'ini, enca' len Dios Xuz.

²⁵ Le guxzí' lu në'ë Dios naca lë ni: Gunnë' gunnë' yöl-la' na'bán idú queëru'.

²⁶ Chibuzúaja' queéli' lu guichi lë ni ca naca quégaca nupa ta'zì' ye'e libí'ili'.

²⁷ Na'a, zóalenë' Dios Bö' Lá'ayi libí'ili'. Cristo gusól-lë'ë Lë' queéli', ate' Lë' cazë' zóalentica'së' libí'ili'. Que lë ni na' biti' riquínili' nu usedi libí'ili', tu' chizóalen Nu na' libí'ili', en rusedi libí'ili'. Didza' idútë li ru'ë Lë', en biti' rizi' yë'ë. Ca na' chinazédali', guli'sóalentica'së' Cristo.

²⁸ Na'a, zxí'ina'do', guli'sóalentica'së' Cristo para cate' uluí' lahuë' Lë', gácaru' rugu ladxì', en biti' utuí'iru' sóaru' lahuë' Lë' cate' huödë'.

²⁹ Channö nözili' náquië' Dios tsahui', ral-la' inözili' ca' yúgu'të nupa tun le naca tsahui' nácagaca zxí'inë' Dios.

3

Nupa nácagaca zxí'inë' Dios

¹ Buli'yú ca nadxí'ide'enë' Dios Xuz rë'u, benë' ga nazí'ilaru' zxí'inë' Dios caz. Que lë ni na' bönachi yödzölió ni biti' ca' núnbë'gaca le nácaru', tu' cabí gulúnbe'e Jesús.

² Böchi' luzá'ado', na'a chinácaru' zxi'iné' Dios, en biti' naca bé'eni le ral-la' gácaru'. Nöziru' cate' ulu'i lahuë' Jesús, gácaru' ca náquië' Lë', ate' ilé'eru'-në' catëz náquië' Lë'.

³ Núti'tës nu run löza gaca ca náquië' Jesús, ru'i ladxi' nu na' gaca dxi'a ca na' náquië' Jesús dxi'a.

⁴ Núti'tës nu run dul-la' riguitsaj xibá queë' Dios, tu' naca dul-la' le riguitsaj xibá.

⁵ Nözili' bulu'i lahuë' Jesús para bugüë' dul-la' nabága'ru', en biti' bi dul-la' runë' Lë'.

⁶ Núti'tës nu dzaga Lë' biti' run dul-la'. Núti'tës nu run dul-la' catu caz bilé'e Jesús, en biti' núnbe'e Lë'.

⁷ Zxi'ina'do', guli'gún chi'i cuinli' para cabí nu si' ye'e libí'ili'. Nu run le naca tsahui', naca tsahui' nu na' ca na' náquië' Jesús tsahui'.

⁸ Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lë ni na' budulu'i lahuë' Zxi'iné' Dios, para usunítië' yugu' le nun tu' xihui'.

⁹ Núti'tës nu naca zxi'iné' Dios biti' rúntica'sö dul-la', tu' zóaléntica'sö le guzxi' lu në'ë Dios Xuz nu na'.

¹⁰ Caní naca bë' nupa náragaca zxi'iné' Dios, en nupa náragaca zxi'ini tu' xihui'. Núti'tës nu biti' run le naca tsahui', en biti' nadxi'i böchi' luzë'e biti' nequi queë' Dios.

Ral-la' idxí'iru' yugu' böchi'ru' ta'yéajlë'ë Cristo

¹¹ Lë ni naca didza' biyónili' dza ni'te, le rnna: Ral-la' idxí'iru' luzá'aru' turu' ia'turu'.

¹² Biti' ral-la' gunru' ca na' benë' Caín. Gúquië' Caín que tu' xihui', ate' bëtië'-bi' bi'i böchë'ë. ¿Bizx que bëtië'-bi' bi'i böchë'ë? Bëtië'-bi' tu' gulaca le benë' Caín na' le ruá' dö', pero le benbi' bi'i böchë'ë, gulaca tsahui'.

¹³ Böcha'ado', biti' ubánili' channö cabí ta'lé'e bönachi yödzölió ni libí'ili' dxi'a.

¹⁴ Nöziru' chigudödiru' lu yöl-la' guti, en chidë yöl-la' na'bán idú queëru' tu' nadxi'iru' yugu' böchi'ru'. Nu biti' nadxi'i böchi' luzë'e, chinati caz nu na'.

¹⁵ Núti'tës nu biti' rilé'e dxi'a böchi' luzë'e, naca huëti bönachi nu na', ate' nözili' nu ruti bönachi biti' dë yöl-la' na'bán idú que.

¹⁶ Caní núnbë'ëru' yöl-la' nadxi'i le naca idú. Naca ca budödë' Jesús yöl-la' na'bán queë', en gútië' uláz queëru'. Lësca' caní rë'u ral-la' udödiru' yöl-la' na'bán queëru', para gácalenru' yugu' böchi'ru'.

¹⁷ Na'a, núti'tës nu dë yöl-la' tsahui' que, lë na' dë yödzölió ni, ate' rilé'e böchi' luzë'e, bi riyadzaj queë', en biti' ruhuéchi' ladxi' lë', bi unödzej queë', ¿naru' nadxi'itsö nu na' Dios?

¹⁸ Libí'ili', zxi'ina'do', ral-la' idxí'iru' luzá'aru', calëga len dídza'sö o lu yöl-la' rinnësö queëru', pero idú ládxi'ru', enca' len idütë yöl-la' run queëru' ral-la' idxí'iru' luzá'aru'.

Le runru' löza lahuë' Dios

19-20 Channö caní nadxí'iru' yugu' böchi' luzá'aru', nöziru' néquiru' que Nu na' naca idútë li, ate' lahuë' Dios huáca cö' dxi icja ládxi'do'oru' channö ruxösa ládxi'do'oru' rë'u, tu' rácada'arë' Dios ca ládxi'do'oru', ate' Lë' nözinë' yúgu'të.

21 Böchi' luzá'ado', channö cabí ruxösa ládxi'do'oru' rë'u, de le runru' löza lahuë' Dios

22 tu' nöziru' gunnë' queëru' bititës bi inábaru' lahuë'. Caní naca, tu' runru' ca rinná bë' xibá queë', en le raza ládxi'ë Lë'.

23 Lë ni naca xibá queë', para tséajlë'ëru'-në' Jesucristo, Zxí'inë' Dios, en idxí'iru' luzá'aru' ca na' chigunná bé'enë' rë'u.

24 Zóalen Dios nu run ca rinná bë' xibá queë', ate' Dios caz zóalenë' nu na'. Caní nöziru' dzágatica'së' Lë' rë'u, tu' chigusöl-lë'ë Dios Bö' Lá'ayi queëru'.

4*Le naca bë' zóalenë' Dios Bö' Lá'ayi rë'u*

1 Böchi' luzá'ado', bitit' tséajlë'ëli' nútitës bönni' rnnë' zóalenë' Dios Bö' Lá'ayi lë', pero guli'sí' bë' bönni' na', channö zóalenë' Dios Bö' Lá'ayi lë', tu' ta'dë' zían bönni' ta'zí' yë'ë yödzölió ni. Ta'nnë' tu'ë didza' uláz queë' Dios.

2 Caní gúnbë'ëli'-në' nu bönni' zóalenë' Dios Bö' Lá'ayi lë'. Nequi queë' Dios bönni' na' rnnë' yálajdo' ca bidë' Jesucristo, Nu gusöl-lë'ë Dios, rnnë' guca cazë' bönachi.

3 Lë'sca' caní, bitit' nequi queë' Dios nu bönni' bitit' rnnë' yalaj lulu ca bidë' Jesucristo, rnnë' bitit' guca cazë' bönachi. Bönni' ni néquinë' que nu na' ridá'baga' Cristo, bönni' na' chibiyönili' ral-la' guidë', ate' na'a chiridë' yödzölió ni.

4 Zxí'ina'do', néquili' queë' Dios, en chibucúl-lali' nupa na' ta'zí' yë', tu' náparö Nu na' zóalen libí'ili' yöl-la' huáca unná bë' ca nu na' ridá yödzölió ni.

5 Légaquië' nácagaquië' bönachi yödzölió. Que lë ni na' tu'ë didza' que le naca que yödzölió, ate' bönachi yödzölió ni tu'zë nágagaca légaquië'.

6 Néquiru' rë'u queë' Dios. Nu nunbë' Dios ruzë nagui rë'u. Nu bitit' nequi queë' Dios bitit' ruzë nagui rë'u. Caní núnbe'ëru' nu na' yu'u le Bö' ruí' didza' le naca idútë li, enca' nu na' yu'u le tu bö' rizi' yë'.

Náljalén Dios yöl-la' nadxí'i

7 Böchi' luzá'ado', ral-la' idxí'iru' luzá'aru', tu' náljalén Dios yöl-la' nadxí'i, ate' nútitës nu nadxí'i luzë'e náljalén ca' Dios, en núnbe'e Dios.

8 Nu bitit' nadxí'i luzë'e, bitit' núnbe'e Dios, tu' náljalén Dios yöl-la' nadxí'i.

⁹ Caní bulu'e lahui Dios ca nadxí'inè' rē'u, gusöl-lë'ë la's dui Zxí'ini cazē' yōdzōlió ni, para gata' yōl-la' na'bán idú queēru' ni'a queē' Lē'.

¹⁰ Caní naca bē' yōl-la' nadxí'i idú, calēga ca nadxí'iru'-nē' Dios, pero ca na' Lē' bidxí'inè' rē'u, en gusöl-lë'ë Zxí'ini cazē' para gútiē', en caní bugúē' dul-la' nabága'ru'.

¹¹ Böchi' luzá'ado', channō caní bidxí'ide'enē' Dios rē'u, lē'sca' rē'u ral-la' idxí'iru' luzá'aru'.

¹² Catu caz nu bilé'e Dios, pero channō nadxí'iru' luzá'aru', Dios zóalenē' rē'u, ate' naca bē' nadxí'iru'-nē' Dios idú lādxi'ru'.

¹³ Nōziru' zóalenru'-nē' Dios, ate' Lē' zóalenē' rē'u, tu' guchíziē' Dios Bö' Lá'ayi rē'u.

¹⁴ Netu' bilé'etu' le benē' Dios Xuz, en runtu' ba nalí que. Lē' gusöl-lë'ë Zxí'ini cazē' Nu rusölá bōnachi yōdzōlió.

¹⁵ Nu bōnni' rnnē' yálajdo' náquiē' Jesús Zxí'inē' Dios, Dios zóalen cazē' bōnni' na', ate' lē' zóalenē' Dios.

¹⁶ Rē'u ni nōziru', en réajlë'ēru' nadxí'inē' Dios rē'u. Yōl-la' nadxí'i náljalēn Dios, ate' nu bōnni' nadxí'inē' luzē'ë, zóalenē' bōnni' na' Dios, ate' Dios zóalenē' lē'.

¹⁷ Caní run dxin yōl-la' nadxí'i lu icja lādxi'do'oru', run ga bítirō rádxiru' dza ichúguiē' Dios quégaca bōnachi ilátigaca. Ca náquiē' Jesús, nácaru' ca' rē'u yōdzōlió ni.

¹⁸ Channō nadxí'iru'-nē' Dios, biti' bi gádxiru'. Cate' nadxí'iru'-nē' Dios idú lādxi'ru', runē' ga biti' rádxiru'. Nu radxi, rigu'i rizáca'a. Nu na' radxi, biti' nadxí'i Dios idú lādxi'.

¹⁹ Rē'u ni nadxí'iru'-nē' Dios, tu' z'älö bidxí'i quézinē' Lē' rē'u.

²⁰ Channō nu inná: "Neda' nadxí'ida'-nē' Dios", pero biti' rilé'e dxi'a böchi' luzē'e, nu ni rizi' yē'. Nu biti' nadxí'i böchi' luzē'e nu rilé'e caz, ¿nacxi caz gaca idxí'i Dios, en catu caz bilé'e Lē'?

²¹ Caní gunná bé'enē' Jesús rē'u. Gunné': Nu nadxí'i Dios, ral-la' idxí'i ca' böchi' luzē'e.

5

Ca gaca idéli'ru' lu le raca queēru' yōdzōlió ni

¹ Núti'tēs bōnni' réajlë'ë Jesús náquiē' Cristo, náquiē' zxí'inē' Dios, ate' núti'tēs bōnni' nadxí'inē' Dios Nu buzóa lē', ral-la' idxí'inē' ca' luzē'ë nu naca bi'i queē' Dios.

² Caní réquibe'eru' nadxí'iru' yugu' bi'i queē' Dios. Naca caní channō nadxí'iru'-nē' Dios, en runru' ca rinná bé'enē' rē'u.

³ Caní naca bē' nadxí'iru'-nē' Dios. Naca caní channō runru' ca rinná bé'enē' rē'u, ate' lē' na' rinná bé'enē' rē'u biti' naca bōniga.

⁴ Núti'tës bönni' náquië' bi'i queë' Dios ridéli'në' lu le raca yödölió ni. Chibidéli'ru' lu le raca yödölió tu' réajlë'ëru'-në' Dios.

⁵ ¿Nuzxi na' rideli' lu le raca yödölió? Run caní nu réajlë' náquië' Jesús Zxí'inë' Dios.

Dios Bö' Lá'ayi runë' ba nalí queë' Cristo

⁶ Caníblë'ë Jesucristo. Bidë'bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idútë li didza' ru'ë Dios Bö' Lá'ayi.

⁷ Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonnë' ni nácaquië' tuz.

⁸ Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná.

⁹ Channö si' lu ná'aru' le tun ba nalí bönachi, le runë' ba nalí Dios nácatërö lesaca'. Lë na' benë' ba nalí Dios naca le benë' ba nalí queë' Jesús, gunné' náquië' Zxí'ini cazë'.

¹⁰ Nu réajlë' Zxí'inë' Dios, nazí lu në'e le nunë' ba nalí Dios. Nu cabí réajlë' Dios, naca ca rna nu na': Dios rizí yë'ë. Caní naca, tu' cabí guyéajlë' le benë' ba nalí Dios queë' Zxí'inë'.

¹¹ Lë ni naca le benë' ba nalí Dios. Gunnë' chibennë' yöl-la' na'bán idú queëru', ate' Zxí'inë' na' náquië' Nu nabániru' caní.

¹² Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' biti' zóalenë' Zxí'inë' Dios lë', biti' dë yöl-la' na'bán idú queë'.

Ca nöziru' dë yöl-la' na'bán idú queëru'

¹³ Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inözili' chidë yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

¹⁴ Lë ni naca le ruzxöni ládxi'ru' Lë'. Channö bi inábiru' Lë' ca ré'ënë' Lë', Lë' riyönnë' rë'u.

¹⁵ Channö nöziru' riyönnë' rë'u ca naca bi rinábiru' Lë', nöziru' ca' ideli' quéziru' lë na' rinábaru'.

¹⁶ Channö ilë'eru' böchi' luzá'aru' runë' dul-la' le cabí nachë' yöl-la' guti, ral-la' inábaru' queë' lahuë' Dios, ate' Lë' unödzejë' yöl-la' na'bán queë'. Caní rnnía': Ral-la' inábali' quégaca nupa tun dul-la' le cabí nachë' yöl-la' guti. Dë dul-la' le nachë' yöl-la' guti. Biti' rnnía' inábali' que nu run dul-la' caní.

¹⁷ Yúgu'të le cabí naca tsahui' naca dul-la', pero dë dul-la' le cabí nachë' yöl-la' guti.

¹⁸ Nöziru' biti' rúntica'sö dul-la' nu naca zxí'inë' Dios, tu' rapa chi'ë Zxí'ini cazë' Dios nu na', ate' tu' xihui' biti' sequi' bi gun que.

19 Nőziru' yú'uru' lu nē'ë Dios, ate' yúgu'të bönachi tuí'i lądxi'gaca le dē yödžölió ni yú'ugaca lu na' tu' xihui'.

20 Na'a, nőziru' chibidē' Zxí'inē' Dios, en bennē' yöl-la' réajni'i queēru', para gúnbē'ēru' Nu na' naca idútē li. Zóalenru' Nu na' naca idútē li tu' zóalenru'-nē' Jesucristo, Zxí'inē' Dios. Nu ni naca Dios idú, en Nu runna yöl-la' na'bán idú queēru'.

21 Zxí'ina'do', guli'gún chi'i cuinli' para cabí tseaj lądxi'li' yugu' budó' guiőj budó' yaga. ¡Ca' gaca!

DÍDZA'DO' BUROPI BUZÚAJĚ' JUAN

Núnbě'ëru' le naca idútë li, en yöl-la' nadxí'i

¹ Neda', bönni' gula run chi'a bönachi queë' Cristo, rugapa' li' Dios, nigula rö queë' Dios, tsözxön len yúgu'të zxi'inu'. Nadxí'ida' libí'ili' tu' núnbě'ëru' le naca idútë li, en calëgasö neda', pero lësca' yúgu'të nupa chinúnbě'gaca le naca idútë li ta'dxí'i libí'ili'.

² Nadxí'itu' libí'ili' tu' núnbě'ëru' le naca idútë li, le zóalenticas'ö rë'u.

³ Rinábida'-në' Dios Xuz, en Xanru' Jesucristo, Zxi'ini cazë' Dios, uzá' ládxë'ë queëli', en huéchi' ládxë'ë libí'ili', en gunë' ga soa dxi icja ládxi'do'oli' tu' núnbě'ëli' le naca idútë li, en nadxí'ili' luzá'ali'.

⁴ Budzéjade'eda' cate' biyönda' tunbi' zxi'inu' ca naca le naca idútë li, tu' tunbi' ca na' gunná bé'enë' Dios Xuz rë'u.

⁵ Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lëbisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'.

⁶ Caní naca bë' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyönili' dza ni'te.

Nupa të'ëni ila'zí' ye'e rë'u

⁷ Lë ni riguixjöi'ida' libí'ili', tu' chita'dá zían nupa ta'zí' yë' yödzölió ni, nupa na' biti' ta'zí' lu në'eguequi ca bidë' Jesucristo, gúquië' idú bönachi. Nu na' run caní, naca nu rizí' yë', en nu ridá'baga' Cristo.

⁸ Guli'gún chi'i cuinli' para cabí'initi le nadéli'li' tu' guzxi' lu na'li' Cristo, pero guli'güí' ládxi'li' idéli'li' idútë le ral-la' sí'ili' lu në'ë Dios.

⁹ Núti'tës nu riguela' nöza yúbölö, en rucá'ana xtídzë'ë Cristo, biti' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxi'inë' nu na'.

¹⁰ Channö núti'tës nu za' ga zóali', en rusedi xibá yúbölö, biti' ulëbili' nu na' lídxili', en biti' guiëli' le: "Guyú'u len netu'."

¹¹ Nu rë le: "Guyú'u len netu'", run tsözxön nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzë'ë

¹² Sal-la' le zían ral-la' uzúaja' queëli' lu guichi, biti' rë'ënda' uzúaja' yúgu'të lu guichi. Runa' löza guída' ga zóali', ate' güi'iru' didza' ruá'a cuinru', para gaca udzéjaru' idú ládxi'ru'.

¹³ Zxí'ininu nigula zxilu', nigula rō queë' Dios, tu'gápabi' Dios lí'. ¡Ca' gaca!

DÍDZA'DO' BUNNI BUZÚAJĚ' JUAN

Le naca tsahui' runě' bönni' lě' Gayo

¹ Neda', bönni' gula run chi'a bönachi queë' Cristo, rugapa' Dios li', Gayo dxi'i ladxi'. Nadxi'ida' li' tu' núnbē'ēru' le naca idútě li.

² Böcha'ado', rinábida'-ně' Dios guně' ga gaca dxi'a quiu' lu yúgu'tě le runu', en su' ca' dxi'a, ca na' raca dxi'a que bö' naca cazu'.

³ Rudzėjada' tu' ta'dxině' yugu' böchi'ru' ga zoa', en tuně' ba nalí quiu', ta'nně' nacu' li ladxi', en runu' ca naca le naca idútě li.

⁴ Biti' bi dē le runrō ga rudzėjada' ca lě ni, riyōnda' tun nupa nácagaca ca bi'i que caza' ca rnna le naca idútě li.

⁵ Böcha'ado', runu' le naca tsahui', rácalenu' böchi'ru', en runu' ca' le nácarō lesaca', rácalenu' böchi'ru' bití' núnbe'enu' légaquiě'.

⁶ Yugu' böchi'ru' ni tuně' ba nalí quiu' lógaca bönachi queë' Cristo ni, ta'guíxjö'ě ca na' nadxi'inu' légaquiě'. Runu' le naca dxi'a, rugú'u légaquiě' nōza, en rácalenu' légaquiě' ca na' sa'yéaj gunu' quegaca nupa tun xichině' Dios, para ulu'ú'ě nōza.

⁷ Légaquiě' bila'rúajě' ni tu' nadxi'igaquiě' Jesús, en bití' bi ta'zi'ě lu ná'agaca bönachi bití' ta'dá' Cristo.

⁸ Que lě ni na' ral-la' gunru' bal bönachi tun caní, para gúnlenru' légaquiě' dxin que le naca idútě li.

Le cabí naca tsahui' runě' Diótrefes

⁹ Chibuzúaja' lu guichi le uzéajni'i bönachi queë' Cristo ni', pero Diótrefes, bönni' ni' raza lădxě'ě gáquiě' lo lădjagaquiě', bití' runě' netu' bal.

¹⁰ Que lě ni na', channō huida' ga zóali', usá'a lădxi'li' cate' udúbili' ca nácagaca le runě'. Rizí' quídzě'ě netu', en rnně' queétu' le cabí nácate. Bití' rizxōn lădxě'ě tsa lě nisō, pero lěsca' bití' runě' bal böchi'ru' ta'dxině' ni', ate' ruzáguě'ě xinōzguequi nupa ni' tē'ēni ilún légaquiě' bal, en rubéajě' nupa na' ladaj bönachi queë' Cristo.

¹¹ Böcha'ado', bití' gunu' ca tun nupa tua' dō', pero ca tun nupa tun le naca tsahui' gunu'. Nu run le naca tsahui' nequi queë' Dios, pero nu ruá' dō' catu caz benbē' Dios.

Le naca tsahui' runě' Demetrio

¹² Yúgu'tě böchi'ru' tuně' ba nalí queë' Demetrio, ate' naca bē' runě' le naca idútě li. Lěsca' netu' runtu' ba nalí queë', ate' nōzili' nácate lě ni runtu' ba nalí queë'.

Le rinabě' Juan lahuě' Dios

¹³ Ziánrö ca' le gú'unida' uzúaja' quiu' lu guichi, pero biti' rě'ända' uzúaja' le lu guíchisö.

¹⁴ Na'a, runa' löza il'éteda' li', ate' güi'iru' didza' ruá'a cuinru'.

¹⁵ Rinábida'-në' Dios gunë' ga soa dxi icja ládxi'do'o. Nupa ni ta'dxí'i rě'u tu'gapa Dios li'. Lësca' li', bugapa Dios tu tu nupa ni' ta'dxí'i rě'u. ¡Ca' gaca!

DÍDZA'DO' BUZÚAJĚ' JUDAS

Judas rugapě' Dios nupa nulidzě' Dios

¹ Neda', Judas, tsaz naca' huen dxin queě' Jesucristo, en naca' ca' böchě'ě Jacobo. Rugapa' Dios libí'ili', nulidzě' Dios Xuz libí'ili', en nadxí'ině' libí'ili', en rapa chi'ě libí'ili' tu' nácali' tuz len Jesucristo.

² Rě'ěnda' inözili' ca ruhuéchi'da' ládxe'ě Dios libí'ili', en nadxí'ide'eně' libí'ili', enca' ruzóadě'ě dxi icja ládxi'do'oli'.

Nupa tu'sedi le cabí nácatě

³ Libí'ili', böchi' luzá'ado', gúcada' ládxa'a uzúaja' queéli' lu guichi ca naca yöl-la' rusölá nadéli'ru', pero run bayudxi uchízia' icja nágali' para idú ládxi'li' tíl-lalenli' nupa ta'dá'baga' le réajlě'ěru'-ně' Dios, lě na' budödě' Dios tsaz lu ná'agaca nupa néquiquequi quez queě' para ulu'zě didza' que lógaca yúgu'tě bönachi.

⁴ Caní run bayudxi guna' tu' bagáchi'sö chigula'yázaleně' bal-lě' bönni' rě'u, Dios buzóé' quégaquiě' dza ni'te ichúguiě' quégaquiě' ila'nítie' tsaz. Biti' ta'yéaj ládxi'gaquiě' Dios bönni' caní. Tu' zoa le ruzá' ládxe'ě Dios queěru', téquině' huáca iluně' le ruá' dō'. Ta'dá'baguě'ě Xanru' Jesucristo. Tuzě' Lě' rinná bé'eně' rě'u.

⁵ Chinöz quézili' lě ni, pero rě'ěnda' usá'a ládxi'li' ca beně' Xanru' Dios. Sal-la' busölě' bönachi Israel cate' bubéajě' léguequi luyú Egipto, gudōdi ni' busunítie' nupa bitsa'gaca ládjaguequi, en bití' gula'yéajlě' Lě'.

⁶ Lěsca' caní, yugu' gubáz lá'ayi queě' Dios, nupa ni' bití' gulún xichíngaquiě', pero bulu'cá'aně' xilátjagaquiě', Dios busayjě' légaquiě' tu lataj chul-la. Nága'gaquiě' tsaz ni' ga idxinrō dza usiúdxě' Dios yōdzōlió ni.

⁷ Lěsca' caní guca quégaca yōdzō Sodoma, en yōdzō Gomorra, enca' yugu' yōdzō dzágagaca léguequi. Ca na' guluně' gubáz lá'ayi na', gula'dá'baguě'ě Dios, lěsca' caní guluně' bönni' yugu' lu yōdzō na'. Bulu'dōdi cuíngaquiě' para guluně' le ruá' dō', en le gula'zēsō ládxi'gaquiě' le tun ga nu rutuí'i. Na'a, tu' busaca' zi'ě Dios légaquiě' lu guí' le cabirō ulu, lě na' guca quégaquiě' naca tu le run gadxi yúgu'těru', para cabí gunru' la' lěbisō.

⁸ Sal-la' gulaca lě ni, la' canisō tuně' bönni' ni, bönni' rōjácaleně' yěla ta'néně'. Tun dítjaně' idútě le naca cazě'. Ta'dá'baguě'ě le rinná bé'eně' Dios rě'u, en ta'nně' zi'ě quégaca nupa ta'nná bě' yehua' yubá.

⁹ Miguel caz, gubáz lá'ayi lo, cate' gudíl-lalenë' tu' xihui' para gaca u'ë idú le naca cazë' Moisés, biti' burúguinë' udxíë' dō' tu' xihui' na', pero gudxë' le: "Xanru' uzenë' li' bach."

¹⁰ Yugu' bönni' ni ta'nnë' zi'ë quégaca le runë' Dios, yugu' le biti' ta'yéajni'inë', ate' yugu' le ta'yéajni'inë' rácasō quégaquië' ca na' tunba' bōa' guixi' biti' ta'yéajni'iba', lë ni tu'gunë' dxin, en caní tu'dxía dō' cuíngaquië'.

¹¹ Bica' bayechi' légaquië' tu' chigulunë' dul-la' ca na' benë' Caín, ate' lu yöl-la' ruhuidi' quégaquië' chigula'chixi gula'níguinë' ca na' guchixi guníguinë' Balaam para si'ë dumí, ate' chinarugu quégaquië' ilátië' ca na' gútië' Coré cate' gudá'baguië' Moisés.

¹² Yugu' bönni' ni tágulenë' tsōzxön libí'ili' cate' ráguli' yugu' güi'i huagu lu yöl-la' nadxí'i queéli'. Tunë' ga ta'chixi ta'nigui nupa dzágagaca libí'ili', tu' tē'aj tagu lizë'. Nácagaquië' ca yugu' bönni' ral-la' ulu'gágugaquië'-ba' bō'cu' zxila', pero la' cuíngacasë' tu'gahuë'. Nácagaquië' ca bōaj lúzxiba biti' nachë'gaca nisa, ate' ruá' bō' léguequi ná'alō nílō. Nácagaquië' ca' ca yugu' yaga chibidxín dza bi'ila'bía, pero biti' bi' ta'bía. Nácagaquië' ca' ca yugu' yaga chigula'bidxi idú luí, en chinaládu'gaca.

¹³ Nácagaquië' ca' ca nísado' cate' riyasa ridxía, ate' ribō' bidxina' que, lë na' rulu'i ca naca yöl-la' stu' tunë'. Nácagaquië' ca yugu' bōlaj lúzxiba nucá'anagacaba' xinōzgcacaba'. Dios chinunë' quégaquië' ila'yázië' tsaz lataj chul-la.

¹⁴ Ca naca quégaquië' bēë' ca' didza' Enoc uláz queë' Dios. Enoc na' gúquië' tu bönni' gubábalenë' le igadxí cō' zxi'ini xi'sōë' Adán. Gunnë': "Buli'yútsōca', zē'ë Xanru', ate' dzágagaca Lë' zían gayuá' bōnachi néquiguequi quez queë'.

¹⁵ Zē'ë para gunë' xíguia' yúgu'të bōnachi, en ichúguië' quégaca yúgu'të nupa tua' dō' ila'niti tsaz." Caní gunë' tu' nözi yúgu'të didza' zi' gula'nnë' bönni' dul-la' na' queë' Lë'.

¹⁶ Yugu' bönni' caní ta'nnë' queë', en ta'zí' quídzë'ë, en tunë' ca naca le ta'zēsō lādxi'gaquië'. Tu'ë didza' lu yöl-la' run ba zxön cuíngaquië', en para ulu'zi'ë xibéguequi, tu'ë didza' le ta'gú'u bōnachi yöl-la' zxön.

Judas rusë'ë lādxi'gaca nupa ta'yéajlë' Cristo

¹⁷ Na'a, bōchi' luzá'ado', guli'tsōjnë' yugu' didza' gulu'ë bönni' gubáz queë' Xanru' Jesucristo dza ni'te.

¹⁸ Yugu' bönni' na' gulë' libí'ili': "Yugu' dza tsöjsétëgaca ulu'lu'i lógaquië' bönni' ulu'titjë' le naca lá'ayi, en ilunë' ca naca le ta'zēsō lādxi'gaquië' le ruá' dō'."

¹⁹ Yugu' bönni' ni tunë' ga irúajli' choplō. Tu'ë didza' lu yöl-la' bōnáchisō quégaquië', en biti' zóalenë' Dios Bō' Lá'ayi légaquië'.

²⁰ Na'a, böchi' luzá'ado', guli'sóa tsutsu lu yöl-la' réajlë' queëli' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi.

²¹ Buli'gá'analenë' Dios, Nu nadxi'i rë'u, en guli'cöza dza ni' ulu'i lahuë' Xanru' Jesucristo, Nu ruhuéchi' ládxë'ë rë'u para gata' yöl-la' na'bán idú queëru'.

²² Guli'gún ga ila'dipa ládxi'gaca nupa raca chopa ládxi'gaca.

²³ Guli'gún ga ulu'lë', le gaca tsca ubéajli' légaquië' lu guí'. Lu yöl-la' radxi queëli' buli'huéchi' ládxi'li' ia'zica'rö bönachi. Guli'gún chi'i cuinli', para cabí gunli' tsözxön légaquië', en cabí gútsa'li' le ruá' dö' tunë'.

Le rigú'uru' Dios yöl-la' zxön

²⁴⁻²⁵ Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzëjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULUÍ'INĒ' DIOS JUAN

Apocalipsis

Le bulu'e lahui Dios ca naca queë' Jesucristo

¹ Lē ni naca le bulu'e lahui Jesucristo, le bē'ē Lē' lataj Dios ulu'ínē' yugu' huen dxin queë' ca naca le run bayudxi ilácatē. Jesucristo gusól-lē'ē tuē' gubáz lá'ayi queë', nu na' buzéajni'i neda', Juan, huen dxin queë' Cristo. Gubáz lá'ayi na' bulu'ínē' neda' ca naca lē ni.

² Neda', Juan, ruzúaja' lu guichi ni le naca idútē li ca naca yúgu'tē le bilé'eda', en runa' ba nalí que xtídzē'ē Dios, en que le benē' ba nalí Jesucristo.

³ Bica' ba nu ulaba didza' ni, ate' bica' bágaca nupa ulu'zē nágagaca nu na' ulaba xtídzē'ē Dios ni, en ilún ca rna lē ni nazúaj lu guichi, tu' chizóa gaca.

Juan ruzúajē' le uzéajni'i gadxi cō' bōnachi queë' Cristo

⁴ Neda', Juan, ruzúaja' lu guichi didza' ni le uzéajni'i gadxi cō' bōnachi queë' Cristo nacua' luyú Asia. Dios, Bōnni' zoa cazē', en gúzōatica'sē', en ral-la' huödē', rinábida'-nē' uzá ládxi'ē queēli', en gunē' ga cō'ō dxi icja ládxi'do'oli', ate' dzágagaca gadxi bō' Lē' nacua' lahuē' Lē' ga ni' rō'ē rinná bē'ē.

⁵ Dzáguiē' ca' Jesucristo Lē'. Jesús ni runē' ca rnnē', en runē' ba nalí queë' Dios. Zí'alō Lē' bubanē' tsaz lu yōl-la' guti, en rinná bé'enē' bōnni' ta'nná bē'ē yōdzōlió ni. Lē' nadxí'inē' rē'u, en gudibē' rē'u, tu' bugúē' dul-la' nabága'ru' len xichōnē' le bulaljē' lē'e yaga cruz, cate' gútiē' uláz queēru'.

⁶ Jesucristo benē' ga rinná bē'ēru', en ga nácaru' yugu' bixúz, para cú'uru'-nē' Dios, Xuzē' Jesús, yōl-la' ba. ¡Yōl-la' ba Lē', en gácatica'sō queë' yōl-la' unná bē'! ¡Ca' gaca!

⁷ ¡Buli'yútsōca'! ¡Zē'ē Cristo lu bōaj lúxiba! ¡Ila'lé'e Lē' yúgu'tē bōnachi, enca' nupa ni' gulún Lē' huē', en bētigaca Lē'! ¡Ila'bōdxi yechi' yúgu'tē bōnachi yōdzōlió ni cate' ila'lé'e Lē'! ¡La'tu' gácatē caní! ¡Ca' gaca!

⁸ Caní rnnē' Lē': "Neda' naca' Bōnni' zoē' zí'alō, enca' Bōnni' rōjsétiē' ca naca le risí lo, en le ruúdxitē." Caní rnnē' Xanru', Bōnni' napa cazē' yōl-la' huáca. ¡Zoa cazē' Lē', en gúzōatica'sē', en si' ulé'ē!

Rilé'enē' Juan yōl-la' zxōn queë' Jesucristo

⁹ Neda', Juan, naca' bōchi' luzá'ali', en tsōzxōn riguí'i rizáca'lēna' libí'ili', en tsōzxōn len libí'ili' ruzi'a xibé le rinná bē'ē Dios, en nadéli'da' yōl-la' ribōza zxōn ladxi' na' rnnē' Jesucristo queēru'. Nadzuna' tu luyú bidxi ni gatsaj láhui'lō

nísado', nazí'i le Patmos. Nadzuna' tu' bena' libán que xtídzë'ë Dios, en tu' bena' ba nalí queë' Jesucristo.

¹⁰ Lu dza lá'ayi queë' Xanru', guzóalenë' Dios Bö' Lá'ayi neda', ate' biyönda' cúdzu'la' chi'ë tu bönni' rulidzë' zidzaj. Biyön chi'ë ca ribödxi lúzuba' böa' bëdxi.

¹¹ Bönni' ni gudxë' neda': "Neda' naca' Bönni' zoë' zí'alö, en Bönni' röjsétië' ca naca le risí lo, en le ruúdxitë. Buzúaj lu guichi le riyönnu', en rilé'enu', ate' gusöl-la' le quéguequi gadxi cö' bönachi quia' nacuá' luyú Asia, nupa nacuá':

Lu yödzö Éfeso,
lu yödzö Esmirna,
lu yödzö Pérgamo,
lu yödzö Tiatira,
lu yödzö Sardis,
lu yödzö Filadelfia,
lu yödzö Laodicea."

¹² Buécja' para ilé'eda' Bönni' na' rulidzë' neda'. Cate' buécja', bilé'eda' gadxi le nuá'gaca guí' le néquiguequini oro.

¹³ Ladaj gadxi le nuá'gaca guí' na' bilé'eda' tu Bönni' rinë'ë ca tu bönni'. Nácuë' tu lari' tunna le ridxín xini'ë, en luchu'ë nasíë' tu le néquini oro.

¹⁴ Chiguíchido'os naca guitsa' icjë' ca naca zxila' o ca riná' bögui', ate' rëpi yösa bení' guiöj lahuë' ca guí'.

¹⁵ Rëpi yösa bení' ni'ë ca guíë bronze dxíldo', le nudzé'eda' lu guí' ca bo' yalaj. Zidzaj biyön chi'ë ca riyön tu yegu zxön.

¹⁶ Lu në'ë ibëla xzóagacaba' gadxi böljaj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

¹⁷ Cate' bilé'eda' Lë' gudzö'a xini'ë ca tu bönni' nati. Ní'irö Lë' guxóa në'ë neda' len në'ë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'.

¹⁸ Naca' Nu nabán caz. Gútia', ate' na'a zóatíca'sa' nabana'. Dë lu na'a inná bé'eda' yöl-la' guti, en lataj ga nacuá' nupa nátigaca.

¹⁹ Buzúaj lu guichi lë na' chibilé'enu', en le raca na'a, enca' le ral-la' gaca tödi na'a.

²⁰ Lë ni naca le nagachi' ca naca quégacaba' gadxi böljaj bení' na' bilé'enu' xzóagacaba' lu na'a ibëla, en ca naca gadxi le nuá'gaca guí' le néquiguequini oro. Gadxi böljaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

2

Didza' gusöl-lë'ë yödzö Éfeso

¹ Gunně' ca' Bönni' na': "Buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' xóagacaba' gadxi bölaj bení' lu në'ë ibëla, en ridë' gatsaj láchui'lö gadxi le nuá'gaca guí' na' néquiqueuini oro.

² Caní rnnía': Neda' nöz quézida' yugu' le runli', en ca rúnda'ali' dxin. Nözda' ribözali' zxön ladxi', en biti' gaca guá' ilenli' nupa tua' dö'. Nözda' chiguzxi' bë'ëli' nupa ta'nná nácagaca gubáz quia' pero biti' ca' nácagaca, ate' na'a nözili' ta'zí' yë'.

³ Ribözali' zxön ladxi', en chigudí'i guzxáca'li' tu' dá'ali' neda', pero biti' gucuidi' láchxi'li'.

⁴ Na'a, dë tu le ruzegui libí'ili' didza': Bítirö nadxí'ili' neda' ca na' bidxí'ili' neda' zí'alö.

⁵ Que lë ni na', guli'tsöjné ca na' benli' zí'alö, lë na' busanli', ate' na'a, buli'bí'i láchxi'li', en guli'gún ca na' benli' zí'alö. Channö cabí ubí'i láchxi'li', guídatia' queëli', ate' ugúa' le nuá' guí' queëli' xilataj.

⁶ Na'a, zoa tu le rácalen libí'ili'. Biti' rilé'eli' dxi'a le tunë' bönni' nicolaíta, nupa na' ta'yéaj láchxi'gaca budó' guiój budó' yaga, en tun le ruá' dö', lë na' lësca' biti' rilé'eda' dxi'a.

⁷ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca le ribía yaga da' gatsaj láchui'lö luyú lachi queë' Dios, le gun ga ila'cuá'tica'sö nabán."

Didza' gusöl-lë'ë yödzö Esmirna

⁸ Gunně' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz.

⁹ Caní rnnía': Neda' nöz quézida' le runli', en ca riguí'i rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca ta'nnë queëli' nupa ni ta'nná nácagaca bönachi judío, pero biti' ca' nácagaca caní. Nupa ni ta'dá' Satanás, tu' xihui'.

¹⁰ Biti' ca' gádxili' le ral-la' quí'i sáca'li'. Tu' xihui' na' gun ga idzunli' bál-lali' libí'ili' lidxi guíë. Caní si' bë' libí'ili', ate' quí'i sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queëli'.

¹¹ Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' didza' yugu' cö' bönachi quia' neda', Cristo, rnnë': Nupa ila'deli' lu le raca yödzölió, biti' bi gun yöl-la' guti queguequi, lë na' gaca le buropi luzuí quegaca nupa ila'cuá'tica'sö lu guí' gabila."

Didza' gusöl-lë'ë yödzo Pérgamo

12 Gunné' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Pérgamo. Caní uzúaju' lu guichi: Ru'ë didza' Bönni' na' nu'ë guié tuchi' na' natuchi' iropa la'a.

13 Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' béntica'së' ba nalí quia', en gútië' ga ni' zoa Satanás, tu' xihui'.

14 Na'a, dë tu chopa le tu'zegui libí'ili' didza': Nacuá'len libí'ili' bal-la bönachi lu yödzo Pérgamo, nazí' lu në'eguequi xibá queë' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bédxido' gulútigaquië'-ba' lógaca budó' guiöj budó' yaga, en gulunë' le ruá' dö'.

15 Lësca' caní nacué'len libí'ili' nupa ni' nazí' lu në'eguequi xibá quégaca bönachi nicolaíta, lë na' biti' rilé'eda' neda' dxí'a.

16 Que lë ni na', buli'bí'i ládxi'li' na'a. Channö cabí ubí'i ládxi'li', guídatea' ga zóali', en tül-lalena' légaquië' len didza' rirúaj ruá'a, le naca ca tu guié tuchi'.

17 Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzoilió, guna' ga ilágugaca yöta maná nagachi'. Unödza' ca' tu guiöj chiguíchido' quégaquië', ate' lu guiöj na' nazúaj tu la cubi, cuntú nu nunbë' le, pero núpasö na' ila'zí'i le, ilünbë'e la na'."

Didza' gusöl-lë'ë yödzo Tiatira

18 Gunné' ca': "Lësca' caní, buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guiöj lahuë' nácagaca ca guí, ate' ni'ë nácagaca ca guié bronce dxí'lido'.

19 Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza zxön ladxi' queëli'. Nözda' nácáro idú ca runli' yugu' lë ni ca benli' zí'alö.

20 Nacuá' tu chopa le tu'zegui libí'ili' didza': Ruí'ili'-nu lataj nigula na' lënu Jezabel, rnnanu ruí'inu didza' uláz queë' Dios, ate' ni'a que le rusédinu rizi' yé'enu bönni' tunë' xichina'. Rusédinu légaquië' le run ga tunë' le ruá' dö', en tahuë'-ba' böa' bédxido' ta'gu'ë légacaba' lógaca budó' guiöj budó' yaga.

21 Neda' bë'a-nu lataj ubí'i ládxi'nu, pero biti' rë'ëninu ucá'ananu le ruá' dö' na' runnu.

22 Que lë ni na' chú'una'-nu tu le gátí'nu ga na' quí'i sáca'nu lu xihué'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí'i ládxi'guequi para cabirö ilún dul-la' na'.

23 Guna' ga ilátibi' zxi'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubi'a queéli' tsca naca le runli'.

24 Ia'zica'li' zóali' yödzö Tiatira, nülöli' biti' nazi' lu ná'ali' lë na' rusédinu, en biti' nazédali' lë na' ta'nná bönachi ni' naca le nayéajni'i idú, pero le nácatë naca xtidza' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'.

25 Na'a, lë na' chinazi' lu ná'ali', guli'gún chi'i ga idxintë dza huöda'.

26 Bönmi' ni' ila'déli'në' lu le raca yödzölió, en ilunë' ca rë'ënda' neda' ga údxitë, neda' guna' ga ila'nná bé'enë' bönachi iduté yödzölió.

27 Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bé'enë' yugu' yödzö, ate' gata' lu ná'agaquië' tu xiyaga guié, ate' ulu'zxuzxjë' bönachi na' ca nu ruzxuzxaj zxiga' yó'öna néquini yu.

28 Gu'a ca' le naca ca bölj hui sila quégaquië'.

29 Nu riyöni ral-la' uzë nagui lë ni rnnë' Dios Bö' Lá'ayi, ruí'ilenë' yugu' cö' bönachi quia' neda', Cristo, didza'."

3

Didza' gusöl-lë'ë yödzö Sardis

1 Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzö Sardis. Caní uzúaju' lu guichi: Ru'ë didza' Bönmi' na' nacué'len Lë' gadxi bö' na', ate' zxóagacaba' gadxi bölj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'.

2 Buli'subán ládxi'li'. Guli'gún tsutsu le nacué'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios.

3 Guli'tsöjné na'a xibá na' biyönili' le guzxi' lu ná'ali'. Guli'gún ca rnna xtídzë'ë Dios, en buli'bí'i ládxi'li'. Channö cabí usubán ládxi'li', guída' ga zóali' tsárido'os ca na' ridxinë' tsárido'os gubán, en biti' inözili' bizxi dza na' guída' ga zóali'.

4 Nacué'len bal-la bönachi libí'ili' lu yödzö Sardis, nupa biti' nácagaca xihui'. Ila'dalen nupa ni neda', nácugaca lari' chiguíchido'os le ruluí'i nuhuöácagaca idú tsahui', en nácagaca lesaca' gaca caní quéguequi.

5 Nupa ila'deli' lu le raca yödzölió ugácuá' léguequi lari' chiguíchido'os, en biti' usúlua' láguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si'

lu na'a nupa ni lahuë' Xuza' Dios, enca' lógaquië' gubáz lá'ayi queë'.

⁶ Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

Didza' gusöl-lë'ë yödzo Filadelfia

⁷ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë didza' idütë li, en dë lu në'ë zxf'ini gué queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le.

⁸ Bönni' ni rnnë': Neda' nöz quézida' le runli'. Nözda' nápalí láti'do'os yöl-la' huáca, pero runli' ca rnna xtídza'a, en bití rutuí'ili' rnnali' néquili' quia'. Que lë ni na' nuzóa' loli' tu ga nu tsaz le nayalaj, ate' cuntu nu gaca usayaj le.

⁹ Buli'yútsöca', ta'dë' bönni' ni' Satanás, tu' xihui', en ta'z'í yë'ë, ta'nnë' nácagaquië' bönachi judío ta'yéaj ládxi'gaca Dios, pero bití' nácagaquië' caní, guna' ga ila'dxinë' loli', en ulu'zechu zxíbigaquië' xiní'ali'. Ní'irö iléqui'be'enë' nadxí'ida' libí'ili'.

¹⁰ Tu' benli' ca rnna xtídza'a, en gulözali' zxön ladxi', gun chi'a libí'ili' dza na' ila'guí'ila'zaca' yúgu'të bönachi lu yödzo lió ni, lë na' gaca para si' bë' léguequi.

¹¹ ¡si' guída'! Que lë ni na' guli'gún chi'i le nápalí, para cabí gaca nu gun ga cabí sí'ili' lë na' ral-la' gunna' queëli'.

¹² Núlöli' ni' idéla'li' lu le raca yödzo lió, neda' guna' ga gácali' tsutsu ca nácagaca ya'zxön, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca lë' Dios quia', enca' ca lë yödzo queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi.

¹³ Nu riyöni ral-la' uzë nagui lë ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

Didza' gusöl-lë'ë yödzo Laodicea

¹⁴ Gunnë' ca': "Lësca' caní buzúaj lu guichi didza' ni isöl-lu'u queë' gubáz quia' zóalenë' bönachi quia' lu yödzo Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnnë', en ru'ë didza' idütë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios.

¹⁵ Caní rnnë': Neda' nöz quézida' le runli'. Ca runli' naca ca nisa bití' naca ziaga, tu' cabí rucá'anali' tsaz neda', en bití' naca ca nisa zögui', tu' cabí dá'ali' neda' idú ládxi'li'. Dxí'arö gaca la' gácali' ca nisa ziaga o ca nisa zögui'.

16 Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuébi nisa nati yula na'.

17 Libí'ili' rnnali' rilé'eli' yöl-la' tsahui' queéli', en raca dxi'a queéli', en biti' bi riyadzaj queéli', pero biti' réquibe'eli' le nácali'. ¡Bayechi' nácali'! ¡Nácali' xizi'! ¡Nácali' yechi', en lo chulla, en ridali' xiguídisö!

18 Que læ ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí', para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutu'i. Ral-la' gá'uli' ca' quia' le gun ga ulu'huóaca guiöj loli' para gaca ilé'eli' le naca quia'.

19 Neda' ruzeda' bach, en run zi'a yúgu'të nupa nadxí'ida' channö cabí tun le naca dxi'a. Que læ ni na', buli'bí'i ládxi'li', en guli'gún xichina' idú ládxi'li'.

20 Buli'yútsöca', neda' caz zuína' ga nu riyaza, en rulidza'. Channö nútítës nu yöni chi'a, en isalaj quia', tsázia', en gágulena' nu na', ate' nu na' gágulen neda'.

21 Núlöli' idéli'li' lu le raca yödzölió, neda' guna' ga cö'öli' tsözxön len neda' ga na' rö'a rinná bē'a, ca na' benē' ca' Xuza' quia' neda'. Bidéli'da' neda' lu le guca quia', ate' gurö'lena' Xuza' tsözxön ga na' rö'ë rinná bē'ë.

22 Nu riyöni, ral-la' uzé nagui læ ni rnnë' Dios Bö' Lá'ayi, ru'ilenē' didza' yugu' cö' bönachi quia' neda', Cristo."

4

Yöl-la' ba ta'gu'ë Dios yehua' yubá

1 Gudödi gulaca yugu' læ ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxí lúzuba' böa' bēdxí. Chi'i ni bulidza neda', gunná: "Gudá xitsá'alö ni, ate' neda' ulu'ida' li' le run bayudxi ilaca tödi ni."

2 La' ní'isö guzóalenē' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bē', en bilé'eda' ca' Nu na' rö'ö lataj na'.

3 Rēpi yösa bení' Nu na' rö'ö lataj na', ca na' rēpi yösa bení' guiöj jaspe, en guiöj cornalina, yugu' guiöj nazáca'da'. Idú gásibi'ilö lataj na' zoa biguita' le naca lachi ca naca guiöj esmeralda, le rēpida' yösa bení'.

4 Idú gásibi'ilö lataj na' nacuá' ca' ia'tapa uruá' lataj gapa ta'bö' nupa ta'nná bē', ate' yugu' lataj na' rö'ögaquiē' tapa uru'ë bönni' gula, nácugaquiē' lari' chiguíchido'os, en dxíagaca ícjagaquiē' le néquiquequini oro.

⁵ Ta' rúaj yösa, en guziú' rinně lu lataj lo ga ni' rö'ö Nu na', ate' bö zxon ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios.

⁶ Ca dödilö lahui lataj ni dē tu ca naca tu nísado' le rēpi yösa bení' ca guiöj jara.

Nacuá' tapa nupa nabángaca cuiti lataj na', tsölá'a huéaj, ate' zían guiöj lógaca dxíagaca zaca' cúdzi'löguequi, en láhuilöguequi.

⁷ Tu nu nutsa' ladaj tapa ni nalá' ca nácaba' bēdxi guixi'. Nu na' buropi nalá' ca nácaba' bēdxi, ate' nu na' bunny nalá' lahui ca naca lo bönni', ate' nu budapi nalá' ca nácaba' bisiá' ruzuba'.

⁸ Idápatē nupa ni, nacuá' xopa xíligaca que queēguequi, ate' idá'alöguequi, en lé'elöguequi xíliguequi dxíada'gaca zían guiöj löguequi. Rēla, en te ža biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquiē' Xanru' Dios!

¡Napa cazē' yöl-la' huáca!

¡Guzóa cazē' Lē', en zoa cazē', en chizóa ulē'!

⁹ Nupa na' nabángaca ta'gú'u yöl-la' ba Nu na' rö'ö rinná bē', en zóatica'sö nabán. Tun bal Nu na', en tē Nu na': "Xclenu'." Bátati'tēs tun idapa na' caní,

¹⁰ tu'tsaga lógaca tapa uru'ē bönni' gula na' lu yu lahui' lo Nu na', en ta'yéaj lādxi'gaca Nu na' zóatica'sö, en tu'cu'ē le néquiguequini oro dxía ícjagaquiē' lahui' lo lataj ga ni' rö'ö rinná bē' Nu na', ta'nně':

¹¹ ¡Xantu' Dios, nacu' lesaca'

cú'utu' Li' yöl-la' ba, en guntu' Li' bal,

en gata' quiu' yöl-la' unná bē' tu' benu' yúgu'tē le dē!

¡Ca rě'ēni quézinu' nacuá', en gula'sí lo nacuá'!

5

Tu guichi, en Bönni' náquiē' Bö'cu' Zxíla'do'

¹ Ní'irö bilé'eda' tu guichi lu na' ibēla Nu na' rö'ö lataj lo. Guichi na' naca tu guichi nudubi, en dá'gaca didza' lé'elö, en láhuilö. Naguela' guichi na' gadxi le nusáyajgaca le.

² Bilé'eda'-nē' tuē' gubáz lá'ayi lo, ate' bē'ē zidzaj didza', gunnē': "¿Nuzxi naca lesaca' uladzu' le naguéla'gaca guichi ni, en usalaj le?"

³ Cuntu nu guca usalaj guichi na', en biti' guca nu uyú le, calēga nu zoa yehua' yubá, en calēga nu zoa luyú, en calēga nu zoa zxánilö luyú.

⁴ Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le.

⁵ Ní'irö tuē' bönni' gula ni' gudxē' neda', gunnē': "Biti' cödxu'. Bönni' na' náquiē' ca bēdxi guixi', en nabábalenē' xzí'ini xí'sóē' Judá, en náquiē' ca' xzí'ini xí'sóē' David, chibidéli'nē' lu yúgu'tē

le raca, en séqui'nē' uládu'ē le naguéla'gaca guichi ni, en usálajē' le."

⁶ Ní'irō bilé'eda'-nē' Bönni' náquiē' Bö'cu' Zxíla'do', zuínē' lahui' lo lataj lo na' zoa gatsaj láhui'lō nupa na' nabángaca, en gatsaj láhui'lē' ca' yugu' bönni' gula na'. Dxíē' huē' ca naca que tu bö'cu' zxíla' zoa nu bēti lēba' lahuē' Dios, nacuá' gadxi lúzuba', en gadxi guiōj loba', le tu'luí'i ca nácagaca gadxi bö' na' dzágagaca Dios, nasöl-lē'ē léguequi idútē yōdzölió.

⁷ Gudödē' Bönni' náquiē' Bö'cu' Zxíla'do', en gudélē'ē guichi na' lu na' ibēla Nu na' rō'ō lataj lo na'.

⁸ Cate' chigudélē'ē guichi na', bulu'zóa zxíbiguequi idapa nupa na' nabángaca, en idapa uru'ē bönni' gula na' lahuē' Bönni' na' náquiē' Bö'cu' Zxíla'do'. Tu tuē' bönni' gula na' zōngaquiē' le rul-la nazí'i le arpa, en nuá'agaquiē' ca' yugu' zxíga'do' néquiguequini oro, yugu' le yúdzugaca yalaj, lē na' ruluí'i yöl-la' rulidza Dios quégaca bönachi queē'.

⁹ Tul-lē' tu le rul-la yöl-la' ba, le naca cubi, le rnna caní:

Nacu' lesaca' quélu'u guichi na',
 en uládu'u le naguéla'gaca le,
 tu' bē'u lataj yugu' bönni' gulútiē' Li',
 ate' len xichōnu' böá'uu' bönachi para ilequi queē' Dios,
 nupa nácagaca bönachi izá'a nacuá' idútē yōdzölió,
 bönachi tuí'i yúgu'tē didza' yúbölö,
 en nabábagaca yúgu'tē yōdzö,
 en yúgu'tē luyú nacuá' idútē yōdzölió.

¹⁰ Benu' ga nácagaquiē' bönni' ta'nná bē'ē
 en ga nácagaquiē' bixúz queē' Dios queēru'.
 Benu' ga ta'nná bē'ē lu yu yōdzölió.

¹¹ Ní'irō buyúa', en biyōnda' chí'igaquiē' gubáz lá'ayi zían. Zían gáyu'ē, en gáyu'ē nacu'ē. Nacu'ē idú gásibi'ilō lataj lo na' tsözxōn len nupa na' nabángaca, enca' yugu' bönni' gula na'.

¹² Tu'ē zidzaj didza' yúgu'tē', ta'nnē':
 ¡Bönni' na' náquiē' Bö'cu' Zxíla'do' gulútiē',
 náquiē' lesaca' gata' yöl-la' unná bē' lu nē'ē,
 en yöl-la' tsahui', en yöl-la' réajni'i, en yöl-la' huáca!
 ¡Náquiē' lesaca' gunru'-nē' bal, en tseaj ládxi'ru' Lē',
 en cú'uru'-nē' yöl-la' ba!

¹³ Ní'irō biyōnda' tul-la yúgu'tē le benē' Dios yehua' yubá, en lu yu yōdzölió, en zxánilö luyú, en lu nísado'. Tul-la yúgu'tē le nacuá' yugu' lataj na', ta'nná:

¡Yöl-la' ba Nu na' rō'ō lataj lo,
 enca' Bönni' na' náquiē' Bö'cu' Zxíla'do'!
 ¡Gúntica'siru'-nē' bal
 en cú'utica'siru'-nē' yöl-la' ba,
 ate' inná bē'tica'sē' Lē'!

¹⁴ Idápatë nupa na' nabángaca ta'nná: “¡Ca' gaca!”

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

6

Yugu' le naguéla' gaca guichi

¹ Ní'irö bilé'eda'-në' Bönni' náquië' Bö'cu' Zxíla'do', ate' buládzu'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyön chi'i ca guziú' rinnë, gunná: “¡Gudá uyú'!”

² Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxie' icjë', ate' birúajë' ca tu nu nácatërö lo para idéli'në' lu gudil-la.

³ Cate' buládzu'ë le buropi le naguela' guichi na', biyönda' nu buropi na' nabán, ate' gunná: “¡Gudá uyú'!”

⁴ Ní'irö birúajba' ia'tuba' böa', nácabá' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzë'eguequi. Bulu'nödzejë' queë' tu guié tuchi' zxon.

⁵ Cate' buládzu'ë le bunni le naguela' guichi na', biyönda' nu bunni na' nabán, ate' gunná: “¡Gudá uyú'!”

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxigóns.

⁶ Biyönda' ruí'i didza' tu chi'i gatsaj láhui'lö tapa na' nabángaca, ate' gunná: “Chopa guié zxoá' xtila len lazzaj que tu dza huen dxin tu' gaca gubín, en xopa guié zxoá' cebada len lazzaj que tu dza huen dxin, pero bití' gunu' ga yadzaj le naca za, en bití' bi gunu' que xisi uva nal-la.”

⁷ Cate' buládzu'ë le budapi le naguela' guichi na', biyönda' ruí'i didza' nu budapi na' nabán, ate' gunná: “¡Gudá uyú'!”

⁸ Buyúa', en bilé'eda'-ba' tuba' böa' gulaj, ate' nu na' dxía lëba' nazí'i le Yöl-la' Guti, ate' zéajlen nu na' nu nazí'i le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacuá' yödzülió para guti léguequi len guié tuchi', en len yöl-la' ridún, en len yugu' yödzühuë', en len yugu' böa' guixi' sínía' dzö'öba' luyú.

⁹ Cate' buládzu'ë le guyu' le naguela' guichi na', bilé'eda' zxañ bucugu yehua' yubá ni' yugu' bö' gulaca cazë' bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'.

¹⁰ Gulu'í'i zidzaj didza' yugu' bö' ni, gula'nná: “¡Xantu' Lá'ayi, runu' ca rnno'! ¿Bátaxi caz uchi'a usöróu' queëtu', en uzí'i lëbu' yugu' bönni' nacu'ë yödzülió tu' gulútië' netu'?”

¹¹ Bulu'nödzejë' quéguequi yugu' lari' chiguíchido'os ilácuë', en gulë' léguequi: “Ral-la' uzí' ládxi'li' ia'tú chí'ido'osö, ga idxinrö

dza ila'dxín yúgu'tè luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bëtigaca libí'ili'."

¹² Cate' buládu'ë le buzzopi le naguela' guichi na', buyúa', en bilé'eda' gudödida' budó' zxu' luyú. Böáca gasaj gubidza, en guca ca tu lari' guitsa' gasaj, ate' böáca beo' xiná ca naca rön.

¹³ Gula'guínnaj bölej lúzxiba lu yu, le guca ca raca que yaga higo, cate' ta'guínnaj le ribía cate' rutá le bö' budunu'.

¹⁴ Gudödi que lúzxiba, ate' guca que ca raca que tu guichi cate' nu rutubi le. Bulu'tsá' xilátjagaca yúgu'tè guí'ado', enca' yúgu'tè gapa zoa luyú bidxi lu nísado'.

¹⁵ Ní'irö yugu' bönni' ta'nná bë'ë luyú, en yugu' bönni' lo, en yugu' bönni' ta'lé'enë' yöl-la' tsahui', en yugu' bönni' ta'nná bé'enë' bönni' röjáquië' gudil-la, en yugu' bönni' dë lu ná'agaquië', en yúgu'tè nupa nadó'ogaca, en yúgu'tè nupa biti' nadó'ogaca bulu'cachi' lógaquië' gapa naca zcan bulóaj, en gapa naca lë'e guiöj lu guí'ado'.

¹⁶ Gulë' yugu' guí'ado' na', en yugu' lë'e guiöj na': "Guli'dubága' netu', en buli'cachi' netu', para cabí ilé'e Nu na' rö'ö lataj lo ni' netu', en para cabí ideli' yöl-la' rilé queë' Bönni' na' náquië' Bö'cu' Zxíla'do' netu'.

¹⁷ Chibidxin dza ulu'í lahui yöl-la' rilé quégaquië', ate' ¿nuzxi caz sequi' guá' ilén le?"

7

Tu gayuá' yu' tapa-un milë' bönni'

¹ Gudödi gulaca yugu' lë ni bilé'eda' tapa gubáz lá'ayi zuíguequinë' idapa la'a yödzölió. Tu'záguë'ë xinözgaca idapa bö' recja tsölá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga.

² Bilé'eda' ca' ia'túë' gubáz lá'ayi zë'ë rirúajë' ga rilén gubidza. Nu'ë tu le udë'ë nupa náca gaca queë' Dios ban le gaca bë' léguequi. Bë'ë zidzaj didza', en bulidzë' idapë' gubáz lá'ayi ni' nadödi lu ná'agaquië' yöl-la' huáca unná bë' ilún dítjanë' luyú, en nísado'.

³ Gudxë' légaquië': "Biti' gun dítjali' luyú, en nísado', en yugu' yaga cate' udá'arötu' tu le gaca bë' ra' xigágaquië' bönni' huen dxin queë' Dios queëru'."

⁴ Biyönda' tsa náca gacaquië' bönni' da' légaquië' lë na' naca bë'. Náca gacaquië' idú tu gayuá' yu' tapa-un milë' ladaj yúgu'tè cö xí'ini xí'sóë' Israel.

⁵ Yugu' bönni' na' da' légaquië' lë na' naca bë' náca gacaquië':

Chinnu milë' di'a dza queë' Judá.

Chinnu milë' di'a dza queë' Rubén.

Chinnu milë' di'a dza queë' Gad.

6 Chinnu milë' di'a dza queë' Aser.
Chinnu milë' di'a dza queë' Neftalí.
Chinnu milë' di'a dza queë' Manasés.

7 Chinnu milë' di'a dza queë' Leví.
Chinnu milë' di'a dza queë' Isacar.

8 Chinnu milë' di'a dza queë' Zabulón.
Chinnu milë' di'a dza queë' José.
Chinnu milë' di'a dza queë' Benjamín.

Bönachi guizxi yu nácugaca lari' chiguíchido'os

9 Gudödi guca lë ni buyúa', en bilé'egacada' bönachi zían, cuntu nu gaca ulaba léguequi. Nabábagaquië' yúgu'të yödzö tuí'i didza' yúbölö idútë yödzölió. Zuíguequinë' ca dödilö lahui lataj lo, ga na' rö'ë ca' Bönni' na' náquië' Bö'cu' Zxíla'do', en nácugaquië' lari' chiguíchido'os, en zöngaquië' zin.

10 Tu'ë zidzaj didza' yúgu'të, ta'nnë':
¡Yöl-la' rusölá za' lu në'ë Dios queëru', rö'ë lataj lo ni,
en za' ca' lu në'ë Bönni' na' náquië' Bö'cu' Zxíla'do'!

11 Zuíguequinë' yúgu'të gubáz lá'ayi idú gásibi'ilö lataj lo na', enca' idú gásibi'ilö ga nacu'ë bönni' gula, enca' idú gásibi'ilö ga nacuá' idapa na' nabángaca, ate' tu'tsaga lógaquië' lu yu ca dödilö lahui lataj lo na', en ta'yéaj láchxi'gaquië' Dios,

12 ta'nnë':
¡Ca' gaca! ¡Yöl-la' ba Li', Dios queëtu'!
¡Napu' yöl-la' zxön, en yöl-la' réajni'!
¡Rëtu' Li': "Xclenu", en runtu' Li' bal!
¡Napu' yöl-la' unná bë', en yöl-la' huáca!
¡Gácatíca'sö caní quiu', Dios queëtu'!
¡Ca' gaca!

13 Ní'rö gunábinë' neda' tuë' bönni' gula na', gunnë': "¿Nupxi na' nácugaca lari' chiguíchido'os, en gapxi bönni' légaquië'?"

14 Neda' gudxa' lë': "Xan, li' nöz quézinu'."
Lë' gudxë' neda': "Nupa ni gula'guí'i gula'záca'da'. Gula'gubë' lari' nácugaquië', en bulu'ún léguequi chiguíchido'os len xichönë' Bönni' na' náquië' Bö'cu' Zxíla'do'.

15 Que lë ni na' nacu'ë ca dödilö lahui lataj lo ga rö'ë rinná bë'ë Dios, en tunë' dxin lahuë' Lë' rëla, en të dza lu yudo' queë'. Nu na' rö'ö lataj lo ni gun chí'i légaquië' tu' zóaléntica'sö légaquië'.

16 Bítí'rö ila'dunë', en bítí'rö ila'bidxë' nisa, en bítí'rö ila'yéguinë' gubidza, en bítí'rö iléquinë' xilá

17 tu' uyúë' Bönni' na' náquië' Bö'cu' Zxíla'do' légaquië' ca nu uyú bö'cu' zxíla'. Zoë' gatsaj láhui'lö lataj lo na'. Ichë'ë légaquië' gapa ralaj nisa le ruí'i yöl-la' na'bán, ate' Dios uzxië' lógaquië' nisa ta'bödxë'."

8

Le igadxi le naguela' guichi

¹ Cate' buládzu'ë le igadxi le naguela' guichi na', gurö'ö dxi yehua' yubá idú gatsaj hora.

² Ní'irö bilé'egacada'-në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi.

³ Ní'irö bidë' ia'tué' gubáz lá'ayi, nu'ë tu zxíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'.

⁴ Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' rö'ë Dios.

⁵ Ní'irö gubáz lá'ayi na' bulië' zxíga'do' na' len bo' yalaj dxía lu bucugu na', ate' gurú'unë' le luyú. Gunnë guziú', ate' bö zidzaj biyón. Guyëpi yösa, en gudödi budó' zxu'.

Tu'cödxë' lúzuba' böa' bëdxi

⁶ Ní'irö igádxitë' gubáz lá'ayi na' zöngaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

⁷ Bucödxë' gubáz lá'ayi zí'alö lúzuba' böa' bëdxi, ate' gurö'ö guiöj bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca' tu cö' tsa tu tsonna cö' yaga. Guyegui ca' yúgu'të guixi' ya'a.

⁸ Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu guí'a zxön régui lu nísado', ate' ia'láti'do'os ca gatsaj tu gatsaj nísado' na' böáca rön.

⁹ Guti tu cö' tsa tu tsonna cö' le nabángaca dzö'ö lu nisa zxön na', ate' guca ditaj tu cö' tsa tu tsonna cö' le ta'dödi láhui'lö nisa na'.

¹⁰ Bucödxë' gubáz lá'ayi bunni lúzuba' böa' bëdxi, ate' böxaj tu bölj lúzhiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' rö'ö luyú.

¹¹ Bölj ni lëba' Ajenjo, le naca tu le silá', ate' böáca silá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böáca silá'.

¹² Bucödxë' gubáz lá'ayi budapi lúzuba' böa' bëdxi, ate' böáca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böáca chul-la tu cö' tsa tu tsonna cö' bölj. Caní guca, bití' buzení' gubidza ia'láti'do'os ca gatsaj tu gatsaj dza, en bití' bulu'zení' bölj, en beo' ia'láti'do'os ca gatsaj tu gatsaj rëla.

13 Ní'irö buyúa', en biyönda' ru'ë zidzaj didza' tu'ë gubáz lá'ayi ridödë' gatsaj láhui'lö lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cödxë' ia'tsonnë' gubáz lá'ayi na' lúzuba' böa' bëdxi!"

9

1 Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu böljaj lúzxiba böxaj luyú, ate' bulu'nödzjë' nu na' zxi'ini guié que lataj chul-la.

2 Gusaljë' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ní'a que dzön na'.

3 Lu dzön na' bila'rúajba' böchi'zu, yugu' le gula'zxóasiba' luyú, ate' Dios bë'ë légacaba' lataj iládu'ba' bönachi ca tunba' xöjnö' dzö'öba' luyú.

4 Gunná bé'enë' légacaba' biti' ilún dítjaba' guixi' rö'ö luyú, en biti' ilún dítjaba' yugu' le naca ya'a, en calëga yugu' yaga, pero gácasö iládu'ba' bönachi na' biti' da' lë na' naca bë' nu nequi queë' Dios ra' xigágaquië'.

5 Biti' bë'ë légacaba' lataj ilútiba' légaquië', pero ulu'saca' zí'siba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnö'.

6 Yugu' dza na' ilë'ënë' yugu' bönni' iluti cuíngaquië', pero biti' ila'zéqui'në'. Ilë'ëninë' ilátië', pero ucuíta cuini yöl-la' guti.

7 Nalá'gacaba' böchi'zu na' ca nácagacaba' böa' nácugacaba' le néquiguequini guié, para tsöjácaba' gudil-la. Dxíagaca ícjagacaba' le nácagaca ca tu le néquini oro. Naca lógacaba' ca naca lógaca bönachi.

8 Naca guitsa' ícjagacaba' ca naca guitsa' ícjanu nigula. Nácagaca láyi'gacaba' ca nácagaca láyi'ba' bëdxi guixi'.

9 Nácugaca luchú'ugacaba' le néquini guié. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la.

10 Nácagaca xibángacaba' ca naca xibángacaba' xöjnö', zoa lí'igacaba'. Lu xibángacaba' na' zoa le tu'dí'iniba', para ilunba' zi' bönachi idú ca gayu' beo'.

11 Zoa nu rinná be'e légacaba', nu na' naca gubáz xihui' que lataj chul-la. Gubáz ni nazí'i le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

12 Chigudödi tu le rusuniti bönachi, le za' zí'alö, pero zá'gaca ia'chopa le ulu'suniti bönachi.

13 Bucödxë' gubáz lá'ayi buzxopi lúzuba' böa' bëdxi, ate' biyönda' tu chi'i ruí'i didza' gatsaj láhui'lö tapa le nácagaca ca

lúzuba' bēdxi dá'gaca tapa squin bucugu na' néquini oro, le rō' lahuē' Dios.

¹⁴ Chi' i ni ruí'ilen didza' gubáz lá'ayi buzxopi na' si' bucōdxē' lúzuba' bōa' bēdxi, en rnna: "Busedxi idápatē' gubáz xihui' na' nága'gaca ra' yegu Eufrates."

¹⁵ Ní'irō bulu'sedxē' tapa gubáz xihui' na', chinucōzē' Dios léguequi para la' ná'asō, le naca dza na', en beo' na', en izi na', para ilútigaca tu cō' tsa tu tsonna cō' bōnachi nacuá' yōdzōlió.

¹⁶ Biyōnda' tsa nácagaquiē' bōnni' rōjáquiē' gudil-la dxíagaquiē'-ba' bōa', en dzágagaquiē' tapa gubáz xihui' na'. Nácagaquiē' idú chopa gayuá' mil milē'.

¹⁷ Bilé'egacada'-ba' bōa' na' ca tu lu bixín, ate' nupa ta'bía légacaba' nacu luchú'uguequi le naca gui'do'os, en ya'a ca lúxiba, en gulaj. Nácagaca ícjagacaba' bōa' na' ca ícjaba' bēdxi guixi', ate' lu ruá'agacaba' ta'rúaj gui', en dzōn, en tu le ruzégui'da', nazi' i le azufre.

¹⁸ Yugu' lē na' ta'rúaj ruá'agacaba' bētigaca tu cō' tsa tu tsonna cō' bōnachi nacuá' luyú, lē na' nácagaca guí', en dzōn, en lē na' ruzégui'da'.

¹⁹ Yugu' le tu'dí'iniba' bōa' na' ta'rúaj ruá'agacaba', en dzō'ō lu xibángacaba', tu' nácagaca xibángacaba' ca yugu' bēla zoa ícjagacaba' le tu'dí'iniba'.

²⁰ Ia'zíca'rō bōnachi, nupa biti' gulati lu chopa ni tu'suniti, biti' bulu'bí'i lādxi'guequi para cabirō ilúngaca ca na' túngaca, en biti' bulu'sán ta'yéaj lādxi'guequi yugu' bō' xihui', en yugu' budó' guió'j budó' yaga, yugu' budó' na' biti' ta'lé'e, en biti' ta'yōni, en biti' gaca sá'gaca.

²¹ Biti' bulu'bí'i lādxi'guequi para cabirō iluti bōnachi, en calēga para cabirō ilúngaca yōl-la' gudzá' quéguequi, en le ruá' dō' túngaca, en yōl-la' ribán quéguequi.

10

Gubáz lá'ayi, nuá' lu nē'ē tu guíchido'

¹ Ní'irō bilé'eda'-nē' ia'tuē' gubáz lá'ayi nál-la, bōtjē' birúajē' yehua' yubá, nácuē' bōaj lúxiba, en zoa ca tu biguita' ícjalē'. Rēpi yōsa bení' lahuē' ca run gubidza, ate' nácagaca ni'ē ca ya'zxōn ta'yegui.

² Zoa lu nē'ē tu guíchido' nayalaj, ate' tu ni'ē ibēla nulibē' lu nísado', en ia'tú ni'ē yōgōla nulibē' luyú bidxi.

³ Ní'irō bē'ē zidzaj didza', ate' biyōn chi'ē ca riyōn cate' ribōdxi'aba' bēdxi guixi', en cate' budxi bē'ē zidzaj didza' na', bila'yōni chí'igaca gadxi guziú'.

⁴ Cate' budxi bila'yōni chí'igaca guziú' na', neda' si' uzúaja' lu guichi, pero biyōnda' nu ruí' i didza' yehua' yubá, rē neda':

“Bucáchi'sö didza' ni gulu'i gadxi guziú' na'. Biti' uzúaju' didza' na' lu guichi.”

⁵ Ní'irö gubáz lá'ayi na' bilé'eda'-në' zuínë' lu nísado', en luyú bidxi, guchisa në'ë ibëla zaca' lúzxbalö,

⁶ ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacué' ni', enca' yödzülió, en le nacué' ni', enca' nísado', en le nacué' ni', ate' gunné': “¡Bíti'rö tse!

⁷ Cate' ucödxë' gubáz lá'ayi igadxi lúzuba' böa' bëdxi, usudxinë' Dios le nagachi' queë', lë na' buluí'inë' yugu' huen dxin queë', bönni' ni' gulu'ë didza' uláz queë'.”

⁸ Ní'irö chi'i na' biyönda' rirúaj yehua' yubá bë'len neda' didza' leyúbölö. Gunná: “Guyéaj, yöjxi' guíchido' nayalaj na' zönë' gubáz lá'ayi na' nulibë' lu nísado', en luyú bidxi.”

⁹ Guyija' ga na' zoë' gubáz lá'ayi na', en gunábida'-në' gunné' guíchido' na' quia'. Gubáz lá'ayi na' gudxë' neda', gunné': “¡Guzxí, gudagu! Lu ru'u gaca zxixi ca naca bidxína'do' queëba' buz, pero lë'u huöáca silá'.”

¹⁰ Guzxí'a guíchido' na' zönë', en gudahua' le. Lu ru'á guca zxixi ca naca bidxína'do' na', pero cate' budxi gudahua' le, böáca silá' lë'a.

¹¹ Ní'irö gudxë' neda': “Ral-la' gu'u didza' leyúbölö uláz queë' Dios lógaca zían cö' bönachi izá'a, en gapa nacué' yúgu'të yödzö, en gapa tuí' zían didza' yúbölö, en lógaca zían bönni' unná bë'.”

11

Chopë' bönni' tunë' ba nali

¹ Ní'irö bidxín nu benna tu gui quia' le naca ca tu yaga ribixi, en gudxi neda': “Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacué' ni' ta'yéaj ládxi'gaca Dios.

² Bucá'ana ca' lö'a que yudo' na' dë ní'ilö, en biti' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chop-a-un beo'.”

³ Gudxë' ca' neda': “Isöl-la'a chopë' bönni' ilunë' ba nali quia', ate' ilu'ë didza' uláz quia' idú ca chinnu gayuá' yu tsónnalalaj dza, nácugaquië' lari' le naca bödzádzado'.”

⁴ Chopë' bönni' ni tunë' ba nali, nácagaquië' chop-a yaga olivo na' nazúaj lu guichi lá'ayi ca naca quégaquië', en nácagaquië' ca' chop-a le nuá'gaca guí' na' nacué' lahuë' Dios, Xani yödzölió.

⁵ Channö guë'ëni nu guá' dö' quégaquië', irúaj guí' ruá'agaquië' le usuniti nu na' rë'ëni guá' dö' quégaquië', en guti nu na', enca' nupa ta'dá'baga' légaquië'.

⁶ Chopë' ni dë lu ná'agaquië' ulu'záguë'ë xinöza nisa guiöj lúzxbi, para cabí galaj guiöj tsca dza na' ral-la' ilu'ë didza'

uláz queë' Dios, ate' dë lu ná'agaquië' ca' ilunë' ga huóaca nisa rön, en ilunë' ga gatsaj yödzhüë' yödzölió. Ilunë' caní bálati'tës luzuí ilë'ënnë'.

⁷ Cate' údxi ilunë' ba nalí, irúajba' böa' sínia' lataj chul-la, en tíl-lalenba' légaquië', en ucúl-laba' légaquië', en gútiba' légaquië'.

⁸ Le gulaca cazë' ila'tulusö ca' la' nöza lu yödzö zxön, ga ni' gudë'e ca' Xanru' lë'e yaga cruz, en ca rucúdz'u' didza', nazí'i le ca' Sodoma, enca' Egipto.

⁹ Idú ca tsonna dza yu' gatsaj bönachi yúgu'të yödzö, en yúgu'të bönachi izá'a, en bönachi tuí'i zían didza' yúbölö, en bönachi yúgu'të luyú, ila'lé'eni le gulaca cazë', en biti' ilu' lataj nu ucache' légaquië' yeru ba.

¹⁰ Ulu'dzéjade'e nupa nacua' yödzölió tu' gulatië', ate' lu yöl-la' rudzeja quéguequi ila'sól-la' le ulu'nödzaj quégaca luzë'eguequi, tu' bulu'saca' zì'ë chopë' ni gulu'ë didza' uláz queë' Dios bönachi nacua' yödzölió.

¹¹ Ní'irö cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuinë', ate' guladxi gula'dzöbi yúgu'të nupa bila'lé'e légaquië'.

¹² Ní'irö bë' zidzaj didza' tu chi'i yehua' yubá, en gudxi légaquië': "Gulí'cuén ni."

Gula'benë' lu böaj lúzxiba zaca' yehua' yubálö, ate' nupa na' gula'dá'baga' légaquië' bila'lé'e légaquië'.

¹³ La' ní'isö gudödida' budó' zxu', ate' biguinnaj tu cö' tsa tu chi cö' yugu' yu' u dzö'ö lu yödzö na', ate' lu budó' zxu' na', gularati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönachi, ate' chizóa idxín le bunny le usuniti léguequi.

Rucödxë' gubáz lá'ayi igadxi lúzuba' böa' bëdxi

¹⁵ Bucödxë' gubáz lá'ayi igadxi lúzuba' böa' bëdxi, ate' guluí'i zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzölió
nadödigaca lu në'ë Xanru' Dios,
en lu në'ë Cristo.

Lë' inná bë'tica'së'.

¹⁶ Ní'irö idapa uru'ë bönni' gula na' rö'ögaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios.

¹⁷ Ta'nnë':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxön quiu',

en risí lo' rinná bë'u!

¹⁸ ¡Gula'lé bönachi yugu' yödzö

pero chibidxín dza gunu' léguequi xíguia!
 ¡Naca dza uchi'a usöröu' nupa chinátigaca!
 ¡Ubi'u quégaquië' huen dxin quiu',
 yugu' bönni' gulu'ë didza' uláz quiu',
 nupa néquiguequi quez quiu', en gulún bal Lo',
 nupa nácgaca cá'asö, en nupa nácgaca lo!
 ¡Chibidxín dza usunítu' nupa bulu'suniti yödzölió!

¹⁹ Ní'irö gyalaj yudo' queë' Dios rö'ö yehua' yubá, ate' bilá' lahui guí'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunné guziú' luyú. Gudödi budó' xzu', en gurö'ö guiöj bögui' yöla sunna.

12

Tunu nigula, en tuba' bëla zxön xitsiní'

¹ Ní'irö bilá' lahui yehua' yubá tu le naca bë'da', buluí'i lonu tu nigula náccunu le naca ca gubidza, en zoa zcan ní'anu beo'. Dxía ícjanu tu le néquini oro ga dxíagacaba' chinnu böljaj bení'.

² Nigula ni chizóa soa bí'ido' queënu, en ribödxinu tu' rúdia' lë'ënu. Riguí'i rizáca'nu ruzóanu bí'ido' queënu.

³ Ní'irö ia'tú le naca bë' bilá' lahui yehua' yubá. Buluí'i loba' tuba' bëla zxön xitsiní'. Náccaba' xiná guí'is, ate' dxíagaca gadxi ícjaba', en chi lúzuba', ate' dxía tu le néquini oro tu tu ícjaba' na'.

⁴ Len xibanba' gú'uyöjba' tu cö' tsa tu tsonna cö' böljaj lúzxiba, en gurú'unaba' légcacaba' luyú. Guzuí'ba' bëla zxön xitsiní' na' lonu nigula na' chizóa sóabi' bí'ido' queënu. Zóaba' sina' gáguba'-bi' bí'ido' queënu na' ca gáljabi' na'.

⁵ Buzóanu-bi' tubi' bi'i bönni'do' ral-la' inná bé'ebi' yúgu'të yödzö len tu xiyaga guíë. La' bucuítatë'ë-bi' Dios bí'ido' queënu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë.

⁶ Buzúnnajnu nigula na', zéajnu lu lataj cá'asö, ga ni' chin-upë'ë Dios lataj queënu. Ulu'gahuë'-nu ni' idú ca chinnu gayuá' yu' tsónnalalaj dza.

⁷ Gudödi gulaca lë ni, gúcada' gudil-la yehua' yubá. Gubáz lá'ayi lo lë' Miguel, en yugu' gubáz lá'ayi dá'gaquië' lë' gula'díl-lalenë'-ba' bëla zxön xitsiní' na'. Gula'dil-la bëla zxön na', en yugu' gubáz xihui' dá'gaca lëba'

⁸ pero biti' bila'deli' lu gudil-la na'. Que lë ni na' bíti'rö bidzöli xilátjagaca yehua' yubá.

⁹ Caní guca, gula'rú'unë'-ba' bëla zxön xitsiní' na' ní'ilö. Náccaba' bëla na' zóaba' dza ni'te, lëba' tu' xihui'. Gula'rú'unë' tu' xihui' yödzölió, dzágagaca le gubáz xihui' na' dá'gaca le.

¹⁰ Ní'irö biyönda' tu chi'i ruí'i zidzaj didza' yehua' yubá, rnna: "Na'a chibidxín dza nulu'ë lahui yöl-la' rusölá nunë' Dios, en yöl-la' huáca queë', en le rinná bë'ë, enca' le rinná bë'ë

Cristo, tu' chigula' rú'unë' ní'lö nu na' buzegui yugu' böchi' luzá'aru' didza'. Rëla, en të dza buzegui légaquië' didza' lahuë' Dios queëru'.

¹¹ Yugu' böchi' luzá'aru' ni bulu'cul-lë' nu na', tu' bulu'gunë' dxin xichönë' Bönni' na' náquië' Bö'cu' Zxíla'do' queë' Dios, en tu' bulu'gunë' dxin didza' na' gulunë' ba nali' queë'. Biti' gulu'í ládxi'gaquië' yöl-la' na'bán queégaquië', pero gulátië'.

¹² Que lë ni na' gaca yöl-la' rudzeja yehua' yubá. ¡Buli'dzeja libí'ili', zóali' ni! ¡Bica' bayechi' libí'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquibe'e ia'tú chí'isö dë lataj que."

¹³ Cate' gúquibe'eba' bëla zxön xitsiní' na' chigula' rú'unë'-ba' luyú, ní'irö yöjsóa régu'ba'-nu nigula na' buzóanu bi'i bönni'do' na' queënu.

¹⁴ Ní'irö Dios bë'ë-nu nigula na' chopa xíliba' bisiá' nácagaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ní' ulu'gahuë'-nu idú tsonna iz yu' gatsaj.

¹⁵ Bëla zxön xitsiní' na' gúbaba' nisa zile zaca' cúdzu'lönu, le guca ca tu nisa yegu, en gú'uniba' gua'të nigula na'.

¹⁶ Ní'irö luyú gúcalen nigula na'. Guyalaj luyú na', en gü'í nisa yegu na' gúbaba' bëla zxön xitsiní' na'.

¹⁷ Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'anagaca queënu di'a dza queënu, nupa na' tun ca rnna le gunná bë'ë Dios, en nazi' lu në'eguequi le nunë' Jesucristo ba nali'.

13

Chópaba' böa' sínia'

¹ Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxí'a.

² Böa' sínia' na' bilé'eda'-ba' riná'aba' ca nácaba' tu bédxito', nacuá' ní'aba' ca nácagaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsiní' na' budödiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë' zxön queéba'.

³ Dxía huë' tu ícjaba' böa' sínia' na', le naca le guti lëba', pero buniti huë' na', ate' bulu'bani yúgu'të bönachi yödzölió, en yöjdá'gaca böa' sínia' na'.

⁴ Gula'yéaj ládxi'gaquië'-ba' bëla zxön xitsiní' na', tu' budödiba' yöl-la' unná bë' queéba' lu ná'aba' böa' sínia' na'. Gula'yéaj ládxi'gaquië'-ba' böa' sínia' na', en gula'nnë': "¿Nuzxi

caz naca zxön ca naca zxön böa' sínia' na', en nuzxi caz sequi' tíl-lalen lëba'?"

⁵ Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queë' Dios. Idú ca chopa-un beo' guta' lu ná'aba' yöl-la' unná bë'.

⁶ Gusí loba' rinnëba' queë' Dios, en rinnë xihui'ba' que Lë' Dios, en que lataj lá'ayi queë', en quégaca nupa nacué' yehua' yubá.

⁷ Guta' lu ná'aba' gudíl-lalenba' nupa néquiquequi quez queë' Dios, en bucúl-laba' légaquië'. Guta' ca' lu ná'aba' gunná bé'eba' yúgu'të bönachi izá'a, bönachi yúgu'të yödzö, en bönachi tuí'i yúgu'të didza' yúbölö, en bönachi idútë yödzölió.

⁸ Yúgu'të bönachi nacué' yödzölió gula'yéaj ládxi'gaca böa' sínia' na', nupa na' bití' nazúajgaca láguequi lu guichi que yöl-la' na'bán, guichi na' buzúajë' Bönni' na' náquië' Bö'cu' Zxíla'do' queë' Dios cate' si' guta' yödzölió. Buzóa cazë' Dios gútië' Bönni' na' ni'a quégaca bönachi queë'.

⁹ Channö nu riyöni, ral-la' uzë nagui.

¹⁰ Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guié tuchi', len guié tuchi' ilátigaca. Que lë ni na', ral-la' ila'böza zxön ladxi' nupa néquiquequi queë' Dios, en ta'yéajlë' Lë'.

¹¹ Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxíla', en ruí'iba' didza' ca na' ruí'iba' didza' bëla zxön xitsiní' na'.

¹² Dë lu ná'aba' böa' sínia' ni yúgu'të yöl-la' unná bë' queë'ba' böa' sínia' bidxinba' zí'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacué' yödzölió böa' sínia' zí'alö na', böa' na' buniti huë' le guti lëba'.

¹³ Böa' buropi na' runba' ca' le nácagaca bë' ga ridxintë runba' ga ruhuöxaj guí' le za' lúzxi'ba, en ruhuöxaj luyú lógaca yúgu'të bönachi.

¹⁴ Rizí' yé'eba' bönachi nacué' yödzölió len le nácagaca bë' dë lu ná'aba' runba' loba' böa' sínia' zí'alö na'. Rinná bé'eba' bönachi nacué' yödzölió ilunë' tu budó' ca nácaba' böa' sínia' na' gúcaba' huë' que guié tuchi', ate' nabanba'.

¹⁵ Dë lu ná'aba' runba' ga soa ibán budó' na' naca ca nácaba' böa' sínia' zí'alö na', en güi' didza' budó' ni, en gun ga nu guti yúgu'të nupa bití' ila'yéaj ládxi'gaca le.

¹⁶ Benba' ga gudá' yúgu'të bönachi tu le naca bë' dá'gaca lëba', nupa nácagaca cá'asö, en nupa nácagaca lo, nupa ta'lé'e yöl-la' tsahui', en nupa nácagaca yechi', nupa bití' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'.

17 Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'.

18 Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

14

Le tul-lë' tu gayuá' yu' tapa-un milë' bönni'

1 Gudödi ni' buyúa', en bilé'eda'-në' Bönni' na' náquië' Bö'cu' Zxíla'do' zuinë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'do', enca' Lë' Xuzë'.

2 Ní'irö biyönda' tu le rigú'u bö yehua' yubá, le rinnë zidzaj ca rinnë tu yegu zxön, en ca rinnë guziú'. Biyönda' le riyön cate' ta'guínnië' lë'e tu le rul-la zë zían du que.

3 Tul-lë' tu le rul-la cubi, nacu'ë ca dödilö lahui lataj lo ni', enca' ca dödilö lahui ga na' nacuá' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquië' ladaj bönachi yödzülió.

4 Nácagaquië' bönni' ni idú ladxi'. Biti' gula'cuá'lenë' nigula, tu' nácagaquië' idú bönni' ra'bán. Söjácalenë' Bönni' na' náquië' Bö'cu' Zxíla'do' gátitës ga sa'yéajë'. Cristo caz böá'uë' légaquië' ladjagaca bönachi, ate' nácagaca nupa bulu'dödi cuíngaquië' zí'alö queë' Dios, enca' queë' Bönni' na' náquië' Bö'cu' Zxíla'do'.

5 Catu caz gula'z'í yë'ë, ate' cuntu nu gaca bi innë quégaquië' ga na' nacu'ë ca dödilö lahui lataj lo ga rö'ë Dios.

Didza' röjuá'gaquië' tsonna gubáz lá'ayi

6 Ní'irö bilé'eda' ia'tué' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacuá' yödzülió, bönachi idütë luyú, yúgu'të bönachi izá'a, en bönachi tuí'i yúgu'të didza' izá'a, en bönachi yúgu'të yödzo.

7 Ru'ë zidzaj didza', rnnë': "¡Gulí'gádxí Dios, en guli'cu'ë yöl-la' ba tu' chizóa uchi'a usöröë' bönachi! ¡Gulí'tséaj ládxe'ë Dios, nunë' lúzxiba, en luyú, en nísado', en gapa ralaj nisa!"

8 Ia'tué' gubáz lá'ayi söjnhuë' gubáz lá'ayi ni, en rnnë': "¡Chibudxi que yödzo Babilonia! ¡Chibudxi que yödzo zxön na'! Caní guca que, tu' gulún nupa nacuá' ni' ga gula'z'í lu ná'agaquië' bönni' yúgu'të yödzo ilunë' ca nácagaca le ta'zë ládxi'gaquië' le ruá'dö'."

9 Ia'tué' gubáz lá'ayi söjnhuë' gubáz lá'ayi buropi ni, en ru'ë zidzaj didza', rnnë': "¡Channö nu tseaj ladxi'-ba' böa' sínia' na',

enca' budó' queéba', en gü'i lataj ta' ra' xigué o lu në'e le naca bē' da' lēba',

¹⁰ gunē' Dios nu ni xíguia' lu yöl-la' rilé queē'! ¡Qui'i saca' nu na' lu guí', en lu lē na' ruzégui'da', lógaca gubáz lá'ayi, en lahuē' Bönni' na' náquiē' Bö'cu' Zxíla'do'!

¹¹ Cuéntica'sō dzōn que guí' ga ni' quí'i saca' nu na'. Rēla, en te dza qui'i saca', ate' catu caz gata' lataj ulu'z'í lādxi'gaca nupa ila'yéaj lādxi'gaca-ba' böa' sínia' na', en budó' queéba'. Biti' ulu'z'í lādxi'gaca nupa ilu'í' lataj ta' laba' léguequi.

¹² Que lē ni na' nupa na' néquiguequi queē' Dios, en tun ca rnna le gunná bē'ē, en ta'yéajlē' Jesús, ral-la' ila'bōza zxōn ladxí'."

¹³ Ní'irō biyōnda' chí'i nu ru'í' didza' yehua' yubá, en rē neda': "Buzúaj lu guichi lē ni: ¡Bica' bágaca nupa ilátigaca na'a si lo, nupa na' ta'yéajlē' Xanru'!"

Dios Bö' Lá'ayi rnnē': "¡Ca' gaca! ¡Ulu'z'í lādxi'gaquiē' lu dxin gulunē', en ulu'z'í'ē xibé ca sa'yéaj le gulunē'!"

Tu'z'í'ē le rulá' luyú

¹⁴ Ní'irō buyúa', en bilé'eda' tu böaj lúzxiba chiguí'chido'os, ate' lu böaj na' rō'ē tu bönni' náquiē' ca náquiē' Bönni' Guljē' Bönachi, ate' dxía icjē' tu le néquini oro, ate' zōnē' tu guíē tuchi' lu në'ē.

¹⁵ Birúajē' tuē' gubáz lá'ayi lu yudo' rō'ō yehua' yubá, ate' bē'ē zidzaj didza', en gudxē' Nu na' rō'ō lu böaj na', gunné': "¡Bugún dxin guíē tuchi' quiu', en guchugu xzoa' xtila, tu' chibidxín dza nu uzí' le! ¡Chinabídx do que le dē yōdzölió!"

¹⁶ Ní'irō Nu na' rō'ō lu böaj na' bugún dxin guíē tuchi' iduté yōdzölió, ate' buzi'ē le rulá' luyú.

¹⁷ Ní'irō birúajē' tu gubáz lá'ayi lu yudo' zoa yehua' yubá. Nu'ē ca' tu guíē tuchi'.

¹⁸ Birúajē' ia'túē' gubáz lá'ayi ra' bucugu ni', dē lu në'ē inná bé'enē' guí', ate' bē'ē zidzaj didza', en bulidzē' gubáz lá'ayi z'í'alō na' nu'ē guíē tuchi', gunné': "¡Bugún dxin guíē tuchi' quiu', en butubi tu'xóa huéaj le ta'bía lubá uva rō'gaca yōdzölió, tu' chiná le ta'bía lubá uva!"

¹⁹ Ní'irō gubáz lá'ayi ni bugunē' dxin guíē tuchi' iduté yōdzölió, en butubē' le ta'bía lubá uva rō'gaca luyú, ate' yōjchú'unē' le ta'bía lubá uva na' lu yeru zxōn ga izí xisi. Yugu' lē ni rulu'í' ca gunē' Dios, gunē' xíguia' bönachi nacuá' yōdzölió.

²⁰ Bulu'libē' le ta'bía lubá uva na' lu lerui zoa ní'ilō ra' yōdzō, ate' lu lerui na' birúaj rōn, en gurén ga bidxintē ruá'agacaba' böa', en gudōdi rōn na' idú tsca gaca sá'aru' idú chinnu dza.

15

Yugu' gubáz lá'ayi nuá'gaquiē' gadxi yōdzōhuē'

¹ Bilé'eda' ia'tú le nácada' bē' yehua' yubá, le run ga nu rubani. Bila'rúajē' gadxi gubáz lá'ayi, nuá'agaquiē' gadxi yödzhuhē' röjsétegaca, le ugunē' dxin Dios, údxi gunē' xíguia' bönachi yödzölió.

² Bilé'eda' ca' tu le naca ca tu nísado' le rēpi yōsa bení' ca guiōj jara le nutsí' guí'. Nupa na' bulu'xicja lu bōa' sínia' na', en lu budó' queēba', en lu laba', zuígaca lu lē na' naca ca tu nísado', en nuá'agaquiē' le tul-la, yugu' le bē'ē Dios quégaquiē'.

³ Tul-lē' le rul-la na' bil-lē' Moisés, bönni' huen dxin queē' Dios. Naca tu le rul-la queē' Bönni' na' náquiē' Bö'cu' Zxíla'do'. Ta'nnē':

¡Li', Xantu' Dios, zxöntērō nacu' Li'!

¡Zxöntērō naca yúgu'tē le benu',

le tun ga rubánitu'!

¡Li' rinná bé'enu' yugu' yödzö!

¡Idú dxí'ado', en idú tsahui' naca ca bi runu'!

⁴ ¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'tē yödzö,

en ila'yéaj ládxi'guequi Li'

tu' ta'lé'e naca tsahui' yúgu'tē le runu'!

⁵ Gudödi guca lē ni, buyúa', en bilé'eda' gualaj yudo' yehua' yubá ga ni' dē lataj lá'ayi que le naca bē' zóalenē' Dios bönachi queē'.

⁶ Bila'rúajē' gadxi gubáz lá'ayi lu lataj lá'ayi na', nuá'agaquiē' gadxi yödzhuhē' na'. Nácugaquiē' lari' nazáca'da' le rēpi yōsa bení', en nuga'gaca luchú'ugaquiē' le néquiguequini oro.

⁷ Ní'irö tu nu nutsa' ladaj idapa nupa na' nabángaca, bē' que queégaquiē' gadxi gubáz lá'ayi na' gadxi zxíga'do' néquiguequini oro, en yúdzugaca le rulu'í yöl-la' rilé queē' Dios, Bönni' zoa cazē'.

⁸ Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queē' Dios. Cuntu nu sequí' tsaza lu lataj lá'ayi na' cate' gátsjarö gadxi yödzhuhē' na' nuá'agaquiē' gadxi gubáz lá'ayi na'.

16

Yugu' zxíga'do' yúdzugaca le rulu'í yöl-la' rilé queē' Dios

¹ Ní'irö biyönda' chí'i nu ruí'i zidzaj didza' lataj lá'ayi na', en rē gadxi gubáz lá'ayi na', rna: "¡Guli'tséaj! ¡Guli'tsöjlálaj gadxi zxíga'do' na' lu yödzölió, le yúdzugaca lē na' rulu'í yöl-la' rilé queē' Dios!"

² Guyijē' gubáz lá'ayi zí'alö, en yöjlaljē' le yudzu zxíga'do' na' zönē' lu yödzölió. Lē na' yudzu zxíga'do' na' ben ga gutsaj

yudzu' ya'a le riláda' idútë le naca caz nupa na' da' léguequi le naca bè' dá'gaca böa' s'nia' na', enca' nupa na' ta'yéaj ládxi'gaca budó' queéba'.

³ Ní'irö guyijë' gubáz lá'ayi buropi, en yöjlanjë' le yudzu zxíga'do' na' zönë' lu nísado', ate' nisa na' böáca rön ca naca rön queë' tu bönni' nati, ate' gulati yúgu'të nupa nabángaca nacua' lu nísado' na'.

⁴ Guyijë' gubáz lá'ayi bunni, en yöjlanjë' le yudzu zxíga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóaca rön.

⁵ Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': "¡Xantu' Dios Lá'ayi! ¡Zoa cazu', en guzóa cazu'! ¡Tshui' nacu' tu' richugu' caní quégaca bönachi

⁶ tu' bulu'laljë' rön quégaca nupa néquiguequi quez quiu', en quégaca nupa gulu'i didza' uláz quiu'! ¡Na'a, Li' runu' ga ilé'ajë' rön, tu' caní ral-la' gaca quégaquië'!"

⁷ Ní'irö biyönda' ru'i didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idútë li, en tshui' naca ca richugu' quégaca bönachi!"

⁸ Guyijë' gubáz lá'ayi budapi na', en yöjlanjë' le yudzu zxíga'do' na' zönë' lu gubidza, ate' gubidza na', bë'ë Dios le lataj uzégui'da' bönachi len gu' que.

⁹ Gula'yégui'da' yúgu'të bönachi tu ruzégui'da' gubidza, pero biti' bulu'bí'i ládxi'gaca, en biti' gula'gú'u Dios yöl-la' ba. Gula'nnë' zi'i queë' Dios, Bönni' dë lu në'ë inná bé'enë' yugu' lë ni tu'saca' zi' bönachi.

¹⁰ Guyijë' gubáz lá'ayi guyu' na', en yöjlanjë' le yudzu zxíga'do' zönë' lu xilataj böa' s'nia' ga na' rinná bë'ëba', ate' gurö'ö chul-la gapa rinná bë'ëba'. Ní'irö, tu' gula'gu'i gula'zaca' bönachi, guláguya'a lúdxigüequi,

¹¹ pero biti' bulu'bí'i ládxi'gaca para cabirö ilúngaca le ruá dö' tunë'. Gula'nnë' zi'i queë' Dios zoë' yehua' yubá tu' ta'gu'i ta'zaca', en tu' dxíagaca yudzu' ya'a na'.

¹² Guyijë' gubáz lá'ayi buzxopi na', en yöjlanjë' le yudzu zxíga'do' na' zönë' lu yegu zxön nazí'i le Eufates, ate' gubidxi nisa yegu na' para ibá'a nöza ga ila'dödi nupa ta'nná bë', nupa ila'rúaj zaca' ga rilén gubidza.

¹³ Ní'irö bilé'eda' bëla zxön xitsiní' na', en böa' s'nia' na', en bönni' ru'ë didza' uláz quégacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu.

¹⁴ Nácagaca yonna bö' ni bö' que tu' xihui', bö' na' tun le nácagaca bë' le ilún ga ulu'bani bönachi. Yójaca bö' xihui' na' idú yödzölió, en yöjtúbigaca nupa ta'nná bë', para tsöjajúequi' lu gudil-la na' gaca lu dza zxön queë' Dios, Bönni' napa cazë' yöl-la' unná bë'.

15 Caní rnnë' Dios: "¡Buli'yútsöca! Guída' tsárido'os ca ridxinë' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxi'a, para cabí gun bayudxi ta xiguídisö, en para cabí utuí' nu na' lahui' lógaca bönachi."

16 Yugu' bö' xihui' na' bulu'tubi yugu' bönni' ta'nná bē'ē, ate' bulu'dubē' tu lataj nazí'i le lu didza' hebreo: Armagedón.

17 Guyijē' gubáz lá'ayi igadxi na', en yöjlaljē' le yudzu zxíga'do' na' zönē' lu bö'ös, ate' bē' zidzaj didza' tu nu zoa lu lataj lá'ayi zoa yehua' yubá ga dē lataj lo na', rnna: "Chinaca."

18 Ní'irö guyēpi yösa, en gur'öda' bö, en gunné guziú'. Gudödida' budó' xzu', le gudödida'rö ca gudödi tsanni ni nacuá' bönachi yödzölió.

19 Birúaj tsonna cö'ölö yödzö zxön na', ate' gula'guínnaj yödzö nacuá' yödzölió. Yöjnenē' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queē' benē' xíguia' nupa nacuá' ni'.

20 Bila'gachi' yugu' luyú bidxi dzö'ö lu nísado', ate' bíti'rö gula'lá' yugu' guí'ado'.

21 Böxaj ca' guió'j bögui' yöla sunna, le za' lúzxiba, en yöjsóa íc'agaca bönachi, ate' nál-li' tu tu guió'j bögui' na' ca tu gayuá' guíē, ate' yúgu'tē bönachi gula'nnē xihui' queē' Dios tu' nözi guió'j bögui' na' tu' bulu'sáca'da' zi'i léguequi.

17

Dios richúguiē' queēnu nigula udá dzaga

1 Ní'irö bidxinē' tuē' gubáz lá'ayi ga zoa', nababē' gadxi gubáz lá'ayi na' gula'zönē' gadxi zxíga'do' na' néquiguequini oro. Bē'lenē' neda' didza', gunné': "Gudá ni, ate' uluí'ida' lí' ca gunē' Dios, gunē'-nu xíguia' nigula udá dzaga na', rö'önu lu nísado' zían.

2 Gula'cua'len lēnu nupa ta'nná bē' luyú yödzölió, en gulún le ruá' dö', ate' gula'zudxi nupa nacuá' yödzölió ni, tu' gulunlen lēnu le bití' naca dxi'a."

3 Dios Bö' Lá'ayi guzóalenē' neda', ate' gubáz lá'ayi na' guchē'ē neda' tu lu lataj cá'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná guí'ido'os. Dxíagaca gadxi íc'jaba', en chi lúzuba', en dá'gaca ca' lēba' le ta'nnē xihui' queē' Dios.

4 Nigula na' dxíanu lēba' nácunu lari' xiná chul-la, en lari' xiná guí'ido'os. Nazí'i biquitaj queēnu le néquiguequini oro, en yugu' guió'j nazaca', en yugu' bugá. Lu ná'anu rö'ö tu zxíga'do' néquini oro, en yudzu le nácagaca xihui', en le ruá' dö' runnu.

5 Ra' xigánu dá'gaca ca lēnu, le tu'luí'i tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió."

6 Gúquibe'eda' nazúdxinu nigula na' tu' bennu ga gulaj rön quégaca nupa néquiguequi queë' Dios, en quégaca nupa na' zoa nu bëti léguequi tu' gulún ba nalí queë' Jesús. Cate' bilé'eda'-nu, bubánide'eda'.

7 Gudxë' gubáz lá'ayi na' neda', gunnë': "¿Bizx que rubáninu'? Uzéajni'ida' li' lë na' nagachi', le rulu'i ca naca nigula ni, enca' le rulu'i ca naca böa' sínia' na' dxíanu-ba', böa' na' dxíagaca gadxi ícjaba', en chi lúzuba'.

8 Böa' sínia' na' bilé'enu' guzóaba' zí'alö, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacuá' luyú cabí nazúajgaca láguequi lu guichi que yöl-la' na' bán, le buzúajë' Dios dza ni'te quez cate' si' gata' yödzölió. Cate' ila'lé'eni böa' sínia' na' guzóaba' zí'atëlö, pero biti' zóaba' na'a, ulu'bani tu' nubanba'.

9 'Lë ni naca tu le uzéajni'i nu gaca tséajni'i: Gadxi ícjaba' na' tu'lu'i gadxi gu'ado' gapa rö'önu nigula na'.

10 Lësca' caní gadxi ícjaba' na' tu'lu'i gadxë' bönni' ta'nná bë'ë. Gáyu'ë bönni' ni chigudödi quégaquië'. Tuë' bönni' ni rinná bë'ë na'a, ate' ia'tuë' biti' ridxíninë', pero cate' guidë', inná bë'ë tu chí'ido'osö.

11 Böa' sínia' na' guzóaba', pero biti' zóaba' na'a, rulu'i tu bönni' izxunu', inná bë'ë. Nunë' tsözxön bönni' gadxi na', ate' tödi ni nítie' tsaz.

12 'Chi lúzuba' na' bilé'enu' tu'lu'i chië' bönni' ila'nná bë'ë. Biti' ta'zí'ininë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bë'ë tsözxön len böa' sínia' na'.

13 Chië' bönni' ni, lébisö nácagaquië', ate' ulu'dödë' yöl-la' unná bë' quégaquië', en le nazí' lu ná'agaquië' lu ná'aba' böa' sínia' na'.

14 Ila'díl-lalenë' Bönni' na' náquië' Bö'cu' Zxíla'do', pero Lë' ucul-lë' légaquië', tu' náquië' Xángaca yúgu'të nupa nácagaca xan, en náquië' Bönni' rinná bé'enë' yúgu'të nupa ta'nná bë'. Nupa nacuá'len Lë', bulidzë' Dios léguequi, en guröë' léguequi, ate' tsaz dá'gaca Lë'."

15 Gubáz lá'ayi na' gudxë' ca' neda', gunnë': "Yugu' nísado' na' bilé'enu' gapa ni' rö'önu nigula udá dzaga na', tu'lu'i bönachi yugu' yödzö, en yugu' bönachi izá'a, en bönachi tu'i yugu' didza' yübölö, en bönachi yugu' luyú.

16 Chi lúzuba' böa' sínia' na' bilé'enu', en tu'lu'i chië' bönni', biti' ila'lé'enë'-nu nigula udá dzaga na' dxi'a, ate' ulu'cá'anë'-nu cá'asö, en xiguídisö. Ilahuë' xipéla'nu, en ulu'zégui'ë-nu len guí'.

17 Dios uchízië' icja ládxi'do'gaquië' chië' bönni' na' le gun ga ilunë' ca rë'ëni quézinë' Lë', ate' ilácagaquië' tuz, en ulu'dödë' yöl-la' unná bë' quégaquië' lu ná'aba' böa' sínia' na' para gaca ca rnna xtídzë'ë.

18 Nigula na' bilé'enu'-nu rulu'i yödzö zxön na' rinná be'e nupa ta'nná bē' yödzölió ni."

18

Riguinnaj yödzö Babilonia

1 Gudödi na' bilé'eda'-nē' ia'tüē' gubáz lá'ayi ruhuötjē' rirúajē' yehua' yubá, en dē lu nē'ē' yöl-la' unná bē' zxön, ate' guyēpi yösa bení' luyú ni'a que yöl-la' bení' queē' gubáz lá'ayi na'.

2 Bē'ē' zidzaj didza' gubáz lá'ayi na', gunnē':
 ¡Chibiguínnaj! ¡Chibiguínnaj Babilonia, yödzö zxön na'!
 ¡Chiböáca xilataj tu' xihui', en xilátjagaca bö' xihui' tun ditaj bönachi!
 ¡Yugu' biguínni xitsiní', en yugu' biguínni xihui' tu'zóaba' xilátajgacaba' ni'!

3 Caní guca que yödzö na' ni'a que le gulún bönachi nacué' ni'. Gulunē' ga gulún bönachi yúgu'tē yödzö ca nácagaca le ta'zēsö ladxi' le ruá' dö'.

Nupa ta'nná bē' luyú yödzölió gulunlen légaquiē' le ruá' dö', ate' guta' yöl-la' tsahui' quégaquiē' bönni' to'o tuti' nacué' yödzölió

tu' guyánda' yugu' le nazaca' gula'zē ladxi' bönachi ni'.

4 Ní'irö biyönda' ruí' didza' ia'tú nu zoa yehua' yubá, rnna: Guli'ruáj lu yödzö na', libí'ili' néquili' quia' para cabí gunli' dul-la' tsözxön len légaquiē', en para cabí quí'í sáca'li' le gaca quégaquiē'.

5 Nayánda' dul-la' nabága'gaquiē', en chinayasa nadxín caz lúzxiba, pero Dios röjnenē' le ruá' dö' núngaquiē'.

6 Buli'bí'í quégaquiē' ca na' gulunē' queéli'.

Buli'bí'í quégaquiē' chopa cō' tsca le gulunē'.

Buli'bí'í quégaquiē' chopa cō' tsca le naca xihui' gulunē' queéli'.

7 Guli'gún ga ila'guí'í ila'záquiē', en ila'bödxi yéché'ē' tsca guca yöl-la' ba, en yöl-la' zxön guluí'í cuíngaquiē'.

Ta'zá ládxi'gaquiē', ta'nnē':

Rö'ötu' ni, rinná bē'ētu'.

Biti' nácatu' uzēbi, en catu caz cödxi yéchi'tu'.

8 Que lē ni na', tu dzasö ila'dxín quégaquiē' le ila'guí'í ila'záquiē', yöl-la' guti, en yöl-la' ribödxi yechi', en yöl-la' ridún. Ilégiē' lu guí', tu' napa cazē' yöl-la' huáca zxön Xanru' Dios. Lē cazē' usiúdxē' quégaquiē'.

9 Ní'irö gunnē': "Ila'bödxi nupa ta'nná bē' luyú yödzölió, en gulún le ruá' dö' tsözxön len légaquiē', en bulu'zí' xibé le nequi

quégaquië'. Ila'bödxë', en ila'bödxí yéché'ë cate' ila'lé'enë' dzön que yödzö zxön na' régui.

¹⁰ Zi'tu' zí'tu'sö ila'cu'ë tu' iládxinë' ca gaca xíguia' le gaca que yödzö na', ate' ila'nnë': ¡Bica' bayechi' Babilonia, yödzö zxön ni, le gúcada' lo! ¡Tu dzasö guca xíguia' que!"

¹¹ Ní'irö gunné': "Ila'bödxë' ca' bönni' to'o tuti' nacu'ë yödzölió, en ila'bödxí yéché'ë ni'a que yödzö na' tu' cabirö soa nu ga'u bi ilúti'ë ni'."

¹² Cúnturö nu ga'u ni':

Le néquiguequini oro, en plata,
 en yugu' guió'j zaca', en yugu' bugá,
 en yugu' lari' nazáca'da', en lari' xiná chul-la,
 en lari' dxí'ado', en lari' xiná guí'ido'os,
 en yugu' yaga rilá' zxixi,
 en le néquiguequini dxita nazáca'da',
 en le néquiguequini yaga nazáca'da',
 en le néquiguequini guië cobre,
 en le néquiguequini guië,
 en le néquiguequini guió'j jara.

¹³ Cúnturö nu ga'u ni':

Canel, en yugu' le rilá' zxixi, en yalaj,
 en le rilá' zxixi que mirra, en que yöj olíbano,
 en xisi uva nál-la, en le naca za,
 en yiözja dxí'ado', en zxoá' xtila,
 en yugu' búrrodo', en yugu' bö'cu' zxila',
 en yugu' böa', en yugu' carreta,
 en yugu' bönni' huen dxin, en ia'bal-la bönachi.

¹⁴ Nupa na' to'o tuti' ilé légaquië', ila'nná:

Nadúagaca le guzé ládxi'li'.
 Chigudödi quégaca yöl-la' tsahui',
 en le náca'gaca lachi queéli',
 ate' bíti'rö idzölili' léguequi.

¹⁵ Ní'irö gunné': "Ila'bödxë' bönni' to'o tuti' na', tu' guta' quégaquië' yöl-la' tsahui' tu' gulúti'ë lu yödzö na', ate' ila'cu'ë zí'tu' zí'tu'sö tu' iládxinë' ca gaca xíguia' le gaca que yödzö na', en ila'bödxí yéché'ë."

¹⁶ Ila'nnë':

¡Bica' bayechi' yödzö ni guca zxön!
 Guca ca tu nigula ná'cunu lari' nazáca'da',
 en lari' xiná chul-la, en lari' xiná guí'ido'os,
 en nazi'i biquitaj queënu le néquiguequini oro
 en le néquiguequini guió'j zaca', en yugu' bugá.

¹⁷ Tu dzasö guniti yöl-la' tsahui' que yödzö ni.

Ní'irō gunnē': "Yúgu'tē bönni' xan barco, en nupa nacuá' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'ë zí'tu' zí'tu'sö."

¹⁸ Cate' ila'lé'enē' dzōn que yōdzō na' régui, ila'bōdxē', en ila'nnē': "¿Bízxilō yōdzō guca zxōn ca naca yōdzō ni?"

¹⁹ Ní'irō gunnē':

Ulu'dxié' bëchtō ícjagaquiē'.

Ila'bōdxē', en ila'bōdxi yechē'ë, ila'nnē'.

¡Bica' bayechi' yōdzō ni guca zxōn!

Yöl-la' tsahui' que yōdzō ni ben ga guta' yöl-la' tsahui' quégaca yúgu'tē nupa nácagaca xan barco lu nísado'.

Tu dzasō guniti yōdzō ni.

²⁰ Buli'dzeja ca gaca que yōdzō ni, libí'ili' zóali' yehua' yubá, enca' libí'ili' néquili' queë' Dios,

libí'ili', bönni' gubáz queë',

en libí'ili', bönni' ruí'ili' didza' uláz queë'.

Buli'dzeja, tu' chiguchúguiē' Dios que yōdzō ni

ni'a que bi gulún queëli' nupa nacuá' lu yōdzō ni.

²¹ Ní'irō tuē' gubáz lá'ayi nál-la buchisē' tu guiōj zxōn le naca ca tu guichi riyētu, ate' gurú'unē' le lu nísado', gunnē':

La' canísō gaca que yōdzō Babilonia,

tu' iguínaj yōdzō na' guca lo,

ate' bíti'rō nu udzōli le.

²² Bíti'rō nu yōni lu yōdzō na' nupa ta'guínni lē'e le rul-la,

en calēga nupa tu'cōdxi gui

en calēga nupa tu'cōdxi lúzuba' böa' bēdxi.

Bíti'rō udzōli bönni' huen dxin ni',

en bíti'rō yōni bö rigú'u le rutu ni'.

²³ Bíti'rō uzení' nitú guí' lu yōdzō na',

en bití' yōni chí'ë bönni' rutsaga nē'ë ni',

en calēga chí'ibi' bi'i nigula rutsaga ná'abi'.

Caní gaca sal-la' nácali' lo, libí'ili' rá'uli', en rúti'li' lu yōdzō ni,

en guzxi' yé'eli' bōnachi idútē yōdzōlió len yöl-la' gudzá' queëli'.

²⁴ Lu yōdzō ni gulaj xichōngaquiē' bönni' gulu'ë didza' uláz queë' Dios,

en xichōngaca nupa néquiquequi queë' Dios,

enca' xichōngaca yúgu'tē bōnachi yōdzōlió,

tu' bétigaca nupa nacuá' yōdzō ni léguequi.

19

¹ Gudōdi lē ni biyōnda' tuí'i zidzaj didza' bōnachi zían nacuá' yehua' yubá, ta'nná:

¡Yöl-la' ba Dios! ¡Yöl-la' rusölá runē',

ate' yöl-la' zxōn, en yöl-la' unná bē' napē' Dios queëru'!

² ¡Naca idútē li, en tsahui' ca rusiúdxē'!

¡Guchúguiē' que yōdzō na' naca ca tu nigula udá dzaga,

en quégaca bönachi lu yödzö na' ila'niti tsaz!
 ¡Gulún ditaj bönachi yödzölió tu' nözi le ruá' dö' guluné!
 ¡Dios buzí' lëbë' légaquië'
 tu' gulútië' yugu' huen dxin queë'!

³ Leyúbölö gula'nnë': "¡Yöl-la' ba Dios! ¡Cuéntica'sö dzön ga régui yödzö na'!"

⁴ Idapa uru'ë bönni' gula ni' bulu'tsaga lógaquië' lu yu tsözön len idapa nupa ni' nabángaca, en ta'yéaj ládxi'gaquië' Dios, Bönni' rö'ë lataj lo queë'. Gula'nnë': "¡Ca' gaca! ¡Yöl-la' ba Dios!"

⁵ Ní'irö biyönda' ruí'i didza' tu nu zoa lataj lo na', rnna:
 ¡Guli'cu'ë Dios queëru' yöl-la' ba
 yúgu'tëli' runli' xichiné', libí'ili' na' rádxili' Lë',
 nácali' bönachi cá'asö, en bönachi lo!

Laní que yöl-la' rutsaga na' queë' Bönni' náquië' Bö'cu' Zxíla'do'

⁶ Biyönda' ca' nu ruí'i zidzaj didza', le biyön ca riyön cate' tuí'i didza' bönachi zían, en biyön ca' ca riyön ga ridödi tu yegu zxön, o ca riyön cate' rinnë guziú', ate' rnna:

¡Yöl-la' ba Dios tu' risí lahuë' rinná bë'ë!
 ¡Napa cazë' yöl-la' huáca!

⁷ ¡Ral-la' udzeja ládxi'ru', en uzí'iru' xibë',
 en cú'uru'-në' yöl-la' ba

tu' chibidxín dza laní que yöl-la' rutsaga na'
 queë' Bönni' na' náquië' Bö'cu' Zxíla'do'!

¡Si' lu në'ë Cristo nupa néquiguequi queë'!

¡Chinabá'a queëbi' bi'i utsaga ná'alénbi' Lë'!

¡Nácabi' le ruluí'i nupa na' néquiguequi queë'!

⁸ ¡Dios ru'ë-bi' lataj gácubi' lari' nazáca'da'
 le naca idú, en rëpi yösa bení'!

Lari' nazáca'da' na' ruluí'i le naca tsahui' núngaca nupa néquiguequi queë' Dios.

⁹ Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do'!"

Gudxë' ca' neda': "¡Yugu' didza' idútë li ni ru'ë didza' Dios cazí!"

¹⁰ Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca nácagaquië' böchi' luzó'o nazí' lu ná'agaquië' le naca idútë li ca naca queë' Jesús. ¡Guyéaj ládxe'ë Dios!"

Nupa tuí'i didza' uláz queë' Dios, tuí'i didza' le naca idútë li ca naca queë' Jesús.

Bönni' dxíë'-ba' böa' chiguichi

11 Ní'irö bilé'eda' nayalaj lúzxiba, ate' buluí'i loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ruí'i Didza' Le Nácatë. Caní lë' tu' ruchi'a rusöröë' ca naca le naca idútë li, enca' caní tsejë' gudil-la.

12 Rëpi yösa bení' guiój lahuë', le nácgaca ca guí', en dxíagaca icjë' zían le néquiguequini oro. Nazúaj lahuë' tu le lë', le cuntunu nu nözi, pero tuzë' Lë' nözinë'.

13 Nácuë' tu lari' në'aj rön, en lë' ca' "Nu Naca Xtídzë'ë Dios."

14 Røjnógaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en nácgacaquië' lari' nazáca'da', le naca chiguíchido'os, en bití' naca bösaj.

15 Rirúaj ru'ë le naca ca tu guíë tuchi' le gúninë' zi' bönachi yugu' yödzö. Inná bé'enë' légaquië' len tu xiyaga guíë, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'.

16 Nazúaj lu lari' nácuë', enca' lu xigatsjë' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Nácgaca Xan."

17 Ní'irö bilé'eda'-në' tuë' gubáz lá'ayi zuínë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rnnë': "¡Gulí'dá, bulí'dubi ga ni gáguli' laní zxön queë' Dios!

18 Gáguli' xipéla'gaca nupa ta'nná bë', en xipéla'gaca nupa ta'nná be'e bönni' røjáquië' gudil-la, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía légacaba', en xipéla'gaca yúgu'të bönachi, nupa bití' nadó'ogaca, en nupa nadó'ogaca, nupa nácgaca cá'asö, en nupa nácgaca lo."

19 Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' røjáquië' gudil-la guizxi yu quégaquië', nudúbigaquië' para ilúnlenë' gudil-la Bönni' dxíë'-ba' böa' chiguichi, dzágagaca Lë' ni'a në'ë guizxi yu.

20 Bidzunba' böa' sínia' na', enca' bönni' na' bë'ë didza' uláz queëba', bönni' na' benë' yugu' le nácada' bë' loba', en guzxi' yé'enë' nupa ni' guluí'i lataj nu uzúaj láhuiguequi lë na' naca bë' dá'gaca lëba', en gula'yéaj ládxi'gaca budó' queëba'. Böa' sínia' na', enca' bönni' na' bë'ë didza' uláz queëba', gula'ru'unë' léguequi nabángacasö ca' ga rö'ö guí' zxön le réguien lë na' ruzégui'da'.

21 Bönni' na' dxíë'-ba' böa' chiguích bëtië' yúgu'të nupa na' gudá'gaca léguequi len guíë tuchi' na' rirúaj ru'ë, ate' bulú'huöljaba' yúgu'tëba' böa' na' ta'daba' lúzxiba, tu' guláguba' xipéla'guequi.

20

Chi gayuá' iz

¹ Gudödi læ ni bilé'eda' ruhuötjè' tu gubáz lá'ayi, zè'è yehua' yubá, en zönè' zxi'ini guié que lataj chul-la, ate' nu'è tu du guié yödx.

² Guzxönè'-ba' bëla zxon xitsiní' na', nácaba' bëla guzóaba' dza ni'te, bëla na' læba' Tu' Xihui', enca' Satanás, ate' béguè'è-ba', en bucá'anè'-ba' caní chi gayuá' iz.

³ Yöjchú'unè'-ba' lataj chul-la, en busayjè' lataj na', ate' budé'è tu le riguela' le rusayaj lataj na' para cabirö si' yé'eba' bönachi yugu' yödzö ga izá'arö chi gayuá' iz na', ate' tödi ni' ralla' yédxiba' tu chí'ido'.

⁴ Ní'irö bilé'eda' yugu' lataj gapa ta'bö' nupa ta'nná bë', ate' nupa bila'deli' ulu'chi'a ulu'sörö le raca ta'bö' yugu' lataj na'. Bilé'eda' ca' yugu' bö' gulaca caz bönachi bulu'rixè' yénguequi yugu' bönni' bití' nácagaquiè' tsahui' tu' gulún ba nali' queè' Jesús, en tu' gulún libán que xtídzè'è Dios. Yugu' bönachi ni bití' gula'yéaj ládxi'gaca böa' sínia' na', en budó' queéba', en bití' gulu'i lataj nu uzúaj ra' xigáquequi, o lu në'eguequi læ na' naca bë' nu da' læba'. Bulu'bán nupa ni lu yöl-la' guti, ate' gula'nná bë'len Cristo chi gayuá' iz,

⁵ pero ia'zica'rö bönachi nátigaca bití' bulu'bán. Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö.

⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö bití' bi gaca gun quéguequi, pero ilácagaca bixúz queè' Dios, enca' queè' Cristo, ate' ila'nná bë'len Lè' chi gayuá' iz na'!

⁷ Cate' izá'a chi gayuá' iz na', ulu'sanè' Satanás ga na' nadzún.

⁸ Urúaj Satanás, en tsöjzxi' ye'e bönachi yugu' yödzö nacué' idapa la'a yödzölió. Si' ye'e ca' bönachi yödzö Gog, en yödzö Magog, ate' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxon.

⁹ Guizxi yusö gula'dödè' idútè' luyú, ate' gula'cu'è læ'ajlö lataj ga na' nacué' bönachi néquiquequi queè' Cristo, le naca yödzö na' nadxí'inè' Dios. Ní'irö benè' Dios ga böxaj guí' le birúaj yehua' yubá, le buzegui' légaquiè'.

¹⁰ Tu' xihui' na' nazí' ye'e légaquiè', yöjchú'unagaquiè' le ga rö'ö guí' zxon que læ na' ruzégui'da', ga na' chizóaba' böa' sínia' na', enca' bönni' na' bë'è didza' uláz queéba'. Ila'gu'i ila'zaca' ni' rëla, en te dza yúgu'tè iz zá'gaca.

Ta'dxin bönachi lahuè' Dios ga rö'è ruchi'a rusöröè'

11 Ní'irö bilé'eda' tu lataj lo chiguichi, en bilé'eda' ca' Nu rö'ö ruchi'a rusöröë' lataj na'. Lahui' lo Nu ni gula'nítitë yödzölió, en lúzxiba, ate' bíti'rö budzöli xilátjaguequi.

12 Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinë' lahuë' Dios. Gula'yálaj guichi, en gualaj ca' ia'tú guichi ga na' nazúajgaca lágaca nupa nadéli'gaca yöl-la' na'bán idú. Buchi'a busöröë' Dios nupa na' chinátigaca tsca naca le nazúaj yugu' lu guichi na', lë na' gulúngaca.

13 Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá' gapa ni', ate' buchi'a busöröë' Dios tu tu tsca naca le gulúngaca.

14 Ní'irö yöjtsázagaca yöl-la' guti, en lataj chul-la ga ni' rö'ö guí' zxon le naca lataj que yöl-la' guti le raca burópilö.

15 Nupa bití' nazúajgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

21

Tu lúzxiba cubi, en tu luyú cubi

1 Gudödi na' bilé'eda' tu lúzxiba cubi, en tu luyú cubi, tu' chigudödi quégaca lúzxiba na', en luyú na' gula'cuá' zí'alö. Bíti'rö dë nísado'.

2 Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoë' Dios, en chinabá'a que ca nabá'a queébi' bi'i nigula chizóa utsaga ná'alénbi' tu bönni'.

3 Biyönda' ruí'i didza' nu rnna yehua' yubá: "¡Buli'yútsöca'! ¡Ga zoë' Dios zóalen bönachi! ¡Sóalenë' léguequi, ate' léguequi ilácagaca bönachi queé'! ¡Dios caz sóalenë' léguequi, en gáquië' Dios quéguequi!

4 Dios uzxië' nisa ribödxí zoa guiöj lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui'i saca', tu' chigudödi quégaca lë na' gulaca zí'alö."

5 Ní'irö Nu na' rö'ö lataj lo ni' gunná: "¡Buyútsöca'! ¡Yúgu'të ruína' cubi!"

Gudxi ca' neda': "¡Buzúaj lu guichi lë ni, tu' naca idütë li didza' ni, en naca löza!"

6 Ní'irö gudxi neda': "¡Chinaca caz! ¡Neda' naca' Nu zoa zí'atëlö, enca' Nu röjsete ca naca le risí lo, en le ruúdxitë! ¡Nu ribidxi nisa, neda' guna' ga guí'aj nisa na' runna yöl-la' na'bán!

7 Nupa ila'deli' lu le raca yödzölió, gaca quéguequi yúgu'të lë ni. Neda' gaca' Dios quéguequi, ate' léguequi ilácagaca zxi'ini caza',

8 pero nupa tadxi, en nupa bití' ta'yéajlë' neda', en nupa nácagaca xihui', en nupa tuti bönachi, en nupa tun le bití' naca

tsahui', en nupa nácagaca udzá', en nupa ta'yéaj ládxi'gaca budó' guióǵ budó' yaga, en yúgu'tè nupa ta'zí' yé', chizóa ribóza xilátjaguequi lu guí', ga ni' rō'ō guí' zxōn que lè na' ruzégui'da', lè na' naca yöl-la' guti le raca burópilō."

Yödzo Jerusalén le naca cubi

⁹ Ní'irō tué' gubáz lá'ayi nababē' gadxē' gubáz lá'ayi ni' gula'zōnē' gadxi zxíga'do' yúdxugaca gadxi yödzo'hué' yójsétegaca, bidē' ga zoa'. Gudxē' neda': "¡Gudá ni! ¡Ulu'ida' li' bi'i nigula na' si' utsaga ná'alēnbi' Bönni' na' náquiē' Bō'cu' Zxíla'do'!"

¹⁰ Guzóalēnē' Dios Bō' Lá'ayi neda', ate' guchē'ē gubáz lá'ayi na' neda' tu lu guí'a sibi, en buluí'inē' neda' yödzo lá'ayi Jerusalén, ruhuótaj, rirúaj yehua' yubá ga zoē' Dios.

¹¹ Yödzo ni rēpi yōsa bení' tu' zóalēn le yöl-la' bení' queē' Dios. Rēpi yōsa bení' ca rēpi yōsa bení' tu' guióǵ nazáca'da' ca naca guióǵ guí'do'os nazí'i le jaspe. Naca yödzo na' yení'ido' ca naca guióǵ jara.

¹² Zoa tu zō'ō zxōn, en sibi idú gásibi'ilō yödzo na'. Lē'e zō'ō na' nacué' chinnu gapa nu riyaza. Ra' gapa nu riyaza na' nacué' chinnuē' gubáz lá'ayi tapa chi'ē. Tu tu ga nu riyaza na' nazúaj tu tu lágaca idxinnu cō' di'a dza zxí'ini xi'sóē' Israel.

¹³ Lē'e zō'ō le ruyú saca' ga rilén gubidza nacué' tsonna gapa nu riyaza, en saca' ga za' bō' ziaga nacué' tsonna gapa nu riyaza, en saca' tsólá'a ga ridōdi gubidza beo' ziaga nacué' tsonna gapa nu riyaza, en saca' ga ribía gubidza nacué' ca' tsonna gapa nu riyaza.

¹⁴ Zxan zō'ō que yödzo na' nacué' chinnu xilibi zō'ō, ate' lē'egaca xilibi zō'ō na' nazúajgaca lágacuiē' idxínnutē' bönni' gubáz queē' Bönni' na' náquiē' Bō'cu' Zxíla'do'.

¹⁵ Gubáz lá'ayi na' ruí'ilenē' neda' didza' zōnē' tu yaga urixi le néquini oro para urixē' tsca naca yödzo na', en tsca nácagaca gapa nu riyaza, en tsca naca zō'ō que.

¹⁶ Yödzo na', lédi'i nácagaca idapa la'a. Lédi'i naca yöl-la' tunna que, en yöl-la' blaga' que. Len yaga na' burixē' tsca naca yödzo na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que.

¹⁷ Burixē' ca' yöl-la' yödx que zō'ō na', naca tu gayuá' yu' tapa-un dxita, tsca naca dxita que na' bōnachi, lè na' rurixinē' gubáz lá'ayi na'.

¹⁸ Zō'ō na' néquini guióǵ jaspe, ate' yödzo na' néquini órotēz, le naca yení'ido' ca naca guióǵ jara.

¹⁹ Yugu' xilibi zō'ō que yödzo na' nazí'gaca biquitaj guióǵ nazáca'da'gaca.

Xilibi zō'ō zí'alō néquini guióǵ jaspe.

Le buropi néquini guiõj zafiro.
 Le bunnì néquini guiõj ágata.
 Le budapi néquini guiõj esmeralda.
²⁰ Le guyu' néquini guiõj ónice.
 Le buzxopi néquini guiõj cornalina.
 Le igadxi néquini guiõj crisólito.
 Le izxunu' néquini guiõj berilo.
 Le igá néquini guiõj topacio.
 Le idxí néquini guiõj crisoprasa.
 Le idxinéaj néquini guiõj jacinto.
 Le idxinnu néquini guiõj amatista.

²¹ Chinnu gapa nu riyaza na' ta'yáyjani chinnu bugá. Tu tu ga nu riyaza na' riyáyjani tuz bugá. Luyú la' nõza lo que yõdzõ na' néquini órotëz, le naca yení'ido' ca naca guiõj jara.

²² Biti' bilé'eda' tu yudo' lu yõdzõ na', tu' náquië' Xanru' Dios yudo' que, napa cazë idútë yõl-la' unná bë', en lësca' caní náquië' Bönni' náquië' Bö'cu' Zxíla'do', náquië' yudo' que yõdzõ na'.

²³ Biti' run bayudxi tsení'gaca gubidza, en beo' lu yõdzõ na', tu' uzení' yõl-la' bení' queë' Dios lu yõdzõ na', ate' lësca' Bönni' náquië' Bö'cu' Zxíla'do' náquië' le uzení' ni'.

²⁴ Bönachi yugu' yõdzõ, nupa nulágaca, ila'dá lu bení' que yõdzõ na', ate' yugu' bönni' ta'nná bë'ë yõdzõlió idiguá'agaquië' yõl-la' tsahui' quégaquië' lu yõdzõ na'.

²⁵ Catu caz tsáyajgaca gapa nu riyaza lu yõdzõ na' lahui' dza, ate' lataj na' catu caz gaca rëla.

²⁶ Bönachi yugu' yõdzõ idiguá'agaquië' ni' le nácagaca lesaca', en yõl-la' tsahui' quéguequi.

²⁷ Tu le ruá' dö' biti' ca' tsaza ni', en calëga tu le naca xihui', en calëga nu rizi' yë', pero tsázagacasõ ni' nupa nazúajgaca láguequi lu guichi queë' Bönni' náquië' Bö'cu' Zxíla'do', ga na' nazúajgaca lágaca nupa nadéli'gaca yõl-la' na'bán.

22

¹ Ní'irõ gubáz lá'ayi na' buluí'inë' neda' tu yegu yení'ido', le naca nisa yegu le runna yõl-la' na'bán. Rëpi yõsa bení' yegu na' ca rëpi yõsa bení' guiõj jara. Rirúaj yegu na' lu lataj lo ga rõ'ë Dios, en ga rõ'ë ca' Bönni' náquië' Bö'cu' Zxíla'do'.

² Rizá' yegu ni gatsaj láhui'lõ nõza lo que yõdzõ na'. Tsölá'a huéaj ra' yegu na' rõ'õ tu yaga le runna yõl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'gaca yaga na' nácagaca le tu'ún bönachi yugu' yõdzõ.

³ Biti' soa ni' nitú le dxía dö'. Soa lu yõdzõ na' lataj lo ga rõ'ë Dios, enca' ga rõ'ë Bönni' náquië' Bö'cu' Zxíla'do', ate' yugu' huen dxin queë' ila'yéaj ládxi'gaquië' Lë'.

⁴ Ila'lé'enë' lahuë' Lë', ate' le nazí'i Lë' nazúaj ra' xigágaquië'.

⁵ Biti' gaca rëla ni', ate' nupa nacuá' ni' biti' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quegaquië'. Nupa nacuá' ni' ila'nná bé'tica'sö.

Chizóa huödë' Cristo

⁶ Ní'irö gubáz lá'ayi na' gudxë' neda', gunné': "Didza' ni naca idútë li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusöl-lë'ë gubáz lá'ayi queë' para ulu'inë' yugu' huen dxin queë' le ral-la' gácatë.

⁷ Caní rnnë' Jesucristo: ¡Chizóa huöda'! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

⁸ Neda', Juan, biyönda', en bilé'eda' yugu' lë ni. Gudödi biyönda', en bilé'eda' yugu' lë ni, buzóa zxiba' xini'ë gubáz lá'ayi na' bulu'inë' neda' yugu' lë ni para guna' lë' zxön.

⁹ Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu'li', en ca nácagaquië' böchi' luzó'o na' tu'ë didza' uláz queë' Dios, enca' ca nácagaca yúgu'të nupa tun ca rnna le nazúaj lu guichi ni. ¡Ben zxön Dios!"

¹⁰ Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni.

¹¹ Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dxi'a, gúntica'sö dxi'a, ate' nu nequi quez queë' Dios, guéquitica'sö quez queë'."

¹² Rnnë' Jesús: "¡Chizóa huöda'! Nu'a lu na'a le nadéli'gaca bönachi, ate' ubi'a que queë'guequi tsa naca le gulúngaca.

¹³ Neda' naca' Nu zoa zí'atëlö, enca' Nu röjsete, ca naca le risí lo, en le ruúdxitë. Naca' ca' Nu run ga risí lo, en Nu rusiúdxí."

¹⁴ Ní'irö gunné': "¡Bica' ba nupa nayari le nácugaca, en tun le naca dxi'a! ¡Nazi'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzo na'!

¹⁵ Nupa nácagaca xihui', en nupa nácagaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guiöj budó' yaga, en nupa ta'yaza ládxi'gaca ta'z'í yë' ila'cuá' ní'ilö ra' yödzo na'.

¹⁶ Neda', Jesús, gusöl-la'a gubáz lá'ayi quia', ate' bulu'inë' libí'ili' yugu' lë ni, libí'ili' na' dzágalí' yugu' cö' bönachi quia'. Neda' naca' di'a dza queë' David, enca' xzí'ini xi'sóë'. Naca' ca' bölaj hui sila."

¹⁷ Tu'ë didza' Dios Bö' Lá'ayi, enca' bi'i nigula utsaga ná'alénbi'-në' Bönni' náquië' Bö'cu' Zxíla'do', ta'nnë': "¡Gudá!"

Nu riyöni didza' ni ral-la' inná: "¡Gudá!"

¡Nu ribidxi nisa, en nu rizë ladxi' le, ral-la' guídi, en gu'aj nisa le runna yöl-la' na'bán!

18 Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni.

19 Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj quéguequi lu guichi ni.

20 Xanru', Nu run ba nalí quéguequi lë ni rnnë': "¡Ön! ¡Huödatea'!"

¡Ca' gaca! ¡Gudá, Xantu' Jesús!

21 Rinábida'-në' Xanru' Jesucristo uzá' ladxë'e queëli' yúgu'tëli'. ¡Ca' gaca!